

New Testament

Gbagyi Language

Gbagyi - Bible - New Testament

Matta	3	
Markus	62	
Luka	100	
Yohanna	165	
Atnu-tnuyi Abozhin	215	
Aromayi	271	
Akorintiyi I	301	
Akorintiyi II	331	
Agalatiyayi	350	
Afesusuyi	361	
Afilibiyi	372	
Akolosiyi	379	
Atasalunikayi I	386	
Atasalunikayi II	392	
Timatawus I	396	
Timatawus II	404	
Titus	410	
Filimon	414	
Aibraniyi	416	
Yakubu	437	
Bitrus I	445	
Bitrus II	453	
Yohanna I	458	
Yohanna II	466	
Yohanna III	467	
Yahuda	468	
Yohanna Bewyegye	471	

Gbagyi - Bible - New Testament

Matta

Matta 1

- ¹Yesu Kristi azakwoyi aye nu nyi, Dauda nugun n Ibrahim yi.
- ²Ibrahim bei zhin Ishaku dada nu Ishaku wa zhin Yakubu dada, Yakubu wa zhin Yahuda dada bedo n wa zajeyi.
- ³Yahuda wa zhin Perez dada n Zerah yi. Tamar nu bei zhin ba 'ya. Perez wa zhin Hazren dada; Hezron wa zhin Aram dada.
- ⁴Aram wa zhin Aminadaba dada, Aminadaba wa zhin Nahshon dada, Nahshon wa zhin Salmon dada.
- ⁵Salmon wa zhin Boaz dada, Rahab nu bei zhin wo 'ya. Boaz wa zhin Obed dada, Ruth nu bei zhin wo 'ya, Obed wa zhin Jesse dada.
- ⁶Jesse wa zhin Esu Dauda dada. Dauda wa zhin Solomon dada, Uriya nyikwo nu bei zhin owo 'ya.
- ⁷Solomon wa zhin Rohoboam dada, Rohoboam wa zhin Abija dada. Abija wa zhin Asa dada.
- ⁸Asa wa zhin Jehoshafat dada, Jehoshafat wa zhin Joram dada, Joram wa zhin Uziya dada.
- ⁹Uziya wa zhin Jotam dada, Jotam wa zhin Ahaz dada, Ahaz wa zhin Hezekiya dada.
- ¹⁰Hezekiya wa zhin Mannase dada, Mannase wa zhin Amon dada, Amon wa zhin Josiya dada.
- ¹¹Josiyi wa zhin Jokoniya dada n wa zaje yi (ama ba esa n na bei lo fyenu tnu-tnu nceyi n Babila nyi.)
- ¹²Nfyenu tnu-tnu avun, Jokoniya bei zhin Shetil dada nu, Shetil wa zhin Zarubbabila dada.
- ¹³Zarubbabila wa zhin Abiu dada, Abiu wa zhin Eliyakim dada, Eliyakim wa zhin Azor dada.
- ¹⁴Azor wa zhin Zadok dada, Zadok wa zhin Akim dada, Akim wa zhin Eliu dada.
- ¹⁵Eliu wa zhin Eliyazar dada, Eliyazar wa zhin Mattan dada, Mattan wa zhin Yakubu dada.

¹⁶Yakubu wa zhin Yusufu dada (wato Maryamu ba – Yesu Kristi Masifu 'ya).

¹⁷Nya kwo laka n Ibrahim koyi lo Dauda – Esu, a chala awo-cei-anyi nu. Kwa laka n Dauda Esu kwa lo fyenu tnu-tnu sa n Babila a chala awo-cei-anyi. A chala awo-cei-anyi n fyenu tnu-tnu sa kwoyi lo Kristi sa.

Alkawali Ebi Nya

¹⁸Abo deye ba nu zhin gaiciya tu n Yesu Kristi mama bo. Yusufu nu bei zhin woi bwa owo 'ya Maryamu. Ama to bai gye ajen, a gye wo gni n nuboyi Zafun Gyi-gyi-yi nya.

¹⁹Sai owo nugun-yi, Yusufu, ntu ge wo bo zhin be-fye-cezhi-yi nu, wa ye ntu ge wa ya wo fya, to wa dna wo vinyikwon.

²⁰Woye dna shawara zhin mi, Dagayi wa tnu n wo malaika yi n Yusufu aba, dna n nanu mi, wa gna woge, "Yusufu, Dauda nugun, to Iwo dna n Maryamu layi wa ze ho nyikwon, ntuge nubo n wo gni n cei nyi, Zafun Gyi-gyi-yi nya nu.

²¹Wo ba ma ebi nugbaya, Ho ba tu wo 'ye ge Yesu, (okwa wyega ge 'Zagniyi') ntu ge wo nu ba gni waza nba alaifi."

²²Deye kwo ba nu Shekwoyi beda n wo bei da nwo anabi 'gbe:

²³"Wo! Binyikwoi ba gni n nuboyi! Wo ba ma ebi nugbaya, aba yi wo 'ye Immanuel" (watau "Shekwoyi kun-sun lo yi").

²⁴Shi Yusufu bo kun agyewyi, wa zhin shi malaika Dagayi nya bei gna wo, wa Maryamu la wa ze 'wo nyikwo.

²⁵Ama ba to bo gye ajen har wa ebi nugbaya ma, Yusufu wa tuwo ye ge "Yesu."

Matta 2

Yesu Mama

¹Abo ma Yesu n Baitalami nu, n. Yahudiya kni, dna n Hirudus begyi-sa. Nsahi, abeyekpeyi bai kun n nyipyeyi kpe bwa (akpasu-wyeyekayi), babe Urushelima bai nyabo,

²"A Yahudawayi esu gni-na nna ma nyia? Ntuge yi ku gye owo kpasu n nyipyeyi kpe bwa, ya be ya ga wo mwa-mwa nu."

³Benya yi konu, kwa dami nsu Hiridus yi har Urushelima vinya ai wo abedeye gbogbo.

⁴Wa ye a Yahudawayi adini a tukwo da zhi. Wa nya ba ge, "Anabi bo ku aba wu na ba ma Masifu?"

⁵Ba gna, "E, N Baitalami nu, ntu ge enya nu anabi Mika bei ka.

⁶O ezhi biyi Baitalami nya, ho to zhin ezhi wyegbaci nya nu dna n Yahudan, ntu ge Gwamna ba gmi n ho nu wa gyi ebe tu n maza tukwo, a Israilayi’.”

⁷Hiridus a pmi wa tnu ga abeye-kpei fya ge ba be ba gye wo, wa nya ba esa bo nu ba gye kpasu cei. Wa gna ba ge,

⁸“Fye lo Baitalami fye zan ebi shin. N fya wo gye wye, fya be fya gna mi ntu ge ma lo mi ga wo mwa-mwa ce.”

⁹Shi a bo ku abo zo ba nya ba ku ka. Ho gye! Kpasu la je gmitu, n wu Baitalami.

¹⁰A daba n mwa!

¹¹Shi ba bei lo nyakun mi ba gye ebi n wo 'ya yi Maryamu, ba ya zhi ba ga wo mwa-mwa. Ba gu oba nyabwa ya, ba ga wo cauta, zinali, n tulale yi bedo n emi sundayi yi.

¹²Esa ba bo jeze lo ba kni, to ba lo Urushelima ba ga esu Hiridus nabarim, ntu ge Shekwoyi bo ku wu ba dna ena ge ba lo n zokwo do yi.

¹³Shi ba bo ku lo, malaika Dagayi nya wa be Yusufu aba dna ena nu, wa gna wo, “Laka ha la ebi n wo 'ya yi ha busi lo Masar. Ho la dna bwayi har esa nmiba gna ho ge ho jeze be, ntu ge esu Hiridus ye lo wa wu ebi ye.”

¹⁴Dna sukwoyi wa laka wa la Maryamu bedo n bei yi ba lo Masar.

¹⁵Ba fi n bwayi har Hiridus wa fi. Bo Dagayi bei da n anabi gbe, kwa ku nu, nge, “Ma yi Mi Nugun n Masar.”

¹⁶Shi Hiridus bo gye abeye-kpei to vi wo bedam, wa gyi minagyi. Wa tnu a soja, ba lo Baitalami nna zhi biyi yi nge ba wu ebi doho dohoyi n wo 'ye bei ku gun aba koi be kni. Wo bo dna kwo ngye shi abeye-kpeyi bo gna wo ge ba bo ya kpasi gye ce yi nu.

¹⁷Hiridus hali nukwoyi deye bo ku bo nu n anabi Irimiya beida,

¹⁸“A wo begye n Rama ebwi nya n bugba wun dnagmayi yi, Rahila woi ci bwi ntu wo abi bo, to woi wo atnazhin ntu ge ba ku fi.”

¹⁹Shi Hiridus bo la fi, malaika Dagayi nya wa be Yusufu aba n Masar dna ena nu,

²⁰Wa gna wo, “Laka ha la ebi nwo 'ya yi ba je ze lo Israila kni, ntu ge aza n ba bo ye ba wu ebi ye nyi, ba ku fi.”

²¹Wa laka wa la ebi n wo 'ya yi wa jeze lo a Israila yi 'kni.

²²Amma shi wo bo wo ge Akilos nu gyibe tu wo dada-Hiridus, wa wo dna to wa ye wa je lo bo m. Wa gwo pmagna n na nu, wa lo Galili 'kni.

²³Wa lo wa sase n 'zhi ai yi kwo Nazarati. Deye kwa nu anabi beda nge “A bei yi wo ge Nazarati yi.”

Matta 3

Yohanna Batizma-zhinyi Nla Wo Tnu-Tnu Ya

- ¹Bai ye fi n Nazarati, Yohanna Batisma zhinyi wa ya wa'azi zhin dna zhabui Yahudiya nya. Owo beda tukwo nu bonyi cici,
- ²"Fye fa a laifi, fya pmi be Shekwoyi aba ntu ge Shekwoyi ebe la ga be."
- ³Anabi Ishaya bo ku Yohanna tnu-tnu bo da aye n mwa begye kafin a mawo. Wa ka ge, "Mawwo begye n kalayi Idna n zhabui, 'Zhin Dagayi zokwo aba, la zokwo cefye cewo n wo ba be wa zan-zan tu'."
- ⁴Yohanna aje bo luluyi n lakumi jeyi nu, owo gigyi zun nya epa nu bei, woi pa n wo shin. Owo nyagyi bo zhin abigyi nu bedo n osu yi.
- ⁵Aza bai knu n Urushelima, n Yahudiya yi, n nazhi yi n ba she Urdun gnu, bai lo Yohanna aba n zhabui bai-wo wo wa'azi.
- ⁶Bai da ba alaifi woi zhin ba batisma n Urdun ela.
- ⁷Ama shi wo bo gye a Farisiyi n Sadukiya bai be ntu ge azhin ba batisma, wa nya ba bo. "Efyewa abi! Nyika gna fye ge fye ba pwo Shekwoyi minagyi n kwo belo nyi a?"
- ⁸Kafin a zhin fye batisma, tile fya wu ge fye ku alaifi fa fyei zhin be manayi.
- ⁹Fye to zhin shaula zhin ge fye kni-kniyi lo, ntu ge fye zhin a Yahudawayi Ibrahim abi m. Deye ta gni fye m. Shekwoyi n ikoyi lo wa zhin akuta ye ba ze a Yahudawayi.
- ¹⁰A la gbakun tu a zun shinwan doho-dohoyi ya n kwo to ga gyi-gyi m, a ba zun kwo ya a gyi ko 'na.
- ¹¹"Aza n ba ye abui, mi zhin ba batisma n nuwan yi, ama ozado be lo n wo du mi lo, owo abuada mi ta mi ma shin (mi ta mi ma la wo tnu-tnu m) owo nu ba zhin fye batisma n Zafun Gyi-gyi-yi bedo n ena yi.
- ¹²Wo bei gna awyi aje n akpalayi, wo gyi akpala ena n kwo ta shan wun, awyi 'wo fi n wo dobui."

Yesu Baptizma Zhin

- ¹³Avun Yesu wa gmi n Galili wa be Urdun ntu ge Yohanna wa zhin wo batisma.
- ¹⁴To Yohanna wa ye ntu ge wa zhin wo batisman, wa gna deye to wu lo dai-dai m, Emi nu ye batisma n ho aba.
- ¹⁵Ama Yesu wa gna, "Suku, zhin mi, ntu ge tile nu ma zhin enya n kwo bmiya." Yohanna wa ye wo batisma zhin bo sayi.

¹⁶N sayi-sayi yi shi a ɓo zo Yesu batisma zhin, wa gmi ɓe n nuwan. Eshe kwa guya, Zafun Shekwoyi nya kwa ɓe ngye lukpe kwa ya tu n wo.

¹⁷Begye kwa gmi n 'she kwa gna, "Emi Nugun ye-yei nu nyi, owo nu n mi bwa gmada woyi."

Matta 4

Yesu Jaraba Dna

¹A Avun Zafun Gyi-gyi-yi wa lo n Yesu yi n zhabui ntu ge Shetan wa dna wo jaraba.

²A nyipyeyi shinyi asukwo shinyi to woi gyi nyahon, mikun kwa wo gun n mwa.

³Jaraba zhinhi wa ɓe wa gna, "Ngye ho zhin Shekwoyi Nugun nu, gna akuta ye ɓa ze nyagyi."

⁴Yesu wa gna wo ge, "Awo! Shekwoyi beda gna yi ge nyagyi ta mi kwa gni aza wye-wyeyi m, sai dai ɓevi Shekwoyi beda nya."

⁵Shetan wa la wo wa lo Urushelima n woi, wa tu wo n aduwa-nyakun tukwo.

⁶"Gye agna," Shetan nu gna Yesu lonu, "ntu ge ha wu ge ho zhin Shekwoyi Nugun nu, ntu ge Shekwoyi beda gna ge, 'Shekwoyi ɓa tnu amalaika ɓa kna ho to ha wu ho hi m.' Ba ɓa knaho to ha lu hohin ya n na pma m."

⁷Yesu wa gna wo, "Aku ka, to mwi ho Shekwoyi n naɓo gbolon."

⁸N jesun Shetan wa lawo wa lo woi n 'pe yakwo tukwo, wa wu wo anyi 'be gbo-gbo, m ɓa bmiya-bmiya yi.

⁹"Miɓa ga ho ɓa vinya," shetan nu da lonu, "Ndai ha yashi ha ga mi mwa-mwa."

¹⁰Yesu wa sagyi wo ge, "Lobwayi, shetan, Shekwoyi beda gna, 'Ga ho Dagayi Shekwoyi mwa-mwa, owo gmanyi nu n ho ɓavi wobo.'"

¹¹Shetan wa lo wo nya, amalaika ɓe ɓa vi Yesu ɓo.

Yesu Wa Ya Wazi Zhin

¹²Esa Yesu ɓo wo ge ala Yohanna dna n kurkuku, wa fa Yahudiya 'kni wa lo Nazarati n Galili 'kni.

¹³Esa fyewyi wa lo Kafarnafum n wo vivi Galili nuwan-zundna yi vivi n Zebulun ɓedo Naftali yi.

¹⁴Deye ɓo ku ɓo nu n anabi Ishaya ɓo da:

¹⁵“Zebulun ’kni bedo Naftali ’kni yi, vivi n nuwan-zundna yi, ekni nkwo mwakpa n Urdun yi, Galili sunbwa nya aba nu abyedo sase nyi, (ba ku ze aba agmada nya).

¹⁶“Aza nba bei sase fi n wyegma baku gye buzagna dnagmayi. Ba bo sase fi n ’kni efi nya nu. Buzangna kwa kpeya da ba.”

¹⁷Tunyi n sayi yi, Yesu wa ya wa’azi zhin, “Fye fa a laifi fya pmibe Shekwoyi aba, ntuge Shekwoyi ’be la wo vi.”

¹⁸Nwiyihoyi woi zan-zan vivi n nuwan gbe-wato Galili nuwan zundna, wa gye eza nwo mado yi Siman (aje wo yi ge Bitrus) bedo Andarawus yi bai fi n ’ya bai wan abmiya na sayi, ntu ge ba bo zhin abmiya wan yi nu.

¹⁹Yesu wa yi ba, “Fye be n gnisun n miyi miaba wu fye shi fye ba wan aza.”

²⁰Ba fa oba asa n sayi-sayi yi ba gni lo n woi.

²¹Ba gyi abye fyewyi, wa gye azao ngun aba Yakubu n Yohanna yi n fi n ’ya n ba dada yi Zebedi, bai zhin asa aba, wa yi ba ge ba be ce.

²²N sayi-sayi yi ba fa ba tnu-tnu nba dada yi ba gni lo n woi.

²³Yesu wa zan-zan dna Galili ’kni ivinya, woi wu aza dna n Yahudawayi aduwan-nyakun, woi zhin wa’azi Nabari Manayi nya ntu Eshe ’bemi bo, woi ka anyasan yi doho-dohoyi pya gna.

²⁴Nabari owo abo wowoyi zhin nya, kwa gnami to ge n Galili gmanyi n, har anyasanyi bai kun abai gbo-gbo, n nabai mwakpa ngye Suriya. Nyasan doho-dohoyi, kwo a zafun nukwoyi nu, kwo tukwo la ba gmiya, kwo nahinu n bai fifiyi-wa ka ba gna vinya.

²⁵Aza yezhi n mwa begye ba viwo abaho-bahoi wa lo, aza ba kun n Galili, bedo azhi dnagmayi yi ngun awo, aza ba kun n Urushelima n Yahudiya yi har aza bai kun n Ur-dun kma.

Matta 5

Wazi Zhin Tu Npe

¹⁻² Nwiyihoi aza-yezhi ba be, wa laka wa lo epe sepa n wo abara yi wa sase wa ya ba nya wu.

³Wa gna, “Aza n ba gba bahim tukwo ba ku gode, ntu ge eshe ebemi zhin ba nya nu.”

⁴Aza nba n bugba zhi-zhiyi ba ku gode, ntuge a ba zhin ba atna.

⁵A hankuri zhin yi na tukwo gbayi yi ba ku gode ntu ge anyi vinya zhin ba nya nu.

⁶Agmada n aza aba n mikun gn ba, nuwan mikun yi wo ba n tu befyece bo gama nubwo bei ku ba fu.

⁷Agmada n aza aba n ba zhin be manayi n sun-sun gye yi, ntu ge aba gye bahin sun-sun.

⁸Agmada n aza aba nba bugba gyi-gyi-yi, ntu ge ba bei gye Shekwoyi.

⁹Agmada n aza aba n ba zan bugbafu shin, aba yi ba ge Shekwoyi abi.

¹⁰Agmada n aza aba na ga ba wahala ntu be manayi zhin bo, Eshe ebe mi zhin ba nya nu.

¹¹“Esa nu akpe fye aye nukwoyi, ai ga fye wahala, ai ce akata fi fye ntu ge fye zhin ma viyi nu-kwo bmiya lo.

¹²Fye zhin bugba bui-bui! A da fye, ntu ge lada dnagmayi shi lo kwoi pmi fye n 'she. Fye pa ge anabi kwo-kwoyi bo ku wahala sin lo nu ce.

¹³“Fye nu zhin sankpegye anyi nya, N fya fye dada ya, kniyi nu ba zhin anyi a? Efyehin nkasun a ba ya fye a kpe fye apita ntu ge fye to ye napma yi lon.

¹⁴Fye nu zhin buzangna anyi nya-ezhi n kwo kpe n 'pe koyi kna buzangna ya ga aza vinya ba gye.

¹⁵⁻¹⁶ Fye to so fye buzangna m. Fye fa kwa fun n aza vinya aba, n lonu 'za ba gye efye atnu-tnu manayi ba la fye Dada tu n wo dna n 'she nyi.

¹⁷“Mi ye fya kpe delili n kwa zhin miyi be. Mi to be ge ma wun Musa awa bedo anabi awyidnaye ya nun. Awo! Ma be ntu ge ma nu ba, ma wu n jesun ge ba zhin gaiciya nu.

¹⁸N mi bugba yi vinya, Ma gna fye, owa doho-dohoyi kwo ba gyi abye lo nu har kwa nu obo na ye ce yi.

¹⁹Ntu ce nu ezaho-zahoyi, n wa zun wyidna bi-biyi gna har wa wu azado lo nu, wo ba ze eza biyi dna ebe eshe nya. Ama aza nu ba wu Shekwoyi awyidna bai shi ba bwa, ba nu ba ze aza dnagmayi dna ebe eshe nya.

²⁰“Ama ma pma fye gna sai efye abo manayi zhin ba du a Farisiyawayi nya n na Yahudawayi abyeda yi, n to lo nu n, fye ta mi fya lo eshe ebe m!

²¹“Musa owa gna, ‘N ha wu eza, tile hafi n hohin’

²²Ama mi la nyado be, ma gna fye, kwo n ha gyi minagyi dna n ho puwa, ho la lo owa. Ndei ha yi ho nugundo ge, tukwo gbolo da, ho la lo wahala n kwo knunce a lo hoi n owa bokun. Ndei ha tu eza ekni ho la lo wahala anapyi nya.

²³“Ntu cenu kwo ho gni n bagadi aba ntu ge ha ga Shekwoyi sadaka, ha pa ge eho nugundo n bohoyi dna lo n womi n hoi,

²⁴Ha ho sadaka fa kpa, ha lo, fya ku eda zo, ha kpe Be ha ga ho sadaka.

²⁵Zhin wolo-wolo ha zo beda n ho nuwunyi yi kada walo n hoi na wadayi aba har a she ho ya dna n jalu.

²⁶N bo nu n ho ba dna sai ho ku agyiwye zo gba shi a tu ho sun.

²⁷“Musa owa a gna ‘To zhin anagbaya m.’

²⁸Ama ma ci ge, ezaho-zahoyi n wa shi nyikwoza awye nna shaakpe wye y, wo ku anagbaya lu zhin n woyi dna wo bugba mi.

²⁹Ntu ce nu, ndei oho wye kwo oho wye manayi nu n kwoyi-ba zhin ha wo shakpe, bikwo ya. Goma oho wye kwo wunya, n jdei nho ba lo anapyi n ho nayi vinya nyi.

³⁰Ndei oho bwa-kwo bwai-zhe nu-ba zhin ho ha zhin laifi, ha zun kwo ya Goma n kwo zun-zun ya yi n doyi n ho ba lo anapyi n ho nayi vinya nyi.

³¹“Musa owa gna ge, ‘Ndei ezaho-zahoyi ye wa gna ewo nyikwo ami, sai wa ga wo wasika amigna nya.’

³²Ama ma ci ge, eza n wa gna owo nyikwo ami, ndei anagbai zhin bo nu to n, wo la nyikoyi ho dna anagbai zhin. Eza n wa la wo, wo ku anagbai zhin.

³³“Musa owa kwa je da ge, ‘Ho ta bma ho alkawali ya n ha zhin ga Shekwoyi m, tile ha nu ba vinya.’

³⁴Ama ma ci ge, To zhin alkawali doho-doho yi m. Kwo ha ci ge, ‘N sheyi, kwo zhin alkawali gyi-gyi-yi nu n Shekwoyi aba, ntu ge eshe zhin Shekwoyi asese ba nu.

³⁵Kwo hoi gna, ‘N nanyi yei deye kwo zhin nya-si nu, ntu ge anyi zhin owo apitakpe ba nu. To si nyasi n Urushelima yi m,’ ntu ge Urushelima zhin ezhi Esu dnagmayi nya nu.

³⁶To si nya-si ha gna, ‘Nmi tukwo yi m,’ ntu ge ho ta mi ha zhin tukwoyi gmanyi kwa ze zhi-zhiyi kwo bui-bui m.

³⁷Bwa ho nya ci ge, ‘E, nba zhin’ kwo ‘Awo, mi ta zhin m.’ Kwo la kun. N ha mi ho beda gni n nyasi yi, kwo wu nu ge enya dna lo.

³⁸Musa owa gna, ‘N eza bi ho ewye ya hohin ha bi wo nya ya. N nyikna nu, ha ka wo kpeya.’

³⁹Ama ma ci ge, To gba be nukwoyi ta m. N eza ce ho epmi n na gnayi, ha wu wo bayi.

⁴⁰Nna lo hoi na wada aba a eje gwo ho gmanyi, ha ku bayi ga.

⁴¹N soja gna ho ge ho la wa kaya ha lo cei mili gmanyi, lo n cei mili ngun aba.

⁴²Eza n wa nya ho nya bo, ha ga wo, to ha bu aza si n ba ye ba ba ho nya m.

⁴³“Beda lo ai ci ge, ‘Ye n ha nugundo yi, ha wun oho anuwun yi nu.’

⁴⁴Ama ma ci ge, ye nha nuwun-yi yi. Zhin aduwa ntu naza bo nba ga ho wahala!

⁴⁵N fya zhin lo nu, kwo ba wu ge fye nu zhin abi a gaiciy da, efye Dada nya n wo dna n 'she nyi. Ntu ge wo zhin wa ga nyipyeyi buzangna n na za manayi aba bedo na za nukwoyi yi, wa je ba tnu n gmayi n na ba gmanyi.

⁴⁶“N fya ye naza yi nu n ba ye fye nyi, kni bemanayi nu shi lo bo a? Ntu ge a tna viyi zhin ba zhin lonu!

⁴⁷Nfya bwa nugundo gyi n fya nugundo yi nu, fye shando lo na azaje yi nu? A benayi bwa zhin lonu

⁴⁸Ama kwo bmiya fya ze aza nunuyi, ngye shi efye Dada n wo dna n 'she nyi, wo zhin nunuyi nu.”

Matta 6

¹Yi zhin peceye. Yi to zhin abo manayi na za abye ntu ge ba ci yi m, n ya zhin lo nu, yi ta bwa lada n eyi Dada aba nwo dna n 'she nyi m.

²Esa nu ha ga nya bayi cauta to dna ewyi m, shi akwoce dnayi zhin bai bye amwayi na aduwa nyakun, na zokwoyi ntu ge aza gye be manayi n a zhin nyi! Gaiciya ma gna fye ba la oba lada pma gwo n ba ba bwa nyi.

³Ama esa nu ha zhin eza bemanayi, ha zhin kwo fiya to ye ge bwa pmi kwa kpe obo n bwaizhe zhin m.

⁴Efye Dada n wo kpe asigyiyi nyi, wo ba ga fye lada.

Aduwa Zhin Bedo n Mikun Shi Yi

⁵Ntu aduwa zhin bo, esa fya zhin aduwa, fye to zhin ngye a kwoce dnayin. Ba nu n a zhin aduwa na zokwo n aduwa nyakun yi, ntu ge aza gye ba. Gaiciya, oba lada nu n ba ba bwa gwo.

⁶Ama esa ha zhin aduwa, la lo dna nyakun, ha ku aba gu, ha zhin aduwa ga 'ho Dada fiya, oho Dada n wo kpe asigyiyi nyi, wo ba ga ho lada.

⁷⁻⁸To zhin, aduwa hoi da bo gmanyi-gmanyi, ngye shi abenayi zhin m. Ba gye ge aba wo ba aduwa ntu beda gmanyi da bo nu cici. Pa ge oho Dada kpe nya yelo n ho ye, tunyi to hoi nya wo m.

⁹Fye zhin aduwa ge “Eye Dada n ho dna eshe nyi ayi ho eye gyi-gyi-yi.

¹⁰Yi ye oho ebe kwa be wolo. Fa azhin ho beye dna nu anyi ye, ngye shi a zhin dna eshemi.

¹¹Gayi nyagyi n jesun naiye ngye shi ho shin yi ga.

- 12** Ha zhin yi alaifi gafara ngye shi yi zhin ba n ba zhin yi laifi nyi.
- 13** To lo n yi n jaraba mi m, ama ha gniyi n Eza nukwoyi. Amin.
- 14-15** Efy e Dada n wo dna eshe nyi wo ba zhin fye gafara ndei fya zhin azaje gafara, ama n fye to ye ba gafara zhin bo m, wohin ta zhin fye m.
- 16** “N sayi ntu azumi bo. Fye tna nyagyi-gyi ntu zafun bo. Fye to zhin kwo pei-peim, ngye shi a kwoce- dnayi zhin ba wu ge ba n wahala yi lo, to ba so tukwo m, n nabai aza ci ba sun-sun. Gaiciya, lada nu n ba ba bwa.
- 17** Ama esa n fye zhin azumi, fye ku aje manayi kpe.
- 18** N nabai to zaho wa kpe ge mikun gun fye lom, sai efye Dada n wo kpe asigyi vinya nyi. Wo ba ga fye lada.
- 19** “Fye to so fye nyabwa shi nu anyi aba kwo ba wunya, ko avi awyi ko m.
- 20** Ama fye so nya shi n’she aba kwo ta wunyam, aba na vi ta mi ba wyi m.
- 21** Ndei efye nyabwa so shi lo n’she, efye bugba ba sun bo nu.
- 22** “N ho wye gyi-gyi-yi lo, aba gye buzangna n ho bugba mi.
- 23** Ama n ho wye n cegyei lo na bo nubwozhin nukwoyi yi, ho dna lo n wyegma yakwo ntu zafun abo bo. Wyegma dnagmayi nu kuwa.
- 24** “Ho ta mi ha zhin a Dagayi ngun aba bauta m, watau Shekwoyi n na gyiwye yi. Tile haye n gmanyi yi, ha wun gmanyi nu.
- 25** “Emi shaula nu nyi, fye to sabo n nya bo n fye ba gyi m, kwo fya sin, kwo fya kpem, Ntu ge fye n wye-wyei lo bedo n nayi, ba du anyagyi lo naje kpe yi.
- 26** Fye dna alu wye! Ba to na besa yi ntu ba nyagyi bo m, ba ta bye m, ai gna ba do ba so fi na dobu m. Efy e Dada n wo dna n’she nyi, wo nu kpa ba. Fyehin kuwa wo gna sun lo n fya pmayi n du ba.
- 27** Efy a besa ba be fye wye-wyei kpa?
- 28** “Kniyi nu zhin fyei sabo ntu aje bo a? Fye shi amamayi wye n bmana, ba ta sabo ntu ba je bo m.
- 29** Kwo Esu Solomon n wo mwa-mwa yi vinya, wo to kpe aje manayi ngye ba m.
- 30** Ndei Shekwoyi lura na mamayi n sun lo nu, oba nu n ba lo naiye nsu bai zo, wo ta gna lura n fyei nu, o aza agaiciya ga gba-gbayi da?
- 31-32** “Ntu cenu fye to sabo ntu nyagyi bo n naje yin. Fye to zhin ngye awye-gma da m. Ntuge a mwa bahin tukwo n nabo deye, har bai sabo n mwa. Ama efye Dada kpe lo sarai anya n fye gyisan.
- 33** Wo ba ga fye ba n bugba da yi, ndei fya wo nu shi na bye kpa, fyei zan-zan ngye shi wo ye fya zan.

³⁴“Ntu ce nu fye to sabo ntu nsu ɓo m. Shekwoyi ɓa lura n koyi. Nyipyeyi dohodohoyi nkwo aɓo yi.

Matta 7

¹“Fye to ci aza aɓo nya m, a ta ci fyehin aɓo nya ce m.

²Ntu ge aza ɓa zhin fye, ngye shi fye zhin ɓa.

³Kniyi zhin hoi wo osha ɓiyi ɓo nkwo dna n ho zado wye hoi bwa gnilo n shinwan-knunuyi dna n ho wye’a?

⁴Ho ɓa mi ha gna ge, ‘Emi zado, fa ma gmi ho,’ sha ɓiyi ya nweye, to hoi gye wyeba lon, ntu ge shinwan-knunuu dna lo n ho wye.

⁵Zakwoce-dnayi! La shinwan-knunuu gmiya nho wye kpa, ha kpe wyeba gye ha bma ho zado zhin.

⁶“To fa nya gyi-gyi-yi ga aza nukwoyi m, to ga aburutu nya manayi m. Ba ɓa kpe kwo apita, ɓa pmi da fye nsayi ɓa sa fye ya.

⁷Fye ɓa, aɓa ga fye nya fye ye! Fye zan shin, fye ɓa bwa! Je abagunya, aɓa gu aɓa ya.

⁸Ntu ge ezaho- zahoyi nwo a, wo zhin wa gwo. Zaho-zahoyi nwo zanshin, wo zhin wa bwa. N fya je aɓa, aɓa gu fye aɓa ya.

⁹Ndei eɓi nya wo dada bredi ɓo, wo ɓa ga wo kuta?

¹⁰Ndei wa nya wo ebmiya ɓo, wo ɓa ga wo owa? Awo!

¹¹Ndei efye abugba kala-kpeyi, a laifi da, fye kpe shi fye ɓa ga efye abi anya manayi. To fya ku gna kpe ge, efye dada Shekwoyi ɓa ga aza anya manayi na nya wo nyin?

¹²“Zhin aza shi ho ye ɓa zhin ho. Kwo nu zhin wuwu dna Musa owa.

Eshe Zokwo

¹³“A ɓa bwa eshe mi lo eza ya du n na boknumi pma-pma yi nu. Zokwo palalayi lo anapi nya, okwa bokun- mi kuwa n mwa pata. Aza begye lo konu lo wato aza n ɓa kni zokwo fa-fayi.

¹⁴Ama wye-wyei abokunmi gba-gbayi, zokwo kuwa n pma-pmayi, aza fyewyi nu bwa kwo gye ɓai wan.

¹⁵“Fye zhin pceiye na malami akata nya yi ɓa zhin ɓa ɓe ngye akni ntna ɓaina, ama n ɓa mi, a cam-cam nu ɓa ɓa gna fye ajeya laɓa.

¹⁶Fye ba mi fya kpe ba ye ntu ba abo zhinzhin bo, ngye shi fye kpe shinwan ye n kwo gyi-gyi-yi nyi. To fya gye nyi-nyi-wyi kwa dna fye do, fya gna gye knawuyi nu m, kwo gbayi fya gna shinwa nukwoyi m.

¹⁷A ba mi a kpe shinwan doho-dohoyi ye n kwo gyi-gyi-yi.

¹⁸Shinwan manayi ta mi kwa ga gyi-gyi nukwoyi m. Shi nukwoyi ta mi kwa ga gyi-gyi manayi m.

¹⁹Shinwan nkwo to ga gyi-gyi manayi m, a zhin a zun kwo ya a shekwo fi n'na.

²⁰Ntu ge akpe shin-wan ye, kwo eza, ntu oba gyi-gyi bo nba ga nyi.

²¹"Aza vinya nu to n ho gye ba ge ba zhin a Yesu viyi nu m. Ba yi mi ge, 'Dagayi, Dagayi' ama ba ta lo she m, ntuge benya gmanyi nu shi. Kwo ba vi emi Dada beye lo n wo dna n 'she nyi.

²²N wada wyi, aza mwa begye bei ci mi ge, 'Dagayi, Dagayi yi ku ho nabari gna azaje har ya kun azafun nukwoyi ya n hoye yi, yi zhin abo wo-woyi n jesun.'

²³Ama mi bei ciba ge, 'Fye kumi kala lo bwai. Fye to zhin maza nun, ntu ge fye zhin abo nukwoyi zhin yi nu.'

²⁴"Aza nba wo mi beda bai vi kwo, ba zhin aza cece nu, ngye eza n wo mi nyakun tu na pma.

²⁵Ko ogmayi zhi n mwa a nuwan yi bagye, ase ci n kala yi bayi lu nyakunyi, kwo ta miya m, ntu ge a mi kwo tu na pma nu.

²⁶"Ama aza n ba wo mi beda to bai gye ba nuwan, ba zhin aza atnacei nu, ngye eza n wa mi nyakun tu na mwi.

²⁷Ntuge she ogma zhi, a nuwan yi ba-gye, ase yi ci, kwa lu nyakun ye, koba miya gbidim-shi konyi a mi kwo tu na mwi nu."

²⁸Ca wo aza, ntu wa'azi bo n Yesu bo zhin nyi.

²⁹Ntu ge wo bo wu ba ngye eza nu n wo ikwoyi, to wu ngye shi a Yahudawayi a tukwo da zhin ba wu ba nyi m.

Matta 8

Yesu Woi Ka Anyasan Gna Gbo-gbo

¹Shi Yesu bo shin zhi n 'pe, aza mwa begye ba vi wo shin zhi.

²Ho gye! Kuturu belo. Wa ya shi wa ga Yesu mwa-mwa, wa gna, "Eza dnagmayi, n ha ye, ho ba mi ha kami gna."

³Yesu wa towo bwa wa gna, "Mi lla ye, gwo kagna." Nsayi-sayi Ikuturu nyasan fa wo.

⁴Yesu wa gna wo ge, “To kpe gni ha daɓo n zaho-zahoi yi m, lo ho wu hohin na malami aba, ha lo n nya gai shi, ngye shi Musa, wa da tu naza ɓo n kuturu nyasan ku ɓa fa, ntu seda ɓo naza ɓa gye ho la kagna bwa.”

⁵⁻⁶ Yesu wa lo Kafarnafum, Romayi za-asoja tukwo da, wa be wo aba wa gyi wo wye ge wo be wo puwa wa ka wo bi gna n wo shi n nyasan yi, n nayi fi-fiyi.

⁷Yesu wa gna, “E, miba be ma ka wo gna.”

⁸⁻⁹ A soja tukwoda ci ge, “Eza dnagmayi, mi to kunce lo ha be mi puwan, (kwoi to zhin tile nu ha be m.) Mi kpe lo ge n ha bwa ho nya gni ya ha cige, ‘Wo kagna.’ Emi fyenu ɓa bwa lafiya. Ntu ge mihin mi dna n iko sinta nu, aza lo n kpe n mi she. Mi n ikoi lo tu mi a soja tukwo, esa n ma gna eza deye ge lo, wa lo, eza do be, wa be. Ma ci mi fyenu nugbayi zhin deye, wa zhin. Mi kpe lo ho ikoi lo ha gna, wo nyasan ge kwo lo, kwa lo.”

¹⁰Yesu wa kpe gni cei wo-wo. Wa igna aza yezhi. “Dna Israila kni vinya, mi to shin gye eza n gaiciya gai la yi m.

¹¹Ma gna fye, abye do n mwa begye (ngye Romayi za ye) ɓa bei kun n nanyi laɓa ɓa be Shekwoyi bemi, ɓa sase n Ibrahim yi, n Ishaku yi, n Yakubu yi.”

¹²Ama aza n obe zhin ɓa nya nyi, a bei ku ɓa she ya fi nwyegma, aba nɓa bei cibwi bai gyi anyikna.

¹³Yesu wa gna Romayi soja tukwoda ge, “Lo apyi, kwo ku zhin ngye shi ha ga gaiciya.” Dna sahi, ebi ho, wa kagna.

¹⁴Yesu wa lo Bitrus puwa, wa gye Bitrus yezhi nyikwoza da wangye tu n gado, n nayi nagnu yi zagyi.

¹⁵Ama Yesu wa to wo bwa nyasan kwa wo fa, wa laka wa zhin ɓa-nyagyi.

¹⁶N wyeshe yi abe nazafun nukwoyi dayi n Yesu aba, shi Yesu ɓo daɓo kawai azafun nukwoyi ɓa busi, anyasan yi vinya ɓa gwo kagna.

¹⁷Deye ɓo ku nu anabi Ishaya ɓo da ge, “Wa la eya nyasan tu wohin.”

Anuwan Kma Ngun Aba-ba

¹⁸Shi Yesu ɓo gye aza yezhi bai mwa, wa gna wa bara ge ɓa zhin shiri ɓa piya lo kmayi.

¹⁹Esa fyewyi a Yahudawayi Malami ho wa be wa gna, “Malam miba vi ho abahohoyi ha lo.”

²⁰Ama Yesu a ci ge, A cam-cam nɓa bai lo, alu nɓa ma yi lo, ama Emi, Masihu, to napi lo n mi ɓa dna imihim tukwo m.

²¹Owo viyi ho wa je ci ge, “Zadnagmayi, pmi mi la mi dada bi kpa.”

²²Ama Yesu wa gna wo, “Vi mi n sayiye, Fa aza nba fi-fiyi dna n zafun ba bi aje.”

²³Wa lo dna n 'ya wa ya piya bedo n wa bara yi.

²⁴Sa fyewyi ese kwa laka n kala yi n nuwan dokwo yi har to ai gye eya wye m. Ama Yesu bei la wangye.

²⁵Abara lo ba yi wo ge wo kun agyewyi bai nawyi ge, “Dagayi, gni yi! Gye yi ye ya bwi nuwan.”

²⁶Yesu wa ci ba ge, efye agaiciya-gai bi-biyi da, kniyi nu zhin fyei wo edna? Wa laka wa gnakni ese, n nuwan yi, har ba ce pi.

²⁷Ce a wo abara ba nya ge, “Nkanu n za deye yi har ese n nuwan yi bai wo wo beda?”

²⁸Shi ba bo si kmayi dna Gadara 'kni a zafun nukwoyi da ngun aba ba shegun ba. Oba sese ba na vingwo nu, aza to bo zhin ba mi diya n bwayi m, ntuge ba ga aza wahala.

²⁹Ba ya aku fi, “Ho ye kniyi n 'ya, O Shekwoyi Nugun? Esa to si n ho ba ga yi wahala n cei kpa m.”

³⁰A burutu garke bei fyi bai gya nyagyi n kpai.

³¹A zafun nukwoyi a gna Yesu ge, “N ha kun yi ya, ha tnu yi na burutu garke yi.”

³²Yesu wa gna bage, “To fye kunya lo.” Ba knu na zahi ba lo fyi na burutu, aburutu vinya ba ku bwi nuwan.

³³A burutu knayi ba busi lo zhimi n nabariyi bo kwa zhin.

³⁴Aza vinya knu be ba gye Yesu. Ba gna wo ge wo lo, wa ba kni fa ba.

Matta 9

Emi Tnu-Tnu Dna Nna Anyi Ye

¹Ntu cenu, Yesu wa lo eya wa je piya lo Kafarnafum, owa yi.

²Esa fyewyi aza be n 'bi nayi fi-fiyi da yi ntu na pece. She Yesu bo gye ba gaiciya ga, wa ci ebi nyasan yi ge “Nugun, laka! Miku oha laifi zhin gafara!”

³“Tukwo-mwa,! Eza deye gna ge wo zhin Shekwoyi nu.” A Yahudawayi abyeda nu gna je lo nu.

⁴Yesu bei kpe a abonubozhin ye, Wa nya ba ge, kniyi nu zhin fyei zhin afo nukwoyi nubo a?

⁵“Kni dei nu gna wo lo fwa-fwa, a cige miku ha laifi zo, kwo kuwa a la ho kagna?”

⁶Ntu cenu, Ma wu fye ge mi iko yi lo dna na nyi ma zo alaifi, wa pmi da bi nyasan yi wa gna, “Lakala, kmi ha pece ha lo ho puwa.”

⁷Ebi ho wa laka woi gye agna wa lo wonya.

⁸Odna wo azayezhi, shi abeye bo zhin ai gye ba la Shekwoyi tu she wa ga aza iko lo nu.

⁹Shi Yesu bo zan-zan lo n zokwo yi, wa gye gadu gwoyi, Matta, n dna na gadu gwo ba. “Be ha ze mi bara,” Yesu nu gnawo lo nu. Matta laka wa gni lo nwoi.

¹⁰Esa nu Yesu bei dna n wa bara yi bai gyi nyagyi, (n Matta puwa), azagyifiyi bei fi bo n zhin azhi-beyi.

¹¹She a Farisiyawa yi bei gye ba nya Yesu abara ge, “Kniyi nu zhin efye Male yi ye wohin bedo n naza deye pya ya?”

¹²Yesu wa gna bage, “A lafiya da ta zan shigbe da shin, sai anyasan yi.

¹³Fye lo fye zan aya ye awyega shin, ‘Mi ta ye sadaka lo n na nyaga yim, Mi ye fya ze asun-sun gye yi.’ Ma be, ntu ge ma yi alaifi da ba be Shekwoyi aba to ge aza n ba yi bahin ge abe-fyeceyi m.”

¹⁴N wyihoyi Yohana batisma zhin yi abara ba be Yesu aba ba nya wo ge, “Kniyi nu zhin to oha bara yi zhin azumi n gye yi bedo na Farisiyawa yi ma?”

¹⁵Yesu wa nya ge, “Kwo bmiya lo mula ba anugundo ba wun bugba to bai gyi nyagyin, mulabai gnisun n bai? Ama esa belo a la Miya n ba ba, n sayi nu n ba to bei gyi nyagyi m.

¹⁶“Nyikanu bagu eje kwokwoyi ta n je woiwoyi ya? Ntuge kwo bei jesaya na tagu ba, obwo ko ladu n pata.

¹⁷Ko nyikanu ba fi nuwan shu-shuyi woi-woyi n pwakun kwokwoyi’a? Nuwan shu-shuyi ye ba bma kwo har pwakun ba cepwo anab nuwan zeya. Sai dai a fi anab woi-woi n pwakun woi-woi, aba bwa ba pma vinya.”

¹⁸Wo gni woi da bo, aduwa nyakun tukwoda be wa yashi n Yesu a pita ba wa ga wo mwa-mwa: a gna wo, “Emi bi ye bwa fi nu, ama ho bami ha je wo wye-wyei ga, ndei ha be ha to wo bwa.”

¹⁹Yesu nwa bara yi, ba gni lo n woyi.

²⁰Bai ye filo n zan yi mi, Nyikwoza ho wo yi ku eye bwa awo-cei-aba ami yi zewo ya, wa lo wa to Yesu je kpe bwa.

²¹Ntu ge wo bo zhin nubo ge, “Ko ma bwa wo bwa to-to, miba kagna.”

²²Yesu wa pmiwye ya wa gye wo wa gna, “Nyigun, bugba bui-bui! Eho gaiciya ga la ho kagna!” Nyikwozahi wa bwa lafiya nsayi-sayi yi.

²³Esa nu Yesu bo si tukwodayi puwa, wagye azai nawyi, ai gyi afi-nya,

²⁴Wa gna, “A kun baya, ntu ge binyinkwoyi deye to fi m, ama wowan gye nu.” Aza ma wo san, bai kpe wa gye.

²⁵She aza bo la za kun ya zhi n bmi, Yesu wa lo aba n binyikwoyi bo dna, Yesu wa tabwa shi wo, wa je wye-wyei bwa.

²⁶Nabari kwagnami n ekniyi vinya ntu abo wowo yi bo n Yesu bo zhin nyi.

²⁷Shi Yesu bo gmi n puwa yi, awyebwayi ngun aba, ba vi wo be bai gna, “Osu Dauda Nugun, gye yi sunsun.”

²⁸Wa pmi wa to ba wye bwa wa gna, “Ntu fye gaiciya ga bo, fye gye wyeba!”

²⁹Wa pmi wa to ba wye bwa wa gna, “Ntu fye gaiciya ga bo, fye gye wyeba!”

³⁰Nsai-sayi, ba gye wyeba, Yesu wa tu ba gbe ge, ba to gna zaho-zaho yi m.

³¹Ama to ba ce pyi m, sai ba da nabari laba n zhimi.

³²Yesu wa laka bo, wa she gun takpebeda, ntu ge azafun nukwoyi bo fi wo.

³³Yesu wa kun baya, zahi wa ya beda da. Ca wo aza yezhi n mwa bai gna, “Yi to shin abeye gyem.”

³⁴Ama a Farisiyi ba gna, “Nya ko zhin woi kun azafun nukwoyi ya nyi, ntu ge wo bai lo n wohin, Shetan dna lo n wo mi, azafun nukwoyi su.”

Atnu-Tnuyi Apma Nba Yi-yi-i

³⁵Yesu wa zan laba na zhi biyi n na azhi dnagmai yi woi wu aza dna na Yahudawayi aduwa nyakun, woi danabari manayi ntu Shekwoyi ebe mi bo woi ka anyasan gna abaho-bahoi n wa lo.

³⁶Aza sun-sun a wan wo, ntu ge babo na bei mwa begye to akpe shi ba ba zhin ko aba n ba-ba lo ntu bmazhin bom, n wu gye akni ntina knayi.

³⁷Wa gna wa bara ge, “Wyido lo mwa ama atnu-tnuyi bwa sun lo fyewyi nu.

³⁸Fye zhin aduwa ga Dagayi wyido nya watnu n na tnu-tnu zhin-yaje yi nwo fwa.”

Matta 10

Awyidna Nna Bei Ga Abara

¹Yesu wa yi wa bara awo-cei-aba wa ga a iko a kun azafun nukwoyi ya, bai ka anyasan doho-dohoi pya gna.

²⁻⁴ Owa bara aye nu nyi: Siman (ai je wo yi ge Bitrus), Andrew (Bitrus zado), Yakub (Zebedi nugun), Yohanna (Yakub zado), Filibus, Bartalomaus, Toma

Matta (Godu goyi), Yakub (Alfis nugun), Siman (Siyasa da), Yahuda Iskariyoti (eza wo ƙo kun Yesu nyi).

Awyidna Nna Bei Ga Abara

⁵Yesu wa tnu ƙa wa gaƙa gbe ge, “Fye to lo abyedo aba kwo a Samariyayi abam.

⁶Fye bwa a Israila yi abanu lo, akni bwi-bwiyi.

⁷Lo fye gna ƙage, Shekwoyi ebe la wo vi-vi.

⁸Fya ka anyasan yi gna, fya ku a fi-fiyi kala, fya ka a kuturu gna, fya kun azafun nukwoyi ya. Fya gacauta, shi fya gwo cauta.

⁹“Fye to lo na gyiwyei shi m.

¹⁰Fye to la pwakun, ko aje do, kwo abuada, kwo busi zan-zan nya: Ntu ge aza n fye lo fye bma ƙa zhin nyi ƙa ƙa ga fye nyagyi.

¹¹Esa nu fya lo ezhi yakwo ko ezhi bi-yi, fye zan Shekwoyi za shin fya fyi n wo puwa har esa nu fye ƙakun n ’zhi yi, fya lo ezhi do.

¹²Esa nu fya nya ƙo ntu ge a ye ge fye lofi; fya ku ze anugundo.

¹³N fya gye Shekwoyi za puwa nu, fya tu ƙa anabarka, nto lo nu n, fya ku fye anabarka shi.

¹⁴Ezhi doho-dohoi, kwo puwa n fya lo, to kwa gwo fye m, fya lu abwi-tukun ya n fya pita fya kun.

¹⁵Gaiciya! N wada wyi yi, Sodom n Gomora yi ƙo ku du ƙa n sauci bwa.

¹⁶“Mi tnu fyei ngye akni fi na cam-cam tasin. Fye la ce ngye awa, ntna baina ngye a lukpe.

¹⁷Ama mi ye fya kpe ge a ƙa wan fye, ai da fye wa, ai iu fye fi na aduwa nyakun.

¹⁸E-har ma fye ƙa gni-agni n gwamna abye ƙedo asuyi ntu ’Mi ’ye ƙo. Deye kwo bei ga fye sa ntu ge fya zhin mi saida n ƙa bye ƙedo n na nyi yi vinya.

¹⁹“Sa na wan fye, fye to wo dna n boi fye ƙa da n na wada ba m, ntu ge abei wu fye ƙo fye bada n ko sai.

²⁰Ntu ge efye nu ta da ƙo m, ama zafun efye Dada nya n wo dna ’she nyi, wo ƙa daƙo n fye gbe yi.

²¹“Eza bei bwi wo zado har efi, adada bei bwi ƙa ’bi. Abi ce bei kuka da ƙa dada har koi zhin ƙa fi.

²²Aza bei wun fye nu, ntu ge fye zhin ma nya nu. Amma eza n wa mi gni har nyalo-nyalo, wo ƙa pwo.

23“Ndei a ga fye wahala n 'zhi, fya kun fya lo ezhi do, miba jeze be kafin fye zo azhi zan vinya.

24Makaranta bi to du wo malamin, ko fyenu ntu wo pida tukon.

25Makaranta bi zhin wa be wa sun ngye wo malami, fyenu lo nu ngye wo pida. Ntu cenu, shi ba ku mi yi ge 'Shetan', n mi zhin fye Dagayi nyi, balle efye!

26Ama fye towo aza dna n ba ga fye wahala nyi m. Ntu ge esa be lo n gaiciya ba da kwihin: eba asiri a kpeya pei-pe.

27“Enya n mi gnafye dna n wyegmaa nyi fye la begye tu fya da kwo n nyipyei yi. Abo sanya n mi gna fye nyi fye knitu n nyakun she fya da ba.

28“Fye to wo aza dna n ba wu fye anayi kawai m, ama fye wo Shekwoyi dna n wo nu ikoyi wa wu nahi bedo n wye-wyei dna n na nanyi.

29Gbakolowyi (asi ba akninya? Ngun aba kabo?) Doho-dohoi to lo n kwo ba fi to efye Dadai kpe kwo bo m.

30Efyu tukwo-yi kudo-kukui lo vinya.

31Ntu ce nu fye to damun, fye du agbakolowyi lo ampanyi.

32“Eza n wa da Mi bo pei-pe na za 'ba ge Mi zhin wo nugundo nu, Mi hin miba da wo bo ge wo zhin mi nugundo nu n Mi Dada abye, wo dna 'she nyi.

33Ama eza n wa nama bo, mi hin miba nawo abo n Mi Dada abye, n wo dna 'she nyi.

34“Fye to gye ge ma be, na sese lafiya nyai nu n nanyi mi m, sai ebe yako.

35Ma be ntu ge ma zhin nugun wa zhin gaba n wo dada yi. Nyigun wa zhin gaba n wo 'ya yi, tnayi wa zhin gaba n wo viya yi.

36Eza nuwun-yi ba bwa jekun n wo puwa nu.

37Ndei ho ye ho dada n ho 'ya yi n dumi, ho to kunce lo ha ze mi nya m. Ko ho ye ho nugun ko nyigun n du mi, ho to kunce lo ha ze mi nya m.

38N ha gnage ho ta la ho zundu ha vi mi m, ho to kunce lo ha ze mi nya m.

39“N ha kpema ho wye-wyei, ko ba ho bwi, ama n ha ga ko ntu mi bo, kwa ho pwo.

40“Aza n ba gwo fye, ba gwo mi nu! Aza ba gwo mi, ba gwo Shekwoyi nu n wa tnu mi nyi.

41N ha gwo anabi ntu ge wo zhin Shekwoyi za nu, ho bei gwo lada dai-dai n anabi yi. N ha gwo aza manayi kwo abefye-cei ntu ba bemanayi zhin bo, ho bei gwo lada dai-dai n bai.

⁴²“Efyē n fye zhin Ema tukwo shanyi, nfyā ga ebi nawyi nuwan fu-fuyi, lallai fye ƒa bwa lada.”

Matta 11

¹Shi Yesu ƒo ku nya zo wa bara wu, ƒa kuka ƒalo azhi yakwo, ƒai zhin wa’azi n ƒa ƒei ku shiri zhin ƒa lo nyi.

Yesu Wa Mi Yohanna Gni

²Yohanna batisma zhin-yi, woi dna n kurkuku, wa wo abo wo-woi n Masihu zhin lo, wa tnu wa bara ƒa nya Yesu ƒo,

³Oho nu zhin eza n yi pmi, kwo yi ye tuwye na bye na?

⁴Yesu a gna ƒa, “Fye lo fye gna Yohanna abo awo-woyi n fye ku gye mi zhin:

⁵Awyebuayi ƒai gye wyeƒa, aza ƒmazhi ƒai zan-zan, akuturu ƒai gwo kagna, atnubua-gunayi ƒai wo ƒeda, azafi yi bwa wye-wyei, fye gna wo mi Nabari manayi ƒo, n Mi da na wyekwoyi aba nyi.

⁶Fye gna wo ge, ’anabarka nu nazayi n ƒa ta zhin shaka ntu mi ƒo m.”

⁷⁻⁸ Shi ƒa ƒo kuka, Yesu wa ya ƒeda tu Yohanna tukwo. “Esa fye ƒo lo zhabui ntu ge fya gye Yohanna, fye ƒo gye ge abo gye wo wuna? Ngye agbegbe n ese ci n ƒai nyi? Kwo fye ƒo gye ge fye ƒa gye eza na jei kpe ngye ’su nugun na?

⁹Ko fye ƒo wyei tu n anabi Shekwoyi nya na? E, woi du anabi lo.

¹⁰Ntu ge Yohanna nu na ƒo da wo ƒo dna n Alkawali kwo-kwoyi ge, tnu-tnu yi n wo ƒa ƒe n ma bye, wa gna aza emi ƒebe ƒo, wa zhin zokwo aba.

¹¹“Gaiciya, dna aza vinya na la ƒa luma, zaho to n buzagna yi ngye Yohanna m, du-du lonu, buzagna ƒi-ƒiyi n Shekwoyi ’be mi, kwo ƒei la du wo!

¹²Tunyi, esa nu Yohanna ƒo ya wa’azi zhin ƒedo n batisma yi har n sayi, aza mwa begye lo ƒai ƒe Shekwoyi ebe mi.

¹³Ntu ge Musa owa ƒedo anabi yi oba vinya ƒo na wyei shi nabye ntu Masihu ƒebe ƒo. Yohanna pmi wa ƒe.

¹⁴Ndei fye ye lo fya kpe ƒeye n mi da, wonu zhin Iliya, eza nu anabi ƒei gna wo ƒa ƒe (n Shekwoyi ebe ya sa.)

¹⁵Ngye fye na tnuhua ƒowo nyai lo, fye wo n saiye.

¹⁶“ ’Miƒa da ge na tu nabe ye tukwa? Aza deye wu lo ngye abi fan awye ƒai yi aje ge anugundo ƒiyi,

¹⁷Ya fan awye ngye yi pa mula, ta da fye m, ya fan awye ngye yi biza, to fya zhin bugba zhi-zhiyi m.’

¹⁸Ntu ge Yohanna to bei sin nuwan shu-shuwuyi eje m, saho to wa gyi nyagyi m, ama fya gna wo zhin nyazei nu.

¹⁹Emihin, Masihu, mi gyi mi sin, fya da gnunu-gnunu ge, mi zhin fwanada nu mwa, miyi zan na laifi nukwoi da yi. Ama efye aza cece, fye kpe shi fye kna fyehin a pita nfyē tna gaiciya doho-dohoyi.”

Pmagna Bedo N Yi-yi-i

²⁰Wa pmi wa ya abeda bugba wunya da, tu na zhi tukwo aba wo beyi ku abo wo-woyi zhin, ama dudu lonu to ba ga Shekwoyi gaiciya m.

²¹“Aiya n fya ba Korazi, aiya njesun n Baisaida aba, Ntu ge abo wo-woyi n mi ku zhin n fya ba nyi, aboi gna ba zhin ba lo nu n Taya bedo Saida yi ba bei ba ku ye abui sapa-sapa dna vinyikwo n tukwo gba yi.

²²“Gaiciya, Taya n Saida yi bei gna fye bmiya zhi n wada wyi yi.

²³Kafarnahum n kohin, n na koi latu nyi, kwo bei lo 'na! Ntu ge abo awo-woyi n ma zhin n ha ba nyi ai ya gna a zhin ba n Sodom nu, kwo ye bei ye lo naiye.

²⁴“Gaiciya Sodom bei la gna fye bmiya shi n wada wyi yi.”

²⁵Yesu wa zhin aduwa ge, “O Dada, Dagayi, eshe nya n 'kni yi, ma gode ngye shi ha so gaciya naza ba nba gye bahin tukwo ge aza ceceyi nu, ha wu ko nabi nawyi aba.

²⁶E, Dada kwa da ho nu ha zhin ko lo nu.

²⁷“Emi Dada ku anya vinya fa fi n ma kun. Dada gmanyi wo nu kpe Nugun ye, Nugun ce wa kpe Dada fye bedo naza yi n Nugun wu ba Dada.

²⁸Fye be maba mi ba ga fye sun-sun, efye nu n fye naya shan-woi kpe.

²⁹⁻³⁰ Fye la ma kaya, ba wo lo fafa mi ba wu fye ge mi zhin eza hankali da nu n bugba sun-sun gye nya yi, efye wye-wyei ba bwa sun-sun. Ntu ge mi ta ga za akaya shan-wo yi m.”

Matta 12

Dagayi Satiwiyi Nya

¹Nwiyihoi, n satiwiyi yi, nyipyei na Yahudawayi zhin ba la Shekwoyi tu, Yesu wa sadu na wyizhin n wa bara yi. Mikun bei ku ba gun, ba ya awyi shin bma bai wu kpe na bwada bai gyi.

²Ama shi a Farisiyi bei gye lo nu, ba gna, “Oha bara la owa zungna. Bai do-wyi n Satiwiyi yi.”

- ³Ama Yesu wa gna ba, “Fye to shin ba fya wo bo n’su Dauda bo zhin n wa nugundo yi n mikun bei ku ba gun?”
- ⁴Wo bo lo dna na duwa zhin ba, ba gyi breidi nkwo bo shi ge a pirist nu ba bwa kwo gyi nyi. Ko bo zhin owa gnana zun nu ce.
- ⁵Fye to shin ba njesun, dna n Musa wa ngye shi a pirist n ba fi na duwa zhin ba nyi, ba zhin tnu-tnu n Satiwiyi yi n?
- ⁶Ma gna fye gaiciya, Eza gni lo ya n wo du aduwa zhin ba lo n mwa-mwa.
- ⁷Fye bo gna fye ku aya ye awyega bwa n kwo gna, ‘Mi ye fya ze a sun-sun gye yi, n du fye nyaga,’ to fyei zun tna laifida kni m.
- ⁸E mi, ‘Zanugun, mi nu zhin Satiwiyi Dagayi.’ ”
- ⁹Wa pmi wa lo ba duwa nyakun,
- ¹⁰Wa gye obwa sha-shai da. A Farisiyi ba nya Yesu ge kwo bmiya lo a ka nyasan yi gna n Satiwiyi yi? (Bai gye ngye wo ba ye ge, “E,” n nabai ba wan wo.)
- ¹¹Amsa nyi n wo bo ga, “Ndai ho n ena buyi bwasun lo gmanyi, kwa kaya dna rijiya n Satiwiyi, ho ba gmi kwo n wyihi yi? Lallei ho ba gmi.
- ¹²Shi eza du ena-buyi lo nyi, kwo bmiya lo a zhin be manayi n Satiwiyi yi?”
- ¹³Wa pmi wa gna zahi ge, “Ta ho bwa ya.” Shi wo bo taya, wa lafiya bwa kwa wo ’wu ngye bayi.
- ¹⁴Nsayi a Farisiyi ba lo ba zhin shawara ba wan Yesu ba wu wo.
- ¹⁵Ama Yesu wa ku ba shawara kpe, wa gmi na duwa nyakun azai vi wo mwa. Anyasan yi vinya n ba mi wa ba kagna.
- ¹⁶Ama wa gni ba t nubua ge, ba to gna Wo beda mi aza kagna nya m.
- ¹⁷Deye ko ku bo nu anabi Ishaya bei da nu, tu n Yesu tukwo:
- ¹⁸“Shi Mi Bara awye! Gye Mi Za kni-kniyi! Owo nu n mi ye, n mi wye-wyei dagma woi. Mi ba puwo mi Zafun, Wo ba da abye ’wa.
- ¹⁹Wo ta sun okun kwo wa bewyi m, wo ta la begye tu m.
- ²⁰Wo ta ye kalagbai fyan, kwo wa ci awyetu wyegba m. Owo nasara ba zo a bo viyan.
- ²¹Owo ye ba ze anyi vinya awyetu.”
- ²²Zafun nukwoi da ho, wye-buai nu, takpe beda njesun, abe n woi n Yesu aba, Yesu wa ka wo gna, wa mi wa da bo, woi gye wyeba n jesun.
- ²³Cawo azayezhi bai gna, “Ko Yesu zhin Masihu na?”

²⁴Ama shi a Farisiyi bo wo ce, ba gna, “Wo mi woi kun a zafun nukwoyi ya, ntu ge wo zhin Shetan nu a zafun nukwoyi su.”

²⁵Yesu wa ku a nubo zhin kpe wa gna ba ge, “Ebe n kwo zhin gaba n kohin yi, kwo ba miya. Ezhi n kwo zhin gaba n kohin ko ta mi kwa gni-agni m.

²⁶Ndei Shetan nya shetan ya, wo sunkun n wohin un, woi mi wo 'be ya.

²⁷Ndei fye gna ge, mi kun a zafun nukwoyi ya n shetan iko yi nu, efya za nba ku azafun nukwoyi ya nyi ma, ba kun ba ya n kni ikoyi na? Fye ga fyehin amsa.

²⁸Ama n gye mi kun azafun nukwoyi ya n Shekwoyi zafun yi nu, a gye Shekwoyi ebe la be fya ba.

²⁹Eza tami wa wyi shetan iko m, sai wo la shetan pa kpa, n sayi wa mi wa kun a zafun nukwoyi ya.

³⁰Eza n wo ta bma mi zhin m, wo zhin mi wahala ga yi nu.

³¹⁻³²“Eza n wa da mi benukoyi, n laifi doho-dohoi yi, aba zhin za gafara, amma eza n wa da Zafun gyi-gyi-yi benukwoyi, a ta zhin wo gafara m, ko nanyi ye, ko nanyi n ba be lo nyi.

³³“A kpe shinwan doho-dohoi ye n ko gyi-gyi yi nu. Shinwa manayi kwa gyi n bmiya, shinwa nukwoyi kwa ga gyi-gyi nukwoyi.

³⁴Efye awa bi! Ko ba ye zhin nwuna aza nukwoyi ngye fye fya da beda manayia? Ntu ge eza bugba nu wu za bo nwo ba da.

³⁵Eza manayi zhin wa da bo manayi n ko fi n wo mi. Bugba nukwoyi da kuwa wa da beda nukwoyi n kwo fi womi.

³⁶Ma gna fye, n wada wyi yi, bei be n fye nyadoku yi tu beda gbeloyi doho-dohoi bo n fye ku da.

³⁷Efya beda n sayi ye nu bei zhin fya kni n'wa, ko bei zhin a zun fye kni.”

Ga Yi Tuze Ho

³⁸N wiyihoyi a Yahudawayi a tukwoda bedo a Farisiyi yi, ba be Yesu aba ge ba ye wa wu ba tuze (kwa wu ge wonu ku Masihu zhin).

³⁹⁻⁴⁰Yesu wa gna ba ge, “Sai abye nukwoi bedo na tna gaiciya-gai yi, ba nu ba nya a tuze bo. Anyi ta shan ba doho wu ndu tuze anabi Yanana nya m! Ntu ge shi Yunana bo dna n'bmiya yakwo mi anyppei gun ata, asukwoyi gun ata, n'lo nu Emi Masihu ba dna n'kni nubo anyipyeyi gun ata, asukwo gun ata.

⁴¹N wada wyi yi, a Ninevayi bei zun fye kni. Ntu ge esa n Yunana bo zhin ba wa'azi ba bo ku ye abui Shekwoyi aba, ba ku abo nukwoi zokwo ya. Eza n wo du Yunana, wo gni lo ya fyei ta ye lo fya ga wo gaiciya m.

⁴²Sarauniya Sheba nya ƒo laka da abye ye wo zun ƒa kni n wada wyi yi, ntu ge wo ƒo gmi n kni do n kpai, wa wo Solomon ƒeyekpe, eza n wo du Solomon, wo gni lo ya fyei ta ye lo fya ga wo gaiciya m.

⁴³⁻⁴⁵ “Abye ye wu lo ngye eza n wo zafun nukwoyi yi. Esa nu zafun nukwoyi gmi n wo kwalo zhabui koi ye asun-sun ba to kwa bwa m. Kwa gna ko ƒa jeze kwa lo kwa gusa, esa kwo ƒe kwa gye zahi bugba zhan baya shi, ama ntna nya dna yi! Sai kwa lo kwa yi a zafun nukwoyi ngun tnaba ƒa ƒe lofi n zahi mi. Ezahi esese kmaknayi ƒei la du kmisunyi n nukwoyi.”

⁴⁶⁻⁴⁷ Esa nu Yesu ƒo dna woi daƒo naza yezhi yi n nyakun, owo 'ya ƒedo nwa zaje yi ƒa ƒe zhi n bmi ƒai ye ƒa daƒo n woi. Zaho wa gna wo ge ƒa ye wo lo.

⁴⁸Wa gna ge, “Nyikanu zhin mi 'ya? Anyika nu zhin maza-je'a?”

⁴⁹Wa wu wa bara bwa wa gna, “Gye! Aza deye ƒa nu zhin ma 'ya n mazaje yi.

⁵⁰Wa je ko ƒe ge, Eza n wo vi mi Dada ƒeye n wo dna she nyi, wo nu zhin mi zado, emi mapui n mi 'ya yi.”

Matta 13

¹Dna n nyipyei hi mi, n'sa do yi Yesu wa fa 'pi wa lo 'dnagbe.

²⁻³ Aza yezhi ƒo nmwa begye. Wa lodna n'ya wa wu aza dna ko, aza kukpe nuwan gbe ƒai kna tnubua. Waku anyi ƒesisi mwa dna n wo wazi. Wa ku do ho si lai “Fwaiza ho ƒo lo nyabye nwo fwa

⁴Wa she nyabye ya fi n'fwa, adoho ƒa kaya kpe n zokwo, a lu ƒa ƒe ƒa ƒa zotnu.

⁵Adoho ƒa kaya kpe napma n kni pele-peleyi. Ba ku pa wolo-wolo kpe 'kni pele-peleyi konu.

⁶Ama nyipyei wowo a ku ƒa wu, n tu ge oba gbegye to lokni lo mwa m.

⁷⁻⁸ Adoho ƒa kaya fi na knawuyi, aknawuyi a ƒa yekma. Ama adoho ƒa kaya fi n'kni manayi, ƒa ga gyi-gyi ndu do na ƒo she. Doha bwa shita, doho shitnanyi, doho tagyi.

⁹Ngye fye na tnubua yi lo, fye wo!”

¹⁰Owa bara ƒe ƒa nya wo ge kni zhin hoi ƒe nabe-sisi yi n ƒa dnaƒo a?

¹¹Wa gna ƒa ge alaye fye fya kpe Eshe Ebemi ƒeye, ama toge azaje m.

¹²⁻¹³ “Ntu ge eza nwo nyai, aƒa ƒewo wa bwa mwa,” ama eza n wo to ceyi m, “Ko odo n wo ncei fyewyi, a ƒeyi la gwo wo. Ce nu zhin mi yi da ƒo nabe-sisi yi ntu ge ƒa wo, ƒai gye, to ƒa bwa awaygan.”

¹⁴“Deye kwa nu enya anabi Ishaya ƒoda, “Ba wo, ama awyega to lon, ƒai shawye, to ƒai gyen!

15“ ‘Ntu ge oba bugba woshan lo, oba tñubua yi gugui lo, bai ku ba wye kpe bai wan gye.’

16Ntu ce nu ba ta gye, bai wo ba bwa awyega, ba jeze be Shekwoyi aba njesun ma ka ba gnan. Amma efya wye zhin anabarka nya nu, ntu ge ba gyelo, nfya tñubua yi, ntu ge ba wo lo.

17Gaiciya, n mwa begye nu anabi n na befyecei yi bo ye ba gyabo fye ku gye, bai wo abo nfye ku wo, to ba min.

18“To fye wo besisi awyega fwaiza nya nwo nyabye yi.

19Zokwo n’nyabye bo kaya kpe nyi, kwo wu gye ’za bugba, n wo wo nabari manayi Shekwoyi Ebemi nya, to wa bwa awyegam, Shetanwa be wa beda yi gwo wo ya n wo bugba.

20Apma ’ba, ekni pele-pelei ko wu gye ’za bugba n wo wo nabari wa gwo kwo na gmada yi.

21Ama ntu ge wo to nabai lo wa so ko dna n wo wye-wyei n, esa wahala laka ntu wo gaiciya ga bo, sai wo fuse, wa fa viɓo.

22Ekni akñawuyi nya ko wu gye za n wo wo nabari, ama abopwawo anyi nya, n’ nyabwa zanshinyi, ba ku Shekwoyi beda gyisun, to wa mi nwo zhin nyaho ntu Shekwoyi bo m.

23Ekni manayi gbedo n’za bugbai nwo wo nabari kwa lowo na wyegayi har wa gni gyiba becei ndu nya bye kokoi, doho shita, shitnai, har ma tagyi.”

24Yesu wa je besisi ye da: “Shekwoyi Ebe wulo ngye fwai za n wo bye nyabye manai n wo fwa,

25Ama n sukwoyi, woi la wangye, owo nuwunyi wa be wa ku alogyi bye fyi na shewyi.

26Shi ashewyi bo ya mwa, alogya mwa bahin ce.

27“Fwaizahi akodogo da be ba gna wo, ‘Zadnagmai, aba yi bo bye nyabye manayi nyi, gye alogyi pa fi lo bodo.’

28“Wa gna ba, ‘Nuwun-yi ho na lo woi bye ba fi.’ Ba nya wo ge, ‘Yi lo yi shi ba ya?’

29“Wa gna, ‘Awo, fye ba shi ashewyi ya bedo.

30Fa ba mwa dnado har esa naba gbe ba. M’ bei gna anyagbei ba tnu alogyi-ya kpa ba gyi ba ’na, ama baye ku ashewyi fi n dobui.’ ”

31-32 Besisi do jesun, wa gna, “Shekwoyi Ebe mi wulo gye musta byegye (nyabye-gye nu ciwiyi ngye fulu) a bye kwo dna fwa. Ko gna nyabye doho-dohoi gba-

gbayi, ama kwo zhin kwa ze shinwan dnagmai har alu a bwa abwi ba n kwa bwala.”

33Wa je besisi ge, “Shekwoyi Ebe ba wu gye nyikoza n wo zhin bredi! She wo sin wyluku, wa gmi kwaje n yisti yi, wa bu ko har kwa wylukuyi gwo vinya.”

34-35 Yesu bo bwa beda n dejiyi n nabesisi yi nu. Anabi bo ku da ionu ge wo bei sanyi besisi n mwa. Ntu cenu, wo to bo wu ba nyahon sai ri besisi yi vi. Pmada anabi nyanyi, “M’beyi dabo na besisi yi; Mi-wu abo bodnai pei-pe i n ba bo so zhi, tunyi shi anyi bei ya.”

36Wa fa ’za zhi n bmi wa lo apyi mi, owa bara gna wo ge wo wu ba awyega besisi ashewyi nya na logyi yi.

37Yesu wa ci ba ge, “Madel, Emi nu zhin fwai n wo bye nyabye manayi nyi.

38Ofa kwo nu zhin anyi, nyabye manayi kwo nu zhin aza Shekwoyi Ebe nya; alogyi kuwa ba nu zhin Shetan aza.

39Nuwunyi n wo bo bye alogyi fi na shewyi nyi, Shetan nu; ashewyi gbe sa ko zhin anyi zo sa, ashewyi gbe-yi a malaika nu.

40“Ngye shi atnu alogyi ya agyi ba’na n nabari ye nyi, nlo nu kwo bei ze nanyi zo sa.

41Mi bei tnu n Ma malaika yi bo tnu jaraba ya n na benukwoyi zhin-yi yi n Shekwoyi ’be.

42Abo she ba ya fi n’na bai gyi ’na, Nbwayi abei cibwi ai gyi anyikna naje.

43Ama Shekwoyi aza bo fun ngye nyipyeyi dna ba Dada be mi. Aza nba na t nubua yi, ba wo.

44“Shekwoyi Ebe wulo ngye duciya nu n za bo gye n dna kni. Ntu dada bo, wa lo wa ku anya kun vinya n wo bo cei ntu ge wa bwa agyiwyeyi kuncce wa si ekni yi konu.

45“Shekwoyi Ebe wulo ngye duciya da nu n wo kun akuta anabmiya-yi ntu cenu wa lafa woi zan amanayi shin.

46Wa pmi wa odo gye n wo ba bwa gyiba, wa lo wa ku anya kun vinya ntu ge wa si kwo.

47-48 “Aba mi a mwi Shekwoyi Ebe mi do n bmiya wan yi, n wo she esa fi n nuwan wa wan abmiya manayi na nukwoyi nyi. Shi ba la nu osa, wa be cei n kma wa tnu amanayi wa ce anukwoyi wa ya.

49Nlo nu kwo bei ze nanyi zo sa-amalaika bo tnu aza nukwoi ya na befyeceyi.

50Abo she aza nukwoyi ya fi n’na, n bwayi abo cibwi ai gya nyikna naje.”

51Wa nya ba ge, “Fye ku awyega bwa?” Ba gna, “E, yi ku bwa.”

⁵²Wa je ba gna ge, “Aza n ba kpe a Yahudawayi owa ye bai zhin ma bara nu, ba ku duciya bwa ngun aba wato alkawali ko-koyi n woi-woi yi.”

Kafinta Nugun Nu To Bwasun?

⁵³⁻⁵⁴Shi Yesu bo ku a besisi ye zo da, wa jeze lo wa 'yi (Nazarat n Galili kni) wa wu aza dna na duwa nyakun, ceiwo ba vinya ntu wo yekpe bo nabo wo-woyi n wo bo zhin nyi.

⁵⁵Ba nya ge, “Wo mi n wuna woi zhin lanyaa? Kafinta nugun nu to bwa gnin? Owo ya ai yi ge Maryamu n? Owa zaje nu to n Yakub yi Yusufu yi, n Siman yi bedo n Yahuda yi n?”

⁵⁶Owa mapwi njesun n fyi n 'ya. Ko zhin wuna wo la ze za dnagmayi a?”

⁵⁷Owo bo kwa san ba, Yesu wa gna ba ge, anabi to n mwa-mwa yi dna wayi n wa za ba yin, sai dna zhi do.

⁵⁸Wa bwa abo wo-woi zhin fyewyi nu bo ntu ba tna gaiciya ga bo.

Matta 14

Shi Abei Wu Yohanna

¹Dna n sayi nu n Hiridus bo wo Yesu bo.

²Wa gna wa za, “Aba gye Yohanna Batisma zhin yi nu la wye-wyei jebwa. Ce nu zhin woi mi woi zhin abo wo-woyi.”

³Ntu ge Hiridus bo la Yohanna wan dna n kurkuku, shi owo nyiko?—Hirodiyas-owo zado-Filibus-nyikwo bei gna wo zhin

⁴Ntu ge Yohanna bo ku gna wo ge ko to bmiya lo wa la won.

⁵Wo bo ba Yohanna wu ama wa wo 'dna kada gyikici kwo laka, ntu ge aza vinya bei gaiciyai ga ge Yohanna zhin anabi nu.

⁶Ama shi Hiridus nyipyei mama nya bo shegundo, wa zhin buci; Hirodiyas nyigun wa, nyanya kwa da Hiridus n mwa.

⁷Wa zhin wo alkawali kala da ge, wo ba ga wo nyaho-nyahoi nwo ye.

⁸Owo 'ya na wu wo nya wo ba ye, wa lo n'sayi wa nya Yohanna tukwo nu bo tu fintala.

⁹Bugba bei la osu wun, ama ntu nyasi bo n wo bei la lu si nyi, to wa ye wa gba wohin naza bye m, wa ce wa ga gbe.

¹⁰A lo a zun Yohanna tukwo ya dna kurkuku.

¹¹A be nwo tukwo yi tu fintala, a ga bi-nyikwoi ho, wa lo wo 'ya ce yi.

¹²Yohanna 'bara be ba la wo nayi ba bi, ba lo baku gna Yesu.

¹³Shi Yesu bo wo lo nu, wa lo 'ya wa lo n wo gmanyi yi aba naza to bo nyi m. Ama aza-yezhi bo ku gye aba n wo lo, ba kun nazhi-yi gbo-gbo ba lo n kma-yi ba vi wo lo.

Yesu Wa Ga Aza Dubu Ngun A tnu Nyagyi

¹⁴Shi Yesu bo piya tu n zhabui, wa gye deji zhi koi pmi wo, wa gye ba sun-sun wa ka ba nyasan-yi gna.

¹⁵N wyesheyi abara be wa 'ba ba gna wo, "Wyeshe nyagyi sa la duya yin to nyaho yi lo n zliabui ye ba gyi m. Ku aza gnami ba si nyagyi na kauye ba gyi."

¹⁶Yesu wa gna ba ge dole nu to a gna ba min, fye ga ba nyagyi ba gyi!

¹⁷"Kninya!" Ca wo ba, "Yi na brede za-zai nu bwa shi lo n gun atnu, n na bmiya yi ngun aba."

¹⁸Wa gna ba ge, "Fye be bai ya."

¹⁹Wa gna aza ge ba ku sase kpe nagbe-gbe, Wa ku brede yi ngun atnu bedo na bmiya yi ngun aba, wa kpa wye wu she wa ba Shekwoyi ge wo tu nyagyi anabarka, wa sa-kwo-ya, wa ga abara ba ga 'za.

²⁰Zaho-zahoyi wa gyi nubo a wo fu. Awiyiwoyi n ba bo ce, a ye ba zhi ba ku nu a cekun awo-cei aba.

²¹(A zanugbayi bo nyi dubu gun atnu (5,000) bam na nyikwo-zayi, n nabi yi.)

²²N sayi-sayi yi Yesu wa gna wa bara ge ba lo 'ya ba piya lo kmayi. Wa ce gni wa gna za 'mi.

²³⁻²⁴Shi wo bo ku aza gnami, wa gun epe wa zhin aduwa. Sukwo kwa ku wo abara zhin kpe 'la, bai sin wahala. Ntu ge ese bo la laka nkala yi anuwa dokwoi kuka.

²⁵Nfyegyiyi bwai ngye sin kna gun anyi, labmi nya, Yesu wa be ba aba woi zan-zan tu nuwan.

²⁶Owa bara fyaku n'dna yi shi ba bo gye wo, ntu ge ba bo gye ngye zafun nukwoyi nu be.

²⁷Ama Yesu wa dabo bai wa gna, "Fye to wo dna m, Emi nu."

²⁸Bitrus wa yi wo, "Dagayi, ngye ho nu gna mi ma be haba mi yi zan-zan tu nuwan."

²⁹Wa gna wo ge, "Be" Bitrus wa gmi n eya walo Yesu aba woi zan-zan tu n nuwan.

³⁰Ama shi wo bei shi anuwan dokwo awye, wa wo 'dna, sai wo ya shin. Wa sawyi ge, "Gnimi, Dagayi!"

³¹Nsai-sayi yi, Yesu wa tabwa wa wan wo. Yesu wa ciwo ge, Kninyi zhin hoi bma bugba ya?

³²Shi ba bo lofi n 'ya, ese kwa fa.

³³Azaje nba bo fi n 'ya nyi, cawo ba, ba gna, "Behin-hin, ho zhin Shekwoyi Nugunu."

³⁴Ba piya kpe Janisarata kni.

³⁵N sayi-sayi yi, a ku wo zunba ge gye Yesu la be. A tnu aza ba lo laba bai gna za vinyan ge ba be nba nyasan-yi akaba gna.

³⁶Ba gyiwo wye ge wo la bwa yeye, ba towo ejekpe bwa aza nba bo ku to bwa viyan, ba ku kagna bwa.

Matta 15

Awyidna N Nafo Bwashi Yi

¹Afarisiyi na Yahudawayi atukwodayi, ba kun n Urushelima ba be ntu ge ba nya Yesu abenya-nya.

²Ba nya wo ge, "Kninyi nu zhin to ho abara yi vi a Yahudawayi akunnun ko-koyi ma? Ntu ge ba ta gye ba nuwan lo n kunnu yi ge, ba nabwa ba kpe nyagyi gyi m."

³Wa dna begbe ge, "Kninyi nu zhin efya kunnu yi zun Shekwoyi 'wa gna?"

⁴Ntu ge Shekwoyi 'wa gna ge, 'Ga ho dada mwa-mwa n ho 'ya yi, ezaho-zahoi wa kni wa zamayi akmi, wo ba fi.'

⁵⁻⁶ Ama fya gna, 'Ko oha zamayi fyi n sangyi, zanyikwoci ha ku gyi agyiwye gaga ko a Ikklisiya ha fa ba fi n sangyi?' Nlo nu zanyikoci awyidna wun Shekwoyi owa ya, n wa gna eza wo ga wa zamayi mwa-mwa woi lura bai nyi.

⁷Efye akoce-dnayi anabi Ishaya bo ku anabci zhin dai-dai tu fye tukwo,

⁸'Aza deye gna, ba ga mi mwa-mwa, ama oba bugba mwa kpa lo n mi yi!

⁹Eba latu to na pmayi lo n, ntu ge ba wu awyidna nu n na zhin maimako Shekwoyi nya.'

¹⁰Yesu wa yi azaye-zhi wa gna ba ge, "Fye wo bo mi da, fya zhin kukari fya bwa awyega.

¹¹Fye ta tu cegye ntu ge fya gyi nyagyi cegye da m. Nya fye da nyi, kwo nu ze fya cegye da."

12Owa bara be ba gna wo ge, “Ho la bugba wun a Farisiyi ya ntu beda bo nha da nyi.”

13-14 Yesu wa gna ba, “Shiwan doho-dohoi mi Dada nu to shi kon, a ba shi kwo ya, ntu ce nu fa ba. Ba zhin awyebuayi nu, bai gni awyebuayi busi oba vinya, baba kaya fyi bwokun.”

15Bitrus wa nya Yesu bo ge, wo wu beda ye awyega n wa da ge, eza ta tu cegye ge wo gyi nyagyi cegye da nu m.

16Yesu wa nya wo ge, “Ho to kpe ganyin?”

17Ho ta gye nyagyi n ho gyi, ko lo nubo nu, kwa je kunya na miyin?

18Ama abeda nukwoyi kun n bugba nukwoyi nu, ba tu 'za cegye n wo da ba nyi.

19N bugba nu na nubo-zhin nukwoyi kun, za wu, anagbai zhin, evi, akata-ce, ntukwo mwa yi.

20Abo deye nu tu za cegye, ama nya to lo n kwo ba tu ho zafun cegye ge, ha gyi nyagyi n tna bwana yi m.”

Abo Wo-woyi

21Yesu wa gmi n knihi wa lo har milu shitnu, wa lo Tayar n Sida.

22Ka'ana nyikwo ho n dna bo, wa be Yesu aba wa gna wo ge, “Gye mi sun-sun, O Dagayi, Osu Dauda Nugun! Emi nyigun lo n zafun nukwoyi koi gnawo gna-gna cici.”

23Ama to Yesu wa dna wo begbe m. Owa bara gna wo ge, “Nya wo ya, gye wo gna yi gna-gna lo nwo wyegyiyi.”

24Yesu wa gna nyikwozayi ge, “A tnu miyi ma bma a Yahudawayi nu zhin, toge abye do m.”

25Ama wa be wa ya shi wa ga wo mwa-mwa, wa je wo wyegyiyi, “Dagayi bma mi zhin.”

26Yesu wa gna wo ge, “Ko to bmiya a la abi nyagyi a ga amwi m.”

27Nyikwozahi wa gna, “A wo lo nu, ama awyiwoyi n ba kaya zhi n tebur sinta nyi, a zhin a fa amwi biyi ba gyi.”

28Yesu wa gna wo, “Nyikoza, oho gaiciya ga mwa lo, nya ho ye, a la ga ho.”

29Nsayi Yesu wa jeze lo Galili 'la, wa gun lo pe wa sase tu bo.

30Deji kwa be wo na zabmazhi yi, awyebuayi, atakpe-beda n na nyasan yi gbo-gbo a ku ba ya zhi n Yesu abye, wa ba ka gna vinya.

³¹Be wowoyi. Atakpe-bedai dabo, aza n ba bo na bwai ko apita gmanyi-gmanyi, bai bwa awoi-woyi, aza bmazhi yi zan-zan bai gyagna laba, awyebuayi gya wyeba laba, Cawo deji, bai la Shekwoyi Isralila nya tu.

³²Yesu wa yi wo abara wa gna ba ge “Aza ye sun-sun wan mi lo, baku anyipyei bwa gun ata n miyi, bai to nyagyi ce lo n, mi ta ye ma gna ba mi lo nun, kada azaho zunfyi zokwo.”

³³Owo abara nya wo ge, “Yi ba bwa nyagyi na n zhabui ye ya ga deji yakwo ye ba gyia?”

³⁴Yesu wa nya ba ge, “Fye nyagyi shi lo nsun na? Ba gna brede ngun tnaba n nabmiya yi fyewyi.”

³⁵Yesu wa gna aza vinya ge ba ku sa-se zhi 'kni.

³⁶Wa go brede tnaba yi na bmiya yi, wa zhin Shekwoyi godiya, wa sa ko ya ga wo abara ba pmi ba ga 'za.

³⁷⁻³⁸Zaho-zahoi wa gyi nubo a wo fu. Anugbayi vinya bo nyi 4,000, gbo na nyikozayi n na bi yi. Awyiwoi n ba bo ce a ye ba zhi, ba nu a chekun tnaba.

³⁹Yesu wa gna aza ami, wa lo 'ya ba piya lo Magadan 'kni.

Matta 16

Bai Ye Tuze

¹Nwiyiho yi a Farisiyi bedo na Sadukiya ba be ntu ge ba mwi Yesu, ngye shi wo gna ge wo zhin Masihu nu nyi, wa wu ba atuze nshe bmana.

²⁻³Wa dna ba begbe ge, “Fye zhin a beyekpeyi nu eshe bmana nya, nshe wu n byei-byei yi, ko wu ge efye ba gyi agya 'bo bmiya, nshe wu n byei-byei yi, n labmi yi ko wu ge abo ta dagma n wiyi yi m.” Ama fye ta mi fya ba atuze anyi nya m.

⁴Abye nukwoyi, atna gaiciya ga yi, fye nya atuze bo n she bmana, a ta wu fye atuze do n du Yunana nya n. Yesu a la wo nya ka, wa fa ba zhi.

⁵Ba piya kpe n kma, abara paje ge, gye yi ku zamwi to yi be n nyagyi shi m.

⁶Yesu wa gna ba ge, “Fye zhin peceiye n Yisti a Farisiyi nya, n na Sadukiya yi.”

⁷Ba gye ge wo da lo nu ge shi ba zamwi to bai be n nyagyi yi shi nun.

⁸Yesu wa kukpe bo ba zhin nubo cei, wa gna ba, “Efye, aza a gaiciya ga gba-gbai da, Kniyi nu zhin fyei gna fyehin tukwo gna-gna ge, fye to nyagyi shi lo ma?”

⁹Fye ta shan ganyi kpe n? Fye ta pa lo aza 5,000 n mi bo ga ba nyagyi n brede yi gun atnu, nya ko bo ce kwa nu a cekun?

¹⁰Fye tapa aza 4,000 bo lon, ba gyi har koi ce n?

- 11Knihi nu ba zhin fya zhin nubo ge mi da nyagyi nu bo a? Ma je fye gna, 'fye zhin peceiye n yisti a Farisiyi nya yi bedo na Sadukiyi yi."
- 12Gni bo nu ba kpe ge yisti konu, wo da wu-wu nukwoyi nu bo na Farisiyi bedo na Sadukiyi wu nyi.
- 13Shi Yesu bo si Kaisariya Filibi, Wa nya wo abara ge, "Aza gna ge mi zhin nyikana?"
- 14Ba gna, "Azaho gna Yohanna batisma zhinyi, azaho ge Iliya, azoho ge Irimiya-ko anabi ho."
- 15Wa nya ba ge, "Fyehin gna ge mi zhin nyika na?"
- 16Siman Bitrus wa gna ge, "Kristi Masihu, Shekwoyi Wye-wyei da Nugun."
- 17Yesu wa gna wo ge, "Shekwoyi la ho tu anabarka, Siman, Yunana nugun. Ntu ge emi Dada n wo dna 'she nyi, wo na wu ho beye, zanyikoci nu ton.
- 18Ho nu zhin Bitrus, kuta; n na pma ye nu miɓa mi mi Ikklesiya. Iko anapyi nya ta mi kwa zhin nasara n ko yi m.
- 19Miɓa ga ho mabudi Shekwoyi bemi nya, abokunmi doho-dohoi ha gu nanyi, a la ba gu 'she, ado n ha guya, ala ba guya 'she."
- 20Wa pmi wa kun wo abara ge, ba to gna aza ge wo zhin Masihu nu m.
- 21Tunyi n sahi, Yesu wa gna Wo abara Urushelima lo bo pei-pe, wa wu ba nya ko bo sin wo bo- Wo ba sin wahala na Yahudawayi a tukoda 'kun, a wu wo, ama dna na nyipyeyi gun ata avun, wo bei je wye-wyei bwa.
- 22Ama Bitrus wa pmi wo gni gna-gna wa gnakni wo, wa gna, "Shekwoyi sauka, abeye ta bwa ho lo nu m."
- 23Yesu wa gna Bitrus, "La mi ka lo bwai, shetan! Ho zhin kuta bonyice nya-nu maba. Eza bemwi nu n ho da, Shekwoyi nya nu to m."
- 24Yesu wa pmi wa gna abara ge, "Ndei zaho-zahoi ye wa vi mi, sai wa na wohin tukwo aɓo, wa la wohin zundu, wa vi mi.
- 25Ntuge zaho-zahoi wa shi wo wye-wyei ntu wohin tukwo bo, ko ba wo bwi. Ama eza n wa bwi wo wye-wyei ntu mi bo, wo ba je kwo bwa.
- 26Kni gyibai nu n za ba bwa ge anyi vinya ba ku ze wo nya, ama wa tna wye-wyei nyalo-nyalo nya? A ba mwi wye-wyei nyalo-nyalo nya do n kniyi ya?
- 27Ntuge Emi, Zanugun, baɓe n ma malaikayi dna latu Emi Dada nya, miye da zaho-zahoi owa shi wa zhan bo wu.
- 28"Behin-hin, azaho zhi lo 'ya n ba bei gye Mi, Mi be dna Mi 'be mi."

Matta 17

Yesu Dna Nwo Mwa-Mwa

- ¹Shi abo bwa anyipyei tnai, Yesu wa ku a Bitrus, Yakub n wo zadoi ngye Yohanna, wa lo bai n 'pe yakwo tukwo, bahin-bahin.
- ²Ba zhi bai shi wa wye, ba gye wo la shando, Owa wyebai bmiyana ngye nyipyei, Owa je ba ku wu bui-bui yi pau.
- ³Nsa gmanyi yi, ba gye Musa n Iliya yi nku be bai dabo wo yi.
- ⁴Bitrus wa ci ge, Dagayi, ko bmiya lo ya ku yi nya kpe 'ya. N ha ye, miɓa kpe alubui gun ata, gmanyi jntu ho ɓo, gmanyi ntu Musa ɓo, gmanyi ntu Iliya ɓo.
- ⁵Wo ye dna beda mi, anyi buzangna nya be, kwa tu ba fun, begye kwa gmi na nyiyi kwa gna, "Emi Nugun Yeye yi nu nyi, mi bwa gmada n woi zam. Fye vi wo beda."
- ⁶N sayi abara miya zhi na wyei knianyikun, ednai wo ba.
- ⁷Yesu wa be wa to ba bwa wa gna ba, "Fye kuka, fye to wo'dna m."
- ⁸Shi ba ɓo sha wye, ba bwa Yesu nu gye gni n kunsun n bai.
- ⁹Shi ba ɓo shin zhi 'pei, Yesu wa gna ba ge ba to gna zaho-zahoi abo ba ku gye nyi m, sai wo la laka n vingwo kpa.
- ¹⁰Owo abara ba nya wo ge, "Knihin nu zhin a Yahudawayi a tukwodai gna ge sai Iliya la jeze be kpa kafin Masihu wo be 'a?"
- ¹¹Yesu wa gna ba ge ba da gaiciya nu, "Tile Iliya wa be kpa wa zhan 'bo zhi dai-dai.
- ¹²Nkusun kuwa, Iliya la bebe kwo, ama a to kpe wo ye m, har a ga wo wahala. Emihin, Masihu, miɓa sin wahala n ba kun."
- ¹³Gni ɓo nu abara kpe ge wo da Yohana batisma zhinyi nu ɓo.

Yesu Wa Ka Obi Gna

- ¹⁴Nba zo kakazhi yi n'pe sinta, bagye deji zhi koi pmi ba. Ezaho wa be wa yashi n Yesu abye wa gna,
- ¹⁵"Dagayi, gye mi nugun sun-sun, ntu ge wo n'fi kpe-kpe nyasan yi lo, woi gya zhin n mwa. Nsahoyi, wa shefi n'na ko nuwan.
- ¹⁶Mi la be woi ho abara aba, ama bato mi bai ka wo gna m."
- ¹⁷Yesu wa gna, "Efye akala-kpei, atna gaiciya ga yi, miɓa bwa atna nfyeyi har kni sai na? Fye bemi woi ya."

¹⁸Yesu wa gnakni zafun nukwoyi nkwo bei dna bihin nyi, kwa gmi n wo, wa bwa lafiya n sayi-sayi yi.

¹⁹Avun abara nya Yesu ge, “Knihin na zhin, to yi mi yi gmi zafun nukwoyi ya ma”?

²⁰Yesu wa gna ba ge ntu fye gaiciya ga gba-gbai bo nu. “Ntu ge fye bo n gaiciya gai lo ko ngye fulu byegye, fye ba mi fya gna epe ye ge, ‘Laka,’ kwa laka. Boho to lo nkwo ta ye zhin m.

²¹Ama zafun nukwoyi ye pya ta ye gmiyan, sai na duwa zhin yi na zumi yi be.”

²²⁻²³Nwiyi hoyi, bai ye fyi n Galili, Yesu wa gna ba ge, “Aba ga Mi naza kun n ba ba wu mi nyi, ama nyipyeyi tayi, m’bei je wye-wyei bwa.” Bugba wun wa bara zin.

²⁴Ba si Kafarnahun a gadu goyi ba be ba nya Bitrus ge, “Efye maigida ta gba gadu n?”

²⁵Bitrus wa gna, “Sosei, wo gba.” Wa lo api mi wa da bo Yesu yi, ama kafin wo bwa ‘sa wa dabo n woi, Yesu wa nya wo ge, “Bitrus, ha gye wuna? Asu kpe aza nu gadu, ko aknido da n na ku ba gyi nkun yi a?”

²⁶⁻²⁷Bitrus wa gna, “Aknidoda nu.” Yesu wa gna, “Ashe akni abi ku pwo! Ama to ya wun ba bugban, lo ‘dna gbe ho she ogwo, ebmiya n ho ba wan nabye, ha la kwo gbe ya, ho ba gye agyiwyeyi fyi nba ba kun yi gadu gba, ha be cei ha ga ba.”

Matta 18

Fye Ku Ze Ngye Abi Nawyi

¹Sa fyewyi abara be Yesu aba ba nya wo bo ntu ‘za bo nwo bei zhin za-dnagmai dudu yi n Shekwoyi ‘be mi.

²Yesu wa yi ‘bi nawyi be cei dna ba tasin.

³Wa gna, “Sai fya ye abui n Shekwoyi aba, fya fwa alaifi, fya ze ngye abi, n to lo nu n, fye ta lo Shekwoyi ‘be mi m.

⁴Ntu ce nu, eza n wa gba wohin ngye binai ye, wo nu bei zhin ‘za-dnagmayi dudu n Shekwoyi ‘be mi.

⁵Njesun eza wa gwo binai lai ntu mi ‘ye bo, wo gwo Mi nu.

⁶Ama ndei eza zhin binai n wo kpema Mi wa fwa gaiciya ga bo ko ba gna bmiya a gyi wo ata wyigwo nya n begye a she wo ya dna n ‘la.

⁷“Aiya nanyi aba ntu kwo abo nukwoi bo, tile a jaraba be, ama aiya n za aba n wa be n jaraba bonyi cencya yi.

⁸Ntu ce nu ndei oho bwa ko pita ba zhin ho ha zhin laifi, sai ha zunkoya ha ko sheya. Ko gna bmiya lo ha lo 'she n bwai zun-zunyi ya ko pita ndoi n ho ba lo ana pyi nha bwai bedo na pitai gun aba.

⁹"Ndei ewye ba zhin ha zhin laifi, sai ha bi ko ya ha ko sheya. Ko gna bmiya lo ha lo 'she n wyei gmanyi da ho dna na napyi nawyei gun aba.

¹⁰"Fye zhin peceiye to fya ci abi naiye wyegbam. Ntu ge oba amalaika 'she zhin ba lo mi Dada aba cici.

¹¹Emi, Masihu, ma be ntu gema gni abwi-bwi yi nu.

¹²"Ndei eza n akni yi tagyi, gmanyi kni kwa bwi, wo ta fwa shi ciwa-gmanyi-cei-ciwagmanyi wa lo ape sepa wo zan gmanyi shin nkwa bwi nyin?"

¹³Nwa ko gye, wo ba dagma n mwa ntu ko bo, ndu shi ciwa-gmanyi-cei-ciwagmanyi nba cefyi nabi n lafiyai nyi.

¹⁴Nlo nu; Emi Dada bomwi nu to gmanyi dna na bi naiye wa bwi m.

Yi Zhin Aje Gafara

¹⁵"Ndei oho zado wa zhin ho laifi, lo wa aba ho gna wo. N wa wo ho, wa ku wo laifi da, ho la wo jeze be cei.

¹⁶Ama n wo to wo n, ha la 'za gmanyi ko gun aba fya lo ha jewo wo laifi wu ntuge asaida-da bai wo.

¹⁷Ndei wo to go wo laifin, ha lo n bedai-yi n Ikklisiya. N Ikklisiya dabo kwa ku dah, to wa du wa yen, Ikklisiya wo ze ngye tna-viyi, to a zhin jedobe nwoi m.

¹⁸Ma gna fye-nyaho-nyahoi nfya ko pa nanyi, a la ko pa n 'she, nyaho-nyahoi nfya loya nanyi, aba ko loya n 'she.

¹⁹"Ma je fye gna, ndei aza gun aba ku gbe gun nanyi ye ba gyiwe ntu nyaho bo, Emi Dada n Wo dna 'she nyi, Wo ba zhin ko ga fye.

²⁰Ntu ge aba naza gun aba ko gun ata yezhi ntu ge ba zhin minya nu, Mi dna lo nba tasin."

²¹Bitrus wa be wa nya wo ge, "Dagayi, mi ba zhin mi zado gafara abwa knihin nu woi ya zhin mi laifi'a? Abwa tnaba?"

²²Yesu wa gna wo, "Awo! Abwa tnaba har shi-tnaba."

²³Aba mi a mwi Shekwoyi bemi do n'su yi n wo bo ye wa ku wa gyiwe do, wa gye nya wo ceyi.

²⁴Dna nanya dokumi, a be wo ntada hoi n wo bo cei shi ₦10,000,000.

²⁵To wa mi nwo gban, osu wa gna a la wo kun bedo n wo nyikwoi na bi yi, n na nyai n wo cei vinya.

²⁶“Ama zahi wa yashi wa gyi 'su kni, 'woi kwa mwi kpe wohin, wa gna, 'suku-suku, bwa hankuri n mi yi, miba gba ta yi vinya.’

²⁷“Osu hi wa gye wo sun-sun wa wo loya, wa ku eta yi zo wo.

²⁸“Ama she zahi bo gmiya n'su aba, wa lo zaha 'ba n wo bo tai shi wo ce ₦2,000, wa ta bwa shi wo n sha wa gna wo ge wo gba wo ta, n sai-sai ye.

²⁹“Eta-dahi wa ya shi wa ba wo ge, 'Zhin hankuri ha gami 'sa fyewyi, mi ba gba ho vinya.’

³⁰“Ama to wa fwan, wa la wo wa wo dna n kurkuku, sai ge wa zo eta yi gba vinya.

³¹“Zahi a-nugundo ba lo ba gna osu bo ko ku zhin.

³²Osu wa yi wo n wo bei ku 'ta zo wo nyi, wa ci wo ge, 'Oho, bugba nukwoyi da, mi ku hota yakwo yi zo ho vinya, ntu ge ha gna mi gye ho sun-sun.

³³Ko to bei kunce ha gye ho zado sun-sun ngye shi ma gye ho sun-sun?”

³⁴“Osu minagyi kwa laka wa wo dna na wahala ba sai wa zo etahi gba ce vinya.

³⁵N lo nu Emi Dada eshe nya zhin fye n fyeto ye nfya bugbai, fya zhin fya zaje gafara m.”

Matta 19

¹Shi Yesu bo ku abeda ye zo da, wa fa Galili, wa pi Urdun ya wa jeze lo Yahudiya.

²Azayezhi mwa ba vi wo, wa ka ba anyasan-yi gna.

³A Farisiyi ho ba be ba mwi wo, n nabai wa dabo nko ba zhin ba wan wo. Ba nya ge, “Ho ga gbe ge a gna nyiko ami?”

⁴Wa gna ba ge, “Fye ta ba Shekwoyi beda n? Dna Shekwoyi beda a ka fi ge, Shekwoyi bo zhin zanugbai n nyikwozayi nu n kmisunyi.

⁵⁻⁶ Ntu cenu, Zanugbai ba fa wo dada n wo 'ya yi wa nyima wo nyikwo nyalo-nyalo. Oba aba ba ku ze gmanyi-aza gun aba nu ton, ama eza gmanyi! Nya Shekwoyi la kwo yebedo, eza ta gna kwa jeya m.”

⁷Ba nya ge, “Kninya zhin Musa wa gna eza ba mi wa gna wo nyikwo ami n wasika amignanya yi a?”

⁸Yesu wa gna ba, “Musa bo da lonu ntu fya bugba nukwoyi na bugba gnanakwoi bo nu, ama Shekwoyi beye nu to bo nun, n kmisunyi m.

⁹Ma gna fye, zaho-zahoi wa ya wo nyikwo, ndei anushin bo nu ton, wa la do, wo ku anagbai zhin.”

¹⁰Yesu abaraba gna wo ge, “Ngye kwo wulo lonu, ha gye kwo gna bmiya lo to za pa mulan!”

11Yesu wa gna, “To vinya nu nba ba mi ba zhin lo nu m, sai dai aza n Shekwoyi wa bma ba zhin.

12Azaho lo na ma ba n zhin akala-gbai, azaho kuwa, aza nu ze ba akala-gbai, azaho ta ye mula pa bon, ntu Shekwoyi be-mi bo. Fa za wo ba mi, wa gwo Mi beda.”

13Abe na bi nai n Yesu aba ntu ge wa kpe ba bwa wa zhin aduwa. Ama owa baragy minagyi, ba gnakni ba ge ba gna wo gna-gna.

14Yesu wa gna, “Fye fa abi naiye ba be Ma ba, fye to nya ba ya m. Adeye pya, ba zhin Shekwoyi be-mi nya nu.”

15Wa kpe ba bwa, Wa tu ba anabarka ba lo ba nya.

Nyabwayi Wa Ma-Wyeya Wa Lo Wo Nya

16Zaho wa be wa nya Yesu bo ge, “Dagayi Manayi, kni emanayi nu mi ba zhin ma bwa wye-wyei nyalo-nyalo nya?”

17Wa nya ge, “Manayi? Eza bwa sun lo gmanyi nu n Wo zhin manayi gaiciya nya (Wo nu zhin Shekwoyi.) Ama gbedna miba dna ho, ho ba mi ha lo she ndei ha shi awyidna bwa.”

18Wa nya ge, “Akni deya?” Yesu wa gna wo ge, “To wu za m, to ha zhin anagbayi m, to ha wyi vi m, to ha ce akata m,

19Ga ho dada mwa-mwa n ho 'ya yi, ha ye ho kun-zhi yi ngye shi ho ye hohin tukwo!”

20Wa gna, “Mi zhan beye lo vinya. Knihin nu miyi ce ma zhi'a?”

21Yesu wa gna wo, “Ndei ho ye ha ze za nu-nuyi, lo ho ku anya kun vinya n ho cei, ha ku agyiwyega a san-yi, ho ba bwa duciya n she, ha be ha vi mi.”

22Ama she biniyi ye bo wo lonu, wa laka bugba wun yi, ntu ge wo bo zhin duciya da nu mwa.

23Yesu wa gna wa bara, “Gaiciya, kwo dna bo lo duciya da wa lo Shekwoyi 'be-mi.

24Ma je fye gna, kwo du lo n sauci lakunmi kwa du naci bwo da duciya da wo lo Shekwoyi 'be-mi!”

25Bedahi kwa wo abara ba gna, “Nyikanu ba shan pwo nanyi ye nba shi nyi 'a?”

26Yesu wa shi ba wye zun wa gna, “N zanyi-kwoci wyegyeyegye, zaho to lo m! Ama n Shekwoyi yi, abo vinya ba ye zhin.”

27Bitrus wa gna Wo ge, “Yi ku anya vinya fa ntu ge ya vi Ho. Yi ba bwa kninyi dna nkwo mi'a?”

²⁸Yesu wa gna, “Gaiciya, esa Mi, Eza Nugun, bei sase tu Mi shinkpegye latu nya n Shekwoyi Bemi, fyehin, Oma bara bei sase kpe na shin-kpegye awo cei-aba fyei da Israilayi abye awo-cei-aba owa.

²⁹“Zaho-zahoi n wo la wa pyi fa, nwa zaje yi, n wa mapui, n dada yi, n 'ya yi, nnyikwo yi, nabi yi, kwo duciya, ntu ge wa vi mi, wo ba bwa gyiba har abwa tagyi ngye shi wa fa anya sun, njesun wo ba bwa wye-wyei nyalo-nyalo nya.

³⁰Ama n mwa begye nba zhin akmisunyi saiye, ba bei ze a kmaknayi, akmaknayi ho n saiye ce bei ze a kmisunyi.”

Matta 20

¹Fye wo be-sisi do Shekwoyi 'bemi nya. Ekni da ho bo gmi n labmi-labmi yi woi ye aza ba zhin tnu-tnu wo fa.

²Ba ku shiri zhin ge wo ba gba ba ₦20 n nyipyeyi gmanyi wa lo bai na tnu-tnu ba.

³Dna sado, woi du wonya ya, wa gye azado zhi bai ye tnu-tnu.

⁴Wa tnu bai nwo fa, wa gna ba ge wo bei gba ba nya wagye kwo bmiya nyipyeyi yi lazo.

⁵N nyi-pyeyi yi na tukwo, n jesun ngye sinkna gun ata sa, wa je azado ku wa lo cei, wa bwa ba bo gmanyi-gmanyi nu gna.

⁶Ngye sinkna gun atnu wyeshei, wa lo zhimi wa gye azaho zhi n tna tnu-tnu, wa nya ba ge, “Knihin nu zhin fyei zhi n tna tnu-tnu, har nyipyeyi zo ye vinya?”

⁷“Ba gna wo ge, 'Ntu ge zaho to ga yi tnu-tnu m.' Wa gna ba ge, 'To fye lo daza n mi fa.'

⁸“N wyeshei, wa gna gyiwye gbai ge wo yi aza be cei wa gba ba, wa ya gba naza a kmaknayi!

⁹Aza na bo ku ba n sinkna gun atnui nyi, wa gba ba ₦20.

¹⁰Shi aza kmisunyi bo be, ba gye ge ba ba gwo ndu bo. Ama ba gwo naira shiba-shiba (₦20) nu ce.”

¹¹⁻¹² Ba ya wyice bai gna, “Aza dohi ba bwa tnu-tnu'zhin awa gmanyi nu, hoi ga ba naira shiba (₦20) ngye yi, eyi n nyipyeyi ku zo kpe yi nyi.”

¹³Wa gna gmanyi nbami, “Mi nugundo, ai mi to zhin ho be nukwoyi m. Ho to ku ye ge ho ba zhin tnu-tnu nya wyi-zon tu naira shiba-shiba tukwon?”

¹⁴Gwo ha lo. Emi nubo-zhin nu ma gba za vinya nsun dai-dai.

¹⁵Ko zhin laifi nu ma ga za ma gyiwye ndei mi ye lo? Ho bagyi minagyi shi mi zhin bo manayi?

¹⁶Nlonu kwo ɓa ze ge kmaknayi ɓa ze kmisunyi, kmisunyi njesun ɓa ze kmaknayi.”

Tile Tukwoda Wa Zhin Bauta

¹⁷Shi Yesu ɓo wan zan woi lo Urushelima, wa ku wo abara awo-cei-aba wa pmiya gni bai.

¹⁸Wa gna ɓa nya kwo ɓo zhin wo n bwai. “Aɓo ga mi dna na pirist yakwo akun, bedo na Yahudawayi atukwodai, ɓa da mi wa efyi nya, ɓa zun mi ’kni.

¹⁹Bai la mi ga dna na Romayi asoja akun, ɓai kpe ma gye, ɓa zun mi du, nyi-pyei tayi miye laka n wye-wyei jesun.”

²⁰Yakubu n Yohanna yi, Zebedi anugun, Eɓa ’ya ɓe n ɓai n Yesu aba, wa ya shi, wa gyiwe.

²¹Yesu wa nya wo ge, “Ho ye kninya?” Wa gna Yesu ge, “N ho ebe-mi, ho ɓa ye ema nugun ngun-aba ɓai sase na shin-kpegye, eza gmanyi nho bwai-zhe, eza gmanyi n bwai-pmi?”

²²Ama Yesu wa gna wo ge, “Ho ta kpe ɓe ye lo nho nya min.” Wa pmi da Yakubu n Yohanna yi wa nya ɓa ge, “Fye ɓa mi fya sin n kofi azhin-nya n mi ye ma sin nyi?” Ba gna, “E, yi ɓa mi!”

²³Wa gna ɓa, “Fye ɓa ku sin nkwo. Ama mi ta mi ma da, aza n ɓa ɓei sase kpe na shinkpegye n wo Vivi n Mi yi m. Aba deye zhin ntu naza ɓo nu n mi Dada wa ga ɓa.”

²⁴Abara je gun awo a gyi minagyi, nɓo yi n Yakub n Yohanna yi ɓo nya nyi.

²⁵Yesu wa yi ɓa zhi vinya n wo aba wa gna ɓa, “N na byedo aba, asu zhin ɓa wu ikwo. Zadnagmai doho-dohoyi a ka ikwo wu naza ɓa nɓa kafi n wo sinta.

²⁶Ama nfya ɓa, ko wu lo gbo. Zaho-zahoi n wo ye wa ze zadnagmai nfye mi, tile wa ze fyenu n fya ɓa.

²⁷Ndei ho ye ha tu na za she vinya, tile ha zhin bauta ngye fyenu.

²⁸Tile efy-a-ɓo zhin-zhin ɓa wu gye Mi nya, ntu ge Emi, Za Nugun, to ɓe ntu ge azhin mi bauta nu n, ama ma zhin bauta, ma ga mi wye-wyei ngye nya-doshan ntu naza begye ɓo.”

²⁹Shi ɓa ɓo fa Jeriko, deji kwa vi Wo lo.

³⁰Awyebua yi ho gun-aba, n sase zhi n zokwo gbe, ɓa wo ge Yesu duya ɓelo n zokwoyi. Ba la begye tu ɓai gna, “Dagayi, Osu Dauda Nugun, gye yi sun-sun.”

³¹Aza-yezhi ɓa gna ɓa ge ɓa ku ce pyi, ama ɓa gna begye la-latu.

32-33 Shi Yesu ɓo si ɓa aba, wa kpe gni zokwo wa nya ɓa ge, “Fye ye ma zhin fye knihin na?” ɓa gna, “Dagayi, yi ye ya gye wyeba nu.”

34 Oɓa sun-sun a wan Yesu, wa to ɓa wye bwa. Nsayi-sayi yi, ɓa gye wyeba, ɓa vi Wo.

Matta 21

Yesu Wa Lo Urushelima

1 Shi Yesu n wa bara yi ɓo ga Urushelima si, vivi n zhi ɓiyi hoi ai yi ko Betifaji n kpe n Zaitun pe, Yesu wa tnu wa bara gun aba ɓa lo ezhi ɓiyi, n ka zhi nkwa bye.

2 Wa gna ɓa, shi fye lo, fye ɓo gye zhagawyi (jaki) gyi gni n kwo ɓi yi, fye lo ɓa fya ɓe bai ya.

3 Ndei zaho nya fye ɓo fye zhin, fya gna, Dagayi n ɓa pma yi lo, a ɓa fa fye fya ɓe ɓai.

4 Deye ɓo zhin ntu ge kwa nu anabi beda nu.

5 “Gna Urushelima ge Okwo Su ɓe da kwo lo, n tukwo gba yi, ntu zhagawyi ɓi yi.”

6 Abara yi gun aba ɓa zhin shi Yesu ɓo da.

7 Ba ɓe zhagawyi yi Inkwo ɓi yi, ɓa ta e pe n ɓi yi, Wa gun tu.

8 Azaho na za-yezhi, ɓa kma ɓa 'je bai ta-zhi n zokwo azahoi gba fintolo ɓai ta-zhi n Wa bye.

9 Aza-yezhi nɓa ɓo gyi nabye, naza yi ɓa-ɓo nyi navun, ɓa la begye tu ɓai gna, “Shekwoyi tu Osu Dauda Nugun anabarka.” “La wo tu! Shekwoyi ‘Za la ɓe,’ Tu wo anabarka, Dagayi!”

10 Aza vinya n Urushelima hankali a laka, shi wo ɓo lo zhimi lo, ɓai nya ge, “Nyikanu Wo ya?”

11 Aza-yezhi ɓa gna ɓa ge, “Anabi Yesu nu n wo gmi n Nazarati Galili nya nyi.”

12 Yesu wa lo-dna na duwa-nyakun wa kun a gnikwo gni yi ya. Wa mi agyiwyeshan yi a tebur ya, ɓedo na lumpa yi aza nya n ɓa ɓo zhin ɓai kun alukpe nyi.

13 Wa gna, “Littafi Gyi-gyi-yi a gna, ‘Ema duwa-nyakun zhin aduwa zhin ba nu, ama fye la kwo ze avi puwa.’”

14 Wyebuayi n zabmazhi yi, ɓa ɓe wo aba na duwa-nyakun, Wa kaba gna dna ɓo.

15 Ama shi a prist ɓedo na Yahudawayi atukwoda yi ɓo gye ɓo wo-woi n Wo bei zhin nyi, ɓa je abi wo ɓai la wo tu, ɓai gna, “Shekwoyi tu Dauda Nugun anabarka,” ɓa gyi minagyi, ɓa ci Wo ge, “Ho wo ɓo lo na ɓi ye zhi ɓai da nyi?”

16Yesu wa ci bage, “E-mi wo lo. Fye to shin Littafi Gyi-gyi-yi ban?” A ci ge, “Har abi putu ba ci wo!”

17Wa laka wa jeze-lo Betenya, wa-a wan 'gye n bwai.

18N labmi yi, woi je ze lo Urushelima, wa wo mikun kwoi gun wo.

19Wa gye gbayi gni n zokwo gbe. Wa lo ge kpekni wo ba gye kwo gyi kpe, ama wa gye afintolo kawai. Wa ci kwo ge, “Ho ta shan gyi m!” Safyewyi, kwa ya bwa.

20Ca wo wa bara ba nya ge, “Kninya zhi gbayi yi kwa bwa wolo-wolo lo nu'a?”

21Yesu wa gna ba ge, “Behinhin, ndei fye gaciya gai lo, ntna shaka, fye ba mi fya zhan beye pya har ma ndu bo. Fye ba mi fya gna Zaitun 'pe ye ge, 'Laka ha she dna 'la,' kwa zhin lo nu.

22Fye ba gwo nyaho-nyahoi, nfya zhan duwa ntu kwo bo ndei fya ga gaciya.”

Ayahudiyi A tukwoda Agam

23Shi wo bo la jeze lo aduwa-nyakun, woi wu nya, a pirist dnagmai, na Yahudawayi a tukwo dayi, ba be waba bai ye ba kpe za wo bo ga wo iko wa nya agnikwo gni yi ya na duwa-nyakun nyi.

24Yesu wa gna ba ge, “Miba gna fye, ndei fya gna mi bo Miba nya fye nyi kpa.

25Shekwoyi nu bo tnu n Yohanna batisma zhin-yi yi ko awo? Sai ba ya nubo zhin najei.” N ya gna n Shekwoyi aba nu wo bo gmi, wo ba nya yi ge, “Knihi nu bo zhin to ya ga Yohanna gaciya ma?

26N ya gna ge Shekwoyi nu to bo tnu woyi m, deji ta fa yi m, ntu ge ba gye ge wo bo zhin anabi nu.”

27Ba gna Yesu ge, “Yi ta kpe lo m.” Wa ci ba ge, “Mi ta ga fye amsa ce m.

28Ama fya gye beye wuna? Eza na nugun yi ngun-aba, wa gna nugun dnagmai ge, 'Nugun, ho ba lo fa naiye.'

29Wa ci ge, 'Mi ta lo m.' Ama sa fyewyi wa bugba shando wa lo.

30Wa gna nugun nawyi ge, 'Lo!' Wa gna, 'Dada, miba lo.' Ama to wa lo m.

31Abi ngun-aba yi, nyika nu vi wo dada beye a?” Ba ci ge. “Ai ebi kmisunyi nu.” Yesu wa wu ba wa gna, “Lalei aza nukwoyi na-kaluwa yi, bei ku lo Shekwoyi bemi n fya bye.

32Ntu ge Yohanna batisma zhin yi bo gna fye ge fye ya bui, fya pmi da Shekwoyi to fya ye m, sai aza nukwoyi na kaluwa yi ba da ku ya bui! Har ma fya gye deye to fya ye abui ye bo fya ga gaciya m.

33“Fye wo be-sisi ye. Ekni daho bo nu ajemwinyi fa, wa-a ko zun kna vinya, wa aba mi, n fwa wyednai ba dna. Wa pmi wa ofwayi ga afwa nuyi ho n nagbai zhin zhi, wa laka wa lo 'knido.

34“Shi ajemwinyi bi sa bo lasi, wa tnu waza ge ba lo ba gwo nya bewo cei, nkwo ba si wo.

35Ama afwa nuyi ba kuka da waza, ba lu zaho, ba zaho wu, ba she zaho akuta.

36“Waje azado tnu ndu aza akmisunyi n begye, ama ba bwa ba je zhin lo nu.

37Kmaknayi wa tnu n wo nugun yi, woi gye kpekni ba ba ga wo mwa-mwa.

38“Ama shi a fwayi bo gye woi be, ba gnaje ge, ‘wo nu bo gyi ofwa ye gado, fye be ya wu wo ntu ge ofwa ye kwa ze yi nya!’

39Ba gniwo ya fwa mi, ba wu wo.

40“Shi of wa dayi bei zhi, fye gye ge wo bei zhin afwa nuyi yi n wuna?”

41A Yahudawayi atukwoda cige, “Wo bei wu aza nukwoi ntna sun-sun gye, woi pmi wa la fwa wa ga azado, n ba ba gba wo ntna sa wunya yi.”

42Yesu wa pmi wa nya ba, “Fye to shin ba n Shekwoyi bedan, ‘Kuta na nyamiyi ta ye, kwo nu la ze kusurwa kuta yakon? Degye kwo nu zhin bezhin-zhin wo-woyi Dagayi nya.’

43“Obo Mi zhin nufi cei ko nu nyia bei la Shekwoyi Bemi gwo fyeya, a ga ebye do n kwo ba ga Shekwoyi Owo fwa gyiba.

44Zaho-zahoi wa ce bonyi n kuta gaiciya nya ye, wo ba bmaya, ama aza n kwa kaya tu ba, ba ba viya ngye amwi”.

45Shi a pirist yakwo na Yahudawayi atukwoda jei bo ku kpe ge Yesu da ba nu bo-nge banu zhin a fwai n Wo be-sisi.

46Ba ye ba wan Wo, ama ba ku wo deji dna, n tuge ba bo gwo Yesu ngye anabi nu.

Matta 22

Shekwoyi Bemi Dogbe

1-2 Yesu bo da anabari n mwa begye ntu ge wa wu ngye shi Shekwoyi 'Bemi wu. Wa gna, “Aba mwi ko do n 'su ho yi n wo bo zhin amula wyefan shiri dnagmai ntu wo nugun bo.

3Wa ku awyefan bo pa aza mwa, She shiri bo ku zo zhin, wa tnu ge aza ba be gye sa la si, ama oba vinya, to ba be m.

4Wa je aza do tnu ge agna ba ge, ‘Aku shiri zo zhin, abu ku bi. Ba ku pye!’

⁵“Ama aza n wo bo pa ba awyefan nyi, ba ma wo san ba gya-bye ba tnu-tnu yi, zaho wa lo wo nya wo fwa, zaho wa lo wo gniko.

⁶Azaho ba wan tnu-tnu da yi ba lu, ba dna ba vinyikwo har a kwa zaho wu.

⁷“Minagyi a gyi 'su yi wa tnu n wa sojayi, ba lo ba ku azayi wu nba bo wu waza nyi, ba ku ba ezhi kpe 'na.

⁸Wa pmi wa gna wa fyenu ge, 'Aku mula nyagyi zo shiri zhin, aza n mi bo pa ba nyi, ba to bo kunce ma pa ba m.

⁹Fye lo fye zan na zokwo, zaho-zahoi fya gye, fya gna wo wa be.'

¹⁰“Afyenu ba lo ba yi aza be cei, amanayi n na nukwoi yi mula nyagyi-ba nugni na zhibei yi.

¹¹Ama she osu bo be ge wa zhin azhibei mabe, wa gye zaho dna ntna mula je-kpe kpe yi (n na bo gawo nyi).

¹²“Wa nya ge, 'Nugundo, ko zhin wuna hoi dna 'ya ntna mula je-kpe ya'? To zaya dna begbe m.

¹³“Osu wa gna wa bmazhin-yi ge, 'Fye la wo pa nabwa na pita yi fya she woya dna wyegma, aba n bwici lo bedo na nyikna gyi yi.'

¹⁴Ntuge ayi-yihi mwa begye lo, ama a kni-kniyi fyewyi nu.”

¹⁵Sai a Farisiyi a yezhi, ba zhin shaula shi ba ba zhin wa da bo ho n kwo ba zhin ba wan wo.

¹⁶Ba ku shaula zhin ge, ba tnu n ba zayi bedo na siyasa-da yi, bo nya wo beye: “Zadnagmai, yi kpe lo ge ho da gaiciya ko ai ba tu ho 'be nu sha, ntna dna, to hoi kni-kni m.

¹⁷Yi ye ha gna yi, ko bmiya lo ya ga a Romayi Gamnati gadu kwo awo?”

¹⁸Ama Yesu wa ku kpe bo ye ba ye, “Wa gna ba, Efye aza-kwoednayi! Fye ye fya ze nyikanu mama n fya benya a dabara nya yi a?

¹⁹Fye wu Mi gyiwye.” Ba ga wo kobo.

²⁰Wa nya ba ge, “Nyikado foto nu tu ya? Nyikado ye yinu ka kpe n foto sinta?”

²¹Ba gna, “Kaisar nya.” Wa gna ba ge, “Fye ga Kaisar enya kwo zhin wo nya, fyaga Shekwoyi nyaho-nyahoi kwo zhin Shekwoyi nya.”

²²Shi wo bo ga ba amsa lo nu ca wo ba, ba kuka ba lo ba nya.

²³N wiyi yi jesun, a Sadukiya, aza nba gna kalaku to lo n vingwo n, ba be Waba ba nya ge,

²⁴“Zadnagmai, Musa bo gna nza fyi to woi ma abi m, owo zado ba mi wa la wo nyigbai, oba-bi ba ku zafifiyi gado.

25“N ya tasin, azaho bo nyi ngun tnaba nba 'ya mi. Eza kmisun-yi wa la nyikwo wa fi to bai ma bi m, owo mada la nyiko yi.

26Mado yi wa ka fice, ntna bi, owa 'za-yatiyi wa kala har, oba tnaba, zaho-zahoi bami, wa nyikwo yi la.

27Nyiko yi ce, wa be wa fi.

28N kalaku vingwo ma, wo bei zhin nyikado nyikwo na? Ntu ge oba tnaba, zaho-zahoi bo la wo la.”

29Ama Yesu wa gnaba ge, “Efyababwi pa ge fye ta kpe Littafi gyi-gyi yi ye lo n Shekwoyi iko yi m.

30Ntu ge n kalaku na vingwo, mula-pa to lo n, Zaho-zahoi bo la ze ngye amalaika n 'she.

31Ntu na zafyi kalaku bo, fye to shin Littafi Gyi-gyi-yi ba n? Fye ta kpe ge Shekwoyi bo dabo n fyei nu Wa gna,

32‘Emi nu zhin Shekwoyi Ibrahim nya, Ishaku, n Yakubu n?’ Ntu cenu, Shekwoyi to zhin Shekwoyi aza fi-fiyi nya nu m, ama Shekwoyi aza wye-wyeyi da nya.”

33Ca wo aza yezhi na amsa yi n wo bo ga nyi.

34-35 Ama gbo na Farisiyi! She ba bo wo ge a Sadukiyi to gyi nasara n, ba zan bonya do shin ba nya Wo. Owa yekpei ho nba mi, wa dabo wa gna,

36“Zadnagmai, kni wyidnai nu du vinya n Musa 'wa?”

37Yesu wa gna, “‘Ye Dagayi oho Shekwoyi nho bugbai vinya, nho wye-wyeyi yi, nho bomwi yi.’

38Deye nu zhin wyidna dnagmai kmisunyi.

39Odo nyi kwo yatu kwo, ‘Ye ho kunzhi-yi ngye shi ho ye hohin tukwo.’

40Awyidnaje vinya, nna anabi beda yi, ba kun nu awyidna gun-aba ye mi nu. Ba nu bami jesun, n ha shi ba bwa, ho ku aje shi bwa vinya nu.”

41Shi a Farisiyi bo ku she wo gun, wa nya ba bo.

42“Masifu ma, Nyika do nugun nu n woya”? Ba gna, “Dauda nugun.”

43Yesu wa nya ba ge, “Kniiyi nu zhin Dauda woi dabo dna n Zafun Gyi-gyi-yi iko woi yi wo ge Dagayi'a?

44“Shekwoyi bo gna mi Dagayi ge, ‘La sase mi bwaizhe-bwa har ma ku ha nuwunyi fi nha pita sinta.’

45Shi Dauda bo yi wo ge Dagayi nyi, ko ba ze wuna agna ge wo zhin wo nugun na?”

⁴⁶To ba bwa begbe-dna m. Ntu wyi yi yi, to zaho-zaho yi wa jemi wo bo nya m.

Matta 23

Afarisiyi Aba Bwi

¹Yesu wa gna azayezhi, bedo wa bara yi,

²“Fye bagye ngye a Yahudawayi a tukoda, bedo na Farisiyi zhin Musa nu, ngye shi ba be na wyidnayi mwa begye.

³Ko bmiya lo fya vi ba-bo nba da, ama fye to vi bo nba zhin m, ntu ge ba ta zhin bo ba gna fye ge fye zhin m.

⁴“Ba gna fye ge fye zhin abo ba dnabo na zhin ba bahin ta tumwi ge ba zhin n ba m.

⁵Nya ba zhin vinya ba zhin ge agye nu. Ba zhan bo gye aza gyi-gyi-yi, bai shi a takarda aduwa nya n na ayoyi kafi, bai be atnu-tnu-je bopa nya yi kpe.

⁶Ba zhin ba ye ba sase kpe nabye n na nyagyi, ba, bedo na saseba manayi na duwa-nyakun.

⁷A zhin a da ba shi a yazhi ba, ai sa ba mi n zokwo, ai yi ba ge ‘Male’ Zadnagmayi!

⁸Fye to ye ge a yi fye ce, lo num! Ntu ge Shekwoyi gmanyi nu zhin fye Male, efye vinya zhin gmanyi nu n fya zaje yi.

⁹Fyei to yi zaho-zahoi nanyi ye ge, ‘Dada m,’ ntu ge Shekwoyi nwo tu she nyi, owo gmanyi nu na ba yi wo lo nu.

¹⁰“Ai to yi fye ge, ‘Dagayi m,’ ntu ge efye Dagayi kwasun gmanyi nu, wato Masihu.

¹¹“N fya gba fyehin, fyei zhin aza bauta, fye ba ze aza adnagmayi. Eza nwo ye wa ze za-dnagmai vinya, wola ze fyenu.

¹²Aza nba gye ge ba zhin aza adnagmai nu, aba gba ba, ama aza nba gba bahin, aba la ba tu.

¹³⁻¹⁴“Aiya nfya ba, Afarisiyi, n fya kunnu tukoda yi. Akoce-dnai. Fye taye ge aza je lo Shekwoyi bemin, fyei ta lo fyehin m. Fya zhan bo gya za gyi-gyi-yi, fyei zhin aduwa n mwa kpa, zhi na zokwo fyei kun anyigbanyi ya nba puwa. Kai akocednayi!

¹⁵E, ai ya n fya ba akocednayi. Ntu ge fye zhin fya zan-zan nkpai, fyei zan abui-yei shin, esa fye la bwa, fya je zhin wa ze anapyi bi.

16“Abyeda awyebuayi! Aiya nfya ba. Ntu ge efye wyidna ge, eza nwa si nyasi n Shekwoyi nyakun yi, ko to zhin boho nun, fye ba mi fya bma ko ya; ama n 'za si nyasi n zinariya yi n ko nyi n Shekwoyi nyakun nyi, kwo zhin bo yako nu.

17Awyebuayi amamada. Kni do yi nu du lo'a, Zinariya ko aduwa-nyakun nba nu zhin zinariya koi ze gyi-gyi-yi nyi'a?

18Fya je gna, nyasi n bagadi yi, aba mi a bma ko ya, ama n na si nyasi n nyaga yi ko zhin bekpakalayi nu.

19Wyebyuayi. Kni do yi nu du lo a, nya na ga tu n bagadi nyi ko bagadi n ko nu zhin nya ga kwa ze gyi-gyi-yi nyi'a?

20Esa fye si nyasi n bagadi yi, fye si nyasi nkwoi nu du n nyayi n ko tu ko.

21Esa fye si nyasi n aduwanyakun yi fye si nu n ko yi bedo n Shekwoyi nwo sase dna n ko nyi.

22Esa fye si nyasi n she yi, fye si nu n Shekwoyi Shikpeggye yi bedo n Shekwoyi n wohin tukwo.

23“E, ayya n fye aba, Afarisiyi, bedo akunnu tukodayi-akoce-dnayi. Fye gna ge akun awoyi du na nya abi-biyi anu nfwā, ama to fya gye fye anuwan n anya a dnagmayi m, bemanayi-zhin n sun-sungyeyi n gaiciya yi. E, fye ba gna a kun awoyi, ama ko to bmiya fya fa abo a dnagmayi zhin bo nu m.

24Abyeda awyebuayi. Fye kun bizuko ya fyei mi lakumi.

25“Ayya fye aba, Afarisiyi bedo akunnu tukodayi-akoce-dnayi, fye zhan ebue n bmi ama fya fa emi n cegyei.

26Afarisiyi awyebuayi! Fye ya ebue zhan n mi ntu ge ebue vinya kwa ze gyi-gyiyi.

27“Aya n fye aba, Afarisiyi bedo akunnu tukodayi! Fye wu gye avingo nu, n zhin aba zhin-zhin yi n bmi ama nmi nunuyi lo n aza sukun yi n anya bodoyi.

28Fye zhin atna fya wu ge fye zhin aza gyi-gyiyi nu, ama efye abugba nunu yi lo n laifi n cegye doho-dohoi.

29-30 “E, aya n fye aba, Afarisiyi, akunnu tukodayi-akoci-dnayi! Fye mi anya shi ntu anabi bepa bo n fye adada bo wu nyi, fyei kpe amamayi n a Shekwoyi aza avingo nba bo wu nyi fyei gna, yi nu bo gna yi nyi nsayi yi to bo ba zhin bo n eyi adada bo zhin nyi m.

31“Shi fye da lo nu nyi, fye wu fyehin nu ge fye zhin aza nukwoyi abi nu.

32Fyehin fye vi ba apita bwi nu, fya zhin benukoy i ngye ba.

33Awa! Agma bi! Fye ba po owa jahannama nya n wuna?

³⁴“Nba tnu fye anabiyi, n abeyekpeyi, fye ba wu azaho kpe n zundu, azadoho fya lu ba n abwokun bai knapoya fi n aduwa nyakun, fye ga azaho wahala n azhi gbo-gbo.

³⁵Ntu ge Shekwoyi aza ami ba tu n fye n na bo wu nyi, tunyi n Habila befyeece zhinyi, har kwa be Zakariya Barakiya nugun, nfyee bo wu wo dna aduwa nyakun nyi.

³⁶E, owaye vinya ko bo be tu aza tuko n cala ye nu.

³⁷“O Urushelima, Urushelima, ezhi yako n ko wu oha bi, koi she aza akuta n Shekwoyi tnu ko n cei nyi, abwa kniyi nu n mi ye ma ye ho abi zhi ngye shi pise zhin kwa ye ko abi fi abwase, ama to ho ye m.

³⁸Nsayi a la ho puwa fa gniho nagusayi.

³⁹Ma gna ho, ho ta je mi wye gyem, ‘sai esa nho ku shiri zhin ntu ge ha go eza n Shekwoyi wa tnu ga ho nyi.’”

Matta 24

Yesu Woi Shi Abo Awe Nnabye

¹Ngye shi Yesu bo laka aduwa nyakun ba, ewo abara ba be bai wu wo a nyakun nu gbo-gbo aduwa nyakun nya.

²Ama wa gna ba ge, “Any mi-mi ye vinya a ba ba baya to a ce kuta doho-dohoyi tu ndo sim.”

³Esa wo bo sase tu n Zaitun pe, ewo abara ba nyawo ge, abo deye bo zhin n knisayi ya? Knihi nu bo zhin ya kpe ge ho jeze bo lo, anyi ku ga zo’a?

⁴Yesu wa gna ba ge, “Fye to ye ezaho-zahoyi wa ze fye amaman.

⁵Ntu ge aza mwa begye bo be bai gna ba nu zhin Masihu, ba bwi aza zokwo n mwa.

⁶Esa fya wo okun nabari, deye to wu ge mi la ga be num, tile abeye ba be, ama esa kmaknanyi to be kpam.

⁷Abye n abe yi na anyi bo kuka da aje, mikun bo gun ekni bo shan-shan na ba yi gbo-gbo.

⁸Ama abeye vinya zhin abo adna nya nu n ba bo ya zhin.

⁹Aza vinya n anyi bo ga fye wahala bai wu fye bai wun fye nu, ntu ge fye zhin emi aza nu.

¹⁰“N mwa begye n fye mi n ba bo jeze na vun yi fi n laifi, fye ga fyehin, fyei wun aje nu.

- 11**Anabi akatayi bo be bo bwi aza zokwo
- 12**Laifi bo mwa abaho-bahoi, yeye bo la fu se n aza aba n mwa.
- 13**Ama aza n ba bo ku mi zhi, har esa kmaknayi, ba nu bo po.
- 14**“A bo ku nabari manayi Shekwoyi ebe mi nya da anyi mi vinya, har abye doho-doho yi bo ku wo, esa kmaknayi ho kpe be.
- 15**“Esa fye gye asisi bo (ko nu anabi Danailu bo da ko bo) koi gni agni aba gyi-gyi-yi (fa bahin wa bwa awye ga).
- 16**Aza n ba fi Yahuda ba bo busi lo ape.
- 17**Aza nu n ba kpe anyakum esin bato bo shin zhi ntu ge ba ku ba kaya n ba apuwam.
- 18**Aza n ba fi n fwa ba to bo jeze be api ntu ge ba ku ba ajem.
- 19**“Ayya n anyiko anubo da aba, n abiya da yi, n anyi-pyeyi hi.
- 20**Fye zhin aduwa to efye sibui ko be n viyikoyi ko n assibi wyi m.
- 21**Wahala bo be, edo pya anyi to shin gye m, tunyi ngye shi a bo zhin anyi, a taje ko pya gye m.
- 22**“Gaiciya ndei a to ce anyipyeyi hi zunya n, aza vinya bo ku zo fi. Ama a bo la ba ce zunya ntu Shekwoyi aza kni-kniyi bo.
- 23**“Njesun ko ezaho-zahoi wo gna fye ge, Kristi n la be nu aba ko ye, ko n ge wo ku wohin tuko wu aba ko ye, fye to ga gaiciya m.
- 24**Ntu ge Akristi akatayi ba kun, bedo anabi akatayi, bai bo zhin abo wowo har ge koi ye zhin nu, abo ku Shekwoyi aza kni-kniyi dna koce.
- 25**Fye gye, mi ku kma fye gna.
- 26**“Ko ezaho yi gna fye ge, Kristi la jeze zhi woi lo n zhabui, fye to gye fye a nuwan fya lo ge fye gye m. Ko fye wo ge wo n wohin so dna lo aba ho, fye to ga gaiciya m.
- 27**Ntu ge ngye shi fye gye ogmai bmiya kwa ga buzungna eshe gmana nyi, elonu ko ba ze esa emi Kristi ba jeze be cei.
- 28**Aba nya fifiyi nyi, n bo nu agulu zhin a yezhi.
- 29**“Nsayi-sayi yi n wahala avun dna n anyipyeyi hi, wyegma bo la dna, ntu ge nyipyeyi to bei je won, epya to bo je fun, akpasu bo kaya n she, iko eshe nya bo shan-shan.
- 30**“N sayi nu abo gye tuze emi bebe nya eshe, bugba wun bo be dna anyi, abye vinya anyi bo gye mi bebe dna anyi, n iko yi, n latu dnagmayi.

31 N ɓo tnu emi amalaika yi, n kasun a knaknaci nya yi, ntu ge ɓa ye emi aza akni-kniyi zhi anyi cezhi ba vinya.

32 “Fye tu deye mwi n gbahi shinwan, esa fye gye eko bwala koi ci afintolo putu, fye kpe ge vinyiko sa la wuvi.

33 Nlonu esa fye gye abeye vinya ɓai ya zhin, fya kpe ge emi ɓebe la wuvi har abokunmi gbe.

34 Nsa yi anyi ye ɓa ɓo duya.

35 “Eshe n ’kni yi ɓa ɓa duya, ama emi aɓeda ɓa ta shan duya m.

36 Ama ezaho to lo n wo kpe nyipye ye lo ko esa nu esa kmaknanyi ɓa ɓe n ce yi m, ko amalaika. Ko Shekwoyi Nugun, sai Dada gmanyi vonu kpe lo.

37-38 “Aza ɓo dagma ɓai zhin buki ɓai pa mula, ngye shi ko ɓei zhin n Nuhu ’sa ogma dnagmanyi kwa kpe zhi nyi.

39 Aza to ɓo ga gaiciya ge, ɓoho ɓa zhin m har esa ogma ɓo ɓe kwa ku ɓa wu vinya. Elo nu emi ɓebe ɓa ze.

40 “Aza gun aba ɓo fi ɓai zhin tnu-tnu, aɓo la eza gmanyi a fa gmanyi.

41 Anyikoza ngun aba ɓo fi ɓai zhin ɓa tnu-tnu api nya, aɓo la gmanyi a fa gmanyi.

42 “Ntu ce nu fye zhi n shiri zhin, ntu ge fye ta kpe nyipyei ye lo n fye Dagayi wo ɓe lo m.

43 “Ngye shi eza zhin wa gu wo puwa, ntu avi ɓo nyi.

44 Nlo nu fye ɓa bui wahala si, fyei zhi n shiri yi ntu emi ɓebe ɓo.

45 “Ho zhin Dagayi bara ce-cei nu n gaiciya da yi? Mi la tnu-tnu puwa bwashi nya ga ho, ha kpa mi aɓi fyegy-i-fyegy-i?

46 Anabarka da nu n hoi ndei ma je ze ɓe ma sun ho hoi zhin ho tnu-tnu dna n gaiciya.

47 N ɓo ga abara a gaiciya nya iko ɓa gyi ebe tu a nya tuko vinya n ɓa zhin emi nya.

48 “Ama ndei ho zhin eza nukoyi nu, ha gna ge, emi Dagayi to ga ɓe m.

49 Ha ya hoi ga abara aje wahala hoi zhin buki hoi sin nya.

50 Eho Dagayi ɓo jeze ɓe to hoi dna ce m.

51 Wo ɓo lu ho n mwa, woi lo n hoi n akoce-dnanyi owa da ba, a ba bwici lo ai gyi anyikna.”

Matta 25

Anabari Tu Shekwoyi Ebemi Tukwo

- 1**“Aba mi a mwi Ebe 'She nya do n nabari abi-nyikwoyi nya ngun awo yi, nba bo ku ba apitila, ba lo ba she gun mula ba.
- 2-4** Nba mi, aza ce-cei bo nyi ngun atnu, ba ku emi fi nba apitila, ngun atnu nba bo ce nyi, ba bo zhin amama nu to ba fi emi m.
- 5-6** “Shi mula 'ba bo la zhin kalala, ba yazhi ge ba sun, har sadu, sanu a bei ku ba kala ai gna, 'Mula ba be lo! Fye kun be fya zhin wo amaba!'
- 7-8** “Abi-anyikwoyi vinya ba kuka, ba wan ba apitila na. Aza ngun atnu nba to bo emi yi shi nyin, bai ba ge ace ga ba ntuge, eba apitila ta wan ena lo n.
- 9**“Ama eba azaje ba gna ba ge, ba lo gniko bo si, gye deye ta kun ba m.
- 10**“Shi ba bo ku zo lo, esa fyewyi mulaba woi be, aza nba bo n shiri zhin, Ba gni lo fi n awyefan ba, apmi a ba gu.
- 11**“Esa fyewyi aza deyi ngun atnu bai jeze be, ba ku zhi n gmi bai gna ge, a gu ba aba ya.
- 12**“Ama wa ye ba wa gna, fye lo fye nya fye ku kalala zhin.
- 13**“Ntu ce nu, fye zhi n shiri yi zhin, ntu ge fye takpe nyipyeyi lo ko esa, nmi ba jeze be n cei m.
- 14**“A ba je Ebe Eshe nya do mwi, n nabari ezado ho nya yi, n wo bo laka wa lo ekni do, wa yi wo abara zhi vinya wa ga ba agyiwyeyi ntu ge ba ze abwa woi du.
- 15**“Wa ga zaho ₦5,000, ezado ₦2,000 wa ga eza kmaknanyi ₦1,000, wa gaba dei-dei ngye shi wo gye ezaho-zahoi ba mi wa zhin sun, wa wan wo zan walo.
- 16**Eza nwo bo go ₦5,000 wa ya anya si woi kun, esa fyewyi wa ku gyiba gyi ₦5,000.
- 17**Eza nwo bo go ₦2,000 wa ya gnikogni wohin ce wa ku gyiba gyi har ₦2,000.
- 18**Ama eza nwo bo go naira ₦1,000 nyi wa lo wa bwokun nyi wa agyiwyeyi ho sodna.
- 19**“Shi esa bo la mwa, eba puwa da wa zhi, wa yi ba ge wa wo lafiya enya nba zhin nwo agyiwyeyi yi.
- 20**Eza nwo bo go ₦5,000 nyi, wa be wo n ₦10,000.
- 21**“Ewo puwa da wa ci wo ntu tnu-tnu manayi bo. Wa gna wo ge, Ho ku gaiciya zhin tu na gyi wye bi-biye, ntu ce nu nba tnu-tnu be ho. Dagma ngnisun nho puwa dai.

22“Eza nwo Ɔo go ₦2,000 wa Ɔe wa gna, ho Ɔo gami ₦2,000 mi ku gyiba gyi njesun lo nu.

23“Ewo puwa da wa gna wo ge a bmiya lo. Ho zhin bara manayi nu n gaiciya da yi. Ho ku gaiciya zhin dna agyiweye Ɔi-Ɔiye nƆa Ɔe ho.

24-25 “Eza n wo Ɔo go ₦1,000 wa Ɔe wa gna, Shekwo mwasa, mi kpe lo ge ho zhin eza kalada nu, ma wo dna ge ho Ɔo la nya’go mi n ma bwa, ntu cenu ma obwo nyi ma agyiweye yi sodna, a hoi shi nyi.

26“Ama ewo puwada wa gna wo ge, ‘Eza nukoyi, fyenu bwatoyi! Shi ho ’bo kpe ge nƆo ye gyiba.

27Ho Ɔo Ɔa lo n mi agyiweyei ho la yadna n banki, mi la gyiba bwa.

28Fye la agyiweye go n wo, fya ga eza n wo ₦10,000 shi nyi.

29Ntu ge eza n wa zhin ampanyi n nya yi n na gawo nyi a Ɔa Ɔe wo, wa bwa n mwa. Ama eza n wo to zhin gaiciyan, ko enya n wo cei shi fyewyi, a Ɔa go wo.

30Fye la bara banza nya ye fya she yadna n wyegma: n bwai nu abo ci bwi ai gyi anyikna.’

31“Esa Emi, Masihu Ɔa Ɔe dna nmi latu, n mi amalaka yi, nƆo sase tu n Shinkpegye latu nya.

32Abye vinya Ɔo la yezhi n mi abye. NƆo gna aza ajeya, ngye shi kniknanyi zhin wa gna akniya n abuiyi nyi.

33A kni Ɔo lo emi bwaizhe, a bui n bwakmi.

34“Emihin Esu mi Ɔo gna aza nƆa zhi nmi bwaizhe ge, Fye Ɔe anabarka da emi Dada nya, fya lo ebe mi na Ɔo zhin shiri ntu fye Ɔo tunyi to ai zhin anyi nyi m.

35Ntu ge mikun Ɔo gunmi, fya gami nyagyi; Nuwan mikun yi womi, fya ga mi nuwan; esa mi Ɔo zhin zhibei fya mi go dna n fye puwa.

36Mi gni n bwotoloyi, fya ga mi aje; mi nyasan yi, mi dna n kurkuku fya Ɔe mi aba.

37“Abefyece zhin yi, Ɔei nya ge, Shekwo-mwasa, yi Ɔo gye ho n na n mikun yi ya ga ho nyagyi a? Ko n nuwan mikun yi ya ga ho sin-sin yi’a?

38Ko n zhin zhibeyi ya bma ho zhin a? Ko n bwotoloyi ya ga ho eje a?

39Yi shin ho gye nkni esa yi nu, n nyasan yi ko n kurkuku ya lo ho gnabi a?

40“Emi, Esu nƆo gna Ɔage, esa nu fye Ɔo zhin mi azaje n cei lo nyi, fye Ɔo zhin mi nu.

41Ma Ɔo pmi ma gna aza, nƆa zhi nmi bwaikmi nyi, Fye la ku mi ka, aza aknituyi, fya lo ena a Ɔo zhin shiri ntu Shetan Ɔo Ɔedo nwo amalaka yi nyi.

⁴²Ntu ge mikun bo gun mi, to fya ga mi nyagyi m, ko nuwan ma to fya ga mi ge mi sin.

⁴³Mi zhin zhibeyi, to fya ye ge fya go mi dna n fye puwan; mi gni n bwotoloyi to fya ga mi ajem, mi n nyasan yi, mi dna n kurkuku to fya be mi gnabi m.

⁴⁴Ba bo gna, Dagayi, yi bo gye ho nkni esa yi n mikun yi, ko n nuwan mikun yi ko zhin zhibeyi, ko nbwotoloyi ko n dna n kurkuku to ya bma ho zhin ma?

⁴⁵“Nbo gna ba ge, esa n fye to bo ye fya zhin emi azaje nyin, emi nu n fye to bo bmazhin m.

⁴⁶“Ba bolo tata nyalo-nyalo nya aba, ama abefyeceyi bolo wye-wyei nyalo-nyalo nya nu.”

Matta 26

Ala Yesu Kun

¹⁻² Esa Yesu bo ku abeda ye zo da, Wa gna wa bara ge, “Fye kpe lo anyipyei ce gun aba ai ya Paska awyefan, a ba kun mi, azunmi du.”

³Nsayi nu dei-dei a pirist dnagmai bedo na Yahudawayi abyeda yi bo fi n Kayafas puwa, pirist yako.

⁴Bai zhin shaula shi ba ba zhin ba wan Yesu fya-a ba wu wo.

⁵Ama ba gna, “To ge n Paska sa m, ntu ge gyikici ba laka.”

⁶Yesu wa lo Betani, wa lo Siman kuturu puwa.

⁷Esa wo bo dna woi gyi nyagyi, nyikoza ho wa lo-be nmi yi shi n tulale nakwoi fyi, wa ze ko ya kpe wo tukwo.

⁸⁻⁹ Abara ba gyi minagyi bai gna, “Wo la agyiwye wunya. Wo bo ba kun ko na 'gyiwyei mwa, a ce agyiwye aga a wye kwoi!”

¹⁰Yesu wa ku kpe bo ba zhin nubo cei, Wa gna ba ge, “Fye da wo bo nukwoi gena? Ntu ge wo ku bo manayi zhin Mi.

¹¹Awyekwoi lo cici n gnisun fyei, ama fye ta bwa mi cici m.

¹²Wa ze tulale ye kpe Mi, woi zhin Mi nayi shiri ntu bibi bo nu.

¹³Aba pa wo bo cici ntu tnu-tnu ye bo. Aba da wo tnu-tnu ye bo na nyi vinya, abaho-bahoi na ba zhin Nabari Manayi wazi.”

¹⁴Nbonu Yahuda Iskariya tigmanyi dna Wo abara awo-cei-aba wa lo a pirist dnagmayi aba.

¹⁵Wa nya ge, “Fye ba ga mi akninya, ma ga fye Yesu a?” Ba ga wo a sile shita (N3).

- 16**Tunyi n sayi, Yahuda wa ya zokwo zanyi shi wo ba ga Yesu.
- 17**N Paska nyipyei kmisunyi yi, na Yahudawayi zhin ba kun breidi yisti nya ya nba puwa nyi, Yesu abara be ba nya wo ge, “Yi ba zhin paska nyagyi shiri nna nu ya gyi a?”
- 18**Wa gna ba ge, “Fye lofyi n zhimi fye ba gye zadoho, fya ciwo ge, ‘Eyi Dagayi wa cige, esa la Misi, Mi ye Ma gyi Paska nyagyi n Ma bara yi n ho puwa.’ ”
- 19**Owo abara zhin shi wo bo gna ba, ba zhin nyagyi shiri n bo.
- 20-21** N wyeshe yi, Woi sase tu Woi gyi nyagyi nba awo cei-aba, Wa gna ba ge, “Eza gmanyi lo nfye mi nwo ba kun mi.”
- 22**Bugba wun ba, zaho-zahoi wa nya ge, “Emi nu?”
- 23**Wa gna, “Owo nu n Ma ya wo nyagyi ga nyi.
- 24**Tile Ma fyi ngye shi anabi bo da, ama aiya nza ba n wo ba kun Mi nyi. Ko gna bmiya lo to aye ma won.”
- 25**Yahuda ku bo nya wo ce, ge, “Male, emi nu?” Yesu wa ku ciwo ge, “E.”
- 26**Shi ba bo kpe bai gyi nya, Yesuwa la breidi Wa tu ko anabarka, Wa sa ko ya Wa ga Wo abara Wa gna, “Fye gwo fya gyi, deye ko zhin ‘Mi nayi nu!”
- 27**Wa la kofi nuwan shu-shuyi nya, Wa zhin godiya n kobo, wa ga ba wa gna, “Zaho-zahoi sin ko,
- 28**Deye zhin emi ami nu, tuze alkawali woi-woi nya. Aze ba ya ntu naza begye alaifi gafara zhin bo nu.
- 29**Ma gna fye, Mi taje nuwan shushuyi ye sin m, sai nyipyei ‘mibo sin ko woi-woi fyei n mi Dada ‘be mi.”
- 30**Shi ba bo ku anyi ko, ba kun ya ba lo Zaitun pe.
- 31**Yesu wa gna ba, “Nsukoye yi, efye vinya, fye ba na mabo. Ntu ge a ka fi lo n Litafi gyi-gyi-yi ge Shekwoyi ba lu Kniknayi, akni ba gnami n ba galice.
- 32**Ama esa ma wye-wye je bwa, m’bo lo Galili ma gye fye bo.”
- 33**Bitrus wa gna, “Ngye aza ba na habo, mi da ta na ha bo m!”
- 34**Yesu wa gna wo ge, “Gaiciya Ma gnaho, dna nsukoye kafin pise nugba ceku, ho ba na mabo abwa ta!”
- 35**Ama Bitrus wa gna, “Sai mila fi knw!” Abara-je ba bwa ka da lo nu.

Yesu Aduwa Zhin

- 36**Yesu wa ku ba wa lo bai n na shinwan shi-shiyi fa, ai yi ko Gesamani, wa gna ba ge baku zhi ba kmi, wa ce ta lo abye wa zhin buwa.

37 Wa la Bitrus n Zabedi anugun yi ngun aba, Yakubu n Yohanna yi, ba gni lo woi, wa ya bugba wun owo wye-wyeyi kwa wun-ya n mwa.

38 Wa gna ba ge, “Emi wye-wyeyi la lo wahala n bugba wun yi har efi-fye ku zhi ya-fya ku zhi n wyewyeyi ngnisun mi yi.”

39 Wa ce ta lo fyewyi wa ya shi n kni wa zhin aduwa. “Emi Dada! Ngye ko ba ye zhin, fwa wahala ye kwa mi duya. Ama emi bomwi nu to na ba vi m, sai oho nya.”

40 Wa jeze abara yi n gun-ata ba, wa gye ba ku wangye! Wa yi, “Bitrus, fye to mi fya zhi n wyewyeyi n gnisun miyi ko awa gmanyin?”

41 Fye ku zhi gwu na duwa zhin yi be! Nto lonun, jaraba ba gyi fye kala. Zafun cei yelo zin, ama ayi gba kala gba-gbai lo.”

42 Wa je ba fwa wa lo Wa zhin aduwa, “Emi Dada! N gye wahala ye ta duya m, sai Ma sin ko vinya, Oho beye ko ze lo nu.”

43 Wa jeze be da ba njesun Wa gye ba zhi bai wan-gye, ntuge oba wye bei ku wo shan.

44 Wa jeze lo bwa tayi Wa zhin aduwa Woi da beda gmanyi-gmanyi.

45 Wa je ze be abara aba Wa gna ba ge, Fye wan fye gye n sayi, fya sun.

46 “Fye kuka ya lo! Gye za be nu n wa kun Mi nyi.”

47 Wo ye gni Woi dabo, Yahuda, gmanyi n Wa bara woi si n begyei vi nakun kaya yi shi abe yako na busi yi, nna Yahudawayi atukoda bo tnu bai.

48 Yahuda bei ku gna ba ge eza n ba gye woi sa wa mi ngye nugundo, ba wan wo, ntu ge wo nu zhin eza nba ye.

49 Ntu cenu Yahuda wa be da Yesu cewo wa ci wo ge, “sanu mwa, Dagayi!” Wa shepma wo ngye nugundo bi do gna.

50 Yesu wa ciwo ge, “Emi nugundo gya bye ha zhin bo kwa be hoi.” Azajeba pmi ba wan Wo.

51 Eza gmanyi nu aza nba bo gnisun n Yesu yi, wa wa beyako wa ka pirist dnagmayi fyenu tnu bua ya.

52 Yesu wa gna wo ge, “La beyako dna n kwa pui, aza n ba zhan pma na be-yako yi, aba wu ba.

53 Ho ta kpe lo ge, n Ma gna Mi Dada ge, wo tnu Mi na malaika yi tagyi-tagyi ba kna yi, Wa tnu bai n tna sawun-ya yi m?

54 Ama n Ma zhin lo nu, Litafi Gyi-gyi-yi beda banu wuna tu nabo ye ba zhin nsai ye nyia?”

⁵⁵Yesu wa dabo naza begye yi Wa gna, “Mi zhin zajeyi nu fyei be mi aba, n na kun kaya yi shi fya kpe Mi wan? M’bei zhin Miyi wu nya cici dna na duwa nyakun, ama to fya wan Mi m.

⁵⁶Ama abeye zhin lo nu n saiye bai nu bo na anabi bo da nu, shi acei kafi n Litafi Gyi-gyi-yi.” Nna ba hi nu na bara vinya bo fwa Wo, ba busi.

⁵⁷Azayezhi ba lo woi n Kayafa puwa, n wo nu bo zhin malami dnagmayi duduyi nyi; nbo nu na Yahudawayi atukoda bo yefyi.

⁵⁸Ama Bitrus wa vi lo ntagi, har wa lo malami dnagmayi duduyi akpeda, wa kun sase shi na sojayi, woi pmi wa gye shi a ba zhin.

⁵⁹Amalami adnagmayi har na Yahudawayi awadayi, ba yezhi bai zan aza shin nba ba ga seda akata nya tu Yesu tukwo, ntu ge ada wo wa efi nya.

⁶⁰⁻⁶¹ Ba bo ku aza bwa, ama oba beda to bo lo egbe gmanyin. Sai dai azaho gun-aba nba bo gna ge, “Yi bo ku wo zeyei gna, ’miba mi Ma la Shekwoyi aduwa nyakun ya, Ma je ko mi dna na nyipyeyi gun-ata.”

⁶²Malami dnagmai duduyi wa laka gni wa ci Yesu ge, “Ho ku bo wo na da nyi? Ho bo ku da lonu ko awo?”

⁶³Yesu wa wo nya shi pyi. Malami dnagmayi duduyi wa gna, “Mi ye dna n Shekwoyi wye-wyei da ’ye Ha gna yi, ko Ho gna Honu zhin Masihu, Shekwoyi Nugun.”

⁶⁴Yesu wa ye wo ge “E, emi nu. N nabye deye fye bei gye Mi, Eza Nugun, n sase tu n Shekwoyi bwai zhe bwa, Miyi jeze be njesun dna nanyi nba kpe nshe nyi.”

⁶⁵⁻⁶⁶ Sai malami dngmai duduyi wa sa wa je ya, wa da beda nkalayi, wa gna, “Wo ku beda nukwoyi da tu Shekwoyi tukwo! Yi ye a seida-da dolo n shan sun? Fye ku wo woi da. Fya da ge na? Ba ye ba gna, ‘A wu wo.’”

⁶⁷Ba kna-kni kpe wo na wyeba, ba lu wo, azadoho ba kni wo agnai apmi,

⁶⁸ba gna, “Ngye ho zhin Masihu nu, gna yi eza nwa lu ho.”

Bitrus Wa Na Yesu Abo

⁶⁹Bitrus ye sase shi na wada ’kpeda, binyikwoi ho wa be wo aba wa ci wo ge, “Ho bo gnisun Yesu yi ntu ge fye zhin a Galiliyi nu!”

⁷⁰Ama Bitrus wa nabo nba bye vinya wa gna, “Mi ta kpe bo ye lo ho da m!”

⁷¹Esa fyewyi jesun, binyikwoi do wa be wa gye wo gni na bokunmi gbe, wa gna aza nba bo zhi bo, “eza deye bo gnisun Yesu yi n Nazarati!”

⁷²Njesun Bitrus wa nabo, har woi si nyasi wa gna, “Mi takpe ezadeye ye lo m.”

⁷³Esa fyewyi jesun, aza nba bo 'gni-agni bo, ba be da wo ba gna, "Yi kpe lo ho zhin gmanyi nu dna Iwo abara, ntu ho beda a Galiliyi nya pya bo."

⁷⁴Bitrus wa ya beda nukwoi da woi si nyasi, wa gna, "Mi ta kpe wo ye lo m. Nsai-sai yi pise-nugba ceku."

⁷⁵Bitrus wa pa Yesu beda bo ge, "Pise-nugba ta ceku naiye n, sai ho la mi yekpe bo na abwa ta." Wa gmiya lo woi cibwi zhan-zhan.

Matta 27

Owo Wada Nwo Wu-Wuyi

¹N Labmiyi a malami dnagmayi vinya bedo a Yahudiyi atukoda yi, ba yezhi njesun ba zhin shaula shi ba Ba zhin ba wu Yesu.

²Ba wo pa, ba lo n woi n Bilatus aba nwo nu bo zhin gwomna nyi.

³Nsahi, shi Yahuda Iskariyoti, n wonu bo kun Yesu nyi, shi wo bo gye ge aku efi owa da Yesu, wa shan wo bugba do, wa la agyiwyewa jeze lo amalami dnagmayi bedo a Yahudawayi atukoda n cei.

⁴Wa gna, "Mi ku laifi zhin, ntu ge mi la eza kni-kniyi kun." Ba ci wo ge, "Oho anuwan nu."

⁵Wa she agyiwyewa ya shi aduwa nyakun wa lo wa wohin gyi.

⁶A malami dnagmayi ba la agyiwyewa ba gna, "Yi ta mi ya shi agyiwyewa ye azhiya m, ntu ge owa kwa gna ge yi ta go agyiwyewa ami nya m."

⁷Ba zhin shaula ba si ekni, aba n na shakun-miyi bo zhin bai ka ozun, ba ekni ho ze avingo ntu azhibei bi bo.

⁸Ce nu zhin ai yi avingo ho ge ekni ami nya.

⁹Deye bo zhin dei-dei ngye shi anabi, Ilimiya bo da ge, "Ba ku azurfa shita agyiwyewa nu a Israila yi bo tu wo.

¹⁰Ba si ekni n ashaku-miyi ngye shi Dagayi bo wu mi."

¹¹Nsahi Yesu woi gni n Bilatus abye, a Roma yi gwomna, wa nya wo ge, Ho nu zhin a Yahudawayi Masihu? Yesu wa ye ge, "E".

¹²Ama esa a malami dnagmayi bedo a Yahudawayi abye-dai bo da beda nukoyi tu n Yesu tukwo, to Yesu wa dna be gbe m.

¹³Bilatus wa ci wo ge, Ho ta wo bo lo n ba da tu nho tukwon?

¹⁴To Yesu wa da bo m, ce a wo gwomna.

¹⁵Ko bo zhin gwomna kunnu nu eye doho-doho n paska 'sa, wa lo eza pa-pai ya ga a Yahudawayi, ezaho-zahoi n ba ye.

- 16Nsaye abo n zajeyi wan dna, ai yi wo ge Barabbas.
- 17Shi aza-yezhi bo ku yezhi n Bilatus aduba n labmiyi, wa nya ba ge, “Nkanu n fye ye ma lo wo ya ga fye a? Barabbas ko Yesu n wo nu zhin efye Masihu nyi a?”
- 18Ntu ge wo bo ku kpe ge a Yahudawayi atukoda bo wan Yesu ntu shewo bo nu, ntu ge aza bo zhin bai ye wo n mwa.
- 19Esa nu wo bo dna n awada ba, Bilatus nyiko wa tnu ga wo ge, “La abwa kun n eza befye-cei ye bo mi ku ena ednanya nu nsukoyi n wo yi.”
- 20Amalami adnagmayi bedo a Yahudawayi atukodayi, ba fi aza ya ge a lo Barabbas nu ya, a wu Yesu.
- 21Ntu ce nu, esa gwomna bo je bo nya ge, dna aza ngun aba ye mi lo nkanu ya? Ba ye vinya ge Barabbas nu.
- 22Bilatus wa nya ba ge, mi zhin n wuna n Yesu yi efye Masihu a? Ba ye gbo-o ge, a zun wo du.
- 23Wa nya ge ntu knibe a? Wo ku knihi nu zhin a? Ama ba ce ba gyi abye ge azun wo du, a zun wo du.
- 24Shi Bilatus bo gye wo ta mi lo wa bwa ba tukwo shin, njesun wa gye gyikici ba laka, wa tnu nuwan bo n ebue yi, wa wa bwa na n aza-yezhi abye, woi gna, mi zhin eza knikniyi nu n eza Befye-cei ye ami bo. Deye ko zhin efye anuwan nu.
- 25Aza-yezhi ba ye nkalayi ba gna ge, Ewo ami ba la tu n yi bedo n yi abi yi.
- 26Nsa-yi Bilatus wa Barabbas loya. Ama Yesu wa lu wo, wa ga wo n a Romayi a soja akun ntu ge ba lo n woi bo zun wo du.
- 27Ba la wo ba lo n woi n akun kaya nyakun, ba yi asoja vinya ba yezhi.
- 28Ba kma wo aje ya vinya, ba kpe wo eje bye-byei.
- 29Ba zhin alawani aknawuyi nya ba kun wo, tukwo, ba ga wo busi shi n wo bwaizhe-bwa ba yazhi n wo abye bai kpe wa gye bai gna, Shekwo-mwasa n hoi, Esu a Yahudawayi nya.
- 30Ba kni akni kpe wo, ba ge busi ba lu wo n cei n tukwo.
- 31Shi ba bo ku agye kpe wo, ba kma wo eje bye-byei, ba kpe wo ewohin eje njesun, ba lo n woi ntu ge bo zun wo du.
- 32Shi ba bei lo aba nba bo zunwodu, ba gye ezado ho wo gmi Sairani n Afirika a yi wo eye ge Siman, ba tu wo tile wa la zundu Yesu nya.
- 33Esa babo si aba a yi Golgota, ngye tukwo-bmila.
- 34Asoja ba ga wo nuwan bedo yi, shi wo bo towo to wa ye sin bo m.
- 35Shi ba bo la wo zundu asoja ba she zoku ntu ge ba gna wo aje ga aje.

- ³⁶Ba ku zhi bai shi wo awye tu zundu.
- ³⁷Ba ku rubutu kakpe n wo tukwo she ge, “EZA DEYE YESU NU, A YAHUDIYI ESU”
- ³⁸Abo ku azaje zundu ngun aba n knusun n Yesu yi, eza gmanyi n wo bwakmi eza gmanyi n wobwai-zhe-bwa.
- ³⁹Azoko wanhi bai duya bai da beda nukoyi ga wo, bai bmiya tukwo bai gna.
- ⁴⁰Ashe! Ho ba mi ha la aduwa nyakun ya ha je ba mi njesun dna anyipyei ngun ata? Ho kashi n zundu ye ngye ho zhin Shekwoyi Nugun nu.
- ⁴¹⁻⁴³ A malami dnagmayi bedo na Yahudawayi atukwodayi ba kpe wo agye bai gna, “Wo bo la azado gni, ama wo ta mi lo wa gni wohin! Ashe ho zhin a Israilayi Esu nu? Ho kashi be n zundu, yi ba ga ho gaiciya. Wo bo la kpema Shekwoyi-akpe Shekwoyi wo gu wo! Wo to bo gna ge wo zhin Shekwoyi Nugun nu?”
- ⁴⁴Azajei ce ba gna wo beda nukoyi.
- ⁴⁵Nyipyei atukwo wyegma kwa dna anyi vinya har awa ngun ata.
- ⁴⁶Esa n sunkna ngun ata bo la si, Yesu wa yi n begye kala yi wa gna, “Eli, Eli Lama sabachthani,” ko wu ge “Emi Shekwoyi, Emi Shekwoyi, knihi nu zhin Ho lami ya?”
- ⁴⁷Aza nba bo zhi bo, to bakpe beye n wo dam, ba zhin nubwo ge wo yi Iliya nu.
- ⁴⁸Ezaho nba mi wa busi lo wa la soso wa fi nuwan yakayakayi wa fye ko n busi wa ga wo ge wa sin.
- ⁴⁹Ama aza je ba gna, Fawo, ya gye ngye Iliya ba be wa gni wo.
- ⁵⁰Yesu wa je bo da nkala yi, wa fa wo zafun, wa fi.
- ⁵¹Labule, nko bo sa na ba gyi-gyi-yi du-duyi n na duwa nyakun nyi, kwa saya tunyi n she har sinta, ekni kwa shan-shan, akuta bai baya.
- ⁵²Avingo bai kmiya, a Shekwoyi aza afi-fiyi anugbai na nyikoyi bai je wye-wyei bwa.
- ⁵³N Yesu kalala avun n vingo, ba fa avingo ba lo fi n Urushelima ba wu bahin tukwo naza mwabegye aba.
- ⁵⁴Asoja nba bo zhi n zundu aba nyi, bedo nba zajei, ba ku vin-vin, shi ba bo gye ekni shan-shan bedo na boi vinya nba zhin, ba ci ge, “Lale, eza deye bo zhin Shekwoyi Nugun nu.”
- ⁵⁵Anyikoza nba bo kun n Galili ba kun be n Yesu yi ntu ge ba bma wo zhin, ba ku zhi n kpai bai gye.
- ⁵⁶Nba mi Maryamu Magadaliya bo nyi, bedo n Maryamu a Yakub n Yusufu ya yi, bedo Yakub n Yohanna 'ya yi, (Zebedi a nugun).

Owo Fi Nwo Bi-Biyi

- ⁵⁷N Wyeshei, nyabwai ho, a yi wo eye Yusufu woi gmi n Arimatiya Yesu viyi nu.
- ⁵⁸Wa lo Bilatus aba wa nya Yesu nayi ɓo. Bilatus wa ga gbe ge a la ga wo.
- ⁵⁹Yusufu wa la wo, wa wo kmi dna na je manayi.
- ⁶⁰Wa lo n woi, wa wo bi dna n wohin vingwo n wo bei ce nyi dna n Kuta, wa kutado la wa ko gu n cei.
- ⁶¹Maryamu Magadaliya ɓedo n Maryamu do yi ɓaku sase kpe vi-vi ɓai gye.
- ⁶²Efye a gyi, wato nyipyeyi n ko ɓo vi paska shiri zhin nya nyi, amalami dnagmayi ɓedo, na Farisiyawa yi ɓa yezhi n Bilatus aba.
- ⁶³Ba gna wo ge, Shekwomwasa, Kata cei ye ɓo gna ge, anyipyeyi ngun ata avun mi ɓo je wye-wyeyi bwa.
- ⁶⁴Ntu ce nu, yi ye ha ga egbe a gu wo vingwo har nyipyeyi tayi, kada ewo abara, ɓo gna aza ge wo la lakala n fi, N kwo ze lo nu, ho gye koce-dna kmaknayi ɓo ladu kmisunyi n nukoyi.
- ⁶⁵Bilatus wa gna ɓa ge, Fye zhin akma n fye aduwa nyakun a yandoka yi ɓa ɓa mi ɓa gu kwo.
- ⁶⁶Sai ɓa lo ɓa hatimi tu n kutayi, ɓa ku a yandoka zhi ɓa gu vingwo.

Matta 28

Wo La Lakala

- ¹N Ladi-wyi labmi yi, Maryamu Magadaliya ɓedo n Maryamu de yi ɓalo vingwo aba.
- ²Nsagmanyi yi, ekni a shan-shan, ntu ge malaika Dagayi nya ɓo gmi 'she wa ɓe wa kpe kuta ya, wa sase tu ko.
- ³Ewa wyeba bmina ngye gma bmiya-bmiya yi. Ewa je n wu buibui yi pau.
- ⁴Aza n ɓa ɓo zhi ɓai gu nyi, ɓa vin shi ɓa ɓo gye wo, ɓa miya zhi ɓa ku zun-fi.
- ⁵Malaika wa da ɓo na nyikoza yi, "Fye to wo dna m. Mi kpe lo ge fye Zan Yesu nu shin, n na ɓo zun wo du nyi.
- ⁶Ama wo to lo ya m, Wo la wye-wyeyi je bwa shi wo ɓo da nyi. Fye lo ɓe fya gye aba Wo ɓo wan gye shi.
- ⁷Sai fye lo wolo-wolo fye gna wo bara ge wo la laka vingwo, Woi du Galili wo gye ɓa bwai. Nya nu ma gna fye."

⁸Anyiko-za ƙa kun n siyi n vinguwo, odnai wa ƙa, ai gwo ƙa da, ƙa lo ntu ge ƙo ga abara nabari shi malaika gna ƙa.

⁹Shi ƙa ƙo lo ƙai busi, nsagma nyi ƙa gye Yesu gni nba bye. Wa ciba ge, “Sanu fyei” Ba lo ƙa ya zhi n wa bye ƙai wan Wa pita, ƙa ga wo mwa-mwa.

¹⁰Yesu wa gna ƙa ge “Fye to zhin dna won, Fye lo fye gna Mazaje ge ƙa lo Galili wolo-wolo ƙa shegun Mi ƙo.”

¹¹Bai filo zan mi ƙai lo zhimi, azaho na duwa nyakun guyi mi wato a yan-sanda, n ƙa ƙo gu vinguwo nyi, ƙa lo a pirist dnagmai aba ƙa wu ƙa lafiya ƙo ko ku zhin.

¹²⁻¹³Ba yezhi n Yahudawayi atukoda jei ƙa zhin shaula ge ƙa ga a yan-sanda agyiwyey, to ƙa da ge Yesu la laka nun, ama ƙa gna ge, esa ƙa bei ku wan-gye n sukoyi, Owa, bara be ƙa wyi wo nahi.

¹⁴A Yahudawayi a tukoda gna, “Ndei gwomna wo ce, yi ƙa gni agni ga fye har to wa zhin fye nyaho m.”

¹⁵Ayan-sanda agyiwyey gwo, ƙa ga nabari shi a ƙo gna ƙa ge ƙa da. Oba nabari kwa gnami fyi na Yahudawayi aba, har naiye, ƙa gaiciya ga lo lonu.

¹⁶Abara awocei-gmanyi, ƙa lo Galili, ƙai lo 'pe aba Yesu ƙo gna ƙa ge ƙa bei shegun wo.

¹⁷N bwayi, ƙa ku gye Wo wye, ƙa ga Wo mwamwa, ama azaho n ƙa mi, to ƙa ga gaiciya ge Yesu nu gni m.

¹⁸Yesu wa gna wo abara, “Iko vinya n 'she beƙo na nyi yi, a la ga Mi.

¹⁹Ntu ce nu fye lo fye zan abara do shin nabye vinya, fya zhin ƙa batisma dna Dada 'ye, n Nugun yi, n Zafun Gyi-gyi-yi.

²⁰Fye wu ƙa ƙa vi awyidna n Mi ku ga fye nyi, fye ku kpe ge Mi gnisun lo fyei ci-ci har anyi zo sa.”

Markus

Markus 1

¹Nabari manayi Yesu Kristi Shekwoyi Nugun nya kwo ya nlayi nu.

²Ngye shi a cei kafi dna Anabi Ishaya Litafi, Shekwoyi bei da ge, Wo ba tnu Wo bi yi dna nanyi, ama owo tnu-tnu dai ba be na bye wa zhin anyi zhi ntu wo be-be bo.

³“Tnu-tnu dai ye bei dna zhabui nu, wa da nabari ge aza vinya ba zhin ba sese aba kafin Dagayi wo be,” nya nu Ishaya bei da.

Yohanna Batizma Zhinyi

⁴Tnu-tnu dai ye nu bo zhin Yohanna Baptisma zhin-yi. Wo bo dna zhabui nu woi wu ge, aza vinya bapmi avun wu laifi, n na bai Shekwoyi wa zhin ba gafara, a zhin ba baptisma, kwa wu ge lallei ba la vun pmi wu laifi.

⁵Azayi knu n Urushelima n Yahudiya yi, bai zanzan fi Yahudiya bmana ba gye, bai wo Yohanna. Sa n ba bei yabui, wa zhin ba baptisma dna Urdin 'la.

⁶Laknumi pa nu bei zhin wo je o wo shinpanya epanya nu. Abo, n 'su zhabui nyai nu bei zhin wo nyagyi.

⁷Wo bei zhin wo zhin wa'azi lai nu! “Zaho be lo safyewyi nwo du mi lo, har mi to knuce lo ma zhin wo baram.

⁸Mi zhin fye baptisma n nuwan yi, ama wo bei zhin fye baptisma n Shekwoyi Zafun yi.”

⁹Nwyi-hoi Yesu wa gmi n Nazarat n Galili. Yohanna wa zhin Wo baptisma n Urdun 'la.

¹⁰Sa Yesu bei gmi be n nuwan, wa gye eshe a guya, Zafun Gyi-gyi-yi n gye lukpe kwoi yatu Wo.

¹¹Begye kwa gmi she, kwa cige, “Oho nu zhin Mi Nugun yeyeyi, Oho nu zhin Ma Gmada.”

¹²Nsayi-sayi yi, Zafun Gyi-gyi-yi wa lo woi n bmana.

¹³N zhabui mi Owa nyipyeyi shinyi n wo gmanyi yi akpe a nyafanya. Shaitan woi zhin Wo jaraba, N na vun amalayika be ba zhin Wa tna.

¹⁴Nsa dohoyi, Esu Hiridus, woi la Yohanna wan, Yesu wa lo Galili, wa'azi zhin Shekwoyi nabari manayi nya.

¹⁵Wa ci ge, “Esa lasi n sayi, Shekwoyi bemi la wo vivi, fye pmi avun wu fya laifi, fya gwo Wo nabari manayi ye.”

Yesu Wa Yi Abnu-Tnuyi

- 16**Nwyyi-hoi, sa Yesu bei zan-zan lo n Galili 'la gbe, Wa gye Siman n wo zadoyi, Andarawus, bai wan awyesala ntuge oba bwaze nu bei nu.
- 17**Yesu wa yi ba, "Fye be fya vi Mi MiBa zefye a zawan-yi."
- 18**Nsayi-sayi yi, ba fwa ba 'sa, ba lo ngnisun woi.
- 19**Nba bye fyewyi, Wa gye Zabadi abi, Yakubu n Yohanna yi, bai zhinba asa aba.
- 20**Wa yi ba ce, Nsayi-sayi yi, ba fwa ba dada Zabadi, dna n 'ya, n na kodogoda yi n wo bei yi ba ba viwo nyi.
- 21**Yesu n Wa nugundoyi, ba be Kafarnafum Nsatiwyi, nlabmiyi ba lo a Yahudawayi aduwa nyakun Wa zhin wa'azi.
- 22**Ca wo aza mwa, ntu ge Wo bei dabo n ikoi gbo n na zaje nya yi. N tu ge Wo to bei shan azam.

Aza Cbo-gbo Ba Bwa Kagna

- 23**Ezaho n alijenu bei dna n aduwa nyakun wa ya wyibe.
- 24**"Knihin nu zhin Hoi gna yi gnagna ya, Yesu Nazaratiyi, Ha be Ha wuyi nu? Mi kpe Ho ye lo, Shekwoyi Nugun Gyi-gyi-yi."
- 25**Yesu wa gna alijanu yi ge, wola ce pi wa pmi wa gmiya be n zahi mi.
- 26**Zafun nukwoyi ho, wa sa wyi wa pmi wa she zahi ya, wa gmiya be n sayi.
- 27**Ca wo aza mwa, ba dabo bai cige, "Kni adini woi-woyi nu nyia? Har a zafun nukwoyi wo Wo begye."
- 28**Nabari deye kwa gnami, har Galili kni vinya.
- 29-30** Sa n ba bei fwa aduwa nyakun, Owo, n wa barayi ba lo Siman n Andarawus yi puva. Ba gye Siman yezhi dna n nayi-napye kaladayi, ba gna Yesu wo bo n sayi-sayi yi.
- 31**Walo wo gado gbe, Wa shiwo bwa Wa bmawo zhin wa sase, nayi-napye yi ho kwa fawo, wa laka n sayi wa zhin ba nyagyi.
- 32-33** N wyeshe yi a kpemi ba nu, na nyasan yi n na lijanu dayi, n na bai Wa ka ba gna. Aza n mwa begye ba kun n Kafarnafum zhimi n na bayi ba gye Wo.
- 34**Yesu wa ka aza gna n wyeshe-yi n mwa. Wa gnakni alijanu ge ba kun na za mi. (Amma woto bei ye ge alijanu da bom, ntu ge ba kpewo-ye lo.)
- 35**N labmi yi Wa kpesa, Wa laka Wa lo zhabui, Wa zhin aduwa.

36-37 Nsa dohoi Siman n na zajeyi ba lo Wo zanyi, ba gna Wo ge, “A za nya Ho bo lo.”

38 Ama Wa dna begbe ge, “Dole ya lo a zhido, Mi gna ba nabari ce, gama Mabe ntu cenu.”

39 Wa zan laba n Galili kni, woi zhin wa’azi n na aduwa nyakun, woi lo a zaya mwa na lijenu iko.

40 Nsa hoi Kuturu wa be wa yashi n Wa bye wa gyi Wo wye ge, Wo kawo gna. “Nhaye, Ho bami Ha kami gna.” Bma mi Zhin.

41 Yesu wa gye wo sun-sun Wa towo bwa Wa cige, “Mi laye, la kagna!”

42 Nsayi-sayi yi, wa kagna bwa.

43-44 Yesu wa gnawo, “Lo Ayahudawayi pirist aba wo dnahowye. To kpe gni ha da bo n zayi n zokwom, lo n nyaga yi shi n Musa bei zun tu kuturu n wo la kagna bwa n nabayi a za kpe lallei hola lafiya bwa.”

45 Ama sa n wo bei lo n zokwo, wa ya wyidna ge wola lafiya bwa, n tu cenu aza shekna Yesu har to wami nwo lo ezhi doho-doho yim, sai dna zhabui mi azayi knu na bai gbo-gbo bai be dawo bo.

Markus 2

1 Anyipyeyi mwa begye navun, wa, jezebe Kapanahum, nabari Owo be-benya kwa gnami n zhi wolo-wolo.

2 Puwa n wo bei dnanyi, nu n na zayi har to ai bwa aba na boknumi gbem. Wa zhin ba wa’azi.

3 Aza n gun anyi ba be n zayi shi n nayi-fi-fiyi-ya n nyasan yi.

4 To ba bwa aba n basi Yesu a bam, ba bma nyakunshe ba shin nyasan-yi shi n Yesu abye.

5 Sa n Yesu bei gye ba gaiciyaga, Wa ci nyasan-yi ge, “Aku ha laifi zhin gafara.”

6-7 Ama A Yahudawayi adini tukwoda ba dafi a ba mi, “Deye kwonu zhin (tukwo-mwa). Wo zhin nubo ge Wo zhin Shekwoyi nu? Gama Shekwoyi gmanyi Wonu zhin gafara zhinyi.”

8-9 Yesu bei kpe ba bugba ye, Wa ci ba ge, “Knihi nu zhin cei wo fya? Kni dei nu dulo n fwa-fwa a ci ge a ku gafara zhin wo, ko a la wo kagna?”

10-11 Ma wu fye ge Emi; ‘Za Nugun n ikoyi lo Ma zhin wo gafara, Wa pmi wye da nyasan-yi Wa ciwo ge, a la ho kagna. Ku ha pece ha lo ho puwa!”

12 Wa gya gna gun she wa ku wo pece wa gmiya lo bmi. Ca wo aza mwa bai la Shekwoyi tu, “Yi to shin degye pya gyem.”

13Yesu wa je gmi ya lo Ola gbe, Wa zhan za wa'azi nba bei shekna Wo nyi.

14She wo bei zan-zan Woi v i la gbe, Wa gye Levi Alfas nugun n sase tu nwo agadu gwo ba. Yesu wa ciwo ge, "Knuɓe Miyi, be ha ze Mi bara." Levi wa laka sa wa kun lo woi!

15Nsukwoyi Levi wa yi wo agadu gwoyi aje n na laifida a dnagmai yi n na nyagyi gyi ba, n na bayi ba sun n Yesu yi, n Wo abarayi. (A laifida ye pya bei mwa begye n na za nba bei viwo nyi.)

16Ama sa na Yahudawayi adini tukwoda bei gye Yesu woi gyi nyagyi n na laifi dayi, ba ci Wo abara ge, "Knihi nu zhin Woi mi Woi gyi nyagyi n na laifida yia?"

17Sa n Yesu bei wo ba beda Wa ciba ge, "Anyasan-yi nu n shigbeda apma yi, toge alafiya dam. Mi to be Ma gna a za manayi nu ge ba ye abui m, sai aza nukoyi."

Oza Nwa Gmi Nshe

18Saho lo n Yohanna a bara n na Yahudawayi atukwodayi bei zhin azumi. Wato to bai gyi nyagyim, shi ba adini bei wu ba. Nwiyihoi ba be Yesu aba ba nyawo, bo kwo zhin to Wo abara yi zhin azumin.

19Yesu wa dnaba begbe ge, "Mulaba anugundo zhin ba na nyagyi n muia ba zhin? Ba ba wun bugba woye kunsun n bai?"

20Ama n wiyihoi a bei laba mulaba nsayi nu nba bei wun bugba.

21(Azumi shi zhin zokwo kwo-kwoyi fye nu) Kwo ze ngye a gu eje kwo-kwoyi ta n je woi-woyi nu. She paci yi bei je saya ma? Obwo woyi kwa du kwokwoyi pata.

22Fye gna ce yekpe lo, nge n na fi anab nuwan woi-woyi n Pwaku kwo-kwoyi, sa anab nuwan bei to gunzhi, pwaku bei baya anab nuwan a zhangma. Anab nuwan woyi ye pwaku woyi nu.

23Nwiyihoi njesun, n Satiwiyi, Yesu n Wo abara yi bai zan-zan fi nfa, O Wo abara ba bma alkama tukwo bai gyi.

24Sa na Yahudawayi adini tukwoda bei gye lonu, ba ci Yesu ge, "Oho abara zun wyidna gna nu, a ta do alkama n Satiwiyin."

25-26 Ama Yesu wa ciba ge, "Fye to shin wo esa mikun bei gun Esu Dawuda nwa nugun-doyi, wa lo Shekwoyi puwa-Abiyata nu bei zhin pirist yakwo n sayi-ba gyi bredi n na pirist nu bei zhin bai bwakwo gym. Degye bei zhin laifi nu nkwohin.

27Ama a bei zhin Satiwiyi ntu za ampanyi bo nu toge! Satiwiyi na gyi gyiba n zayim.

28Emi, Eza Nugun, n ikoyi lo Ma da nya na za ba mi ba zhin n Satiwiyi yi!"

Markus 3

¹Sa Yesu bei dna n Kafarnafum Wa lo aduwa nyakun njesun Wa gye za dna nbwai sha-shayi.

²Shikwonyi Satiwiyi nu bei, Yesu a nuwun-yi bai ka wo wye ko Wo ba ka zayi bwa gna. N Wa kawo gna, ba bei shiri zhin ba wan wo.

³Yesu wa yi zayi be ceyi gni na za bye.

⁴Wa pmi awye shi owo anuwun yi Wa nya ge, “Ko bimya a zhin bo manayi n Satiwiyi? Kwo nyipyeyi benukwoi zhin nya na? Kwo zhin nyipyeyi a-wye-wyeyi gni nya nu kwo oba wu nya na?” Amma to ba dna Wo be gbe m.

⁵Wa shiba wye n mina-gyi yi, ntu ge ce bei san Wo shi bata gye ba anuwan n nyai n aza yem. Wa ci zayi ho ge, “Ta ho bwaya,” Sa n wo bo takwoya, wa bwa kagna n sayi-sayi yi.

⁶Nsayi-sayi yi a Farisiyi ba lo Hirudus azaba ba zhin shaula shi ba ba wu Yesu.

⁷⁻⁸Nsa deye, Yesu nwo abara yi, ba lo olagbe deji yi viɓa nba bo knu n Galili kni, n Yahudiya yi, n Urushelima yi, n Udumiyayi, wato Urdun la kma har kwoi lo Taya n Sida kni yi. Ntuge owa bo wowoyi zhin nabari bo la gnami n kpai, ntu cenu azai be wo gye n bahin tukwoyi.

⁹Wa gna Wo abara ge, ba be eya yi vivi yi, sakun a ce Wa bwaya dna nuwan, ntuge deji bo ku duwiyi.

¹⁰Ntuge Wo bola aza kagna n wyi yi mwa, ntu lo nu anyasanyi mwa ba she kna Wo, bai ye ba to Wo bwa.

¹¹Sanu alijanu da gye Wo wye, ba miya zhi kni, bai fyaku, “Oho nu zhin Shekwoyi Nugun!”

¹²Ama Wa gna kni ba ge, ba to zhin a kpe Wo yem.

Aje Atnu-tnuyi Ho Yi Be

¹³Nnavun deye, Wa gnu lo pe, Wa gna Wa za kni-kni yi ho ge ba be ba sun Woi bo, ba ku zhin lonu.

¹⁴⁻¹⁵Nsayi Wa kni aza n bami n gun awo-cei-aba ba ze Wa nugundo, Wa tnu ba, ba zhin wa'azi, bai knu alijanu ya.

¹⁶⁻¹⁹Aza 'ye awo-cei-aba nyi, n Wo bo kninyi: Siman (Wa shan wo ye tu ge Bitrus), Yakubu n Yohanna yi (Zabadi a bi ama Yesu bei yi ba ge, Ogmawyisa abi), Andarawus, Filibus, Batalamawus, Matta, Toma, Yakubu (Alfas nugun), Tadawus, Siman (wo bei dna naza nba sun kun ba mi a Romawayi gwamnati ya nyi.) Yahuda Iskariyoti (nwo bo knu Yesu nyi.)

²⁰Sa nwo ɓo jeze be puwa nwo bei dna nyi, aza ya yezhi njesun, har to Wa bwa sa n Wo gyi nyagyi m.

²¹Sa n Wo anugun-do bei wo lonu, ɓa zhin atna ɓa lo Woi n ɓa puwa. Ba cige, “Wo ta kpebeye lo n Wo zhin m!”

Laifi Nkwo To N Gafara Yim

²²Amma a Yahudawayi a malami n ɓa ɓo knu Urushelima, ɓa cige, “shetan, alijanu-su dna lo n wo mi. Cenu zhin alijanu yi wo-wo beda.”

²³Yesu wa yi ɓa zhi Wa nya ɓa ɓo “woi si anyi besis nba ɓo kpeye Shetan ɓa zhin wuna wa nya shetan ya?”

²⁴Ebe n kwo gna je nkwohin tukwo yi, kwo ɓa miya.

²⁵Puwa n kwo na je gna yi, kwota gni m.

²⁶N shetan sungun n wohin yi, woba mi n ɓoho zhin wuna. Wo ta pwo m!

²⁷(Sai a pa shetan, kafin a knu alijanu ya), ngye sai a pa zakala kpa, kafin ami a lo wo puwa a wyi wo akaya.

²⁸“Eminu gna fye, aba zhin laifi doho-dohoi gafara, kwo eza woi yi Mi n ye nukwoyi yi.

²⁹Ama beda nukwoyi tu n Zafun Gyi-gyi-yi tukwo, ata zin za gafara m, laifi yakwonu.”

³⁰Wo ɓo gna ɓa lo nu n tu ge, ɓa ɓo cige Wo zhin Wa tnu-tnu a wowoyi n shetan ikoyi nu. (Maimako ɓa cige n Zafun Gyi-gyi-yi iko yinu.)

³¹⁻³²Owo 'ya n Wa majeyi, ɓa be puwa n naza ɓo yefi woi wuba nya nyi, ɓa tnu wo yi ɓa daɓo n Woi “Oho 'ya n Ha majeyi, n Ho bei pmalo n bmi ɓa daɓo hoi.”

³³“Wa dnaɓo gbe ge, Anyikanu zhin Mi ya? Nyikanu zhin Ma maje'a?”

³⁴Wa shi aza 'wye n ba bei shewo kna nyi Wa ci ge, “Emi 'ya, n Ma majeyi nu zhi nyi!

³⁵Eza n wo zhin Shekwoyi beye, wo nu zhin Mi Mado, emi mapui, n Mi 'ya yi!”

Markus 4

Yesu Wa Wu Aza Nya

¹Nsa dohoi njesun, aza yezhi n Wo aba n 'lagbe woi wu ɓa nya. Walo Wa sase dna n 'ya Wa daɓo ɓai dna ɓo.

²Wo bei zhin Wa wunya Woi si aza anyi besi nu ndu. Wa si ba doho layi:

³“Fye wo! Fwa-yi ho bei lo anya bye. Shi wo bei she nya-bye n wo fwa,

⁴Adoho ba kaya zhi zokwo, alu babe ba tnuBa ba gyi.

⁵⁻⁶ Adoho ba kaya kpe na gbaku-ku, ba pye pai, ama safyewi nyipyeyi kwa woBa ba ku fyi, ntu ge oBa gbege to lo kni lo m.

⁷Adoho ba kaya fyi n Knawuyi, aknawuyi ba kuBa gyi sun to ba fya wye m.

⁸Ama adoho ba kaya fyi n kni manayi, ba ga ampani aku shita n du 'do nwo bo bye nyi, adoho aku shi-tnanyi, adoho har aku tagyi.

⁹Nfye na tnuBua yi gyilo, fya wo!"

¹⁰Nnavun sa n ba bei cezhi n Wo abara awo-cei-aba yi, n Wo aviye hoi jesun, ba nya Wo "Yiye Ha wuyi oho anyi-besi-si awyega."

¹¹⁻¹² Wa ciBa ge, "Ala ga fye fya kpe aboho ye tu n Shekwoyi bemi tukwo, n ba zhin asiri nu nna za ba nBa ta kpe Wo yem. She anabi Ishaya cei da, 'Ko da shike ba gyelo, bai wo, bata kpe awye ga m, n na bai ba pmida Shekwoyi, Wa zhin ba gafara m.'" "

¹³"Ama n fye to kep anyi besisi biyi ye awyega m, fye ba kpe ajeye wuna n Miye Ma da nya?"

¹⁴Fwayi n Ma dawo bo nyi, ezanu n wo lo n Shekwoyi bedayi, woi zhin kukari wa bye kwo n za bugba.

¹⁵"Zokwo n nyabye ho bei kaya zhi nyi, kwo wu gye a-za n ba na kuta bugbayi fyi. Sa n ba wo Shekwoyi beda, Shetan wa be n sayi-sayi yi, wa zhin ba ba zo kwa mwi.

¹⁶Agbakuku kni nya wu gye a-za n ba wo Shekwoyi beda na gmadayi,

¹⁷ama ngye agebegbe putu nu fyi n kni-yi pya, oBa gbege to lo shin n kpayin, koda shike ba zhin ba bmiya kmisun yi, sa n wahala bwa ba, ba fyi.

¹⁸"Ekni akna-wuyi nya wugye aza n ba wo Shekwoyi beda ba gwo kwo.

¹⁹Ama safyewyi abowye-da anyinya, n nyabwa ye yi, n na bye-gyi zanyi yi, n na nya manayi shakpe yi, ba be ba ku Shekwoyi beda gyi sun n ba bugba, har to ba zhin ampanyi m.

²⁰"Ama ekni manayi nya, wugye aza bugbanu n ba wo Shekwoyi beda ba gwo kwo n shince kniyi, ba ga ampanyi shita, shitnai, har tagyi, ndu odo n na bo bye nBa bugba nyi."

²¹Wa nyaBa ge, "Sa n za dna fitila na, wo zhin wa be n bue yi wa knu kwo?" Awo! Ata gye buzangna har a zhin ampanyi n ceyi m, A zhin a ya fitila tu n nya nu nkwo ba ga buzangna dai-dai a bwa kwo gyiba.

²²Obo kwo bwishi lo nsayi ye, aBa kpekwa nyaya n wyihoi.

²³Nfye na tnuBuayi gyilo, fyewo!

- 24**Fye zhin bo fya wo, N fya zhin lonu, fye ba gna awyega bwa nbo Mi gna fye nyi.
- 25**Eza n wo nya yi lo aba gawo, eza n wo to cei lon, odo n wo cei lo ma aba kwo gwo wo.
- 26**Fye wo anyi be sisi deye, Fya kpe shi Shekwoyi ebemi wu.
- 27**Fwayi ho bo bye anya nwo fwa, wa lo wo nya: anya pa har ba mwa n tnawo bamzhin.
- 28**Ntuge ekni nu bo zhin nyabye kwa mwa. Kmisun-yi, fyintolo nu bo gmi be kpa, n sayi alkama tukwo ba be har ba bi.
- 29**Kwonu o fwada be sagmanyi yi nwo limzhegye yi wa gbe ba.
- 30**Yesu wa nyage, “Mi ba wufye shi Shekwoyi bemi wun n wunana? Miba gbekwodo n knihin nu fya bwa awyega?”
- 31-32** Kwo wu gye mustard byegye nu. Kwo bwa sun ciwyi nu, ama shi kwo mwa, kwo zhin kwa du a shinwa 'je mwa-mwa n na bwalayi mwakpa har aluyi be bai kpa ma n kwa bwala.
- 33**Wa si ba anyi besii n mwa shi ba ba mi ba bwa awyega.
- 34**Behin-hin, wo bei zhin Woi wu nya, n nanyi be-sisi yi nu du n deji aba, ama sa n Wa pmigni n Wa barayi, Wa wuba awyega.
- 35**Sa wyeshe bei she, Yesu wa gna Wo abara ge, “Yi piya lo nuwan kma deyi.”
- 36**Ba lo ba ya aza zhi (kwo da yake aya je bei vi ba na vun).
- 37**Safyewyi agmasa ci, anuwan dokwo ba kuka bai ce eya abwa ya, nuwan ye kwa nu eya-har kwoi ye kwa shin.
- 38**Yesu bei la wangye dna eya avun tu na gyewan nya. Ba knu Wo agyewyi ya bai gna, “Male, Ho tagye Ha nuwan lo n yi bwi-bwi bo yin?”
- 39**Wa gnakni se, Wa ci ola ge, “La ce pyi” Ese, n na nuwan dokwoyi, ba ze cei pyi.
- 40**Wa nya ba ge, “Knihin nu bo zhin fyei wodna? Har saiye fye to gami Gaiciyan?”
- 41**Ca wo ba bai gna je ge, “Nyikado pya nu dna n zaye ya, har ese n 'layi bai wo-wo beda?”

Markus 5

Abulutu 'Ba Fi Oza Ce N Wye-Wye Yi

- 1-2** Shi ba bei piya kpe nkma dehi, eza doho nwo bei n alijanu yi, wa gmi be nsi n na vingwo, Yesu woi bwa kakashi n eya.

3-4 Eza deye bei zhin woi sase dna na vingwo nu, wo bei n kalai ko a la wo pa n na gmai a ku asunkna fi wo n na pita, wa gbe agma ya wa bma asunkna ya, wa lo wo nya. Zaho to bo ikoi wa gyi wo shi m.

5N nyipyeyi n sukwoyi vinya, woi zan dna n na vingwo n na pei woi fi aku, woi sa wohin ya n na kuta yi.

6She wo bei gye Yesu nkpai, wa busi lo wa ce akwo-kwo shi nwo abye.

7-8 Yesu wa dafo n alijanu yi wa gna, “zafun nukwoi gmiya be” Kwa sawyi n kalai, “Yesu, Shekwoyi iko da Nugun, Ho ye ha zhin mi knihi nu a? Ntu Shekwoyi bo, to ga mi wahala m.”

9Yesu wa nya wo ge, ayi ho ge na? Alijanu kwa ci ge, “Begye, ntu ge yi mwa begye fi lo n za deye mi.”

10Alijanu ba gyi Yesu wye ge, wo to tnu nbai nkpai m.

11Dna sayi mi, a burutu ho bei zhi nmwa begye bai gyi anyagyi n pe sepa.

12Ba gyi wye ge, “Tnu yi na burutu yi mi.”

13Yesu wa ga ba gbe. A zafun nukwoyi ba kun n za yi mi ba lo fyi na burutu yi mi. A burutu yi vinya, ba busi shin zhi peyi ba kafi 'la, nuwan shin bayi.

14A burutu da busi lo a kauye bai wu lafiya, aza yi knube bai gye n bahin yi.

15Safyewyi a-za ye-zhi n mwa aba Yesu bei gni nyi. Ama shi ba bei gye zayi sase ma Yesu dna n wohin hankali, ba wo dna.

16Aza n ba bei gye bo kwo bei zhin, ba wu lafiya laba.

17Aza ya Yesu wye-gyi ge, Wo lo wonya Wa faba.

18Wa je eya lo. Eza wo bei na lijanu yi nyi, wa gyi Yesu wye ge wa knulo n Woi.

19Yesu wa ciwo ge awo, “Lapyi da ha nugundo ho gna ba nya Shekwoyi ku zhin ho, shi wo sun-sun gyei lo jesun.”

20Wa ya azhi ngnu awo vi (Dikapolis kni) woi gna za abo adnagmayi n Yesu wa zhin wo, ca wo aza n mwa.

Abo Wo-woyi Kagna Nya

21Sa Yesu bela pi ola ya n 'ya yi, aza yezhi n wo aba n mwa n 'la gbe.

22Aduwa nyakun tukwoda be, ai yiwo ge Yairus, wa be wa yashi n Yesu abye.

23Woi gyi wo wye ge? Wo kawo nyignu gna, “Wola ga fyi, mi gyi Ho wye, be Halo Ho tuwo Ho bwa wa ka gna.”

24Yesu wa viwo lo, aza viwo na vun.

- 25 Dna na za nba bei viwo nyi, nyikwoza ho bei dna n nyasan-yi aye awo-cei-aba ami yi zewo ya.
- 26 Wo bo ku wahala sin woi wu agyiwyeya n mwa n na shigbe-da aba, ama to wa kagna m, sai koyi gya bye-abye nu.
- 27 Wo bei ku wo abo awo-woyi n Yesu zhin, cenu bei zhin wa viwo na vun dna deji, wa towo 'je bwa.
- 28 Ntuge wo bei zhin nubo fyi wo mi, "N ma towa 'je bwa kawai, mi ba kagna."
- 29 Shi wo bei to wo 'je bwa n kusun, wa ze kagna yi, o wami-zeya zan n sayi-sayi yi, waku wonya kpege wola kagna bwa!
- 30 Yesu wa kpe n sagmanyi ge kagna iko la gmi n Wo, Wa pmi awye shi aza Wa cige, "Nyika to mi jekpe bwa?"
- 31 Owo abara nya Wo ge, "Aza n ba sheho kna zhl mwa nyi, Hoi gni Hoi nyabo ge nyika to Ho bwa?"
- 32 Ama Wa ce Wa sha-wye laba n 'na bai Wagye 'za n wa to Wo bwa.
- 33 Nyikwo-za ho, shi wo bei gye bo kwa zhin wo, wa be n dnayi, woi vin, wa cakwo-kwo shin Wa bye wa gna Wo bo wa zhin.
- 34 Wa gna wo ge, "ho gaiciya ga, kwo la ho kagna, lo ho nya n lafiya yi."
- 35 Woi ye gni Woi dabo n woi atnu-tnu yi ba be bai kun n Yairus puwa ge esa la diya, owo nyigun lafi, apma to lo Yesu wa shan lom.
- 36 Ama to Yesu wa gye wo anuwan n ba beda yim, waci Yairus ge, "To wo dnam, la gaiciya ga Mi."
- 37 Yesu wa kpe a za zhi n bmi to wa ye ge ba lo api min; akpe Bitrus, n Yakubu yi, n Yohanna yi.
- 38 Sanu ba bei lofi ba gye aza fi bai cibwi, bai bewyi, har baku jeje.
- 39 Wa lo mi, Wa dabo na zayi, "Knihi nu zhin fyei cibwia? Ebi to fim, wo wangye nu kawai."
- 40 Ba mawo san wyegbaci nya, ama Wa gna ba ge ba la kun. Wala biyi 'ya nwo dadayi n Wa barayi ba lolo nyakun mi n 'biyi bei yadna nyi.
- 41 Wa ta bwa shi wo nbwa, wa ci ge, binyikwoi lakala. (Owo aye bei nyi awo-cei-aba nu)
- 42 Wa lakala gni-agni, wa ya zan-zan, ce awo owo azamayi.
- 43 Yesu wa tu ba gbe n kala yi ge, ba to ye zaho-zahoi wa kpe cem. Wa gna ba ge ba ga binyikwoyi hi nyagyi.

Markus 6

¹Esa fyewyi wa fa ekni dehi, wa O jeze lo wo ayi Nazarati bedo nwo abara yi.

²⁻³N satiwyi yi wa lo aduwa nyakun, ntu ge wo wu nya, owo beyekpe nwo afo wo-woyi zhin yi kwa wo aza, ntu ge wo fo zhin oza nu ngye ba. “Ba nya ge kafinta n Maryamu yi nugun nu to n, owo azaje nu to n Yakubu yi n Yusufu yi n Yahuda yi bedo n Simani yi n? Owo amapwi to bwa gni fi lo n ya n yi n.” To ca da ba m.

⁴Yesu wa ci ba ge “Anabi n mwamwa yi nna baho-baho yi, sai dai n wohin ayi nwo aza aba.”

⁵Ntu ba tna gaiciya ga fo, wo to fo mi wa zhin afo wo-woyi nba aba m, sai dai wo fo to anyasan yi bwa, wa ka ba gna.

⁶Ca wo wo ntu ba tna gaiciya ga fo. Wa gmiya wa lo azhi do wa wu ba nya.

⁷Wa yi awo-cei-aba, wa tnu ba ngun aba-ba, wa ga ba iko tu nna azafun nukwoi tukwo.

⁸⁻⁹Wa gna ba ge ba to la nyahon, sai oba busi zanzan nya. Ba to la nyagyi n pwakun yi ko agywe ko abuada do ko eje do m.

¹⁰N fya lo ezhi fya ku bwa fi n puwa gmanyi har fya kun n zhihi.

¹¹N fya lo ezhi nna to gwo fye ko a kna fya beda tnubuan m, fya abwitukun luya nfyepita, fya kun, fya fa ba nba aboi.

¹²Owo abara bai gna zaho-zahoi nba gye, n ge wo la laifi fa.

¹³Ba kun alijanu ya n mwa, ba ka anyasan yi gna, bai shin ba zaitun mi.

Yohanna Fi

¹⁴Esa fyewyi Hirudus wa wo Yesu nabari, ntu ge a bei zhin ai da wo afo wo-woyi zhin fo abaho-bahoi. Esu wa zhin nubo ge ko Yohanna batizma zhin yi nu la laka n vingwo. Aza ci ge ashe ce nu zhin woi mi woi zhin afo wo-woyi.

¹⁵Azadoho bai gye ge Yesu zhin Iliya nu, ko anabi kwoi-kwoi ho nu la laka n vingwo. Azadoho ba gye ge anabi woi-woyi ho nu ngye anabi dnagmayi ho.

¹⁶Hirudus wa ci ge awo, “Yohanna nu eza nmi bei la wo tukwo zunya, wola laka n vingw.”

¹⁷⁻¹⁸Ntu ge Hirudus bei la Yohanna wan, wa wo dna n kurkuku, ntu ge wo fo zhin woi gna wo ge kwo to bmiya lo wa la Hirudiya owo zado Filibbus nyikwo m.

- 19**Hirudiya bo cei pma a Yohanna wu, ama wo to bo mi wa zhin lo nu to Hirudus woi ye m.
- 20**Hirudus bei zhin woi ga Yohanna mwa-mwa, woi kpe ge wo zhin oza befyecei nu nza gyi-gyi-yi, wa wo kna. Wo bei zhin woi ye wa wo Yohanna beda, ama shi wo ku wo kwa gna wo gna-gna nwo mi.
- 21**Hirudiya sa bewo Hiridus mama nyipyeyi kwa shegundo wa yi aza agmada zhin n wo puwa, owa bmazhinyi, asoja tukwoda, n na za dnagmai yi n ba knu Galili.
- 22-23** Hirudiya nyrgnu wa nya-nya nba bye har kwa da ba gma vinya. Esu wa zhinwo alkawali ge ntu onya bo nwa nya nyi, wo ba gawo nyahonyahoi n woye. "Kwo emi kni, ma gna kwaje ma gaho tokun yi."
- 24**Wa gmiyalo wa nya wo 'ya, nya kwo bmiya wa nyabo. Owo 'ya wa gna wo ge, "Lo ho gna ho ye Yohanna Baptisma zhinyi tukwo nu."
- 25**Wa je zelo osu aba npye wa gna woge, "Miye Yohanna Batisma zhin yi tukwo n sayiye tu n fintala."
- 26**Kwa gna esu gna-gna, ama kwa wo-wo shan n wo ba bma wo alkawali ya na 'za bye nyi.
- 27**Wa tnu wo guyi ge, wo lo wo be n Yohanna tukwoyi. Soja yi, Wa lo kurkuku wa zun Yohanna tukwo.
- 28**Wa be ce yi shi ntu fintala, wa ga binyikwoyi wa lo wo 'ya ce yi.
- 29**Sa n Yohanna bara bei wo nya kwa zhin, ba lo ba la Yohanna nahi ba bikwo dna vingwo.
- 30**Yesu a bara jezebe waba ba gna wo a tnu-tnu vinya ba zhin n nyayi n ba gnaza nba bei lo ba aba nyi.

Yesu Wa Ga Aza Dubu Ngun Atnu Nyagyi

- 31**Nnavun Yesu wa gna ba ge ba kuka naza 'ba balo ba ku sun, ntuge aza mwa-begye bai be bai lo, to ba bwasa ba gyi nyagyi m.
- 32**Ba kuka fi n 'ya ba lo abado n ba bei wo pyipyi-pyi
- 33**Ama aza mwa begye ba ku gye bai lo, aza she ba kpe ba busilo ba sun bai, bai kazhi n 'ya.
- 34**Aza yezhi shi ba zhin ba shin yezhi, kafin wo kashi n 'ya. Wa gye ba sun-sun n tuge ba bei zhi n gye akni n bato knayi yim, Wa wuba anya mwa begye n kwo bei bmiya ba kpeye.
- 35-36** Nwyesheyi, owo abara ba gna wo ge, "Gna aza ba lo ezhi biyi ba si nyagyi, n tuge nyagyi to lo n bmana ye a gyi m, sukwo nyi bwa be-be nu."

³⁷Ama Yesu wa gnaba ge, “fye ga ba nyagyi,” Ba cige, “N kni nyi ya? Ntuge kwo ba dnabo za mi wa si nyagyi ga za n mwabegye layi.”

³⁸Yesu wa nyaba, “Yi nyagyi shi lo mwa? Fye lo fye kpe ge-nyi.” Ba jeze be ba gnawo ge, “Bredi lo ngnu atnu n na wyesala yi ngnu aba.”

³⁹⁻⁴⁰ Yesu wa gna aza ge baku sase, safyewyi aza sase zhi shitnu-shitnu, tagyi-tagyi kpe na gbe-gbe.

⁴¹Wa ku bredi ngnu atnu ho, n wyisala ngnu aba hi Wa kpe wye wushe Wa zhin godiya ntu nyagyi bo. Wa gna wa bara bredi n na wyisalayi ba gnaza.

⁴²Aza gyi har nubo kwa fuba, to ba shan mi gyi m.

⁴³⁻⁴⁴ Aza bei nyi dubu ngnu atnu (5,000) n ba bei gyi nyagyi nyi, n na vun a ye awyiwoyi zhi, a ceknu awocei-aba.

⁴⁵Nsayi Yesu wa gnawo abara ge ba lo 'ya ba jezelo Basaida Wa kmafe daba. Wohin woba cegni wa gna za mi.

⁴⁶Ndeye avun wa lo epe wa zhin aduwa.

⁴⁷Nsukwoyi owo abara yi fi n 'ya, n kpe n 'la tasin, woi ce tu nkma n Wo gmanyi yi.

⁴⁸Wa gye ba fi n wahala dnagmayi bai gye azhin a nuwan dokwo yi, n 'seyi, Wa zan-zan lo da ba tu nuwan 'she har Wa ya ba diya.

⁴⁹Ama shi ba bei gye nyaho kwoi zan-zan lo n ba bmayi, ba fyaku n dnayi bai gye ge nya-subwi nu.

⁵⁰Ba ku gyewo vinya. Wa dabo bai n sagmanyi yi, “Emi nu! Fye to wo dna m!”

⁵¹Wa lo 'ya daba ese kwa ce pyi-pyi-pyi. Ba sase fi n 'ya to bai mi bedam.

⁵²Har sayi ye, ba to bei ye kpe Wo ye, du na bo awo-woyi n Wo bei yi ku zhin nwyeshi yi nyi, ntuge ba to bei cei pma ba ga gaiciya m.

⁵³Sanu ba bo kusi Janisarata kni ba kpe eya gni n nuwan gbe.

⁵⁴N wo kakashiyi, aza n ba bei zhi nabayi, ba kpewo ye n sa gmanyi yi.

⁵⁵Ba busi laba bai gna 'za ge Yesu lafe, ba ya anyasanyi ku lowo ceyi kpe na pece.

⁵⁶Esa n Walo a kauye, n na zhi yakwo yi, n na fwa yi, ba ku a-nyasan yi lo wo cei na zokwo n na gnikwo bayi, ba yi wo wye ge wo fwa ba towo ejekpe bwa kawai shi a za bei to wo bwa n sun ba bwa kagna.

Markus 7

Akunnu Tukwoda Ba Nya Yesu Abo

- ¹Nwiyihoi a Yahudawayi adini tukwoda ƒa knu Urushelima ntu, ge ƒa dna Yesu wye.
- ²Ba gye Wo j abara ƒai gyi nyagyi to ƒai zhin a Yahudawayi knunun,
- ³(Gama a Yahudawayi tun бага a Farisawayi, ƒata gyi nyagyi to ƒai nabwa n na bwagma yi m, shi ƒa knunu kwokwoyi kwo da.
- ⁴Sanu ƒa zhi gnikwo, tilas ƒa zhan ƒahin kpa kafin ƒa gyi nyagyi. Ba na knunu ye pya yi lo mwabegye tunyi sapa ƒai zhin ƒa, har naiye ngye aknunu shaknu zhan nya, na kwanu zhan yi.)
- ⁵Ntu lonu, adini tukwoda ƒa nya wo ge, “Knihi nu zhin to ho abarayi vi yi aknunu ma? Ntu ge ƒa gyi nyagyi to ƒai nabwa kpam.”
- ⁶⁻⁷ Yesu wa gnaba ge, “Efyе amu-nafici da! Ishaya Anabi wa wufye bmi pai-pai sa n wa ci cei ge, ‘Azaye ci Shekwoyi ngbeyi nu, ama ƒa ta yewo n ƒa bugba min. Ba gami mwa-mwa gbeloyi nu, ntu ge ƒa gna aza ge Shekwoyi gnage a shi ƒa wyidna bwa. Ishaya da gaiciya nu.’
- ⁸⁻⁹ “Ntuge fye shan Shekwoyi wa do n ye knunu yi. Behin-hin, fye na Shekwoyi owa ƒo nu fye shi fya knunu bwa.
- ¹⁰“She Musa ƒei ga fye gbetu deye n Shekwoyi aba: ‘Gaho dada mwa-mwa nho-yayi.’ Wacige znu wa da ƒeda nukwoyi tu wa zakwoyi tukwo, wo ƒa fyi.
- ¹¹Amma fya cige, Benukwoi nu ton nza gye wa zakwoyi fyi n san, wa ci ƒa ge, ‘Aiya mitami ma bmafye zhin m, ntu ge nya mi ƒei ƒa ga fye nyi, mi la ga Shekwoyi.’
- ¹²⁻¹³ N lonu fye bma Shekwoyi awyidna ya n nabai fya shi aknunu bwa n zanyikoci wa zhin, aknunu ypya lo n mwa begye.”
- ¹⁴Nnavun Yesu wa yi aza ge ƒa ƒe ƒa wo. Wa ciba ge, “Efyе viyan, fye wo, fya fwa kwa lofye njesun.
- ¹⁵⁻¹⁶ Efyа wye-wye tabwa nyasan, ntu nyabo fye gyi m, sai nya fye zhin nubo ceyi, fyei da!”
- ¹⁷Navun Wa lolo puwa mi, ntuge Wa lka na za aba, owo abara ƒa nyawo owo ƒeda awyega.
- ¹⁸Fye to na wyegai lo cen, nge nya gyi, konu tatu fye cegye n?
- ¹⁹Gama nyagyi ta siho bugbam, ama kwo diya lo nubo mi. (Owo ƒeda lonu ko wuge nyagyi doho dohoi gyi-gyi-yi.)
- ²⁰Wa cige. “Abo nubo zhin nukwoyi nu tuza cegye.

21-22 Gama n za bugbanu n na nubo zhin nukwoi knu, nayi dhakpe, eviwyi, zawu, Kwocedna, azanya pwa wo, anagbaya zhin, shewo, bonukwoi mwi, akmikni, tukwo mwa, nyaze, na benukwoyi vinya.

23 A nya nukwoyi ye vinya knu n 'zami nu, banu tu za cegye to Shekwoyi wa gwo zam."

Beho-behoyi Nwa Zhin Kwo Zhin Bewowoyi Nu.

24 Nnavun Wa fwa Galili Wa lo Taya kni n Sida yi, to Wa ye a kpe ge Wo la bem, ama to kwa zhin m, gama Owo bebe nabari bei la lapwi wolo-wolo she kwo shin zhin.

25 Nsagmanyi yi, nyikwoza ho wa be, n na alijanu bei wan wo nyigun. Wo bei ku Yesu nabari wo, wa be wa yashi n Yesu abye.

26 Wa gyiwo wye ge wo kawo nyigun gna. (Ama wo bei zhin Sirufunikiyi nu "ebye wyegba ci nya.")

27 Yesu wa gnawo, "Kwo bmiya Ma bma ma zanu zhin kpa – a Yahudawayi, kwo to bmiya a la abi nyagyi a ga amwi m."

28 Nyikwoza ho wa cige, "a zhin a ga amwi biyi nba zhi n tabul sinta, dna na bi nyagyi ba gyi nya kwoce nyi."

29 Wa ciwo ge, "Hada dai-dai! Mi la ho nyigun kagna, lo ho nya. Alijanu la ho bi fwa!"

30 Sa nu wo bei si apyi, wa gye wo bi wangye tu n gado, Alijanu yi lawo fwa.

31 Wa gmi n Taya W lo Sida, Wa jezelo Galili 'la n na zhi ngun awo zokwo yi.

32 A be Wo n t nubua-gunayi woi san gu-gulo n jesun. Aza vinya ba gyi Yesu wye ge Wo to wo bwa Wa kawo gna.

33 Yesu wa gmi wo n na za, Wa lo nwoi Wa dna wo bwanyi n t nubua. Wa kni akni kpe n bwanyi Wa to wo nyitala bwa n cei.

34 Wa kpewye wu She, Wa ya sun Wa ciege, "Guya."

35 N sayi-sayi yi, wa ya atnubua bewo woi da bo njesun dai-dai.

36 Yesu wa gna aza ge bato wu lafiya labam, ama sa n Wa gnaba ge bato dam, ba gna dada nu.

37 Ntu ge ce bei wo ba n mwa. Cici ba cige, "Boho-bohoi n Wa zhin, bo wowoyi nu, har woi zhin a t nubua gunayi n na takpebedayi, bai dabo cewo."

Markus 8

1-2 Nwiyihoi, aza je yezhi n mwa-begye, nyagyi a kuba zo. Yesu wa yi Wo abara Wa gna ba ge, “Mi gye a zaye sun-sun lo ntu ge, oba nyipyei tahi nu nyi naiye nyagyi yi to ye bai celo ba gyim.

3 Nma tun bai n na pyi to bai gyi nyagyi mm ba ba cafyi zokwo. Ntu ge aza lo bai knu naba kpai.”

4 O wa bara nyawo ge, “Yi ba bwa nyagyi n zhabui ye a gaba ba gyi?”

5 Yesu wa nya ba ge, “Fye n breidi yi shi n gnu a kniya?” Ba ciwo ge, “N gnu tnaba.”

6 Wa gna aza ge ba ku sase zhi kni. Wa go breidi wa sa Shekwoyi ami, Wa sa kwo ya, Wa ga Wo abara ba gna za.

7 Awyisala bei nyi fyewyi, Yesu wa kuba Wa tuba anabarka Wa ga Wo abara ba gnaza.

8-9 Aza vinya, ba gyi nyagyi nubo a kuba fu. N navun Wa gna bami ba lo apyi. Aza bei yezhi nlo dubu gun anyi (4,000) Sa na bei ye awiywoyi zhi a bwa a ceknu dnagmayi ngun tnaba.

Fye ye Abo Wo-woyi Ngun Akninya?

10 N sai-sayi Wa lo 'nwo abara yi ba be Dalmanuta kni.

11 Sa na Yahudawayi tukwoda bei kpe ge Wo la be, ba be Wo aba n na bai ba na bo n woi. Ba ciwo ge, “Zhin yi obo wo-woyi ya gye! Zhin nyaho kw zhin n nanyi bmana! N na bayi ya gaho gaiciya!”

12 Wa do 'mi n mwa sa Wo bei wo lonu wa ciba ge, “Mi ta zhin m, fye ye a tnu-tnu a wo-woyi nshan-sun gnu akninya?”

13 Wa je eya lo Wa fa ba Wa piya lo ola pma deyi.

14 Owo abara ba ku zamwi to ba la nyagyi m, ba bwalo n breidi yi shi gmanyi nu n 'ya.

15 Sa babei lo bai pi ola ya, Wa gnaba, “Fye zhin peceiye n yeast Esu Hiridus nya n na Farisawayi nya yi.”

16 Banya ge, “Wo da knibeyi na? Kpekni Wo da breidi nu bo n ya zamwi nyi.”

17 Yesu wa ku kpe beye n ba da, Wa ciba ge, “Mi ta da cenun. Fye to kpe bo ye nmi dan? Efy bugba dna kala lo nu to fye kpe awyegan?”

18 “Shi Ishaya da, 'Fye na wyei gyi n wyeba gye ye a tun-tnu a wo-woyi nshan-sun bo wye ma? Knihi nu zhin to fyei gu atnubua ya fya wo bo ma? Fye ta pa bo lo m?”

19 Aza dubu n gnu atnu (5,000) Mi bo fuba nubo na breidi yi ngun

⁵nyi ma? Fye bo ye apisayi zhi acekun ngnu akninya?" Ba cige, "Aceknu awo-cei-aba."

²⁰"Esa nmi bei kpa aza dubu ngun anyi (4,000) n breidi yi ngun tnaba, knidonu bo ce a?" Ba cige, "acekun ngun tnaba."

²¹"Fyei gye ge Mi damu lo shi fyeto breidi yi shi lon?"

²²Sa ba bei si Baitsaida, azaho ba be n wyebuayi, bagyi wo wye ge Wo kawo gna.

²³Yesu wa la wyebuayi yi Wa gmiya gni woi n piwun Wa kni akni kpewo na wye Wa tu wo ba bwaya, Yesu wa nya wo ge, "Ho gye nyaho lo sayi?"

²⁴Zahi wa shi awye laba wa cige, "E, mi gye azalo, ama mita gyelo dei-dei n, ba wulo ngye ashinwa gbigbi nu zan-zan laba."

²⁵Yesu wa tuwo ba bwaya njesun, Shi zahi bei cewa wye zun, awye kna woya vinya, wa gye nyaho-nyahoi sarai.

²⁶Yesu wa tnu woi nwo aza 'ba. Wa gnawo ge, "To jezelo kauye ho kpatam."

Ho Nu Zhin Masifu

²⁷Yesu nwo abarayi, ba fa Galili ba lo Kaisariya Filibi akauye. Shi ba bei zan-zan lo, Wa nya bage, "Aza zhin nubogeyi Mi zhin nyikado na? Ba dalo gena n Mi tukwoa?"

²⁸Ba ciwo ge, "Azaho zhin nubogeyi Ho zhin Yohana Baptisma zhinyi nu, aza ho cige Ho zhin Iliya nu, azaho cige Ho zhin anabi sapainya ho nu nwa lakala n vingwo."

²⁹Wa nya ba ge "Fye gyege Mi zhin nyikado na?" Bitrus wa cige, "Ho nu zhin Kristi."

³⁰Wa gnaba ge bato gna zaho-zaho yim.

³¹Wa ya ba a wahala gna n ba ba sun Wo, njesyn a za yakwo, n na prist tukwoda yi, n na Yahudawayi tukwoda yi, ba ba nawo abo, har ba wuwo, ama Wo bei lakala n vingwo nu anyi-pyei at avun.

³²Wagnaba ce pei-pe. Bitrus wa la Wo lo ceyi n sepa gmanyi wa gnakni Wo, wa ciwo ge, "Kwo to bmiya Ho da a Be ye pyam."

³³Yesu wa pmiwyeshi Wo abara Wa gnakni Bitrus Wa ciwo ge, "shetan, la pmigni Ma vun. Ho da zanyikwoci beda nu, to ge Shekwoyi nyam."

³⁴N navun Wayi Wo abara bedo n deji yi ge ba be ba wo. Wa gnaba, Fye wo, eza n woye wa vi Mi, wo la anyida yashi wa lami zundu wa vi Mi n bugbayi gmanyi.

³⁵N ho ye ha gni ho wye-wyei, ho ba bwi kwo nuwan, Sai aza n ba she ba wye-wyei ya ntu Mi bo, n Nabari manayi yi, ba ba kpe nyaye na yige wye-wyei bwa.

³⁶Mi gye eza gyiba, wa bwa anyi vinya ama owo wye-wyei kwa bwi dace?

³⁷Nyaho lo ndu 'za wye-wyei?

³⁸Eza nwa womi vinyikwo n Mi nabari yi dna na nyipyei nukwoyi ye tna gaiciya ga nya, Emi, Kristi, sa Mi bei jeze be dna Mi Dada mwamwa n na malalka gyi-gyi-yi Mi bei wo zahi vinyikwo ce.

Markus 9

Yesu Dna Nwo Mwa-Mwa

¹Yesu wa godu Wa gna Wo abara ge, "Aza zhilo ya nfy'e mi nbata fyi m, sai ba gye Shekwoyi bemi kwoi be dna ko ikwo yakwo kpa."

²Anyi-pyei tnanyi, navun Yesu wa la Bitrus, n Yakubu yi n Yohanna yi ba gnulo epeshe. Zaho to bei shan knusun n ba yim safyewyi Owo awyeba ba shando bai bmiyana.

³Owo aje bai bmiyana n bui-bui yi pesheu n du anyi nya zhin dohodohoi n fwan-fwan.

⁴Safyewyi Musa n Iliya yi ba be ba ya beda n Yesu yi.

⁵Bitrus wa cige, "Male, beye bmiya lo mwa. Yi ba kpe alubui ngnu ata ntu fye bo vinya!"

⁶Wo bei da deye ntu ge wo to bei kpe beye n wo ba shan dan, ba ku ba nya fyiya zhi n dnayi.

⁷Ama sa nwo beye dabo nyi, enyi kwa tuba fun kwa gu nyipyei, begye kwa gmi 'she, "Emi Nugun ye-yei nu nyi, fye wo wo."

⁸Safyewyi ba shawye to ba gye Musa n Iliya yim, ba gye Yesu nu bwa cegni nbai.

⁹Sanu ba bei kazhi be 'pe hi, Wa gna ba, "Fye to gna za obo fya gyen sai Mila laka n vingwo fya bei kpeda."

¹⁰Baku kwo shi fyi bami, ama cici bai dace bahin-bahin, to ba bwa bo wyega n Wo da ge, "Kalala vingwo nyi m."

¹¹Ba ya Wo afo nya na Yahudawayi adini tukwo-da zhin ba da nge tilas Iliya jezebe kpa (Masihu wa kpeanyi be).

¹²⁻¹³Yesu wa ya beda Wa cige, "Tilas nu Iliya be wa zhin zokwo kpa behin-hin, wo la be ama aza to zhin wo bo nbmiya m, ba wu wa nyi shi anabi bei da. Yesu wa nyaba bo na anabi bei da n Kristi tukwo ge Wo ba sin wahala n vinyikwo yi."

Yesu Wa Ka Obi Gna

- 14 Sanu ɓa bei kazhi n 'pe ɓa gye aza yezhi n mwa begye ɓai na ɓo n Wo abara yi ciwa-gmanyi n ɓa bei cezhi nyi.
- 15 Aza shi Yesu awye n dnayi shi Wo bei kashi ɓe ɓa bayi cewo, ɓa busilo dawo ɓa biwo gna.
- 16 Wa nyaba, "Kninya zhin fyei nabo na je ya?"
- 17 Zaknayiwa dnabe gbe wa cige, "Male, ma ɓe n biyi nu Ha kawo gna, wota milo nɓedan ntuge alijanu dna lo wo mi.
- 18 Osa alijanu lawo kala, kwa lawo kwa zunwo 'kni. Wa pu-afugya woi gyanyikna wa fyi-fyiya. Ntu lonu mi-i gyi Ho abara wye ge ɓa kawo gna, to ɓai min."
- 19 Yesu wa gna Wo abara, "O, a gaiciya ga biyi da, Har kniwyi nu Mi ɓa knusun fyei ya? Har kni sayi nu Mi ɓa zhin ankuri n fyei ya? Fye ɓe Mi bihi ya."
- 20 Ba ɓe n bihi, ama sa nu wo bei gye Yesu, zafun nukwoyi kwa lawo n kalayi kwa zun wo kni wa pu afugya woi gyi anyikna.
- 21 Yesu wa nya wo dada ɓo ge, "Kwo bei yawo n kni sayi'a?" Wa ci wo ge, "Tunyi woi ye kwasun ciwyi.
- 22 Zafun nukwoyi ye zhin kwa zhin wo wa miya fyi ena, n nuwan yi, n nabai kwa wu wo. O, gye yi sun-sun Ha kawo gna n gye Ho ɓa mi."
- 23 Yesu wa nyawo ge, "Kninu zhin hoi cige, ngye Mi ɓami'a? Nyaho-n yahoi to dnabom, hoi ya ga gaiciya m."
- 24 Owo dada cige, "Mi n gaiciya gai lo, bmami zhin ma bwa kwo mwa."
- 25 Sa Yesu bei gye aza ɓai yezhi Wa gnakni zafun nukwoyi. "O, Zafun nukwoyi atnubua gunya n takpeɓedanyayi bi ɓe n ɓi yemi, to ha jewo lo m."
- 26 Zafun nukwoyi ho kwa sawyi kwa pmikwa la bihi kwa zun wo kni n mwa n jesun, kwa fawo sayi. Ebihi wa shibo ngye wola fyi har aza cige, "Wo la fyi."
- 27 Ama Yesu wa shiwo bwa Wa lawo kala gni na gni, Wa wo wola lafiya bwa.
- 28 N navun sanu Yesu bei gni n Wo gmanyi yi n Wa bara yi ɓa nya Wo bo, "Knihin na zhin to yi mi n zafun nukwoyi gmiya ma?"
- 29 Yesu wa ciba ge, "Aɓo ye pya sai fya zhin aduwa."
- 30-31 Sanu ɓa bei fwa ekni deyi, ɓa zan-zan fi n Galili kni to Wa ye ge aza gye wom n na bayi Wa bwa sa n wo abarayi Wa wu ɓa nya. Wa ci ɓa ge, "Emi, Kristi, aɓa knu Mi a wu Mi ama Miɓei laka n vingwo n na anyipyeyi ata vun."
- 32 Ama to ɓa bwa awyegam har odna wo ɓa to ɓa nya Wo kwa wyegam.
- 33 Basi Kafarnahum, Sanu ɓa bei ku si puwa n ɓa bei fi, Wa nya ɓa ge, "Fye ɓo da kni bei nu n zokwa?"

³⁴Ama vinyikwa ku wan ba to ba dnabo gbem, ntuge ba bei be bai nabo nu najei eza nwo zhin zadnagmai n ba mi.

³⁵Wa sase Wa yiba zhi nwo aba Wa ciba ge, “Eza nwo ye wa zhin zadnagmai tilas wa ze fyenu.”

³⁶Nsayi Wa be nbiyi dna n ba tasin Wa la bihi she Wa ci ba ge,

³⁷“Eza n wa ye na biyi ngye za deye dna Miye, wo ye n Miyi nu. Eza n wa ye n Miyi, woye n Mi Dadayi nu n Wa tnu n Miyi nyi.”

³⁸Owo bara, Yohanna, wa ci wo n wyihoi ge, “Male, ya gye zaho woi zhin ampanyi n Ho yeyi, woi knu alijanu ya, ama ya ciwo ge wo lafa ntu ge wo to zhin Ho bara nu n gye yim.”

³⁹Yesu wa gna ba ge, “Fye to hana n woyim, gama eza to lo wa zhin atnu-tnu wo-woyi dna Miye wa pmi a vun wu, wa zhin gaba n Miyi n pye-pyeyim.

⁴⁰Eza nwo to zhin gaba n yi yim, wo zhin yi nya nu.

⁴¹Ndei eza ga ho nuwan n kofi yi n tu ge ho zhin Kristi nyanu, wo ba bwa lada n mwa.

⁴²Ama ndei zaha zhin zaknayi dna n na biyemi wa ce bonyi gwoma a gyiwo ata wyigwo nya dnagmai dna n begye a shewo ya dna nuwan yakwo mi wa bwi nuwan.

⁴³⁻⁴⁴ “Nho bwa zhin laifi, la kwo zunya. Gwoma ha sase nyalo-nyalo dna na gmada n bwai gmanyi, aya ci ge a she ho ya dna, n na kota shan wun nyin, nha bwayi gyi ngnu aba.

⁴⁵⁻⁴⁶ N ho pita lo n hoi naba nukwoyi, lakwo zunya, Gwoma ha sase nyalo-nyalo n pita yi gmanyi aya cige ho lo anapyi n ha pitayi gyi ngnu aba.

⁴⁷“Nho wye zhin laifi, ha kwo gmiya. Gwoma ho lo Shekwoyi bemi n wyei gmanyi aya cige oha wye gnu aba gye anapyi.

⁴⁸Aba n gugurugu to shan zom, ena ce to kwoi shan wun m.

⁴⁹Aba n na sansan yi gyi aza nyalo-nyalo.

⁵⁰“Sankpegye dadayi to na ampanyiyim, ndei kwa fa kwo dadam. Kwo ta shan mi kwa da nya hom. Ntu lonu fye to ya fye dadam. Fye sase najei n na gmada yi.”

Markus 10

Yesu Woi Dna Abo Nya-nya Gbe

- ¹Nnavun Wa fa Kafanahum U Wa lo Yahudiya kni n Urdun 'la yi. Aza a yezhi n mwa shi ba zhin ba shin zhin, Wa wu ba nya shi Wo shin wu.
- ²A Farisawayi ho abe ba nya Wo ge, "ho ba ye ge a wu mula?" Ba bei nya Wo lonu ntuge ba pyi Wa gam nu.
- ³Yesu wa nya bage, "Musa bo da gena tu mulawu tukwa?"
- ⁴Ba ci ge, "Wo bei gna ge kwo to zhin bo nukwoyi num, sai dei za ku wasika mula wu nya ka wa ga wo nyikwo."
- ⁵Yesu wa nya bage, "Knihin nu bei zhin Musa wa da lonu'a?" Mi ba gna fye nya kwo bei zhin wa da lonu. "Ntu fya bugba nukwoyi kala kpe bonu.
- ⁶⁻⁷ Ama kwoto zhin Shekwoyi zokwo num. Tunyi sapa, Wo bei zhin zanu-gbai n nyikwozayi ba sase nyalo-nyalo nu n knusun dna mula, ntu cenu eza ba fa wo dada n wo 'ya yi,
- ⁸Wa nyima wo nyikwo n lonu, ba to shan aza gnu aba nu zhin m, ama gmanyi.
- ⁹To 'za gna nyaje n Shekwoyi la cigyidom."
- ¹⁰Nnavun, sanu ba bei fi Wa bara yi n puwa ho, ba je be n beda yi tu mulawu tukwo.
- ¹¹"Wa gna ba ge sanu 'za yawo nyikwo wa lado, wo ku anagbai zhin n wa ba.
- ¹²Nyikwoza ce nwa ya wo ba, wa se 'zado, wo ku anagbai zhin."
- ¹³Nsa doho yi, Anyikwoza be n ba biyi n na bai Yesu wa tuba anabarka, Owa bara ba nya ba ya ge bato gna Yesu gna-gna m.
- ¹⁴Ama sanu Yesu bei gye bo ba zhin, to ca dawo m, Wa ci ba ge, "Fye fa abi nawyi ba be Ma ba, gama Shekwoyi bemi zhin ba nya nu. Fye to nya ba yam.
- ¹⁵Behin-hin nu n Mi gna fye, eza nwo to be Shekwoyi aba ngye bi m, ata ye ge wo lo Wo bemin."
- ¹⁶Nnavun, Wa kpa bwa na bihi tukwo Wa tuba anabarka.
- ¹⁷Sanu Wo bei lakala, 'za doho wa be woi busi wa cha kwo-kwo shi n Wa bye wa nya Wo ge, "Male Manayi mi ba zhin knihin nu ma lo she'a?"
- ¹⁸Yesu anya wo ge, "Kninu zhin hoi yi Mi Manayi'a? Shekwoyi gmanyi nu zhin Za manayi.
- ¹⁹Ama beda n ha nya Mi nyi, ho kpe a wyidna ye lo nge to wu zam, to zhin anagbayim, to ha wyi vim, to ha ceakatam, to ha gyi za fyim, ha ga ho dada mwa-mwa n ho 'ya yi."
- ²⁰Zahi wa ci ge, "male, mi shi ba bwa vinya, mi to bma doho ya n ba min."

²¹Yesu wa wo yeye dnagmai ho tu wo bo, Wa ci wo ge, “Nya gmanyi n hoi celo. Lo ho knu ho nyabwa vinya, ha ca gyiwyie ha gna a wyekwoyi, ha so ho nyabwa dna n’she, ha be ha vi Mi.”

²²Owa wyeba shando n sayi-sayi, wa lo wo nya to cei dawom, ntuge wo bei zhin nyabwayi dnagmai nu.

²³Yesu wa shiwo awye shi wo lo, Wa bmiya wye Wa ci Wa bara ge, “Kwo po bedna lo nyabwayi wa lo Shekwoyi bemi.”

²⁴Ca woba mwa. Yesu wa je ba gna: “Ema bi yeyeyi, kwo dnabo lo eza nwo bugbai shi n nyabwa ba, wa lo Shekwoyi bemi.

²⁵Kwo gna dulo n sauci lakumi kwa Idu na ci buawye, aya cige nyabwai wo lo Shekwoyi bemi.”

²⁶To Wa bara ga bedayi gaiciyam, ba nya Wo ge, “Ngye nlonu, nyikado nu ba shan pwo na nyi ye nto na nyabwai yi nun ma?”

²⁷Yesu wa shiba wye zun, Wa ci ba ge, “Ntna Shekwoyi, ko ta wo zhin m. Ama n Shewoyi aba, nyahonyahoi to dna bom.”

²⁸Bitrus wa ya anya yeyi n wo, n woabara jeyi nku ya ntu Wo bo wa cige, “Yi ku anya fa vinya n nabai ya vi Ho.”

²⁹Yesu wa ci ba ge, “Wuye Ma gna fye behin-hin eza to lo n wa fa nyaho-nyahoi kwo apyi, owaje, owoamapwi, owo’ya, owo dada, owo abi, kwo owo akaya ntu Mi yeye bo, har wa gna azaje nabari manayi

³⁰Nwo ta gwo gyiba abwa tagyim, tu nwo puwa, owo aje, owo amapwi, owo ya, owo abi, owo kni, nwahala sin yi. Anya deye vinya ba zhin wo nya nu, dna na ’nyi ye n anyi ba be lo nyi, njesun wo ba bwa wye-wyei nyalo-nyalo nya.

³¹Ama nmwa begye na gye ge ba zhin aza yakwo nsaiye, ba bei ku ze aza gbagbayi n bwayi. Aza na gye ge, ba to zhin nyaho nu yam, banu bei zhin aza yakwo n bwayi.”

Yesu Wa Da Wo Fi Bo

³²Ba pmi ba lo Urushelima Yesu yi gyi n ba bye. Owo abara yi viwo navun, edna ku wan ba, Wa lo n bai n sepa gmanyi, Wa ya ba gna nya n kwo ba bwa Wo sanu ba si Urushelima.

³³Wa gna ba ge “Esa yi si bo, Emi, Kristi, aba wan Mi alo n Miyi n Pirist tukwoda ba wa da Mi efyi wa, wa ga Mi n na Romawayi a knu ba wu Mi.

³⁴Ba ba kpema gye, ba kni akni kpe Mi, ba gbe Mi ya n ba knarufin yi, ba wu Mi. Ama n na nyipyeyi gnu ata avun, Mi ba lakala n vingwo.”

35 Yakubu, n Yohana yi, Zabedi abi, a be ba daɓo Woi san-san ba ci Wo ge, “yi ye Ha bmayi zhin.”

36-37 Yesu wa nya ba ge, “Kni do na?” Ba ci ge, “Yi cei pmalo yi ye sase viyi n Hoi n Ho bemi. Zaknayi n Ho bwai-zhe, zaknayi n Ho bwapmi.”

38 Yesu wa ciba ge, “Fye takpe nya ye lo n fye nyam. Fye ba mi fya sin dna Mi kofi liliyi wahala nya n Mi ye Ma sin nyi? Ko a zhin fye batisma n batisma azhin nya yi nkwo zhin tilas Ma zhin nyi?”

39 Ba ci ge, “yi bami.” Yesu wa ci ba ge, “Fye ba sin dna n Mi kofi azhin fye batisma n Mi batisma yi,

40 ama Mito iko yi lo Ma kpe fye viyi n Ma sese bayi m, n Mi bemi m. A ku ko shiri lu zhin.”

41 Sanu Wo abara je bei kpe be ye n Yakubu n, Yohana yi bei nya, ba gyi minagyi.

42 Yesu wa yi ba Wa gna ba ge, “Fye kpelo ge asu n na 'za yakwoyi na nyi, ba wan za sun,

43 Ama kwo wulo gbo n fya ba. Zanu n wo ye wa zhin zayakwo n fye mi, tile wa zhin fye bara.

44 Eza n wo ye wa zhin zayakwo vinya, dole wa zhin aza bara vinya.

45 Ntuge kwo Emi hin, Kristi, Mi to be a zhin Mi bauta num, ama Ma bma aza zhin Ma gami wye-wyei ntu na za gni-gni bo.”

46 Ba ku si Jeriko. Bai knuya nu n 'zhi, aza n mwa begye bai vi ba. Nyabai ho wye buayi, ai yiwo ge Batimawus (Timawus bi) bei sase shi n zokwo gbe, Yesu yi diya.

47 Sanu Batimawus bei wo ge Yesu diya lo, wa ya wyi be, “Yesu, Dawuda Nugun, gye mi sun-sun.”

48 Aza ciwo ge, “La ce pyi!” Ama wa gna wyi be-be. “Aya, Dawuda Nugun, gye mi sun-sun!”

49 Sanu n Yesu bei wo, Wapi gni n zokwo, Wa ci ge Gna wo ge wo be ya. “Laka ha dagma, wo yi ho lo.”

50 Batimawus wa she wo je kwokwoyi ya, wa gmigna, wa lo Yesu aba.

51 Yesu wa nyawo ge, “ho ye Ma zhin ho kninya?” Wye buayi wa ciwo ge, “Aya, Male, miye ma gye wye ba.”

52 Yesu wa ciwo ge, “Oho gaiciya ga la ho kagna.” Nsayi-sayi yi, wye buayi wa gye wye ba, wa vi Yesu lo n Zokwo yi.

Markus 11

Ba Be Urushelima

- ¹Sanu ba bei wu vivi n Baifaji yi n Baitanya yi n Urushelima pyifun, ba be Zaitun 'pe Yesu wa tnu Wo abara n gnu aba.
- ²Wa gna ba ge, "Fye lo kauye yi kwo zhi nu. Shi fye ya kwolo, fye ba gye zhaci biyi n gyigni n na to shin kwo gnu m, fya lo kwo be Mi ceyi.
- ³"N zaho anya fye bo fye zhin. Fya ci ge, Eyi, Dagayi n kwo bei pma lo, Wo ba je tnu n kwoyi sa fyewyi."
- ⁴⁻⁵ Aza gnu abahi ba kuka ba lo ba gye zhaci gyigni n zokwo n na duba. Sa n ba bei lokwo ya aza n ba bei zhibo, ba nya ba bo, "Kni nu zhin fyei lo zhaci biyi ya?"
- ⁶Ba da shi Yesu bei gna ba ge ba da, azahi ba ye ge ba lokwo.
- ⁷Ba be Yesu n zhaci biyi yi owo abara ba ya ba 'je kpe n kwo boknu Wa gnutu.
- ⁸Nnavun, aza ba bei zhi bo, ba ya ba 'je zhi n zokwo n Wa bye. A za ho ba gbe a bala fintolo ba be ncei ba ya zhi Wo n zokwo.
- ⁹Wo bei dna na 'za tasin nu, aza n Wa bye, aza n Wavun, oba vinya bai bewyi bai cige, "Shekwo mwasa n 'Su yi! Anabarka danu n 'zayi n Wo be dna n Dagayi 'ye mi!"
- ¹⁰"Anabarka nu n 'beyi Wo be ceyi nyi. Eyi dada, Dawuda 'be. Shekwo ngi Esu!"
- ¹¹She Wo bei lo Urushelima, Wa lo aduwa nyakun, Wa shi aba wye laba vinya Wa jegmiya, ntu ge nyipyeyi bei la gashin. Walo Baitanya n Wo abara awo-cei-aba yi.
- ¹²N labmi yi shi ba bei fa Baitanya, Wa wo mikun yi gnu Wo.
- ¹³Shi Wo bei shi awye n Wo abye fyewyi, Wa gye gbayi shinwa gni na fintoloyi ci kpe Wa lo kpekni Wa gye kwo gyi kpe. Ama wa bwa a fintolo nu gye kpe. Ntuge 'sa to beyi si n kwo ba gyi m.
- ¹⁴N sayi Yesu wa tu gbayi hi kni, "Ho ta shan gyi n jesun m." Owo abara ku wo woi da lonu.
- ¹⁵Sanu ba bei si Urushelima, Wa lo aduwa nyakun Wa nya aza ya n ba bei fyi bai knu anya fyi na duwa nyakun. Wa ce agylwe shanyi tebul abwa ya. Wa nya a likpe knuyi ya.
- ¹⁶To Wa ye ge zaho-zahoi lo be na kaya knu-knuyi m.
- ¹⁷Wa gna ba ge, "Acei ka dna n Litafi, 'Emi nyakun zhin aduwa zhin ba nu ntu nanyi vinya bo,' ama fye la kwo ze avi nyakun."

¹⁸She a pirist na Yahudawayi tukwodayi bei wo nya Wa zhin, ba ya shiri zhin she ba ba wan Wo. Oba wahala gmanyi nu ba bo wo gyikici dna. Ntu ge aza bei n bahin yi gagayi da Yesu nya wu bo.

¹⁹Nwyeshe yi shi ba shin zhin, ba fa ezhi yi ho.

²⁰Nlabmiyi, sanu Wo abara bei du gbayi hi ya n Wo bei tukwo kni nyi, ba gye kwo la afintolo woya n ku bwa har agbegye.

²¹Nsayi, Bitrus wa pa nya Yesu bei gna shinwahi n nyipyeyi avun nya nyi, wa cige, “Male, gyewye, gbayi n Ho bei tu kwo kni nyi, kwo ku bwa.”

²²⁻²³ Wa dna ba be gbe Wa cige “Ndei fye n gaiciya gayi lo n Shekwoyi, gaciciya nu Mi gnafye fye ba mi fya ci Zaitun ’pe ge laka ha kadna n ’la. Tilas kwa vi fye beda. Nya na ye kwonu nyi la gaiciya ga, to ha zhin abugba gnu abam.

²⁴“Fye wo Mi! Fye ba zhin aduwa ntu nyaho-nyahoi bo, ndei fye ga gaiciya ge fye la kwo bwa, kwo zhin fye nya nu.

²⁵“Ama sanu fye zhin aduwa, zhin eza n ho woi shi bugba gafara nnabai efye Dada n Wo tu she nyi Wa zhin fye laifi gafara ce.”

²⁶⁻²⁸ Nsa deye bai ku si Urushelima njesun. Shi Wo bei zanzan lo n na duwa nyakun ba, a pirist tukwoda n na Yahudawayi tukwoda yi, ba be wo aba ba nya Wo bo “Knihin nu zhin ya? Nyikana ga Ho iko ge Ho nya anyaknuyi ya na duwa nyakun a?”

²⁹⁻³⁰ Yesu wa ciba ge, “Mi ba dna fye be gbe n fya ga Mi benya ye awyega. Yohanna Baptisma zhin yi ma, Shekwoyi nu bei tnu n woi, kwo awo? Fye dna Mi be gbe.”

³¹Ba da kwo bahin-bahin, “N ya cige Shekwoyi nu bei tnu n woi. Wa ci yi ge, ’Kni nyi nu bei zhin to fya gwo wo ma?”

³²N ya cige Shekwoyi nu to bei tnu n woi m, aza tafa yim. (Ntu ge aza ga gaiciya n kalai ge Yohanna bei zhin anabi nu.)

³³Ntu lonu ba cige, “yi ta kpe genyi lom.” Yesu wa gnaba ge, “Ntu cenu Mi ta ga fye benya amsa cem.”

Markus 12

Anabari N Yesu Bei Da

¹Anyi besisi nyi Yesu bei si ga za n sayi-yi. “Zaho bo nu aje-mui-fwa, wa nyami ko n Shekna dna mi. Wa bwokun nyi ntu na jemui-gma pi bo. Wa ofwa wyednai nyakun mi n latu she. Wa pmi wa fwa yadna na haya da kun. Wa laka wa lo kni do n kpai.

- ²Sa na jemui-ka sa bela si, wa tnu n wo bara yi gmanyi wa gwo odo gawo n kwo ba zhin wo nya.
- ³Ama a fwa daba luwo, ba jewo zeya lo na bwa gbelo yi.
- ⁴“Ofwa da waje tnu n zadoyi, ba jewo lu n du za kmisun yi, ba tuwo 'ci nukwoyi n tukwo.
- ⁵Eza nna bei je tnu n cei nyi, a wo wu, n navun wa tnu na zaje yi, a lu ba ai ce ai wu azaho.
- ⁶Zaknayi nu bei bwa ce owo bigba gmanyi. Wa kmatnu n woi, woi gye ge ba ba gawo mwa-mwa ntu ge owo bi nu.
- ⁷“Ama sanu afwayi bei gye wo woi be, ba cige, ‘Owo nu bei gyi wo dada fwa ye gado, owo dadayi lafyi. Fye be ya wu wo n nabai ofwa kwa ze yi nya.’
- ⁸Nlonu ba wan wo, ba wu wo, ba she wo nayi ya n fwa 'kna vun.
- ⁹“Fye gye ge ofwa dagayi ba zhin wuna n sanu wa wo bo kwa zhan? Wo ba be wa wu ba vinya wa ga of wa yi na zado akun.
- ¹⁰Fye ta pa aya ye ba bo lo dna n Litafim? ‘Kuta n na nyakun miyi laya, kwonu la zhin bwakwonu yakwo dna nyakun, ai ga kwo mwa-mwa ndu a kuta aje, dna n nyakun yi.
- ¹¹Deye zhin Dagayi bezhin-zhin yi nu, kwoi zhin bo wowoyi nu.’”

Anuwunyi Ye Ba Pi Wo Agam

- ¹²A Yahudawa tukwoda ye ba wan Wo ntu na 'nyi besisi ye bo. Ba bei ku kpe ge Wo da ga ba nu, ban bei zhin afwayi anukwoyi dna Wo besisi. Ama ba ku wo dna n Wo bwatoyi ntu na 'za bo, ntu ce nu ba fwa Wo ba lo ba nya.
- ¹³Ama ba tnu na adini n na siyasa tukwoda je yi ba daɓo n Woi, bai pi Wo agam, n na bai Wa da boho n na ba wan Wo n cei.
- ¹⁴Aza wyekayi ba ciwo Ge, “Male, yi kpe ge Ho da gaiciya. Ho ta vi aza bemwi, kwo aza bo pwa-wom, ama Ho wu Shekwoyi zokwo. Nsayiye, gna yi kwo bmiya a gba gadu n na Romawayi aba, kwo awo?”
- ¹⁵Yesu wa ku gye ba awun pi ba, wa ci ba ge, “Fye be mi n gyiwyeyi, Mi ba gnafye.”
- ¹⁶Sanu ba bei gawo gyiwyeyi, Wa nyaba ge, “Nyikado foto nu tu n yeyi n gyiwyeyi ya?” Ba ci wo ge, “Esu nu.”
- ¹⁷Wa gna ge, “kwo bmiya lo a gawo nya kwo zhin wonya. Ama nya kwo zhin Shekwoyi nya tilas fya ga Shekwoyi kwo.” Ba gye ba tukwo dna n vinyikwo to ba kpe beye n ba ba shan dam.

18A Sadukiyawayi ba yebe aza ba ba cige, Kalaku to lo n na vingwom. Ba nya bo layi.

19“Male, Musa bei gayi wyidna ge n 'za fyi n tna bi owo do ba lawo nyikwo wa bwa abi gawo zado.

20-22 “To, aza bei nyi n gun tnaba, adnagmayi na majei yi. Dnagmayi wa la nyikwo wa fi to woi bwa bim. Owo mado wa la nyigbaya ho, ama safyewyi wa fi to woi bwa bim. Owo mado wa je wola, sa fyewyi wa je fi to woi bwa bim. Har n lonu baku fi vinya to bai bwa bi n woyin. Nnavun nyikwoyi ho wa wonya fi ce.

23“Nya yi cei pma ya kpe okonu nyi, Dna n Shemi wo bei zhin nyikado nyikwo na? Ntuge oba vinya zaho to celo n wo to bei la wom.”

24Yesu wa dna ba be gbe ge, “Bo kwo gna fye gna-gna nyi, fye ta kpe Shekwoyi beda ye lom. Fyei ta kpe Shekwoyi iko ye lom.

25Sa na zadeye ngnu tnaba n nyikwo-zaye yi bei kukala n vingwo, ba to bei shan mula pam, ba bei ku ze ngye a malaika nu.

26“ Ama tu n kalaku nvingwo bo, fye to shin-ba dna n Fitowa tu n Musa tukwo n gbe-gbe nagyi yim? Shekwoyi Wa gna Musa ge ‘Eminu zhin Shekwoyi Ibrahim nya Eminu zhin Shekwoyi Ishaku nya Emiyi nu zhin Shekwoyi Yakubu nya.’

27“ Shekwoyi bei gna Musa nu ge, aza deye kwo shi kwo nyi sala mwa shi ba bei fi, baye n wye-wyei lo, ntuge Wo to bei cige, ‘Mi zhin Shekwoyi aza nya n ba to lom! Fye ku bwi aba mwa.”

28Zaknanyi n na adini malami bei gni bo woi wo bo ba da, wa ku kpe ge Yesu la bo dnagbe dei-dei. Ntu cenu wa nya ge, ‘Dna na awyidna, kni dai nu zhin dnagmayi’a?

29Yesu wa dna begbe, “Odo kwa ci ge, ‘Fye wo, O, Israila! Eyi Dagayi Shekwoyi gmanyi nu, Shekwoyi do to shasun m.

30“ ‘Kwo zhin tile nu fya yewo fya bugbaya vinya, n fya wye-wyei yi, nfya kala yi.’

31“Bahi, Tile ha ye ho zado n gye hohin tukwo,” Abobwashi ho tolo ndu adeye yam.

32Malami yi wa dnabegbe, “Ho ku beda gaiciya nya da n Ha ci ge Shekwoyi bwasun gmanyi nu, zaho to shansun lom.

33Mi-i kpe lo ge, kwo dulo 'za ye wo n wo bugbaya vinya, nwo beyekpe yi, n wo kalayi, maye n ma zajeyi ngye mihin ndu anyaga-ga n za ba ga na duwa nyakun nyi.”

34Sanu Yesu bei gye wo “Shekwoyi bemi yim.” N deye avun bei shan Wo benya m.

³⁵Nsado hoi, shi Yesu bei gni woi wu nya na duwa nyakun ba, Wa nyaba beda, “Kni nyi nu zhin efya dini tukwoda fyei ci ge, Kristi ba gmi n Dawuda byemi nu’a?”

³⁶Gama Dawuda nwohin tukwo bei ci ge, “Zufun Gyi-gyi-yi nu bei dabo n womi, sanu wo bei ci ge, “Shekwoyi bei gna emi Dagayi, sase tu mi bwaizhe bwa sai Ma ze oha nuwuyi oha pita kpenya.”’

³⁷Shi Dawuda bei la Wo yi ge owo Dagayi, Wo ba zhin wo bi nwuna?” (Beda yepya, kwada aza, ba kna tunbua n pwawo yi mwa.)

³⁸Anya doho nyi n Wo bei wuba n sa deyi, “Fye zhin peceiye na malami yi. Ntu ge ba ye ba kpe aje yakwo agyiwyedanya n na beye-kpei, nnabai aza bi ba gna bai yazhi, bai zan-zan na gnikwo ba n nabai a gye ba wye.

³⁹Ba ye a seseba manayi na duwa nyakun, n na mwa-mwa ba yi, aba na zhin abo gmada.

⁴⁰Ama ba gyi anyigbanyi fi n ba puwa n tna vinyikwo. Ntu ge ba takpe ba haliyem, ba laba ngye ba gyi-gyi-yi bai zhin aduwa kpadala yi n na ’za bye. Ntu deye bo, oba tata bei la du aza nya.”

⁴¹Safewyi Wa lo aba na gwo sadaka nyi n na duwa nyakun, Wa sase tu Woi kawye, woi gye shi aza ya agyiwyefi. Anyabwayi hoi ya agyiwyefi n mwa.

⁴²Safewyi nyigbanyi ho wa be, nwo to bei nyaho yim, wa ya akobo fi ngnu aba.

⁴³⁻⁴⁴Wayi Wo abara wa ci ba ge, “nyigbanyi, san-yi da yi, n wa ga kobo aba nyi, wo la nya ga n du a gyiwyeda ye vinya. Ntu ge ba knikni nu ciwiyi nba nyabwa, ama wa ga enya nu n wo cei kmasun lo.”

Markus 13

Yesu Kun-kun Nwo Wan-Wan Yi

¹She Wo bei fwa aduwa nyaknu n wyiyi yi, owo bara ho wa ci Wo ge, “Male, Ho gye anyaknu manayi nba mi-miyi lo na kuta yi n safya je nyi.”

²Yesu wa dna be gbe wa cige, “E, shawye hoye nsai bwa. Ko kuta gmanyi, ato bei fwa kwo tu ndo shem, akpe agusa.”

³⁻⁴ Sa Wo bei sase tu n Zaitun pe n na wyei ce n Urushelima, Bitrus, Yakubu, Yohanna n Andarawus yi ba be fya-a ba nya wo. ’Kni sayi nu n na bo deye ba zhin aduwa nyakun a? Abei ku atuze wu na bye kpa?

⁵Yesu wa gaba amsa kpadalayi Wa cige, “Fye to ye Zaho-Zahoi wa dna fye kwo cem.

⁶Ntuge aza ƒa ƒe n mwa begye ƒai cige ƒanu zhin Kristi, har ƒai dna aza kwoce mwa.

⁷“A ƒei sun knu vi-viyi n na bayi mwakpa n jesun, ama 'sa kmaknayi nu to num.

⁸“Ntuge akni n na 'beyi ƒei sunknu n najeyi, ekni ƒei shan-shan n na bayi gbo-gbo, n miknu yi, Azhin ƒiyi nu nyi kwoi wu ge odo n kwo belo nyi, kwo dulo ya.

⁹Ama sa na nya deye ƒei zhin, fye ye lura, ntugbe fye ƒe fi n wahala n mwa. Abei lo fyei n na wadayi aba. Ai lu fye n na duwa nyakun, ai ga fye laifi n na gwamna 'ba n na suyi, she fye zhin Ma viyi. Efyee sa nu nyi nfyee ƒei bwa fya zhin emi eye saida nba bye.

¹⁰Tila a za wo Nabari Manayi ye n na kni vinya kafin esa Kmaknayi ko ƒe.

¹¹Ama sanu abei wan fye alo fyei n na wadayi aba, fye to damu n ƒei n fye ƒa dam, fya bma fyehin. Fye da ƒo n Shekwoyi agna fye ge fye da. Dna sayi mi, efyenu ta dabom ama Zafun Gyi-gyi-yi nu ƒa dabo n fyemi.

¹²“Amajeyi na dnagmayi ƒei knu ƒaje har efi, ada yi knu ƒa ƒi, abi yi knu ƒa azakwoyi n nabai a wuba.

¹³Aza ƒei bmifyee ntu ge fye zhin Ma nya nu. Ama eza n wa mi gni har esazo sa to wa na Ma bom, wo ƒei pwo.

¹⁴“Sanu fye ƒei gye Nyanukwoi gni a gni-gni na duwa nyakun Nyabai, kna tñubua – busi, n ho ƒa mi ha lo Yahudiya 'pe

¹⁵⁻¹⁶ La pye! Nho tu n nyakun she nu, to kashi ha lo apyi mim. Nho tu fwa nu, to jezebe ntu ha gyiwyee ƒo kwo ajem.

¹⁷“Aya na nuboda 'ba dna na nyipyeei ye mi, n na ƒiya yi mba na ƒiyi shi.

¹⁸Fye zhin aduwa ntuge efyee subui to kwoi ƒe dna n vinyikwo mi m.

¹⁹Anyipyeei a nukwoyi nu na to shin ƒa pya bwam, tunyi shi Shekwoyi ƒei sanyi. Ai ta je ƒa pya bwam.

²⁰N Shekwoyi nu to ƒei ce anyi-pyeei a nukwoyi zunyam, wye-wyeei gmanyi to ƒei pwom. Ama ntu Wa za kni-kniyi ƒo, Wo ƒei ce anyi-pyeei zinya.

²¹“Njesun n 'za gna fye ge, Kristi nu gni nyi, 'Ko kuwa 'Wonu gni nu,' fye to ye m.

²²Ntuge a Kristi akatanya ƒei knu n na anabi akatanya yi n ƒa ƒei zhin abo a wowoyi ƒai dna aza kwoce, n kwa yezhi har n Shekwoyi abi yi.

²³Fye zhin pecei-ye, Miku pma fye gna!

²⁴“N wahala ye avun, nyipyeei ƒei dnawyegma, epya to ƒei ga buzangnam.

²⁵Akpasu ƒei kaya, anyi bmana ƒei shando.

²⁶“Nsayi anyi vinya bei gye Mi wye, Kristi, Mi yi be dna iko dnagmayi n latuyi be.

²⁷Nsayi, Miyi tnu amalaika bai ye Maza 'kni-kniyi zhi n nanyi mi vinya.

²⁸“Fye tubo mwi gbayi shinwa, sanu kwo ya afintolo ci, fya kpege vinyikwo laga.

²⁹“Sanu fya gye abo deye n Ma gnafye nyi bai zhin, fye ku kpe ge Emi jezebe la wo vivi, Mi gnilo n na boknumi gbe.

³⁰“E, anya nyi n ba bei wuge sak-maknayi la ga.

³¹Eshe nkniyi ba ba diya, ama ema beda ta diyan, har nyalo-nyalo.

³²“Dudu lonu, zaho-zahoi, kwo amalaika n 'she ko Emihin, Mi ta kpe nyipyeyi yelom, ko esa n na beye bei zhin m, akpe Emi Dada n Wo dna she nyi.

³³Shi fye ta kpe nyipyeyi yelo n na beye bei zhin nyim, fye ku zhi gwu fyei dna Mi bebe wye.

³⁴“Fye ba mwi Mi bebe do n zayi nwo bei lo knido n kpai. Wa ga owa tnu-tnuyi tnu-tnu ba zhin wa kpe zhi. Wa gna owo zokwo guyi ge wo dna wo zhi-zhi wye.

³⁵⁻³⁶“Fye lawye ka dai-dai. Ntuge fye ta kpe saye lo Mi bei bem. Ko dna sukwo, ko n labmi yi, kwo n nyipyeyi yi. Fye to ye Miye zhi Ma sun fye zhi fyei wan gyem.

³⁷Obo nyi Mi gnafye, n 'zaho-zahoi yi vinya, Fye gwu!”

Markus 14

Yesu Kun-kun Nwo Wan-wan Yi

¹Paska zhin sa bei ce anyi, pyei ngnu aba agmada n na Yahudawayi zhin eyeye, bai gyi breidi n tna yist fiyi. A malami adna gmayi n na Yahudawayi atukwoda yi, ba bei zan zokwo shin shi ba ba wan Yesu fye-a ba wu wo.

²Ba cige, “Ama yita wan Wo n Paska sayin, sakun anya lakala dna na za tasin.”

³Yesu bei dna n Baitanya kpa, n Siman nayiwun-yi puwa. N na wyeshe nyagyi sa yi, nyikwoza ho wa be n 'mi nakwoyi kwalba yi shi. Wa kpe koya wa ze ko ya kpe Wo n Wo tukwo.

⁴⁻⁵ Azaho n ba bei gnike Woyi na nyagyiba, to ca dabam, ba kwo ze nya wunya. Ba gna, “Ai kwo bo bmiya ha knu emiye na gyiwyei mwa a ga asan-yi.”

⁶Ama Yesu wa ciba ge, “Fye fawo, kninu zhin fyei gna wo gnagna shi wa zhin Mi bo manayi a?”

⁷Fye na san-yi dayi lo mwa n fye yi bai yefye bmazhin. Fye ba mi fya bma ba zhin sanu fya ye cei. Ama safyewyi Mi ta je knusun n fye yin.

⁸“Wo kufo zhin shi wo bami, wo ku emi shin Mi nayi kafin Emi bi wyi.

⁹Ma gnafye gaiciya, aba vinya n na ba zhin Nabari Manayi ye wazi, beye n nyikwoya zhin nyi, aba pa ce ai ciwo.”

¹⁰N navun, Yahuda Iskariyoti Yesu bara, walo a pirist tukwoda aba wa pagbe nbai, shiwo ba knu Yesu.

¹¹Sa na Pirist tukwoda bei wo nya kwa be woyi, ca woba, ai dabanjesun, ba zhin wo alkawali ge ba ba gawo lada, ntu cenu wa ya aba wyedna n sayi n wo ba knu Yesu.

¹²Ewyi kmisunyi na zhin paska cei nyi 'wyi na wu a kugya ai zhin hadaya ce yi nyi, O wo abara ba nyawo aba n Wo cei pma ba gyi paska fi.

¹³Wa tnu bai gnu-aba balo Urushelima ba zhin aba shiri. Wa gna ba ge, “Shi fyelo, fye bo gye zanugbai woi be n nuwan shaknu yi tu, fya viwo.

¹⁴Puwa nwa lo, 'Eyi gna puwada, 'Fye Dagayi na tnu n yi ya gye nyaknu n ho cei gni, ya be ya gyi paska fi wyeshe yi.'

¹⁵Wo ba lo fyei n nyaknu-she-nya dnagmayi n zhanba gni, fye shirya n yi paska yi bo.”

¹⁶Owo abara n gnu-aba ba knuya lo zhi mi ba lo ba gye nyaho-nyahoyi n shirya gni shi Yesu bei gna ba, ba shirya n paska yi.

¹⁷Nwyeshei Yesu wa kma be ngnisun n Wo abara jei.

¹⁸Shi ba bei kpe n tebur bai gyi nyagyi, Yesu wa cige, “Ma gna fye, behinhin zaknayi fyemi ba knu Mi, Zaknayi n fyemi n wo dnalo ya woi gyi nyagyi Miyi.”

¹⁹Bugba wunba vinya shi ba bei wo lonu ba ya wo nya gmanyi gmanyi. “Emi nu?”

²⁰Wa dnabo gbe ge, “Zaknayi n fye awocei aba mi nu woi gni nyagyi gyi lo n Miyi n sayi ye.

²¹Tilas Ma fi shi a anabi bei da tunyi n sapai, ama, aiya, wahala yakwo shilo n za ba nwo ye wa knu Mi nyi. O! Ngye to aye ma zayim.”

²²She ba bei kpe bai gyi nyagyi, Yesu wa la bredi Wa gyi Shekwoyi wye Wa tu kwo anabarka. Wa sakwo ya Wa gaba Wa cige, “Fye gyi Emi nayi nu.”

²³Wa pmi Wa la kofi Wa zhin Shekwoyi godiya, Wa gaba ba sin n kwomi oba vinya.

²⁴Wa gnaba ge, “Ema mi na zeya ntu naza begye bo, alkawali woiwoyi nu n Shekwoyi atasin n 'zanyikwo-ci yi.

²⁵Minu gnafye, Mi taje nuwan shushuyi sin m, sai ewyi Mi bei sin odo nkwo kakwo dulo n Shekwoyi Bemi.”

²⁶Ba pmi ba kwo anyi, ba lo Zaitun pe.

- 27 Yesu wa gnaba, “Efyē vinya, fye ɓa ya Mi, ntuge Shekwoyi ɓo ku da na anabi gbe, ‘Miɓei wu kniknayi, a kni ye busi.’
- 28 Ama sa Mi ɓei la laka n ’vingwo, Mi ɓei lo Galili Miyi sun n fyei ɓo.”
- 29 Bitrus wa gna Wo ge, “Ko azaje ya Ho, mida ta ya Hom!”
- 30 Yesu wa cige, “Bitrus, Kafin Pise nugba ɓei ceku bwa bayi nsu n labmi yi, hoi la Ma ɓona abwa-ta.”
- 31 Bitrus wa dnabo gbe n kalayi wa cige, “Awo, ko n fi yi, mita na Ha ɓom.” Aza je vinya ɓa bwa da lonu ce.
- 32 Sa fyewyi ɓa si ashinwan nu-nu fwa ho, Ayi kwo ge Jesimani, Wa gna Wo abara ge, “Fye pmi Mi zhi ’ya, Malo Mi zhin aduwa.”
- 33 Wala Bitrus, n Yakubu yi n Yohana yi, ɓa gnilo n Woi. Waya bugba wun n mwa, n kala yi.
- 34 Wa ci ɓa ge, “Emi bugba la wunya har efi, fye ku zhi ya fya gu n gnisun Miyi.”
- 35 Wa ce tala lo fyewyi Wa ca kwo-kwo shi n kni Wa zhin aduwa ge, n gye ko ɓa wozhin, esa nukwoyi nkwo shi wa ’bye nyi, tokwa ɓem.
- 36 Wa cige, “Dada, Dada nyaho-nyahoyi to dnabo Ha bam, la kofi (azhin) ye laya Maba Ama Miye Oho ɓeye nu, to ge eminyan m.”
- 37-38 Wa pmi Wa jezebe Owo abara ngnu ata-yi aba, Wa gye ɓaku wangye. Wa yi, “Siman! Fye wangye nu? Ashe Fye ta mi fya gu n Miyi kwo esa gmanyi m? Fye gu ngnisun Miyi, fya-zhin aduwa saknu jaraba-dnayi wa dufye kala. Ko shikwo nyi zafun ceyi yelo, nayi zhin kalagbaya nu.”
- 39 Waje laka lo Wa zhin aduwa Wa gyiwe shi Wo ɓo shin gyi nyi.
- 40 Wa jezebe Wa gye ɓai wangye, ntuge abeyi ku ɓa ɓe. To ɓa kpe ɓeye ɓa ɓa dam.
- 41 Shi Wo ɓei jezebe daba bwatayi, Wa ciba ge, “Fye wan gye, fye sun! Ama awo, gyewansa ladiya! Fye gye! Ala Mi knu na za nukwoyi aknu.
- 42 Fye ɓe! Fye kukala! Tilas yalo! Gyewye! Emiknuyi laɓe!”
- 43 Nsayi-sayiyi Wo ye gni Woi daɓo, Yahuda (zaknayi n Wa bara) wa ɓe na zayi vi n na knu kaya yi shi, abeyakwo, n na busi gbaknu yi, n na pirist tukwoda n na Yahudawayi tukwo da ɓei tnu ceyi.
- 44 Yahuda ɓei ku gna ɓa, “Fye ɓei kpe ’za ye nfyē ɓa wan, sanu mi ɓei lo mi biwogna miyi powa ’bwa. Fyeyi wan Wo n ’sayi n tna ɓednayi.”
- 45 Sanu ɓa ɓei kusi, wa lo Yesu aba wa cige, “Dagayi,” wa shepmawo n gye nugnudo.

⁴⁶Nsayi laza wan Yesu ba Wo shi kpan.

⁴⁷Ama zaho (Bitrus) wa wa beyakwo wa ka Pirirst dnagmayi bara tnubua ya ceyi.

⁴⁸Yesu wa nya ba ge, “Mi zhin evi yakwo nu fyei be Ma ba n na kun kaya yi shi fya wan Mi?”

⁴⁹Knihin nu bo zhin to fya wan Mi dna na duwa nyaknu ma? Mi bei dna bo Miyi wu nya fyegy-i-fyegy-i. Ama abeye zhin n na bai ba nu albeda n na bei da tu Mi tukwo nu.”

⁵⁰Nsa deye mi Owa bara yi la busi vinya.

⁵¹⁻⁵² Ama samari ho bei vi ba laba navun dna na gyewan jekpe. Sa na 'za beye ba wanwo, wa busi, Ko shi ko nyi owo aje bo la saya, wa busi n bwotolo yi.

Bitrus Wa Na Yesu Abo

⁵³Alo n Yesu yi n pirist yako puwa aba na pirist tukwo da aje nna Yahudawayi tukwoda yi bei yefi.

⁵⁴Bitrus bei viba n navun n kpayi wa wyi-ya fya-a wa lo dna pirist Yakwo dugwe wa ce akwo-kwo shi nna naba bedo nwa barayi.

⁵⁵Nmi, a pirist tukwoda, n na Yahudawayi padawa yi bai fi bai zan Yesu laifi zanyi n ko kunce a zun wo kni a wuwo. Ama to ba min.

⁵⁶A saida-da akatayi ba be, ama ba dafo n gmaje gmi-gmiyi.

⁵⁷Nkmasun, a zaho ba ku kala ba ce kata fyiwo ba cige,

⁵⁸“Yi bei ku wo woi cige, ‘Mi ba mi aduwa nyakun ya n kwo mi gni n naza 'bwayi nyi, dna anyipyei gun ata maje odo mi n nato mi n naza abwa yim.’”

⁵⁹Duddu lonu beda bei mbai gmaje gmi-gmiyi.

⁶⁰Pirist dnagmayi wa laka wa nya Yesu ge “Hota dna be gbe nna da tu nho tukwo nyin?”

⁶¹To Yesu wa dnawo begbem Prist yakwo wa nyawo ge, “Eho nu zhin Kristi, Shekwoyi Nugun?”

⁶²Yesu wa cige, “Eminu. Fye bei gye mi sase-tu a Shekwoyi bwayi zhe bwa, mi i je ze be anyi dna n mwa-mwa.”

⁶³⁻⁶⁴ Pirist yako, wa sawo aje ya wa cige, “Yi shan knihi ye'a? Knihi nu zhin yi pmi a saida-da n shan san? Fye kuwo Wo beda nukwoyi tukwo mwa nya. Fye zun owa ya gena?” Ada viyan ge a wuwo.

⁶⁵Nsayi azaho ba ya kni-kni kpewo, ba puwo je n nawye, ba yawo lu n nawyeba n na knuyi. Bai nyawo ge, “nyika na lu hoa, Oho Anabi? Bai kpewo agye. Har ma awadayi atnu-tnu loyi ba lo woi bai gwo wo apmikni n na wyeba.

⁶⁶⁻⁶⁷Bitrus beye dna n dugwe Binyi-kwoyi ho n wo zhin tnu-tnu n pirist yakwo yi wa gye Bitrus shi woi wyena. Wa shi wo awye zun wa cige, “ho bei gnisun n Yesu yi n wo gmi n Nazarat nyi.”

⁶⁸Bitrus wa nabo, “Mita kpe beye lo n ho dam!” Wa gmi ya lo a duba. Safewyi pise nugba ceku.

⁶⁹Binyikwoyi wa gye wo gni bo wa ya azaje gna, “n Wo gni nu! Yesu bara gni!”

⁷⁰Bitrus wa nabo n jesun. Safyewyi aza mba bei zhi nna nawye ba, ba ya Bitrus gna, “ho zhin oba zanu, ntuge ho gmi n Galilinu!”

⁷¹Waya a kmikni woi sinya-si, “Mi ta kpe za deye ye lo n fye zhi fyei dawo be nyim.”

⁷²Nsayi-sayi yi pise nugba ceku, bwa bayi. Nsagmanyi yi wa pa Yesu beda bo, “Kafin Pise nugba ceku a bwa aba, ho ba namafo, abwa-ta.” Wa ya bwici.

Markus 15

Owo Wada Nwo Wu-wuyi

¹N labmiyi, a pirist tukwoda, a byeda, a malami, n na Yahudawayi apadawa yi vinya ba kpesa ba zhin shawara nyaba ba zhin. Ba zhin shawara ge ba tun n Yesu yi dna na soja tasin n Bilatus aba a Romawayi Gomna.

²Bilatus wa nyawo. “Ho zhin a Yahudawayi Esu nu?” Yesu wa yewo ge, “Ho ku da dai-dai.”

³⁻⁴ Nsayi a pirist tukwoda a kpewo abo na katayi mwa. Bilatus wa nyawo ge, “Knihi zhin to hoi ba dna be-gbe ma? Abeye na datu ho tukwo nyi ma?”

⁵Ama Yesu to bei shan be gbe dnam. Ca wo Bilatus n mwa.

⁶Kwo bei zhin Bilatus kunnu nu n Paska esa, wa lo'za wan-wan ya ga a Yahudawayi, ezaho-zaho yi nba ye.

⁷Kurkuku da ho ai yi ge Barabas. Wo bei zhin evi yakwo nu n na zajeyi.

⁸Safewyi, aza ya yezhi n Bilatus aba, Bai gyiwo wye ge wo lo eza papayi ya gaba gmanyi she wo shin zhin.

⁹Bilatus wa nyaba, “Fye ye malo a Yahudawayi osu nu ya ga fye? Owo nu n fye ye ma leya?”

- 10**(Ntuge, wo bo ku kpe n ge a pirist tukwoda munafici nu ba pa, ntuge Yesu bei n zafun yi n duba.)
- 11**Ama a pirist tukwoda ba gna aza nge ba gnage ba ye Barabas nu to ge Yesu m.
- 12**Bilatus wa nyaaba, “Nma lo Barabas ya, ma zhin wuna n zadeye yi’a n fye yi ge efye ’su nya?”
- 13**Ba ye na kuyi viyan, “A zunwo du.”
- 14**Bilatus wa nya ba, “Ntu Knibeya? Wo ku knibei nukwoyi zhan?” Ama ba gna aku fyi-fyi ge, “A zun wo du.”
- 15**Shikwoyi Bilatus, wo aza yezhi dna, wo ye njesun aza yewo wa lo Barabas ya. Wa ga gbe ge a zhin Yesu bulala n bulalayi n kwo na sinknayi fyi. Wa gawo m ba kun nge ba zun wo du.
- 16-17** A Romayi a soja ba la wo lo cei n bariki, ba yi a soja je be cei, ba kpewo aje asu nya pya, ba zhin lawonyi aknawuyi nya, ba kun wo n tukwo.
- 18**Ba ya zhi bai sa wo ami, bai ci ge, Shekwomwasa, osu a Yahudiyi nya.
- 19**Baluwo n tukwo n na busiyi ba kni akni kpewo, ba kni a kwo-kwo zhi bai biwo gna agyekpe nya.
- 20**Sanu n na bei kuba be mba wyefan agye-kpe nya yi, ba kma woje mba bei kpewo nyi ba kpe Wo owohin aje njesun ba lo woi a zunwo du.
- 21**Siman Siriniyi, woye bwa lolobe, ayi wo wa be wa bma Yesu zundu la (Siman nu zhin Alezanda dada n Rufus yi.)
- 22**Babe n Yesu yi aba n na yi ge Golgota (wato Kwalluwa nu).
- 23**Agawo nuwan mamayi to wa yesin bom.
- 24**Ba pmi ba zunwo-du ba she kuriya n wa je tukwo.
- 25**Ba bei zunwo du n sinkna ciwagmanyi nu n labmi yi.
- 26**Ba ka nya kpe n wo Zundu she, bai wuwo laifi, “A Yahudawayi ’su.”
- 27**Abei zun wodu n gnisun na vihoyi nu gun-aba n labmi yi, gmanyi nwo bwapmi, gmanyi nwo bwai-zhe bwa.
- 28**Anabi beda nwo bei da ge, “Aba Wo bedo na laifi da yi,” nyi kwa ku nu.
- 29-30** A zokwo wanhi bai duya bai bmiya ba tukwo, bai da beda nukwoyi agyekpe nya, bai gna, “Gye oza nwo gna ge wo ba mi wa ba aduwa nyakun ya, waje ba mi dna anyipyei ngun ata. Gni hohin ha ka shi nzundu.”
- 31**A pirist tukwoda n na adini amalemi yi bei zhi bo bai kpe Yesu agye. Bai cige, “Wo mi n na zaje gni bo, ama wo tami wa gni wo hin m.”

- ³²Ba yaku kpewo, “Wo tunu. A Israila yi Esu, kashi n zundu n na bai ya gaho gaiciya.” Harma aviya ngun aba bai kniwa kmi.
- ³³Nyipyeyi atukwogunyi ekni vinya kwa dna wyege har sinkna ngun ata wyeshe nya, wyege yi yedna.
- ³⁴Yesu wa yi n begye Kalayi, “Eli, Eli Lama Sabach thani” (Emi Shekwoyi, emi Shekwoyi, kni nu zhin hoi yami’a?)
- ³⁵Aza m ba bei ihi bo, ba gye ge wo yi Annabi Iliya nu.
- ³⁶Ntu cenu zaknanyi wa busi be n nuwan mamayi shi n fi n soso wa kuwo ko ngbe n busiyi. Fye pmi ya gye, kwo Iliya ba be wa kawo shi.
- ³⁷Safyewyi Yesu wa je wyisa n kalayi wa gna wo zafun a mi.
- ³⁸Labule nkwo bei sa n na aduwa nyakun nyi kwa saya n she har ekni.
- ³⁹Sanu Romawayi soja Tukwoda bei gye shi wo bei gnawo zafun ami, wa cige, “behin-hin, wo bei zhin Shekwoyi Nugun nu.”
- ⁴⁰Anyi-kwoza ho bai shi awo n tagni-Maryamu Magadalin, Maryamu (Yakubu Biyi n Joses ya yi), Salomi, n naza-je yi.
- ⁴¹Oba n na Galiliyi anyikwo aje yi mba zhin owo aviya nyi, ba bma wozhin n na tun-tnuyi sa nwo bei dna n Galili nyi, ba be Urushelima ngnisun nwoi.
- ⁴²⁻⁴³ Abeye vinya bei zhin n Jumawyi nu. Dna n wyeshe yi mi Yusufu Arimatiya ’za yakwo dna na Yahudawayi apadawa (nwo-hin tukwo wo bei pmi Shekwoyi bemi bebe). Wa bwa bugba kala wa lo Bilatus aba wa nyawo Yesu nayi bo i wa bi.
- ⁴⁴To Bilatus wa ga gaiciya ge Yesu la fin Ntu lonu wayi Romawayi soja gadi tukwoda wa In Yawo.
- ⁴⁵Soja tukwodayi wa gna Bilatus ge, wola fi. Bilatus wa ga Yusufu gbe wa la Yesu nayi.
- ⁴⁶Yusufu wa si linen ’je, wa ka Yesu shi n zundu, wa puwo linin ’je yi, wa yawo dna n vingwo n wo bei jikwo nna pma, wa pmi kutaya lo cei wa gu kwo n vingwo gbe.
- ⁴⁷Maryamu Magadalin n Maryamu Yesu ’ya yi bei zhi bai shi awo she a bi Yesu.

Markus 16

Wo La Lakala

- ¹Sanu n Satiwyi bei la duya Maryamu Magadalin n Salomi yi, n Maryamu Yakubu ’ya yi ba kun yalo n emi sinda-yi nya yi shi n na shin zafi to wa bwo nyin

- ²Nla-bmiyi, nyipyeyi kpebe, ɓa lo Yesu vingwo n emiyi hoi shi.
- ³Balo ɓai da n zokwo shi ɓa ɓe kpe vingwo kutaya n kwo gu n vingwo bwo nyi.
- ⁴Ama shi ɓa ɓei si ɓa gye kuta-shanwoyi n pmiya shi, n vingwoyi guya gni.
- ⁵Balo vingwo mi ɓa gye ɓiniyi sase tu n bwai-zhe-bwa n na aje bui kpe. Ce'a wo anyikwo-zayi.
- ⁶Ama Malaika cige, "Ceto wo fyem. Fye ta zan Yesu Nazaratiyi nu shin, n na ɓei zun wo du nyin? Wo to dna lo yam. Wo la laka n vingwo. Fye gye aba nu nwo nayi ɓei shi.
- ⁷Fye lo n sayiye fye gna Owabara nabari deye (n Bitrus yi ɓe). Yesu gyilo n fya-bye woi lo Galili fye ɓo gye wo ɓo shi wo ɓei gna fye tunyi to woi fim."
- ⁸Anyi-kwoza yi ɓa kun n vingwo n vinvinyi, ednanyi wo ɓa ɓodo n ɓowo-woyi har to ɓa mi m ɓa dabom.
- ⁹N Ladiwiyi yi nu n labmiyi n Yesu ɓei laka n vingwo, eza n wo ɓei kmiwo gye Maryamu Magadalin nu – nyikwozayi n wo ɓei kun alijenu ya ngnu tnaba n wo nyi.
- ¹⁰⁻¹¹ Wa gye abara fi n bugbawun ɓai cibwi, wa gna ɓa ge wo la gye Yesu, woi n wye-wyeyi lo. Ama to ɓa gawo gaiciyam.
- ¹²N sadohoyi, dna nyipyeyi yimi, wa wu wohin n aza ngun aba aba ɓai kun Urushelima ɓai lo ezhi ɓiyi ho, ama to ɓa kpe woyem, ntuge wo ɓei la wohin pmibma wuba.
- ¹³Sanu mba ɓei kpewo ye, ɓa busi lo Urushelima ɓa wu oɓa zaje lafiya, ama to a ga ɓa gaiciyam.
- ¹⁴Nnavun, wa wu wohin n wo abara a wocei-gmanyi aba ɓai yezhi ɓai gyi nyagyi. Wa gnakni ɓa ntu ɓa tna gaiciya gaɓo. Nya kwo ɓei zhin to ɓa ga aza gaiciya mba ɓei gna ɓa ge ɓa ku gye wo wye nyin.
- ¹⁵Wa pmi wa gna ge, "Fye lo anyi vinya, fya zhin nabari manayi wa'azi n zahozahoi aba n nabaho-bahoyi yi.
- ¹⁶Aza mba ga gaiciya a zhinba baptisma, ɓa ɓa pwo. Ama aza mba to ga gaiciyan, a ɓei zunba kni.
- ¹⁷"Aza mba ga gaiciya ɓa ɓei zhin ampani n mi ikoyi ɓa kun aljanu ya, ɓai daɓo n na nyitala woyi yi.
- ¹⁸Ba ɓei mi ɓai wan awa to ɓaye zhinba nyahon, ko ɓa sin emwi, kwo ta zhin ɓa nyahon, ɓa ɓei mi ba kpe a bwa n na nyasanyi ɓa kaba gna."
- ¹⁹Sanu Dagayi Yesu ɓei ku beda zoda mbai, a lawo lo cei n eshemi wa sase tu n Shekwoyi bwai-zhe bwa.

²⁰Owo abara laba n bwaho-bwahoyi bai zhin wa'azi, Dagayi kunsun n bai. Wa wu ge ɓo ɓa danyi gaiciya nu, n na ɓo, awo-woyi yi mba bei zhin nyi.

Luka

Luka 1

1-2 Emi nugundo n wo ye Shekwoyi nyi aza ku nabari ka n mwa n Kristi tukwo. Ba bei bwa a nabari ye n aza nu n ba bei wo n Yesu abara nyi. Bedo n aza n ba gye Yesu n ba hin tukwoyi.

3 Amma mi cei pma ma dnawye ma gye ko nabari ye zhin gaiciya nu. Nsayi ma kaho gna.

4 Nnabai kwa bma ho zhin ha kpe gaiciya ye n na ei wu ho nyi.

Malaika Wa Wu Wohin N Zakariya Aba

5 Zaho bei nyi ai yiwo ge Zakaria. Wo bei zhin malami dnagmayi nu n esa Hiridus bei gyibe n cei n Yahudiya nyi. Zakaria bei dna n Abija ebye nu. Obanu bei zhin tnu-tnu nna duwa nyakun n sahi. Ai yi ewo nyiko ge Alizabatu. Wo bei zhin prist nu ce. Ntuge wo bei zhin Haruna Yawyi nu.

6 Zakaria n Alizabatu yi bei zhin aza manayi nu. Ba bei n zafun manayin njesun bai zhin abo manayi.

7 Amma ba to bei ni yi m, gama Alizabatu bei zhin lama nu. Nsayi kwa bai ku ze azakwoyi.

8-9 Nwiyihoi Zakaria dna n aduwa nyakun wo zhin tnu-tnu, gama owo gwodo nu bei zhin tnu-tnu n mako yi. Kuria ku gyi wo nwo balo woi zhin hadaya nna duwa nyakun ga Shekwoyi.

10 Nsayi kwa nza zhi lafa nbmi bai zhin aduwa. Shi ba bei zhin bai shin zhin nyi, nsaho-sahoi nza lo ntuge woi zhin hadaya ye pya, wato wo gyi turare na ga Shekwoyi.

11-12 Esanu wo bei dna n cei n haikali to wo dna ce m, wa jeje wa gye malaika gni n wo bwaizhe bwa. Zakaria wa ku jeje.

13 Malaika ciwo ge, "Zakaria, to wo dna m, gama maɓe ma gnaho ge Shekwoyi ku eho aduwa wo. Oho nyiko alizabatu ba ma ebi. Hobu tu ewoye ge Yohanna.

14 Eho n Alizabatu yi fyeba bwa agmada yakwo esalu n fye bei mawo n cei. Aza n mwa be gye bei dagma nfyeyi n jesun.

15 Gama woba zhin Shekwoyi oza nu sosai nya. Fye to yege wo sin ejen ko fyewyi, amma wo ba nu n zafun gyi-gyi-yi har ma kafin a ma wo.

16 Owonu ba zhin a Yahudawa n mwa ba be Shekwoyi aba.

¹⁷Owo zafun ɓa wu ngye anabi Iliya nya nu. Wo ɓa ɓe n Kristi abye ntu ge wa zhin aza ɓa zhin shiri ntu Kristi ɓebe ɓo. Aza yakwo bugba ɓa wu ngye abi nya. Woba zhin aza nba ta wobom ɓa kuze aza nbeyekpe yi.”

¹⁸Zakaria wa ci malaika ge, “Ai, deye ta ye zhin! Ntuge mila kwo, emi nyikwo jesun, wo la kwo.”

¹⁹Nsayi malaika ciwo ge, “Emi nu zhin Malaika Jibrailu. Mi gni n Shekwoyi abye nu cici. Ewo nu na tnumi nge ma ɓe eho aba.

²⁰Amma shi ho to gami beda gaiciya nyi m, ho ta mi ha shan bedam, sai eho nyikwo wola ebi ma. Gama dole emi beda kwa nu.”

²¹Esa n malaika ɓei da ɓo n woi nyi kwa, azai zhi n bmi ɓai pmi Zakaria to ɓai kpeɓo n kwo zhin woi la mwasa lo nu.

²²Esa n wo ɓei gmiɓe, to ɓa gye woi mi woi daɓo m. Aza ku kpe ge woku bewyegye gye gama wo ɓei ku zhin ɓa n nab-wai.

²³Zakaria kwa wa dna n aduwa nyakun woi zhin tnu-tnu shi ewo anyipyeyi ɓei ku nu wa lo api.

²⁴Esafyewyi, Alizabatu ewo nyikwo wa gni n nuboi. Alizabatu kwa wa wohin so dna har apya ngu atnu.

²⁵Wa cige, “Shekwoyi zhin eza sun-sungye nyanu. Gama Wola vinyikwo shin miya har woi la ebi gami.”

Alkawali Oɓi Nya

²⁶Dna n epya tnanyihi Shekwoyi wa tnu n malaika yi, ai yi wo ge Jibrailu, n Nazarat nkwo dna n Galili nyi.

²⁷N nabai walo ɓinyikwoi ho aba n wo to shin gyewa n zaho-zahoyi m. Ai yiwo ge Maryamu. Ayi owo nugunyi ge Yusufu. Wo ɓei zhin Dawuda Yawyi nu.

²⁸Jibrailu kwa wa lo Maryamu aba wa sawa mi wa cige, “Ho zhin oza ye-yehi nu. Shekwoyi kunsun lo n hoi.”

²⁹Maryamu wa jeje to wa bwa awyega n nyayi n malaika ɓei gna wo m.

³⁰Amma Malaika ciwo ge, “Maryamu to wo dna m, gama Shekwoyi la tuge ho ɓa bwa anabarka n mwa.

³¹Esa fyewyi hoɓa gni n nuboi ha ma ebi-nugbayi. Ha tuwoye ge Yesu.

³²Eɓi hi ɓa zhin eza dnagmayi nu har aɓa yiwo ge Shekwoyi ɓi. Shekwoyi kwa woba ga ebiye ewo dada 'be wato woba tuwo n Dawuda shinkpegye.

³³Woba gyibe tu n Israila tukwo. Ewo begyi kwa kwo ta shan zo m.”

³⁴Maryamu wa nya malaika ge, “Amma deye ba yezhin n wuna? Gama mito shin gyewan n zanugbayi doho-dohoyi m.”

³⁵Malaika ciwo ge, “Zafun Gyi-gyi-yi ba be daho (Shekwoyi iko kwa- kwo ba zekpe ho. Ntucenu ebi nho ba ma nyi, wo ba zhin oza gyi-gyi-yi nu. Wo ba zhin Shekwoyi ebi nu.

³⁶Nsaiye kwa eho dnawun wato Alizabatu wo gnilo n nuboi apya ngnu tnanyi. Wola bwa woi la kwo. A bei zhin ai cige wota mabi m.

³⁷Gama Shekwoyi alkawali doho-dohoyi dole kwa nu.”

³⁸Nsai Maryamu wa cige, “Mi zhin Shekwoyi fyenu nu. Milaye ge wo zhin n miyi shi wo cei pma. Shekwoyi wo zhin eho beda vinya n ha gnami nyi kwa nu.” Nsai malaika bwi wye. To Maryamu wa shan wo wye gye m.

³⁹⁻⁴⁰ N anyipyei fyewyi avun, Maryamu wa lo azhibeyi n ape kni n Yahudiya, aba n Zakaria bedo n Alizabatu bei fi nyi.

⁴¹Sanu Maryamu bei bi ba gna ebi n ko bei dna n Alizabatu nuboyi kwa shan-shan dna mi. Alizabatu kwa wa nu n zafun yi.

⁴²Wa ci Maryamu ge, “Shekwoyi ku alheri wu ho n anyikwo aje vinya. Eho bi kwa wo ba zhin a ga Shekwoyi mwa-mwa n dudu.

⁴³Ai mi to shin esa ye pya bwa m, gama eza n woba ma emi Dagayi nyi wola bemi gnabi.

⁴⁴Esanu n ha be hoi bi mi gna nyi, shi mawo oho begye ebi nkwo dna n mi nuboyi, kwoyi shan-shan ntu agmada bo.

⁴⁵Ai hola gaiciya ga nge nya n Shekwoyi da kwo ba nu. Cenu na zhin woi tu ho anabarka ye pya.”

⁴⁶Nsai Maryamu wa cige, “Ma gode n Shekwoyi.

⁴⁷Mi dagma lo dna n Shekwoyi n wo gni mi nyi.

⁴⁸Gama wa shi ewo nyigun awye n wo to zhin nyaho nyi m. Nsai ye kwa aza ba yi mige anabarka da har nyalo-nyalo.

⁴⁹Gama Shekwoyi iko da nwo gyi-gyi-yi nyi wo ku obo wo-woyi zhin ga mi.

⁵⁰Wo gye aza sun-sun vinya n saho-sahoi, aza vinya nba gawo mwa-mwa nyi.

⁵¹“Ewo atnu-tnu zhin abo wo-woyi nu. Wo zhin wa zun aboko da bedo n atukognana-kwoyi anyigyiyi ya.

⁵²Wo la begyi gmi n asu akun woi la ga azagbayi.

⁵³Wo ku anya manayi ga awyekwo yi, amma anyabwayi wa ku ba gnami ntana nyaho.

⁵⁴Njesun n saiye wola owo fyenu bo pa, wato Israila. Woto ze owo alkawali amwi n wo bei zhin ge wa gyeba sun-sun.

⁵⁵Gama wobo zhin eyi dada Ibrahim bedo n wo abiyi, alkawali nge woba gyeba sun-sun har nyalo-nyalo.”

⁵⁶Maryamu kwa wa dna n Alizabatu yi har apya ngnu ata. Shi apya ngnu ata bei ku wo nu nsahi, wa ieze lo owo zhi.

Ala Yohanna Bapizma Zhinyi Ma

⁵⁷Nsayi kwa esai la Alizabatu nu n woba kagna n cei, wa ma ebi nugbayi.

⁵⁸Nabari ewo kagna nya kwa gnami laba n wo aje vinya, bai da shi Shekwoyi wa gyewo sun-sun n wu. Ai da zaho-zahoi laba.

⁵⁹Shi anyipyei bei ku nu ngun nyimwa-nyimwa, owo anugundo babe ntu ge ba dagma n kaciya zhin sa. Bai gye ge aba yi ebi ge Zakaria nu, wato owo dada ye nu.

⁶⁰Amma Alizabatu wa cige awo. “Aba yiwo ge Yohanna nu.”

⁶¹Aza ciwo ge, “Eh! Ho shingye ai yi nyikadonu n yei pyayi n fye bye a?”

⁶²Nsayi ba nya ebi da, bai zhin wo n nabwai.

⁶³Wa gna ge agawo takarda n nabai wa ka beda kpe. She a bei gawo, wa katu ge, “Aba yiwo ge Yohanna.” Deye ca wo aza vinya.

⁶⁴Nsayi-sayi kwa Zakaria wa ya beda njesun, wa ga Shekwoyi mwa-mwa.

⁶⁵Ca wo aza laba n ba bei zhi bo nyi. Nabari yi kwa gakpe laba n Yahudiya ape kni.

⁶⁶Zaho-zahoi n wo bei wo beye kwa, wa zhin tunani n mwa wa cige, “Ai mita kpelo shi ebi ye ba ze m?” Gama Shekwoyi kun-sun lo n woi n zokwo do gbo.

⁶⁷Zakaria owo dada kwa wa nu n Zafun Gyi-gyi-yi wa zhin anabci ye, wa cige,

⁶⁸“Fye ga Dagayi, Shekwoyi Israila nya mwa-mwa, Gama wola be ntu ge wa gye ewo aza, woi la gni-gni gaba njesun.

⁶⁹Wo ba tnuyi, Eza dnagmai n wo ba gni yi nyi. Wo ba gmi n Esu Dawuda Shekwoyi fyenu puwa nu.

⁷⁰Zagni yi ba be shi Shekwoyi bei zhin alkawali, n wo anabi gyi-gyi-yi gbe.

⁷¹Oza n wo ba gniyi n yi anuwun yi aknu, n na zayi vinya n ba wun yi nu nyi.

⁷²⁻⁷³ Shekwoyi ku sun-sun gye eya dada. Wo ku sun-sun gye Ibrahim gama wola owo alkawali bo pa, n wo bei zhin Ibrahim nyi.

⁷⁴Har woi gayi iko ya ci wo n tna edna. Eyi anuwun yi dna ta shan yiwo lo m.

⁷⁵Woi kuyi ze aza gyi-gyi-yi n Shekwoyi bami wa goyi, har ya zhi n wo aba n tna edna.

⁷⁶“Oho, emi bi kwa aba yiho ge anabi Shekwoyi anabarkada nya.

⁷⁷Ho ba wu ewo aza shi ba-ba bwa gni-gni n wo. Wato a zhan ba ya n ba laifi.

⁷⁸Anya deye ba zhin vinya ntuge Shekwoyi sun-sun gye sa to diya m. Woba gayi buzangna gni-gni nya.

⁷⁹Wa ga aza buzangna n ba filo n wyegma bedo n efi nyi. Njesun wa zhin yi fi n zokwo bugba fu nya.”

⁸⁰Ebi hi wa ye Shekwoyi n mwa. Osa n wo bei mwa n cei kwa, wo bei dna n zhabui n wo gmanyi yi har osa n wo bei ya aza wa’azi zhin laba n Israila nyi.

Luka 2

Shi Abei Ma Yesu

¹Nsayi kwa Kaisar Augustus wa ga wyidna ge a ba aza vinya. Kaisar bei zhin esu nu n Roma

²Aza ba ye nu bei zhin kmisunyi sanu Kirinius bei gyibe n Siria nyi.

³Ko bei zhin dole nu zaho-zahoyi wa lo ewo ayi ntu ge woi ga owo ye.

⁴Yusufu kwa walo Baitalami. Wo bei lo ntu ge Dawuda zhi nu n sapai. Yusufu kwa wo bei zhin Dawuda awyi nu. Wa laka n Nazarat Galili nya.

⁵Ba gnilo n Maryamu yi, Yusufu bei zhin Maryamu Nugunyi nu. Amma nsayi Maryamu bei gni n nuboyi.

⁶Sanu babei fi n Baitalami, esa Maryamu nu n wo ba ma ebi.

⁷Wa ma ebi nugbayi, owo bi kmisunyi. Wa kmi wo dna n bargo wa yawo dna n aba n bafi aburutu nyagyi nyi. Gama ba to bei bwa nyakun n azhibeyi puwa m.

⁸Nsukoyi azaho bei zhi n zhabui bai kna akni.

⁹Sai malaika wa bayana gaba to bai pa ce m. Aba bmiya ’naya wai-wai n Shekwoyi mwa-mwayi. Har edna kwa woba sosai.

¹⁰Amma malaika ciba ge, “Fye to wo edna m, gama ma be fye n nabari manayi nu, n ato shin ko wo m. Ko zhin zaho-zahoi nya nu.

¹¹“Gama n naiye ala anyi gyiyi ma n Baitalami.

¹²Nfya lo fye ba gye obi kmidna n bargo n woi ya dna n aba nba zhin ba ga aburutu nyagyi nyi.”

¹³Nsayi kwa amalaika do ba kun n She ba yebedo n deyi bei ci Shekwoyi.

- 14** Ba ko anyi ge, “Aga Shekwoyi mwa-mwa n She, Bugba fu kwa ku be aza ba n ba da Shekwoyi nyi.”
- 15** Sanu amalaika ye bei la jeze lo she aknikna yi ba cige, “Ko kamata lo ya lo Baitalami yi gye ebo manayi ye n Shekwoyi ku wu yi nyi.”
- 16** Ba kukala ba lo zhimi, ba lo ba gye Yusufu n Maryamu yi. Ba gye ebi dna she abei gna ba n wu nyi.
- 17** Akniknayi ba gna zaho-zahoyi laba enya ko ku zhin, njesun nya amalaika gna ba.
- 18** Ezaho-zaho vinya n wo bei wo bedaye ca wo-wo.
- 19** Amma Maryamu wa ku abeye sofi n bugba woi zhin ba nubo nsasai.
- 20** Nsayi aknikna yi ba jezelo zhabui bai ga Shekwoyi mwa-mwa ntu amalaika bo n ba bei be nyi. Ntu ge ba bei ku gye ebi shi malaika-bei gna ba nyi.
- 21** She anyipyeyi bo ku nu n gun nyimwa-nyimwa, alo n bi ntu ge a zhin wo kaciya. A tuwoye ge Yesu shi malaika bei da nyi.
- 22** She esa bei labe ntu ge Maryamu wa ze wohin gyi-gyi-yi she Musa wyidna bei da nyi, balo n Yesu yi n Urushelima ntu ge bo dnawo n Shekwoyi akun.
- 23** Gama Shekwoyi bei gna Musa n doka ge, “N nyikoza mabi kmisunyi, zanugbayi, woba ze Shekwoyi nya.”
- 24** Nsayi kwa Maryamu wa be n sadaka yi ntu wohin gyi-gyi bo, ba ga alukpe ngnu aba ko kwa a tatam-bare a bi-biyi.
- 25** Nwyihi kwa ozaho ai yi wo ge Simon n dna n Urushelima wa be aduwa nyakun. Wo bei zhin oza manayi nu, woi wo Shekwoyi dna n nu-nuyi n zafun yi woi pmi Yesu bebe dna anyi.
- 26** Gama Zafun gyi-gyi-yi bei ku wu wo nge wo ta fi m, sai wo la gye oza n Shekwoyi ba tnu n woi.
- 27** Zafun Gyi-gyi-yi wa zhin wo ntu ge wa lo aduwa nyakun n wyihi. Sanu n Maryamu bedo n Yusufu yi bei be ntu ge ba ga Shekwoyi ebi ntuge ba nu Musa wyidna.
- 28** Simon bo dna. Wa la ebiyi shi wa zhin Shekwoyi godiya.
- 29-31** Wa cige, “Dagayi, fami ma fi n saiye, gama hoku oho alkawali Inu. Mi la oza gye n wo ba gni aza vinya nba laifi nyi.
- 32** Owo nu zhin buzangna n wo ba wu aza nba to kpeho ye m. Owo nu ba be n daraja yi n ho aza Israila aba.”
- 33** Yusufu n Maryamu yi kwa, cei wo ba, she Simon bei gni woi da aboye pya n Yesu tukwo.

34-35 Simon wa tu ba anabarka, amma wa ci Maryamu ge, ebeyakwo ba fin ho n bugba, gama aza n mwa begye n Israila taye ebi ye m. Amma oba nuwan nu. Amma aza n mwa ba bwa agmada n wo aba njesun, wo ba kun azaho bemwi bmi.

36-37 Anabi nyikwozada, ai yiwo ge Anna, bei je dna n aduwa nyakun n wyihi. Wo bei zhin Fanuel nyigun nu. Fanuel kwa bei zhin Asher bye nu. Anna bei la kwo, gama wo bei zhin nyigbaya nu har aye Shinyimwa-nyimwa cei-anyi. Anna bei senu aye ngun tnaba nu kawai. To woi gmi n aduwa nyakun m, amma woi dna ba sukwo n nyipyeyi, woi zhin aduwa ga Shekwoyi.

38 Wa be sanu Simon bei gni wo dabo n Maryamu bedo n Yusufu yi. Owihin ce wa ga Shekwoyi mwa-mwa, har wa gna azaje laba n Urushelima n ba bei kmi Kiristi bebe nyi, woi cige Masifu laɓe.

Ba Jeze Lo Nazarati

39 She ba bei ku zo n boho-bohoyi vinya n wyidna da, ba kuka ba lo Nazarat n Galili kni.

40 Nbonu n Yesu bei mwa, wa bwa beyekpe n du wohin kala. Shekwoyi kwa, wa tuwo anabarka.

41-42 Sanu Yesu bei bwa aye ngun awo-cei-aba wa lo Urushelima n gnisun nwo azamayi, ntuge bo zhin paska, n ba bei zhin bai lo eye-eye nyi.

43 Esanu n ba bei ku zo ba jeze lo oba yi Nazarat, amma Yesu wa ce dna n Urushelima. Owo azamayi to bai kpe m.

44 Gama ba bei gye ge wo dudu nu ngnisun nwo anugundo yi, bai gni zan-zan. Amma she wyeshe bei she to ba gye wo m, ba dnawo wye laba n azaje aba n a nugundo yi.

45 Sanu n ba to bei gye wo m, ba jeze lo Urushelima ntuge bo dnawo wye.

46-47 Avun anyipyeyi ngu ata, ba gye wo dna n nyakun n gnisun amalami yi bai nya wo abo n ataurat. Ca wo zaho-zahoi she wa bwa beyekpe ye pya.

48 Owo adada n wo 'ya yi kwa ba ku jeje. Owo 'ya cige, "Eyi bi, kni na zhin hoi zhin yi lonu a? Ai akuyi be ge yi zan ho zan yi n abaho-bahoi."

49 Yesu wa ciba ge, "Kni na zhin fyei zan mi zanyi a? Fye to bei kpe ge mi dnalo n aduwa nyakun n omi-dada puwa n?"

50 Amma toba bwa awyega n nyayi n wo bei da nyi m.

51 Nsayi wa jezelo Nazarat n bai woi vi ba bo. Owo ya kwa waku aboye sofi n wo bugba.

52 Yesu kwa wa mwa n nahi bedo n beyekpe yi. Shekwoyi bedo n azai bai ye wo.

Luka 3

Yohanna La Yawo Tnu-Tnu

¹⁻² Esu, Taiberius Kaisar bo ku 'be gyi aye awo-cei-atnu, nsayi nu Shekwoyi wa dabo n Yohanna yi Zakaria nugun. Yohanna bei n wo puwai gni n zhabui nu n sayi. N sayi kwa Bilatus nu bei zhin esu n Yahudiya. Hirudus woi zhin esu n Galili. Owo zado kwa, Filibus woi gyi be tu Ituria tukwo n Traikonatus yi. Lisantias nu bei zhin Abiline esu. Nsayi kwa Anas bedo n Kayafas yi bei zhin malami dnagmayi.

³Yohanna kwa wa zan-zan laba vi-viyi n Urdun gbei, woi zhin wa 'azi ge, aza ba zhin baptsima. Batisma ye bo wu ge aza 'ba ku laifi fa n nabai a zhin ba gafara.

⁴Dna n anabci n Ishaya bei zhin nyi Yohanna bo zhin begye nu dna zhabui. Wa zhin Yesu zokwo aba. Wa be ko pata ntuge wa vi.

⁵Wa mi ape ya. Wa nu aba woi knu akwana ya laba.

⁶Nsayi aza vinya ba gye zagniyi n Shekwoyi wa tnu n woi nyi. (Wato Yesu.)

⁷Fye wo misali Yohanna wa'azi nya sanu nwo bei zhin aza nyi. "Efye awa bi fye cei pma fya bui ena si, amma fye to cei pma fya be Shekwoyi a ba m. Cenu zhin fye ye azhin fye baptsima ko?"

⁸To sai fya wu ge fye ku tuba zhin dna n fye zan zan mi. Fye to zhi fyei ci ge, yi zhin Ibrahim ayawyi nu m. Deye to kun lo m.

⁹Nsaiye ma, Shekwoyi aze tatalva tulo nfyee. Wo cei pma wa mifye ya zhi kni. Eh, shinwan doho-doho n kwo to ga ampanyi m, aba zunko ya, a yakwo dna n na."

¹⁰Aza ci Yohanna ge, "Ho cei pma ya zhin kni nu'a?"

¹¹Yohanna ci ge, "Ngye ho na ajei lo ngnu aba, to, sai ha ga zaho gmanyi. Ngye ho nyagyi lo n mwa, to, sai ha cega 'za nba to cei lo m."

¹²Agadu goyi n ba zhin rikici sosai nyi, ba ku be n nabai a zhin ba baptsima. Ba nya ge, "Yiba wu nwuna ge yiku alaifi fa?"

¹³Yohanna wa ciba ge, "Efye gaiciya zhin nu ba wu. Fye to gwo gadu ndu tu m."

¹⁴Har ma a soja bo ku be. Ba nyage, "To yiba zhin wuna ce'a?" Yohanna wa gnage, "Fye to gwo agyiwyee na kala yi m. Fye to ce akata fi 'za pei-peii m. Fye fa efye albashi ba fye knu."

¹⁵Ezaho-zahoyi ba pmi Masihu (Kristi) wabe. Ba bo cei pma ba kpe kwo Yohanna nu zhin Masihu yi. Sai ba nyawo ntu ge ba kpe.

16 Amma Yohanna waciƙa ge, “Mi zhin baptisima n nuwai nu kawai. Amma ozaho belo safyewyi. Wo du mi lo n iko. Har ma mito knuce lo ma zhin wo bara m. Wo bo zhin fye baptisima n ena yi njesun n Zafun Gyi-gyi-yi.

17 Wo bo gna esin ajeya n awyi byegye yi. Nsayi woi gyi akpai na n enayi n kwo ta shan wu m. Amma woi shi awyi-byegye ajiya.”

18 Yohanna bo pma aza gna n lai nu, sanu n wo bei gna ƙa nabari manayi n cei nyi.

19-20 Amma sanu n Yohanna bo da Hiridus bo, nge nya wa zhin nyi kwo to bmiya lo m, (Gama Hiridus bei la nyikwo gwo owo mado.) Hiridus wa Yohanna wan wa dna n kurkuku. Deye kwa ze ngye wo ye alaifi zhi wohin.

21 Nwiyihoi, sanu Yohanna bo ku baptisima zhin aza Yesu wa ku baptisima zhin ce. Sanu n wo bei gni woi zhin aduwa eshe kwa guya.

22 Zafun Gyi-gyi-yi n wu gye Lukpe wa be wa yatu n Yesu. Nsayi begye ho kwa daƙo n She kwa cige “Ho Zhin emi ’bi ye-ye yi nu, Eho bo dami sarai.”

Yesu Azakwoyi

23-38 Yesu aye bo nyi ngye shita nu ’sanu n wo bei ya tnu-tnu n cei nyi. Yesu bei zhin ngye Yusufu ’bi nu. Yusufu dada kwa Hali nu, Hali dada kwa Matthata nu. Matthata dada kwa Lavi nu. Lavi dada kwa Malki nu. Malki dada kwa Yonna nu, Yonna dada kwa Yusufu nu. Yusufu dada kwa Mattathiya nu. Mattathiya dada kwa Amos nu. Amos dada kwa Nahoma nu. Nahoma dada kwa Hosli nu. Hosli dada kwa Najjaya nu. Najjaya dada kwa Ma’atha nu. Ma’atha dada kwa Mattathiya nu. Mattathiya dada kwa, Shimi nu. Shimi dada kwa Yuseka nu. Yuseka dada kwa Joda nu, Joda dada kwa Yohanna nu. Yohanna dada kwa Risa nu. Risa dada kwa Zarubabila nu. Zarubabila dada kwa Nari nu. Nari dada kwa Malki nu. Malki dada kwa Ad-di nu. Addi dada kwa Kusama nu. Kusama dada kwa, Almadama nu. Almadama dada kwa Iri nu. Iri dada kwa Yosi nu. Yosi dada kwa, Aliazara nu. Ali’azara dada kwa Yarima nu. Yarima dada kwa Matthata nu. Matthata dada kwa Lawi nu. Lawi dada kwa Shim’on nu. Shim’on dada kwa Yahuda nu. Yahuda dada kwa Yusufu nu. Yusufu dada kwa Yonanna nu. Yonanna dada kwa Aliyikima nu. Aliyikima dada kwa Malaya nu. Malaya dada kwa Minana nu. Minana dada kwa Matthata nu. Matthata dada kwa Nathan nu. Nathan dada kwa Dawuda nu. Dawuda dada kwa Yossa nu. Yossa dada kwa Abida nu. Abida dada kwa Bu’aza nu. Bu’aza dada kwa Salmuna nu. Salmuna dada kwa Nahoshina nu. Nahoshina dada kwa Aminadaba nu. Aminadaba dada kwa Arama nu. Arama dada kwa Hasruna nu. Hasruna dada kwa Farisa nu. Farisa dada kwa Yahuda nu. Yahuda dada kwa Yakubu nu. Yakubu dada kwa Ishaku nu. Ishaku dada kwa Ibrahim nu. Ibrahim dada kwa Tarah nu. Tara dada kwa Nahura nu. Nahura dada kwa Saruja nu. Saruja dada kwa Ra’uwa nu. Ra’uwa dada kwa Falaju nu. Falaju dada kwa Abiru nu. Abiru dada kwa Shalahu

nu Shaluhu dada kwa Kinana nu. Kinana dada kwa Arfakahada nu. Arfakahada dada kwa sama nu. Sama dada kwa Nuhu nu. Nuhu dada kwa Lamaka nu. Lamaka dada kwa Matushalaha nu. Matsuhahaha dada kwa Anuhu. Alnuhu nu dada kwa Yanda nu. Yanda dada kwa Mahalailu nu. Mahalailu dada kwa Kan'ana nu. Kan'ana dada kwa Anesha nu. Anosha dada kwa Shitu nu. Shitu dada kwa Adamu nu. Adamu dada kwa Shekwoyi nu.

Luka 4

Yesu Jaraba

¹⁻² Nsayi Yesu woi dna gni n zafu wa fa Urdun wa lo zhabui, aba n Shetan bei zhin wo jaraba nyi har anyipyeyi shinyi to woi gyi nyaho m. Mikun kwa wo gun.

³ Shetan wa ci wo ge, “ngye ho zhin Shekwoyi nugun nu, gna akuta ye ba ze buredi.”

⁴ Yesu wa dna'bo gbe ge, “A kadna lo n litafi a nya lo n mwa n anyi ye n ba du brede lo n daraja.”

⁵ Nsayi Shetan la wo wa wu Yesu anyi ye vinya n sai gmanyi.

⁶⁻⁷ Shetan wa ci wo ge, mi ba gaho abegyie ye vinya n ba darajai be ntuge ba zhi emi nya nu, ndai n ha yashi ha gami mwa-mwa.

⁸ Amma Yesu wa dna 'bo gbe ge, “A kadna n Littafi dole nu ya ga Shekwoyi mwa-mwa gmanyi.

⁹⁻¹¹ Nsayi Shetan wa lo n woi n Urushelima wa tuwo n aduwa nyakun 'she wa cige, “Ndai ho zhin Shekwoyi nugun nu, gye agnana zhi n 'kni. Gama aka dna n litafi ge, Shekwoyi ba tnu n wo amalaika yi ba gni ho, n nabai to ha viya zhi n kni m.”

¹² Yesu wa ciwo ge, “Littafi kuda njesun, ‘To dna Shekwoyi oho Dagayi jaraba banza nya m.’”

¹³ Sanu Shetan bei ku jaraba zo wo zhin wa fa Yesu, n sai fyewyi wa lo wo nya.

Yesu La Ya Wo Tnu-Inu

¹⁴ Nsayi Yesu wa jeze lo Galili n nunu yi n Zafun yi. Nsai-sai aza ku wo laba.

¹⁵ Zaho-zahoi wa ci Yesu ntu n wo wa'azi bo n aduwa nyakun.

¹⁶ Sanu n wo bei be Nazarat aba n wo bei mwa nyi, wa lo dna nba aduwa nyakun shi wo zhin wa shin aba n Shetan bei zhin wo jaraba nyi zhin. Wa laka gni ntuge wa ba littafi.

¹⁷⁻¹⁹ A gawo Anabi Ishaya Littafi. Wa guya n aba kwa ci ge, “Shekwoyi Zafun kpe lo n mi. Gama wola mi kni ntuge ma da nabari manayi. Wo la mi tnu ge ma ka

a za gna, n'ba bugba to nkala yi lo m. Wola mi tnu ma da ge ma ka aza gna, n'ba bugba to nkala yi lo m. Wola mi tnu ma da ge a ba lo a kurkuku da ya, ma gu awyebuayi awye ya. Aza nba filo n azado kalkashi kwa a kun baya njesun, ma da ge Shekwoyi la shiri zhin, wa tu zaho-zahoyi anabarka n ba be owo aba."

²⁰Wa kun Littafi yi wa ga oza n wo bei gawo nyi, wa sase. Aza vinya kwa ba ku atnubua ya gawo.

²¹Nsayi wa cige, "Nnai ye abedaye ku nu."

²²Aza nba bo fi bo vinya ba dabo, cei woba shi wo dabo n wo. Ba ci ge Ashe Owo nu to zhin Yusufu nugun?

²³Nsayi wa ciba ge kpekni fya gnami beda yi konu nge "ngye gbisi kpe amishe shigbe ko zhin kohin." Ko awyega ge, "Kni nu zhin ho ta zhin abo wowoyi n ho ayi ngye she ho ba zhin n Kafarnahum nyi ma?"

²⁴Amma ma cifye ge Anabi ho to lo n wo n mwa-mwa yi dna n wa ayi m.

²⁵⁻²⁶ Misali fye palo shi anabi Iliya bo zhin bo wowoyi, ntuge wa bma nyigbaya zhin n Zarefat nyi. Wo bo gmi n Zidom nu. Amma fye kpelo ge anyigbaya bo nyi n mwa, n ba bei ye bmazhin n mikun sayi, gama ato bei zhi ogma m har aye ngnu ata. Mikun kwa ku aza wan. Amma ato bei tnu n Iliya yi n ba aba m.

²⁷Ko kwa zhin Elisha nubwo, n wo bei ka Na'aman gna n wo kuturu nyasan nyi. Na'aman bei gmi n Siria nu. Kni nu bei zhin to Elisha lo a Yahudawa ba nu ma?"

²⁸Abedaye ba zhin ba, ba gyi minagyi.

²⁹Nsayi aza kuka zhi n na bai, ba wan Yesu ba lo n woi n epe she, n na bai bo shewoya fi n bwo.

³⁰Amma wa zan-zan dna nba tan-tasin wa fa ba zhi bo.

³¹Wa jeze lo Kafar'nahum n Galili, woi zhin wa'azi bo n Satiwiyi.

³²N ya ce, aza zhin mamaki n abei nwo bo da. Gama wo bei da bo ngye oza nu n wo kpe gaiciya ye. Woto bo zhin woi cige wa kawo-wo nu m.

³³N wyihoi woi dna n aduwa nyakun woi wu nya, ozaho n wo bei n alijenu fi, wa la woi yi Yesu woi ci ge,

³⁴"Yesu Nazaratiyi, ho la be ntuge ha gayi wahala. Suku-suku lo ho nya. Yita ye lo ya zhin nyaho n hoi m. Ai mi kpe ho ye lo. Oho nu zhin Shekwoyi Gyi-gyi-yi nugun."

³⁵Yesu wa zun wo beda ya, wa ci alijenu yi ge, "La ce pi, gmibe." Nsayi-sayi alijenu kwa she zayi ya zhi n kni, to kwa tu wo oci m Aza bei zhi n mwa bai gyebo.

³⁶Ce'a wo ba sosai har ba nyage, "Kni nu dna n zaye beda har alijenu bai vi wo bo a?"

³⁷Nabari yi kwa laba ngye gbe-gbe-na, har aku wo laba vinya.

³⁸Sanu n wo bei fa aduwa nyakun n wiyi, walo Siman Puwa. Nbo, wa gye Siman yezhi dna n zezebi yi. Aza'ba Yesu ge wo ka wo gna.

³⁹Sai Yesu wa dabo n ze-zebi yi kawai, nsai-sai wa gwo kagna. Wa lakala wa zhin ba nyagyi bo.

⁴⁰Nwyesheyi, Anyasan yi n ba bo fi n zhi yi nyi, ba kunbe vinya. Azaho ai be n bai. Ba be Yesu aba, wa kpe ba bwa har ba ku lafiya bwa oba vinya.

⁴¹Azaho bei n alijenu yi fi, amma Yesu wa kun ba ya. Alijenu yi bei ci ge, "Ho zhin Shekwoyi 'bi nu." Yesu kwa wa gnaba ge ba ku ce pi, ntuge ba bo kpe ge wo zhin Kristi nu.

⁴²N labmi yi wa lo zhabui. Aza zan wo zanyi laba. Sanu n ba bei gye wo ba gyiwo wye n nabai to wa fa ba m.

⁴³Amma wa ciba ge, "Ko zhin dole nu ma zhin wa'azi Nabari manayi ye nya n abado ce. Gama ce na zhin ma be."

⁴⁴Ntu cenu wa zan-zan laba woi zhin wa'azi n aduwa nyakun n Yahudiya vinya.

Luka 5

Yesu Wa Yi Abara

¹N wiyihoyi woi gni woi zhin wa'azi n nuwan zundna gbe n na yi ko ge Genesarit nyi, aza be dawo n mwabegye ntu ge ba wo Shekwoyi beda.

²Yesu wa gye aya ho ngun aba, n nuwan gbe. Anyada bei fi bai zhan awyisala wan nya ya. Aza to bei fi n ya m.

³Sanu Yesu bo lodna n ya mi, wa nya Siman nyada bo n nabai wa lo nkoi vivi n nuwan 'gbe, n nabai n wo bami wa dabo n nazayi dai-dai.

⁴Sanu n wo bei ku beda zoda wa gna Siman ge, "Lo aba nko loloyi lo hoi she aburiji. Hoban abmiya n mwa."

⁵Siman wa ciwo ge, "Shekwo mwasa, ai akuyi be nu zhi. Dna n sukwo vinya, yi to mi yi wan nyaho-nyahoi m. Amma she ho ku gna ge yi zhin nyi, yi ba tumwi ya gye."

⁶Sanu n wo bei zhin lonu, owo aburiji 'wa abmiya n mwa har bai saya.

⁷Ba yi oba zaje ntuge ba bma ba zhin. A kole-kole yi ngun aba, baku nu n na wyesalai, har ngye ba shin fi n nuwan.

⁸She Siman Bitrus bei gye ɔ kɔwa zhin, wa ce ako-ko shi n Yesu aba wa cige, “Dagayi, fa yi ha lo ho nya mito kunce lo ma gni n ho aba m.”

⁹Gama Siman n wa 'zajeyi, cebo wo ɔa n awyesala n ɔa bei wan nyi.

¹⁰Siman azaje wato Yakubu n Yohanna yi a Zebadi abi ca wo ɔa ce. Yesu wa ci ɔa ge, fye to wo dna m, gama fye ɔa zhin aza-wan yi nu nsayi (ɔa be maba.)

¹¹Sanu n ɔaɔo kun nuwan kwa ɔa fa aza vinya ɔa vi Yesu nsa-sayi.

Aza Nmwa Begye ɔa Bwa Kagna

¹²Nwiyihoi Yesu dna n zhi ho, oza ho n kuturu nyasan yi, kwoi lawo mwa so-sai wa gye Yesu. Wa miya zhi n kni wa gyi Yesu wye nge wo kawo gna. Wa ci Yesu ge, “Dagayi, Suku-suku kami gna sarai.”

¹³Yesu wa tabwaya wa towo bwa. Wa cige, “Milaye, la kagna n nyasan ve.” Kuturu nyasan yi kwa fawo Nsai-sayi.

¹⁴Yesu wa gna wo ge, wo lo to wa da laba nya nkwo ku zhin m, n nabai a pirist ɔa dna wo wye. Wa ci Kuturu yi ge lo hoi zhin sadaka ntu kagna ɔo shi Musa owa da. Deye ɔa wu zaho-zahoi ge lalle ho la kagna.

¹⁵Nabari ye kwa laba nɔye-pɔyei har aza ɔa be n mwa ntuge ɔa wo owo wa'azi a ka ɔa gna n jesun.

¹⁶Amma Yesu bei zhin wa wiyi cici wa lo zhabui ntuge wa zhin aduwa.

¹⁷Nwiyihoi sa nu Yesu ɔo gni woi wu aza nya, a Yahudiyayi atukwoda ho ɔedo a Farisiyi ɔa be ɔa ku sase zhi vivi (abei zhin ai gye ngye azayezhi ye ɔo kun n akauye nu n Galili, n Yahudiya yi, har ma n Urushelima yi.) Yesu kwa wo bei nunu yi n iko kagna nya yi.

¹⁸⁻¹⁹ Kni ɔa zhia! Sai azaho ɔai zabmazhi latu n pece, ɔai ye ɔa duya to ɔa min. Sai ɔa gun kpe n nyakun she. ɔa kma nyakunya ɔa shin wo be cei aba Yesu bei gni nyi.

²⁰She Yesu ɔo gye ɔa gaiciya ga wa cige, “Emi nugundo aku gafara zhin ho.”

²¹A farisiyawa yi ɔa kuka zhi n minagyi yi ɔa cige, “Zeye gye ge wo zhin nyikado na? Ai deye zhin laifi dnagmayi nu. Zaho-zahoyi ta mi wa zhin za gafara m, sai Shekwoyi gmanyi.”

²²Yesu ɔo ku kpe anya 'ɔa zhin nubo ncei. Wa nyaɔa ge, “Kni nu na zhin koi ze laifi dnagmay a?”

²³⁻²⁴ Omi, oza tnu-tnu yi (Kristi) mi ikoi lo ma zhin aza gafara n anyi ye. Amma ntuge ma wu fye ge mida gaiciyanu mi ka nyasai ye gna.” Nsayi wa gna zabmazhi yi ge, “Ku ha pece ha lo api gama hola lafiya bwa.”

²⁵Nsai-sayi kwa zaho-zahoi gni woi gye zabmazhi 'gye a gnana wa ku a pece wa lo api woi ci Shekwoyi.

²⁶Zaho-zahoyi n wo 6o gni 6o wa ce ndna woyi, sai 6a ci Shekwoyi 6ai cige, "Yi ku abo wowoyi gye n naiye."

²⁷Sanu n Yesu bei fa zhi yi, wa gye gadu goyi sasetu woi gwo gadu, (a gadu goyi 6o zhin aza gyifi yi zanu.) Ai yi wo ge Lawi. Yesu wa ciwo ge, "Be ha ze mi bara."

²⁸Nsai-sayi, Lawi wa lakala wa fa nyaho-nyahoi wa vi Yesu.

²⁹Sai Lawi wa yi aza nyagyi-gyi n wo puwa. Wo bei yi ko ntuge wa wu Yesu owo agmada nu. Lawi bei la owo anugnudo yi n na zai mwabegye njesun.

Akpezhinyi Bai Ce A wyi

³⁰Amma A Farisiyi 6a gyi minagyi sosai. Ba nya owo abara 6o, nya kwo zhin wo gyi nyagyi n laifi da yi lonu.

³¹Yesu wa ciba ge "ai oza n wo n nyasai owo nu zan shigbeda zanyi, to ge oza n wo lafiya yi m.

³²Emi be mwi nu ge ma yi alaifida, 6a fa '6a laifi, amma toge ma bma aza zhin n6a ta kpe lo ge 6a zhin alaifida nu m."

³³Afarisiyi 6a je 6o nya, nya kwo zhin Yesu abara 6ai gyi nyagyi maimakon 6a zhin azumi. "Ba cige Ai Yohanna abara ta gyi nyagyi lo m. Ba ce 6ai zhin aduwa nu kawai. Amma kni nu zhin oho abarai ce 6ai dagma nu'a?"

³⁴Yesu wa nya 6a ge. "Oza nwo dagma wo zhin wa zhin azumi? Aza n6a zhin amula '6a nugundo 6a zhin 6a zhin ntna nyagyi?"

³⁵Amma osa 6elo n na bei wu mula 6a n sayi nu n 6a to bei gyi nyagyi m."

³⁶Nsai Yesu wa zhin misali ge, "Ata zhin a la eje woi-woyi a ci eje ko-kwoi n cei m, gama eje kwo-kwoyi ta mi n woi-woi shi m. Kwo ta da wye-gyen ma.

³⁷Njesun ata zhin a fi oje woi-woyi n apa kwo-kwoyi m, gama oje woi-woyi 6a sa apa kwo-kwoyi ya har kwa zeya zhi la6a.

³⁸Ko zhin dole nu a fi je woi-woi n apa woi-woi ce.

³⁹Amma eza to lo m n wo ku oje kwo-kwoyi sin, n wo cei pma wa je woi-woyi si m. Ba zhin 6a cige, 'Zokwo kwo-kwoyi gna bmiya.'

Luka 6

Yesu Wa Kni Owo Abmazhinyi Wa Wu Ba Nya

¹Nwiyihoi n Satiwiyi, sanu Yesu n wo abara yi bei duya n awyizhin, 6a bma awyi tukwo 6ai wuya 6ai gyi.

- ²Amma A Farisiyi ho ƙa cige, “deye kwoto wulo dai-dai m. Ai oho abara lo bai do wyi nu. Ko to bmiya lo a zhin lonu n Satiwiyi m.” (Wato oba sun-sun wyi nu.)
- ³Yesu wa ci ƙa ge, “Fye to shin ba n litafi nya n Dawuda ƙo zhin ƙedo n wa zai, sanu miknu ƙo gun ƙa nyi ko?”
- ⁴Dawuda ƙo lo dna n tent, wa la breƙi nkwo bei tu n Shekwoyi abye nyi wa gyi kwo. Ƙedo n wa’azai. Ai deye tobo bmiyan ko?”
- ⁵Yesu wa je ƙa gna ge, “Omi nu zhin Satiwiyi ye Dagayi.”
- ⁶Njesun n Satiwiyi dohoi Yesu dna n ƙa aduwa nyakun woi wu ƙa nya. Oza ho wa ƙe dna ƙo ce n bwai sha-shayi.
- ⁷A farisiyi ƙedo na malami ƙa shiwa wye zun ƙa gye kwo wo ƙa ka zayi gna n wyihi. Gama ƙa bei ce pma ƙa bwa nyaho nwo tukwo.
- ⁸Amma Yesu ƙo kpe oba bugba ye sarai. Wa ci nyasan yi ge “ƙe ha gni ya, zahozahoyi wa gye ho.”
- ⁹Nsai Yesu wa ci a Farisiyi ƙedo n na malami ge, “Mi ce pma ma nya fye ƙoho. Ko bmiya lo oza zhin ƙo manayi n Satiwiyi, kwo kwa ƙo nukwoyi? Ko bmiya lo a gni oza wyewyeyi kwo kwa a wu kwo?”
- ¹⁰Wa shi ƙa wye laba wa ci za yi ge, “ta oho bwa ya.” She wo bei ze zhin lonu kwa wu dai-dai.
- ¹¹Sai a Farisiyi ƙa gyi minagyi sosai. Har bai ye ƙa wuwo.
- ¹²Nwiyihoi, Yesu wa lo epe sepa wa zhin aduwa har efye kwa gyi.
- ¹³N labmi-la bmi yi, Yesu wa yi owo aviyyi zhi, wakni owo abara nnabai ƙa knusun n woi.
- ¹⁴⁻¹⁶Oba ye nyi, Siman (a jewo yi ge Bitrus) Andrawus (woƙei zhin Siman zado nu) Yakubu, Yohanna, Filibus Barthamiw, Matta, Tomma, Yakubu (Alfeaus ƙi) Siman (wo ƙei dna n na za kampani nƙa gyi ‘Be nyi) Yahuda (Yakubu ƙi) ƙedo Yahuda Iskariot (owo nu ƙo kun Yesu).
- ¹⁷⁻¹⁸Sanu n ƙa bei shin ƙe n epe yi, ƙa ƙe sarari ho kwo shiko nyi ƙa bei ye kpe n pe nu, owo abara ƙe vivi n woi. Aza n mwa-begye ƙa shewo kna njesun. Gama aza ƙo la kun ƙe n nabai gbo-gbo. Ba kun n Urushelima, Tayor Sidom yi n na bai a ka ƙa gna. Wa kun alijenu ya n naza mwa njesun.
- ¹⁹Ezaho-zahoyi ye wa to wo bwa, gama sanu n ƙa towo bwa ƙa kagna.
- ²⁰Nsai wa gna owo abara ge, “Fye dagma nfyeto nyabwai yi m, gama Shekwoyi be mi zhin fye nyanu.
- ²¹Fye dagma of ye amikun da gama nubo ƙa fufye. Fye dagma ofye abwiciyi, gama osa ƙelo n fye bei masan sosai.

- 22**Fye dagma of ye n naza ta yefye yi m, bai kpe fya gye bai da abo nukwoyi dohodohoyi ntuge fye vi mi.
- 23**Fye dagma sosai gama fye bo bwa lada dnagmai n She mi. Ai babo zhin anabawa kwo-kwoyi n lo nu nu.
- 24**“Amma anyabwa yito n bugbafu yi io m, gama ba ku agmada pma bwa ya.
- 25**“Ba wye-wyeyi lo n saiye, amma miknu lo kwoi pmi ba na bye. Oba san ma bei la ze bwici.
- 26**Njesun bugbawu lo na 'zayi na ciba n saiye nyi, ntu ge azhin a ci anabi katai nlo nu-nu ci ci.
- 27**“Fye wo ofye viyan, fye ye nfya nuwuyi, fye zhin ba abo manayi.
- 28**Fye zhin aduwa ga aza nba ta ye fye m, nge Shekwoyi wo tu ba anabarka.
- 29**“Oza nu wa dnaho agnayi pmi, ha jowo bayi ga. Oza nu wa gwoho gbedo, ha gawo bace bedo.
- 30**Ga ezaho-zahoi enya n wa nyaho kwo bo. Sanu na gaho nyaho njesun, to ye ge ha jekwo gwo m.
- 31**Zhin aza bo she ho cei pma ba zhin ho ce.
- 32**“Fye gye ge kwo bmiya lo fya ye aza nba ba ka fye ye kawai? Kni lada yi nu nfye ba bwa? Ai a Shetan da zhin ba zhin lonu.
- 33**N fya ye aza nba ye fye ce mi gye be mana bo? Ai a Shetan da zhin ba zhin lo nu ce.
- 34**Nfya ga azanu gyiwye mwi kawai n ba bami ba gba fye ta, mi gye be mana o?
- 35**“Fye ye efya nuwun yi, fye zhin ba be manayi, fye gaba nyamwi to ha gni hoi gye ge ba ba je ho gba m. Nsayi nu n ho lada ba mwa n she mi, fye ba ze Shekwoyi abi, gama wo zhin aza nba ta zhin godiya m bemanayi njesun n azai n ba zhin aza nukwoyi.
- 36**“Zhin kokari ha wu aza yeye she oho dada eshe nya zhin wa wu nyi.
- 37**To gyi aza kutu-kutu m, ko kuwa ha da za bo nukwoyi m. Gama ko bei bwa jeze kpe ho nu. Zhin aza bemanaba bahin ba zhin ho ce.
- 38**Gama n ha ga, hoba bwa. Ho ba bwa lada n mwa oho mudu ba nu har koi knaya. Mudu n ha mwi n cei a bei ka ho mwi n koi nu.”
- 39**Yesu wa ga ba a misali ye, “Wyebuayi ta mi wa bma wyebuayi do zhi m, tile ba kaya fi nbwo n gnisun.
- 40**Eza ba kpe nya ye ndu wo malami? Amma wo ba mi wa tumwi har wa ze ngye owo male ce.

⁴¹“Kni nu zhin hoi la damu ntu obyasukwo ɓo n kwo dna lo n ho 'zado wye nyi, hoi gnilo n shiwan knunu yi dna n ho nya?”

⁴²“Ho ɓa mi nwuna ha gna ho zado emi zado fa ma gmi ho byasukwo ya nho wye, to hoi mi ho gye shinwan-knunu nkwo dna nho wye nyi ma? Zakwoednai, la Shinwan knunu gmiya nho wye kpa, ha mi ha gye wyeba sarai, ha gmi ho zado byasukwo ya nwo wye.

⁴³“Shinwa manayi ta mi kwa ga ampanyi nukwoyi m. Shinwa nukwoyi kwa ta mi kwa ga ampanyi manayi m.

⁴⁴Azhin a kpe shinwa i manayi ye nkwo gyi-gyi nu. Ata taba a gye shinwa manayi n gyikpe n aknawuyi m.

⁴⁵Oza manayi zhin wa zhin aɓo manayi. Aɓo manayi zhin ɓa knu n wo bugba nu. Oza nukwoyi kwa wa zhin aɓo nukwoyi. 'Ba kun n wo bugba nu ce. Nya kwo dna bugba a zhin a gye kwo nɓeda.

⁴⁶“To, kni nu zhin fyei yi mi ge, 'Shekwoyi' to fyei vi mi beye ma?”

⁴⁷⁻⁴⁸ Oza ho-zahoi nwa ɓe maba wa wo mi ɓeda har wa zhin kwo, wo wu ngye oza nu n wo mi nyakun tu napma. Sanu nase ci ncei, kwo ta shashan gama kwo mi gni lo sosai.

⁴⁹“Amma aza nɓa wo mi to ɓai zhin biyaya m, ɓa wu ngye aza nu n wo mi nyaknu ntna fandeshe manayi. Sanu n ase a ci n cei kwo zhin kwa miya butuu.”

Luka 7

Aɓo Wowoyi Ngun Aba

¹Sanu Yesu ɓei ku wa'azi zo zhin wa jeze lo Kafarnahum.

²Nsayi kwa soja bara ho dna nyasan yi sanwo, har ngye wo ɓa fi. Soja yi ɓo zhin kaptin nu.

³Sanu kaptin yi ɓei wo Yesu ɓo wa tnu a Yahudiyi atukwoda ge a yi Yesu ɓe cei.

⁴Balo ɓa gyi wye ge Yesu wo ɓe wa bma zhin. Gama Kaptin yi ɓo zhin za manayi nu. 'Ba cige, Ngye oza lo woiye bmazhin, to zeye dudu lo.

⁵Gama wo ye a Yahudiyi sosai. Har ma wola aduwa nyakun mi yi.

⁶⁻⁸ Sai Yesu wa lo n ɓai, amma kafin ɓa si puwa yi, Kaptin yi wa je aza tnu ge woto ɓe mi puwa m, gama mito kun ce lo m. Da ɓo kurum emi 'ɓi kwa wo a kagna. Mi kpelo ntuge mi zhin za nu n wo dna na za sinta. Amma aza filo n mi sin-ta ce. N ma cige, lo sai ɓa lo. N ma cige ɓe, sai ɓa ɓe. N maci ema bara ge zhin deye, sai Ba zhin. Ntu cenu, daɓo kurum omi fyenu ɓa kagna.

- ⁹Yesu ƙo ku mamaki zhin. Wa cige mi to shin zagye n Israila mi n gaiciya ga ye pya yi m.
- ¹⁰Sanu Kaptin anugundo yi bei jeze ƙa gye fyenu yi la kagna.
- ¹¹Esa fyewyi Yesu n wo abara yi alo Nain. Aza ƙa vi wo n mwa sosai.
- ¹²Basi ezhi yi ai lo nzai o bi. Eƙi n wo bei fi nyi kwa owo ya tobo ndohoi shan sun m. Aza viwo n mwa ƙai cibwi.
- ¹³Sanu n Yesu bei gye wo, wa wo wo sun-sun, wa ci wo ge, “to zhin bwi ci m.”
- ¹⁴Nsaiyi wa lo wa to zafi bwa, azafi layi ƙa ku kpe zhi. Yesu wa cige, “samari, wye-wyeyi ko jezebƙe da ho.”
- ¹⁵Eƙi yi wa laka sase woi dabo n nazai n ƙa bei zhin ƙo nyi. Yesu kwa wa ga owo ya wo.
- ¹⁶Odna wo aza sosai. Har ƙa cige, “Anabi dnagmayi la e ya ba.” Yi ku Shekwoyi iko gye n naiye.
- ¹⁷Nabari yi kwa busi laƙa n Yahudiya har koi lo aknido.

Yesu N Yohanna Yi

- ¹⁸Yohanna abara kwa ƙaku aboye wo vinya n Yesu bei zhin nyi sanu n ƙa ƙo gna Yohanna aboye.
- ¹⁹Yohanna wa tnu aza ngun aba nge ƙa lo ƙa nya Yesu ge, “Oho nu zhin Masihu (Kristi) kwo kwa yi tu awye na bye a?”
- ²⁰⁻²² Aza yi bei lo ƙa gye Yesu gni wo ka anyasan gna. Aza bmazhi, awyebua yi, woi knu alijenu ya njesun. Sanu n ƙa bei nya Yesu bo, wa ciba ge, “Fye lo fye gna Yohanna ’ƙo fye ku wo, fyei ku gye n naiye. Azabmazhi zan-zan lo daidai. Awyebuayi gye wyeba. A Kuturu da ƙai kagna sarai, atnubua-gunayi wo beda lo sarai. A zafi la jeze ƙe. Aza nƙa to nyabwai kwa ƙaku nabari manayi wo.
- ²³Fya ciwo ge anabarka tulo nza n woto fa mi gaiciya ga ƙo m.”
- ²⁴Sanu n ƙa bei la kukala Yesu wa dabo n Yohanna tukwo ge, “Fye bei lo fye gye nyikado nu n Yahudiya zhabui’a? Agbe-gbe n ose ci kwoi pmi ƙa laƙa?”
- ²⁵Fye bei gye wo n naje manayi kpe aje anakoi? Awo! Ai aza n ƙa dagma ƙa fi nsu puwa nu to ge n zhabui m.
- ²⁶Amma fye bei gye anabi nu? I oza ndu anabi kwa.
- ²⁷Littafi dwo nu ƙo sanu n kwa cige, ‘Miƙa tnu emi barayi n ma bye n nabai wa zhin zokwo gami.’
- ²⁸Shi anyi shi, zaho-zahoi to lo n du Yohanna m. Amma kwo oza n wo zhin Kmakanyi n ’she mi wo du Yohanna lo.”

²⁹Aza n babei wo Yohanna wa'azi kwa ba ku ye ge Shekwoyi beda bmiya lo. A ku ba zhin baptisma vinya.

³⁰Aza n ba bei ce kurum banu bei zhin a Farisiyi n amalami. Bato bei ye Shekwoyi zokwo m. Cenu bei zhin toba ye Yohanna wa'azi m.

³¹"Mi ba da gena n azaye pya tukwo'a? Mi ba mwi bado n kni ya?"

³²"Ba wu lo ngye abi nu kawai n ci aje ge 'Ho ta ye amula wyefan lo m, ho ta ye azafi wyefan lo m.'

³³Gama Yohanna to bei zhin woi gyi nyagyi m. To woi sin ejem, amma fya ci ge 'Ai wola cencya.'

³⁴Amma ma be mi gyi nyagyi mi sin nya sisin. Fyei cige Wai zeye milo gyi, woi milo n sin, woi n na nugundo kasayi lo.

³⁵Amma fye kpe ge nya fye danyi, koto lo-lo m."

Nyagyi Gyi Ho Pya

³⁶Farisiyi ho wa yi Yesu ge, wo be wa gyi nyagyi n wo puwa. Yesu kwa to wa nabo m. Sanu n ba bei sase bai gyi nyagyi.

³⁷Nyikwozaho karuwa wawo ge Yesu dna lo bo. Wa be n nyiknu dnagmayi shi n turare nufi.

³⁸She wo bei lo dna n nyakun, wa ce ako-ko shi n Yesu aba woi cibwi. Owo awyenyi kayakpe n Yesu apita. Wa wun ya n wo tukwoyi. Wa zhin Yesu apita sunba wa ze turare ya kpe ba.

³⁹Sanu n Farisiyi yi n wa yi Yesu nyi, bei gye lo nu. Wa gye karuwa n wo shi-shi lo nyi wa ci fi n wo bugba ge, "deye kwa wu pei-peige Yesu to zhin anabi nu m. Gama agnage Shekwoyi na tnuwo, wo kpe nyikwoza za ye pya ye n wo shi."

⁴⁰Nsayi Yesu wa dnawo tunani be gbe ge, "Siman mi ei pma ma gna ho boho."

⁴¹"Oza bo nyi woi ga aza ta. Wa ga zaknayi ₦3,332. Waga zabayi ₦332.

⁴²Amma aza ngun abayi to bai mi ba gba nyada owo agyiwyeye m. Ntuce nu waku gafara zhin ba. Ho gye lo ngye. Nyikanu bei gna agmada n ba mi'a?"

⁴³Siman wa cige, "Mi gye lo ngye zayi nu n wo bei ce shi ₦3,332 nyi." Yesu wa ciwo ge, "Ho kuda dai-dai."

⁴⁴Nsayi Yesu wa ci Siman ge, "Ho ku gye nyikoye n wo shin nyi, sanu ma, lodna n ho puwa ho to gami nuwan ge mi zhan apita m, amma wo la ba zhanya n wo awyenyi, har woi la ba wuya n wo tukwoyi.

⁴⁵Ho to zhimi sunba m. Amma woku sunba zhin ma pita i tunyi sanu ma lobe nyi.

- ⁴⁶Ho to gami omi shin-shin yi m, amma wola turare nakwoyi zekpe ma pita.
- ⁴⁷Ntuce nu owo alaifi nba mwa lo nyi, aku gafara zhin wo, gama wo ye milo n mwa. Amma oza nazhiwo gafara fyewyi owo yeye kwasun fyewyi nu ce.”
- ⁴⁸Nsayi Yesu wa ci nyikwoyi ge, “Aku gafara zhin ho.”
- ⁴⁹Aza nba bei kpe bai gyi nyagyi n woi nyi ba ci ge, “Zeye gye ge wozhin nyikado nu woi zhin aza gafara laba?”
- ⁵⁰Amma Yesu wa ci nyikwoyi ge, “Oho gaiciya ga la ho gni, lo n lafiya yi.”

Luka 8

Nyabyei Nabari

- ¹Esa to bei shan mwan Yesu wa laba n Galili a zhi woi gna ba Shekwoyi bemi bebe bo. Wo bei gni sun n wo abarai awo cei ba.
- ²Anyikwoza ho bei nyi ce n wobei knu alijenuya n ba kwo kwa n wo bei ka ba gna nyi Maryamu Magadaliya bo nyi (Yesu bo la alijenu knaya nwo ngu tnaba)
- ³Yuwannan Chuza nyikwo bo nyi ce (Chuza bei zhin Hiridus manaja nu woi dna esu puwa wye.) Susana bei nyi n nazai mwa nba bo zhin bai ga Yesu nyaho ntuge kwa bma wo zhin (ngye a gyiwye.)
- ⁴Nwiyihoi Yesu wa ga aza misali ye n ba bei cei pma ba wo owo beda nyi.
- ⁵Ozaho bei nyi wa lo ofwa ntuge wo bye anya. Sanu n wo bei lo adoho ba kaya zhi n zokwo, akpe ba pita, alu ba Ba ku ba gyi.
- ⁶A doho ba kaya zhi n kni ho amma ekni yi bo na kutayi. Sanu nkwo bei la pa kwa ku fi gama ekni to bei nyi daidai m.
- ⁷Adoho ba kayafi n a knawuyi, sanu n ba bei pa aknawuyi ba ba gyice.
- ⁸Amma adoho ba kayazhin n kni manayi. Nyabye ye bo pa kwa zhin ampanyi sosai. (Sanu nwo bei da misali ye wa cige), “Oza n wo n tnbua’i lo, to sai wa wo.”
- ⁹Owo abara ba nya wo misali yi awyega bo.
- ¹⁰Wa cige, “Shekwoyi la ga fye n tuge fya kpe kwo awyega ye, gama ba zhin ba wu nya n mwa n Shekwoyi ebe mi tukwo. Amma azeye n ba zhi n mwa nyi bawo lo, amma bata gane lo m, ngye shi anabi sapai nya bei da nyi.
- ¹¹“Okwo awyega nu nyi. Nyabye yi kwo nu zhin Shekwoyi beda n aza ba.
- ¹²Zokwo yi n nyabye ho bei kaya zhin nyi abugba kalada nu. Sanu ba wo Shekwoyi beda Shetan zhin wa be wa kukoya to wa ye ge ba ga gaiciya m.

¹³Ekni akuta nya wu ngye aza nu, n ba wo Shekwoyi beda amma ko ta bwa amizhi ba m. Ba kpelo ge bedayi zhin gaiciya nu har ba zhin ngye ba ga gaiciya sa fyewyi. Amma sanu n wahala be, sai ba ta Shekwoyi zokwo ya.

¹⁴“Ado n ba kayafi n aknawuyi nyi, ko wu ngye aza nu nba wo har baku gaiciya ga. Amma n navun anyi’a wyeda zhin kwa ba gna-gna. Ntuce nu ba ta mi ba bma zado zhin ntuge wa vi nabari manayi m.

¹⁵Amma ekni manayi wu ngye aza abugba manayi da nu. Ba zhin ba wo Shekwoyi beda ba nyimako sosai har ba lo azado ncei, ntuge ba ka gaiciya ga ce.”

¹⁶“Dna n saho Yesu wa nya ge) Nyikado shin za gye n wo dna fitila na wa kwo dna n Shakun’a? Ai a zhin a tu fitila n aba kwo ba ga buzangna nu. Ata zhin a sokwo dna m.

¹⁷Deye kwa wuge nwyihoi afo kpe zaho-zahoi asiri ya a bei kun kwo wu nbmi sarai.

¹⁸“Ntucenu fye zhin peceiye shi fye wolo, gama oza n wo cei lo, aba gawo. Amma oza nwo to cei lo m, ko odo n wo gye ge wo cei lo nyi ma, abei la kwo gwo wo.”

¹⁹Nwyihoi, sanu n Yesu ’ya bedo n wa mado yi bei be ntuge ba gye wo, to ba mi ba lofi nu aba n wo bei dna nyi m, ntuge aza bo zhi n mwa.

²⁰Sanu wo bei wo ge ba zhin lo n bmi, nge ba cei pma ba gye wo.

²¹Wa cige, “Aza n ba wo Shekwoyi beda bai zhin ko njesun, obanu zhin ’miya n mi amado yi, njesun.”

Nuwan N Esei 'Ba Vi Yesu 'Beda

²²Nwyihoi n jesun Sanu Yesu n wa barai bo fi n oya, wa gna ba ge ba piya ntuge ba lo okma deyi.

²³Sanu n ba bei lo wa yashi ntuge wa wan egye kafin ba si. Sanu n wo bei wan gye ase’a ci har ba ku lo wahala sosai, gama ko bo ce fyewyi oya kwa cekun.

²⁴Balo n pye ba kun Yesu agyewyi ya, ba cige “Dagayi! Dagayi, ai yi ye ya bwi nuwan nu.” Nsayi wa dabo n ese yi wa cige, Ese lafa cibo lonu. Nsayi-sayi kwa fa.

²⁵Nsayi wa ci wa bara ge, “Migye fye gaiciya? Ce’a wo ba sosai har ba cige, Nyikado nu zeye yi har ese koi wo owo beda?”

²⁶Ba ku si ekma deyi. Gadarin kni nu bei nkoi, ai la pi Galili nuwan ya.

²⁷Sanu Yesu bo gmibe n oya ozaho n alijenu bei la dami woi wa be Yesu aba. Wo to bei njei kpe m. Avingwo nu bei zhin wo puwa.

28Sanu wo bei gye Yesu, wa bewyi nmwa, wa miyazhi n kni wa cige, “Ho ye ma zhin kni nu, Yesu Shekwoyi nugun duduyi? Suku-suku, to ga mi wahala m.”

29Gama Yesu bei ku gna alijenu yi nge ba kun ya nwo. Alijenu yi bo ku nuwo sosai. Har ma wo bei zhin wa agma gbeya, a ye a pawo n cei wa lo zhabui dna n ba iko.

30Yesu wa nya alijenu yi ge, “A yi ho gena?” Ba ci ge, “Begye da” gama ba bei mwa begye. Ba bei fi n wo nlo dubu har ma n duya.

31Alijenu yi bei zhin bai ba Yesu nabai to wayaba fi n bwokun nyalo-nyalo nya m.

32A burutu ho bei laba bai gyi anyagyi bo, Alijenu yi ba nya Yesu ntuge ba lofi n na burutu yi. Yesu wa ciba ge ba lofi.

33Nsayi ba fa 'zayi ba lofi na burutu yi. Aburutu yi kwa ba busi lo epe sepa ba kaya fi n 'la.

34Aburutu knayi kwa ba busi lo ezhi ho bai da nabari nya wo ku zhin.

35Safyewyi aza yezhi ntuge ba gye nya kwa zhin, ba gye zayi, na kun alijenu ya nwo nyi n sasetu n ajei kpe ndna n wohin hankali. Odna wo aza n mwa.

36Aza n ba bei zhi bo, sanu Yesu bei kun alijenu ya nyi, ba ka za gna shi kwo bei zhin n wu.

37Oba vinya nsayi ba ba Yesu, nge wo fa oba yi wa lo wo nya, gama odna o ku ba wo n mwa. Yesu kwa wa lo dna n oya wa piya lo ekma deyi njesun.

38Oza n Yesu bei kun alijenu ya n wo nyi kwa wa be ntuge wagnilo n iYesu yi. Amma Yesu wa ciwo ge awo.

39Yesu wa ciwo ge, “Jezelo oho puwa ho gnaba abe wo-woyi n Shekwoyi ku zhin ho nyi.” Ntuce nu wa laba n zhimi woi da Yesu iko bo.

Zafi wa je wye-wyeyi bwa

40N ekma deyi kwa aza gwo Yesu n agmadai, gama ba bo zhi bai pmi wo nu.

41Nsahi ozaho ai yiwo ge Yayirus, aduwa nyakun tukwoda, wabe Yesu aba woi ba wo ge, wo gni api be n woi.

42Gama owo 'bi gmanyi nyikwoza zyeyi

12 bei shi woi fi. Yesu wa du azaya laba, wo kun lo n Yayirus yi.

43-44 Sanu n ba bei lo nyikwoza ho n wo bei ye a kawo gna, wa be wa to Yesu bwa. Gama owo aye

¹² nu woi kpe ami, amma wo to bei bwa kagna ko shiko nyi agyiwyē bei ku wo zo, nge wo si ashigbe. Amma sanu n wo bei to Yesu je bwa ami yi ba zan wo, n sayi-sayi.

⁴⁵ Yesu wa cige, “Nyikado nu a tomi bwa? To wa bwa za m. Bitrus wa ciwo ge, Dagayi ai aza Shekna ho lo n mwa.

⁴⁶ “Amma Yesu wa ciwo ge, a’ a oza n wa tomi bwa nyi, wa zhin kwo woi kpe nu, gama kagna iko la gmiya n mi.”

⁴⁷ Sanu nyikwozayi bei gye bo la kunzhi lonu, wa be Yesu aba woi vin wa ce akwo-kwo shi, wa da shi kwa zhin nwu, har wa bwa kagna.

⁴⁸ Yesu wa ciwo ge, “Omi bi oho gaiciyaga la ho kagna, loho nya n laifiyai.”

⁴⁹ Sanu Yesu boye gni woi dabo n nyikwoyi a be wo n nabari ge Yayirus ’bi lafi. Ntucenu Yesu to shan damu nge wa be m.

⁵⁰ Amma sanu Yesu bei wo lonu wa ci Yayirus ge, “To damu, Gami gaiciya kurum. Nyaho ta zhin wo m.”

⁵¹ Sanu ba bei si owo puwa, to Yesu wa ye ge zaho-zahoi wa lo dna n nyakun, sai dai Bitrus n Yakubu yi n Yohanna yi, njesun n Yayirus yi be do n wo nyikwo yi.

⁵² Aza bo fi n mwa bai cibwi. Yesu wa ci ba ge, “Fye to zhin bwi ci m, ai wo to fi m, wo wan gye nu kurum.”

⁵³ Amma aza ba mawo san, gama ba bo kpe ge wola fi.

⁵⁴ Nsayi wa la ebi yi nbwa wa ciwo ge, “binyikwoyi lakala.”

⁵⁵ Nsayi-sayi wye-wyeyi kwa jezebe dawo. Wa lakala. Yesu wa gna ba ge fye gawo nyagyi wa gyi.

⁵⁶ Ada owo dada n wo yayi sosai. Amma Yesu wa gnaba ge bato gna zaho-zahoi m. Shi kwa zhin n wu m.

Luka 9

¹ Nwyihoi Yesu wa yi owo abara zhi nnaba gmanyi, wa ga ba iko tu alijenu tukwo, ba kun ba ya ba ka nyasan doho-dohoi gna.

² Wa tnu ba ba lo ntu ge ba zhin Shekwoyi ebemi wazi bai ka anyasan yi gna.

³ Wa gna ba ge ba to la busi, ko pwakun, ko nyagyi, ko agyiwyē ko aje ngun aba m.

⁴ Puwa nfya lo fya ku bwa fi bo nu har fya fa ezhi-hi.

⁵ Aba nfya lo to a gwo fye m, fya fa ezhi-hi, fya abutuku luya zhi ba nfye apita.

⁶ Abara ba lo bai zhin wazi n na zhibga laba, bai ka aza gna.

Ca Wo Hirudis Nnazajei

- ⁷Hirudis Sa-galili yi, wa wo abo nba bo zhin wa ku jeje, ntu ge azaho bei ci ge Yohanna batizma zhin-yi nu la laka n vingwo.
- ⁸Azaho ba gna iliya nu, azaho ge anabi kwo-kwoi ho nu la jezebe, ai da laba.
- ⁹Hirudus wa ci ge, “Ai nbei la Yohanna tukwo kpeya, nyikanu n zadeye yi nmi wo owo nabari nyi a?”
- ¹⁰Abara ba jezezhi ba wu Yesu lafiya abo nba ku zhin, wa ku ba ba lo Besaida.
- ¹¹Ama aza bei ku kpe aba nwa lo, ba vi wo lo: Wa gwo ba wa ya ba nya wu tu Shekwoyi ebemi tukwo, woi ka anyasan yi gna.
- ¹²Wyeshei la ya kwoi she, abara awo-cei-aba ba be ba gna wo ge, wo ku aza gnami ba lo bo zan nyagyi shin bedo nna gyewan ba yi nna kauye, “Ntu ge nyaho to lo n zhabui ye a gyi m.”
- ¹³Yesu wa gna ba ge “fye ga ba nyagyi;” Ba ci Yesu ge, “Ai yi to n nyahoi shi lo ndu bured; ngun-atnu nna bmiya yi ngun-aba m, ko ho ye ge yo si be cei nu ntu begye ye bo a?”
- ¹⁴Aza bei nyi ngye dubu ngun atnu nu (5,000), Yesu wa gna ge, “Fye gna aza ba ku sase zhi shitnu-shitnu (50–50).”
- ¹⁵Aza ku sase zhi lo nu.
- ¹⁶Yesu wa gwo buredi ngun-atnu hi bedo abmiya yi ngun-aba, wa kpe awye wu nshe wa zhin godiya; wa sa ko ya waga wo abara ba gna azayezhi.
- ¹⁷Aza vinya ba ku gyi aku ba kun, awyiwoyi nna bei yezhi ba ku nu acekun awo-cei-aba.
- ¹⁸Nwyihoi woi gni nwo gmanyi-i, nwo abara yi woi zhin aduwa. Wa be wa nya ba ge, “Aza gna ge mi zhin nyikado nu a?”
- ¹⁹Ba gna wo ge, “Yohanna batizma zhin yi ko Iliya, azaho ba gna ge, anabi kwo-kwoyi ho nu la laka n vingwo.”
- ²⁰Wa nya ba ge, “Fyehin ma fye gna ge mi zhin nyikado nu a?” Bitrus wa ciwo ge. “Ho nu zhin Masihu Shekwoyi nya.”
- ²¹Wa tu ba gbe ge ba to gna zaho-zaho yi m.
- ²²Wa ci ge, “Oza Nugun ba sin wahala nmwa, a Yahudiyi atukwoda ba na wo abo, bedo amalami dnagmayi nna awa yekpeyi, ba wu wo, nyipyeyi tahi wo bei je wye-wyeyi bwa.”
- ²³Wa je ba gna ge, “Oza nwo ba vi mi, tile wa na wohin tukwo bo wa la wohin zundu fyegyi-fyegyi wa vi mi.

²⁴Oza nwa bwi wohin wye-wyeyi ntu mi bo, wo ba bwa ko, ama oza nwo ye wa shi kwo, kwo ba wo bwi.

²⁵Mi gye gyiba nza ba bwa, ndei oza ku anyi nya bwa vinya ama ntna wohin wye-wyeyi?

²⁶“Omi Masihu, sa ma be cei dna nmimwa-mwa nmi Dada mwa-mwa yi nmi amalaika gyi-gyi-yi, nbei wo aza vinyikwo nba wo mi beda vinyikwo lo nsayi ye nyi.

²⁷Ma gna fye gaiciya, aza zhi lo ya nfyee mi nba ta fim, sai ba ku gye Shekwoyi ebe.”

Yesu Dna Nwo Mwa-mwa

²⁸Anyipyei nyimwa-nyimwa avun wa la Bitrus n Yakubu yi bedo n Yohanna yi, wa gun lo ope nba ba zhin aduwa.

²⁹Shi wo bei tu woi zhin aduwa, ba gye owo awyeba bai bmiyana owo aje ba ku wu n bui-bui pau.

³⁰Safyewyi aza ngun aba ba be bai dabo nwoi, Musa n Iliya yi.

³¹Ba bei n mwa-mwa eshe nyai kpe, ba bei dabo ntu owo fi bo nu nkwo ba zhin Urushelima nyi, shi Shekwoyi wa zhin shiri.

³²Ogye bei zhin Bitrus bedo n nazajei, ba bei kun agyewyi ba gye Yesu tu n buzangna yi n mwa-mwai, n nazayi zhi nwoi ngun-aba.

³³Musa n Iliya yi bai ye ba kuka, Bitrus wa ku je-je to wa kpe beye nwo dam, wa ci ge, “Shekwomwasa ko ba bmiya ya kpe alubui zhi ya ngun-ata, gmanyi ntu ho bo, gmanyi ntu Musa bo, gmanyi ntu Iliya bo.”

³⁴To woi zun beda yam, onyi kwa shin zhin kwa pwi ba, ba wo odna shi ba bei lo fi n onyih.

³⁵Begye kwa gmi n onyih ge, “Omi Nugun nu nyi, omi za kni-kni-yi fye wo wo.”

³⁶Shi begye bei ku bo zo a, ba gye Yesu nu bwa cetu bedo nba. To ba gna zahozaho yim har esa kwa.

Yesu Wa Ka Obi Gna

³⁷Ofye kwa gyi woi la kashi npe, azayezhi ba be Yesu aba.

³⁸Ozadoho dna azayezhi wa ta begye n kalai wa gna, “Male, obi ye nu bwa mi nugun zhin gmanyi,

³⁹alijenu yi gni bai wan wo, bai zhin wo woi fi aku, bai she wo ya bai gna wo gna-gna har woi pui afugya ngbe, kwo zhin kwa zun wo kni kwa fa wo ya zhi.

- ⁴⁰Mi-i gyi ho abara wye ge ba kun alijenu ya, to bai mi m.”
- ⁴¹Yesu wa ci ba ge, “O aza tna gaiciya ga yi, nba sun esa nwuna nu nfyeyi a? Fye be woi ya.”
- ⁴²Shi obi hi bei be, alijanu ba la wo ba zun wo nkni via, ba ga wo wahala. Ama Yesu wa gna alijenu ge ba kun nwo, wa ka bihi gna wa la wo wa wo ga wo dada.
- ⁴³Ca wo aza ntu Shekwoyi iko bo. Bai ye bwa zhi cei wo ba, Yesu wa gna wo abara ge.
- ⁴⁴Fye wo bo nmi ye ma da nyi, fya pa kwo bo. A ye lo a ga oza Nugun nnaza akun.
- ⁴⁵Ama to ba kpe beye nwo dam, ntu ge a bei la kwo so shi ba odna ku ba wo to zaho-zaho wa nya wo bo m.
- ⁴⁶Abona laka dna nwo abara atan-tasin, kwo nyikanu nba mi bei zhin zadnagmayi vinya nba mi a?
- ⁴⁷Yesu wa ku kpe beye nba da, wa yi bi nawyi ho be cei nwo aba.
- ⁴⁸Wa gna ba ge, oza nwa gwo obi nawyi ye dna nmi eye, wo gwo mi nu, oza nwa gwo mi, wo gwo oza nu nwa tun mi nyi. Oza nwo zhin oza nawyi owo nu ba zhin oza dnagmai.
- ⁴⁹Owo bara Yohanna wa ci ge, Dagayi ya gye zaho woi kun alijenu ya dna nho eye, yi-i gna wo ge wo la fa, ntu ge wo to dna lo n yi nu m.
- ⁵⁰Yesu wa ci wo ge, To fye-e zhin lo nu m; ntu ge oza nwo ta zhin gaba nfyeyi m, wo zhin fye nya nu.
- ⁵¹Shi esa bei la wu vi-vi nwo ba jeze lo eshe, wa bugba shi wa lo Urushelima.
- ⁵²Wa tnu aza ba lo a Samariyayi kauye, ntu ge a ga wo aba wa zhin anya shiri.
- ⁵³To aza n kauye yi ba gwo ba m, ntu ge ba bei n nawyeyi wu n Urushelima.
- ⁵⁴Shi Yakubu n Yohanna yi bei gye lo nu, ba nya Yesu ge “Ho ba ye ya gna atnu n nai nshe kwa gyi ba?”
- ⁵⁵Ama Yesu wa gnakni ba,
- ⁵⁶ba lo kauye do.
- ⁵⁷Bai lo nzan yi, zaho wa gna Yesu ge, nba vi ho abaho-bahoi n ha lo.
- ⁵⁸Yesu wa gna wo ge, “Acamcam n nabwo yi lo bai fi, alu nba ama yi lo, amma omi Masihu mi to n napi yi lo n anyi yem.”
- ⁵⁹Nsadohoyi wa yi zaho ge wa ze wo bara, wa ye amma wa gna ge sai owo dada la fi kpa.

⁶⁰Yesu wa gna wo ge, “Fwa aza afifi yi ba bi aje. Amma oho tnu-tnu ha be ha lo ho da Shekwoyi ebemi nabari.”

⁶¹Zadoho wa gna wo la ye, amma Dagayi wo fwa wo gna aza ami nwo puwa kpa.

⁶²Yesu wa gna ba ge, “Oza nwa fwa aza ba pmi wo ya ntnu-tnu nmi cei zhin shiri ntu wo bo nyi, wo to kunce lo n Shekwoyi ebemi yim.”

Luka 10

Yesu Wa Tnu Nwo Abara Yi

¹Dagayi wa kni owo aviya shi tnaba wa tnu ba, ba lo azhi vinya n wo bei n shiri zhin ntu ge walo n wohin.

²Wa gna ba ge, fye gyiwe n Dagayi aba, ntu ge wa tnu n a tnu-tnuyi a awyido ba ba bma fye zhin, wyido lo n mwa amma atnu-tnuyi kwasun lo fyewyi nu.

³Fye lo, fyei pa ge ma tnu fye ngye akni nu fi acamcam ata-tasin.

⁴Fye to ku agyiwyem ko pwakun ko abuada ngun aba m. Fye to wun osa ya n zokwo m.

⁵Osa fya lo puwa doho-doho yi n cei, fya ci gafara.

⁶Nba gwo fye, puwa yi ba bwa anabarika, amma nba to gwo fyem, anabarika yi ba jeze be da fye.

⁷Esa fya lo ezhi, fye to lo apuwa laba m, amma fyaku fi n puwa gmanyi, enya na gafye, fya gyi, fye to nya bo m. Fye to na bmazhin doho-doho yi bo m, ntuge tnu-tnuyi kunce a gba wo owo lada.

⁸⁻⁹ Ezhi nna gwo fye fya zhin abeye Fye gyi enya nna ga fye Fya ka anyasanyi gna, fyaci ba ge Shekwoyi ebemi wo lo vi-vi n fyei n sayi.

¹⁰Amma ndei ato gwo fye n ezhi yi mi, fya kun zhi n zokwo fya ci ge,

¹¹Yi lu ofye zhi abutukun ya zhi fye n ya pita, deye zhin saida nu fya pa ngye shi fye bei ku wu vivi n Shekwoyi ebe mi i.

¹²Har ma a Sodoma yi bo ku gnafye bmiya zhi n owada wyi, n ba nu bo zhin alaifi da nyi.

¹³Wahala lo koi pmi azhi ye wato Krasinu bedo n Baitsaida yi, ntu ge abo awo-woyi n ma zhin bo nyi, a gna azhin ba Sur nu bedo n Sida yi, aza nbo bei ba ku ye abui har ba kpe ajesakun, n tnuyi nba tukwo ntu bugba zhi-zhiyi bo.

¹⁴Kwo nu bo zhin Sur n Sida yi bo gwo ta-ta nawyi n wada wyi.

¹⁵Efye a Kafar'nafum yi, mba da kni nu tu nfyen tukwo a? Abo la fye tu fya lo eshe? Awo aba gba fye nu har anapi.

- ¹⁶Wa ci wo abara ge aza nba gwo fye ba gwo mi nu, aza nba na fye abo ba na mi nu abo. Aza nba na mi abo ba na Shekwoyi nu abo n wa tnu mi nyi.
- ¹⁷Osa nu abara shitnaba bei jeze zhi, ba wu wo lafiya n bugba buibui yi bai gna, “Har alijenu bai vi yi beda dna nho eye.”
- ¹⁸Yesu wa ci ba ge E, maku gye shetan woi kaya shinzhi nshe ngye shi ogma zhin kwa bmiya nyi.
- ¹⁹Mila iko ga fye tu anuwunyi tukwo, njesun fye ba zan-zan fi awa atan-tasin bedo anapisiyi fya kpe ba apita, nyaho ta zhin fyem.
- ²⁰Alijenu nba vi fye abeda nyi kwo to zhin nyaho nu m, ama obo kpakalayi okwo nu nyi ge aku efye aye ka fi nshe.
- ²¹Nsaiyi wa nu a agmada Zafun nya yi wa ci ge “Ma gode nhoi Shekwoyi dada, eshe nkni yi zhin ho nya nu. Ho ku aboye bwizhi abeyekpei azai nba kpe anyi ganyi. Amma hoi la ba guya gayi n yi n gaiciya ga n ho ngye abi nyi. O dada ma gode nhoi gama ho bei ye nlo nu nu.
- ²²Emi nu zhin Shekwoyi maimako n nyaho-nyahoi zaho to lo woi kpe nugun ye m, n zai n nugun la kni ge wa wu wo”.
- ²³Nsaiyi wa gna wa barage, “Fye zhin aza sa’a da nu ntuge fye ku abo ye gye vinya.
- ²⁴A anabi n asu yi n mwa, bei ye ba gye bai wo a nyagye n fye ku wo fye gye nyi.”

Samariyayiza Manayi Nabari

- ²⁵Nwyihoi malami dnagmayi ho wa be ntuge wamwi Yesu gye. Wa ci Yesu ge, “Malami oza ba zhin wuna wa pwo nyalo-nyalo’a?”
- ²⁶Yesu wa nya wo ge, “Musa owa da gena n kwo tukwo’a?”
- ²⁷Malami yi wa dna be gbe, “Wa cige, ye Shekwoyi eho Dagayi n ho bugbayi vinya, n ho wye-wyeyi vinya, nho akala yi vinya, nho bomwi vinya. Njesun ha ye ho ozado ngye shi ho ye hohin tukwo nyi.”
- ²⁸Yesu wacige, “Ho kuda dai-dai zhin abeye. Ho ba pwo.”
- ²⁹Malami yi wa ye ntuge wa gni wohin, Wa nya ge, “Nyikado nu zhin mi zado’a?”
- ³⁰Yesu wa gawo misali ye, “Zaho bei laka n Jerikwo woi lo Urushelima, avi ba wan wo n zokwo ba gwo wa je n agyiwyeyi yi, ba luwo har wa gafi.
- ³¹“Nsahi pirist ho wa duya, shi wo bei gye zahi, wa bmaya wa fa wo shi bo.
- ³²Zaho njesun n wo bmazhi n aduwa nyakun waduya wa fawo shi bo njesun.
- ³³“Amma shi Samariya yi za do ho bei gye wo, sun-sun’a wan wo.

³⁴Wa ce akwo-kwo shi n wo aba, wa zhanwo aciya, wa pa ba n bandeji yi. Nsayi wa lawo tu n jaki, har wa lo n woi n puwa ho, wa zhin wo nyasan.

³⁵N labmi yi wa ga puwa da agyiwyē, n nabai wa bma nyasai zhin. Wa ciwo ge n agyiwyē bo dutu mi bei gba ho mi la zhi.

³⁶“To n ho wyegye ma nyikanu zhin nyasan yi zado’a?”

³⁷Malami yi wa cige, “Oza n wa bma wo zhin nyi.” Nsayi Yesu wa ciwo ge, “lo ho zhin lonu.”

³⁸Ba be puwa ho aba n Marta bei dna nyi. Marta kwa wa ba gwo.

³⁹Maryamu, Marta mado wa lo wa sase shi n Yesu aba, woi kna Yesu beda tnubua.

⁴⁰Amma Marta lo wa zhin nyagyi. Shi wo bei gye kwo la gna wo gna-gna, wa be wa gna Yesu ge, “Dagayi, Hoto ku gye Maryamu shi woi gyi mifi to woi zhin yahom? Lawo kala ya wa be wa bma mi zhin.”

⁴¹Amma Yesu wa ciwo ge, “Marta hola damu n aboye tukwo vinya.

⁴²Onya lo gmanyi nu n kwo bmiya na damu n kwo bo. Maryamu la kwo kni, mi tago wo kwo ya m.”

Luka 11

Aduwa Zhin N Gyi-gyi-yi

¹Nwiyihoi sanu Yesu bei lo woi zhin aduwa. Owo abara ba be ba ciwo ge, “Wu yi shi yi ba zhin aduwa n wu shi Yohanna bei wu wo abara nyi.”

²Aduwa yi nyi n wo bei wu ba nyi. “Dada, ala ohoye tu ntuge kwo gyi-gyi yi lo. Ha tnu nho bemi safyewyi.

³Gayi nyagyi fyegyi-gyegyi.

⁴Ha zhin yi gafara gama yi ku zhin aza nba zhin yi laifi nyi. To ye ge ya lo jarabam.”

⁵⁻⁶Wa godiya wa wuba n misali ye ge, N ha lo oho nugundo puwa n sadu yi ntuge hoi gwo ezhe ho bei ciwo ge, “ai miku azhibeyi bwa n sai ye mi to nyahoi lo n mi a ga ba m.”

⁷Amma wa dna n nyakun mi wa cige, “Kai to kun mi agyewyi ya m. Ai mi la abagu, yi ku wagye vinya. Mi ta mi ma bma ho zhin m.”

⁸Amma ma gna ho gaiciya ko shi ko nyi wo ta be wa gaho ntuge ho zhin wo nugudo m, n ho to fa aba lu bo m, sai wa be ntuge ho la wo gyi ce.

- ⁹Kwo wu lonu n aduwa yi, Nya bo cici, ho ba bwa cici ce, zanyi cici, ho ba gye wye, lu aba aba guho ya.
- ¹⁰Zaho-zahoi n wa nyaɓo wo zhin wa bwa. Oza nwa zanyi wo zhin wa gye wye. Oza n wa lu aba azhin a guwo ya.
- ¹¹“Ofye adada, n fye abi nya fye breɗi bo fye zhin fya ga ba kuta? N wa nya wyesala bo, fye zhin fya ga ba awa?”
- ¹²“N wa nya ezhe bo, fye zhin fya gawo napisi? Awo.
- ¹³“Ngye alaifi da zhin ba ga oba bi enya nba ye, ai ofye Dada n wo tu she nyi ba zhin lo nu ce, har wa ga aza n ba vi wo nyi Zafun Gyi-gyi-yi.”
- ¹⁴Nwiyihoi Yesu wa kun alijenu ya n zaho n wo to bo mi n bedam, Har wa mi woi dabo, ce’a wo aza.
- ¹⁵Amma azaho ba cige, “Ai wo gwo wo ikwo n Shetam nu n wo zhin alijenu esu nyi.”
- ¹⁶Azaho ba nya ge ga tuze ho n she, nabai kwa wu ge wo zhin Kristi nu.
- ¹⁷Wo bei kpe zaho-zahoi bugba ye wa cige, Ebe n kwo sun kun n kwihin yi to, kwo ta migni m. Puwa njesun nkwo wu anya cici ko ta migni m.
- ¹⁸Ntucenu ngye bo fya da nyi kwo zhin gaiciya nu, ngye mi gwo ikwo n shetam nu, mi kun alijenu ya to, shetam puwa ba migni n wuna?
- ¹⁹Amma ngye shetam nu gami ikwo to ofye aviya ma gama ba zhin ba kun alijanu ya! Fye gye ge ba gwo iko n shetam nu kwo? Fye nyaɓa ngye fye da gaiciya nu.
- ²⁰Amma ngye mi kun alijenu ya n Shekwoyi ikwo yi nu, to kwa wu nu ge Shekwoyi ’be mi la be.
- ²¹Gama Shetam zakala da, wo zhin wa zhin owa ba gadi n wohin, nyaho ta to ba bwa m.
- ²²Saidai zaho’a be n du wo na kala, n dabarai du wo nya, wa sun kun n woi har wa gyi wo, wa gwo wo akun kaya vinya.
- ²³Zaho-zahoi n wo to zhin mi nya nu m, wo zhin mi nuwun yi nu. N wo ta bma mi zhin lo m, wo gna mi anya mi nu.
- ²⁴Sanu na kun alijanu ya kwo zhin kwa lo zhabui koi zan a sun-sun ba zanyi, amma nkwo to bwa m, kwo zhin kwa jeze be aba nkwa gmi nyi.
- ²⁵Sanu ko gye okwo puwa sapai nya gni n bmiya n tna zaho dna yi,
- ²⁶Ko zhin kwa lo kwa be n alijenu hoi, ngnu tnaba n dukohin n nukwoyi ba lofi n zahi mi. Zahi wonu kwa wo zhin wa gna wunya ndu sapai.

27Sanu wo bei gni wo ye da bo, nyikwoza ho wa gmi begye ya wa cige, “Shekwoyi wo tu oho’ya anabarka, nubo n ho bei gmi n kwo, bedo n bebe yi n ho bei ye nyi.”

28Yesu wa cige, “I amma anabarka gna tulo n aza ba wo mi beda bai zhin kwo nyi.”

29-30 Sanu aza bei be bai yece wo, wa zhin ba wa’azi ye, Esa nukwoyi nu, aza nukwoyi lo njesun. Ba nya bo cici ge mi wu ba tuze nshe. Amma nya n mi ba gna ba gmanyi kwonu zhin obo wo-woyi, ngye shi kwo bo zhin Yunana nyi, kwo bei wu a Niniva yi ge Shekwoyi bei tnu wo. Emi nya ba wu ce ge Shekwoyi nu na tnu mi.

31Amma n wada wyi sarauniya sheba bei la aza zunkni nba fi n esa ye nyi. Gama wo bo ku zan-zan n mwakpa ntuge wa wo Solomon beyekpe. Amma Solomon doduyi gni nyi ya (fye ta wo wo lo m.)

32A Niniva yi kwa bei zun aza kni n ba fi n esa ye nyi. Gama ba bei ku abu ye sanu Yunana bei zhin ba wa’azi nyi. Amma Yunana doduyi gni lo ya (fyei ta wo wo lo m.)

33Zahozahoi to lo n wo dna fitila na, wa kwo bwi dna m. Amma a zhi a yakwo tu pei-pe nu, n nabai kwa ga aza buzangna.

34Ofya wye nu zhin ba wu bugba buzangna. Awye gyi-gyi-yi zhin ba ga buzangna n fye wyeweyi. Amma awye anukwoyi da zhin ba buzangna gu har kwa zhin za wa lo dna wyema.

35Ntu cenu fye to ye ge, ala nyipyeyi buzangna gu fyem.

36N fya bugba n buzangna yilo, aba gyekwo n fya wyeba har efya wyeba bai bmiyana.

Abeda Shanwoyi Ga Akwocednayi

37-38 Sanu wo bei gni wo ye dabo, Farisiyi ho wa yi wo lo owo puwa cei ntuge wa gyi nyagyi. Sanu Yesu bei si, wa sase wa gyi nyagyi to woi na bwa m, (ngye shi ba zhin ba shin zhin) Sai ba gyi minagyi nzai n wo bei yi wo nyi.

39Amma Yesu wa ciba ge, “Ofye a Farisiyi fye zhin fya zhan obmi sarai amma ofye mi tu cegye lo ngye ’vun.

40Aza gbelo, Shekwoyi nu to zhin omi, wa zhin obmi m?

41Azhin a wu gyigy, a wu n ye-ye nu.

42Amma aiya nfye aba a Farisiyi, gama kwo shi ko nyi fye zhin fya zhin zakka sosai nya, amma fye ku gaiciya zhin zamwi n Shekwoyi ye-yeyi. Fye zhin zakka amma fye to fa abo aje zhi, n tna zhin yi m.

⁴³“Aiya n fyei a Farisiyi, gama fye ye aba manayi n aduwa nyakun, n na zagnabi n bmi laba du n gnikwo gbe, nkwo be fye n mwamwa nyi.

⁴⁴I, wada yakwo lo kwoi pmi fye, gama fye wu ngye avingwo nu n ba ku bwiwye. Aza laba n fyei, to bai kpe benukwoyi ye nkwo so dna lo m.”

⁴⁵Malami dnagmayi ho wa ciwo ge, “Shekwo mwasa, ai ho ku mi kni akmi dna n mi tnu-tnu.”

⁴⁶Yesu wa cige, “Eh, aiya tulo fye ce, gamafye zhinfyia ga az wyidna nba ta mi vi m, amm ofyehin ta mi fya vi ko m.

⁴⁷Aiya n fyei, gama fye wulo dai-dai n fya dada yi, n ba bei wu anabi laba any nyi.

⁴⁸“Azawu-zawuyi, gama fye ku y nfya dada yi ge, nya n ba bei zhin nyi Ko bei bmiya. Ai fye bei ba zhi lonu n fyehin.

⁴⁹Onya nyi Shekwoyi wa da nfye tukwo, ‘Mi ba tnu fye n anabi yi bedo n aza hoi Amma fye bei wu ba har fyei ny adoho ya.’

⁵⁰“Ofye aza esa ye nya kwa Shekwoyi bei nyafye dalili kwa zhi fya wu aza tu nyi n anyi zhin sa yi.

⁵¹Nyakwa laka n Habila fi h kwalo Zakaria n wo bei fi dna n aduwa nyakun nyi, Shekwoyi bei nyafye ’ba bo.

⁵²“Aiya n fyei nfye kpe Shekwoyi beda ye nyi, ntuge ye la gaiciya bwi shi. Fye ta go kwo nfye hi m, amma fye ta ye lo ge azaje ba gwo m.”

⁵³⁻⁵⁴ A Farisiyi n a loya yi wato aza n ba kpe owa, ba ku gyi minagyi. Daga sayi ba nya wo abo barkatai nabai wa zhin kuskure ho har ba wan wo.

Luka 12

Yesu wa Dabo Nna Zayezhi Yi

¹Esa fyewyi aza yezhi n mwa sosai har bai kun aje ya laba. Amma Yesu wa gna owo abara ge, “Fye zhin peceiye n a Farisiyi yi, gama ba zhin ba wu aza ge ba zhin aza manayi nu, amma zaho to du ba n abonukwoyi zhin m. Abe ye vinya bei kun bmi nwyihoi.

²Kwo bo wu ngye yist n na zhin a fi n bredi nyi.

³Gama beho-behoi n ba da n bwi-bwi kwo bei la kunzhi, nya nbada n wyegma kwa abei wo kwo n buzangna.

⁴“Emi anugundo, Fye to wo aza dna n baye ba wu fye nyi m. Ba mi ba wu fye nayi nu kawai. Ba to n ikoyi lo n fye wye-wyeyi m.

- ⁵Amma miƙa gna fye, oza n fya wo wo dna. Owo nu zhin Shekwoyi. Gama wo n ikoi lo wa wu za, wa je oza dna n anapi njesun.
- ⁶“Azhin a kun gbakolo akniya? Ai oƙa gyiwye to mwa m. Amma Shekwoyi ta zo ƙa mwi m.
- ⁷Shekwoyi kpelo shi oho tukwoyi lo nsun. Ai fye du agbakolo lo n mwa-mwa n Shekwoyi aba.
- ⁸“Njesun ma gnafye gaiciya, omi, Kristi mi ƙa gafye mwa-mwa n Shekwoyi amalaika aba ndai fya gwo mi ngye ofye nugundo.
- ⁹Amma aza nƙa na mibo n aza ƙa, to, mi bei naba ƙo ce n Shekwoyi amalaika aba.
- ¹⁰Njesun zaho-zahoyi wa da mi (oza nugun) benukwoyi aba zhin wo gafara. Amma oza wa da Zafun gyi-gyi-yi ƙe nukwoyi, ata zhin wo gafara m.
- ¹¹“Njesun sanu na ƙe nfyeyi n a Farisiyi ye aba, ntuge ƙa da fye wa n aduwa nyakun, fye to damu n nyai n fye ƙa da m.
- ¹²Gama Zafun Gyi-gyi-yi ƙa gna fye nya fye ƙa da n ƙa 'ba.”
- ¹³Nsai zaho wa ciwo ge, “Dagayi gna emi zado ya gna gado n gnisun.”
- ¹⁴Amma Yesu wa ciwo ge, “Zanyikoci nyika nu na dna mi alkali n nabai ma da owa ye pya?
- ¹⁵Zhin peceiye to zhin aƙo wye da m. Gama wye-wyeyi hin-hin nya to gni ge sai hoi n nyabwayi nu m.”
- ¹⁶Nsai wa ga misali ye, “Gyi wye-da ho bei nƙwai gni, kwa ga ampani dai-dai.
- ¹⁷Har ma a doƙui ƙa kuwo nu, to wa bwa 'ba n wo ƙa ya adoho zhi m. Nsai wa zhin nubo wa cige,
- ¹⁸Miƙa adobui ye ƙaya, ma mi awoi-woyi n nabai ma bwa aba ma fi ƙa.
- ¹⁹Nsai ma ci mi wye-wyeyi ge, la sun lonu, gama ho n nyagyi lo har n ayei mwa. Ntuce nu dagma ha gyi hoi sin.’
- ²⁰“Amma Shekwoyi wa ciwo ge, ‘Zagbelo! Ho ƙa fi n naiye. Anya ye nƙa zhinyi mwa, ho ƙa fa zhi nyika?’
- ²¹“I, zaho-zahoi wa zhin aziki n anyi ye, to wa zhin n she m, wola ze zagbolo.”
- ²²Nsai wa ci wa bara ge, “Fye to sa aƙo ntu nyagyi ƙom, kwo kwa aje n fye ƙa kpe m.
- ²³Gama wye-wyeyi du nyagyi lo n ajeyi

24Fye shi a kwasa-kwasa wye, ba ta nufa m, bai gna ge bai na dobui m. Amma ba n nyagyi ntuge Shekwoyi nu ga ba. Amma fye du ba lo n mwa-mwa n Shekwoyi aba.

25“Amma kwo fyei sa abo kwo ba gafye ampani ho? Kwo ba mi kwa be fya nyipyeyi? Awo.

26To mi gye ampani n fye ba sa abo ntu anya dagmai bo, shi ko nyi kwo ta bma zhin lo n anya bibi bo ma.?

27“Fye shi agbe-gbe awye, ba ta lu ajem, amma Solomon n wo mwa-mwa yi vinya, wo to bei kpe aje manayi n gye ba m.

28To, ndai Shekwoyi zhin wa kpe agbe-gbe ye aje n ba zhin ba fi n pye-pye nyi, fye ta gye ngye wo ba ga fye m, ko?

29Fye to sa abo njesun ntu nyagyi bo m. Nya nfyee ba gyi n nyai nfyee ba sin m, gama Shekwoyi ba ga fye.

30Aza vinya zhin ba mwa nyagyi mwz-mwa nu. Amma ofye dada n wo tu 'She nyi wo kpe nya ye lo n fye ye.

31Woba ga fye nyaho-nyahoyi n fye ye vinya cici, sai dai fya Dagayi be mwi shi na bye.

32“Ntu cenu fye to wo dna m, abi gama ko zhin kwa da fye dada wa ga fye owo 'be mi.

33Fye kun anya vinya n fyei ce lo, fya ku ga aza nba to cei lo m, Deye ba gafye arziki n She mi. Gama nya ta wunya bom, ai ta wyi vi bo m, a gwowyi kwa ta gyi anya bo m.

34Gama abaho-baho n ho arziki shi oho bugba nyi bo nu ce.

35“Fye ku shiri zhin.

36Ntu Dagayi zhi-zhi bo n amula pa ba, nsayi fye bei zhi n shiri yi fyei gu wo aba ya sanu wo bei be ncei.

37Abei da aza n mwa n ba zhi lo bai pmi wo bebe nyi. Dagayi n wohin wo bei gaba mwa-mwa owo nya. Wo se ba ase zhi, wo ga ba nyagyi.

38“Kpekni wa be n wyeshi kokwa n saduyi. Amma saho-sahoyi n wa be n cei abei da aza mwa nba ku shiri zhin nyi.

39“A bei gna ge aza kpe esa ye lo n wo bei jeze be n cei nyi, ai ku shiri zhin, shi aza zhin ba zhin shiri, bai ku wo ge evi lo nyi.

40Ntucenu fye zhi n shiri yi n saho-sahoyi, gama emi, 'Za nugun ba be saho-sahoi.'”

41Bitrus wa nya wo ge, “Ho dabo n yi nu kadai kwo kwa n zaho-zahoi.”

42-44 Yesu wa ciwo ge, “Mi dabo n zaho-zahoi nu n wo nbefyecei lo, n wo n nubo zhi lo. Eza n wo dagayi wa ga wo tnu-tnu n nabai wa bma aza do zhin. Nwo dagayi wa jeze be wa gye wo ku tnu-tnu zo zhin n bmiya, a bei gawo lada. Owo dagayi bei tu wo n anya she vinya n wo ncei.

45“Amma n zayi’a cige, ‘emi dagayi tajezebe n pye m.’ Wa ceba wa lu aza, na gnawo ge wo bma zhin nyi, n jesun woi wun esaya n ajesin ba woi sin je.

46To owo dagayi bei zhi to woi kpe m, woi shin wo ya n aba manayi woi lo n woi n naba kwo to bmiya ngye deyi m.

47Ai bei gawo tata gama wo bei kpe wo tnu-tnu ye ama wo to bei zhin kwo m.

48“Amma oza n wo takpe ge wo zhin laifi nu m, a to bei gawo tata n mwa m. Gama oza n ala gawo n mwa dole a gwo n waba gama owo tnu-tnu du lo.

49“Mabe ntuge ma fin ena nu n anyi ye. Mi cei pma lo kwa ma zo nkoi

50Baptizma dagmai lo n ma bye. Mi cei pma lo kwa emi tnu-tnu kwa ku nu.

51“Fye gye ge mabe ntu ge ma ga bugba fun nu n anyi ye? Awo, Amma mabe n ajegnai nu.

52Puwa gmanyi ba kun kpe aje, aza ngun ata bei ye mi aza ngu aba tobei ye mi m. Ko kwa aza ngun aba bei ye mi to aza ngun atai ye mi m.

53“Oda bei da gbo tu mi tukwo, obi wo da odo kwo kwa owo ya n wo mapwi bei da do. Oza to bei ye n wo yezhi yi m.”

54Nsayi Yesu wa gna aza vinya ge, “sanu fye gye anyi bai yezhi n nyipyeyi shin bwa, fya cige egma belo. Deye zhin gaiciya nu.

55“Sanu fye gye ese kwoi ci n nyipyeyi kpe bwa, fya ci ge nyipyeyi ba wo n naiye. Deye kwo zhin gaiciya nu.

56Zagbelo! Fye kpe nya anyi da amma fye tagye wahala lo n kwo shi n fya bye nyi m.

57Kni nu zhin fyei to cei pma, fya gye nya kwo bmiya ma?

58“Ndai ha gye oza nzokwo woi lo n hoi n wada ba. Bawo gafara kafin fye si alkali aba. Ntuge nwo ta tnu hoi n jaru m.

59“Gama n kwa zhin ho lonu ho to bei shan po m. Dole sai hoi gba wo owo agyiwyeyi vinya.”

Luka 13

Abokunmi Ayepmayi

- ¹Nsayi nabari kwa beda Yesu ge, Bilatus ku ayahudawa ho wu ai kun n Galili, sanu a bei fi ai zhin sadaka n Shekwoyi nyakun.
- ²Yesu wa nya aza ge, “fye gye lo ge oba nu zhin alaifi da lo n du n Galili? Cenu zhin bai sin wahala ye?”
- ³“A’a, kwo to wo lo nu m. Amma fye tagye lo ngye fye ba fi n fye hin m, akpe ge fya fa alaifi, fya be da Shekwoyi m?”
- ⁴“Aza ngun awo cei nyimwa-nyimwa n ba bei fi, sanu Siluwan nyakun bei miya kpe a nyi mwa? Oba nu bei zhin alaifida n du Urushelima?”
- ⁵Awo, kwo to wo lo nu m. Amma fye ba fi ce, akpe ge fya ye abui.”
- ⁶Nsayi wa ga ba misali ye, “Oza bei n lemu shinwan gni n wo fwa wa be woi pmigye cici ko kwo ku gyi, am-ma to wa gye nyaho m.
- ⁷Navun wa gna wo bara ge wo mi koya, wa cige, ‘mila pmi ko har aye ngnu ata, am-ma kwo to gyi m. Ai kwo gni koi gwo aba nu n yi ba shi odo nyi.’
- ⁸“Owo bara wa ciwo ge, ‘Dagayi ato miko ya kpa m. Fako har eye gmanyi, ma fi kwo taki ma gye.
- ⁹Nkwo bei gyi, to, amma nkwo to bei gyi m, sai mo zun koya.’ ”
- ¹⁰Sanu Yesu bei dna woi wu nya n aduwa nyakun n satiwyi.
- ¹¹Wa gye nyikwoza ho n dna wahala. Wo zan-zan n bmatu har aye awo cei nyimwa-nyimwa, to woi mi woi gni agni m.
- ¹²Yesu wa yi wo, waciwo ge, “Nyikwoza, ala ho kagna n ho nyasan.”
- ¹³Wa to wo bwa, Nsayi sayi nyikwozayi wa kpe gni. Wa zhin Shekwoyi godiya sosai.
- ¹⁴Amma a duwa-nyakun tukoda, bo ku minagyi gyi n woi, ntuge wo bei ka za gna n Satiwyi. Wa cige, “anyipyei lo ngu tnai tnu-tnu bo. Ko to bmiya lo a ka za gna n Satiwyi m.”
- ¹⁵Amma Yesu wa ciwo ge, “Zagbolo! Ho ta lo anakwo ya n Satiwyi ntuge ba sin nuwan?”
- ¹⁶To, kwo to bmiya lo ma lo nyikwoza deye ya n Shetan lawo pa har aye awo-cei nyimwa-nyimwa nyin?
- ¹⁷Owo bedaye bo ku vinko ga owo anuwun yi. Kwa da aza mwa n ba bei ce nyi.
- ¹⁸Nsayi wa ya ba wu njesun n Shekwoyi bemi tukwo wa cige, “Shekwoyi bemi wu n wuna? Ma zhin ko misali n kni ya?”
- ¹⁹Kwo wu lo ngye mustard byegye nu, n kwo bwa sun cewyi nyi. Sanu ko pa kwo zhin kwa mwa sosai har alu bai ya kpe kwo.

20-21 Shekwoyi bemi wulo ngye yist nu n na zhin a fi n bredi nyi. Ata zhin a gye kwo wye n sai dai agye bredi koi sun kawai.”

22Yesu wa zan n azhi dnagmayi n azhi bibi yi, woi zhin ba wa’azi. Amma wo bei na wyei ce n Urushelima bwa nu.

23Zaho wa nya wo ge, “Aza ciwiyi nu bei pwo ko?”

24-25 Yesu wa cige, “Abokunmi eshe nya bwa sun ciwiyi nu. La hoi yi n nabai ho lo. Gama aza mwa bei ye ntuge ba lo fi, amma sanu puwa da bei gu aba ato bei shan aba bwa m. Nsayi oza n wo bei gni woi ci ge Dagayi gu mi abaya, Dagayi bei ciwo ge, ‘Mi ta kpe hoye lo m.’

26“Amma fye bei cige, ‘Ai yi bei ku nyagyi gyi n hoi, har ha wu yi nya n yi a zokwo.’

27“Amma wo bei cige, ‘Mita kpe fyeye lo m. Fye tami fyabe ya m, gama fye zhin alaifi danu.’

28“Fye bei ci bwi n mwa fyei gyi anyikna. Gama fye bei gye Ibrahim, Ishaku n Yakubu yi n be mi bedo n anabi yi vinya.

29Gama aza bei be n anyi vinya n nabai bei sase bo.

30Ma gna fye gaiciya aza n ba ta bwa mwa-mwa lo n sai ye m, ba bei gwo ko nwyiyi, aza n ba bwa mwa-mwa kwa ba to bei zhin aza mwa-mwa da nu, n shan sun m.”

31Esafyewyi a Farisiyi ba be, ba gna Yesu ge, “Hiridus cei pma lo wa gye ho wye. Kwo kamata lo ha busi.”

32Yesu wa cige, Fyelo fye gna beda yi ge, mi ba kun alijenu ya mi zhin abo wowo yi, n naiye n su yi har wyigyei kafin mi si aba n mi lo.

33Eh, n naiye, nsu, har n wyigyei yi ntu ge koto bmiya lo a wu Shekwoyi anabi m, sai n Urushelima.

34Oh, Urushelima, Urushelima ezhi nko wu anabi nyi. Ezhi nkwo kni aza kuta n na tnu bai n ba aba nyi. Mi ba zhin wuna gama mi zhin ma ye ntuge ma ye fye zhi, shi pese zhin kwa ye ekwo abi zhi nyi, amma fyeta ye lo m.

35To naiye, mila fye puwa yashi fye, Fye ta shan mi wye gye njesun m, akpege fya ci ge, “Sanu n bei ga oza n wo be dna Shekwoyi ye nyi.”

Luka 14

1-2 Nwyihoi n Satiwiyi woi dna n Ayahudiyi zadnagmayi puwa a Farisiyi zhi bai shi wa wye, ba gye kwo wa ka za gna n wo bo dna n kpo-kpo nyasan yi nyi.

3Yesu kwa wa ciba ge, “Owa ku da ge a kaza gna n Satiwiyi ko kwo to da ma?”

⁴To ba dna wo be gbe m. Nsayi Yesu wa shi nyasayi n bwa wa kawo gna wa ciwo ge wo lo.

⁵Nsayi wa je ba nya ge, “Nyika lo n fye n wo ta zhin tnu-tnu n Satiwiyi ma?”

⁶To ba dna wo be gbe m.

Fye To Zan Mwa-Mwa Shin M

⁷Sanu wo bei gye aza ye ba sase kpe n aba dnagmai n anyagyi 'ba wa gaba shawara ye.

⁸“N 'za yi fye na mula ba, ko to bmiya lo fya sase n aba nba gna bmiya m. Ntuge n za be nwo du ho,

⁹to wo bei shan ho aba wo tu zayi. Oho kwa hoi lo buzu-buzu n vinyi-kwoyi.

¹⁰“Amma ko bmiya lo n ya be dina ba ha kni akujera nukwoyi ha sase. Sanu mula ba gye ho tu lo nu, sai wa be wa gaho akujera manayi. To nsayi nu n ho bei lo n mwa-mwa kpe.

¹¹Gama zaho-zahoyi n wo cei pma wa mwa wohin, to, aba gba wo. Amma zaho-zahoyi nwa gba wohin, to, a ba gawo mwa-mwa.”

¹²Nsayi wa ci oza n wa yi aza nyagyi nyi ge, “Sanu ha yi aza nyagyi to yi a nugundo n amado yi n ho abye yi n agyiwye-dayi nu kadai m. Gama ba bei kaho yi ce.

¹³“Maimako ho zhin lo nu, yi aza nu n ba to n agyiwyei m, azagmazhi n na wyebuayi.

¹⁴Nnabai wyi yi n Shekwoyi bei ku azafi kala nyi, woi gaho lada ntu aza bo n ba to mi ba gbaho nyi m.”

¹⁵Ozaho n wo bei tu woi wo Yesu beda wa ci Yesu ge, “Ai oza wa lo Shekwoyi bemi wo ku sa'a dnagmai zhin.”

¹⁶Yesu wa gawo amsa n misali yeyi “Oza ho bei zhin agmada dnagmai har wa yi aza mwa n na nyagyi ba.

¹⁷Sanu wo bei ku boho-bohoi zo zhin, wa tnu owo bara woi gna aza ge esa la si.

¹⁸Amma ba gawo a dalili gbo-gbo. Za knayi wa cige, ‘Mi la ofwasi n ha ye mi cei pma mi gyekwo. Ntuce nu, mi tami ma be anyagyi ba m.’

¹⁹Zaho wa cige, ‘Mila anakwo si ngun awo n fwanu bo, Mi cei pma mi gye ba.’

²⁰Zaho wa cige, woi bwa nyikwo la nu, ntu ce nu wo tami wa be m.

²¹“Bara yi wajeze lo wa da nya ba gna wo vinya. Owo maigida gyi minagyi wa cige, lo bwaho-bwahoi ho yi a nyabai na zabmazhi yi bedo na wyebuai.

- ²²Amma shi azaye pya bei ku be aba dudu ba ce.
- ²³Nsayi owo maigida ciwo ge, ‘Lo hoi dnawye vinya aba ha gye oza gni ha gna wo ge wo be, n nabai puwa ye kwa nu.
- ²⁴Gama aza ma yiƙa na bye nyi, ƙa tabwa enya n mila shirya ntu ƙa ƙo m.’”
- ²⁵Aza ƙo viwo n mwa. Wa zegni wa ci ƙa ge:
- ²⁶“Oza wo cei pma wa vimi dole wa yemi n du owo dada, owo ya, owo nyikwo, owo abi, owo amaje, owo amapwi, Har ndu wohin wye-wyeyi. Nto lo num, wo ta mi wa vi mi m.
- ²⁷Njesun oza nwo to la wohin zundu wa vi mi m, wo ta mi wa ze emi bara m.
- ²⁸“Amma oza wo cei pma wa vi mi, To, sai wa zhin nubo kpa sosai, gama zaho-zahoi wo cei pma wa mi nyakun, wo zhin wa shi wa kpa agyiwyē zhi wa gye she kwo ƙa la nsun, kafin wo ya nyakun mi.
- ²⁹Kada wo bwa nyakun nu shi kawai, nsayi agyiwyē zowo har ha gye aza ƙai mawo san.
- ³⁰‘Bo cige, ‘Fye gye zayi n wo nu, wo to mi woi zo nyakun mi m, ntuge agyiwyē ku wo zo.’
- ³¹“Ko kwa kni esu yi nu ƙa lo okun, to woi zhin shawara n wa azai ko owo asoa 10,000, ƙa mi ƙa sukun n azai 20,000?
- ³²“Nwo tamin, sai wa tnu na zai ƙa gyi esu deyi wye, tunyi woye nyin nkpayi, kadawo be wa wu owo aza vinya.
- ³³Ntuce nu zaho-zaho ta mi wa ze mi bara m, akpege wa shi wa zhin nubo kpa, wa gye wahala n wo ƙa sin n anabarka yi n wo ƙa gwo, n sayi wa gye kwo wo ƙa mi wa vi mi.
- ³⁴“Sankpegye n ampani yi, kvoi la dada gmiya?
- ³⁵Sankpegye nkwo to da m, ko to n ampani hoi m, atalni a zhin taki n koi ma. Azhin a ze koya aza kpe ko apita kawai. Fye kna tɓɓua sosai ngye fye cei pma fya gane nbei n mi da nyi.”

Luka 15

Ala Nya Bwi-Bwiyi Bwa

- ¹A gadu gwo yi n ƙa to n gaici yai nyi m, beɗo n alaifida hoi bei zhin ƙa be ntuge ƙa wo beɗa.
- ²Amma kwo to bei da a Farisiyi tukwoda m, ntuge Yesu bei zhin woi dami n laifi dai har ma woi gyi nyagyi n ƙai.

3-4 Ntucenu Yesu wa gaba misali ye, “Oza n wo n anai lo tagyi, amma gmanyi kwa bwi, wo ta fa adeyi zhi vinya wa lo wo dna deyi wye har wa gye kwo m?”

5Nsayi wa ƙe nkoi na gmadai n api n kwoi tu nwo bwapa m.

6Sanu wa si api kwa wo ƙa yi owo anugundo n wo azaje yi ƙa dagma gama wola ena gmanyi gye n kwa bwi nyi.

7“To, konyi lonu n She, Gama agmada lo n mwa n she ntu zaknayi ƙo n wa ga gaiciya ndu aza n ƙa shin Yesu viyi zhin lo nyi.

8“Ko kwa misali nyikwoza ho n zinariyai fi ngun awo. Ngmanyi a bwi wo, sai wa dna fitila na wa fin abaya vinya, woi zankwo zanyi ntuge wa gye kwo.

9N a ko bwa wa yi owo anugundo n wo azaje yi ntuge ƙa dagma.

10To, kwo wu lo nu. Ammalaika n she zhin ƙa dagma ntu laifida ƙo gmanyi n wa ga gaiciya.”

11Wa je ba misli ho gna ge, “Oza ho ƙei na ƙi ngun aba.

12Oza nawyi da wa gna owo dada ge, ‘Mi yelo ha gna yi oho gado n naiye, kafin ho fi.’ Owo dada kwa wa ye.

13Nsayi obi yi wa ku owo akaya wa lo ezhi ho nkpayi. Wa gyi agyiwye yi vinya. Wo si nyagyi ga aza laƙa, woi ce wo gyi a karuwa.

14Sanu agyiwye ƙwi ku wo zo, mikun kwa gmi n ezhi yi har to azai bwa nygyi m.

15Wa nya zaho n nabai wa gawo aburutu wa kna ƙa.

16Mikun ƙei zhin ko gun wo ce sosai, har ma ai wo wo ngye wo gyi aburutu nya gyi, amma to ai ga wo m.

17“Sanu wo ƙei zhin anyi ƙo nubo, nsayi wa cige, Ai n yi puwa ko abara ma ƙa n nyagyi lo sosai. Amma mi gninyi ya mikun ƙamiya.

18Miƙa jeze lo omi dada ba mi ciwo ge, ‘Dada miku laifi zhin Shekwoyi ƙedo n hoi.

19Mito kunce lo ha yi mi ge eho ƙi n shansun. Mi cei pma ma ze ho fyenu.’

20“Nsayi wa laka wa lo api da owo dada. Sanu wo ƙei ye ƙe n kpai owo dada gye wo. Wa busi lo wa zhin wo amabe har wa Shekma wo.

21“Eƙi yi waciwo ge, Mi ku laifi zhin ho ƙedo n Shekwoyi. Mito kunce lo m, ayi mi ge oho ƙi m.

22“Amma owo dada ci abara ge, ‘Fye ƙe n eje manayi fya kpe wo. Fye ƙe n bwai-nyai fya dnawo, fya ƙe na buadai njesun.

23Fya ƙe n nakwo yi yawu ko, Tile ya zhin agmada sosai nya.

²⁴Gama emi bi ye bei la fi, amma wola jeze be. Wo bei la bwi amma ala wo gye.' Sai n agmada yi nu sayi.

²⁵"To, owo dnagma bei bwi nfwawoi zhin tnu-tnu; shi wo bei zhi wa wo ai gyi agaga nba puwa.

²⁶Wanya bara ho nya kwo zhin.

²⁷Bara ho wa gna woge, ai oho mado nu la zhi. Oho dada kwa, woi la nakwo manayi wu wo, woi zhin agmada dnagmai ntu nwo bebe bo.

²⁸"Wagyi minagyi nsayi, har wa ma, to wa lodna n mi m. Owo dada wa be wa bawo.

²⁹Amma wa ci wo dada ge, esala mwa mi zhin ho tnu-tnu, har mi vi ho bo vinya. Amma ho to shin ena wu ntu mi bo m, ntuge ha zhin agmada deye pya m.

³⁰Amma sanu n oho bi deye wa zhi, woi ku oho agyiwyeye zo wu n akaruwa laba hoi la nakwo manayi wuwo.

³¹"Owo dada ciwo ge, Emi bi yeye yi, ai ho kun sun lo n mi n saho-sahoyi, nya mi cei vinya oho nya nu.

³²Amma kwo bmiya lo ya dagma. Gama wo zhin oho mado nu wo bei la fi amma wo la jeze be. Wo bei la bwi amma a lawo gye wye."

Luka 16

Anabari Ntu Bemanayi Zhin Bo

¹Nsayi Yesu w gna owa bara Nabari ye, "Gyiwyeda ho bei la zaho n nabai wa zhin wo manaja, esa fyewyi waya nabari nukwoyi wo tu nu tukwo.

²"Wayi wo manaja waciwo ge, 'Kni nu zhin hoi wyi mi agyiwyeye'a? To lo ho zhin shiri anyai vinya, gama miba gmi ho ya.'

³"Nsayi manaja yi wa zhin nubo wa cige, 'Miba zhin wuna?' Emi tnu-tnu ku zo ya mi-i ta mi ma nu ofwa m, mi ta ye-ge ma ze nyabayi m.

⁴To mi kpe boye lo n mi ba zhin n nabai mi bwa anugundo n mwa ntu ge bei bma mi zhin."

⁵⁻⁶ "Nsayi wa yi aza be n cei n ba bei na ta shi owo maigida nyi, wa ci zaknayi ge, 'Ho cei shi akniya?' Zayi wa ciwo ge a galon 850 zaitun mi nya Manaja yi wa ciwo ge mila ce ho zunya. Ho ba gba tokunyi nu kawai."

⁷"Wa je zado nya ge, 'ho cei shi akniya?' Zayi wa ciwo ge, 'Mudu 1,000 alkama nya. Manaja ciwo ge to ho ba gba 800 nu kawai.

8“Owo maigida cige, ‘Lalle mana ja ye cecei lo sosai.’ To, kwo bwawu lo nu a shetan da gna cecei n laifi zhin afa aza ba fi n buzangna nyi.

9Amma mi ba cifye ge fye zhin ngye wo n nabai fya bwa anugundo n gyifi dna? Deye ba lo n fyei n api nyalo-nyalo nya n she?

10Awo! Gama oza wo to n befyeccei lo n anya bi-biyi m, wo tami wa zhin befyecce n anya dnagmayi m.

11Njesun n fye to zhin befyecce n abo anyi ya m, nyikado bei ga fye gaiciya ntu arziki eshe nya bo’a?

12“Nfye to zhin befyecce n aza agyiwyeyi fye ba zhin befyecce n wuna n fya gyiwyeyi’a?

13“Gama zaho-zahoi to lo n wo ba mi wa bwa a maigida ngun aba m. Ko ha ye zaknayi to ha ye zadeyi m, ko kwa ha ye zadeye to ha ye zadeyi m. Ho ta mi ha vi Shekwoyi bedo n agyiwyeyi n esa gmanyi m.”

14A Farisiyi bei zhin agyewye yei nu sosai. Ntuce nu ba gyi minagyi n woi.

15Nsayi Yesu wa ciba ge, Fye zhin abo ngye aza manayi, har ai ga fye mwa-mwa, amma Shekwoyi kpe fya bugba nukwoyiye lo. Ntu ge obo nkwo zhin ngye bemanayi nna zaba kwo zhin laifi nu n Shekwoyi aba.

16Kafin Yohanna wo ya wa’azi zhin n batisma yi, Musa owa, nu bei zhin fye zokwo bedo n wa’azi n anabi gbo-gbo bei zhin anyi. Amma Yohanna wa be fye n nabari maayi nge Shekwoyi bemi la ga be. To aza zhi nyi n mwa bai ye.

17Amma deye ta wu ge Musa owa to n ampanyi lo m. Ata mi a shan kwo do ngye ‘She nkniyi.

18Ntuce oza n wa gmi owo nyikwo ya, wa la nyikwo do, wo ku anagbai zhin. Njesun oza wa la nyikwo n na la kwo gmiya to, wo ku anagbai zhin ce.

19Yesu wa cige, ozaho bei nyi n agyiwyeyi sosai. Wo bei na je yi n mwa har woi dagma n saho-sahoi.

20Nwyihoi zaho ai yi wo ge Liazuru n wo bei zhin nyabai nu, n na ci kpe lafa, a wo shi n Nyabwayi yi puwa.

21Sanu wo bei shi woi pmi nyagyi kwa kaya, n agyiwyeda yi bei zhin woi gyi nyi, a mwi bei zhin bai nyi wo aci.

22Nwyihoi Liazuru wa fi, amalaika lawo ba lo woi n Ibrahim aba. Nwyihoi gyiwyeda yi wa fi ce, Har a wo bi.

23Amma owo wyewyeyi kwa lo anapi, n bo wa gye Liazuru ngnisun n Ibrahim yi.

²⁴“Wa cige, ‘Dada Ibrahim gye mi sun-sun, ha tnu n Liazuru yi n nabai wa dna owo bwai n nuwan, wa lice mi. Gama mi sin wahala lo n mwa.’

²⁵“Amma Ibrahim wa ciwo ge ‘Ebi pa sanu n ho bei dna n anyi ho bei nyahonyahoi n ho bei cei pma. Amma Liazuru to bei nya hoi m. Amma n saiye a zhin wo atna lo amma ho dna lo n wahala.

²⁶Amma bokun dnalo n mwa, n ya tan-tasin n hoi ntuge oza wo cei pma wa piya lo fya ba, wo ta mi m. Zahonyin ta mi wa piya be eya ba m.’

²⁷“Nsayi nyabwayi wa ciwo ge ‘O dada Ibrahim suku-suku ha tnu n woi n mi dada puwa,

²⁸Gama emi azaje lo ngun atnu, n nabai wo gnaba wahala ye bo, kada baye be ya ce bai ku fi.’

²⁹“Amma Ibrahim wa ciwo ge, ‘Ai litafi ku gna ba. Oha maje bami ba ba litafi ndai gye ba ce pma lo.’

³⁰“Arziki dayi wa ciwo ge, ‘A’a Dada Ibrahim ba ta gye ba nuwan ba ba m. Amma ndai zaho wa lo woi gmi n naku, ba ba fa oba laifi.’

³¹“Amma Ibrahim wa ciwo ge, ‘Ngye ba ta wo Musa beda bedo n anabi yi m, To ba ta wo m, ko ozai laka n vingwo m.’”

Luka 17

¹Nwiyihoi Yesu wa ci owa bara ge, aza ba bwa jaraba cici ntuge ba lofi n laifi. Amma aya n oza aba n wo zhin jarabaye nyi.

²⁻³ Nna she ozaya dna n la n kuta dagmai pa dna n begye ko ba wo du afa wahala n wo ba sin ntuge wa zhin abi anawyi bei zhin laifi nyi. Mi ku pmafye gna, “Gnakni ohozado, n wa zhin laifi, zhin wo gafara njesun n wa ba gafara.

⁴“Ko wa zhin ho laifi abwa ngun tnaba nu, nyipyeyi gmanyi woi ba ho gafara, sai ha zhin wo.”

Gaiciya Ga N Godiya Yi

⁵Nwiyihoi Yesu abara ba ciwo ge, “Yi ye gaiciya ga lo n mwa. Yi ba bwa kwo n wuna?”

⁶Yesu wa ciba ge, “Nfya bwa gaiciya ga ye n bwa sun ciwiyi, ngye musta byegye (Musta wu ngye fulu nu.) Ko ba mi kwa shi shinwan dnagmai ya har kwa shekwoya dna n la. Nfya ga gbe, koba ze lo nu.

⁷⁻⁹ “Ndai fyenu wa zhi ofwa, ko wa zhi akni kna, wo to zhin wa sase shi wa ce wa gyi nyagyin, sai wo la wo puwada nya zhin, wa ga wo wa ku gyi kpa, n navun

wa kpe wohin nya gyi. Zahoi ta sa wo ami ko wa zhin wo godiya n, ntu ge wo zhin wo tnu-tnu nu.

¹⁰“Ko wu lonu n fya vi mi bo, fye ta gna ge a ci fye m, ntu ge fye zhin efye tnu-tnu nu.”

¹¹Sanu n ba bei gyi abye n zan-zan yi bai lo Urushelima ba si anyajegna ba n kwo gna Samariya aje n Galili yi nyi.

¹²Sanu ba bei lo ezhi ho, akuturu ba kune ngun awo ba ku zhi n kpai.

¹³Ba cige, “Yesu, Dagayi gye yi sun-sun.”

¹⁴Yesu wa shi ba wye wa cige, “Fyelo prist aba fyei gna wo ge fye la kagna.” Sanu ba bei lo n zokwo kwa ba kagna.

¹⁵Zaknayi n bami wa jeze be woi ci ge, “Fye ga Shekwoyi mwa-mwa gama mila kagna.”

¹⁶Wa miyazhi n Yesu aba woi zhin wo godiya, ntuge bo Yesu bo zhin wo nyi. Zeye kwa bei zhin Samariya za nu.

¹⁷Yesu wa nya wo ge, “Mi to kafye gna ofye awo nu m? Azaje zhi n na?”

¹⁸Zeye nu na bwa jeze be n wo zhin Samariya za nyi, woi zhin Shekwoyi godiya?”

¹⁹Nsayi Yesu wa ciwo ge, “Laka ha lo ho nya oho gaiciya ga la ho ka gna.”

Fye Zhin Shiri Ntu Mi Jeze Be Bo

²⁰Nwyihoi a Farisiyi ba nya Yesu ge, “Shekwoyi be gyi bei ya n knisai ya?” Yesu wa ciba ge, “Shekwoyi be mi ta be ai gyekwo wye nu m.

²¹Fye tami fya cige, ko la la n zhi ye m. Kwo kwa n zhi yi m. Gama Shekwoyi bemi dna lo nfyee.”

²²Nsahoi wa dabo n wa barai n ko tukwo wa cige, esa belo n fye bei ye fya gye mi n nabai fya kunsun n mi, ko n nyipyeyi gmanyi, amma fye to bei gye mi wye m.

²³Fye bei wo ge mi la jeze be, nge mi gnilo n ya ko kwa n bwai, fye to bei ye m, ko kwa fyei lo ge fye zan mi shin.

²⁴Gama sanu mi bei jezee fye bei kpe sosai. Ko bei wu n gye ogma bmiya nu. N kwo zhin kwa bmiya n she nyi.

²⁵Amma dole me sin wahala kpa har to a shan mi ye m.

²⁶Sanu mi bei jezebe nyi, anyi bei wu ngye Nuhu sa nu.

²⁷Gamaba bei sin bai gyi har bai ku anyikwo. Ba bei dagma har sanu Nuhu bei lo dna n ya nuwan be aza bwi vinya.

²⁸Njesun anyi bei wu ngye Lot sa nu: gama aza bei gyi, bai sin, bai si bai knu, bai nu fwa, bai mi anyaknu

²⁹Har wyi Lot bo fa Sodoma nyi. Nsayi ena kun n she kwa gyi ba vinya.

³⁰Eh, aza bei laba lonu nu, har esa mi ba jezebe n cei nyi.

³¹Aza nba to bei fi n napi m, to bato bei jeze be m. Aza n ba kpelo nfw, ba to bo be zhi mi m.

³²Fye pa nya ko bei zhin Lot nyikwo nyi.

³³Zaho-zaho wa wo wye-wyeyi shi kam-kam wo ta bwa ko m. Amma oza wa wo wye-wyeyi ya to, wonu ba bwa kwo.

³⁴Nwyyi aza bei fi ngu aba bai wan gye, ai la gmanyi o ce gmanyi ya.

³⁵⁻³⁶ Anyikwoza ngun aba bei zhi bai zhin tnu-tnu ai la gmanyi o ce gmanyi ya. Kwo bei jewu lo nu na zai bai kpe n fwa.

³⁷Owo abara ba nya wo ge, “Dagayi aboye bei zhin n kni wyi ya?” Yesu wa ciba ge, “Aba zafi shi agulu zhin ba she laba bo nu.”

Luka 18

La Hohin Yi

¹Nwyyihoi Yesu wa gna owa bara nabari ho n nabai wa wuba ge ba zhin aduwa cici. Har ba bwa amsa.

²Wacige, “Alkali ho bei nyi n ezhi ho, To woi kpe Shekwoyi ye m, njesun to woi gye oza ntukwoi tu m.

³Nyigbanyi ho wa gna wo gna-gna ntuge wa dawo wa n zahoi n wo bei gyi wo fi.

⁴⁻⁵ To Alkali yi wa gye wo ngye nya ho m. Amma nyikwoza yi woi be cici. N sayi Alkali yi wa cige Koda shike niita wo Shekwoyi dna m, ko gbagyi za m. Dole ma da nyikwoye wa dai-dai gama wola gna mi gna-gna.

⁶⁻⁷ “Nsayi Yesu wa ciba ge, ngye alkaliye pya ba zhin lai, fye ta kpe ge Shekwoyi ba zhin owo abi daidai, nba gyi wo wye n sukwoyi bedo n nyipyeyi ko?”

⁸Eh, wo ba woba aduwa npye-pyeyi, amma sanu mi (oza nugun) bei jezebe mi bei gye aza nyi n gaiciya ga yi nsun na (bai zhin aduwa?)”

⁹Nsayi wa gna azaho nabari ye, nba bei zhi bai zhin aboko ge, ba zhin aza gyi-gyi-yi nu.

10“Wa cige, aza ngun aba bei lo aduwa nyakun, ntuge bo zhin aduwa. Zaknayi bei zhin Farisiyi nu, oza bayi kwa bei zhin godu goyi nu.

11“Farisiyi abokwo da wacige, ‘Ma gode n hoi Shekwoyi ntuge mi to zhin laifi da nu ngye godu goyi ye m. Gama mitagyi oza fi m, mi ta zhin anyikwo bo m.

12Mi zhin azumi abwa ngun aba dna n mako. Njesun mi zhin ma ga Shekwoyi zakka.’

13“Amma godu gwoyi wa gni n kpayi, to wa ye ge wa zhin abokwo m. Amma wa lu agu n bugbawun yi, wa cige, ‘Shekwoyi, gye mi sun-sun gama mi zhin laifi da nu.’

14To, ma gnafye laifi da yi bei la lo api n gafara yi, amma Farisiyi to bei bwa m. Gama oza n wo zhin aboko a ba gba wo amma oza n wo gba wohin aba gawo mwa-mwa.”

15Nwiyihoi azaho ba be n abi yi n Yesu aba, ntu ge wa pe ba bwa wa tu ba anabarka. Amma Yesu abara ba ci azayi ge ba la kuka.

16-17 Nsayi Yesu wa yi abi yi nge ba be. Wa ci owo abara ge, “Fye fa abi nawyi ba be mi aba. Fye to nyabaya m. Gama Shekwoyi ebemi zhin aza nya nu n ba gaiciya ngye abi nyi. Ozaho-zahoi n wo to ga gaiciya ngye abi ye m, wo ta lo Shekwoyi ebemi m.”

Nyabwayi Nwo Abo Gna-gnayi

18Nsayi a Yahudiyi malami ho wa nya Yesu ge, “Malami manayi, mi ba zhin wuna ntuge ma bwa wye-wyeyi nyalo-nyalo nya?”

19Yesu waci malami yi ge, “Kni nu zhin hoi yi mi ge, oza manayi’a? Ai oza to lo n wo zhin oza manayi m, sai Shekwoyi.

20Ho kpe awyidna ye lo: “To zhin anagba yi m, to wu oza m. To wyi evi m, to ce akata m, Ga oho dada mwa-mwa bedo n oho ya yj.’”

21Malami yi wa ci Yesu ge, “Tunyi mi ye bwasun ciwiyi miku awyidna ye vi vinya.”

22Sanu Yesu bei wo lonu wa ci malami ye ge, “Enya ye hoi celo gmanyi. Lo hoi kun anya vinya n ho cei lo, ha ku agyiwe ga anyamwa yi, hoba bwa dukiya n eshe mi nsayi habe ha vimi.”

23Amma she malei yi bei wo lonu, bugba kwa wo wun gama wo bei zhin gyiwe da nu.

24Sanu Yesu be gye bugba la malemi yi wun, wa cige, “Ai kwo dnabo n mwa gyiweda wa lo Shekwoyi bemi.

- ²⁵Ko ƚa gna wo fafa Rakumi kwa lo aci bwo a ya cige gyiwye da wo lo Shekwoyi ebe mi.”
- ²⁶Aza nƚa bei wo bedaye ƚa cige, “To, nyikado nu ƚa pwo’a?”
- ²⁷Yesu wa ciba ge, “Enya n ko dna gbagyiza nyikwoci ƚo ge wa zhin kwo ta dna Shekwoyi ƚo m.”
- ²⁸Nsayi Bitrus wa cige, “To, yiku eyi apuwa fa ntuge ya vi ho.”
- ²⁹Yesu wa ƚa ge, “Miba gnafye gaiciya ozaho-zahoi wa fa wo puwa owo’ya, owo dada, owo amaje, kwo kwa owo ai ntu Shekwoyi bemi ƚo.
- ³⁰“Wo ƚa bwa anabarka n mwa n anyi ye, njesun wo ƚa bwa wye-wyeyi nyalo-nyalo nya, n anyi de yi n ƚa belo nyi.”
- ³¹Nsayi Yesu wa kun owo abara ya zhi wa ci ƚa ge, “Fye kna tɔubua. Yilo Urushelima nu anabi doho-dohoi beda n oza nugun tukwo ƚa nu nƚo nu.
- ³²Aƚa gawo n aza kun nƚata kpe Shekwoyi yem, obanu ƚa ma wo esan, ƚa kniwo bugba ƚa kni akni kpe wo.
- ³³Ba luwo har ƚa wu wo, amma wo bei laka n vingwo n nyipyeyi tayi.”
- ³⁴Owo abara to ƚai gane n enya yi n wo bei da m, gama abei la okwo awyega bwishi, cenu bei zhin to ƚa kpe enya ye n Yesu bei gni woi da m.
- ³⁵Sanu n ƚa bei ƚe n zokwo, Yesu wa wo vivi n ezhi hoi ai yiko ge Jerikwo. Wyeɔuayi ho bei sase tu n zokwo gbe woi ƚa nya.
- ³⁶She wo bei wo aza ƚai duya n mwa wa nya ƚo ge, “Kninu zhi’a?”
- ³⁷Aza ƚa ciwo ge, “Yesu n wo gmi n Nazarat nyi owo nu duya.”
- ³⁸Nsayi wa ƚe wyi wacige, “Yesu Dawuda nugun gyemi sun-sun.”
- ³⁹Aza nƚa bei gyi n abye nyi, ƚa ciwo ge wola ce pi. Amma wa gna begye latu n she wa cige, “Dawuda Nugun gyemi sun-sun.”
- ⁴⁰Nsayi Yesu wa kpegni wa cige, ayi wyeɔuayi ge wo ƚe she wo bei ƚe Yesu wa nya wo ge:
- ⁴¹“Ho ye ge ma zhin ho kni nu’a?” Wyeɔuayi wa cige, “Dagayi mi cei pma ma gye” wyeɔa njesun.
- ⁴²Nsai Yesu wa ciwo ge, “Gyewyeba, oho gaiciya ga kola ho ka gna.”
- ⁴³Nsayi-sayi awye ƚa guwoya bmagyi. Wa vi Yesu woi zhin Shekwoyi godiya. Sanu aza bei gye lonu, oba vinya ƚa zhin Shekwoyi godiya.

Luka 19

Lada Bemanayi Zhin Nya

- ¹Yesu kwa wa godiya lo Jeriko.
- ²Esanu wo bei diya lo ozaho, gadu gwoyi oba su ai yiwo ge Zaka. Wo bei zhin agyiwyē da nu sosai.
- ³Woi cei pma ntuge a gye Yesu wye. Amma wo bei bwa sun kpe-kpegye nu to wa mi wa gye wo wye m, ntuge aza bei mwabegye.
- ⁴Ntuce nu wa busi lo n aza bye, wa gun gbayi shinwan ho ntu ge wa gye Yesu wye, gama Yesu bei vi zokwo yi nu.
- ⁵Esanu Yesu bei si shinwan yi aba, wa kpawye wu n she wa gye Zaka tu wa ciwo ge, “Zaka, kashi be n pye-pye gama n ba dna nho puwa nu naiye.”
- ⁶Zaka kwa wa kashi n pye-pye wa zhin Yesu amabe. Ba lo owo puwa.
- ⁷Shi aza bei gye lo nu ba laba bai da gnunu-gnunu bai cige, “Ai zaye du azhibeyi n alaifida puwa.”
- ⁸Zaka wa lakala gni wa ci Dagayi ge, “Dna emi nyabwa vinya miɓa la tokunyi ma ga aza n bato n nyahoi m. Ngye mila zaho-zahoyi gyifi kwa, miɓa gbawo ta har abwa ngun anyi.”
- ⁹Yesu wa ciwo ge, “Gni-gni la be puwaye naiye, gama zeye zhin Ibrahim Yawyi nu ce.
- ¹⁰Gama oza Nugun wato Kristi wabe ntuge wa zan abwi-bwiyi nu shin wa gbnia njesun.”

Koonci N Zinariya Agyiwyē Yi

- ¹¹Esanu aza bei zhi bai wo Yesu beda wa gaba misali ye. Wo bei wo vivi n Urushelima yi aza zhi bai gye ge Shekwoyi ebemi la gabe nu.
- ¹²Nsayi wa ciba ge, “Arzikida ho bei nyi n wo bei lo ezhi ho n kpai ntuge wo gyibe wo zhi.
- ¹³Kafin wo lo kwa wa yi owo abara ngun awo, wa ga zaho-zahoi agyiwyē, wato ngye ₦1,332 wa ciba ge, zaho-zahoi lo wo gni gniko n agyiwyē yei, n nabai wa gye gyiba n wo ba bwa.
- ¹⁴Amma shi wo bei lo ezhi yi to aza ye wo m. Ba kun aza ya ba cige, ‘Yi to cei pma lo zeye wa gyi be tu n-yi tukwo m.’
- ¹⁵“Esanu n wo bei jeze zhi, wa yi owa abara yi zhi n wo bei gaba agyiwyē nyi, ntuge wa kpe gyiba ye n ba ku bwa.
- ¹⁶“Oza kmisunyi wa be wa cige, miku gyiba gyi har n sun ngye nya ha gami nyi abwa ngun owo.

- 17“Maigida ciwo ge gezhiya nhoi, ho zhin fyenu manayi nu. Shi kwa nyi ho ku gaiciya zhin n nya fyewyi ye, miƙa gaho begyi tu n azhi awa tukwo.
- 18“Oza bayi wa ƙe wacige miku gyiba gyi har n sun ngye nya ha ga mi nyi abwa ngun atnu.
- 19“Maigida kwa wa ci fyenu ye ge, ho ƙa gyi be tu azhin ngun atnu tukwo.
- 20“Ozaho wa ƙe wa cige, oho agyiwyɛ shin nyi. Mi ƙei lo ma kwo so dna n shakun.
- 21Gama mi ƙei wodna ntuge oho hali dnaƙo. Ho zhin ha la enya nkwo to zhin oho nya m. Ho zhin ha do n aba ho to ƙei bye m.
- 22Maigida ciwo ge ho zhin fyenu banza nya nu, Oho beda nu a wu ho. Ho kpe lo ge emi hali ƙo dnaƙo, mi la nya nkwo to zhin emi nya m, mi do aba n mi to bye m.
- 23To, kni nu na zhin to ha ya emi agyiwyɛ fi n banki, n nabai esanu n ma zhi n cei mi gwo n dutun ma?
- 24Nsayi wa gna aza nƙa ƙei zhi ƙo nyi ge, fye gwo agyiwyɛ ye n wo cei shi nyi, fya ga oza n wo cei lo ngun awo nyi.
- 25“Ba ciwo ge, Dagayi, ai wo ceilo ngun awo.
- 26“Amma wa ciba ge mƙa gnafye, ozaho-zahoi n wo n cei lo, to, aba ƙewo ƙe-ƙe nu. Amma oza n wo to n cei lo m, ko odo n wo cei bwasun lo ciwiyi nyi ma a ƙei la kwo gwo wo.
- 27To, emi anuwuyi ye nƙa to cei pma ge ma gyibe tu nƙa tukwo nyi m, fye ƙe n ƙai fya wu ƙa zhiya.”

Vivi N Urushelima Yi

- 28She Yesu ƙei zo misali ye da wa go duya lo Urushelima.
- 29Shi wo ƙei wo vi-vi n Baitafaji bedo n Baitanya azhi ho n ƙa zhi vi-vi n epe hoi ai yi kwo ge Zaitun wa tnu owo abara ngun aba n wa bye.
- 30Wa ciba ge, “Fye lo ezhi ye n kwo zhi n fya bye nyi, fye ƙo gye jaki ƙi ho gnifo n ozaho-zaho to shin kwo gun, fya loko ƙe n cei.
- 31N ozaho-zahoi nwa nya fye ƙo ge kwo zhin wuna fyei lokwo a? Fya ciwo ge, ‘Dagayi n kwo ƙoyi pma lo.’”
- 32Abara yi ƙalo ƙa gye nyaho-nyahoi vinya shi Yesu ƙei gnaba nyi.
- 33Shi ƙa ƙei lo jaki yi ya, anyada nyaba ge, “Kninu zhin fyei lo kwo a?”
- 34Ba cige, “Dagayi nu n kwo ƙei pma.”

- 35** Ba lo Yesu n Jaki yi. Nsayi ba zhi ko sildi n ba aje yi, ba gun Yesu tu n kwo.
- 36** Shi wo bei gun kwo be, ba kma o ba je bai tazhi n kni.
- 37** Shi wo bei wu vi-viyi n Urushelima yi n zokwo, nkwo lo Zaitun pe nyi, aza n ba bei viwo be vinya ba la bai gode n Shekwoyi bai ga mwa-mwa bmana-bmana ntu abo wo-woi bo vinya n ba bei gye nyi.
- 38** Bai cige, “Shekwoyi wo tu esu ye anabarka n wo be dna n Dagayi eye nyi. Bugbafu lo n she bedo n mwa-mwai n Shekwoyi aba.”
- 39** Nsayi A farisiyi ho ba dabo n Yesu yi ba cige, “Malam, gna oha zeye n ba nyi nge baku ce pi.”
- 40** Yesu kwa wa ciba ge, “Mba gnafye, n a zaye ba ce pi akutaye ba lamitu nsa.”
- 41** Yesu kwa wa be vi-viyi n Urushelima yi. Esa nu wo bei gye ko wa cibwi kpe kwo.
- 42** Wa cige, “Bugbafu nyalo-nyalo nya bei la wo vi-viyi nfyeyi, ammato fya ye ko m. N saiye kwa esa la lu diya.
- 43** Esa belo esanu ofye anuwuyi bei ye kpe n fye ganuwa bei she fye kna bai gufye fi n mi.
- 44** Ba bei vi fyeya du nfya bi be, n ba fi nfye mi nyi. Ofya nuwuyi to bei fa kuta gmanyi ganuwa nya kwa cetu n do m. Gama fye to bei zhin ampani n gni-gni n Shekwoyi bei gafye nyi m.”

Yesu Dna Nna Duwa-Nyakun

- 45** Yesu kwa wa lodna n aduwa nyakun wa nya aza ya n ba bei fi bai kun anya fi bo nyi.
- 46** Wa ciba ge, “Akafilo n littafi ge aba yi emi puwa ge aduwa nyakun. Amma fye la kwo ze aba n avi bwifi.”
- 47** Yesu kwa wawu ba nya dna n aduwa nyakun fyegy-i-fyegy-i. A prist dnagmayi kwa bedo n amalemi a Yahudawa nyai bedo n na tukwoda yi beye ntuge ba wu wo.
- 48** Amma to ba kpe shi ba ba zhin-zhin n wu m, ntuge aza bei kna owo beda tsubua sosai, har to bai ye ge owo beda gmanyi kwo zun ba tsubua gnana m.

Luka 20

- 1** Nwiyihoi, esanu Yesu bei dna n aduwa nyakun woi wu aza nya woi zhin ba wa'azi nabari manayi nya a prist dnagmai, bedo n atukwoda yi ba be owo aba.
- 2** Ba ciwo ge, “Gnayi gaiciya, Nyikado nu nagaho iko nge ho zhin aboye pya?”

- ³Yesu wa ciba ge, “To mi cei pma lo ma nyafye boho ce.
- ⁴“Fye gna mi Yohanna iko batizma zhin nya mwa, kwo bei gmi n Shekwoyi aba nu ko ka n azanyikwoci aba?”
- ⁵Ba zhin nubo ba cige, “N ya ciwo ge n Shekwoyi aba, to, wa nya yi ge kni nu bei zhin to ya gawo gaiciya ma?”
- ⁶Amma n ya ciwo ge n a zan-yikwoci aba nu, to, a zaye n ba zhi laba nyi, ba kniya akuta n sa, ntuge ba n gaiciyai galo ge Yohanna bei zhin anabi nu.”
- ⁷Ntuce nu ba ciwo ge, “Yita kpe abalo n wo iko bei gmi m.”
- ⁸Yesu wa ci ba ge, “To mita gnafye ce aba n mi iko gmi mi-i zhin aboye pya m.”
- ⁹Nsayi Yesu wa gna aza misali ye wa cige, “Ozaho bei nufwa wa ga akodogo da nge ba zhinwo aba, owohin ce wa laka wa lo ozan n kpai har wa mwasa.
- ¹⁰Shi wo bei zhi, wa tnu owo fyenu ho nge wo lo akodog da yi aba, woi gwo ampanyi be n cei n babei bwa n ofwayi. Amma akodogo da yi ba wan fyenu yi ba luwo ba jewo zeya tna nyaho.
- ¹¹Nsayi maigida yi waje fyenu ho tnu. Amma a kodogo da yi ba wan wo ba luwo sosai, bai zhin wo abo nkwoto kamata m, ba jewoze ya n tna nyaho.
- ¹²Nsayi maigida yi wa tnu n fyenu tahi. Amma a kodogo dayi ba jewowan ba luwo ba shewoya shi lonu n tna nyaho.
- ¹³“Nsayi maigida yi wa zhin nubo wa cige, ‘Mi ba zhin wuna’ a? Mi ba tnu nmi biyi. Ai shi ba bo gye wo bato bei zhin wo nyaho m.’
- ¹⁴Amma shi akodogo dayi bei gye wo, ba cige, Owobi nu beya sosai nya. Yi la wo wu ntuge n ya wu wo, anyagye vinya baku ze eyi nya nu.
- ¹⁵Ntucenu ba wan wo ba shewoya shi n of-wagbe ba wun wo. Nsayi Yesu wa nyaba ge, “To Maigida ye ba zhin kni nu n akodogodaye’ a?”
- ¹⁶“ ‘Ai ko zhin dole nu wabe wa wu azeye vinya, wa ga zado ofwa ntuge ba zhin wo aba.’ ” Shi aza bei wo lonu ba cige, “Shekwo to ye ya zhin abeye pya m”.
- ¹⁷Nsayi Yesu wa shi ba wye wa cige, “To Littafi da knibeyi nu ge, Kuta n anyakun miyi taye m, okonu laze kuta bwakonu nya?”
- ¹⁸Ozaho-zahoi wa ce bonyi n kutayi wo ba bmaya, amma ozaho-zahoi nkutayi kwa kayatu wo, woba viya dugu-dugu.”
- ¹⁹A pirist dnagmai bedo n amalami bei cei pma ntuge ba wan wo, gni nu abayi ntuge ba bei cei kpe ge abo vinya n Yesu bei da nyi, wo bei datu n ba tukwo nu. Amma ba wo aza dna n mwa.

20Ntucenu ba zhi bai dna esa manayi wye. Ba tnu azaho ntuge ba lo bai nya Yesu afo, ngye aza manayi n nabai n Yesu ba da boho nukwoyi n nabai ba lo n woi n a sheria ba.

21Azayi n abei tnuƙa nyi ba lo ba nya Yesu ge, “Malami, yi kpelo ge anya vinya n ho da hoi wu aza nyi gaiciya nu. Yi kpelo ge hota wo oza dna m, amma ho da gaiciya cici. Hoi da nya n Shekwoyi ye ntuge aza ba zhin.

22Gnayi kwo bmiya lo ya gba a Romayi godu ko kwa yito gba ma?”

23Amma Yesu wa ku oƙa bemwi kpe wa ciba ge:

24“Fye wumi agyiwe ho.” She ba bei wu wo wa nyaba ge, “Nyikado hoto bedo n eyei nu tuya?” A cige, “Esu Roma nya.”

25Nsayi Yesu wa ciba ge, “To, Fye ga Esu Roma nya enya ko zhin owo nya. Nsayi fya ga Shekwoyi enya n kwo zhin Shekwoyi nya.”

26Bato bei mi ba wan wo gnibo n azaba m, ntu cenu baku ce pi cei wo ba shi wo bei gaba amsa n wu.

27A Sadukiya ho ba be Yesu aba (Ebanu bei zhin bai cige, azafi kalaku to lo m.) Ba nyawo ge.

28“Mallam, Musa bei gayi wyidna ye ge, Nza fi wa fa owo nyikwo gni ntna bi, to, owo mado wa la nyikwoyi ntuge wa bwa obi n woi ga owo dnagma.

29“To, ko bei zhin lonu n aza ngun tnaba. Oba dnagma vinya wa la nyikwo amma wa fi to woi bwa obi m.

30Ntucenu owo mado n wo bei yatu wo nyi, wa la nyikwoyi.

31Har oza tayi har oƙa ngun tnaba lonu, zaho-zahoi nba wa ku mula pa n nyikwo yi, aku fi to bai bwa bi m.

32Nyikwoyi wa be wa wonya fi ce.

33“To, ewyi n abei ku azafi kala ma, wo bei zhin nyikado nyikwo nu’a? Gama oƙa vinya bei ku mula pa n woi.”

34Yesu kwa wa ciba ge, “Aza n ba fi n anyimiye nyi, ba zhin ba pa mula.

35Amma aza nba bei kuka n vingwo nyi nba ku kunce ntuge bai bwa wye-wyei n anyi deyi bato bei pa mula m.

36Ba wu ngye amalaika nu ba ta mi ba shan fi m. Ba zhin Shekwoyi abi nu ntuge bala kuka n vingwo.

37“Amma ntu fye bo nya bo, ko efi kalaku lo. Musa bei ku wufye dei-dei nge aku aza kala vingwo, ntuge ba bwa wye-wyei nu. Aba n Musa nabari kafilo woi gni n aba ena bei kpe n gbe-gbe amma to koi gyi na nyi m, wa cige Shekwoyi zhin Shekwoyi Ibrahim nyanu bedo n Ishaku yi bedo n Yakubu yi.

³⁸Deye kwa wu ge wo zhin Shekwoyi aza wye-wyeyi nya nu. Toge aza fifiyi nya m, ntuge aza vinya ɓa n wye-wyeyi lo n Shekwoyi aba.”

³⁹A malami ho n ɓa bei zhi ɓo ɓa cige, “Malam ho la ɓo dnagbe dai-dai.”

⁴⁰To aza shan wo ɓenya njesun n sayi m.

⁴¹Yesu kwa wa nyaba ge, “Aba mi a ci n wuna ge Masifu wato Kristi wo zhin Dawuda yawyi nu’a?”

⁴²Ntuge Dawuda n wohin tukwo wa ci dna n Zabura ge, Dagayi wa ci omi Dagayi ge, La sase tu n mi bwazhe bwa.

⁴³Sai miku oho anuwuyi ze oho apita kpe ɓa, ɓa ye fi n ho apita sinta.”

⁴⁴Wato Dawuda bei yi wo ge Dagayi nu. To Masihu ɓa zhin Dawuda yawyi n wuna?

⁴⁵Esanu aza bei zhi ɓai knawo beda tɓubua waci owo abara ge,

⁴⁶Fye zhin peceiye n ɓa Yahudawa malami yi n ɓa cei pma ɓa lo n aje dnagmai kpe nyi, ɓa cei pma a ɓi ɓa gna n mwa-mwai gni n gniko gbe. ɓa zhin ɓa sase kpe n aba manayi nu n aduwa nyakun ɓedo n abai n aza zhi ɓai zhin agmada.

⁴⁷ɓa zhin ɓa zhin aduwa n mwakpa, n mwa-mwa gayi, ɓa ngbayi shi ɓa gyi anyigbayi fi, ɓa gwo ɓa duciya. Oba ta-ta bei la mwa.

Luka 21

¹Nsayi Yesu wa shi awye wa gye agyi-wye da zhi ɓai zhin sadaka n adduwa nyakun.

²Njesun wa gye nyigbayi ho n wo to bei n nyahoi m, woi ya a sisin-kwobo fi ngun aba.

³Yesu wa cige, “Ma gnafye, Nyigbayi ye n wo to n nyahoi lo nyi m, wo ku agyiwyega n du Arzllida ye.

⁴Gama azaye n ɓa bei ga sadaka ɓai kni-kni ɓai ceyafi nu. Amma owoi da wo ga nyaho-nyahoi vinya n wo cei lo nu.”

⁵Azaho n wo abara mi ɓa zhi ɓai da shi adduwa nyakun bei bmiya gni n wu. Nkwo akutayi kpaje daidai ɓedo n nyigun yi n kwo bei zhin kpe n nyakun pa. Yesu wa ciba ge,

⁶“Duk anyaye n fye gye vinya nyi esa ɓelo n kuta gmanyi to bei ce tu n do m. A bei la ɓa kmaya vinya n na je.”

⁷Nsayi ɓa nyawo ge, “Malami kwo bei zhin lonu n knisayi ya? Kni nu bei zhin n nabai yi kpe ge esa lasi nkobo zhin lo nu’a?”

- ⁸Yesu wa ci ba ge, “Fye zhin peceiye, Fye to ku ze aza gbeloi, gama aza nmwa ba be dna n mi ye, bai cige eminu zhin Kristi. Esa lasi, amma fyeto vi ba m.
- ⁹Fye to wo dna esanu fya wo ge a sun akun lo, ko kwa ai shan asu do. Gama ko zhin dole nu aboye pya ba zhin kpa, amma kwo to wu ge esa kmaknayi la ga m.”
- ¹⁰Wa godiya wa ciba ge, “Akni gbo-gbo bei sunkun n ba jei, Asu bei kun kpe aje.
- ¹¹A bei woge ekni shan-shan lo laba, koi saya koi wu aza, mikun bei la lakpe bedo n anyasan yi gbo-gbo, fye bei gye abo nukwoyi bai ga atuze n she.
- ¹²“Amma kafin anyagye ba zhin a bei wan fye, ai zhin fye zamba, ai lo n fyei n na aduwa nyakun ntuge a dafye owa, ai gufye fi n purusuna, ai lo n fyei n asu abye gbo-gbo ntu mi bo.
- ¹³Nsaiy kwa okwonu be zhin ofye sa, fyei da nabari manayi ye.
- ¹⁴Fye ku shiri zhin esa ye nyi to fyei sa abo n amsai n fye ba gna ba m.
- ¹⁵Ntuge mi bei ga fye beda n beyekpe yi nfya nuwuyi to bei mi bai na ofye beda abo m.
- ¹⁶Ofya dada, nfya dnagmai, n fya zai, n fya nugundo yi, ba bei gafye n tukwoda aba har bo wu azaho n fye.
- ¹⁷Zaho-zahoi bei la ze ofye nuwuyi ntu mi bo.
- ¹⁸Amma tukwoyi gmanyi nfye tukwo to bei kaya kwa bwi m.
- ¹⁹“Fye ku zhi dai-dai ntuge fye bei gni fyehin n lonu nu.
- ²⁰“Esanu fye bei gye Urushelima shekna gni n na soja yi, to, fye bei kpe ge esa la si a la kwo ya.
- ²¹To aza nba fi n Yahudiya kwa bo busi lo ape. Aza nba filo n zhimi kwa bo kun ya. Aza n ba lo n fwa to bo zhi api m.
- ²²Gama anyipyeyi ye banu zhin anyipyeyi ta-ta nya, n nabai lit-tafi beda kwa nu.
- ²³Ayya n anyikwo aba nba zhi lo n nuboyi bedo n abiya dai n ba na abi shilo nakun. Esa nukwoi ba be da ekni ye. Shekwoyi minagyi bei tu n aza.
- ²⁴Abei wu azaho n abeyakwoyi. Abei lo n azahoi n knido baku ze oba fyenu. Aza nba ta kpe Shekwoyi ye m, ba bei zhin Urushelima chaka chaka har oba sa kwa nu.
- ²⁵“Abei gye tuze nyipyeyi n apyai har du na kpasu yi. Dna n anyi akni vinya bei zhi bai wo dna laba, bai wo abeci dna n ko kun n bela nyi.
- ²⁶Aza bei zunfi laba, shi ba zhi bai pmi nya nkwo belo n nabye, gama eshe to bei shan sun n kwohin wan shi m.

²⁷N anya deye avun vinya nsayi oza Nugun wato Kristi wo be dna n anyi n iko yi.

²⁸“Esanu nfya gye aboye bai zhin, to, fya ku zhi n shiri zhin sosai ntuge ofye gni-gni la wo vi-vi yi.”

²⁹Nsayi Yesu wa gnaba misali ye wa cige, “Fye pa shinwan bo n na yikwo ge gbayi nyi, bedo n ashiriwan aje yi.

³⁰“Esanu nfya gye bai ci afintolo, wa gu aduwa nyakun nyi, shi.

³¹To kwo wu lonu she fye bei gye aboye vinya bai zhin, to, fye bei kpe ge Shekwoyi bemi kola ga be.

³²“Fye pa ge anya ye vinya ba zhin kafin aza nba fi n anyi ye nyi ba fi vinya.

³³Eshe bedo n kni ba ba duya, amma omi beda kwo ta duya m kpe-kpe.

³⁴“Fye zhin peceiye, Fye to fa agmada n jesin yi har bedo n damuwa anyi nya ba ku fye gnagna m, kada nyipye yi bei be to fyei dna ce m.

³⁵Gama kwo bei be shi agam zhin kwa wan za nyi nu, koye be da aza n anyi ye.

³⁶Fye zhin peceiye, fyei zhin aduwa n nabai n fye ba bwa akala fyei kunya n aboye vinya n lafiya yi. N nabai fye zhi n oza Nugun aba dai-dai.”

³⁷Yesu be zo owo anyipyei kmaknayi lonu woi wunya dna aduwa nyakun. Esanu wyeshe a she wo bei zhin wa gmiya wa lo Zaitun pe, har labmi.

³⁸Aza kwa balo haikali n labmi-labmi ntuge ba wo owo beda.

Luka 22

Ai Pa Yesu Kulu

¹To esa wo vi ntu a Yahudiyi agmada bo (nba zhin bai pa esa n Shekwoyi bei knu n bai n Masar nyi.) A yikwo ge Idin Paska. Esanu n ba bei zhin bai gyi bredi n koto n yist nyi m.

²Sai pirist dnagmai bedo a Yahudiyi malemi ba zhin atna ntuge ba wu wo, amma ba bei zhin bai wo aza dna.

³Nsayi Shetam wa lo Yahuda Iskariyoti bugba. Wo bei zhin Yesu bara nu.

⁴Wa lo wa dabo n prist dnagmai hoi bedo n zai n wo zhin wa gu aduwa nyakun nyi, she ba ba zhin ba wan Yesu nwu.

⁵A daba n mwa har baku ye ntuge ba gawo agyiwyeye.

⁶Yahuda kwa wa ye n agyiwyeye n ba be tuwo nyi. Tunyi sayi wa la ba woi dna esa manayi wye n wo ba ga Yesu nba kun n tna aza kpei.

⁷Ewyi ka ƒe n ƒa zhin agmada n Bredi ntna yist nya nyi, esayi ƒa zhin ƒa wu a kugya ntu paska yi ƒo.

⁸Yesu wa tnu Birtus ƒedo n Yohanna yi nge ƒalo ƒo zhin shiri n paska yi ntuge ƒa gyi.

⁹Ba nya wo ge, “Ho cei pma yi zhin ko shiri n kni bwai a?”

¹⁰Wa ciba ge shi ƒye lofi n zhimi ƒye ƒo gye ozaho n nuwan shakun shi. ƒye viwolo n puwa n wo ƒa lo dna nyi.

¹¹ƒye gna puwa da ge, ma cige wo wufye nyakun n miƒa ƒe ntuge ma gyi paska ƒedo n mi abarai nyi.

¹²Wo ƒa wu ƒye nyakun dotu ho. To ƒye zhin shiri ƒo nu.

¹³Shi ƒa bei lo ƒa gye nyaho-nyahoi dai-dai shi Yesu bei gna ƒa n wu nyi. Ba zhin paska shiri ƒo.

Nyagyi Kmamnayi

¹⁴Shi ƒa bei ku zo esa si n ƒa ƒa gyi paska n cei. Yesu wa sase n wo aba ƒedo n wo abarai.

¹⁵Wa ciba ge, “Awomi pua lo n mwa n nabai ma gyi paska nyagyi ye n ƒyei, kafin mi gye azhin.

¹⁶Gama ma gnafye gaiciya mita je kwo gyi n ƒyei m, sai dai n eshe esanu n kwo bei nu daidai nyi.”

¹⁷Nsayi Yesu wala kap, wato aba n anab nuwan bei fi nyi, wa zhin godiya ga Shekwoyi wa cige, “ƒye gwo ƒya sin ƒyei ce ga je.

¹⁸Gama ma gnafye mita shan anab nuwan ye sin m, Sai Shekwoyi ebemi la ƒe.”

¹⁹Nsa yi wa la bredi wa zhin Shekwoyi godiya wa gnakwo ajeya wa gaba wa cige, “Deye, kwo nu zhin omi nayi (n Shekwoyi n cei ga ntu ƒyeƒo nyi.) ƒye zhin ko lonu ci-ci ƒyei pa mi ƒo.”

²⁰Njesun lonu wa gaba kap ƒai ku nyagyi gyi wa cige, “Kap ye n kohin kwo nu zhin Shekwoyi alkawali woi-woi n wo kwoi tuze n mi ami n a cei zeya ntu ƒye ƒo nyi.)

²¹Amma ƒye wo boho oza n wo ƒa gami n a Yahudiyi akun nyi wo tulo woi gyi nyagyi n gnisun n miyi.

²²Gama oza Nugun ƒa fi shi Shekwoyi n cei katu lo, amma ayya oza yi n wo ƒa gami n ƒa akun nyi.”

²³Nsayi ƒa zhi cei wo ƒa ko nyikadonu n ƒa woi ye wa zhin ƒo lo nu.

- 24** Esanu n ɓa bei ku paska zo zhin bai zhi n abaho, Yesu abara ɓa nabo naje yi, ko nyikadonu ɓo zhin oza dnagmai n (Shekwoyi ebe mi).
- 25** Yesu wa ciba ge, “Asu anyi nya ɓa n ikoi lo tu n oba aza tukwo, Aza n ɓa gyibe kwa a yiɓa ge aza nugun-do.
- 26** Amma deye to wulo lonu n fyei m. Amma oza n wo zhin zad-nagmai lo nfyɛ, to, wu ngye obi nawyi. Oza n wo zhin gnabyelo kwa, to, wola ze ngye fyenu.
- 27** Nyikadonu du lo’a? Oza n wo saseshi woi gyi nyagyi nyi, ko oza n wo ga nyagyi ga-ga nyi’a? Ai ozanu n wo sase shi nyi. Amma mi dna n fya tantasi ngye oza nu n wo ku nyagyi ga nyi.
- 28** Fye ku kunsun n mi vinya n mi anyipyɛi jaraba nya.
- 29** Njesun shi omi dada la iko gami nge mi gyibe nyi, to miɓa zhin alkawali ye n fyei.
- 30** Fye bei gyi fyei sin dna n omi ebemi. Fye bei kpe n abegyɛi ashinkpegye fyei da a Islailayi vinya owa.
- 31** “N sa dohoi Yesu wa ci Siman ge, ‘Siman, Siman, kna tɓubua ha wo shetam la izini gwo, ntuge wa zhin fye jaraba nfyɛ vinya shi fanuyi zhin wa kun osin ya n awyi-byegye nyi.
- 32** Amma miku adduwa zhin ga ho, Siman n nabai n ho gaiciyaga ta shan-shan m. Amma esanu ho bei jezebe dami, to, mi cei pma hoi mi oho azaje zhi.’ ”
- 33** Bitrus wa cige, “Dagayi, mi la ye ntuge malo purusuna ngnisun n hoi, har ma ma fi ngnisun n hoi.”

Ala Yesu Wan

- 34** Amma Yesu wa ciwo ge, “Bitrus, Pise nugba ta cheku n naiye m, Sai dai hola mi aɓo na har abwa ngun ata.”
- 35** Nsayi Yesu wa ciba ge, “Esanu n mi bei tnu n fyei ntna agyiwyɛ ko pwakun, ko kwa ntna abuadanyi, fye bei ku gyi nyaho san a?” ‘Ba cige, “awo.”
- 36** Yesu wa ciba ge, “To, nsaiye dai zaho-zahoi n wo n agyiwyɛi lo kwo kwa apwakun, wola la. Oza n wo to n ebeyakwoi lo m, to, wo kun owo eje ntuge wa si, ebeyakwo.
- 37** Gama ma gnafye, dole ɓeda kwa nu n acei kafi n Littafi ge, Abei ɓewo do n alaifi dayi. Gama ɓeda n kwo kafi n mi tukwo nyi kola wo vi-vi kwa nu.”
- 38** Owo abara ɓa ciwo ge, “To ai yi n abeyakwoi shi nyi ngun aba.” Yesu wa cige ɓaku kun lonu.
- 39** Yesu wa fa zhimi shi wo bei zhin woi zhin ci-ci, wa lo Zaitun pe. Owo abara ɓa kun lo ngnisun n woi.

⁴⁰Esanu wo bei si aba n wo zhin wa shi nyi wa ciba ge, “Fye zhin aduwa n nabai to fya kayafi n jaraba m.”

⁴¹Nsayi wa lo n kpai fyewyi wa ce akwo-kwo, wa zhin aduwa wacige,

⁴²“Dada, n haye fa wahala ye kwa dumi ya, to kwa be ma ba m. Amma to vi omi bemwi sai-dai oho nya.”

⁴³Malaika gmi n she nsayi wa be wa mi wo gni;

⁴⁴Dna n wahalayi Yesu wa zhin aduwa n gaiciya, har amisa ba kpe ngye ami kolo kawai, bai kunya zhi nkni.

⁴⁵Esanu n wo bei laka n aduwa zhin ba wa lo wa gye owo abara zhi bai wan gye. Ai ku ba be ce n wahalai.

⁴⁶Wa nyaba ge, “Kni nu zhin fyei wan gye’a? Fye kukala fya zhin aduwa n nabai to fya kayafi n jara ba m.”

⁴⁷Esanu Yesu bei ye gni wo dabo, aza n mwa ba be, Yahuda Yesu bara yi owo nu bei gyi be nabye, wa be wa zhin Yesu sumba, ngye nugun-do.

⁴⁸Yesu wa ci ge, “Yahuda ho ga Oza Nugun n sumbai nu?”

⁴⁹Amma Yesu abara n babei zhi n woi nyi, bai gye enya nkwoye kwa zhin ba, “Dagayi, yi zhin ampanyi n abeyakwoi ya ce ba ya?”

⁵⁰Zaknayi nba mi wa zun prist dnagmayi fyenu tnuhua bwaizhe nya ya.

⁵¹Amma Yesu wa ciwo ge, “To zhin aboye pya m.” Wa to zayi tnuhua bwa kwa wo kagna.

⁵²Nsayi Yesu wa ci a prist dnagmai, bedo n adan-doka aduwa nyakun nya yi, har bedo n atukwodai n ba bei be ntuge ba wan wo nyi ge, “fye be zhi n abeyakwoi n abusi shi ge na? Fye ye fya wan evi nu?”

⁵³Ai mi bei gnisun n fyei n aduwa nyakun fyegy-i-fyegy-i, amma to fya wan mi m. Amma deye kwonu zhin efye sa, esanu n shetan iko zhin tnu-tnu lo.”

Bitrus Wa Na Yesu Yekpa Bo

⁵⁴Nsayi ba wan Yesu ba lo n woi n pirist dnagmai puwa. Bitrus wa viwo n kpai.

⁵⁵Ena bei fin zhi n puwayi a tan-tansin, bai sase zhi bai wye. Bitrus wa be wa sase shi n gnisun n bai.

⁵⁶Esanu obi nyikoi ho n wo zhin tnu-tnu n puwa yi, bei gye Bitrus shi n ena ba. Wa shi Bitrus awye zu uuu wa cige, “Ai zeye kunsun lo n woi nu.”

⁵⁷Amma Bitrus wa nabo wa cige, “A’a mita kpewo ye lo m.”

⁵⁸Esa fyewyi ozaho wa gye Bitrus njesun wa ciwo ge, “Ai ho zhin gmanyi nu n gnisun n bai.” Amma Bitrus wa cige, “Sam.”

⁵⁹Ngwe awa-gmanyi avun, zaho wa gyitu, woi cige, “Ai ata mi a nafo ge zeye kunsun lo n woi ntuge wo zhin Galili yi zanu.”

⁶⁰Amma Bitrus wa cige, “Kai ozaye, mita kpe oboye lo n ho gni hoi da m, Sam, sam.” Esanu wo bei gni woi dafo n cei nyi, pise-nugba kwa cekwu.

⁶¹Yesu wa shi Bitrus awye, nsayi Bitrus wa pa Dagayi beda shi wo bei da ge, “Kafin pise kwo cheku n naiye ho bei na ma fo har abwa ngun ata.”

⁶²Bitrus wa gmiya, wa cibwi n wyei kana.

⁶³Aza n ba bei zhi bai gu Yesu nyi, ba kpe wo agye, ba luwo.

⁶⁴Ba guwo awye ba luwo, ba ciwo ge, “Nyikado nu na lu ho’a?”

⁶⁵Har ba gnawo abeda nukwoyi laba.

⁶⁶Shi of ye bei gyi, a prist dnagmai bedo n amalami attaurat nyai bedo n atukwodayi ba yezhi a be n Yesu n ba tan-tasin.

⁶⁷Ba nyawo ge, “Gna yi, ho zhin Masifu nu?” Wa ciba ge, N ma gnafye, fyeta gami gaiciya m.

⁶⁸Nma nyafye beda fyeta gami amsa m.

⁶⁹Amma daga nsaiye, Oza N ugun ba sase tu n Shekwoyi bwai-zhe-bwa iko da.

⁷⁰Ba nyawo n obogmanyi ge, “Ho zhin Shekwoyi nugun nu?” Wa dnaobgbe wa cige, “Fyeku da ge mi zhin wo nu.”

⁷¹Nsayi ba cige, “Ai yita shan seida ho ye lo m. Gama yiku wo n yi a tnuwai woi da n wo gbei. Yiku wo n yi a tnuwai woi da n wo gbei.”

Luka 23

Yesu Wada Nwo Knizun-yi

¹Oba vinya n ba bei yezhi fo, nyi ba la Yesu ba lo n woi n Bilatus aba.

²Ba lo bai tuwo fo, bai cige, “Ya wan zeye woi dna aza koche woi gna ba ge ba to gba esu Roma nya gadun. Njesun woi cige wo zhin Kristi nu. Wato Esu nu.”

³Bilatus wa nyawo ge, “Ohonu zhin A Yahudiyi esu?” Yesu wa dnabo gbe wa cige, “Ho ku da n ho gbei.”

⁴Nsayi Bilatus wa ci a pirist dnagmai bedo n amalemi attaurat nyai ge, “Mi to gye wo n laifi hoi, n kola kunce ma wu wo m.”

⁵Amma ba du-du ba gyitu ge, “wo zhin aza lo bai kpe akala. Enya n kwa laka n Yahudiya koi lo Galili. Ga shi wo la be ya woi zhin ba lo nu.”

⁶Shi Bilatus bei wo lonu wa nya ge, “Zeye gmi n Galili nu?”

⁷Shewo bei wo ge Yesu gmi n ekni nu n Hiridus gyibe tu nkwo nyi, wa I tnu n woi n Hiridus aba. Hiridus bo dna n Urushelima n sayi.

⁸Shi Hiridus bei gye Yesu a dawo n mwa, gama wo bei ku abo wo n mwa n Yesu tukwo har ma woi ye ntuge wa gye Yesu wye, amma to wa min. To wo bei gye ge Yesu ba zhin abo wo-woyi nsayi Bilatus bei tnu n woi n wo aba nyi.

⁹Ntucenu Hiridus wa nya Yesu abo n mwabegye amma to Yesu wa dnawo bogbe m.

¹⁰A pirist dnagmai bedo n amalemi attaurat nya yi ba kun zhi bai tu Yesu bo n Hiridus aba.

¹¹Hiridus bedo n wo a sojai ba zhin Yesu zamba. Ba kpewo esuje, nsayi ba jezelo n woi n Bilatus aba.

¹²Nwyyi Bilatus n Hiridus yi baku ze anugundo. Amma babei zhin aje Inuwuyi nu kafin n wyi yi.

¹³Bilatus wa yi a pirist dnagmai zhi bedo n a Yahudiyi atukwodayi.

¹⁴Wa ciba ge, “Fya be mi n zaye yi, fyei cige wo dna aza kwoce lo. To mi ku owa dawo fyei gye, amma mi to gye wo n laifi hoi dna n anya, vinya n fya be n cei nyi m.

¹⁵“Hiridus ce to bwa laifi ho n wo m, gama wola Yesu jezeya gayi, zeye to zhin nyaho nukwoi m, n ko kunce lo a wuwo m.

¹⁶Mi ga gbe ge a zhin wo bulala nsayi ma yawo wa lo kawai.”

¹⁷Dna n paska doho-dohoi sa, Bilatus zhin wa lo Purusuna da ho ya gmanyi.

¹⁸Doji vinya n ba bei yezhi bo nyi ba la begye tu ba cige, “A wu wo, lo Barabas ya ga yi.”

¹⁹(Abei n Barabas yi dna n purusuna ntu tashin hankali bo nu njesun n zawu tukwo.)

²⁰Bilatus bei cei pma ntuge wa fa Yesu. Ntucenu wa gna aza ge ba ku ce pi.

²¹Amma ba gna ewyi be-be nu. Ba cige, “a zun wo du! A zunwo du!”

²²Bilatus wa ciba, 'bwa tahi ge, “Amma wo ku kni bei nu zhi'a? Mi to gye enya n wa zhin n kunce n fi m. Mi ba da a zhin wo bulala a yawo kawai.”

²³Amma ba bewyi n gaiciyai bai cige a zun Yesu du. Ba ku nasara gyi.

²⁴Har Bilatus wa efi ta-ta zuntu Yesu, shi aza bei ye n wu.

²⁵Wa lo Barabas ya n ba bei ye nyi, n abei wo dna n purusuna ntu tashin hankali bo nyi bedo n zawu bo njesun. Wa la Yesu wa gaba ntuge ba zhin n woi shi ba ncei pma.

²⁶Ba gwo Yesu ba lo n cei. Shi ba bei lo n zokwo ba gye zaho ai yi wo ge Simon, woi gmi n ezhi ho ai yi kwo ge Sirene, wo bei zhi kauye ho n sayi. Ba wan wo ba tuwo tile ge wo la Yesu zundu wa vi Yesu be n navun.

²⁷Doji n mwa bei viwo be, Nbami anyikwo ho bei be bai cibwi ntu Yesu bo.

²⁸Amma Yesu wa pi gni wa ciba ge, "A Urushelimayi anyikwo, fyeto cibwi n mi bo m, amma fye cibwi n fyehin tukwo bo n fya i yi.

²⁹Gama esa belo n aza bei cige anabarka danu n anyikwozai nbato ma abi m, nba to bwa abi m, n ba to zhin ba atna m.

³⁰Esayi nu n aza bei ci ape ge, Fye miya kpe yi, bei ci ape bi-biyi ge fye bi yi fi."

³¹Gama shi ba zhin aboye pya kpemi omi n mi zhin Shiwan wye-wyei nya, ba bei kafye zhin-zhin n wuna?

Ala Yesu Zundu

³²Ba ku avi ngun aba n nabai ba wu ba ngnisun n Yesu yi.

³³Esanu n ba bei si aba n na yi ge Kwaluwa nyi, ba zun Yesu du tu bo. Ba ku avi yi ngun aba, ba zun ba du gmanyi n wo bwaizhe gmanyi n wo bwapmi bwa.

³⁴Yesu wa cige, "Dada, zhin ba gafara gama bata kpe oboye lo n ba zhin m." Ba gna owo aje n kuriya yi.

³⁵Aza zhi bo bai shi wo awye. A Yahudiyi yi tukwoda bai kpewo agye bai cige, Wo gni aza, to, wo gni ewohin tukwo mana, ngye wonu zhin Masifu n Shekwoyi wa tnu n woi nyi.

³⁶A soja n bahin ba kpewo agye. Ba be ba gawo anab nuwan mamayi.

³⁷Ba cige, "Gni ohohin ngye honu zhin Kristi a Yahudiyi esu."

³⁸Rubutu bei ka kpe nwo zundu ge "AYAHUDIYI ESU NU NYI."

³⁹Evi gmanyi n na bei zunwo du ngnisun n Yesu nyi, wa ci wo ge, "Ohonu to zhin Masifu m? To, gni hohin tukwo n gnisun nyi mana."

⁴⁰Amma oza bayi wa ci eviyi ge, "Haba, emi zado. Hota wo Shekwoyi dna m? Yi gnifilo n ta-ta gmanyi nu.

⁴¹Amma eyi tat-ta wulo dai-dai, gma yi gwo eyi lada nu bisaga enya n ya zhin. Amma owoi da to zhin laifi ho m."

⁴²Nsayi wa ci Yesu ge, "Yesu, pami bo dna n ho ebe mi."

- ⁴³Yesu wa ciwo ge, “Ma gnaho gaiciya, Nnaiye, ho kunsun lo n mi-i n Paradisi.”
- ⁴⁴Esanu nyipyeyi bei la gun atukwo to kwa shan buzangna ga m. Wyegma kwa dna duruum har nyipyeyi kwa bmaya ngye sunkna ngu ata.
- ⁴⁵Labule n kwo bei gyi n aduwa nyakun nyi, kwa ngajeya ngun aba.
- ⁴⁶Yesu wa la begyetu wa cige, “Dada, n ho akun nu mi ga mi wye-wyeyi.” Shi wo bei zoda lonu wa fi.
- ⁴⁷Asoja tukwoda ho n wo bei gni bo, shi wo bei gy lo nu wa ci Shekwoyi wa cige, “Lalle, zaye bei zhin oza manayi nu.”
- ⁴⁸Shi aza nba bei yezhi bo bai gye nya nkwa zhin vinya, ba jeze lo api n bugba wun yi.
- ⁴⁹Aza n ba bei kpe Yesu ye nyi, bedo n Anyikwozai n ba bei kun n Galili bai viwo nyi, ba ku zhi n kpai bai gye aboye vinya.
- ⁵⁰⁻⁵¹To, zaho bei nyi ai yiwo ge Yusufu, woi gmi n Ezhi ho ai yikwo ge Arimatiya. Wo bei zhin oza manayi nu n hankali yi sosai woi pmi Shekwoyi ebemi, be-be bo. Ko shiko nyi wo bei dna n aza n ba bei zhin shawara ge a wu Yesu nyi wo to bei vi n banya m.
- ⁵²Yusufu yi wa lo Bilatus aba wa nya ge, a fawo wa la Yesu nayi.
- ⁵³Nsayi wa shin wo shi, wa kmi wo dna n aje manayi walo wa yawodna n vingwo n a bei ji kwo nkuta dnagmai ho. Zaho-zahoi tobei shin ampanyi zhin n vingwo yi m.
- ⁵⁴Jumawyi nu bei gni nwyi Esa la wo vi-vi n a Yahudiyi sun-sun nyipyeyi ba be n cei wato Satiwiyi nu. (Ba bei zhin bai ya oba nyipyeyi n wyeshei nu.)
- ⁵⁵Anyikwoza n ba bei kun ngnisun n Yesu n Galili nyi, balo ngnisun n Yusufu yi, ba gye vingwo yi njesun ba gye shi wo bei ya Yesu dna n wu.
- ⁵⁶Nsayi azaho ba jezelo api ba zhin shiri n emi asinda nyai ntu owo nayi bo. Nsatiwiyi baku sun shi owa bai zuntuba nwu. Wato Musa owa nu.

Luka 24

Wo N Wye-wyeyi Lo Njesun

- ¹Shi ofye bei gyi n Ladiwiyi, anyikwoza yi ba kun n labmi-lbmi yi ba lo vingwo n omi asindnyai shi.
- ²Ba gye ala kuta pmiya n ko bei gu n vingwo gbe nyi.
- ³Ntucenu ba lofi. Amma shi ba bei lofi to ba gye Yesu nayi shi m.

- ⁴Shi ƒa ƒei gye lonu ƒaku je-je. Amma n sayi-sayi azaho ngun aba ƒa kunzhi n najei kpe n bu-bui pashau.
- ⁵Edna kwa wo anyikozayi ƒa ce akwo-wko zhi, esanu azayi ƒei daƒo n ƒai ge, “Kni nu zhin fyei zan oza wye-wyei shin n azafi aba?”
- ⁶Ai wo to gnɪ lo ya m, wola lakala. Fye pa enya n wo ƒei gnafye woi ye nyi n Galili ge:
- ⁷“Aƒa ga Oza Nugun n alaifida akun a zun wo du, amma woba laka dna n anyipyeyi tayi.”
- ⁸Nsayi anyikozayi ƒa pa ƒedaye ƒo.
- ⁹Ba jezelo api ƒa gna owo abara ngun awo-cei gmanyi ƒedo n azajei n mwa.
- ¹⁰Ayi anyikwozayi Maryamu Magadaliya, Yuwannan ƒedo n Maryamu n wo zhin Yakubu ya nyi. Oba ƒedo n anyikoza ajeyi ƒa gna Yesu abara aƒoye vinya.
- ¹¹Amma to Yesu abara ƒa ga ƒedayi gaiciya m, ƒai gye ge anyikozayi gbe akata fi ƒa nu ka wai.
- ¹²Amma Bitrus wa lakala wa busi lo vingwo n wohin, shi wo ƒei yawye shi wa gye aje nu kawai n ƒabei puwo nyi. Nsayi wa jezelo api woi zhin nubo si koba ze nwo lonu.
- ¹³Nwyyi kwa Yesu aviyyi ngun aba ƒai fi n zokwo bai daƒo lonu Imwasu, Ezhi yi nyi ngye mil ngun tnaba nu n Urushelima yi.
- ¹⁴Alo ƒai daƒo tu anya ƒo nƒa zhin vinya n Yesu tukwo.
- ¹⁵Shi ƒa ƒei lo ƒai daƒo lonu Yesu wa yeƒe vi-viyi n ƒai ƒa lo ƒai gni zan-zan.
- ¹⁶Shi ƒa ƒei gyewo to ƒa kpe wo ye m.
- ¹⁷Yesu wa nyaba ge, “fye lo fyei da knibeɪ nu lai’a?” ƒa ku pizhi n na wyebai wun fi.
- ¹⁸Zaknaye n ƒa, ai yiwo ge Kiliyobas wa nyawo ge, “Oho nu bwace dnalo n Urushelima ye n ho ta kpe oboyelo n kwa zhin n anyipyeyi avun nya ye m?”
- ¹⁹Yesu wa nya ƒa ge, “A kni boya? A ciwo ge, anya n ƒa zhin n yesu yi n wo gmi n Nazarat nyi. Wo ƒei zhin anabi nu har ma Shekwoyi ƒedo n azai vinya ƒei ciwo ntu aƒo wo-woyi ƒo n wo ƒei zhin nyi.
- ²⁰“Amma eyi aprist dnagmai ƒedo n ya begyi yi ƒa wan wo ƒa gawo ntuge azun wo du.
- ²¹Yi ƒei n wyetu yi ge owo nu ƒa gni Israila. To nyipyeyi tayi nu shi aƒoye ƒei zhin.

- 22“Anikozaho n yi baku beyi n nabari hoi to yi kpe ce yem, ba lo vingwo n labmi-labmi yi.
- 23Ba to gyewo nayi shi m, ba jezebe bai cige, baku gye amalaika ho bai gna ba wo la lakala n vingwo.
- 24Azaho n i kuwa bai lo vingwoyi bai gye gaiciya nu, amma bato gyewo wye m.”
- 25Nsayi Yesu wa ciba ge, “Ai fye zhin a ma-ma nu kni nu zhin to fyei ga anabi beda gaiciya n pye-pye n ma’a?
- 26Ai kwo bei zhin tile nu ntuge Masifu wa sin wahala ye n sayi walo owo daraja.”
- 27Nsayi Yesu wa wu ba enya nkwo kafi lo n wo tukwo n Littafi enya n kwo ya n Attaurat har kwoi lo annabi.
- 28Shi ba bei wo vi-vi n ezhi hoi n ba bei lo nyi, Yesu wa zhin ngye woye wa duya.
- 29Amma ba bawo ge wola wangye ngnisun n bai ntuge wyeshe bei la she. Ntucenu wa ye n ba nya, wa bmadna n gnisun n bai.
- 30Shi abei be n nyagyi wa sase ngnisun bai, wa shin bredi wa zhin Shekwoyi godiya, wa gnakwo ajeya wa gaba.
- 31Nsayi oba wye ba guya bmagyi ba gane ge Yesu nu gni, amma wa bwi ba wye n sayi-sayi.
- 32Baci aje ge, ai yi bei wo agmada pya ho esanu n wo bei daɓo n yi be n zokwo nyi. Woi wu yi enya kwo kafi lo a Littafi nyi.
- 33Ba kukala bajeze lo Urushelima bagye owo abara n yezhi ngun awocei-gmanyi bedo n azajei.
- 34Ba cige, “Lalle Dagayi la lakala n vingwo gama wo ku wohin tukwo wu Siman.”
- 35Oba ngun aba baku obanya da nya kwa zhin vinya n zokwo, n jesun shi ba gane n woi esanu wa gna brediya gaba nyi.
- 36Esnu n ba bo yezi bai da aboye sa fyewyi, ba je-je ba gye Uesu gni n ba tansin kawai, wa ciba ge, “Bugbafu nfya ba.”
- 37Bazhi ednai wo ba bai gye ge zafun nukwoyi ho nu gni.
- 38Amma Yesu wa ciba ge, “Kni nu zhin fyei la damu’a? Kni nu zhin to fyei ga gaiciya ma?
- 39Fye shi mi abwa awoye n mi apitai fya kpe ge emi nu gni sosai. Fye to mi bwa fya gye gama zafun to n nayi m, bale a cige kwo bw asunkun, shi fye gye mi n cei nyi m.”
- 40Shi wo bei d lonu wa-wuba owo abwa n apita yi.

⁴¹Amma to ba du-du ba ga gaiciya m, gama ba bei nuzhi n agmadai nu cei wo ba. Ntucenu wa nyaba ge, “Fye n nyagi lo ya?”

⁴²Ba gawo wye sala bi ho.

⁴³Wa gwo wa gyikwo gni nba bye vinya.

⁴⁴Nsayi wa ciba ge, “Aboye nyi n mi bei gnafye esanu n mi bei kun-sun n fyei nyi. Nyaho-nyaho n kwo kafi lo n Musa Littafi n mi tukwo beda n annabi bei ka har bedo n Zabura yi ba ku nu.”

⁴⁵Nsayi wa guba tunaniya ntuge ba gane n nyai n kwo kafi lo n Littafi.

⁴⁶Wa ciba ge, “Nya nyi nkwo kafi lo nge kwo zhin tile nu Masifu wa sin wahala har wa laka n vingwo n nyipyeyi tayi.

⁴⁷Njesun ge dna wo eye nu aba zhin wa’azi ntuge aza ba bwa gafara n ba laifi. A zhin aza vinya, kwoi ya n Urushelima.

⁴⁸Fye zhin asaida-da nu aboye vinya.

⁴⁹“Emice, mi ba tnu fye n nyai n mi dada ku alkawali zhin. Amma fye ku pmi fi n zhimi ye saidai ikwo n kwo gmi nshe kola be da fye.”

⁵⁰Nsayi wa kunbaya zhi nbmi wa vi zokwoyi n kwolo Baitanya nyi. Wa ku abwa wu nshe wa tuba anabarka.

⁵¹Shi wo bei gni woi tuba anabarka yi Walakala tu she har wa bwi ba wye woi gun n sheyi.

⁵²Ba zhin wo sujada zhi bo, Nsayi ba jezelo Urushelima n nu-nuyi n agmadayi.

⁵³Baku fi adduwa nyakun n saho-sahoi vinya bai zhin Skekwoyi gwodiya.

Yohanna

Yohanna 1

Buzangna Dna N Wyegma

¹N kmisunhi Beda bei nyi, Bedahi bei kunsun n Shekwoyi, Bedahi bei zhin Shekwoyi nu.

²Kafin a zhin nyaho-nyahoi wo bei kunsun n Shekwoyi.

³Owo beda na zhin anya vinya. Nyaho-nyahoi to lon n wonu to zhin m; anya vinya owo nu na zhin.

⁴Wye-wyeyi nyi nwo mi, wye-wyeyi kwa ko zhin anyi buzangna nu.

⁵Buzangnahi kwoi kna aba ya n wyegma. Wyegma kwa kwo ta mi kwa gyi kwo sun m.

⁶Oza bo nyi ai yi wo ge Yohanna, Shekwoyi nu bo tnu n woi a mawo.

⁷Wo bo be ntu ge wa zhin saida ntu buzangnahi bo nu. Wato Yesu nu zhin buzangnahi.

⁸Yohanna nu to bei zhin buzangna m, wo bo zhin saida buzangna nya nu kawai.

⁹Nwo avun, buzangna gaiciya nya kwa be kwa knaya na 'za vinya aba nba fi nanyi.

¹⁰Owo nu bo zhin anyi ye, Wa be anyi n wa Zhin nyi. Ama anyi ye to bei kpe wo yen.

¹¹Wa be a Yahudiyi aba, n wo hin kni, ntu ge ba nu zhin wo aza, ama to ba gwo won, akpe aza fyewyi kawai n ba mi.

¹²Ama zaho-zahoi nwa gwo wo, wo bei la iko ga wo wa ze Shekwoyi bi. Onya nyi kawai n za ba zhin Wo la gaiciya ga, Yesu ba gni wo.

¹³Aza nba ga wo gaiciya ba ku zhin aza n na la ba shan ma. Toge nayi nami nu, kwokuwa n za bemwi m, ama Shekwoyi na ma ba dna n wo be ye.

¹⁴Yesu bo la ze Oza wa dna n anyi ye n yi atasin. Yi ku wo latu gye wye. Latu Shekwoyi bi gba nya nu. N nunuyi na alheri n gaiciya yi.

Yohanna La Yesu Gmiwu

¹⁵Yohanna bo zhin wo saida wa gna aza vinya ge, "Oza nyi n mi bo gna fye wo bo nyi. Mi bo gna fye ge wo be lo n ma avun. Wo hin kwa wo dumi lo kpolo-kpolo, wo bei nyi tunyi sapai, wo kwo mi lo. Kafin a ma mi wo bo nyi."

- 16**Eyi vinya yi ku amparyi bwa, n alheri dnagmayi nwa be yi n cei woi tu yi anabarka mwa-mwayi.
- 17**Gama Musa bo ga yi owa n kwo gmanyi yi, ama Yesu bei be yi n gafara zhin yeye nya yi bedo. Alheri gna owa Musa nya bmiya lo, ntuge owa bo gna bo dna, n na be yi kpakpeyi gbo-gbo nduwyi.
- 18**Ozaho to shin Shekwoyi wye ggem, sai Yesu gmanyi n wo nu kunsun n Shekwoyi nyi. Yesu, owo bi-gba, Shekwoyi zabayi, owo nu gna yi Shekwoyi bo.
- 19**A Yahudawayi bo tnu na priest yi bedo na Levi yi n Urushelima. Ba be Yohanna 'ba ntu ge ba gye za n wo zhin Yohanna. Ba lo ba nya Yohanna bo ge, Ho zhin Masihu nu?
- 20**Yohanna gna ba gaiciya, ge "Mi to zhin Kristi nu m."
- 21**Ba je wo bo nya n ge, "Ho zhin Iliya nu?" Wa gna ba ge, "a'a." Har saiye ba nya wo bo, "Ho zhin anabi ho nu?" Wato n Shekwoyi bo zhin alkawali nyi, wa cige, "A'a."
- 22**Ba nya wo sayi ge, "Ho zhin nyikanu? Yi ye ya gna aza n ba tnu yi tnu-tnu nyi. Wu yi hohin bo vinya?"
- 23**Yohanna gna ba ge, "Mi zhin begye nu kawai dna zhabui. Mi zhin zokwo ga Dagayi nu wa be shi Anabi Ishaya bei da nyi."
- 24**A Yahudiyi n na Farisiyi ba nya wo bo n jesun ge.
- 25**"Shi ho to zhin Kristi nu nyi m, ko kwa Iliya kwo anabi nyim, Nyika ga ho iko hoi zhin batisma?"
- 26**Yohanna ci ge, "Mi zhin batisma n nuwan nu kawai ama za gni nyin n fye atasin, fye ta kpe wo ye lon.
- 27**Esa to ce lo nkun, wo ba ya tnu-tnu n fya ba. Mi to kunce lo ma, ma ze wo baran."
- 28**A bei zhin afo deye n Baitanya nu. Kwo nyi n Urdun kma nu, aba n Yohanna bo zhin aza batisma nyi.
- 29**Sa n fye bei gyi, Yohanna gye Yesu woi be, wa cige, "Fye gye kugya biyi Shekwoyi nya nwo nu la alaifi anyi nya vinya nyi.
- 30**Fye pa lo? Owo nu n mi bo gna fye wo bo nyi, nge oza belo n ma vun, nwo du mi, ntuge wo bei nyi na bye-abye, wo gyi n mi abye.
- 31**Mihin to bei kpe wo yem, ama mi zhin batisma n nuwan yi, ma wu a Israilayi wo nu."
- 32**Yohanna gna, "Ma gye Zafun Gyi-gyi-yi wo gmi n She ngye lukpe, kwa yatu n Yesu.

³³“Mihin to bei kpe wo yem, sai dai Shekwoyi nu bei gna mi nge, ‘Shi ho bo gye Zafun woi yatu n zaho, Owo nu. Owo nu zhin aza batisma n Zafun Gyi-gyi yi.’

³⁴Ma gye Zafun Gyi-gyi yi woi yatu nwo. Ma ga gaiciya ge zeye nu zhin Shekwoyi bi.”

Yesu Nla Anugundo Kni

³⁵Of ya gyi, Yohanna yi gni n kun-sun n wa barayi, oba aba.

³⁶Wa gye Yesu woi be. Wa shi wa wye daidai, wa cige, “Gye! Shekwoyi Kugya biyi lonu.”

³⁷Yohanna bara ba ya Yesu vi.

³⁸Yesu wa bmiya awye wa gye bai viwo, wa nya ba ge, “Fye ye kninya?” Ba gawo amsa ba cige, “Maigida, ho dna lo n na?”

³⁹Wa ciga ge, “Fye be fya gye.” Ba be ba gye aba n wo bei dna. Wyeshe bei la she, ntu ce nu ba Ku gye wan n woi.

⁴⁰Zaknayi nba, ai yiwo ge Andrawus, wo nu zhin Siman Bitrus mado.

⁴¹Andarawus wa lo wa zan Siman shin, wa gna wo ge, “Yi ku gye Kristi wye.”

⁴²Wa be n Siman yi n Yesu aba. Yesu wa ci Siman ge, “Oho nu zhin Siman, Yohanna nugun. Ama aba yiho ge Kefas wato apma nu.”

⁴³Ofye a gyi, Yesu wa laka wa be Galili wa gye Filibus wa gna wo ge, “vi mi.”

⁴⁴Filibus ho bo gmi n Basaida nu. Basaida kwa kwo zhin Andarawus ayi nu, edo n Bitrus yi.

⁴⁵Filibus wa be da Natanailu wa ciwo ge, “Yi la gye gniyi wye, n Musa bedo n anabi yi bei da wo bo, n Alkawali kwo-kwoyi nyi Owo nu zhin Yesu n wo gmi Nazareti. Wo nu zhin Yusufu 'bi.”

⁴⁶Ce bei wo Natanailu n gaiciya yi. Wa gna ge, Nazareti! “Enya manayi ba gmi n Nazarati?” Filibus wa gna wo ge “be ha gye n hohin yi.”

⁴⁷Shi Yesu bo gye Natanailu bai be wa ci ge, “Gyewye, wo nu zhin Israilayi behin-hin nya, wo ta zhin awyebui m.”

⁴⁸Ce bo wo Natanailu n gaiciya yi, wa nya Yesu bo ge, “Ha kpe mi ye nna?” Yesu wa ci wo ge, “To na bom, sanu n ho bei shi n shinwa gna nyi, ma ku gye ho kafin Filibus wo yi ho.”

⁴⁹Natanailu wa gaiciya ga, wa ciwo ge, “Maigida, Oho nu zhin Shekwoyi nugun, ho nu zhin Esu Israila nya.”

⁵⁰Yesu wa nyawo ge, “Ho gami gaiciya shi ma gna ho ge, ma ku gye ho n shinwa gna?” Ho ba gye abo mwa-mwa yi n dudu bo.

⁵¹Ho ɓa gye eshe kwoi guya, ho gye a mailaika ɓai shin zhi ɓai je gun, dami, Oza nugun.

Yohanna 2

Mulapa N Kana

¹Shi anyipyei ngun aba ɓo la, diya, Yesu 'ya wa lo mula pa n Kana Galili nya.

²Yesu ɓedo nwo abara ɓei nyi ce n mula pa 'bahi.

³Esa nu nya sin-sin yi ɓo ku zo na mula pa ba yi, Yesu 'ya wa gna Yesu ge, "Gye nyasin-sin yi ku zo."

⁴Yesu wa ci wo 'ya ge, mita zhin nyaho-nyahoyi n saiye m. Ai omi sa to sin n mi ɓa zhin obo wo-woyi nyi m.

⁵Yesu 'ya wa gna atnu-tnui ge, "ɓo wa gna fye ge fye zhin, fya zhin."

⁶A shakun yakwo ɓei zhin ɓo n gun tnanyi, a shakun akuta nya nu ɓei. Baɓo zhin ɓai gyi a garuwa-kanazuru nya ngye shiba (20) ko kuwa shita (30), a Yahudiyi ɓei zhin amula ɓo n ɓai nu.

⁷Yesu wa ci ge, "Fye nu ɓa n nuwan yi." Nsayi-sayi-i yi, ɓa nuba.

⁸Yesu wa ci ɓa ge, "fye lo cei fye ga mula-tukwoda." Bahin kwa ɓa lo n cei.

⁹Shi wo ɓo to wo, to wakpe aba n kwa gmi m, ama atnu-tnuyi da ɓei kpe. Ntu cenu mula tukwoda wa yi mula ɓa.

¹⁰Wa ci wo ge, "Nyasinsinyi ye dalo sosai. Knihin nu na zhin ai ɓei n deyeyi so shi a? Azaje zhin ɓa ɓe n nyasin-sinyi manayi nu na bye. N kwa ku zo, a kma ɓe n nukwoyi yi."

¹¹Deye nu ɓei zhin ɓo wo-woyi kmisunyi, n Yesu ɓo zhin dna n Kana Galili nya. Shi owa bara ɓo gye wo mwa-mwa, ɓa ga wo gaiciya.

¹²Shi na ɓo knu na mula ɓo zhin ɓa, Yesu wa lo Kafarnahum n wo 'ya yi n wa zaje yi, n wa barai, ama ɓa to ɓo mwasa n ɓom.

Aduwa Nyakun To Zhin Gniko Num

¹³Esa nu Paska ɓo la wu viyi, Yesu wa lo Urushelima.

¹⁴Wa gye aza fi n na duwa-nyakun ɓai kun anya. A nakwo, akni, ɓedo n na lukpe yi. Agyiwye shanyi ɓo nyi ce.

¹⁵Wa pmi knalufin wa nya ɓa ya na duwa nyakun, Wa nya anyakunyi ya, Wa kni atebur nyikun.

¹⁶Wa gna alukpe kunyi ge, “fye kun anya ye ya n ya. Fye to ze ’mi Dada nyakun a gnikwo gni ba m.”

¹⁷Owo abara ba pa ge, Littafi Alkawali kwo-kwoyi bo ku da ge, “Wyenyi ntu ho nyakun bo, kwo nu ba gyi mi ngye ona.”

¹⁸A Yahudiyi ba nya bo ge, “Nyika ga ho iko ye’a? Ngye Shekwoyi iko nu, gna yi ya wo. Zhin abo wo-woyi ya gye.”

¹⁹Yesu wa cige, “To, mi ba zhin ga fye. Fye la aduwa-nyakun ye ya, mi ba mi kwo n na nyipyeyi ngun ata kawai.”

²⁰Nsayi ba ya aboda, “Yi bei mi nyakun ye n na ye shinyi nu, Hoi gna ho ba mi kwo na nyipyeyi ngun ata kawai? Kwo ta ye zhin.”

²¹Ama Yesu bei da wo nayi nu bo.

²²Sanu n wo bo laka n vingwo, Owa bara ba pa nya wo bei gna ba nyi. Ba ga Littafi Gyi-gyi-yi gaiciya. Ba ga Yesu eda gaiciya njesun.

²³Aza n mwa begye n paska ba gawo gaiciya, ntu nabo wo-woyi bo n ba bei gye nyi. Kwa wu bage, wonu zhin aza gniyi.

²⁴Yesu to bei ga ba gaiciya m, gama wo kpe zanyi-kwoci bugba ye lo sarai.

²⁵Zaho-zahoi ta mi wa gna wo zado bon. Ntu ge wo kpe aza bugba lo sarai. Zado nu to bei ba gna wo zanyi-kwoci bon. Wo bei kpe shi za bugba pye doshan yi.

Yohanna 3

Zhibeyi N Sukwoyi

¹Nwiyihoyi, sukwoyi la zhin, a, Yahudiyi adini tukwoda ho, n dna na farisiyi kpegye ai yi wo ge Nikodimu. Wo bei lo Yesu aba ntuge wa nya wo bo fya-a.

²Wa gna Yesu ge, “Mallam, yi kpe lo ge Shekwoyi na tnu n hoi ha wuyi nya. Yi kpe lo lonu, ntu nabo wo-woyi bo n ho zhin nyi.”

³Yesu wa gna wo, “Mi ba gna ho gaiciya, sai a shan ho ma, ho ta mi ha gye Shekwoyi bemi m.”

⁴Ce bei wo Nikodimu n mwa, wa nya ge, “A shan mi ma n wu na? A zhin a shan zakwoyi ma? Zakwoyi ba mi wa lo wo ’ya nubo a je wo ma?”

⁵Yesu wa gna wo ge, “Zaho-zahoi to lo n wo vi mi bemwi to ai shan wo ma n nuwan yi bedo n Zafun yi m.”

⁶Aza bami ba ma azanyikwoci. Ama Zafun Gyi-gyi-yi nu ga wye-wyeyi n kwo gmi n ’she nyi.

⁷Ce to wo hon, shi ma gna ho ge, “Tile a shan ho man.”

⁸Ese zhin kwa ci a ku gye ko wye? Ho zhin ha wo ashan nu kawai. Ho ta kpe bwa kwo kun, kwo kwa aba kwo lon. Zafun ɓo wu lo nu, yi ta kpe shi Zafun lo tnu-tnu wa ma aza m.

⁹Nikodimu wa nya wo ɓo ge, Kni nu ho da n wu lonu'a?

¹⁰Yesu wa nya wo ɓo ce, "Ho to zhin a Israilayi male nun? Hoi gna ge ho ta kpe ɓo lo n mi da nyin kwo?"

¹¹"Behin-hin, ma gna ho, Yi da ɓo nu yi kpe. Enya ya gye yi zhin kwo nu saida, ama fye ta gwo yi saida lon.

¹²Ama n fye to ga abo gaiciya n mi gna fye n ɓa zhin lo dna n na nyin, fye ɓa ga gaiciya n wuna, mi ya gna fye ɓo n kwo zhin lo n 'she mi'a?

¹³Mi gmi n 'she nu, ama zaho to shin eshe lo m, sai omi oza Nugun.

¹⁴Njesun shi Musa ɓo ku owa sunknanya kpe n busi dna zhabui nyi, n lonu na ɓa zhin mi.

¹⁵N nabayi zaho-zahoi n wa gami gaiciya wa bwa wye-wyeyi nyalo-nyalo nya."

¹⁶Gama Shekwoyi wa ye na nyi yi, har wa wo 'bi gba gmanyi ga, ntuge zaho-zahoyi n wa gawo gaiciya, wota bwi n, ama wo ɓa bwa wye-wyeyi nyalo-nyalo nya.

¹⁷Shekwoyi to bei tnu n wo bi-i ntu ge wa da 'wa nun, ama ntuge wa gni anyi.

¹⁸Aza n ɓa gawo gaiciya ɓa ta bwi aba fi n wan, ama aza n ɓa na wa ɓo, aku alaifi wa pma ɓa da, ntuge ɓa to ga Yesu, n wo zhin Shekwoyi 'bigba gmanyi, gaiciyan.

¹⁹Owa ku gyi ɓa ge, buzangna la ɓe anyi mi, ama ɓa gna wyegma ye ndu buzangna. Ntuge ɓa zhin aɓo nukwoyi zhin yi nu.

²⁰Ba ɓo wun buzangna 'she nya nu, ntuge ɓa bei ye ɓa zhin aɓo nukwoyi fi n wyegmaa, to a gye ɓa wyen m.

²¹Gaiciya dayi zhin Wa ye buzangna cici, Wo ta wo vinyikwon, ntu ge wo zhin ɓo dna n Shekwoyi yenu, woi ye aza ɓa gye.

²²Avun deye Yesu wa fa Urushelima wa ɓe Yahudiya n wa barai, Nbwayi ɓa fi ɓo woi zhin aza batisma.

Yohanna N Yesu Yi

²³Yohanna njesun woi zhin batisma ce. A yi abayi ge Aenon, Ko ɓo wu vivi n Salim yi, Nuwan bei nyi n ɓo n mwa.

²⁴Yohanna to bei lo jalu kpam.

²⁵Nwyihoi, Aza ho ɓai na aɓo Yohanna barai, ɓai gna ɓa ge, Yesu batisma gna Yohanna nya bmiya lo.

- ²⁶Nsayi-sayi Yohanna bara ƙa lo da Yohanna. Ba gna wo ge, Male, oza n yi bei gye n Urdun kma, ha ga saida tu nwo tukwo nyi wo zhin batisma lo ce. Aza vinya njesun ƙai lo wo aba nu.
- ²⁷Yohanna wa gna ƙa ge, Shekwoyi na ga zaho-zaho wo tnu-tnu.
- ²⁸Mi to ƙo ku gna fye ge, mi to zhin Kristi nu m? Mi zhin wo tnu-tnuyi nu, miye aza vinya ƙa lo wo abanu.
- ²⁹Oza n wo n mula-nyikwoyi, wo nu zhin mula-ƙa. Mula-ƙa nugundo kwa woi dagma n jesun. Mi zhin mula-ƙa nugundo nu. Mi dagma lo n woi.
- ³⁰Owo mwa-mwa ƙa ƙe-ƙe. Ama tile ma gba-gba.
- ³¹Oza wo gmi n 'she nyi wo du zaho-zahoyi lo. Mi zhin anyi nya nu. Emi beye-kpe to mwa lo m.
- ³²Nya wa wo, woi gye, ko nu n wo da, ama aza fyewyi nu ga wo beda gaiciya.
- ³³Aza n ƙa ku gaiciya ga wo, ƙa kpe lo ge owo beda zhin gaiciya nu.
- ³⁴Yesu n Shekwoyi wa tnu woi nyi, wo da owo aƙeda nu; Shekwoyi la Zafun gawo ntna cezhiba.
- ³⁵Shekwoyi ye Yesu har wo ku anya ga wo vinya.
- ³⁶Oza wa ga Yesu gaiciya wo ƙa bwa wye-wyeyi. Oza n wo to ga Yesu gaiciyan wo ƙa bwi. Shekwoyi minagyi ƙa tu nwo tukwo.

Yohanna 4

Nyikwoza Nnabai Ngun Atnu

- ¹Yesu bei zhin aza batisma ndu Yohanna nya, nna barayi nmwa begye njesun. Afarisiyi ƙa ku kpe.
- ²Ama Yesu to bei zhin batisman, lowo abara nu bei zhin.
- ³Sai wa fa Yahudiya wa lo Galili.
- ⁴Kwo ƙo la wo zhin tile wa lo n Samariya zokwoyi.
- ⁵Wa si a Samariya yi zhi ho, ai yi kwo ge Sikar. Kwo wu vivi nna bai nu n Yakubu bei ga Yusufu, owo nugun ekni nyi.
- ⁶Yakubu Lizhiya bei gni ƙo, Yesu wa sase shi ƙo n lizhiya gbe, ntuge abei lawo ƙe, n zan yi. Nyipyeyi bei la pwo atukwo gun n sahi yi.
- ⁷Shi wo bei sase shi ƙo, nyikwoza ho wa ƙe nuwan to, Yesu wa gna wo ge, "To nuwan gami, ma sin."
- ⁸Owo abara bei du zhimi ƙo si nyagyi ƙe n cei. Ntu cenu ƙa to bei zhin.

⁹Nyikoza hi wa gna Yesu ge, knihi na ye yi bedo'a? Ho zhin Yahudiyi nu, ama mi zhin Samariyai'za nu, Knihi nu zhin hoi nya mi nuwan bo'a? (Nsayi, a Yahudiyi to bei bmiya jem n na Samariyayi n ba.)

¹⁰Yesu wa gna wo ge, "Ho takpe Shekwoyi nyaga ye lom, hoi takpe mi ye lon. Ho bo kpe ye lo, hoi kpe oza ye nwo nya nuwan bo nyi, wo ga ho nuwan wye-wyeyi nya."

¹¹Nyikwozahi wa nya wo bo ge, "Ho gugayi shi na ha to nuwan cei a? Ai lizhiya lo-loi lo. Ho ba bwa nuwan wye-wyeyi nya na?"

¹²Eyi dada Yakubu bo zhin oza dnagmayi nu, wa ga yi lizhiya ye. Owo, bedo n wa bi-i n wo anyakpayi ba sin nuwan ye. Ho du wolonu?"

¹³Yesu wa gna wo ge, "Lizhiya ye nuwan ta gyi za nuwan mikun, har nyalo-nyalo n. Oza n wa sin Lizhiya ye nuwan, wo ba je nuwan mikun wo n pye-pyei.

¹⁴Ama omi nuwan zhin kwa gyi za nuwan mikun har nyalo-nyalo. Kwa ze lizhiya wye-wyeyi nya dna nza mi. Kwoi zeya har nyalo-nyalo fi n wo mi, kwoi ga wo wye-wyeyi nyalo-nyalo nya."

¹⁵Nyikwozahi wa ci wo ge, "Male, Gami nuwan ye ma sin. Ala mi be ge mi to nuwan ye cici. To ma je be ya ma to nuwan, ai be min, to me je nuwan mikun won."

¹⁶Yesu wa gna wo ge, "lo ho be n ho bayi."

¹⁷Nyikwozahi wa gna Yesu ge, "Mi to n bayi lon," Yesu wa dna wo be-gbe ge, "Ho ku gaiciya da, ho to n bayi lon."

¹⁸Anu ku ho lo atnu, kwo odo n ho dna n woi n sayi ye nyi, oho ba nu to m. Ha da gaiciya nu.

¹⁹Ce a wo nyikwozahi nwodna, waci Yesu ge, A ba gye ho zhin anabi nu!

²⁰Ofye a Yahudiyi gna ge, a ga Shekwoyi mwa-mwa dna n Urushelima nu gmanyi, ntu knibehia? Eyi adada to bei ga Shekwoyi mwa-mwa bo num, ba bo ga wo mwa-mwa n 'pe ye nu. (Wato Gerizim pe.)

²¹Yesu wa ci wo ge, nyikwozaye nhohin, esa be lo n na ta ga Shekwoyi mwa-mwa n ya, kwo n 'pe ye, kwo n Urushelima m.

²²Efye Asamariyayi, fye ta kpe oza ye lo nfye ga wo mwa-mwa ni, Ama eyi A Yahudiyi yi kpe oza ye lo n yi la wo tu. Ntuge gni-gni kwa gmi na Yahudiyi abanu.

²³Esa be lo, kwo nsaiye kwo la be, nu amwa-mwa ga yi gaiciya nya, ba ga Dada mwa-mwa dna n Zafun, n gaiciya yi. Azaye pya nu n Dada ye cei.

²⁴Shekwoyi zhin Zafun nu, tile aza nba ba ga wo mwa-mwa, ba ga mwa-mwa dna n zafun n gaiciya yi.

- ²⁵Nyikwozahi wa ci wo ge, “Mi kpe lo ge Yesu be lo. Esa n wa be wo ba wu yi anya vinya pei-pe.”
- ²⁶Yesu wa ci wo ge, Ai omi nmi gni mi-i dabo nhoi nyi. Omi nu zhin Kristi hi n ho da wo bo nyi.
- ²⁷Nsahi yi owo abara ba be. Ce ba wo a nkalai shi wo gni woi dabo n nyikwozahi. Ama ko ozaho nba mi wa nya wo bo ge, Kni nu zhin hoi dabo n nyikwoza ye yi’a? To a bwa za nwo nya bo m.
- ²⁸Nyikwozahi wa ta shakun ya shi, wa busi lo ezhimi wa ci aza ge,
- ²⁹“Fye be fya gye oza, nwa gnami abo vinya n mi ku shin zhin. Kwo owo nu zhin Kristi’a?”
- ³⁰Aza kna be nzhimi ba lo wo gye.
- ³¹Esa nu nyikwozahi bei bwi nnaza yi, owo abara ba gna wo ge male, gyi nyagyi.
- ³²Amma Yesu wa ci ba ge, mi n nyagyi yi lo ma gyi, nfyta kpe kwo be ye lo m.
- ³³Owo abara ba nya aje ge, “Ko zaho la be wo n nyagyi yi nu woi ku gyi’a?”
- ³⁴Yesu wa ci ba ge, Emi nyagyi nu ge mi zhin Shekwoyi beye nwa tnumi nyi ma zo kwo zhin njesun.
- ³⁵Fye ta gna lo ge, apya ce ngun-anyi mikegye kwa kpe gyin? Fye dna wye zunba fya gye, aza awye-wyeyi ku bi, ba ku ye do.
- ³⁶Oza nwo do nya, wo zhin wa bwa lada. Wo ye aza zhi nu n ba ba lo 'she nyi. Oza nwo do nya, nzayi nwo bye nya nyi ba bai bwa bugba bui-bui.
- ³⁷Gaiciya nu ge, ozaho zhin wa bye, ozadoho wa dodo.
- ³⁸Ma tnu fye ge fye lo fye do do nu. Fye nu to byem, fye zhin aza nu nba dodo kawai.
- ³⁹Asamariyayi bei ku gaiciya ga nmwa ntu nyikwozahi beda bo nwo bo gna ba nyi ge, “Wo ku abo gnami vinya nmi ku shin zhin.”
- ⁴⁰Asamariyayi ba gna Yesu ge, Be ha dna n yi-i nzhiye, Yesu wa dna bo anyipyeingnu-aba.
- ⁴¹Aza nmwa begye ba ku gaiciya ga ntu wo beda bo.
- ⁴²Ba gna nyikwozahi ge, “Yi to ga gaiciya ntu ho beda bo num. Yi ku wo n yihin tukwoyi. Yi kpe lo ge wo nu zhin anyi Gniyi.”
- ⁴³N anyipyei ngun aba avun, wa laka wa lo Galili.
- ⁴⁴Yesu bei ku da ge, “Anabi ta bwa mwa-mwa dna nwo ayi m.”

⁴⁵Esa nu wo bei si Galili, ɓa gwo wo na gmadayi, ntuge ɓa ɓo ku gye abo vinya nwo zhin dna n Urushelima nyi. Wato esa nu Yesu bei lo paska nyi.

Zadnagmayi Ho Bi La Kagna Bwa

⁴⁶Wa lo Kana Galili nya njesun, aba n wo bei zhin nuwan kwa ze nuwan shu-shuyi nyi. Gwamnati tnu-tnuyi tukwoda ho bei dna n Kafarnahum, owo nugun bei san nyasan n kalai.

⁴⁷Shi wo ɓo wo ge Yesu la ɓe Galili 'kni, wa gmi n Kafarnahum wa ɓe Yesu aba, wa gyi wo wye ge, wo ɓe wa lo, wo ka owo ɓi gna, nwo shi woi fi nyi.

⁴⁸Yesu wa nya wo ɓo ge, "Nfye to gye abo wo-woyim, fye ta ga gaiciya m kwo?"

⁴⁹Tukwodayi wa gna wo ge, "Dagayi la pye nbe yi kafin omi nugun wo fi."

⁵⁰Yesu wa ci wo ge, "Lo ho puwa, ho ɓo gye oho ɓi n lafiya yi." Nsa-sayi wa lo api.

⁵¹Owo abara kwa ɓa shegun wo n zokwo, ɓa gna wo ge ai nyasan la ho ɓi fa wo n lafiya yi lo n sayi.

⁵²Wa nya ɓa ɓo, esa nwo nugun wa ya lafiya bwa n cei, ɓa gna wo ge nsu nu nyipyei kwoi la bmaya n na tukwo, nyasan kwa fai wo.

⁵³Oɓi dada wa gye nsayi nu, n Yesu bei gna wo ge, "Oho nugun la lafiya bwa." Owo ɓedo n wo puwa yi vinya ɓa ku gaiciya ga.

⁵⁴Deye nu bei zhin obo wowoyi bayi n Yesu ɓo zhin, esa nu wa gmi n Yahudiya wa ɓe Galili.

Yohanna 5

A Ka Zaho Gna Cei San Abyeda

¹Ndeye avun, Yesu wa lo Urushelima ntu A Yahudiyi kunnu awyefan ɓo.

²N Urushelima mi nuwan zundna ho ɓo dna, n wu vi-vi n Akniabokunmiyi, ai yi kwo ge, Baitasda, kwo bei ashiragyi kpe zhi ngun atnu.

³Anyasan-yi bei zhi ɓo n mwa begye, awyebuayi, na'zab-mazhiyi, na bwa-fifiyi dayi. Bai zhi ɓai pmi nuwan zundnahi kwa shan-shan.

⁴Ntu ge malaika Dagayi nya bei zhin woi ɓe nsa-sayi, wa bui nuwan zundna hi. Oza nwa kmi pita dna, n nuwanhi wa gwo kagna.

⁵Ozaho bei shi ɓo, n wo bei ku aye bwa shita-cei-nyimwa-nyimwa (38) shi nyasan bei ya wo.

⁶Sanu Yesu bei gye wo, wa ku kpe ge esa la mwa, shi nyasan bei yawo. Yesu wa nya wo ge, "Ho ye lo ha bwa lafiya?"

⁷Nyasan-yi wa ci wo ge, “Mi ye lo, ama mi to nzayi lo nwo ba bma mi zhin m. Shi mi ye lo ma lo dna, ma gye zado la lolo dna n ma bye.”

⁸Yesu wa ci wo ge, “Laka gni-agni Kmi ho apece ha lo api.”

⁹Nsai-sayi yi nyasan-yi wa laka sau, wa kmi pece wa lo api. Ama wyihi bei zhin satiwyi nu, A Yahudiyi nyipyeyi sun-sun yi.

¹⁰Ce to bo da a Yahudiyi atukwodam. Ba gna nyasan-yi ge, kwo zhin laifi nu, ha ku ho apece n naiye.

¹¹Nyasan-yi wa ci ba ge Oza nwa ka mi gna nyi wo na gna mi ge mi ku.

¹²Ba nya wo ge, nyikana gna ho lo nu’a?

¹³Ozaho to bei kpe Yesu yem, ntuge Wo bei la lu lo dna n begye.

¹⁴Nsado Yesu wa gye wo dna aduwa-nyakun, Wa gna wo ge, “Nsayi ho la lafiya bwa, to je laifi zhin shi ho bei shin zhin nyim. Kada enya nkwo du deye kwa bwa ho.”

¹⁵Ozaho wa lo a Yahudiyi atukwoda aba, wa gna ba ge, Yesu na ka wo gna.

¹⁶Ntu ce nu a Yahudiyi atukwoda ba ga Yesu wahala ge, wa ka ’za gna n Satiwyi.

¹⁷Yesu wa ye wa gna ba ge, Omi Dada zhin Bemanayi n saho-sahoyi, Mi shan wo nu.

¹⁸Shi wo bei da lonu, kwa zhin a Yahudiyi atukwoda ba ye ba wu wo ge, wo ku laifi zhin, ntuge wa ka za gna n Satiwyi njesun woi la wohin tukwo ze dei-dei n Shekwoyi.

¹⁹Yesu wa gna ba ge, “Nugun ta mi wa zhin nyaho n wohin tukwom.

²⁰Ntuge Dada ye n nugun yi, woi wu wo abo vinya n wo zhin, nugun kwa wo zhin abo wowoyi nmwa, ndu za kagna ye.

²¹Ngwe shi Dada ku azafi kala wa ga ba wye-wyei nyi, Elonu Nugun ga aza wye-wyei n wo ye cei.

²²Dada ta da ozaho-zahoyi owam, ama wo ku owada vinya fa fi n Nugun akun.

²³Ntuge aza vinya ba ga Nugun mwa-mwa, ngye shi ba ga Dada. Nfye to ye fya ga Shekwoyi Nugun mwa-mwa n wa tnu mwoi nyim, agye fye ta ga Dada mwa-mwa lo n.

²⁴“Ma gna fye gaiciya, oza n wa wo mi beda wa ga Shekwoyi gaiciya wo ba bwa wye-wyei nyalo-nyalonya, ata da wo owam, ama wo la gmi n efi woilo wye-wyei mi.

²⁵Ma gna fye gaiciya, esa belo, ko nsaiye ma kwo la be, nna aza fi-fiyi ba wo Shekwoyi Nugun begye, aza nba wo ba ba bwa wye-wyei.

- 26 Ngye shi Dada n wye-wyei lo n wohin tukwo nyi, elonu wo la iko ga Nugun wa bwa wye-wyei n wohin tukwo ce.
- 27 Wola iko ga wo ntuge wa da aza owa ntuge wo zhin oza Nugun nu.
- 28 Ce to wo fyem, ntuge esa belo, nu aza nba fi nna vingwo nyi bei wo Shekwoyi nugun begye,
- 29 ba bei kun be, aza nba bei ku bemanayi zhin, ba bei bwa wye-wyei, ama abenukwoyi zhinhi ba bei lo wada aba.
- 30 "Mi ta da wa nmi gmanyi nu m, tile nu ma nya Dada bo kpa, nya ma wo, kwo nu n mi ba zhin. Mi ta da mihin beda num, ama oza nwa tnu mi nyi.
- 31 "Ndei ma zhin mihin tukwo saida, a gye gaiciya to dna lo n mi bedam.
- 32 Oza do lo n wo zhin mi saida, mi-i kpe lo ge owo saida tu nmi tukwo zhin gaiciya nu.
- 33 Fye ku tnu n azayi n Yohanna aba, woi ku saida zhin tu n gaiciya.
- 34 Mi ta kpema zanyikwoci saida num, ama mi da lo nu ntuge fya pwo nu.
- 35 Yohanna bo zhin fitila nu nfya 'ba, fya bwa agmada dna nwo buzangna nsayi fyewyi.
- 36 Omi saida kwo du Yohanna nya lo. Atnu-tnu nmi zhin nyi ba ga saida ge Dada nu na tnu nmi yi.
- 37 Dada nwa tnu n mi nyi, wo ga saida tu nmi tukwo. Fye to shin wo begye wom ai gna ge fye gye shi wo wu m.
- 38 Owo beda to dna lo nfye mim, ntuge fye ta ga oza gaiciya lo n Dada wa tnu n woi nyim.
- 39 Fye zhin fya ba, Littafi Gyi-gyi-yi ntuge fye gye ge kwo ba ga fye wye-wyeyi. Littafi Gyi-gyi-yi da beda tu nmi tukwo nu.
- 40 Fyei ta be mi aba lo, ntuge ma ga fye wye-wyeyi m.
- 41 "Mi ta ye aza latu nu m.
- 42 Mi kpe fye ye lo. Mi kpe lo ge Shekwoyi ye-ye to dna lo nyfe mi m.
- 43 Ma be dna nmi Dada 'ye, ama fye to gwo mim. Ama ndei ozado na be dna n wohin 'ye to ge Dada wa tnu wom, fya gwo wo nu abwa 'ba-ba.
- 44 Fye ta mi fya ga gaiciyam ntuge fye zan latu shin n aje aba, to fyei gye fye anuwan n latu yi nkwo gmi n Shekwoyi abam.
- 45 "Ama fye to gye ge mi nu zhin fye kala n Dada abam, awo, Musa beda nu nfye n na awyetu yi.

⁴⁶Ndei fye ga Musa gaiciya, fye ba ga mi gaiciya ce, ntuge Musa bo ku nya ka tu nmi tukwo.

⁴⁷Ama shi fye ta ga gaiciya lo, tu n nya tukwo n Musa bo ka nyim, fye ba ga mi beda gaiciya nwuna?”

Yohanna 6

Yesu Wa Ga Aza Dubu Ngun Atnu Nyagyi

¹Ndeye avun, Yesu wa piya lo Galili nuwan kma, wato Tibariya nuwan zundna.

²Aza yezhi nmwa begye ba vi wo lo, ntu ge-ba bo ku gye abo wo-woyi nwo bo zhin tu nanyasan-yi tukwo.

³Yesu wa gun lo 'pe, wa sase tu ngnisun nwo abara yi.

⁴Sahi bo la wu vi n paska yi, wato a Yahudiyi nyagyi sa.

⁵Shi Yesu bo kpe awye shi wa gye aza yezhi nmwa begye, wa nya Filibbus ge, Yi ba bwa nyagyi nna ya si, ya ga aza yezhi ye'a?

⁶Wo bei ye wa wo nya nu n Filibbus ba da, ntuge wo bei kpe boye nwo ba zhin.

⁷Filibbus wa dna wo begbe wa gna, Kwo yi si buredi naira tagyi ngun aba nya (₦200) ko ta kun bam.

⁸Andarawus, Bitrus zado, wa ci ge,

⁹Obiho gni lo ya n buredi yi shi ngun atnu, n abmiya yi ngun aba. Ama kwo ba zhin knihin nu n begye ye'a?

¹⁰Yesu wa gna ba ge, ba gna aza ba ku sase. (Gbegbe bei nyi bo) aza vinya ba ku sase. Azanugbayi bei nyi adubu ngun atnu. (5,000).

¹¹Yesu wa gwo buredihi, wa zhin godiya ga Shekwoyi wa ga aza. Wa je abmiya gwo wa je godiya zhin wa ga ba.

¹²Shi nubo bei ku ba fu, Yesu wa gna wo abara ge, “fye ye awyi-woyi zhi, to nyaho kwa wun yam.”

¹³Awyiwoyi-hi nba bei ce nyi, ba bei ku nu acekun ngun awocei-aba.

¹⁴Shi aza bo gye lonu, ba gna ge, “Behin-hin oza deye zhin anabi nu, n yi nwo awyetuyi nyi.”

¹⁵Shi Yesu bo ku kpe ge, ba ye lo ba wan wo ba dna wo 'be nna kala, wa laka wa gun lo 'pe-sepa nwo gmanyi yi.

¹⁶Sanu wyeshe bo la she, owo abara ba lo ednagbe.

- 17 Ba lo fi n 'ya, ntuge ba piya lo Kafarnahum. Sukwo kwa zhin, to Yesu woi be ba abam.
- 18 Ese ci nkalayi, har nuwan kwoi ce nya.
- 19 Ba bei bwa zan-zan ngye milu ngun ata ko ngun anyi, ba gye Yesu woi be, woi zan-zan tu nuwan woi be 'ya ba. Ba ya edna wo.
- 20 Yesu wa gna ba ge fye to wo dna m, Omi nu.
- 21 Ba ye ba gwo wo dna eya, safyewyi ba piya kpe nkma.
- 22 She 'fye bei gyi, aza-yezhi ba gye eya ce shi gmanyi kawai, Yesu kwa to bo lo dna nwo abara yim, ama ba bei lo bahin-bahin nu.
- 23 Aza ho ba kun n Tibariya, ba piya kpe vivi aba yi aza bai gyi buredi, n Dagayi bei tu kwo anabarka nyi.
- 24 Shi aza-yezhi to bo gye Yesu ko owo abara fi n aya him, ba lofi aya ba lo Kafarnahum bai zan Yesu shin.
- 25 Shi ba bei gye wo nkmahi, ba nya wo ge, "Male, ha be ya n knisayi ya?"
- 26 Yesu wa gna ba ge, "Ma gna fye gaiciya, fye ta zan mi shin ntu abo wo-woyi bo nu nfya gye nyim, ama ntuge fye bo ku buredi gyi lanubo ku fye fu.
- 27 Fye to zhin tnu-tnu ntu nyagyi bo nkwo ba wun Iyam, ama ntu nyagyi wye-wyei nya bo, okwo nu n Oza Nugun ba ga fye. Ce na zhin Shekwyi Dada woi tnu n woi."
- 28 Ba nya wo ge, "Yi ba zhin nwuna ya zhin Shekwoyi beye'a?"
- 29 Yesu wa gna ba ge, "Shekwoyi beye nu nyi ge, fye ga oza gaiciya nwa tnu n woi nyi."
- 30 Ba nya Yesu ge, "Ho ba zhin kni atuzeyi nu ntuge ya gye nabai ya ga ho gaiciya? Ho ba zhin knihi na?"
- 31 Littafi Gyi-gyi-yi, kwa gna ge, eyi Adada bei gyi manna n zhabui Wa ga ba buredi nkwo gmi n 'she."
- 32 Yesu wa gna ba ge, "Musa nu to bei ga ba buredi hi m. Omi Dada nu. Nsayi wo ga fye buredi gaiciya nya nkwo gmi n 'she nyi.
- 33 Buredi gaiciya nya, okwo nu zhin oza n Shekwoyi wa tnu n woi dna anyi woi ga aza wye-wyei nyi."
- 34 Ba gna wo ge, Dagayi ga yi buredi ye fyegyi-fyegyi.
- 35 Yesu wa gna ba ge, "Omi nu zhin buredi wye-wyeyi nya. Oza nwa be mi aba mikun ta gun wo m, oza nwo ga mi gaiciya nuwan mikun ta wo wom.

36“ Ama, ngye shi mi ku gna fye, fye ku mi gyewye, dudu lonu fye ta ga mi gaiciya lon.

37Aza n Dada ku gami nyi, tile ba be mi aba. Mihin kwa mi ta nya ba yam.

38Mi to gmi n 'she mi-i be ya ntu ge ma zhin mihin beye num, ama ma zhin Shekwoyi beye owo nu nwa tnu mi nyi.

39Shekwoyi beye nu nyi ge, To zaknayi wa bwi, dna n na aza n wa gami nyi m. Ama ma ku ba kala lo wye-wyeyi nyalo-nyalo nya, n nyipyeyi kmaknayi.

40Omi Dada beye nu nyi ge, Zaho-zahoi nwa gye Nugun, wa ga wo gaiciya wo ba bwa wye-wyeyi nyalo-nyalo nya. Omihin n bei la wo kala n vingwo n nyipyeyi kmaknayi.”

41A Yahudiyi ba ya gunnu-gunnu da, shi ba bo wo Yesu woi gna ge, Omi nu zhin buredi nkwo gmi n 'she.

42Ce a wo ba ba gna, Kninyia! Yesu, Yusufu nugun nu to bwa gnin, owo dada nwo iya yi n yi kpe ye lo nyin. Knihi nu zhin woi gna ge wa gmi n 'she nu'a?

43Yesu wa dna ba bo gbe, wa ci ge, “Fye ku fa gunnu-gunnu da bo shi ma da lo nu.

44Zaho-zahoi ta mi wa be mi abam, sai Dada gna wo ge wo be. Mihin mi bei la wo kala n vingwo n nyipyeyi kmaknayi.

45Alkawali kwo-kwoi ku da ge, 'Shekwoyi bo wu aza nya vinya, Oza n wa wo Dada beda wo ba be mi aba.

46Ozaho-zahoi to shin Dada wyegyem, sai dai emi nma gmi nwo aba nyi.

47Behin-hin ma gna gye, oza nwa gami gaiciya wo wye-wyeyi nyalo-nyalo nya yi lo.

48Emi nu zhin buredi wye-wyeyi nya.

49Of ye azakwoyi bei gyi manna fi n zhabui, ama ba bo ku fi.

50Eminu zhin buredi n kwo gmi n 'she, nza gyi ko wo ta fim.

51Eminu zhin buredi wye-wyeyi nya, nkwo gmi nshe nyi. Ozaho-zahoi nwa gyi buredi ye wo ba bwa wye-wyeyi nyalo-nyalo. Buredi ye emi nayi nu, nmi ye ma ga kwo ntu anyi gni-gni bo nyi.”

52A Yahudiyi, ba ya abona na jei, bai gna, Oza deye ba mi nwuna wa ga yi owo nayi ya gyi'a?

53Yesu wa gna ba ge, “Behin-hin ma gna fye, nfyey to gyi Oza Nugun nayi m, fyei sin owo amin, fye ta bwa wye-wyeyi dna nfyey mim.

⁵⁴Ama oza n wa gyi mi nayi, wa sin mi ami wo ba bwa wye-wyei, njesun mbei lawo kala n vingwo n nyipyeyi kmaknayi.

⁵⁵Omi nayi kwo zhin nyagyi nu behin-hin omi ami njesun ba zhin nya sin-sin yi nu.

⁵⁶Oza nwa gyi mi nayi, wa sin omi ami njesun, wo zhin ozanu nwo sase dna nmi mi, Emihin ndna nwo mi.

⁵⁷Ngye shi Dada wye-wyei nya wa tnu n mi-i, mi n wye-wyei lo ntu wo bo. Elonu oza nwa gyi mi nayi wohin wo ba bwa wye-wyei ntu mi bo ce.

⁵⁸Eminu zhin buredi gaiciya nya nkwo gmi n 'she; kwo to wu lo ngye odo nu nfyeyi azakwoyi bo gyi fi n zhabui, ba fi nyim. Oza nwa gyi deye wo ba bwa wye-wyeyi nyalo-nyalo nya”.

⁵⁹Yesu bo da abo deye dna n a Yahudiyi aduwa nyakun nu, n Kafarnahum.

⁶⁰Shi ba bo wo deye, owo avi-yi nmwa begye ba gna, wu-wu ye dna bo lo, nyikanl ba mi wa gwo kwo'a?

⁶¹Yesu wa ku kpe ge ba da gunnu-gunnu lo; wa nya ba ge, “Deye wun fye bugba ya lo?

⁶²Fye bei zhin wuna, shi fye bo gye Oza Nugun woi jeze lo 'she'a?

⁶³Zafun Gyi-gyi-yi nu ga wye-wyeyi nyalo-nyalo nya, ama nayi nya ta ga za kwom. Mi ku wu fye shi fye ba bwa wye-wyeyi zafun nya.

⁶⁴Ama azaho nfyeyi mi, ta gami gaiciya lon.” (Ntuge Yesu bo kukpe oza n wo to bo ga wo gaiciyam, n za yi nwo bo kun wo.)

⁶⁵Wa gyi abye wa gna, “Ntu cenu ma gna fye ge, ozaho to lo nwo ba mi wa be mi abam, akpe Dada gni wo be cei.”

⁶⁶Nsahi, owo avi-yi nmwa begye ba jeze nnavun yi to ba je wo vim.

⁶⁷Yesu wa nya abara awo-cei-aba hi ge, fyehin ba lo ce?

⁶⁸Siman Bitrus wa dna wo begbe wa gna, “Dagayi, yi ba lo da nyika? Oho nu gmanyi nna beda yi nba ba mi ba ga wye-wyeyi nyalo-nyalo nya,

⁶⁹Njesun yi ku gaiciya ga yi kpe lo ge ho nu zhin Nugun gyi-gyi-yi Shekwoyi nya.”

⁷⁰Yesu wa gna ba ge, Mi la fye kni awo-cei-aba, ama oza gmanyi zhin shaitan nu.

⁷¹Wo bo da Yahuda, Siman Iskariyoti nugun nu bo, gmanyi n awo-cei-aba hi, nwo ba kun Yesu nyi.

Yohanna 7

Abona Tu N Yesu Tukwo

- ¹Ndeye avun, Yesu wa fa Yahudi ya wa lo Galili, woi zan nazhi abi-bi-yi, wo to bo ye wa dna n Yahudiya m, ntuge ba bo ye ba wu wo.
- ²A Yahudiyayi awyefan, alubui nyagyi nya 'sa bei la ga si.
- ³Yesu amaje ba gna wo ge wo lo Yahudiya ntu awyefan bo. "Lo aba n aza lo, ntuge ho zhin abo wo-woyi nabai oho abara ba gye.
- ⁴Ndei ho ye a kpe ho ye, sai ha hohin gmi wu, to zhin abo n so-son, shi ho mi lo hoi zhin aboye nyi, wu hohin n anyi vinya aba."
- ⁵Ntu ge ko owo amaje nbahin, ba to bo ga wo gaiciya m.
- ⁶Yesu wa ci ba ge, "Omi sa to si kpam, ama nfyee aba esaho-sahoi wu lo dei-dei.
- ⁷Anyi ta wun fye nu lom, ama ba ta ye mi lon, ntuge mi gna ge oba atnu-tnu zhin anukwoyi nu.
- ⁸Fye lo fye nya awyefanhi, shi esa si mi n'ba be."
- ⁹She wo bo ku da lo nu, wa wo nya ce dna n Galili.
- ¹⁰Esa nwo amaje bo ku lo, wa kma ba nya lo n so-so.
- ¹¹Nna awye-fan 'ba a Yahudiyi bai zan wo shin bai nya ge, Zahi gni na?
- ¹²Aza bai da abeda gbo-gbo tu nwo tukwo, azaho ba gna, Wo zhin oza manayi nu, azaho ba gna, awo, Wo zhin aza-kwoce-dnanyi nu.
- ¹³Ama zaho-zahoi to bo mi, wa da wo bo pei-peim, ntuge ba wo a Yahudiyi edna.
- ¹⁴Dna n awyefan atan-tasin, Yesu wa lo dna nu aduwa-nyakun, wa ya ba nya wu.
- ¹⁵Ce awo a Yahudiyi, ba nya ge, "Oza deye wa bwa beyekpe n na to woi lo makaranta ma?"
- ¹⁶Yesu wa gna ba ge, "Omihin beyekpe nu to nmi wu fyem, ama Shekwoyi nya, owo nu n wa tnu mi nyi.
- ¹⁷Ndei oza la kni, wa zhin Shekwoyi beye, wo ba kpe nya ye n mi wu nyi, ko kwo zhin Shekwoyi nya nu, ko omihin nya nu.
- ¹⁸Oza nwa da beda ntu wohin tukwo bo, wo ye mwa-mwa n wohin bo nu, ama, oza nwo zhin tnu-tnu ntu oza latu bo nwa tnu wo nyi, wo nu zhin oza gaiciya da nza manayi.
- ¹⁹Musa to bo ga fye awyidnan? Zaho tolo n wo shi ba bwa lo nfyem. Knihi nu zhin fyei ye fya wu mi'a?"
- ²⁰Begyehi kwa ci wo ge, "Tukwo laho pmiya! Nyika nu ye wa wu ho'a?"

- 21** Yesu wa dna ba begbe wa ci ge, “Ma zhin bo wo-woyi gmanyi ca wo fye.”
- 22** Musa bo gna fye ge fye zhin abi kaciya, (yi kpe lo dei ko to ya nwo sa num, kwa ya n yi azakwoi sa nu) ama fye ta kni Satiwyim.
- 23** Ndei fye ba zhin kaciya n Satiwyi, ntuge fya nu Musa awyidna, ntu knibeyi nu fyei gyi minagyi ge, ma ka oza gna n Satiwyi’a?
- 24** Nfya dnawye peceye, fye ba gye, ma zhin be manayi nu.
- 25** Azaho nba fi n Urushelima mi, ba nya bo ge, “Ozaye nu to nba ye ba wu n?”
- 26** Ai wo gni nyi woi dabo pei-pe, zaho-zahoi ta da nya ho lon. Kwo atukwoda ba ku kpe nu ge Wo nu zhin Kristi’a?
- 27** Ama yi kpe aba lo nzadeye gmi, esa Kristi ba be, ai zaho-zahoi to bo kpe aba nwa gmim.”
- 28** Yesu woi gni woi wu ba nya, wa ci ba ge, “E fye kpe mi ye lo, fye kpe aba lo nmi gmi njesun. Ama mi zhin tnu-tnuyi nu, oza nwa tnu mi nyi wo zhin gaiciya nu. Fye ta kpe wo ye lo m.
- 29** Ama mi kpe wo ye lo, ntu ge ma gmi nwo aba nu, owo na tnu mi.”
- 30** A Yahudiyi atukwoda bai ye ba wan wo, ama zaho-zahoi to bo to wo bwam, ntuge owo sa to bei sim.
- 31** Ama aza nmwa begye n aduwa nyakunhi, ba ku gaiciya ga wo. Ba nya ge, “Esa n Kristi ba be ncei, wo bo shan abo wo-woyi ho zhin ndu oza deye?”
- 32** Esanu Afarisiyi bo wo lo nu, ba tnu adogagyi ntuge ba wan Yesu be cei.
- 33** Ama Yesu wa gna ba ge, “Esa ye mi ce lo fyewyi ma kun-sun nfyeyi, ma kpe je ze lo oza aba nwa tnu mi nyi.
- 34** Fye bo zan mi shin ama fye to bei gye mi wyem. Fyei to bo mi fye be aba nmi nyi m.”
- 35** A Yahudiyi atukwoda ba nya aje ge, “Wo ye wa lo nna nu to ya gye wo wyem ma? Ko wo ye wa lo eyi azaje aba nu nba gnami fi nna abyedo, wo zhin abyedo wa’azi a?”
- 36** Knibeyi nu nwo dage, ‘Fye bo zan mi shin ama fye to bo gye mi wyem, njesun ge, ‘Aba mi nyi, fye ta mi fya bem ma’?”
- 37** N nyipyeyi kmaknayi awyefan nya, Yesu wa je beda nazayi ge, Oza n nuwan mikun wo wolo, wo be mi aba wa sin.
- 38** Ntuge Littafi Gyi-gyi-yi ku da ge, oza nwo ga mi gaiciya, nuwan ba kpe nwo mi ngye dnapa.

³⁹Wo bei da Zafun Gyi-gyi-yi nu bo, nna ba ga ozaho-zahoi nwa ga Yesu gaiciya nyi. Ama nsahi Zafun to bei bem, ntuge Yesu to bei jeze lo Dada aba n 'she min.

⁴⁰Sanu ba bo wo woi da lo nu, azaho ba ci ge, "Oza deye zhin anabi nu behin-hin."

⁴¹Azaho ge, "Wo zhin Kristi nu." Azaho ge. "Kristi ba gmi n Galili nu?"

⁴²Ntu ge Littafi Gyi-gyi-yi ku da pei-peige Yesu ba gmi n Esu Dauda ebye nu n Baitalami aba nabo ma Dauda nyi.

⁴³Aza bo la gnaje ngun aba ntu wo bo.

⁴⁴Azaho bai ye ba wan Wo, ama zaho-zahoi to bo to wo bwam.

⁴⁵Adogagyi n na bei tnu, ba jeze be ntna wo shi yi. Aduwa nyakun tukwoda bedo a Farisiyi ba nya ba ge, kninya zhin to fyei be nwoi ma?

⁴⁶Adogagyi-hi bei gna ge, ba to shin oza wo woi dabo ngye shi Yesu da nyi m.

⁴⁷Afarisiyi ba nya ba ge, "Aku fye dna kwoce nuce?"

⁴⁸Atukwoda ho lo ko a Farisiyi, nba ku gaiciya ga ge, wo zhin Gni-yi nu?

⁴⁹Aza nba ta kpe owa ye nyin, oba nu ku gaiciya ga, okni tu lo nba.

⁵⁰Nikodimu, nwo bo lo Yesu aba n sukwoyi nyl, wo bo dna nba, wa nya ge,

⁵¹"Ko wu lo dei-dei a ga za laifi to ai da wo owa n?"

⁵²Ba nya wo ge, "Hohin gmi n Galili nu ce? Lo ho shan Shekwoyi beda baba, ho ba gye ge anabi to lo nwo ba gmi n Galili m."

⁵³Ba kuka, zaho-zahoi wa lo wo puwa.

Yohanna 8

Oho Abwiyi Zhi Nna?

¹Ama Yesu wa gun tu n Zaitun 'pe.

²N labmi-labmi yi, wa je aduwa nyakun lo, esa fyewyi aza ba yezhi n wo aba, wa sase wa ya ba nya wu.

³Shi wo bei shi woi dabo, a Yahudiyi atukwoda bedo na Farisiyi, ba be n nyikwoza hoi nna bei wan wo dna n anagbai zhin, ba wo gni naza abye.

⁴Ba gna, "Male, nyikwoza ye, ya wan wo dna nu anagbai zhin nu.

⁵Musa 'wa gna ge, ya wu wo, Ha gna ge na?"

⁶Ba bo nya wo lonu, ntuge ba mwi wo gye nu. Ba bei ce pma wa da bo ho nabai ba wan wo nu. Ama Yesu wa yagni, wa ka nya zhi nkni nwo bwanyi yi.

⁷Ba ku gnawo gna-gna ge wo dna ba begbe, wa kpebye gni wa gna ba ge, “Oza nwo to zhin laifin, wo ya wo kuta ce.”

⁸Wa je ya gni wa je nya ka zhi n kni.

⁹Esa nu ba bo wo deye lo nu, ba ya kalaku gmanyi-gmanyi. Shi ba bo ya nzadnagmayi har kwa lo binawyi. Ba ce Yesu ya gni n nyikwozahi yi.

¹⁰Yesu wa kpebye gni wa nya nyikwozahi ge, “Azahi ma? Zaho to ce ho kutan?”

¹¹Nyikwozahi wa ci ge, “Awo” Yesu wa gna wo ge, “Mihin ta zun ho knim, lo ho nya, ama to je laifi zhin m.”

¹²Yesu wa je gwodu n nyawuyi wa cige, “Omi nu zhin buzangna anyi nya, oza nwa vi mi wo ta zan-zan dna n wyegmam, ama wo ba bwa buzangna wye-wyeyi nya.”

¹³Afarisiyi ba ciwo ge, “Ho mwa hohin tukwo nu, hoi ce akata njesun.”

¹⁴Yesu wa gna ba ge, “Ko mi-i zhin saida tu n mihin tukwo bo, omi saida zhin gaiciya nu, ntuge mi kpe aba lo mi gmi, mi-i kpe aba lo n mi lo njesun, ama fye ta kpe bohoye lo tu nmi tukwom.

¹⁵Fye da mi owa zanyikwoci nya pya nu, ama mi ta da zaho-zahoi owa m.

¹⁶Ama kwo mi-i da, omi owa da ba zhin gaiciya nya nu, ntuge Dada nwa tnu mi nyi, wo kunsun lo n mi-i.

¹⁷Ofye owa gnage, saida n aza ngun-aba gbe, a gwo kwo ge kwo zhin gaiciya nu.

¹⁸Omi n mihin mi zhin mihin tukwo saida, omi Dada nwa tnu mi nyi, wo nu zhin mi saida-da bayi.”

¹⁹Ba nya wo ge, “Oho Dada gni na?” Yesu wa gna ba ge, “Fye ta kpe oza ye nwo zhin omi Dada m, Fye bo kpe mi ye lo, fye kpe wo ye ce.”

Nmwa Begye 'Ba Ga Gaiciya 'Ba Gni Abona

²⁰Yesu bo da abeda deye, dna aduwa nyakun, n sopa nu a ya agyiwye fi. Zaho-zahoi to bo wan wom, ntuge owo sa to bei si m.

²¹Wa gna ba njesun ge, “Mi ye ma fa fye ma lo minya, fye ba zan mi shin, fye ba fi fi n fye alaifi. Fye ta mi fya lo aba nmi ye ma lo nyi m.”

²²A Yahudiyi ba nya ge, “Wo ye wa wu wohin nu? Wo da knibe nu ge, aba nmi lo nyi, fye ta mi fya be ma?”

²³Yesu wa gna ba ge. “Fye kun anyi ye nu, ama mi gmi n 'she nu. Fye zhin anyi nya nu, ama mi zhin 'she nya nu.

²⁴Ce na zhin mi-i gna fye ge, fye ba fi fi n fye alaifi. Nfye to ga gaiciya ge omi nu zhin Kristi m, tile fya fi fi n fye alaifi.”

25 Ba nya wo ge, “Ho nu zhin nyika?” Yesu wa gna ba ge, “Mi zhin oza nu nmi shin fye gna ci-ci ge mi zhin nyi.”

26 Abo lo mwa n mi ba da, har ma zun fye kni n owa yi, ama oza nwa tnu mi nyi wo zhin gaiciya da nu, abo nma wo nwo aba Imi ku gna anyi.

27 To bai kpe ge, wo gna ba Shekwoyi bo num.

28 Ntu cenu Yesu wa gna ba ge, Esa fye bo wu Kristi ncei, fye bo kpe nsahi nu ge omi nu zhin Wo. Njesun ge Mi ta da omihin bo num, ama obo n Dada wa wu mi.

29 Oza nwa tnu mi nyi wo kunsun lo nmiyi, wo ta ya min, ntuge mi zhin obo lo n wo ye nsaho-sahoi vinya.

30 Shi wo bo da lo nu, aza nmwa begye ba ku gaiciya ga Wo.

31 Yesu wa gna aza nba bo ga Wo gaiciya nyi ge, “Nfya zhin bo n ma gna fye agye fye zhin Omi abara gaiciya nya nu.

32 Fye ba kpe gaiciya ye, gaiciyahi kwo ba lo fye ya.”

33 Ba gna wo ge, “Yi zhin Ibrahim abi nu, yi to shin zaho-zahoi bauta zhin m, ho ba gna nwuna nu ge gaiciya ba lo yi ya?”

34 Yesu wa gna ba ge, “Ma gna fye gaiciya, oza nwo zhin laifi, wo zhin laifi fyenu nu.

35 “Fye kpe ge fyenu to iko yi dna n puwan sai nugun.

36 Ntu cenu, oza n Nugun la wo loya, wo la ze lo-loiya nyalo-nyalo.

37 Mi kpe lo ge fye zhin Ibrahim ayawyi nu, ama fyei ye fya wu mi, ntuge omi abeda ta bwa asese ba lo n fye abugbam.

38 Mi gna fye abo nu nma gye nmi Dada, ofyehin ce fye zhin abo nu nfya gye n fye dada.”

39 Ba gna ge, “Ibrahim nu zhin eyi dada. Yesu wa ci ba ge, Awo! Ndei wo nu bo zhin fye dada, fye shan wo abemanayi zhin.

40 Ama fye ye fya wu mi, ntuge ma gna fye gaiciya nma wo nmi Shekwoyi. Ai Ibrahim to bo zhin abo nwu lonu m.

41 Fye zhin abo lo ngye of ye dada nu.” Ba gna ge, “Yi to zhin akaruwa 'bi num, Shekwoyi nu zhin eyi Dada nwohin tukwo.”

42 Yesu wa gna ba ge, Shekwoyi nu bei gna wo zhin fye Dada, fye ye mi, ntuge ma gmi n Shekwoyi aba nu. Mi to be n mihin tukwo bo nu m, Owo na tnu n mi-i.

43 Knihin nu zhin to fyei kpe bo ye nmi da nyin ma? Ntuge fye to cei pma lo fya gwo mi beda m.

⁴⁴Ntuge fye zhin ofye dada abi nu, shetan, ntu cenu fye cei pma fya zhin abo nukwoyi ngye wo. Wo bei zhin zawuyi nu tunyi nsapa, wo ta ye gaiciyam. Wo dami nna katayi, ntuge wo nu zhjn akata cei 'su.

⁴⁵Ntu cenu, shi mi gna fye gaiciya, fye ta ye lo fya ga kwo gaiciya m.

⁴⁶Nyikanu ku mi gye mi-i zhin laifi'a? Ndei fye to gyen, knihin nu zhin to fyei ga mi gaiciyan ma?

⁴⁷Oza nwo zhin Shekwoyi nya, wo wo Shekwoyi beda. Nya kwo zhin to fyei wo nyin, ntuge fye to zhin Shekwoyi anya nu m.

⁴⁸A Yahudiyi ba gna ge, Ai yi ku gaiciya da ge, Ho zhin Samariya yi zanu, Hoi nna aljanuyi lo?

⁴⁹Yesu wa gna ba ge, Awo! Mi to na aljanu yi lon. Mi ga mi Dada mwa-mwa, ama fye ci mi wyegba lo.

⁵⁰Mi ta ye ma ci mihin m, Shekwoyi nu ba ye kwo ga mi owo nu zhin wa dahi.

⁵¹Behin-hin ma gna fye. Oza nwa ga mi gaiciya wo ta fi m.

⁵²A Yahudiyi ba ci wo ge, lalei n sayi yi ku kpe ge Ho nna aljanu yi lo! Ibrahim bedo anabi adnagmayi bo ku fi, ama oho da gna ge Oza nwa ga ho abeda gaiciya wo ta fi m.

⁵³Ho du eyi dada Ibrahim lo? Wo bo la fi, elonu anabi aje. Ho gye ge ho zhin nyikana?

⁵⁴Yesu wa gna ba ge, nma ci mihin omi cici to zhin nyaho nun, ama Omi Dada nfye gna ge wo zhin fye Shekwoyi nyi, Owo nu ga mi mwa-mwa ye.

⁵⁵Fye ta kpe wo ye lom. Nma gna mi ta kpe wo ye lo cen, mi la ze zakata. Ama mi kpe wo ye lo, mi-i zhin bo wa gna mi jesun.

⁵⁶Ofye dada Ibrahim bo dagma wa gye omi nyipyeyi. Wo bo kpe ge mi be lo ai da wo.

⁵⁷A Yahudiyi ba ci wo ge, "Ho to lo aye shitnu, hoi gna ge ho bo ku Ibrahim gyewye!"

⁵⁸Yesu wa gna ba ge, "abo sun nna ma Ibrahim nyi mi-i nyi!"

⁵⁹Shi ba bo wo lo nu, ba ku akuta ntuge ba kni wo, ama Yesu wa wyi ba ya, wa gmi ya nna aduwa nyakun.

Yohanna 9

Yesu La Za Kagna Nna Bei Ma Nna Wyebua Yi

- ¹ Esa nu wo bei lo n zokwo, wa gye wyebuga-yi ho, nna bei pma wo ma nna wyebuga-yi.
- ² Owo abara ba nya wo bo ge, "Male, nyikado laifi nu bo zhin a ma oza deye n zhin wyebuga yi'a? Owo azamayi, laifi na?"
- ³ Yesu wa gna ba ge, "Zaho-zahoi laifi nu to n, ko owo ko owa zamayi m, ama ntuge a wu Shekwoyi iko.
- ⁴ Tile ya zhin omi Dada tnu-tnu, nwa ga yi nyi, nyipyeyi ye tu sukwo la ga zhin n zaho-zahoi ta mi wa je tnu-tnu zhin m.
- ⁵ Mi ye dna anyi mi, omi nu zhin buzangna anyi nya."
- ⁶ Shi wo bo zo da lonu, wa kni akni zhin nkni, wa fu owun wa pmiya wyebuga-yi nawye,
- ⁷ Wa gna wo ge, "Lo Siluwan nuwan zundna ho fu nuwan."
- ⁸ Wa jeze be to aza bai kpe wo yem. Du nwo azajeyi to bai kpe wo yem. Bai nya aje ge, "wyebugayi, nyabayi hi nu bwa lo ya?"
- ⁹ Azaho ba gna ge, "Owo nu, azaho ge owonu to m, zalogbe nu," ama wa gna a ge, "Omi nu."
- ¹⁰ Ba nya wo ge, "Kwa ze wuna hoi gye wyeba?"
- ¹¹ Wa gna bage, "Oza nna yi wo ge Yesu nyi, owo na fu amwi woi tna mi nawye woi gna mi ge mi lo Siluwan nuwan zundna mi fu nuwan, awye yi kpe mi ya, mi i gye wyeba."
- ¹² Ba nya wo ge ozaho gni na? Wa gna ba ge, Mi takpe lo m.
- ¹³ Ba la wo lo cei, nna Afarisiyi aba.
- ¹⁴ Abo deye vinya bo zhin n Satiwiyi nu.
- ¹⁵ Afarisiyi ba nya wo bo, shi kwa ze woi gye wyeba. Wohin wa wu a, shi Yesu Bo zhin wo n wu.
- ¹⁶ Azaho nba mi, ba gna ge, "Woto zhin oza nu n Shekwoyi wa tnu cei yim. Ntu knibeyi nu woi zhin tnu-tnu n nyipyeyi sun-sun yi'a?" Azadoho ba gna, "Ai laifi da ta mi wa zhin abo wo-woyi yem." Deye kwa be ba n naje-gna-yi.
- ¹⁷ Ba nya wo bo ge, "Oza nwa kpe ho awye ya nyi ho gye ge wo zhin nyikanu'a?" Wa gna ba ge, "Wo zhin anabi nu."
- ¹⁸ To a Yahudiyi ba ga gaiciya ge wo bo zhin wyebugayi num. Ntu cenu ba yi wo azamayi, ba nya ba bo.
- ¹⁹ Ba nya ge, Ofye bi nu gni ya? Wo bo zhin wyebugayi nu? Kwa ze nwuna woi gye wyeba?

- 20** Ba gna ge, “Eyi bi nu gni, Wo bei zhin wye buayi nu tunyi nwo mama-wyi.
- 21** Ama, shi kwa ze woi gni woi gye wye ba nyi, ko oza nwa kpe wo awyeya, yi ta kpe lo n. Wo la sun za, nwo ba dabo n wohin, fye nya wo bo!”
- 22** Ba to bo ye ba da m, ntuge ba bo wo Ayahudiyi ’dna nu, ntuge ba bo ku da ge, Oza nwa gna ge Yesu zhin Kristi nu, a ba wo gmi ya aduwa nyakun.
- 23** Ce nu bo zhin owo azamayi ba gna ge, ba ta kpe lon, wo la sun za, fye nya wo bo.
- 24** Ayahudiyi ba je zahi yi ba gna wo ge, “Ga Shekwoyi mwa-mwa, to ge Yesu m, yi kpe lo ge Yesu zhin laifi da nu.”
- 25** Wohin wa gna ba ge, “Mi ta kpe lo ko wo zhin laifi da nu ko oza manayi m. Ama onya gmanyi nmi kpe, okwo nu ge mi bei zhin wye buayi nu, ama nsayi ye mi gye wye ba lo.”
- 26** Har sayi ye ba je wo bo nya, “Wa zhin ho wuna? Wa ka ho gna n wuna?”
- 27** Wa gna ba ge, “Be ma shin fye gna nyi fye to won? Knihi nu zhin fyei je mi bo nya? Fye ye ge ma je da nu? Fye ye ge fya ze owo aviyi nu ce?”
- 28** Ba kni wo akmi, ba gna, Ho nu zhin wo viyi, ama yi zhin Musa aviyi nu.
- 29** Yi kpe lo ge Shekwoyi bo ku boda n Musa yi, ama oza deye da yita kpe aba lo n wo gmi m.
- 30** Ozahi wa ci ba ge, “Ko zhin bo wowoyi nu! Fye ta kpe aba lo n wo gmi m. Ama wo la awye kpe mi ya.
- 31** “Yi kpe lo ge Shekwoyi ta wo laifi da aduwa m, ama oza n wo wo Shekwoyi dna, Shekwoyi zhin wa wo wo.
- 32** Shi Shekwoyi bo zhin anyi, fye shin gye ozaho woi kpe oza awyeya, nna bo ma wo nna wyeibua yi?
- 33** Wo to bei gna wo zhin Shekwoyi za nun, to wo mi wa zhin deye m.”
- 34** Ba kni wo akmi, “Oho n ho zhin laifi da, ho nu ba wu yi?”
- 35** Shi Yesu bei ku wo abo vinya nna bo zhin wo, wa gye wo wye, wa nya wo ge “Ho la gaiciya ga oza Nugun?”
- 36** Wa nya Yesu bo ge, “Nkanu n woi’a? Mi cei pma ma ga wo gaiciya.”
- 37** Yesu wa ci wo ge, “Ho ku wo gye wye, owo nu dabo n hoi.”
- 38** Wa gna wo, “E, Dagayi mi la gaiciya ga,” wa ya shi wa ga wo mwa-mwa.
- 39** Yesu wa gna wo ge, “Ma be anyi ntuge ma ga aza wye ba gye Zafun nya. Aza nba gye lo ge ba gye wye ba lo, ma wu ba ge, ba zhin awye buayi nu.”

⁴⁰Afarisiyi nba bo zhi bo, ba wo ba nya ge, “Ho gna nu ge yi zhin awyebuayi nu?”

⁴¹Yesu wa gna ba ge, “Fye bo zhin awyebuayi nu, to fye n laifi yi lon. Ama fye gna ge fye gye wyeba lo, ntu cenu fye n laifi yi lo.”

Yohanna 10

Emi Nu Zhin Kniknayi Manayi

¹“Ma gna fye gaiciya, oza nwo to lo aknigbe nna bokunmin, ama wa gun nyakunpa nu wa lo dna fye-a, wo zhin evi nu.

²Oza nwo zhin kniknayi, wo zhin wa lo dna nna bokunmi nu.

³“Abokunmi guyi zhin wa gu wo aba ya, akni zhin ba wo 'wo begye, ba be dawo wa yi ba nba aye yi, wa kna ba njesun.

⁴Wa duya gyi nba bye, ba vi wo, ntuge ba kpe wo begye ye.

⁵Ba ta vi zhibeyi m, ama sai ba bu wosi, ntuge ba to shin wo begye wom.”

⁶Aza nba bei wo beda ye nyi, ba to bei kpe kwo awyegam, ntuge Yesu bo da beye n nanyibesi-siyi nu.

⁷Ntu cenu, Yesu wa kna ba awyeya, wa gna ba ge, Omi nu zhin abokun-mi akni nya.

⁸Aza vinya nba bo be nmi abye nyi, ba zhin avi nu. Ama omi aknigaiciya nya to wo bam.

⁹Omi nu zhin abokunmi. Zaho-zahoi nwa lo nna bokunmi ye wo a pwo, wo ba gmi woi lo, woi ba bwa nyagyi manayi wa gyi.

¹⁰Evi zhin wa lo oza puwa ntuge wa wyi vi, wa wu za, wa wun anyaya. Ama ma be ge ba bwa wye-wyeyi, ba bwa ko nmwa.

¹¹Omi nu zhin kniknayi Manayi, Kniknayi Manayi zhin wa ga Wohin wye-wyeyi ntu nakni bo.

¹²Oza nwo kna akni, ntu lada bo nu kawai, wo to zhin kniknayi num. Esa nu wa gye cam-cam kwoi be ntuge kwa wan akni, wo zhin wa busi, wa fa akni ntuge ba to zhin 'wa nya num, woi to zhin ba knayi num. Cam-cam hi ba mi kwa lo dna ba, kwa gna ba miya.

¹³Wo zhin wa busi, ntuge wo zhin tnu-tnu lada nya nu. Wo ta gye wo anuwan nna kni yim.

¹⁴Omi nu zhin Kniknayi Manayi, Mi kpe omi akni ye, omi akni bai kpe mi ye.

¹⁵Ngye shi Dada kpe mi ye nyi Mihin ce mi-i kpe Dada ye, Mi la mihin wye-wyeyi ga ntu akni bo.

16Mi akni do yi lo, nba to fi lo n gwodo yem. Tile nu ma be nbai, ntuge ba wo mi begye, ba ze gwodo gmanyi, Kniknayi gmanyi.

17Dada wo ye mi, ntuge mi la mihin wye-wyeyi ga, Ma je kwo bwa njesun.

18Zaho-zahoi ta mi wa wu mim, akpe ma ye. Omi nu ga mihin tukwo. Ntuge mi iko yi lo ma ga kwo esa nma ye njesun ma gwo kwo esa nma ye. Gama, Dada la iko ye ga mi.

19Shi wo bo da lo nu, Ayahudiyi ba gnaje ngun aba dna nba shawara tu nwo tukwo.

20Azaho ba gna, wo na zafun nukwoyi lo ko wo la cencya nu. Fye ze nwuna fyei kna oza deye pya beda tnubua?

21Ama azaho ba gna ge, “abede ye to wo lo ngye oza nu nwo nazafun nukwoyi m. Zafun nukwoyi ba mi kwa kpe wyebuayi awye ya?”

Gnayi Pei-pei

22Nsayi awyefan tukwoga nya kwoi la si dna n Urushelima. Vinyiko sa nu bei.

23Yesu woi gni woi zan nna aduwa nyakun n Solomon a shiragyi.

24Ayahudiyi ba be ba ku she wo gun, ba ci ge, “Har knisayi nu n ho ba fa yi fi n jeje’a? Ngye ho zhin Kristi nu, gna yi pei-pei.”

25Yesu wa dna ba begbe wa gna ge, “Mi ku gaiciya gna fye ama fye to ga gaiciyam. Abo wo-woyi n mi zhin dna nmi Dada eye nyi, oba nu ci mi saida.

26Ama fye ta ga mi gaiciya lon, ntuge fye to zhin omi akni num.

27Omi akni kpe mi begye ye, Mihin mi kpe ba ye, ba zhin ba vi mi.

28Mi ga ba wye-wyeyi nyalo-nyalo nya. Ba ta bwi m. Njesun zaho to iko yi lo wa gwo ba nmi akun m.

29Omi Dada nwa ga mi ba nyi, wo du Zaho-zahoi lo. Zaho ta mi wa fan mi ba m.

30Omi n Dada yi, yi zhin gmanyi nu.”

31Anyhudiyi ba ku akuta ntuge ba kni wo.

32Ama Yesu wa gna ba ge, Mi ku abo wo-woyi zhin nmwa ga fye, ngye shi Dada wa wu mi, fye ye fya wu mi ntu knidoyi bo nu nba mi’a?

33Ba gna ge, “Oho abo manayi zhin nu ta gna yi gna-gna m. Ama ntuge ho kpe Shekwoyi agye. Ho zhin zanyikwoci nu, ntu kni bei nu hoi yi hohin ge Shekwoyi’a?”

34Yesu wa ye wa gna, “Acei ka dna lo nfyee owa ge, fye zhin ashekwoyi nu?”

³⁵A ku aza yi ge ashekwoyi, oba nu n Shekwoyi beda be ba ba, Shekwoyi beda kwo ta ce akatan.

³⁶Ama Omi da, Dada la mi ze gyi-gyi-yi. Owo nu na tnu nmi yi. Mi kpe wo agye nwuna? Shi ma yi Mihin ge Shekwoyi Nugun?

³⁷Ngwe mi ta zhin omi Dada tnu-tnu num, fye to ga mi gaiciyam.

³⁸Ama ngwe mi zhin Owo atnu-tnu nu, fye ga atnu-tnu ho gaiciya, ko fye to ga mi gaiciya m, fye ba kpe ge, Dada dna lo nmi, Mihin ce mi dna lo n Dada.

³⁹Ba bei ye ba wan wo njesun, ama wa busiya.

⁴⁰Yesu wa piya lo Urdun kma, wa lo wa dna nwu vivi aba yi n Yohanna bo zhin batizma nyi.

⁴¹Aza nmwa begye ba vi wo, ba gna ge “Yohanna to bo zhin abo wowoyi deye pyam. Ama abo nwo bo da tu n za deye tukwo nyi ba ku nu.”

⁴²Aza nmwa begye ba ga gaiciya ge Yesu nu zhin Gniyi.

Yohanna 11

Liyazaru La Fi

¹Oza bei nyi ai yi wo ge Liyazaru nyasan san wo. Wo bei dna n Baitanya nu bedo nwo amapui yi, Maryamu n Marita yi.

²Maryamu ye nwo mapui bei shi n nyasan yi nyi, owo nu bo ze omi sin-dayi ya kpe n Yesu apita, wa wun kwo ya nwo tukwo yi-i.

³Ntu cenu, Liyazaru mapui ba tnu tnu-tnu ga Yesu ge, “Dagayi gye nyasan oho 'za ye-ye-yi lo.”

⁴Shi Yesu bo wo lonu, wa gna ge, “Ai Liyazaru nyasan to zhin efi nya num, ama ntu Shekwoyi latu bo nu; njesun Shekwoyi Nugun ba bwa latu.”

⁵Yesu bo zhin woi ye a Marita n, Maryamu yi bedo n Liyazaru yi.

⁶Esa Yesu bo wo Liyazaru nyasan bo ncei, wa dna nnaba nwo bo dnanyi anyipyei ngun aba kpa to wa lo Baitanya m.

⁷Avun wa gna wo abara ge, “Yi lo Yahudiya kni.”

⁸Ama owo abara to bo ce pma ba lo m. Ba gna wo ge, “Dagayi nbwasun n yahoi nu to, nba bo ye ba kni ho akuta n Yahudiya kni n, Hoi ye ha je lo bo?”

⁹Yesu wa ci ba ge, “Awa to nyi awo-cei-aba nu nyipyei buzungna nyan? Zan-zan yi ta ce bwonyi m, ntuge wo gye wyeba lo sarai.

¹⁰Ama n Sukwoyi oza zhin wa cbwonyi ntuge wyegma dna lo.”

- 11** Wa gna ba ge, “Eyi nugundo Liyazaru la wangye, ama mi ba lo mi kun wo agyewyi ya.”
- 12** Owo abara ba ci ge, “ngye wo wan egye nu ai wo ba kun agyewyi.”
- 13** Yesu bo da efi nu bo, owo abara bai gye ngye egye gam nu.
- 14** Ntu ce Yesu wa gna ba pei-pei ge, “Liyazaru lafi.”
- 15** A da mi lo ntu fye bo, shi mi to bo gni nwo afi bam, deye ba ga fye sa fya ga mi gaiciya.
- 16** Toma, nna bei zhin ai je wo yi ge aza-aba nyi, wa gna wo abara aje ge, “Yi lo yo fi nknusun nwoi.”
- 17** Shi ba bo si Baitanya, a gna ba ge, Liyazaru ku anyipyei bwa ngun-anyi dna nvingwo.
- 18** Baitanya bei bwasun ngye mil ngun-aba nu n Urushelima yi.
- 19** A Yahudiyi nmwa begye ba be ba gye Marita n Maryamu yi ntu oba mapui fi bo.
- 20** Esa nu Marita bo wo ge Yesu be lo n zokwo, wa lo shegun Wo, ama Maryamu wa ce dna napi.
- 21** Marita wa ci Yesu ge, “Ho bei gna ho gni, omi mapui to bei ba fi m.
- 22** Ama mi kpe lo ge kwo nsaiye Shekwoyi ba ga ho nyaho-nyahoi nha gyi wo wye.”
- 23** Yesu wa gna wo ge, Oho mapui ba laka njesun.
- 24** Marita wa dna wo begbe wa ci ge, “E mi kpe lo ge wo bo laka n nyippyeyi kmaknayi.
- 25** Yesu wa gna wo ge, Mi zhin maku aza fi ka, ma je a wye-wyeyi ga, oza nwa ga mi gaiciya kwo woi fi, wo ba je wye-wyeyi bwa;
- 26** Oza nwo n wye-wyeyi, wa ga mi gaiciya wo ta shan fim. Ho la gaiciya ga deye?”
- 27** Marita wa ci ge, Dagayi mi la gaiciya ga ge, Ho nu zhin Kristi Shekwoyi Nugun nwo be anyi ye lo nyi.
- 28** Marita wa lo da Maryamu nnapi, wa yi wo gni fya-a, wa gna wo ge, “Dagayi la be, woi nya ho bo lo.”
- 29** Nsayi-sayi, Maryamu wa lo da Wo.

Yesu La Liyazaru Lakala

- 30** Yesu to bei lo dna n zhinmin, ama wo bei ye gni nnaba nu Marita bo shegun wo nyi.

- 31 Shi abwiwanyi ƙo gye Maryamu woi gmiya lo nnawyei ya, ƙa gye ge wo lo wo cibwi nu n Liyazuru vinguwo. Ntu cenu ƙa vi wo lo.
- 32 Shi Maryamu ƙo si Yesu aba, wa ya shi n Yesu apita 'ba, wa gna wo ge, "Dagayi ho ƙo gna ge ho gni omi mapui to bei ƙa fim."
- 33 Esa wo ƙo gye Maryamu ƙedo na Yahudiyi ƙai ci bwi, bugba wun wohin n kalayi.
- 34 Wa nya ƙa ge, "Fye woi ƙi shi nna?" Ba gna wo ge, "Dagayi be ha gye."
- 35 Yesu wa ci bwi.
- 36 A Yahudiyi ƙa ci ge, "Ai owo nugundo nu sosai, ƙo kwo la sun woi ci bwi nyi."
- 37 Azaho ƙa ci ge, "Ashe oza nwo ƙo kpe wyebuayi awye ya, to ƙo ƙa mi wa zhin ozaye to wa fim?"
- 38 Yesu nsun-sungye yi mwa, wa lo vinguwo aba. Vinguwohi ƙo zhin kuta-bmi nu, nkuta dnagmayi gu nkwo egbe.
- 39 Yesu wa gna ƙa ge, "Fye kpe kuta ya!" Ama Marita wa ci ge, "Dagayi aba gye wo la casin, ntuge nyipyei nyihi nu nyi shi wo ƙo fi."
- 40 Yesu wa gna wo ge, "Mi to ku gna ho ge ndei ha ga gaiciya ho ƙa gye Shekwoyi mwa-mwa wye m?"
- 41 Aza ƙa kpe kuta ya. Yesu wa kpe awye wu 'she wa zhin aduwa, "Dada ma gode shi ho wo mi aduwa.
- 42 Mikpe lo ge ho zhin ha wo mi cici, ama mi da deye lonu, ntu aza ƙo nu nba zhi ya nyi, ntuge ƙa ga gaiciya ge oho na tnu mi.
- 43 She wo ƙo ku da lonu, wa yi nbegye kalayi ge, 'Liyazuru gmiƙe.' "
- 44 Nsayi-sayi, Liyazuru wa gmi ƙe, n papyi, dna na zafi aje, Yesu wa gna ƙa ge "fye lo wo ya, fya ga wo zokwo wa duya."
- 45 A Yahudiyi nmwa begye, nba ƙo ƙe Maryamu gye, ƙa gye obo n Yesu ƙo zhin, ƙa ku gaiciya ga wo.
- 46 Ama azadoho ƙa kuka ƙa lo ƙa gna Afarisiyi ƙo Yesu ƙo zhin.
- 47 Ntucenu, amalami dnagmayi nna Farisiyi ƙa yezhi ntuge ƙa dna aƙo wye. Ba nya aje ge, "Yi ƙa zhin wuna? Ntuge Ozadeye zhin aƙo wo-woyi lo.
- 48 N ya fawo wa gyi abye, aza ƙa ku zo wo vi. A Romayi ƙo ƙe ƙa la yi aduwa nyakun ya, ƙo wu yi vinya."
- 49 Ama ozadoho nba mi ai yi wo ge, Kayafa, Malami Dnagmayi nu, wa gna ge "Fye zhin atukwo gbolo danu, fye ta kpe ƙo ye lom."

⁵⁰Gwoma zaknayi wo fi, cei ya cici ge begye kwo bwi. Tile zaknayi ye wa fi ntu yi bo.

⁵¹Obo n Kayafa bo da ge Yesu ba fi ntu aza vinya bo nyi, Wo bo da kwo ntuge wo nu bo zhin Malami dnagmayi, ama Shekwoyi nu bo wu wo kwo, wo to bo da kwo n wohin nubo zhin num.

⁵²Shekwoyi bo ku lu da ge Yesu ta-a fi, ntu a Israilayi bo nu gmanyim, ama ntu nna aza vinya bo.

⁵³Tunyi nwyihiyi a Yahudiyi atukwoda ba ya wo zan shin ntuge ba wu wo.

⁵⁴Yesu to bo je zan dna n Yahudiya knin Wo bei la Urushelima fa wa lo wa dna n zhi biyi ho Ifraimu nya bedo nwo abara yi.

⁵⁵Paskasa kwa wu vi, begye kwa be Urushelima sapa to wyihi kwoi sim, ntuge ba ze bahin gyi-gyi-yi, paska wyi kwa kpesi.

⁵⁶A Yahudiyi atukwoda ba ya Yesu zan shin, esa ba bo fi n aduwa nyakun, ba nya aje bo ge, "Fye gye lo ngye wo ba be paska ye."

⁵⁷A Malami dnagmayi bedo a Farisi yi bei la egbe lu ga ge zahozahoi nwa gye Yesu wa da npye, ntuge ba wan Wo.

Yohanna 12

Mi Ta Mwasa Nkunsun Nfye Yim

¹Paska kwoi ce anyipyeyi ngun tnanyi, Yesu wa lo Baitanya, Liyazaru ayi, oza n Yesu bo la wo kala n vingwo nyi.

²Ba ku nyagyi zhin ntu Yesu bo. Marita woi gni woi zhin nyagyi bo, Liyazaru wa sase shi na nyagyi ba n Yesu yi.

³Maryamu wa la omi sundayi wa zekpe Yesu nna pita, wa wun kwo ya nwo tukwoyi-i.

⁴Ama gmanyi nwo abara, wato Yahuda Iskariyoti, nwo bo kun Yesu nyi to ca da wom, wa ci ge,

⁵"Ai omi ye ba ku lo a naira tagyi-tagyi. A bei ba kun kwo nnabai a ce agyiwyeyi a ga awyekwoyi."

⁶Yahuda to bo da lo nu ge, wo ye wa ku awyekwoyi nu bmazhin m, ama ntuge wo nu bei zhin woi shi agyiwyeyi, wo bei zhin woi kni fya-fya.

⁷Yesu wa ci ge, fa wo, wa zhin kwo ntu nyipyeyi bo nu nna bei bi mi ncei nyi.

⁸Fye ba mi fya bma awyekwoyi zhin nba kunsun nfyei cici nyi, ama fye ta bwa mi cicim.

⁹Eas nu aza ɓo wo ge, Yesu la ɓe zhimi, yewa kwa knabe ntu ge kwa gye wo njesun ɓa gye Liyazaru n Yesu ɓo la wo kala n vingwo nyi.

¹⁰Amalami adnagmanyi ɓa zhin shaula ntuge ɓa wu Liyazaru ce.

¹¹Gama ntu wo ɓo nu Ayahudiyi ɓa fa ɓa kunnu ɓa ga Yesu gaiciya ge owo nu zhin Gniyi.

Deji La Yesu Gwo Nna Gmadayi

¹²Shi efye ɓo gyi, aza begye nɓa bei ku ɓe ntu Paska ɓo nyi, ɓa wo ge Yesu ɓe Urushelima lo, woi ɓe lo n zokwo.

¹³Ba ku abala afintolo, ɓa shegun wo n zokwo, ɓai ɓowyi ɓai gna, Hosanna! Anabarkada nu oza nwo ɓe dna Dagayi eye! Anabarkada nu Esu a Israilayi nya.

¹⁴Yesu wa gun Zhagawyi biyi, ntu ge Shekwoyi beda kwa nu ge,

¹⁵“Fye to wo Ofye Esu dnam a Israilayi, gama wo ɓa ɓe n tukwo-gbayi, n sase tu n zhagawyi biyi.”

¹⁶Nsahi owo abara to bei kpe aɓo nɓa ka fi n Littafi Gyi-gyi-yi ge ɓa nu num. Sai sanu Yesu ɓola jeze lo eshe ai la wo latu, ɓai kpe ge aɓo nmwa begye bei ku nu nɓa wye.

¹⁷Aza nɓa zhi n vingwo aba, ɓa gye ngye shi Yesu la Liyazaru kala nyi, ɓa ɓo laɓa ɓai gna azaje aɓo nwo ɓo zhin.

¹⁸Ntu deye ɓo aza nmwa begye ɓa kun lo ntu ge ɓo gye wo, ntu aɓo wo-woyi ɓo nɓa wo ge wo ku zhin nyi.

¹⁹A Farisiyi ɓa gna aje ge, “Wo ku nasara zhin n yi tukwo, gye aza vinya du dawo.”

²⁰A Helleniyi ho nɓa ɓo ɓe Urushelima ntu Paska ɓo,

²¹Ba lo Filibbus aba, nwo gmi n Baiseda nyi n Galili kni, ɓa gna wo ge, “Male yi ye ya gye Yesu.”

²²Filibbus wa gna Andarawus, ɓa kuka ɓa gni lo ɓa gna Yesu.

²³Yesu wa gna ɓa ge, “Esa la si nna ɓa ga Oza Nugun mwa-mwa.

²⁴Ma gna fye gaiciya, ndei Owyibyegye to kaya dna nkni kwa fim, kwo ɓa bwa kwo nya shi lo nu gmanyi, ama nkwa fi, kwo zhin kwa ga wyishin nmwa.

²⁵Oza nwo ye wohin wye-wyeyi wo ɓa bwi, ama oza nwo wun wohin wye-wyeyi nu, wo nu ɓa pwo.

²⁶“Oza nu nwo ye wa ze mi ’baratile wa vi mi n saho-sahoi. Oza nu nwo ɓa ze mi bara, Dada ɓa ga wo mwa-mwa.

- 27** Bugba wun mi lo nmwa sosai, nba gna Dada nu wa gni mi n wahala nu n kwo belo nmiyi dna anyi.
- 28** Dada la oho ye tu!" Ba wo begye nshe kwoi gna, "Mi la mi ye latu, Mi-i ba la kwo tu njesun."
- 29** Esanu aza bo wo begye ba wo ngye ogma na jewyi, azaho ba ci ge malaika ku bo da nwoi.
- 30** Yesu wa gna ba ge, "Begyee nfyaa wo nyi kwa be ntu fye apma bo nu, to ge ntu nmi bo m.
- 31** Esa la si ada anyi owa. Esa la si a wan shetan, yerima anyi ye nya, a she wo ya nbmi.
- 32** Esa nu abo la mi tu nshe (tu n zundu) nbo yi aza vinya be cei nmi aba."
- 33** Wo bo da lo nu, ntu ge wa wu shi wo ba fi nwu.
- 34** Aza yezhi ba dna begbe ba gna, "Ya kpe lo ge Kristi ta fim. Wo zhin wye-wyeyi da nu nyalo-nyalo. Knihi nu zhin hoi gna ge wo ba fi-a? Kristi knidoyi nu n ho da wo bo a?"
- 35** Yesu wa gna ba ge, "Emi buzangna bo kunsun nfyee nsai fyewyi. Fye zan-zan dna nkwo, ntu ge esa be lo, wyegma ba dna, fye to bo je zokwo wyegyem.
- 36** Fye ga buzangna ye gaiciya, kwo kunsun nfyee, ntu ge fya ze abuzangna abi." Shi Yesu bo ku abo deye zo da vinya wa laka wa lo bwaho, to ba je wo wyegyem.
- 37** Yesu bo ku abo wo-wo-yi zhin bai gye, dudu lo nu, aza nmwa begye to ba ga gaiciya ge wo nu zhin Kristi m.
- 38** Anabi Ishaya beda bo ku nu, nwo bo gna ge, "N nyika ba nu Dagayi wa wu wo iko-a?"
- 39** Ba to bo mi ba ga gaiciya m, gama ntu ge Ishaya bo ku je da ge,
- 40** "Shekwoyi ku awye bua ba. Woi la bugba dna ba kala, ntu ge, to ba mi ba gye wyeba ko ba bwa awyega dna nba bugba ko ba be mi aba, ma ka ba gnam."
- 41** Ishaya bo da lo nu, ntu ge wo bo ku gye Yesu mwa-mwa, wa da beda tu nwo tukwo.
- 42** Dudu lo nu a Yahudiyi atukwoda nmwa begye bei ku gaiciya ga ge Owo nu zhin Kristi. Ama ba to bo ye ba wu bahin tukwo pei-peii m, ntu odna bo ge kada Afarisiyi ba nya ba ya nna duwa nyakun;
- 43** Ba bo zhin bai gna ye aza nu ba ci ba, to ge Shekwoyi m.
- 44** Yesu wa dabo n begye kalayi wa gna "Oza nwa ga mi gaiciya wo ga Shekwoyi nu gaiciya nwa tnu nmi-i nyi.

⁴⁵Oza nwo ku mi gye, wo ku Oza gye nwa tnu mi nyi.

⁴⁶Ma be ngye buzangna anyi nya, ntu ge Ozaho-zahoi nwa ga mi gaiciya wo ta zan-zan dna nwyegmam.

⁴⁷Oza nwo wo mi beda to woi ga gaiciya m, mita da wo owam, ntu ge ma be ma gni anyi nu, to ge ma da anyi owam.

⁴⁸Ama oza nwo na mi abo, to woi gwo mi beda m, abo da wo owa n'wadawyi.

⁴⁹Gama beda nmi da nyi omi beda nu tom, Mi da bo nu n Dada wa tnu mi ge mi da.

⁵⁰Mi kpe lo ge Owo beda ba ga za wye-wyeyi nyalo-nyalo nya. Ntu ce nu, Enya wa gna mi ge mi da, ma da."

Yohanna 13

Yesu Wa Zhan Wo Abara Apita

¹Nwyesheyi ai gna a bei zhin Paska nsu, Yesu wa ku kpe ge owo sukwo pmaknayi nu, wa kpe jeze lo wo Dada aba nshe. Wa ku ye-ye wu ba nba zhin owo anya nnanyi, nsahi wa wu ba owo ye-ye dei-dei.

²Bai kpe n tebur bai gyi wyeshe-nyagyi, shetan woi la lo dna n Yahuda-Iskariyoti Siman nugun bugba, ntu ge wa kun Yesu.

³Yesu bo ku kpe ge, Dada ku anya vinya fa fi nwo akun, njesun shi wa gmi Shekwoyi aba nu nyi, wo ba je ze lo Shekwoyi aba n njesun.

⁴Esa nu ba bo kpe bai gyi nyagyi, Yesu wa laka wa kma aje zhi, wa ku tawal wa pa nshin.

⁵Wa la nuwan wa sin fi n kwanu, wa zhan wo abara apita, wa wun ba apita ya n tawal yi nwo bo cei pa nyi.

⁶Shi wo bo si Bitrus aba, Bitrus wa nya wo ge, "Dagayi ho nu ye ha zhan mi apita?"

⁷Yesu wa gna wo ge, "Ho ta kpe be ye lo nmi zhin nyin, ama ho bo kpe ye nwyihoi."

⁸Bitrus wa gna, "To omi apita nu nho ba zhan." Yesu wa gna wo ge, Nmi to zhan ho apitam, agye ho to zhin mi bara num.

⁹Bitrus wa gna Yesu ge, Omi apita nu to kawai n ho ba zhan ama zhan mi abwa bedo nmi tukwoyi.

¹⁰Yesu wa gna wo ge, "Oza nwo la nuwan fu, aba bwa wo apita nu zhan, owo nayi gyi-gyi-yi lo. Fye gyi-gyi-yi lo, ama ofye vinya nu tom."

- 11**Wo bo da lo nu ntuge, wo kpe oza ye lo nwo ba kun wo, ce nu bo zhin wa ci ge, 'ofye vinya nu to gyi-gyi-yi lo m.
- 12**Esa nu wo bei la apita zo ba zhan, wa ku je kpe, Wa sase, Wa nya ba ge, "fye kpe bo ye lo nma zhin fye nyi?"
- 13**"Fye yi mi ge malami, njesun ge Dagayi, gaiciya nu, ntu ge mi zhin kwo nu."
- 14**Shi emi nmi zhin Dagayi n Malami yi mi la apita zhan fye nyi, fyehin fye zhan aje apita.
- 15**Mi la of ye manayi ya shi fye, fye zhin lo nu ngye shi ma zhin fye nyi.
- 16**Behin-hin ma gna fye, fyenu ta du puwadam, tnu-tnuyi ta du oza nwo tnu wo tnu-tnu nyim.
- 17**Shi fye ku kpe lo nu nyi, fye ba bwa anabarka ndei fya zhin lo nu.
- 18**"Mi ta da be ye nfyei vinya num; Mi kpe aza ye lo nmi la kni. Littafi ku da ge, 'Zaho lo woi gyi nyagyi nkunsun nmi yi, Wo nu ba kun mi.'
- 19**Mi pma fye gna nu, n nabai shi kwo zhin, fye ga mi gaiciya ge mi nu zhin Kristi.
- 20**Behin-hin ma gna fye, oza nwa gwo mi tnu-tnuyi, wo la mi gwo, oza nwa gwo mi, wo la Shekwoyi gwo nwa tnu mi nyi."

Zaknayi Nfye Mi 'Ba She Mi

- 21**Shi Yesu bo ku dalo nu, bugba wun wo, wa gna ba ge, "Ma gna fye gaiciya, oza ho lo nfye mi nwo ba kun mi"
- 22**Owo abara ba shi aje awye, to ba kpe oza ye nwo da wo bo m.
- 23**Bara-ho bo sase tu vi-vi n Yesu yi, Yesu bo zhin woi ye wo nmwa.
- 24**Siman Bitrus wa yi barahi ge, "nya Yesu oza nwo da wo bo."
- 25**Wa lo vi-vi n Yesu yi, wa nya wo ge, "Dagayi nyikado nu-a?"
- 26**Yesu wa gna ge, "Owo nu zhin oza nmi ba ga wo ezhegma, mi-i la kwo dna nna anyi." Wa da dna wa ga Yahuda Iskariyoti Siman nugun.
- 27**Shi Yahuda bo gwo buredi, shetan wa lo dna nwo bugba. Yesu wa ci wo ge, "Bo ho ye ha zhin, zhin kwo npye."
- 28**Ozaho-zahoi nwo bo tu nna nyagyi ba to bo kpe beye n Yesu dam.
- 29**Shi Yahuda nu bo zhin oba gyiwyeshiyi nyi, azaho ba gye ge Yesu bo tnu wo nyagyi si nu, ko ge wo ga awyekwoi gyiwye.
- 30**Yahuda wa pye ngmiya loi, dna nsukwo wwegmahi.

³¹Esa nu Yahuda bo zo gmiya, Yesu wa gna ge, “Esa la si a la Oza Nugun tu, aga Shekwoyi mwa-mwa njesun.

³²Ndei ala Shekwoyi latu dna nwo, (Yesu) Shekwoyi nwohin ba la Nugun tu, Woi ba zhin ce lo nu safyewyi.

³³Omi abi nawyi, esa fyewyi nba fa fye, fye bo zan mi shin, mi gna fye nu ngye shi mi ku gna a Yahudiyi nyi, aba nmi lo nyi fye ta mi fya be m.

³⁴“Wyidna woi-woi nu nmi ga fye, fye ye najeyi, shi mihin ma ye nfyeyi nyi, Nlo nu fye ye najeyi.

³⁵Nfye ye aje lo, zaho-zahoi ba kpe ge fye zhin omi abara nu.”

³⁶Siman Bitrus wa nya ge, “Dagayi ho lo nna?” Yesu wa gna wo ge, “Aba nmi lo nyi ho ta mi ha gni lo nmi yi m, ama ho bo be da mi n sahoi.”

³⁷Bitrus wa je nya ge, “Dagayi knihi nu ba zhin to ma gni lo nhoi nsayi yem ma?” Gama mi la ye ma fi ntu ho bo.

³⁸Yesu wa nya wo ge, “Ha fi ntu mi bo? Ma gna ho gaiciya, ho ba na mi ye kpe bo har abwa ngun ata, pise-nugba kwa kpe ku ce.”

Yohanna 14

¹A Bugba kwo to wun fyem. Fye ga Shekwoyi gaiciya, fya ga mi gaiciya njesun.

²Anyakun lo nmwa begye nmi dada puwa. Kwo to bo lo nlo num, mo gna fye ge nba lo mi zhin aba ba ga fye.

³Esa nu mi la pwo nba jeze be ma ku fye lo ncei N’she mi, ntuge aba n mi nyi fyehin fya sase bo.

⁴Fyeyi kpe zokwo lo nkwo lo aba nmi lo nyi.

⁵Toma wa ci ge, “Dagayi yi ta kpe aba lo nho lon, yi ba kpe zokwo nwuna?”

⁶Yesu wa gna wo ge, “Omi nu zhin zokwo, n gaiciya yi n wye-wyeyi. Zaho-zahoi ta mi wa lo Dada abam, sai wa e mi aba kpa.

⁷Fye bo gna fye kpe mi ye lo, fye kpe mi Dada ye lo, nsayi ye fye kpe wo ye lo, fyeyi ku wo gye wye.”

⁸Filibbus wa gna wo ge, “Dagayi wu yi Dada kwo ba yi kun.”

⁹Yesu wa gna wo ge, “Filibbus? Esa la mwa, yi kunsun na jeyi, Knihin nu zhin to hoi kpe Dada ye ma? Oza nwo ku mi gyewye, wo ku Dada gyewye. Knihin nu zhin hoi nya mi Dada bo njesun-a?

¹⁰Ho to ga gaiciya ge, mi dna lo n Dada, Dada njesun wo dna lo nmi m? Abeda nmi da nyi, Omi nya nu to m, ama Dada nu nwo dna n mi nyi. Wo nu zhin wo tnu-tnu.

¹¹La gaiciya ga ge mi dna lo n Dada. Dada njesun n dna lo n mi. Kwo kwa ha gami gaiciya ntu abo wo-woyi bo nfyeku gye mi-i zhin nyi.

¹²“Behin-hin ma gna fye, Oza nwa ga mi gaiciya wo ba zhin abo wo-woyi shi ma zhin nyi, wo ba zhin abo ndu manya, ntu ge mi lo Dada 'ba nu.

¹³Fye nya Dada nyaho-nyahoi bo dna nmi eye, nba ga fye, ntu ge a la Dada tu n Nugun aba.

¹⁴Fye ba mi fya nya nyaho-nyahoi bo dna nmi eye mba zhin kwo.

Alkawali Zafun Gyi-gyi-yi Nya

¹⁵“Ndei fye ye mi lo, fye ba shi mi awyidna bwa.

¹⁶Nba gyi Dada wye wa ga fye bmazhinyi nwo ta shan fye fwam.

¹⁷Owo nu zhin Zafun Gaiciya nya. Wo ba kunsun nfyeku har nyalo-nyalo. Anyi ta mi ba gwo wom, ntu ge ba ta gye wo wyem, ai gna ge ba kpe wo yem. Ama fye kpe wo ye lo ntu ge wo sase nfyeku nu, woi ba dna nfyeku mi nu.

¹⁸Mi ta fwa fye ngyeku akuwym, nba jeze be da fye.

¹⁹Esa fyewyi nba fwa anyi, ama mi kunsun lo nfyeku, ntu ge nbo je wye-wyeyi bwa. Fye ba bwa wye-wyeyi ce ngyeku mi.

²⁰Nwyihi-i fye bo kpe ge mi dna lo n Dada, efyehin ce nfi lo nmi, omihin njesun n dna lo n fye.

²¹Oza nwo zhin bo n mi ye, wo nu zhin mi yehi. Oza nwo ye mi, Dada nwohin wo ba ye wo. Mihin nba ye wo. Njesun ma wu zahi nwo ye mi nyi, mihin tukwo.”

²²Yahuda (to ge Iskariyoti m) wa nya wo ge “Dagayi, ntu kni bei nu ha wu hohin tukwo n yi aba, to ha wu azajem ma?”

²³Yesu wa dna wo begbe wa ci ge, nba wu mihin tukwo nnaza ba nba ye mi nyi. Dada ba ye nbai ce. Yi ba be ya sase nbai.

²⁴Oza nwo taye mi m, wo ta vi mi bedam, beda ye nmi da nyi Dada nya nu nwa tnu mi nyi.

²⁵Mi gna fye abo deye, tunyi mi-i ye kunsun nfyeku.

²⁶Ama shi Dada bo tnu n Bmazhinyi, wato Zafun Gyi-gyi-yi wo bo wu fye abo vinya. Njesun wo bo pa fye abo n mi ku gna fye nyi.

²⁷Kyauta asese-lafiya nyami la fwa nfyeku aba; Omi asese-lafiya nya nu nmi ga fye, kwo kakayi lo nnanyi nya. Ntu ce nu bugba to wun fyem, fyei to wo edna m.

²⁸Fye pa abo n mi ku gna fye, mi fwa fye nu ama nba jeze be da fye njesun. Ndei fe ye mi lo behin-hin nya, fye ba dagma, ntu ge mi lo Dada aba nu nwo du mi nyi.

²⁹Mi ku abeye pma fye gna, tunyi to bai zhin m, nabai shi ba bei zhin fye bo ga mi gaiciya.

³⁰Mi to nsa yi lo, ma da bo nfyeyi m, ntu ge oza nukwoyi anyi nya be lo, ama wo to n iko lo, tu nmi tukwo m.

³¹Ama, nba zhin bo Dada wa gna mi ge mi zhin. Ntu ge anyi ba kpe ge mi ye Dada lo. Fye kukala ya lo.

Yohanna 15

Gnai Gaiciya Nya

¹Omi nu zhin anab wunuyi gaiciya nya, omi Dada nu zhin of wa-da woi zhin kwa ba.

²Wo zhin wa gbe abwala ya nba ta ga gyi-gyi m. Njesun wa zhin abwala manayi aba, ntu ge ba ga gyi-gyi ndudu.

³Wo la fye zhin aba nmi beda yi, nmi da nfyeyi cici nyi.

⁴Fye sase fi nmi, omihin nfyeyi mi. Ntu ge bwala ta mi kwa ga gyi-gyi to kwoi kpegyi n shinwan-gnai num. Fyehin ta mi fya ga gyi-gyi, to fyei sase fi nmi m.

⁵Omi nu zhin shinwan-gnai, fya zhin abwala. Oza nwo sase dna nmi, omihin ndna nwo, wo ba ga gyi-gyi nmwa, ntu ge ntna mi, fye ta mi fya zhin nyaho-nyaho yi m.

⁶Oza nwa kpeya nmi, a ba she wo ya ngye bwala ntna apma, nkwo zhin kwa wo akawu, abwala ye pya a zhin a ye ba zhin a dna ba 'na, ba gyi 'na.

⁷Ndei fye sase fi nmi, fyei vi mi abeda, fye nya nyaho-nyahoi bo nfyeyi abe ga fye kwo.

⁸Omi abara gaiciya nya, zhin ba ga gyi-gyi dei-dei, Deye zhin kwa e Dada n latu yi.

⁹Mi ku fye ye, ngye shi Dada wa ye mi. Ntu ce nu fye ku sase fi nmi ye-ye.

¹⁰Esa fya vi mi abeda, fye sase fi nu nmi ye-ye, ngye shi mihin mi ye Dada mi-i sase dna nwo ye.

¹¹Ma gna fye abo deye nabai, fya bwa omi agmada, efye agmada njesun ba nu.

¹²Mi ye fya ye najeyi, ngye shi mi ye fye nyi.

¹³Yeye dnagmayi to lo kwa du deye m, shi oza ga wohin wye-wyeyi ntu wo anugundo 6o m;

¹⁴Fye zhin omi anugundo nu, ndei fya zhin 6o nmi ye.

¹⁵Mi to yi fye lo ge afyenu m, ntu ge puwada to zhin wa zhin shaula nfyenu yim, Fye zhin mi anugundo nu, ntu ge mi ku abo gna fye vinya n Dada wa gna mi nyi.

¹⁶Ofye ye nu to kni mi m! Omi nakni fye! Nabai fya lo fye ga gyi-gyi manayi. Nabai nyaho-nyahoi nfya gyiwye dna nmi eye, Dada 6a ga fye kwo.

¹⁷Mi cei pma fya ye najeyi.

¹⁸Ndei anyi wun fye nu, fye kpe ge a ku mi nu wunnu nnabye.

¹⁹Fye 6o gna fye zhin anyi nya nu, 6o ye nfyeyi, ama fye to zhin anyi nyanu m, ntu ge mi la fye kni n6a. Ce nu zhin anyi bai wun fye nu.

²⁰Fye pa 6o lo nma gna fye nyi? Fyenu ta du wo puwa da m. Shi 6a ku wahala ga mi nyi, kwo wu nu ge, 6a 6a ga fye wahala ce. 6a gna 6a mi abeda gwo, 6o la ofye abeda gwo.

²¹Aza n anyi 6a ga fye wahala, ntu ge fye zhin oma nya nu, gama 6a takpe Shekwoyi ye lo, nwa tnu nmi nyim.

²²Mi to gna ma 6e ma dabo n6a yim, to 6o n laifi lo m. Ama nsayi ye, 6a to nna gma kun yi lo, ntu 6a laifi 6om.

²³Oza nwo wun mi nu, wo wun mi Dada nu lo ce.

²⁴Mi to gna ma zhin abo wo-wo-yi, naza to shin zhin, to 6o n laifi lo n. Ama baku gye abo wo-woyi ye wye, bai du-du bai wun mi nu bedo nmi Dada yi.

²⁵Deye ku 6eda nu, n anabi 6ei da tu Masihu tukwo ge, 6a 6o wun mi nu ntna dalili.

²⁶Ama n6a tnu fye n Tnazhinyi, wato Zafun Gyi-gyi-yi, Wo 6a gmi n Dada aba nu, Wo nu zhin Zafun gaiciya nya, Wo 6o gna fye abo vinya n mi tukwo.

²⁷Tile, fya gna zaho-zahoi omi nabari, ntu ge fye ku kunsun n miyi tunyi n kmisunyi.

Yohanna 16

Azhin Nna Gmadayi Lo Nnabye

¹“Mi gna fye abeye vinya, nabai to fya ku jeje fi nna 6o n6a 6e lo nabye nyim.

²6a 6o nya fye ya nu aduwa-nyakun. Har esa 6e lo aza 6a wu fye, bai gye ngye 6a zhin Shekwoyi 6e ye nu.

³6a 6o zhin nu, ntu ge 6a ta kpe Dada ye lo kwo omi m.

⁴Mi pma fye abeye gna nu, nabai ge esa nba be ncei, fya pa ge nbo ku pma fye gna. Mi to bo shir fye gnam, ntu ge mi bei ye kunsun n fyei.

⁵“Nsayi mi lo oza aba nu nwa tnu mi nyi, Ozahoi ta shan mi nya lo ge, ‘Ho lo nana?’

⁶Ntu ge fye zhi nbugba wun yi nu, shi ma gna fye beye.

⁷Ama ma gna fye gaiciya, kwo gna bmiya lo nfye aba ma lo, nmi to lo n Bmazhinyi ta be fye abam; ama nma lo nba tnu nwoi wa be fye aba.

⁸“Esa nwa be, wo ba wu anyi ba laifi pei-pe, wo ba wu ba Shekwoyi befyece, nwo wada yi.

⁹Anyi laifi nu nyi, ntu ge ba to ga mi gaiciyam.

¹⁰N befyece bo, ntu ge mi lo Dada ba nu to fya je mi wyegye m.

¹¹N wada bo, ntu ge aku owa pma anyi-su da, wato Shetan.

¹²“Abeda lo nmwa nmi ye ma gna fye, ama fye ta kpe ba ye nsayi yem.

¹³Esa nu Zafun Gaiciya nya ba be, wo ba dna fye n zokwo gaiciya nya. Wo ta gna fye owohin beda nu m. Ama nya nu nwo ku wo. Wo bo gna fye abo nba be lo nabye.

¹⁴Wo ba la mi tu, wa wu fye omi mwa-mwa.

¹⁵Omi Dada mwa-mwa zhin omi nya nu; Ce na zhin mi-i gna fye ge, esa Zafun ba be ncei wo ba wu fye omi mwa-mwa.

¹⁶Esa fyewyi fye ta je mi wyegyem, ama esa fyewyi njesun fye bagye mi wye.”

¹⁷Owo abara ho banya ge, “Wo da knibe, nu ge, esa fyewyi fye ta je mi wyegyen, esa fyewyi fye ba je mi wyegye n jesun; Woi je da ge, ‘ntu ge mi lo Dada aba?’”

¹⁸Bai nyabo, “Wo da knibe, nu ge esa fyewyi a? Yi ta kpe be ye lo nwo dam.”

¹⁹Yesu wa ku kpe ge, ba ye ba nya wo bo nu. Wa she sasa, wa nya ba ge, fye nya aje bo ntu beda bo nu nma da nyi?

²⁰Ma gna fye gaiciya, fye ba cibwi fyei zhin bugba zhi-zhiyi, ama anyi ba dagma. Fye ba wun bugba, ama Ofye bugba wun ba ze fye agmada.

²¹Kwo bo ze ngye shi nyikwoza bo yashi woi wo nyasan, ntu ge owo sa la si, ama esa wo zo bi ma, wa san-san ze amwi ntu agma da bo, ntu ge ala oza ma dna anyi.

²²Bugba wun fye lo nsayi ye. Ama esa nmi ba jeze be nyi, fye bo nya agmada, zaho to lo nwo bo gwo fye agmadahim.

²³Nsahi fye to bo nya mi nyaho bo m. Gama enya nfya nya Dada kwo bo cewo, wo bo ga fye, nfya nya wo bo dna nmi 'ye wo ta wo fye bim.

²⁴Fye to shin nyaho wyegyí dna nmi eye m. Fye gyiwye, wo ba ga fye ntu ge, Ofye agmada ba nu har bai gyiya.

²⁵“Mi ku beda da n nanyi-besisi yi, ama esa be lo nmi ta je da lo nu m, sai dai ma gna fye Dada bo pei-peí.

²⁶Dna n nyipyeyi-hi fye bo gyiwye dna nmi’ye. Mi ta da ge mi bei gyi Dada wye ntu fye bo nu m.

²⁷Ntu ge Dada ye fye lo, gama fye ku gaiciya ga mi ge ma gmi n Dada aba nu.

²⁸Ma gmi n Dada aba nu, mi-i be anyi, mba fa anyi, ma jeze lo Dada aba.”

²⁹Owo abara ba gna wo ge, “Ho ku bo da nsayi cewo to ge n nanyi-besisi yim.

³⁰Yi kpe lo ge ho kpe abo ye lo vinya, Zaho to lo nwo ba wu ho bohóm, ntu deye bo, kwo ku zhin yi ku gaiciya ga ge ha gmi n Dada aba nu.”

³¹Yesu wa nya ba ge, “Fye ku gaiciya ga nhayi!”

³²“Ama esa belo, kwoi la lu be, nfyé ba gnamiya zaho-zahoi wa lo wo puwa, fya ce mi gni nmi gmanyi yi, ama mi to gni nmi gmanyi yi nnum, gama Dada kunsun lo nmi-i.

³³Ma gna fye deye, ntu ge fya bwa bugbafu nu. Fye ba bwa wahala dna nanyi ye. Ama agu-tu-fye ngye apma, Miku nasara zhin n nanyi yi.”

Yohanna 17

Yesu Aduwa-zhin Ntu Aza Bo

¹Esa nu wo bo la pwo abeda ye da bo, Wa kpe awye shi nshe wa gna, “Dada! Esa la si ha la ho Nugun tu. Nabai, Nugun nwohin wa la ho tu.

²Gama Ho la iko ga wo tu naza tukwo vinya, ntu ge wa ga wye-wyeyi nyalo-nyalo nya nna aza ba nho ku ba ga wo nyi.

³Zokwo wye-wyeyi nyalo-nyalo nya nu nyi, ba kpe ge ho nu zhin Shekwoyi gaiciya nya gmanyi, bedo n Yesu Kristi yi n ha tnu nwoi dna anyi nyi.

⁴Mi la ho latu dna nanyi, ngye shi mi ku abo zhin vinya nha tnu mi ge mi zhin nyi.

⁵Nsaiye, Dada, la mi tu nho aba, n latu pyai nmi bei cei shin sun nhoi, tunyi to ai zhin anyi nyim.

⁶“Mi ku ho bo gna aza vinya nha ga mi fi nanyi nyi. Ba bei zhin ha nyanu, hoi ga mi ba, bai ku gaiciya gaho beda.

⁷Nsaiye ba kpe lo ge, anya vinya nmi cei lo, ho naga mi.

⁸Ntu ge mi ku ho awyidna ga ɓa vinya, ɓai la gwo. ɓa kpe lo ge ma gmi nho aba nu, Oho na tnu mi.

⁹“Mita gyiwye ntu aza vinya ɓo nu m. Ama mi gyiwye ntu naza ɓo nu nha ga mi nyi. Ntu ge ɓa nu zhin oha nya.

¹⁰Anya vinyan n mi cei, ɓa zhin oha nya nu, Oho anya omi anya nu, Mi-i la latu bwa nɓa aba.

¹¹Miye ma fa anyi nu, ma ce ɓa fi 'ya, ma ɓe ho aba. Dada Gyi-gyi-yi, oɓa nu nho ku ga mi nyi, mi ye ha kna ɓa nho ikoyi, ntu ge ɓa ze gmanyi, ngye shi yi zhin gmanyi nyi.

¹²Esa nu mi bei dna cei nanyi nyi mi bei la ɓa kna, mi-i gu ɓa, dna n eyehi n ho bei ga mi nyi. Nabai to ɓa bwim akpe ena ɓi ntu ge wanu Littafi Gyi-gyi-yi beda.

¹³“Nsaiye, mi ɓe ho aba nu, esa nmi bei kunsun nɓai, ma ku aɓo gna ɓa n mwa ntu ge oɓa agmada kwa nu.

¹⁴Mi ku ho beda ga ɓa, anyi wun ɓa nu, ntu ge ɓa to zhin anyi nya nu m, ngye shi mihin to zhin anyi nya nu nyim.

¹⁵Mi ta zhin aduwa ge ɓa kun ɓa nanyi num, ama ha kna ɓa n shetan iko.

¹⁶ɓa to zhin anyi nya nu m, ngye shi mi to zhin anyi nya nu nyi m.

¹⁷Ze ɓa gyi-gyi-yi n gaiciya yi, oho beda nu zhin gaiciya.

¹⁸Ngye shi ha tnu mi dna nanyi nyi, elo nu mihin mi tnu ɓai fi nanyi.

¹⁹Mi la mihin ze gyi-gyi-yi ntu ɓa ɓo, nnabai ɓahin ɓa ze gyi-gyi-yi dna n gaiciya.

²⁰“Mi ta zhin aduwa ntu aza deye ɓo nu gmanyin, ama mi zhin aduwa ntu ɓa ɓo nɓa ɓa ga mi gaiciya ntu aza deye saida zhin ɓo nyi.

²¹Mi zhin aduwa ge ɓa ze gmanyi, Dada, ngye shi mi dna nho, ohohin ndna nmi. N lo nu ɓa fi n yi mi, ntu ge anyi ɓa ga gaiciya ge oho na nu mi.

²²“Mwa-mwa nha ga mi nyi mi la ga ɓa. Mwa-mwa gmanyi ze nya, ntu ge ɓa ze gmanyi.

²³Omi ndna nɓa mi, ohohin ndna nmi. Fwa ɓa ze gmanyi dei-dei, anyi ɓa kpe ge oho na tnu nmi-i, Mi ku ye nɓai ngye shi hohin ha ye mi nyi.

²⁴Dada, mi ye aza no ku ga mi nyi, ɓa sase aba nmi nyi, ɓa gye mi mwa-mwa wye, mwa-mwa n ha ga mi ntu ge, ho ye mi tunyi to ai zhin anyi m.

²⁵“O, Dada befyecayi, anyi ta kpe ho ye lo m. Ama mi da kpe ho ye lo, abara ye njesun ɓa kpe lo ge ho na tnu nmi yi dna na nyi.

²⁶Mi ku ho wu ɓa, mi-i ɓo wu ho ɓa, n nabai yeye dnagmayi nho cei nmi aba nyi kwa dna nɓa mi, omihin njesun nɓa mi.”

Yohanna 18

Ala Yesu Wan

- ¹Esa nu Yesu ƙo la pwo aƙeƙe daƙo, wa pi Kidron nuwan ya, beƙo n wo abara yi, ƙa lo fi n ofwa ho ƙo.
- ²Yahuda, nwo ƙo kun Yesu nyi, wo bei kpe abahi aba, ntu ge Yesu bei zhin woi lo ƙo cici nwo abara yi.
- ³A malami dnagmayi beƙo a Farisiyi, ƙa ku asoja ga ƙa gni lo n Yahuda yi. Ba lo n na fitila yi, n anabwi-yi, n nanyagalayi ƙa lo ofwahi.
- ⁴Shi Yesu ƙo ku kpe ƙoye nkwo ƙa zhin wo, wa gmi lo wa nya ƙa ƙo ge, “Fye ye nyika na?”
- ⁵Ba ci wo ge, “Yesu” wa gna ƙa ge, Omi nu zhin wo. (Yahuda zabwi za ƙo gni ngnisun nƙai).
- ⁶She wo ƙo gna ƙa ge, “Omi nu zhin wo,” ƙa ce ƙa miya zhi nkni navun yi gbudu-gbudu.
- ⁷Wa je ƙa ƙo nya ge, “fye ye nyika?” Ba ci ge, “Yesu n wo gmi n Nazarati nyi.”
- ⁸Yesu wagna ƙa ge, “Mi ku gna fye ge omi nu gni nyi,” shi fye bwa mi nu ye nyi, fye fwa aza deye ƙa lo ƙa nya.
- ⁹Wo ƙo da deye, nabai owo i beƙa kwa nu nu ge, “Aza nha ga mi nyi, kwo gmanyi kwo to bwi m.”
- ¹⁰Bitrus wa wa obe-yakwo, wa ka Malkus tɓɓua bwai-zhe-nya ya n i cei. Wo ƙo zhin malami dnagmanyi fyenu nu.
- ¹¹Yesu wa gna Bitrus ge, “La ho beyakwo ya dna n kwo apui. Kwo to zhin tile nu ma sin wahala n Dada la ga mi nyin?”
- ¹²Elo nu, abusi-ƙiyida, nna sojayi nƙa tukwoda yi, ƙa wan Yesu ƙa pa wo nna wun yi.
- ¹³Ba lo n woi n Hannana aba, Kayafas yezhi nwo nu ƙo zhin malami dnagmayi dna eyehi.
- ¹⁴Kayafa nu ƙo gna a Yahudiyi atukwoda ge, “Kwo bmiya lo zaknanyi wa fi ntu azaje ƙo.”
- ¹⁵Siman Bitrus wa vi lo n navun, ngnisun n bara dohoyi. Barahi bei dami n malami dnagmayihi, ntu ce nu a fwa wo wa lo dna ngnisun n Yesu yi n awada 'ba.

¹⁶Ama Bitrus da wa kpegni n nabokunmi gbe. Bara dehi wa gmi lo, wa da bo n binyikwoi bokunmi-guyi ge wo du be n Bitrus yi.

¹⁷Binyikwoihi wa nya Bitrus ge, “ho to zhin Yesu bara nu m?” Bitrus wa ci ge, “Awo, mi to zhin kwo num.”

¹⁸Ese beifu, ntu ce nu, aza bo zhi bai wye ona, a fyenu bedo a sojayi. Bitrus wa kpe gni n kunsun n bai woi wye ona.

¹⁹Malami dnagmayi, wa ya Yesu abo nya, tu nwo abara tukwo bedo nwo nyawu yi.

²⁰Yesu wa dna begbe wa ci ge, “Aza kpe mi nyawu beye lo vinya, Ma ku wa’azi zhin dna nna duwa-nyakun, a Yahudiyi atukwoda bai wo. Mi to wu nyaho n vim, ma wu kwo pei-pe nu.

²¹Ntu knibeyi hoi nya mi bo a? Nya aza bo nba bo wo mi nyi. Ba kpe beye lo n mi bo da.”

²²Shi Yesu bo zo beda lo nu, soja ho wa ce wo pmi, wa nya wo ge, “Beda pya nu nho ba dna Malami Dnagmayi begbe ncei?”

²³Yesu wa ci ge, ngye mi ta da gaiciya nu m, ha da ma wo, ama ngye mi da gaiciya nu, knidonu ba zhin ha ce mi pmi a?

²⁴Hannana wa tnu n Yesu yi n Kayafa aba n pa-pa-yi, wo nu nwo bo zhin Malami dnagmayi nyi.

²⁵Siman Bitrus woi gni woi wye ’na, Zaho wa nya wo bo njesun ge, “Ho to zhin zahi bara nu m? Wa ci ge, Awo.”

²⁶Ama Malami Dnagmayi fyenu ho wa nya wo bo ge, “Mi to bo ku gye ho, n kunsun Yesu yi dna n fwa n?” Fyenu hi ba bei zhin ’bye nu n zahi n Bitrus bo ka wo tñubua ya nyi.

²⁷Bitrus wa abo na njesun, Nsa-sayi pise-nugba kwa ce ku.

Ala Lo N Yesu Yi N Bilatus A ba

²⁸Kayafa bo pwo Yesu owa da bo n labmiyi nu. Ba la wo ba lo nwoi n a Romayi gwamna garko. A Yahudiyi nba bo lo Yesu yi nyi, to ba ye ge ba lo fi n garko-him, ge kada ba tu cegye to ba mi ba gyi Paska nyagyi m.

²⁹Bilatus wa gmi be, wa nya ba ge, “Oza deye, wa zhin fye knihi na?”

³⁰Ba ci ge, “Wo to bein laifi ye lon, to yo wan wo be cei nho aba m.”

³¹Bilatus wa gna ba ge, “fye da wo owa nfyehin yi.” A Yahudiyi ba ci ge, yi ta mi ya wu oza m, yi ye ha ga yi ’gbe.

³²Deye ɓo zhin lo nu, ntu ge Yesu beda kwa nu nu, esa nwo ɓo da efi pya cei nwo ɓa fi nyi.

³³Bilatus wa jeze lo wada-bokun, Wa gna ge adube n Yesu yi, wa nya wo ge “ho nu zhin a Yahudiyi osu?”

³⁴Yesu wa nya wo ge, “ho nu nya beye nhohin tukwo ko aza na gna ho a?”

³⁵Bilatus wa ci ge, Ho gye ge mi zhin Yahudiyi-za nu? Oho aza nu na ɓe nhoi, ɓedo nna malami dnagmayi. Ha zhin ɓa kni a?

³⁶Yesu wa ci ge, “Mi to zhin esu anyi nya nu n. Mi ɓo zhin esu anyi ye nya nu omi aviya ɓo sunkun ga mi, esa nu a Yahudiyi ɓo wan mi nyi.”

³⁷Bilatus wa nya wo ge, “Ho zhin Esu nu?” Yesu wagna wo ge, “E, ntu ce nu a ma mi. Ma ɓe ntu ge ma wu gaiciya. Minu zhin gaiciya, aza nɓa da gaiciya ɓa nu zhin omi aviya.”

³⁸Bilatus wa nya ge “Knidonu zhin gaiciya?” Wa gmiya lo bmi da a Yahudiyi wa gna ɓa ge, “Mi to bwa laifi ho nwo abam.”

³⁹Kwo zhin fye kun-nu, ma gmi oza gmanyi ya ga fye n kurkuku n Paska sayi. Fye ye lo ma lo a Yahudiyi esu ya ga fye?

⁴⁰Ba kni aku, “ɓai gna ge, awo a ga yi Barabbas nu.” Barabbas hi ɓeizhin evi nu n zaje yi.

Yohanna 19

¹Nsaya Bilatus wa la Yesu wa zhin wo bulala.

²Asoja ɓa zhin lawanyi aknawuyi nya, ɓakun wo n tukwo; ɓa kep wo eje dnagmayi.

³Ba lo ɓai ci wo ge, “Zaci saraci. A Yahudiyi ‘Su!’” ɓai kni Wo apmi nna wyeɓa.

⁴Bilatus wa je gmiya lo bmi, wa gna a Yahudiyi ge, “Mɓe ga fye Yesu, ama fye kpe ge mi to sun wo n laifi ho yi m.”

⁵Yesu wa gmiya lo n lawanyi aknawuyi nyai kun, n eje yakwoi kpe. Bilatus wa ci ɓa ge, “Ofye ‘za nfyeyi shi nyi.”

⁶Shi amalami dnagmayi, ɓedo a Yahudiyi ɓo gye wo wye, ɓa bowyi, ɓai gnage, A zun-wo du! A zun-wo du! Ama Bilatus wa gna ɓa ge, fye la wo fya zun-wo du, ama mi to sun wonlaifiyim.

⁷Ba ci ge, “Yi nna wyidnaya lo, n ya vi awyidnahi wo kunce lo wa fi, ntu ge wo yi wohin ge Shekwoyi Nugun nu.”

⁸Shi Bilatus ɓo wo lo nu, wa wo dna ndu-du.

⁹Wa jeze lo n Yesu yi, n wada-bokun, wa nya wo ge, “Ho gmi nna?” To Yesu wa dna wo begbe m.

¹⁰Bilatus wa ci wo ge, “Ho ta dna mi bogbe n? Ho ta kpe lo ge mi iko yi lo ma ya ho, njesun mi iko yi lo ma zun ho du n?”

¹¹Yesu wa gna wo ge, “Ho to ikoi lo tu nmi tukwo m, akpe a ga ho kwo nshe. Oza n wa be n mi yi nho aba nyi wo du lo n laifi.”

¹²Bilatus woi ye wa ya wo, ama a Yahudiyi atukwoda ba ci wo ge, N ha wo ya, agye ho to zhin Kaiser nugundo nu m. Oza nwa gna ge wo Izhin esu nu, wo zhin Kaiser nuwunyi nu.

¹³Shi wo bo wo lo nu, wa gmi Yesu be ba cei njesun, wa lo wa sase tu n shinkpegye-wada nya, aba abei cei lu-lu-yi na kutayi.

¹⁴Nyipyei kwoi ye kwa gun atukwo, Paska yi ce shi ge nsu. Bilatus wa gna a Yahudiyi ge, “Fye gwoi fye 'su.”

¹⁵Ba kni aku kpe wo, bai gna ge, “A lo nwoi, a lo nwoi, azun-wo du.” Ca wo Bilatus, wa nya ge, “Fyei wu ofye 'su?” Ba gna ge, “Yi to nsu yi lo m, sai Kaiser gmanyi.”

¹⁶Bilatus wa Yesu ga ba ntu ge ba zun-wo du.

Ala Yesu Zundu

¹⁷Ba lo n Yesu yi, woi la owohin zundu, ba lo aba a yi kwo, “Tukwo Bmila” n Yahudiyi ge Golgota.

¹⁸Nbo nu nba bo zun-wo du, nna zado yi ngun aba, gmanyi n bwapmi, gmanyi n bwai-zhe, n Yesu yi dna nna tasin.

¹⁹Bilatus wa ku nya ka, wa ce kwo ma n zundu. Nyanyi nkwo bo ka kpe, “YESU NAZARATIYI ZA A YAHUDIYI 'SU.”

²⁰Aba nna bo zun Yesu du nyi, kwo to bo mwakpa n zhimi yim. Aza nmwa begye ba rubutuhi ba, kwo bo kakpe nna-byei ngun ata nu. Helleni, n Roma yi bedo na Yahudiyi byei.

²¹A Yahudiyi amalami adnagma yi, ba gna Bilatus ge wo la rubutuhi shan do, wa ci ge, Yesu a gna, “Omi nu zhin a Yahudiyi 'Su.”

²²Bilatus wa gna ge, “Enya nmi ku ka, mi ka, kwo ba bwa kpe lo nu.”

²³Esa nu ba bo la wo zun-du, asoja ba ku wo aje ba kpa ba zhi aku ngun-anyi, ba ga zaho-zahoi wo nya. Ama ejekpe yakwo ho bo nyi to gun-gun yi m, n lu-luyi nya kwo laka nbegye har kwa lo sinta.

- 24** Ba gna aje ge, “Yi to sa kwo yam; ama yi she ca-ca n kwo tukwo agye oza nkwo ba zhin wo nya.” Deye bo ku Littafi Gyi-gyi-yi beda nu nkwo kafi ge, “Ba gna mi aje ga aje tu nmi jekpe tukwo ba she ca-ca.” Enya nu na soja bo zhin.
- 25** N Yesu zundu aba, Maryamu, owo iya bei gni, bedo nwo iya mado yi, n Maryamu Kilyobas nyikwo yi, n Maryamu Magadaliya yi.
- 26** Esa Yesu bo gye wo iya gni bo, n bara hoi nwo ye wo n gni bo, Wa gna wo iya ge, “Oho nugun gninyi.”
- 27** Wa gna barahi ge, “Oho iya gninyi.” Tunyi nsahi, barahi wa la wo iya lo cei nwo puwa.
- 28** Shi Yesu bo ku kpe ge abo vinya nku nu njesun ntu ge Littafi Gyi-gyi-yi kwa nu, Yesu wa ci ge, “Nuwan mikun wo Milo.”
- 29** Nna bahi nuwan mamayi bo shi n nyikun yi, ba la soso ba da kwo dna, ba gyi soso hi n busi, ba lo nkwoi n Yesu 'gbe.
- 30** Shi wo bo la nuwanhi gwo, Yesu wa ci ge, “Aku zo.” Wa ka tukwo dna wa fi.
- 31** A Yahudiyi to bei cei pma a ya aza kpe n zundu har Satiwyin. Ntu ge Satiwyin nu bei zhin Paska gyi nya. Ba lo ba gna Bilatus ge a bma ba apita-ya ntu ge ba da fi a bi ba.
- 32** Asoja ba be ba bma avihi apita-ya, nna bo zun ba du ngnisun n Yesu yi nyi.
- 33** Ama esa nu ba bo be Yesu aba, ba gye wo la fi, to ba bma wo apita-yam.
- 34** Sai soja gmanyi wa fin wo mashi nna-bmayi, ami n nuwan yi ba zeya nsayi-sahi yi.
- 35** Oza n wo be gye beye nyi, owo nu ga saida ge, owo saida zhin gaiciya nu. Wo kpe lo ge wo da gaiciya nu, woiga saida ye nnabai fya ga gaiciya nu njesun.
- 36** Abo deye bo zhin ntu ge Littafi Gyi-gyi-yi beda kwa nu nu: “A to bma wo a sunkun yan kwo gmanyi.”
- 37** Littafi kwa je da nnabado ge, “Ba bei shi wo awye oza nba bo la wo fin mashi.”
- 38** Nna bedeye avun Yusufu Arimatiya nya, Yusufu ye bei zhin woi vi Yesu n soso nu, ntu ge wo bei zhin woi wo a Yahudiyi dna. Wa lo Bilatus aba ge, wo ga wo iko wa shin Yesu nayi, wa ga wo.
- 39** Nikodimu nwo bo be Yesu aba nkemisunyi nsukwoyi nyi, wa be n kunsun n Yusufu yi. Nikodimu wa be n omi sundayi shi, okwo Shanwo bei ba sun ngye pam tagyi.
- 40** Oba 'ngun aba ba la Yesu nayi ba kmi kwo dna naje, ngye shi a Yahudiyi kun-nu zabi nyanyi.

⁴¹Vivi aba yi abo zun Yesu du, ofwa ho bei gni ɓo, n ofwa hi vingwo ɓo nyidna nna to ɓo shin 'za bi nkwo m.

⁴²Ntu ge nyipyeyi shiri zhin nya nu bei ntu Paska ɓo, ɓa wo bi dna n vingwohi nkwo bei wu vivi nvi.

Yohanna 20

Yesu N Wye-wyeyi Lo Njesun

¹N Labmi-labmi yi, n Ladiwyi; Maryamu Magaliya wa lo vingwo aba, wa lo wa gye a la kuta kpeya a vingwo gbe.

²Wa jeze ɓe woi busi, wa lo da Bitrus n bara do yi, n Yesu ɓo zhin woi ye nwoi nyi. Wa gna ɓa ge, “Ba la Yesu nayi gmi n vingwo, yi-i ta kpe aba lo nba woi ya shi m.”

³Sai Bitrus ɓedo n bara dehi yi, ɓa kuka lo vingwo aba nsi.

⁴Oɓa ngun aba ɓai busi, ama bara dehi wa du Bitrus ya wa si nabye.

⁵Wa ya awyeshi, wa gye azafije nzhi, ama to wa lo dna nmin.

⁶Shi Bitrus da nwo ɓo kma ɓe nyi, ɓo si ɓo wa ce wa lo dna nvingwo. Wa gye azafije n ya fi.

⁷Eje nna bei cei puwo n tukwo nyi, n yazhi n tukwo bwa. Odo n na bei ce pawo n nayi nyi, n yazhi n kwo bwai.

⁸Bara dehi ce wa lo dna n vingwo wa gye wa gaiciya ga.

⁹Har nsayi to ɓai dudu ɓa pa Littafi ɓeda ɓo ge, Yesu ɓo je kala la n vingwo m.

¹⁰Abarahi ɓa je ɓa nya ze lo ɓa puwa.

¹¹Maryamu woi gni woi cibwi. Shi wo ɓo ya awye fi n vingwo.

¹²Wa gye amalaika zhi ngun-aba, n naje bui-bui kpe, n sase fi aba n Yesu nayi ɓo shi nyi, zaknayi n tukwo bwa, zaknayi njesun n apita bwa.

¹³Ba nya wo ɓo ge, “Nyikwoza knihin nu zhin hoi cibwi a?” Wa gna ɓa ge, “Ba la mi Dagayi la, mi ta kpe aba lo nba woi ya shim.”

¹⁴Wa bmiya awye wa gye za gni nwo avun, ama to wa kpe oza ye m, ashe Yesu nu gni.

¹⁵Yesu wa nya wo ge, “Knihin nu zhin hoi ci bwi a? Ho ye nyikana?” Maryamu wa gye ngye lambu zhin yi ho nu dna, wa ci wo ge Puwada ngye ho la wo la ho la so, wu mi aba, ma lo mi la wo ɓe cei.

¹⁶Yesu wa yi wo, “Maryamu!” Maryamu wa lo da wo, wa yi wo n kala yi, “Malam.”

¹⁷Yesu wa ci wo ge, to to mi bwa m, ntu ge mi to gun lo mi Dada aba kpm. Ama lo da omi azaje ho gna ba ge, mi du gun da mi Dada nfyē Dadayi, omi Shekwoyi nfyē Shekwoyi.

¹⁸Maryamu wa gye Yesu abara, wa gna ba ge, “Mi la gye Dagayi wye,” wa pmi wa gna ba owo tnu-tnu.

¹⁹Nwyeshe-bwai n Ladiwyihi, owo abara bai ye fi n nyakun, n na bai gu-gu-yi ntu ge ba bo wo a Yahudiyi atukwoda dna. Nwyekpatayi ba gye Yesu gni nba tasin. Wa sa ba mi wagna, “Bugbafu nfyē aba.”

²⁰Shi wo bo ku ba sa mi, wa wu ba owo abwa, bedo n wo apita yi n nabmayi. Abo da ba n mwa shi ba bo je ba Dagayi wyegye.

²¹Wa je ba ci ge, “Bugbafu kwo kunsun n fyei!” Ngye shi Dada wa tnu mi, mihin mi tnu fye.

²²Shi wo bo da lo nu, wa ya sun kpe ba, wa gna, “Fye gwo Zafun Gyi-gyi-yi.

²³Aza nfyā zhin ba gafara, a ku gafara zhin ba ama aza nfyē to zhin ba gafara m, a to zhin bam.”

Toma Bugba’ba Da

²⁴Zaknayi nwo abara, ai yi wo Toma wo bo zhin aza ’ba nu, to woi da dna n na zaje yim.

²⁵Shi abara aje bo gna wo ge, “Yi ku gye Dagayi wye,” Wa gna ba ge, mi ta ga gaiciya m, sai mi ku gye akusa ci wye nwo abwada ma to bwa, bedo nwo abmayi ma to bwa njesun.

²⁶Anyipyeyi nyimwa-nyimwa avun, abara bai ye fi n nyakun, Toma bo dna nkunsun n bai i wyihi. Abokunmi bo gu-gu-yi, ba Igye Yesu dna gni n ba tantasin, wa sa ba mi, “Bugbafu kwo kunsun n fyei.”

²⁷Wagna Toma ge, Dna ho bwanyi n mi abwada. Ha to mi abmai bwa, to zhin shaka zhin m, la gaiciya ga.

²⁸Toma wa ci wo ge, “Omi Dagayi nmi Shekwoyi.”

²⁹Yesu wa gna wo ge, “Ho ga gaiciya shi ha gye mi wye. Anabarka da nu aza nba to gye mi wye nyin ama bai ga gaiciya.”

³⁰Yesu beiku abo wo-wo-yi zhin nmwa nwo abara awyeba, nba to kafi lo n Littafi yem.

³¹Ama aka adeye ntu ge, fya kpe ge, Yesu nu zhin Kristi Shekwoyi Nugun, nfyā ga wo gaiciya fye ba bwa wye-wyeyi nyalo-nyalo nya dna nwo eye.

Yohanna 21

Labmi Nyagyi N Wyisakayi

- ¹Nwiyihoi Yesu wa je wohin tukwo wu nwo abara aba, bai zhi n nuwan zundna Galili nya 'gbe.
- ²Aza nyi nba bei gni zhi bo, Siman Bitrus, n Toma yi nna yi wo ge aza 'ba nyi, n Natanailu yi n wo gmi n Kana Galili nya nyi, n Zabadi anugun yi, bedo abara dohoi ngun-aba.
- ³Siman Bitrus wa gna ba ge, "m ba lo abmiya wan." Bahin ba gna ge, "Yi ba gni lo nhoi." Ba kuka ba lo, ba lo fi n eya, sukwohi vinya to ba wan nyahom.
- ⁴Nfyegyibwayi ba gye ozaho tu n kmahi ama to ba kpe za ye n wo tum, ashe Yesu nu.
- ⁵Wa yi ba, "Omi anugundo fye ku abmiya wan?" Ba ci ge "awo."
- ⁶Wa gna ba ge, "fye she osa ya fi n eya bwaizhebwa, fye ba wan abmiya." Shi ba bo she osa ya fi, ba wan abmiya n mwa har to ba shin esa gnim, ntu abmiya shanwo bo.
- ⁷Bara n Yesu ye wo nyi wa gna Bitrus ge ai Dagayi nu gni! Shi wo bo wo ge Dagayi nu gni, wakpe wo je wolo-wolo wa she nuwan wa lo dawo nkma.
- ⁸Abara je ba ku ce fi n eya, bai gni osa be cei nna bmiyai nu, ntu ge ba to bo mwakpa n kmayim, kwo bo bwa ce ngye yadi tagyi nu.
- ⁹She a bo wankma ba gye ena fin zhi n na bmiyai kpe bedo n bredi yi.
- ¹⁰Yesu wa gna ba ge, "fye be nna bmiyai nfya wan nsayi ye nyi."
- ¹¹Sai Siman Bitrus wa lo dna 'ya, wa gni osa be cei nkma. Abmiya adnagmayi bo nyi tagyi-cei-shitnu lcei-ata, ama osa to bo gbeya m.
- ¹²Yesu wa gna ba ge, "Fye be fya gyi nyagyi labmi nya." To zaho-zahoi nwo abara wa nya wo bo ge, "Nyikado nu gni nhoi a?" Ntu ge ba bo ku kpe ge Dagayi nu gni.
- ¹³Wa la bredi wa gna ba, wa je zhin lo nu n na bmiya yi.
- ¹⁴Shi wo bo laka n vingwo, bwa tahi nu bo nu, woi wu wohin tukwo nwo abara aba.
- ¹⁵Shi ba bo ku nyagyi gyi, Yesu wa nya Siman Bitrus ge, "Siman Yohanna nugun, ho ye mi lo ndu aza deye?" Wa gna, "E Dagayi ho kpe lo ge mi ye ho lo." Yesu wa ciwo ge, "kpa oma kni."
- ¹⁶Yesu wa je wo bo nya, "Siman Yohanna nugun ho ku mi ye lo behin-hin nya?" Wa ye wa ci ge, "E, Dagayi ho kpe lo ge mi ye ho." Yesu wa gna wo ge "kpa oma kni."

17Waje wo bwa tahi nya ge, “Siman Yohanna nugun ho ye mi?” Bitrus bugba kwa wun ya ntu ge Yesu bo je wo bo bwa tahi nya ge, “Ho ye mi lo?” Wa ci ge “Dagayi ho kpe a bo ye lo vinya. Ho kpe lo ge mi ye ho lo. Yesu wa ci wo ge, kpa oma kni.”

18Esa nu ho bei zhin binawyi, ho bei zhin ha mi ha zhin bo nho ba zhin, ha lo aban ho ye ha lo; ama esa nu ho bo kwo, ho bo tabwa ga za wa wu ho zokwo, abo lo n hoi aban ho ta yem.

19Yesu bo gna wo deye nnabai wa wu wo efi pya nwo bo fi, kwo la Shekwoyi tu. Yesu wa gna wo ge, “vi mi.”

20Bitrus wa bmiya-wye, wa gye bara n Yesu ye cei nyi woi be, barahi nwo bo kpema n Yesu agu esa wo kma nyagyi gyi nwo abarai nyi, nwo bo nya Yesu bo ge, “nyikanu ye wa kun ho a?”

21Shi Bitrus bo gye wo, wa nya Yesu ge, “Dagayi oza deye mwa?”

22Yesu wa gna wo ge, “N ma ye wa gni n wye-wyeyi har ma jeze be, oho anuwan lo? Hohin dai vi mi.”

23Bedahi kwa gnami laba ge, gye Yesu wa gna ge, barahi ta fi m. Ama Yesu to bo da lo nu ge wo ta fim. Sai ge, “ndei ma ye ge wa gni n wye-wyeyi har ma be.”

24Baraye, owo nu bo ku gye abeye owo na ka ba. Yi kpe lo ge owo saida zhin gaiciya nu.

25Abo do lo n mwa n Yesu bo zhin, N na gna aka beho-behoi vinya, mi gye kwo anyi ta bwa aban na ba ya a takardai zhi m.

Atnu-tnuyi Abozhin

Atnu-tnuyi Abozhin 1

¹⁻² Emi nugundo nwo ye Shekwoyi nyi. Nbo ku shin ho ka. Ma wu ho anya n Yesu bo wu aza. Wa wu wo abara kafin wo kpe eshe lo.

³ Shi wo bo laka evingwo wo bei bwa anyipyeyi shinyi woi wu wohin nwo wo abara aba. Ntu ge ba kpe ge wo wye-wyeyi lo. Woi da bo n bai tu Shekwoyi ebe bo.

Yesu Du Gun Lo Eshe

⁴ N Wyihoi wagna ba ge, ba to kun n Urishelima m, ama ba pmi har Zafun Gyi-giyi wa be, ntu ge alkawali Dada nya ba nu.

⁵ Yohanna bei zhin baptizma n nuwan yi amma a ba zhin fye n j Zafun Gyi-giyi.

⁶ N Wyihoi wa je ba ba be ba nya Yesu ge, “a bo gni a Yahudiyayi nkni sayi nu’a? Wato a knu ba nu a Romayi aknu.”

⁷ Yesu bo gna ba ge, “Efya nuwan nu tom fya kpe anyipyeyi yem.”

⁸ Ama Zafun Gyi-gyi-yi bei ga fye iko esa n wa be ncei, fye da mi nabari dna n Urishelima n Yahudiya yi n Samariya yi n na bai vinya. Fye da 'mi kala-la bo n vingwo.

⁹ Safyewyi wa laka tulo 'she owo abara ba shi wo awye har wa bwi wye.

¹⁰ Ba zhi bai shi awye 'she ba gye aza ngun aba na je bui-bui kpe.

¹¹ Aza n ba nu a gna “Agalili yi fye gye kniyi nu 'she a? She fye gye Yesu woi lo nyi elonu wo ba jeze be.”

¹² Abeye vinya bo zhin kpe a zaitun 'pe nu. Ba jezelo Urishelima mi.

¹³ Ba lo ba ku fi n nyakun 'she bai zhin adduwa.

¹⁴ Aza nyi n ba bei fi bo. Bitrus, Yohanna, Yakub, Andrawus, Filibus Toma Bartalamawus, Matta, Yakub Halfa nugun, Siman owo ye bayi ge Zelotes bedo n Yesu azaje yi. Na anyikozayi n Yesu 'ya yi.

¹⁵ Wyiho ba ye zhi aza 120 ba zhin adduwa Bitrus wa laka gni wa da bo n bai.

¹⁶ Wa gna “Emi azaje dole Shekwoyi beda kwa nu tu n Yahuda tukwo. Wobo la Yesu kun abo ku anabci zhin tu wo tukwo kafin ama wo. Esu Dawuda nu bo da, shin Zafun Gyi-gyi-yi bei wu wo.

¹⁷ Yahuda bo gnisun n yi nu. Har ma n zhin bara.”

¹⁸Amma wo ɓo la ekni si n na 'gyiwy'e nukwoyi wa gyi wohin, Wa kaya har wabaya.

¹⁹Aɓo ku ce wo vinya n Urushelima. A aba ho tuye ge, "ami 'ba."

²⁰Anabci ye dna n Zabura nu kwa da ge, "Fa owo puwa kwa wunya to oza wa dnam. 'Njesun a lawo tnu-tnu ga ozado wa zhin.'

²¹⁻²² "Dole ozado n yi mi wa la Yahuda apita n wo ɓo gnisun n yi tunyi n Yesu baptisma zhin sa har esa n wo ɓo lo 'she nyi."

²³A ɓe n na za aye yi ngun-aba Yusufu Jastis (ko Barsabas) ɓedo n Matiyas yi.

²⁴⁻²⁵ ɓa zhin adduwa ntu ge Shekwoyi wa wu ɓa oza na ɓa kni. ɓa gna, "O Dagayi ho kpe eyi abugba yelo, wuyi oza nu ho ye nɓa mi wa la Yahuda apita, owo nu n wo la wo zokwo kni nyi."

²⁶N adduwa zhin avun ɓa she kuri'a, Kuri'a wan kpe n Mathias. A wo kni, wa ze bara ɓedo awocei-gmanyi yi.

Atnu-tnuyi Abozhin 2

Pantikos Nyipyeyi

¹A mako ɓo ku sun ngu shi. Yesu ɓei fi. Pantikos nyipyeyi koi la wu vi a Yesu viyi ɓa yezhi.

²Sa fyewyi a wo aɓo ho ɓai ci ngye ogma jewyi, aɓo ci hi ɓa nu nyakun n ɓa ɓo fi nyi.

³ɓa gye ena anyitala kwoi yakpe ɓa na tukwo.

⁴Oɓa vinya ɓa nu n Zafun Gyi-gyi-yi. ɓai da ɓeda n na byei gbo-gbo n ɓa ta shin da m. Zafun Gyi-gyi-yi nu ɓo ga ɓa iko ye.

⁵A Yahudiyi yi ɓei fi n mwa n Urushelima n wyihi yi. Ntu ge ɓa la Shekwoyi tu n Urushelima mi.

⁶Shi aza ɓo wo kasun, ɓa kun ɓe ntu ge ɓa gye ɓo kwo nyi, Sai ɓa wo abara ɓai da ɓa bye, ce'a wo ɓa.

⁷ɓa nya ge, "Aza deye zhin a Galiliyi nu, ɓa mi n wuna ɓai da abye deye'a?"

⁸Ya wo ɓai da ɓeda n byei nu aba n ya kun nyi.

⁹Eyi a Patiyayi Amidiyi, Alamitiyi, aza n ɓa kun n Mesopotamiya n Yahudayi, Kapadokiya, Pontus, Asiya.

¹⁰Filijiya, Pamfiliya, Masar n na abyei n ɓa she Libya gun nyi. Aza n Roma n ɓa zhin a Yahudiyi ɓedo n ɓai n ɓa zhin a Yahudiyayi alaloi nyi.

- 11**Akaritayi bedo na, Larabawa yi. Ya wo bai da abye deye bai gna yi abo awo-woyi Shekwoyi nya.”
- 12**Ca wo aza n kalayi. Ba gna, “kniyi nu wu la yi’a?”
- 13**Amma azaho ba kpe agye ba gna, “Ai ba ku nya nu sin.”
- 14**Sai Bitrus n abara awo cei gmanyi (11) ba gna, “Efyе vinya fye kna tнubua, Yi ye ya da bo n fyei, azhibeyi du na pi dai.
- 15**Azaho n fye mi ku da ge, Yi ku onya nu sin. Ba to da gaiciyan sam. Aza ta sin nya n labmiyi la yim, wato karfe 9.
- 16**Beye kwa zhin nyi Joel Anabi bo ku ce da tunyi.
- 17**Shekwoyi bo da ge, ‘Nna a nyipyeyi kmaknanyi n bo ze omi Zafun Gyi-gyi-yi ya kpe aza, efye anugun n anyigun yi ba bo zhin anabci. Efyе a samari ba bo gye afe-wyegye. Azakwoyi bo nu ana.
- 18**Emi Zafun Gyi-gyi-yi, ba be tu emi abara anugbaya n anyikwoyi tukwo, ba bo zhin anabci.
- 19**N bo zhin abo awo-woyi n ‘she n ‘kni yi, Abo gye ami nonayi bedo anyi, awu nya yi.
- 20**Npyei bo ze zhi-zhiyi, epya ko ze ami. Kafin Dagayi nyipyeyi dnawo nya ko be.
- 21**Oza n wa ye sun-sungye wo ba bwa. Ai gni wo n jesun.’
- 22-23** “A Israilayi fye wo! Fye kpe la ge Shekwoyi nu bo zhin ama Yesu Nazaratiyi wa zhin abo wo-woyi n wo aba. Ama dna Shekwoyi shiri, wa fa fya zhin ampanyi na Roma yi, fya wu Yesu tu n zundu.
- 24**Amma Shekwoyi bo la wo gmi n wahala har wa wo laka n vingwo. Efi to zhinwo nyaho m.
- 25**“Esu Dawuda bo da Yesu beda wa gna, ‘Mi kpe lo Dagayi kunsun n miyi cici, woi bma mi zhin. Iko Shekwoyi nya koi ce mi bwa.
- 26**Ce nu zhin mi yi dagma. Omi ‘gbe nunu yi n wo ciciyi. Mi kpe lo ge ko mi yi fi milo wo aba nu.
- 27**Ho ta fami dna ena m, Ho taye oho Nugun Gyi-gyi-yi nanyi kwa buo m.
- 28**Ho boje mi wye-wyei ga Ha ga mi agmada n ho abye.’
- 29**“Omi azaje Dawuda ta da wohin nu bo m. Dawuda bei la fi a wo bi, owo vingwo shi lo n ya ba.
- 30**Dawuda bo zhin anabci Shekwoyi nya nu. Woi kpe ge oza be lo n wo ba zhin Kristi dna nwa a yawyi.

31 Wo bo gye nya ko be lo nabye, wa da Kristi kalala bo evingwo. Wa gna Kristi wye-wyei ta dna e nam Kwo kwa buo m

32 Wo bei da Yesu nu bo, yi zhin aseda da nu ge Yesu la laka evingwo.

33 “Wo lo n gnisun n Shekwoyi, Dada n la iko gawo wa tnu n Zafun Gyi-gyi-yi, Elonu n fye gye n naiye.

34 “Dawuda ta da wohin nu bo m. Woto shin gun lo 'shen. Wa da ge, Shekwoyi wa da bo n mi Dagayi yi wato Kristi, wa gna, la sase nwu viyi nmiyi n latu aba.

35 Har maze oho anuwuyi, oho apita kpe 'ba.

36 “Ntu ce nu mi gna a Israilayi ge Yesu n fye bo wu nyi, Shekwoyi la wo ze Dagayi n Masihu yi.”

37 Bitrus beda bo ku lo aza sosai. Har ba gna, “eyi azaje, yi ba zhin wuna?”

38 Bitrus wa gna, “Fye fa alaifi, fya yi Shekwoyi a zhin fye baptisma dna Kristi ye.

39 Kristi bo ku alkawali zhin ga fye. Ofye n Shekwoyi la fye yi nyi, duk n fye abi yi, nge woba ga fye Zafun Gyi-gyiyi.”

40 Bitrus bei zhin wa'azi Yesu nya wa gna ge ba ye abui ba vi Shekwoyi.

41 Aza 3,000 bei ku gaiciya ga aku baptisma zhin ba.

42 Ba ye bedo a Yesu viyi, abara bai wu ba nya, bai zhin zumun ta, bai zhin aduwa n gnisun.

43 Ba bo wo edna n mwa cei wo ba. Abara n jesun ba zhin afo wo-woyi n mwa.

44 A Yesu viyi bei zhin bai yezhi cici, bai gna anya n gnisun.

45 Ba bo kun ba nyabwa, ba gna ngnisun, n aza yi n ba gyisan.

46 Bai ga mwa-mwa nu aduwa nyakun, bai yezhi n aje puwa ntu zumunta bo. Bai gyi nyagyi ngnisun nagmadai.

47 Bai ci Shekwoyi, Har ezhi vinya kwa dagma nbai, har Shekwoyi woi be ba begye fyegyi-fyegyi.

Atnu-tnuyi Abozhin 3

Bitrus N Yohanna Yi La Zabmazhi Kagna

1 Nwiyihoyi n wyeshe yi, Bitrus n Yohanna yi, ba lo aduwa zhin ngnisun na za yi.

2 Vivi n aduwa nyakun yi, ba gye za-bmazhi shi. A bo ma wo lo nu nu. Cici ai be n woi n abwokumin manayi 'gbe, vivi n aduwa nyakun yi.

3 Shi Bitrus n Yohanna yi bei duya, wa ba sadaka.

- ⁴Ba shi wo awye, Bitrus wa ciwo ge 'shi awye ya.
- ⁵Wa gye ngye baye ba ga wo nya ho nu.
- ⁶Amma Bitrus wa ciwo ge, "Yito nagyiwyeyi lo ya gahon, Amma miɓa ga ho nyado. Dna Yesu Kristi Nazarati eye laka ha zan-zan."
- ⁷⁻⁸ Bitrus wa shiwo bwa wa laka owo apita bwa lafiya wa gye agna. Wa zan woi gye agna. Wa kwo anyi woi ci Shekwoyi. Wa lo aduwa nyakun wa ci Shekwoyi.
- ⁹Aza gye wo dna aduwa nyakun woi zan-zan, ba ci Shekwoyi.
- ¹⁰Ba kpe ge wo zhin nyabayi nu, n wo shi abwokunmi manayi gbe cici nyi. To ba kpe shi kwa ze woi zan-zan m.
- ¹¹Ba busi lo Solomon ashiragyi, aba n wo ɓo gni n Yohanna n Bitrus shibwa, ce a wo ɓa vinya ntu ɓo wo-woyi ye ɓo.
- ¹²Bitrus wa gna, "A Israilayi kniyi nu zhin cei wo fya? Fyei shi yi awye ngye ya zhin deye n yihin iko yi'a?"
- ¹³Shekwoyi Ibrahim nya, n Ishaku yi, n Yakub yi ɓedo n yi azakwoyi nyayi na zhin deye, wo la Yesu ga mwa-mwa ntu abeye ɓo. Yesu n fye ɓo na wo aɓo n Bilatus abye nyi kwo shi ko nyi Bilatus ɓo la ye wa lo wo ya nyi.
- ¹⁴Fye to ɓo ye a lo oza Gyi-gyi-yi yam, sai 'zawuyi.
- ¹⁵Fye ɓo la wye-wyei Dagayi wu, ama Shekwoyi ɓo la wye-wyei gawo njesun. Yohanna n mihin yi zhin aseda da nu gama yi bei ku wo gye n wye-wyeyi.
- ¹⁶"Gaiciya ga, dna Yesu eye okwo na ka oza deye gna.
- ¹⁷"Fye bei zhin Yesu aɓe deye dna n wyegma nu elonu ofye abyeda.
- ¹⁸Ama anabci nu ɓo nu. Gama dole Kristi wa sin wahala ye.
- ¹⁹Ko bmiya fya shan bugba do, fya ɓe Dagayi aba, Fye ye abui a zhan fye ya, fye ɓa bwa agmada m Shekwoyi aba.
- ²⁰Shekwoyi wo ɓa je fye tnu n fye Masihu yi.
- ²¹⁻²² Gama woɓa sase n 'she har anya vinya la kun n laifi, ɓo nu aɓo ku da n kwo-kwoyi. Musa ɓo da ge Dagayi ɓa ga fye anabi n fye mi ngye mihin, sai fya wo wo.
- ²³Oza n wo to wo won, aba wu wo.
- ²⁴"Samuila n Anabi yi, bei ku aɓe ye da nɓa zhin n anyipyei ye nyi.
- ²⁵Fyei ɓedo lo nu alkawali n Shekwoyi ɓo ga Ibrahim nyi. Nge ntu na a Israila yi ɓo, anyi vinya ɓa bwa Shekwoyi anabarka. Fyehin kwa fye zhin anabi nu.
- ²⁶Shi Shekwoyi ɓo ga wo abara wye-wyei n jesun wo ɓo tnu n wo yi n fye aba a Israila yi. Ntu ge wa tu fye anabarka. Wa pmi fye awye ya n fye alaifi."

Atnu-tnuyi Abozhin 4

Ala Bitrus Wan N Yohanna Yi

- ¹Amma sanu ba bei zhi bai daɓo na zayi nyi, a priest a dan-doka aduwa nyakun nya, n Assadukiyayi ba be da ba.
- ²Ba gyi minagyi, Nge Bitrus n Yohanna yi ba fa wa'azi zhin Yesu kala-ka nya evingwo.
- ³Ba wan ba, ba ku ba gu fi n kurkuku, har efye a gyi.
- ⁴Amma aza nba bei wo Bitrus wa'azi nyi ba ga gaiciya. A Yesu viyi ba ku mwa begye har aza ba ku sun 5,000 (dubu ngun atnu).
- ⁵A beye bo zhin, a Yahudiyi atukwoda, bai ye zhi n Urishelima n sayi.
- ⁶Annas Pirist dnagmayi bo nyi n Kayafa yi, Yohanna, Alekzanda n na zajeyi n ba nyi n prist bwa.
- ⁷A be n Bitrus n Yohanna yi n ba 'bye. Ba nya ba ge, "Fya bwa iko n na? Nyika ga fye izni fyei zhin beye'a?"
- ⁸Bitrus n nunuyi n Zafun Gyi-gyi yi wa gna, "Eyi abye atukwoda dnagmayi.
- ⁹Fye dabe manayi ye nu n na zhin zabmazhi nyi?
- ¹⁰Ya zhin deye dna Yesu ye nu, Wo nu zhin Kristi n fye bo zundu nyi. Amma Shekwoyi bei la wye-wyei gawo, owo iko na zhin ce, ko kunce lo fya kpe lo nu.
- ¹¹Yesu Masihu nu n na daɓo ge, kuta n na nyamiyi na ko aɓo, oko nu la ze kuta kusurwa nya.
- ¹²Gni-gni to lo n na babaho yin, n Eshe sinta, eye do to lo n aza ba yi ba pwo nkwo aba m."
- ¹³Shi ba bo gye Bitrus n Yohanna yi n bugba kala yi, ce a wo ba ntuge ba to zhin aza nu nba zhin makaranta m. Amma ba gye n sayi ge ba bo ku gnisun n Yesu yi.
- ¹⁴A shaula zhin yi to bo mi, ba na zabmazhi kagna bo m, ntu ge wo bo gni bo n wohin.
- ¹⁵Ba kun ba ya zhi ebmi.
- ¹⁶Ba nya aje ge, "Yi ba zhin wuna naza deye yi'a? Yi ta mi ya na aɓo wo-woyi ye bom, aku ce kpe n Urushelima vinya.
- ¹⁷Amma yi ba mi ya hana nbai to ba gyi abye m, ba ku ce pi. Ko kwa ba sin wahala."

- 18** Shi ɓa ɓo ku da lonu ɓa yi ɓa, ɓa gna 'fye to je nyaho da tu n Yesu tukwon.
- 19** Bitrus n Yohanna yi ɓa gna ge, fye gna yi kwo Shekwoyi ye ya vi oza bena nu kwo owo nya!
- 20** Yi ta mi ya fa abo wo-woyi da ɓo, na yi ɓo gye Yesu woi zhin woi da njesun nyi m.
- 21** A shaula zhinyi to ɓo mi ɓa ta ɓa m. Amma ɓa gna kni ɓa, ɓa fa ɓa lo. 'Ba ɓo gna ɓa ta ɓa, wahala bei ɓa laka, ntuge aza ɓo ci Shekwoyi ntu abo wo-woyi ɓo.
- 22** Zabmazhi ye ɓo ku aye bwa ngun-shinyi.
- 23** Bitrus n Yohanna yi ɓa kuka ɓa lo ɓa da abara je enya n ko ku zhin.

Aduwazhin N Latu Yi

- 24** A Yesu viyi vinya ɓa yezhi, 'Ba zhin aduwa. 'Ba gna "O Dagayi n ha zhin eshe n 'kni, a nuwan yi, n anya yi vinya n ɓa fi n ɓa nyi.
- 25-26** Sapai ho ɓo da ɓo eyi zakwoyi gbe Esu Dawuda, she Zafun Gyi-gyi-yi bei wu wo. Knihi nu zhin abyedo gyi minagyi n Dagayi, amama ɓai pa kulu tu Shekwoyi dnagmayi tukwo a? Asu anyi nya ɓa ku gbe gun ntu ge ɓa sun kun n Shekwoyi Nugun yi!
- 27** "Enya nu n kwa zhin n naiye! Hirudus n Bilatus gwamna yi ɓedo n a Israilayi yi ɓa la 'gbe dnado gabna n Shekwoyi nugun yi, oho nugun kni-kniyi, oho fyenu gyi-gyi-yi.
- 28** Ba ta fa ɓo zhin ɓo n ho iko ye ɓa zhin.
- 29** O Dagayi wo ɓa shaula nukwoyi, ha ga ho a fyenubugba kala ɓa zhin wa'azi.
- 30** Tnu ho iko kagna nya yi, fa ya zhin abo wo-woyi dna n Yesu eye, oho fyenu gyi-gyi-yi."
- 31** Shi ɓa bei zo aduwa zhin, nyakun kwa shan-shan, oba vinya ɓa nu n Zafun Gyi-gyi-yi ɓa zhin wa'azi ntana edna.
- 32** A Yesu viyi bugba vinya bei nyi gmanyi nu. Ozaho-zahoi to ɓo shi nyanyaho yi n wo gmanyi ɓo nun, ɓa ɓo ce ga aje.

Abozhin-zhin Ngun Aba Tu Gyiwe Tukwo

- 33** Abara ɓa zhin wa'azi Yesu kalala nya evingwo. Zumunta bei nyi nna a Yesu viyi mi dei-dei.
- 34-35** San-gyi to ɓe nyi nba ba m. Ntu ge afwaiza bei ku oba afan kun ɓa ɓe nagyiwe yi n abara aba, ɓa zhin ampanyi cei gnisun.

³⁶Misali Yusufu (aje wo yi nugun wa'azi zhin yi) wo bi Saiprus wo zhin Levi bye nu.

³⁷Wo bei la owo fwa knu, wa be nnagiyweyi n aba, a gna aza n ba gyisan nyi.

Atnu-tnuyi Abozhin 5

¹Amma ozaho bo nyi ai yi wo ge Hananiya, owo nyikwo Safiratu. Wo bo la owo 'kni kun ce.

²Ba kni agiyweyi ba be n cei ngye nya ba kun nu.

³Amma Bitrus wa gna wo, "Hananiya, Shetan la nu ho bugba har hoi ce akata fi Zafun Gyi-gyi-yi.

⁴Ofo oho nya nu ho bei n dama yi ha kun, ko kwa to ha kun m. Esa hola kun agiyweyi zhin ho nya nu ha ga kwo shi ho ye. Kni a zhin hoi zhin nlai'a?"

⁵Hananiya n wo-woyi lo nu wa miya wa fi. Edna kwa wo azaho-zahoi.

⁶A samari ba ku aje puwo ba lo ba wo bi.

⁷Esa fyewyi owo nyikwo wa lo be, to woi kpe enya nkwo ku zhin m.

⁸Bitrus wa nya wo bo. "Fya kun ofwa na giyweyi layi nu?" Wa ye ge "Eh".

⁹Bitrus wa gna wo, "Kni yi a zhin oho n ho bai fyei zhin shiri deye, fya mwi Shekwoyi zafun ko? Aza n ba bi oho ba nyi ba be nyi bakaho bi."

¹⁰N sayi-sayi wa fi. A samari ba be ba wo lafi ba lawo ba biwo vivi nwo bai.

¹¹Edna kwa wo ikklisiya vinya, du aza yi n ba bo ku ce wo.

¹²Abara ba gyi abye dna Solomon ashiragyi, n yezhi cici bai zhin abo wo-woyi n mwa.

¹³Azadoho to bei lo da bam, ama aza bei zhin bai gye ba mwa-mwa.

¹⁴Aza n mwa begye ba ga gaiciya anugbayi du na nyikwoza yi.

¹⁵A nyasan yi mwa begye, abe n bai nbmi ntuge Bitrus ofun kwa to ba, ba gwo kagna.

¹⁶Aza ba kun n Urushelima a kauye, ba be nna nyasan yi du nna za yi nba bei n alijenu yi, a ba ka gna vinya.

Aku Atnu-tnuyi Je Wan

¹⁷Amma pirist dnagmayi n asadukiya ba wo she ntu atnu-tnu manayi bo.

¹⁸Ba wan abara ba fi ba n kurkuku.

¹⁹Amma nsukwoyi Malaika be wa gu ba abaya ba kun. Wa gna ba ge.

- 20“Fye lo aduwa nyakun fye zhin wa’azi wye-wyei nya.”
- 21N labmi yi, ba lo aduwa nyakun ba zhin wa’azi. Amma pirist dnagmayi n wo atukoda aje yi, ba ye zhi na shaula zhinyi. Ba yi abara be cei.
- 22Dan-sanda wa lo kurkuku to wa gye ba fi m. Ba lo ba da atukwoda nya ba gye.
- 23“Kurkuku abokunmi bo guguyi aza n ba gu aba nyi n zhi, amma esa ya guya, yi to gye zaho-zahoi n dna m.”
- 24Ce awo ba vinya, to ba kpe nya nba ba zhin.
- 25Ozaho wa be wa da ge ai aza nfyen zanshi nyi, ba fi nu n aduwa nyakun bai zhin wa’azi.
- 26-27 Yan-sanda tukwoda, ba lo ba wan abara, bai zhin ba peceye, ntuge ba bo wo aza dna. Har ba be n bai n ashaula zhinyi aba.
- 28Pirist dnaygmayi wa nya ba ge, “Kni a zhin to fyei vi eyi wyidna ma? Yi ku gna fye ge fye to je wa’azi zhin. Amma Urushelima la nu n fye wu-wu yi. Fye ye a gye eyi laifi nu dna oza deye fi ko?”
- 29Bitrus wa gna ba ge, “Yi vi Shekwoyi beda nu ndu oza nya.
- 30Fye bo la esu gyi to nshiwani, fya wo wu. Amma Shekwoyi eyi azakwoyi nya bo la wo laka evingwo.
- 31Shekwoyi lawo ze yerima bedo n gniyi. Wa zhin ce lo nu ntu ge a Israilayi ba ya bui, a zhin ba laifi gafara.
- 32Eyihin bedo n Zafun Gyi-gyi-yi n Shekwoyi ga zaho-zahoi n ya, yi zhin aseda da nu.”
- 33Shi a shaula zhin yi bo wo lonu, ba gyi minagyi har ba ye ba wu ba.
- 34Amma Gamaliel wa da bo ge, “A la abara kun ya zhin n bmi kpa.” Gamaliel bo zhin ilimi da nu. Aza mwa bai kpe lonu.
- 35Wa gna wo azaje ge, “A Israilayi fye zhin peceiye enya yi nfyen ye fya zhin aza ye nyi.
- 36Fye ku ze amui enya Theudas bo zhin? Wo bo be n gye oza dnagmayi nu. Har aza 400 ba viwo. Amma shi abo wuwo owo aviyi ba gnami.
- 37“Elonu Yahuda Galili nya, ngadu sayi, wo bo ku aza bwi n mwa. Amma shi wo bo fi aza gna mi.
- 38“Ntu ce nu mi ye fya fa ba. Nba zhin n bahin tukwo nu sa fyewyi ko ba ze gboloyi.
- 39Amma ngye ba zhin Shekwoyi nya nu, fye ta mi fya hana bai m. Kada fya gye fyei zhin gaba n Shekwoyi.”

⁴⁰A shaula zhin yi ba yi abara ba lu ba. Ba gna ba ge ba to je Yesu beda da m.

⁴¹Abara kun bai dagma gama ba ku kunce ba sun wahala ntu Yesu bo.

⁴²Ba gyi abye fyegy-fyegy n aduwa nyakun bai wu nya bai zhin wa'azi ge Yesu nu zhin Kristi.

Atnu-tnuyi Abozhin 6

¹Shi a Yesu-viyi bei ku mwa begye a wahala ya kala ku. A Helleniyi bai gna, ata gye ba nuwan lo n ba anyigbaya-yin. A gna a Ibraniyi anyi-gbaya nyagyi ga lo.

²Abara ba yezhi ba gna. "Wa'azi zhin yi tnu-tnu nu. Yi ta wun esa ya ntu nya gyi gna bo m.

³Fa ya kni aza tnaba eyi m. Aza nba nunuyi n Zafun yi! N nyagyi bo.

⁴Ntu ge ya mi ya bwa sa ya zhin aduwa n wa'azi bedo n wu-wu yi."

⁵Shaula ye kwa da ba, ba kni Istifanus, (Istifanus bei nunuyi n Zafun yi sosai). Ba kni njesun Filibus, Buruhoris, Nikano, Timon, Barminas n Nikolawus, Antakiya nya. Wo bei zhin ebye do nu n wo bo ga gaiciya.

⁶Abara ba zhin aduwa ntu ba bo, ba kpe ba abwa tukwo.

⁷A da Shekwoyi nabari abaho-bahoi. Aza n mwa bai ga gaiciya n Urushelima har du Ayahudiya yi aprist yi.

⁸Istifanus bei nu Zafun Gyi-gyi-yi iko yi. Ntu ce nu wa mi wa zhin abo wo-woyi.

⁹N wyihoi a Yahudiyi ba na bo n woi har a Yahudiyi n ba kun n Sirine, Alekzanda n Masar. Tarki Silisiya nya Asiya yi ba 'gbe dna do.

¹⁰Amma ba to bo min n Istifanus bo m. Gama wo bei nunuyi n beyekpe yi, bedo n Zafun yi.

¹¹Sai ba be aza yi ba ce akata fi Istifanus. Ba gna ge wa da Musa benukwoyi woi ce akata njesun.

Ala Istifanus Wan

¹²Deye kwa ga aza minagyi, A Yahudiyi atukwoda ba wan wo ba be n woi n a shaula zhinyi aba.

¹³Aseda katai da ba gna, "Istifanu wa da beda nukwoyi ntu aduwa nyakun tukwo bedo n Musa owa yi.

¹⁴"Yi ku wo woi da ge, Yesu ba la aduwa nyakun ya, wa she Musa owa ya."

¹⁵Aza vinya n ba bei fi bo nyi ba gye Istifanus awyeba la shando ngye malaika nya!

Atnu-tnuyi Abozhin 7

- ¹Pirist dnagmayi wa nya wo ge, “Abe ye wu lo nu.”
- ²Istifanus wa gna ge, “Shekwoyi bei wu wohin tukwo eyi dada Ibrahim aba n Irak kafin wo lo Suriya.
- ³Shekwoyi bei gna wo ge wo fa 'kni, n wo azayi wa lo aba n wo ba wu wo.
- ⁴Wa fa Kaldiya 'kni wa lo Haran. Wa sase bo har owo dada wa fi, Shekwoyi wa gna ge wo lo Israila kni.
- ⁵Shekwoyi to bo sa ekni gawo m, amma wo bei zhin wo Alkawali ekniyi nya vinya. Alkawali ye bo nu peceiye nu.
- ⁶“Shekwoyi bo gna wo ge owo ayawyi bo fa ekniye bo zhin bauta ekni do har aye 400.
- ⁷Amma Shekwoyi alkawali nu ge, wo bei kun ba n bauta. Wa ta ekni n kwa fi ba n bauta nyi.
- ⁸“N sahi nu n Shekwoyi bo gna Ibrahim wa zhin kachiya. Deye zhin tuze nu Shekwoyi alkawali nya. A zhin Ishaku kaciya woi na anyipyei nymwa-nyimwa. Ishaku wa ma Yakub, Yakub wa ma eyi azakwoi awo-cei-aba a Yahudiyi bye.
- ⁹Aza deye ba wo she n Yusufu yi, ba wo kun
- ¹⁰wa ze fyenu dna n Masar 'kni. Amma Shekwoyi bei kunsun nwoi, wa gni wo nwo awahala vinya, wa zhin Fir'auna Sa-Masar yi wa ye wo. Shekwoyi wa ga Yusufu beyekpe, kwa zhin Fir'auna wa gwamna ga wo n Masar'kni, wa wo ze tukwoda n garukwo.
- ¹¹“Sa fyewyi mikun laka n Kan'ana. Eyi adada to ba bwa nyagyi m.
- ¹²Shi Yakub bo wo ge nyagyi lo n Masar, wa tnu n wo abi ba lo ba si.
- ¹³Ba je bwa bayi lo, Yusufu wa wu ba wohin tukwo. A lo n bai n Fir'auna ba.
- ¹⁴Sai Yusuf il wa tnu wo dada bo bedo n wo azaje yi, oba vinya ba bei nyi 70 nu.
- ¹⁵Yakub wa be Masar, nbonu n wo bo fi n wo anugun yi.
- ¹⁶A bei la ba ku lo n cei n Kan'ana kni, a bi ba n Sakar kni n Ibrahim bo si nyi.
- ¹⁷⁻¹⁸“A Yahudiyi ba ku mwa begye, Esa wo vi n Shekwoyi ba gni ba. Amma esu ho wa gyi be. To wa gye wo anuwan n Yusufu ajeyin.
- ¹⁹Esuhi wa gaba wahala, wa tu dole ba wu ba abi.
- ²⁰“Nsayi nu abo ma Musa, amma shi owo azamayi bei gye wo zhin obi manayi nu ba wo so har apya ngun-ata.

- 21 Shi ba bo gye ba tami nwo som, dole ba ya wo. Har Fir'auna nyigun wa wo bwa, wa wo ze owo nugun.
- 22 Wa wu wo beyekpe a Masar nya. Har Musa wa ze oza dnagmayi.
- 23 "Musa woi na ayei 40, wa be owo azaje aba.
- 24 Shi wo bo lo wa gye Masar 'za woi ga Israila za wahala, wa Masar yi za wu.
- 25 Musa wagye ge owo azaje ba gye ge Shekwoyi na tnu woi, ntu ge wa bma ba zhin. Amma ba to bei gye lo nun.
- 26 "Nwyihoi wa lo wa gye a Israilayi bai sungu bahin-bahin, wa gna kni ba wa gna, 'kwo to bmiya lo fya sungu fyehin-fyehin m.
- 27 "Ama ba nya wo ge, 'nka dna ho alkali n yi tukwa? Ngye ha nuwan n yi.
- 28 Ho ye ha wu mi nu, n gye shi ho wui Masar yi 'za nsu nyi.'
- 29 "Shi Musa bo wa lonu wa busi wa lo Midiya kni. Har wa ku abi bwa n bo ngun-aba.
- 30 "Shi wo bo bwa aye shinyi bo, Malaika be wo aba n fwa. Wa gye ena anyitala n wu vivi n Sinai pei.
- 31 She wo bo gye ce'a wo wo n mwa, wa lo ntu ge wo gye. Wa wo begye kwoi yi wo.
- 32 Omi nu zhin Shekwoyi oha dada Ibrahim, Ishaku, n Yakubu yi nya." Musa wo dna wa ku awye bwi.
- 33 "Dagayi wa gna wo ge, 'La ho abuada kun, ntu ge ho gni aba gyi-gyiyi nu.
- 34 Mi ku omi aza bwi ci wo n Masar, Mi ye ma kunba n wahala. Be ma tnu ho ha lo Masar.'
- 35 Oza nba bo na wo abo nsapa bai gna nyikanu na ze ho begyi-i nwadayi n yi tukwoa? Shekwoyi wa je tnu nwoi nu. A bei tnu n Musa yi nu wa zhin ba tukwoda wa gni ba.
- 36 Musa bei ku abo wo-woyi zhin n Masar kafin wo kun ba. Ba pi ela byei-byei ya, ba zan-zan n zhabui bai jeze kpe har aye shinyi (40).
- 37 "Musa bei gna aza ge, 'Shekwoyi bei ga fye anabi nwu gye mi n fye mi.
- 38 Deye gaiciya nu, gama Musa nu bei dna aza tasin n Malaika yi n wo bei gaba Shekwoyi awyidna n zhabui nyi.
- 39 "Amma eya dada bo la Musa abo na, har ma bai ye ge ba jeze lo Masar.
- 40 Ba gna Haruna ge wo zhin ba eshan, n kwo ba je lo n bai n Masar, gama ba ta kpe nya lo n kwo ku zhin Musa, n wa kun ba n Masar nyi m.

- ⁴¹Sai ba zhin nakwo biyi, ba ga kwo sadaka aminya ba dagma.
- ⁴²“Shekwoyi kwa wa fa ba, har ba ga npyei, epya, bedo n akpasuyi mwa-mwa. Shekwoyi wa nya Israilayi n Amos gbe ge, Fye bo ga mi nu sadaka ami nya sa fye bei zan-zan anye shinyi n zhabui nyi?”
- ⁴³Awo, of ye bugba bei shi na ashekwoyi do aba nu. Ngye sakut n kaiwe yi. Ntuce nu nba tnu nfyeyi n bauta ndu Babila ya.
- ⁴⁴“Eyi adada bei aduwa zhin ba yi shi, ba bei allo yi shi, n Shekwoyi awyidna yi ka kpe. A bei zhin ba nwu dai-dai nu ngye shi malaika bai wu Musa.
- ⁴⁵Aye mwa begye avun Joshua wa sun okun n abye do yi, Ba aduwa zhin ba la be n cei. Ba zhin ampanyi nkwoi har Esu Dawuda sa.
- ⁴⁶“Shekwoyi bei la Dawuda tu anabarka, har Dawuda wa ye ntu ge wa mi nyakun ntu Shekwoyi bo.
- ⁴⁷Amma Solomon nu bei mi nyakun yi.
- ⁴⁸⁻⁴⁹ Amma Shekwoyi ta dna aduwa nyakun, n na mi n abwayi m. ‘Eshe nu zhin mi asese ba. Ekni kwa zhin mi apita kpe ba.’ Nya nu n Dagayi wa da. Kni nyakun yi pya nu n ho ba mi, n mi ba mi ma dna ko’a?
- ⁵⁰Omi nu to zhin Eshe n kni yi m?
- ⁵¹“Efye aza bugba kala kpe yi! Fye ba gyi abye fyei na Zafun Gyi-gyi-yi abo? Efye adada bo ku zhin, ekonunfyeyi zhin nfyeyi hin.
- ⁵²Ba bei ga anabi wahala, har bai wu anabi n ba da ge Masihu belo nyi, Owo n fya ga a wu wo nyi.
- ⁵³I, efyehin fya Shekwoyi awyidna wunya ko shi ko nyi fya gwo ba n a malaika akun.”

Ala Istifanus Wu Nna Kuta Yi

- ⁵⁴A Yahudiyi atukwoda ba gyi minagyi n Istifanus yi.
- ⁵⁵Amma Istifanus bei nunuyi n Zafun yi, wa shi awye 'she wa gye Shekwoyi mwa-mwa wye. Har n Yesu yi gni agni-gni n Shekwoyi bwai-zhe bwa.
- ⁵⁶Wa gna, “Migye eshe lo nguya gni n Yesu yi gni a gni-gni n Shekwoyi bwai-zhe bwa.”
- ⁵⁷Ba tabwa shi wo bai gu ba atnubua, bai bewyi ntuge wa cepi.
- ⁵⁸Ba gni wo ba gmiwoya n zhi mi ntu ge ba kni wo akuta. Ba oba aje kmaya zhi Samari ho ai yi wo ge Bulus, woi dna Ba ajeyi wye.
- ⁵⁹Shi ba bo kni wo akuta Istifanus wa zhin aduwa wa gna Dagayi Yesu gwo mi wye-wyeyi.

⁶⁰Wa ce akwo-kwo wa da ɓo n kala yi wa gna, “Dagayi zhin ɓa gafara,” wa fi wo nya.

Atnu-tnuyi Abozhin 8

¹A ɓo da Bulus ntu Istifanus fi ɓo. Esayi a ga Yesu-viyi wahala, har kwa ɓa ze dole ɓa busi ɓa lo Yahudiya ɓedo n Samaria yi.

²A Yahudiyi, a Shekwoyi aza, ɓa ɓe ɓa Istifanus bi.

³Amma Bulus wa lo labaho-bahoi woi ga a viyi wahala, woi lo a puwa woi kun ɓa ɓe cei, Anugbayi du na nyikwoyi, woi lo ɓai n kurkuku.

Filibus Wa Lo Samariya

⁴A viyi n ɓa ɓo busi nyi ɓa lo aba gbo-gbo ɓai zhin wa’azi Yesu nya.

⁵Filibus wa lo Samaria wa da nabari Kristi nya nbwai.

⁶Aza ɓo kna tɓubua ge wo ɓei zhin abo wowoyi n ɓa ba.

⁷Woi kun azafun nukwoyi ya, anyasan yi ɓai bwa lafiya.

⁸Aza ɓo dagma n mwa n ezhi yi.

⁹⁻¹¹ Ozaho ɓei nyi ɓo a yi wo ge Siman. Wo zhin ɓeyi nu, wo ɓei mi woi zhin abo gbo-gbo har ai da wo ɓo ngye wo zhin Kristi nu.

¹²Amma shi Filibus ɓei zhin ɓa Yesu wa’azi ge wonu zhin Masihu, njesun wa gna ɓa Shekwoyi bemi ɓo, aza ɓa ɓei ga gaiciya nyi, a ku ɓa zhin baptizma.

¹³Siman ce, wa gaiciya ga har a ku wo zhin batizma. Wa vi Filibus cei wo wo, ntu abo wowoyi ɓo nwo zhin nyi.

¹⁴Shi abara n Urushelima ɓei wo ge a Samariya yi ku gaiciya ga, ɓa tnu n Bitrus ɓedo n Yohanna yi ɓa lo Samariya.

¹⁵Ba lo ɓa si ɓa zhin aduwa ga ɓa, ntu ge ɓa gwo Zafun Gyi-gyi-yi.

¹⁶Ba to ɓei gwo Zafun kpam, abo bwa ɓa baptizma nu zhin dna n Yesu Kristi eye mi.

¹⁷Bitrus n Yohanna yi ɓa kpe ɓa abwa n tukwo ɓa gwo Zafun Gyi-gyi-yi.

¹⁸Shi Siman ɓo gye lo nu, wa ga agyiwyeyi ntu ge wa si iko hi.

¹⁹Wagna ge “Mi ye iko ye lo ntu ge aza gwo Zafun Gyi-gyi-yi, esa ma tu ɓa bwa cei n tukwo.”

²⁰Bitrus wa gna wo ge, “Oho n ho agyiwyeyi fye ku zhangma. Ho gye ge ho ɓa mi ha si Shekwoyi kyauta ko?”

²¹Ho ta gni deye bwa n zayi m, gama oho bugba to wu lo n Shekwoyi bwa m.

- ²²Fa benukwoyi ye ya zhin aduwa ntu ge Shekwoyi wa zhin ho gafara.
- ²³Gama mi gye shewo lo bedo n laifi n ho bugba.”
- ²⁴Siman wa gna ge, “Zhin aduwa ntuge abo nukwoyi ye ta bwa min.”
- ²⁵Shi ba bo ku wa’azi zhin n Samaria ba je ze lo Urushelima. Bai zhin wa’azi nabari manayi nya n zokwo.
- ²⁶Amma malaika gna Filibus ge, “Lo Urushelima zokwo n Gaza zhabui bwa.”
- ²⁷Wa lo wa gye Habashayi za woi be. Wo bei zhin tnu-tnuyi n Sarauniya Kandas nya nu. Woi zhi sujada zhin n Urushelima. Wo bei zhin oza kakayi nu.
- ²⁸Woi zhi dna karusa woi ba nya dna Littafi Ishaya nya.
- ²⁹Zafun Gyi-gyi-yi wa da bo n Filibus yi ge, “Lo vivi n karusa yi.”
- ³⁰Filibus wa lo wa wo nya n wo ba. Wa nya wo ge, “Ho kpe nya ye lo n ho ba?”
- ³¹Ozahi wa gna ge, “Mba kpe ye n wuna, to oza yi lo n wo ba ga mi awyegan ma?” Wa ci Filibus ge wo gun tu karusa wa sase n gnisun woi.
- ³²Nya nyi n wo bei ba: “A lo n woi ngye ekni n ana wu ba, ngye kugya sanu a gbe kwo eyi ya. To wa dabon. Wa wo pipi.
- ³³“Ntu wohin tukwo gba bo, to a gye wo be manayi m. Ntu ge aza n wo ’sa, ba bei zhin aza nukwoyi nu. Har ba wo wu.”
- ³⁴Oza kakayi wa nya Filibus ge, “Ishaya bo da wohin nu bo ko ozado?”
- ³⁵Sai Filibus wa ya wo awyega wu nya na da ntu Yesu tukwo.
- ³⁶Shi ba bei lo ba gye nuwan, zahiwa cige, “Ma gye nuwan dna nyi, kni ba zhin to ha zhin mi batizma ma?”
- ³⁷Filibus ci wo ge, “A ba mi a zhin ho baptizma n dai ho la gaiciya ga n ho bugba yi vinya.” Wa gna “Mi la gaiciya ga ge Yesu Kristi nu zhin Shekwoyi nugin.”
- ³⁸Wa kpe karusa gni, ba ka fi n nuwan a zhin wo batisma.
- ³⁹Shi ba bei kun n nuwan Zafun Gyi-gyi-gyi-yi wa la Filibus to za kakayi wa je wo gye m amma walo wo nya woi dagma.
- ⁴⁰Sa fyewyi Filibus a gye wo gni n Azatus, wa da nabari manayi n bwai, dna ezhi doho-dohoi woi duya har wa lo Kaisariya.

Atnu-tnuyi Abozhin 9

Bulus Abuiye Bo Wowoyi Nya

- ¹Amma Bulus bei gna ye wa wu a Yesu viyi, ntu cenu wa lo prist dnagmayi aban Urushelima.

- ²Wo bei ye ntu ge ɓa dna egbe do n woi, ɓa g wo takarda ntu ge walo Dimashika wo wan a Yesu viyi be cei n Urushelima.
- ³Shi wo ɓo wu vi n Dimashika yi, buzangna dnagmayi eshe kwa bmiya fi wo.
- ⁴Wa miya shi ekni wa wo ai yiwo, “Bulus, Bulus kniyi nu zhin hoi gami wahala?”
- ⁵Wa nya ge, “nka nu da ɓoa?” Begyehi kwa gna, “Omi, nu Yesu, n ho ga wo wahala nyi.”
- ⁶“Laka ha lo zhimi n ɓo gna ho nya miye.”
- ⁷Aza n ɓa bei gnisun n woi nyi ce a wo ɓa, to ɓa mi n nyaho da m, gama ɓa ɓo wo oza ɓeda amma to ɓa gye za m.
- ⁸⁻⁹Shi wo ɓo laka la to wa wye ɓa ye wo kpe yam. A shi wo busi bwa shi shi nu wa lo Dimashika. Wa dna ɓo anyipyei ngun-ata to woi gye wyeba m, to woi gyi nyagyi m.
- ¹⁰Yesu viyi ho ɓo dna n Dimashika ai yi wo ge Hananiya. Dagayi wa da ɓo n woi ngye wo nuna n ge, “Hananiya,” wa gna mi gni nyi Dagayi.
- ¹¹Dagayi wa gna wo ge, Lo zokwo tatayi, Ha lo Yahuda puwa, Bulus dna lo ɓo woi zhin aduwa.
- ¹²Mi ku wu wo n ruya ge, oza ɓelo wa kpe wo awye ya, a yi wo ge Hananiya.
- ¹³Hananiya wa gna ge, Dagayi mi ku aɓo nukwoyi wo n Bulus zhin lo na viyi n Urushelima mi.
- ¹⁴Yi ku wo shi wo ku aza wan n mwa fi n kurkuku, woi la izni gwo n na prist dnagmayi aba, ntu ge wa ga a Yesu viyi wahala, n tna edna n Dimashika ye.
- ¹⁵Amma Dagayi wa gna wo e, “lo ho zhin ɓo ma gna ho, gama Bulus zhin omi ’za kni-kniyi nu ntu ge wa dami nabari n abye aba, n asu yi, na Israilayi vinya.
- ¹⁶N ɓa wu wo shi wo ɓa sin, wahala nsun ntu mi ɓo.”
- ¹⁷Sai Hananiya wa lo, wa to Bulus bwa wa gna wo, “Omi zado Bulus Yesu n wa wu ho wohin n zokwo nyi, wo na tnu mi ntu ge ha nu Zafun Gyi-gyi-yi, ha gwo wyeba gye njesun.”
- ¹⁸Nsai-sayi anya ɓa kaya ngye ashiwan gulu n Bulus awye, wa gwo wyeba gye a zhin wo batizma n sai-sayi.
- ¹⁹Wa gyi nyagyi wa bwa kala. Wa dna ɓo n gnisun n a Yesu viyi anyi-pyei fyewyi.
- ²⁰Wa lo aduwa zhin ba, ntu ge wa da nabari manayi Yesu nya, n ge wo zhin Shekwoyi nugun nu.
- ²¹Ca wo aza, ɓa nya ge, ’oza deye nu to ɓo zhin, woi ga a Yesu viyi wahalan, har woi be Dimashika ntu ge, wo wan ɓa lo cei n Urushelima m?

- ²²Bulus wa gyi abye n wa'azi yi sosai, har ma wa du a Yahudiyi n ba nyi n Damashika nyi, ngye shi wo dabo tu n Yesu tukwo ge wo nu zhin Masihu.
- ²³Safyewyi a Yahudiyi ba zhin shaula ntu ge ba wu wo.
- ²⁴A ku ce gna Bulus ge aza zhi lo na bokunmi bai zan wo shin n sukwoyi n nyipyei ntu ge ba wu wo.
- ²⁵Shi ba bei ku kpe, a Yesu viyi ho ba la wo dna n cekun n sukwoyi, ba gun kpe n garu ba ya wo shi n wun yi ebmi wa lo wo nya.
- ²⁶Shi wo bo si Urushelima woi ye wa ye gu a Yesu viyi, amma ba wo wo 'dna 'dna ba gye ge wo zhin ba dabara nu wa wan ba.
- ²⁷Nsayi Barnaba wa be n Bulus yi n abara aba, wa wu ba ngye shi Bulus bo gye Dagayi, n nya yi n Dagayi bo gnawo. Wa wu ba njesun, wa'azi n wo zhin lo n iko yi ntu Yesu bo nyi.
- ²⁸Nsayi baye ba go wo, wa kunsun n aviya cici.
- ²⁹Wa zhin wa'azi n Yesu eye yi ntna edna. Amma a Yahudiyi n ba da Helleni bye, ba nu nwo bei nabo n bai nyi, ba zhin shaula ntuge ba wu wo.
- ³⁰Amma a Yesu viyi ba ku wo ba la wo ba lo woi n Kaisiariya ba tnu woi n Tarsusu owo ayi.
- ³¹Nsayi Ikkliya kwa bwa lafiya n Yahudiya, Galili n Samariya yi kwa mwa n kalayi. Bai zan-zan dna n Dagayi dnawo, Zafun Gyi-gyi-yi woi ga a bugba fu.

Abo Wowoyi Ngun Aba

- ³²Bitrus wa lo abai gbo-gbo woi bi ba gna har wasi a viyi aba n Lida.
- ³³Wa gye ozaho a yiwo Aniyas nayi fifiyi da ntu n gado har aye nyimwa-nyimwa.
- ³⁴Bitrus wa gna wo ge Aniyas Yesu Kristi la ho kagna, laka ha zan-zan, wa gwo kagna n sayi-sayi.
- ³⁵Sai aza vinya n Lida bedo n Sharo yi ba ga gaiciya ngye shi ba gye Aniyas woi zan-zan.
- ³⁶N Joppa nyikwoza ho dna bo n zhin viyi a yi wo Dokas ko Tabita woi bma aza zhin tun ba ga a sanyi ba.
- ³⁷Dna sayi, nyasan wo, wa fi, owo anugundo ba nuwan fu wo ba wo pa ba wo ya dna n 'nyakun she, kafin a bi wo.
- ³⁸Amma ba wo ge Bitrus lo n Lida ba tnu wo bo.
- ³⁹Ba lo n woi aba n ba bei woi dna. Anyigbaya bo fi bo nmwa bai ci bwi bawu wo anya n Tabita bei zhin woi ga ba.

⁴⁰Bitrus wa ƙunya wa zhin aduwa, wa gna Dokas wo la kala, wa kpe awye ya wa gye Bitrus nu wa laka sase.

⁴¹Wa shi wo bwa wa laka wa yi a viyi ƙedo anyigbaya ƙa ƙe wa wo ga ƙa.

⁴²Aza n mwa begye ƙa wo nabari ye, ƙa ku gaiciya ga.

⁴³Bitrus wa sun sa dna n Joppa n Siman 'pabmiyi puwa.

Atnu-tnuyi Abozhin 10

Malaika Wa Ɣe Koniliyus Aba

¹Italiya yi 'za ƙo dna n Kaisari- ya ai yi wo ge, Koniliyus, wo ƙei zhin soja tukwo da nu.

²Wo ƙei zhin oza nu nwo wo Shekwoyi edna duk n wo puwayi, woi ga sadaka dai-dai, woi zhin aduwa cici.

³N Iwyihoi n wyeshi yi wa gye ruya, malaika wa ƙe wo aba.

⁴Malaika gna wo ge, owo sadaka n aduwa yi ƙa ku si Shekwoyi aba.

⁵⁻⁶Tnu oza wa lo Joppa wo yi Bitrus ƙe cei, wo dna lo n Siman pa bmiyi puwa, wa e ho puwa.

⁷Shi malaika ƙo la wonya lo, Koniliyus wayi wo afyenu ngun aba ƙedo n soja yi gmanyi.

⁸Wa da ƙa nya ko ku zhin wa tnu ƙa, ƙa lo Jop-pa.

⁹⁻¹⁰Nyipyei bayi ƙa ku wu vivi n Joppa yi, dei-dei n sayi yi Bitrus wa zhin aduwa mikun ƙei gun wo, n sayi sai wagye ngye wo nuna.

¹¹Wagye eshe la गया, wa gye kwanu dnagmayi kwoi ƙe kni.

¹²Wa gye abu gbo-gbo nfi, alu n awa i, n na nya yi n na ta ye ge a Yahudiyi ƙa gyi m.

¹³Wa wo ai da wo ge, lo ho kni hawu, ha gyi.

¹⁴Wa gna awo Dagayi ho kpe lo ge shi a mami, mi to shin ƙa gyi m ntu ge eyi awyidna ta ye ge yi gyi ƙam.

¹⁵Wa wo ai je wo da ge, to pmi Shekwoyi ƙeda bma m, n dei nya wa dage kwo gyi-gyi-yi lo kwo zhin gyi-gyi-yi nu.

¹⁶Wagye deye har abwa ata. Kafin a la kwo lo cei n she njesun.

¹⁷Bitrus wa damu, To wa kpe ƙo ye n ko nyi m. Dei-dei n sayi yi a tnu-tnu yi ai si puwa n wo ei dna nyi.

¹⁸Ba nya ƙo kwo gye Bitrus dna lo.

¹⁹Bitrus woi dna woi zhin nubo tu n nya nwa gye nyi. Zafun Gyi-gyi-yi wa da wo ge aza zhi lo bai ye ho.

²⁰Lo da ba ha gni lo n bai, mi na tnu ho.

²¹Bitrus wa shin lo wa gna ominu zhin oza fye ye nyi, kniyi nu a?

²²Ba gna wo soja tukwoda bo nu, Shekwoyi dnawoyi ngye shi malaika be wo aba wa wu wo Bitrus aba wa be ntu ge wa wu wo enya n Shekwoyi ye wa zhin.

Bitrus Wa Lo Koniliyus Puwa

²³Ba ku wangye n Joppa, n labm yi wa gni lo n bai bedo na Yesu viyi hoi n Joppa.

²⁴Nyipyei bayi ba si Kaisariya, Koniliyus woi shi wo pmi ba, shi ba bo be wa yi wo azaje n anugundo yi ntu ge ba wo Bitrus beda.

²⁵⁻²⁶Shi Bitrus bei lo Koniliyus puwa, Koniliyus wa yashi wa ga Bitrus mwa-mwa. Bitrus wa gna wo ge wo la laka ntu ge mi to zhin Shekwoyi, nu m.

²⁷Wa laka gni ba da bo na jei fyewyi, ba lo aba n aza bo yezhi nyi.

²⁸Bitrus wa gna ge fye kpe lo ge a Yahudiya yi awyidna ta ye ge yi lo abye do puwa m. Amma Shekwoyi ku wumi dna n ruya ge mi to ci zaho-zahoi wyegba m.

²⁹Ce na zhin mi be wolo-wolo. Fye ye kni nya?

³⁰Koniliyus kwa wa gna, "Anyipyei ngun-anyi n sayi mi yi dna mi-i zhin aduwa ma gye oza gni n ma bye, aje bui-bui yi kpe.

³¹Wagna mi ge omi aduwa n sadaka yi ba ku si Shekwoyi aba.

³²Wa gna mi ge, Mi tnu Siman Bitrus bo n Joppa, wo dna lo n dna gbe n Siman pabmiyi puwa.

³³Ce nu a zhin ma tnu ho bo hoi e. Yi zhi yi pmi ho nu ya wo enya n Shekwoyi ye ha gna yi."

³⁴Bitrus wa gna mi ku gye a Yahudiyi nu to zhin aza n Shekwoyi ye gmanyi m.

³⁵Dna abye doho-doho yi Shekwoyi na za yi lo bai ga wo mwa-mwa, bai zhin be manayi wohin kwa woi gwo ba.

³⁶⁻³⁷Ho ku nabari manayi wo a Israilayi salama n Shekwoyi yi dna n Yesu eye kwo? Almasihu nu zhin Dagayi anyi zhinyi. Nabari ye la gnami vinya n Yahudiya kwoi ya n Yohanna batisma yi dna Galili.

³⁸Ho kpe lo ge Zafun Gyi-gyi-yi bo gnisun n Yesu yi, wa ga wo iko woi ka aza gna du azayi n ba aljanu yi, ntu ge Shekwoyi bo kunsun n woi.

³⁹Eyihin abara yi zhin aseida da nu, tu abe deye n wo bei zhin dna Israila bedo n Urushelima yi, aba a bo wu wo tu n zundu nyi.

⁴⁰⁻⁴¹Anyipyei ngun ata avun, Shekwoyi wa je wo wye-wyeyi ga wa wu wohin tukwo aza aba. To ge aza vinya m, sai dai eyi n yi bo gyi ya sin, n gnisun n woi, woi la lakala ev-ingwo nyi.

⁴²Wa tnu yi ntu ge ya zhin wa'azi ge Shekwoyi la Yesu ze wadayi. Anyi nya vinya awye-wyeyi da na fifiyi.

⁴³Anabi vinya bo ku ka tu nwo tukwo ba gna ozaho-zaho nwa ga gaiciya, aba zhinwo alaifi gafara dna Yesu ye.

⁴⁴Shi Bitrus bo da lo nu, Zafun Gyi-gyi-yi wa be kpe nba vinya, n ba bo wo wo nyi.

⁴⁵Ce a wo a Yahudiyi n ba bo kun be n Bitrus yi nyi, ba to bo kpe ge aba ga abye do Zafun Gyi-gyi-yi m.

⁴⁶⁻⁴⁷N tna jeje bawo ai da bo anyitalayi gbo-gbo bai ci Shekwoyi. Bitrus wa nya ge, "Zaho lo nwo ba wo bi ge mi to zhin ba batizma m, bai la Zafun Gyi-gyi-yi gwo ngye yihin?"

⁴⁸Sai wa zhin ba batizma dna n Yesu Masihu ye. Koniliyus wa gna Bitrus ge wo la dna kpa n bai anyipyei fyewyi.

Atnu-tnuyi Abozhin 11

Bitrus Wa Wu Lafiya

¹Safyewyi abara ba wo, abye do gaiciya ga bo.

²Shi Bitrus bo jezebe Urushelima, ba nabo n woi.

³Ba gna wo ge, "Ho zhin zumunta na 'bye do yi hoi gyi nyagyi n bai."

⁴Bitrus wagna ba, nabari vinya.

⁵Wa gna, "Nwyihoi n Joppa ma zhin aduwa ma gye ruya.

⁶Ma gye kwanu dnagmayi koi shin zhin eshe. Ma gye abu fi gbo-gbo ana, alu, awa nya yi du anya yi n yi ta gyi m.

⁷Ma wo begye kwoi gna 'Kni wu ha gyi.'

⁸"Ma gna awo Dagayi mi to shin anya deye gyi n yi awyidna gna yi to gyi nyin.

⁹"Amma ma je wo ge to gna ato bmiya lon, Shekwoyi woi ku gna ge a bmiya lom.

¹⁰Ko bo zhin lo nu har abwa ta, kafin aje kwanu yi la lo cei n she.

¹¹Sa fyewyi aza be ngun-ata bai kun n Kaisariya bai be mi yi.

¹²Zafun Gyi-gyi-yi wa gna mi lo, mi to gna ge ba zhin abye do nu m. Aza nguntanyi ba gni lo mi-i har Kaisariya.

¹³Ozaho wa gna yi, ngye shi malaika bei gna wo ge wo yi mi be cei.

¹⁴Zafun Gyi-gyi-yi wa gna wo ngye shi mihin Bitrus ba wu-wo gni-gni zokwo.

¹⁵“Ma ya nabari manayi da, to mi yi ga zo m, Zafun Gyi-gyi-yi wa yakpe ba n ba bo zhi bo nyi.

¹⁶Deye kwa zhin mi ma pa Dagayi beda bo n wo bo gna ge Yohanna bo zhin batizma n nuwan yi, amma a ba zhin fye batizma n Zafun Gyi-gyi-yi.

¹⁷Shi Shekwoyi nu bo ga ba nyaga ngye yihin nyi, nka nu n miyi ma na bo’a?”

¹⁸Shi a zaje bo wo lonu ba ku ba abena fa ba ci Shekwoyi. Ba gna, E, Shekwoyi la dama ga abye do ba be wo aba ba bwa wye-wyei nyalo-nyalo.

Abui-ye Yi N Antakiya

¹⁹Aviyi n ba bei busi n wahala sa ai la Istifanus wu nyi ba lo har Finishiya Saiparus, bedo Antakiya yi ba da nabari manayi. Amma n na Yahudiyi aba kawai.

²⁰Ama dai a viyi n ba bo lo Antakiya bai kun n Saiparus nyi, ba da nabari manayi ye, ga Helleniyi.

²¹Dagayi bo la ba beda tu anabarka, har abye deye ba ku gaiciya ga.

²²Shi ikklisiya Urushelima nya bei wo, ba tnu n Barnaba yi n Antakiya ntu ge wa bma a Yesu viyi zhin bo.

²³Wasi Antakiya wagyе abo wowoyi, n Shekwoyi a zhin nyi, a dawo n mwa, wa mi ba zhi, wa gna ba ge ba la nyima Dagayi.

²⁴Barnaba bo zhin oza manayi nu n nunuyi n Zafun Gyi-gyi-yi. Deye kwa zhin har aza mwa begye ba ga Dagayi gaiciya.

²⁵Barnaba wa laka wa lo Tarsusu woi ye Bulus.

²⁶Wa be woi n An-takiya ba fi bo eye yi gmanyi bai wu a viyi woi-woi nya. N bo nu a bei ya a viyi yi ge a Yesu viyi.

²⁷Nsai anabi ho ba kun n Urushelima ba be Antakiya.

²⁸Gmanyi n ba mi a yi wo Agabus wa laka gni wa zhin anabci shi Zafun Gyi-gyi-yi bei wu wo, wa gna mikun be lo n Israila kni. Deye bo zhin dna n sa nu Klaudiyus bo gyi ebe nyi.

²⁹Ntu cenu a viyi ba zhin shawara ba tnu n nyagyi yi ga a viyi n Yahudiya, zahozahoi wa ga shi wo ba mi.

³⁰Ba ku anyagyi ye ga Baranaba n Bulus yi ge, ba lo atukoda ikklisiya nya cei n Urushelima.

Atnu-tnuyi Abozhin 12

Bitrus Wan-wan Nwo Gni-gni Yi

¹Dna n sayi esu Hirudus wa laka, woi zhin gaba na gaiciya ga yi.

²Wa bara gmanyi wu, watau Yakub Yohanna zado.

³Wa gye deye kwoi da a Yahudiyi, wa Bitrus wan wa wo gu n Paska sa.

⁴Wa wo dna n kurkuku, a soja ngun tnanyi bai gu wo. Hirudus bei n nufi ge wa wu wo nu n Paska avun.

⁵Amma aduwa zhin n wyenyi yi ba gun lo Shekwoyi aba, ikklisiya nu bo zhin aduwa ntu ge Shekwoyi wa gu wo dna n kurkuku.

⁶Amma n sukwoyi kafin a da wo wa, woi wangye dna na soja ngun aba atan-tasin, na gmai fi wo abwa ababa, na soja ajei zhi na bokunmi.

⁷Safyewyi wa gye buzangna wa gye malaika gni n wa ba wa gna wo, “La pye ha laka.” Shi wo bo da lonu a gna kaya zhi n kni.

⁸Malaika wa gna wo ge, “Ku ha je kpe ha ku abuada fi.” Waku zhin lonu wa je wo gna ge ku ho koti kpe ha vi mi be.

⁹Bitrus wa gmi n kurkuku woi vi malaika lo. Amma wa gye ngye wo nuna nu.

¹⁰Ba du abokunmi n gun aba ya, ba be abokunmi sunkna nya. Ba guya n bahin yi, ba duya ba zan-zan fyewyi malaika wa fawo.

¹¹Bitrus n sayi wa kpe ge, Dagayi la wo malaika tnu, woi gni wo n Hirudus akun.

¹²Shi wo bo gni wa zhin tunani fyewyi, wa laka wa lo Maryamu Yohanna 'ya puwa, aba na aza bei yezhi bai zhin aduwa nyi.

¹³Wa je aba, bi nyikwoyi ho ai yi wo Roda, wa be ntu ge wa gu aba ya.

¹⁴Shi wo bo kpe ge Bitrus begye nu, a da wo n mwa sosai. Wa busi lo mi wa gna aza ge Bitrus gni lo na bokunmi.

¹⁵To ba ga wo gaiciya m, amma to wa fa da bo m, sai ba gna Bitrus malaika nu.

¹⁶Bitrus wa gyi abye woi je aba Ba lo ba guya ce'a wo ba.

¹⁷Wa gna ba ge ba ku ce pi, wa wu ba enya n kwa zhin, “Fye ku gna Yakub na za je yi, enya ko ku zhin.” Wa fa ba wa lo wo nya.

¹⁸N labmi yi a kurkuku da ku je-je ba nya ge Bitrus ma?

¹⁹Hirudus wa ku a soja wu. Ntu ge ba bo fa Bitrus wapwo. Nsayi wa lo Kaisariya wa sase bwai anyipyei fyewyi.

²⁰N Kaisariya azaho ba be bai kun Taya n Saidon yi, ntu ge ba gye Hirudus wo to bo dagma n ba yi m, amma ba bo ku ze anugundo ntu gniko gni bo.

²¹Ba nyipyei shi ntu ge ba wo Hirudus beda. N wyihi wa ku wo asu jekpe wa be wa tu wo asu ku-jara ntu ge wa da bo.

²²Aza a bowyi ba gna, “Begye ye to zhin oza nyanu m, amma shekwoyi nyanu.”

²³Nsayi-sayi yi malaika Dagayi nya wa be wo n nyasanayi, avin ba gyi wo har wa fi, ntu ge wo to bei ga Shekwoyi mwa-mwa m.

Barnaba N Bulus Yi N Antakiya

²⁴Shekwoyi beda kwa gyi abye wolo-wolo har a bwa a viyi n mwa begye.

²⁵Barnaba n Bulus yi ba lo aza gye n Urushelima. Shi ba bo ku bo zo n ba bei lo zhin, ba jeze be Antakiya n gnisun n Yohanna Marukus yi.

Atnu-tnuyi Abozhin 13

¹Anabi bedo na malami yi bei mwa n Antakiya, Barnaba yi bei nyi n ba mi n Siman yi. Lukiyas n Manaya bei nyi n jesun, bedo n Bulus yi.

²N wyihoi bai zhin aduwa Zafun Gyi-gyi-yi wa cige, “Mi ye Bulus lo n Barnaba yi ntu tnu-tnu bo n mi ba gaba”.

³Shi ba bo ku aduwa n azumi yi zo, ba tuba anabarka ba ya tnu-tnu yi.

⁴Zafun Gyi-gyi-yi kwa wa ze ba gna bye. Ba lo Selusiya n Saparus yi.

⁵N ezhi ho ai yi ko ge Salmis, ba lo a Yahudiyi aduwa nyakun ba zhin wa’azi bo. Yohanna Markus bei knusun n bai.

⁶⁻⁷ Ba zhin wa’azi n ekniyi vinya. Sanu ba bei si Pafos ba gye anabi katai ho, ai yi wo ge Bar-Yesu. Wo bei zhin esu nugundo nu. Esu yi bei zhin oza hankali da nu. Wa yi Bulus n Barnaba yi ntu ge ba zhin wo wa’azi.

⁸Amma Elimas anabi katai hi, Owo ye ma’ana nu, wa gna su ge wo to gwo ba beda m. Wo to bei ye ge osu yi wo ga Shekwoyi beda gaiciya m.

⁹Ntu cenu Bulus wa gyi minagyi sosai. Ntu ge wo bei nunuyi n Zafun Gyi-gyi-yi.

¹⁰Wa ci wo ge, “Oho shetam bi ho zhin oza nukwoyi nu. Ho ta ye anya manayi m. Ho ta fa gaba zhin bo n Dagayi m?”

¹¹Nsaiye kwa Shekwoyi la kni tu ho. Ho ta gye wyeban har esa fyewyi.” Nsayi-sayi wa ze wyebuayi. Wa lafa woi zan oza shin wa shi wo busi bwa.

¹²Shi esu yi bo gye lonu, wa ga Shekwoyi gaiciya n sai-sayi. Wa wo Shekwoyi dna n jesun.

Bulus Wa Lo Turki

¹³Bulus kuwa n wa nugundo yi ba fa Pafos ba lo Parga n Panfiliya 'kni, Yohanna Markus bei jeze ya nu wa lo Urushelima.

¹⁴Amma Bulus n Barnaba yi ba godiya lo Antakiya n Bisidiya 'kni. Ba lo aduwa nyakun n Satiwiyi yi. Ba bei zhin ba lo aduwa n wiyi nu.

¹⁵Shi abo la nya zo ba n ataurat bedo n anabawa yi, anya Bulus n wo beda yi lo, wa be wa da.

¹⁶Bulus wa lakala gni wa ya beda wa cige, "Ofye a Israilayi n azayi n ba ga Shekwoyi mwa-mwa nyi."

¹⁷"Shekwoyi bei kni 'ya dada wa gaba mwa-mwa dna Masar wo bei zhin deye n sayi nu n wo bei kun ba n Masar nyi.

¹⁸Wa kun sun n bai har aye shinyi n zhabui. Bai zan-zan laba n bmana.

¹⁹⁻²⁰Shi ba bei lo Kan'ana wa sun kun ga ba, har abye ngun-tnaba ku fi kutu-kutu Wa fi ba n alkali akun har aye 450. Oza n wo bei ya tu ba wonu zhin anabi Samuila.

²¹"Nsayi aza gyi wye nge aga ba esu, Shekwoyi wa ga ba Saul Kish nugun. Wo bei zhin Banyami bye nu. Wa gyi be aye shinyi.

²²Anuna Shekwoyi wa shin wo ya wa dna Dauda be. Dauda bei zhin ozanu n wo bugba bei shi n Shekwoyi aba.

²³Njesun Dauda bye nu, wato Yesu bei nu Shekwoyi alkawali wa gn Israila.

²⁴"Amma kafin wo be, Yohanna Baptizma zhin yi bei la be kpa. Wa zhin wa'azi ge aza ba fa ba laifi, ba pmi be Shekwoyi aba.

²⁵Sanu Yohanna bei ye wa fa tnu-tnu wa cige, 'Fye gye ge mi zhin Kristi nu? Ai wo ba be esayi fyewyi. Mi zhin za gbagbaya nu n waba sosai.'

²⁶"Omi azaje Ibrahim a yawyi n fye abye do yi n fye wo Shekwoyi dna nyi, gni-gni ye zmn fye nya nu.

²⁷A Yahudiyi n Urushelima, bei nu Shekwoyi beda ba Yesu wu. Ba to bei kpe nya ye n ba zhin m.

²⁸Ba to bei kpe nya ye n ba ba wu wo tu kwo m. Ntu cenu ba gna Bilatus ge wo wu wo kawai.

²⁹Shi ba bei la wo wu wato bai ku anabi beda nu a wo bi.

³⁰"Amma Shekwoyi wa lawo kala n vingwo.

31Aza ku gye wo n jesun, wato aza n ba bei kun Galili ba gni Urushelima lo nwoi obanu bei da n ba gbei pei-peige Yesu bo la laka n vingwo.

32-33 “Nabari nu kuwa n ya be fye cei, Shekwoyi gni-gni la be ya ba, ntu ge Yesu la laka n vigwo, Zabura sura

2 cige, ‘Nnaiye mila ho ze omi bi sosai.’

34“Shekwoyi bei zhin alkawali ge, wo ba la Yesu kala n vingwo, wo ta shan fi m. Alkawali kwo-kwo yi kwa cige, Mi ba zhin ga ho anya wo-woyi n mi bei gna Dauda nyi.

35Zabura cige, Shekwoyi ta fa wo za Gyi-gyi-yi wa bwo m.

36Wo to bei da Dauda nu bo m. Ai Dawuda bo la fi har wa ku bwo dna vingwo.

37Amma wo bei da zado nu bo. Owo nu n efi to bo mi kwa shi wo m. Wato Yesu nu.

38“Omi azaje gafara zhin lo n Yesu aba nu kawai ntu fye alaifi bo.

39Zaho-zahoi wa gawo gaiciya aba ze wo oza gyi-gyi yi, enya n a Yahudiyi owa ta mi kwa zhin m.

40Oh fye zhin peceiye, mi to cei pma anabi beda ye kwa nu n fya ba m. Ntu ge ba ci ge,

41Fye gye, fya bwi, ofye awyegbaciyi, gama mi zhin abo wowoyi lo n fya ba, fyei ta ga gaiciya lon, ko ozaho yi wu fye awyega.”

42Aza ba fa aduwa nyakun n wyi yi n gye a tu ba dole nu ge ba kun. Ba gna Bulus ge wo bei jezebe ntu ge ba wo Shekwoyi beda, n satiwyi nkwo be lo nyi.

43Aza n mwabegye n wiyi ba vi Bulus laba n Barnabas yi. Bulus wa gna ba ge ba ga Yesu gaiciya ba vi wo.

44Shi Satiwyi bei si aza ku nu aduwa nyakun sosai ntu ge ba wo Bulus eda.

45Amma shi a Yahudiyi atukwoda bei gye aza lonu minagyi kwa gyiba. Ba kni Bulus akmi ba gna ba abeda nukwoyi.

46Bulus n Barnaba yi kuwa ba cige, “Kwo yi zhin dole nu ya be fya ba a Yahudiyi n nabari manayi. Amma n saiye fye la yi bo na, fye ta ye yi beda lo m. Ntu cenu yi lo abyedo aba nu.”

47Shekwoyi bei gna yi lonu nu, nge 'mi ku fye ze buzangna n abyedo aba fya kun baya n wyegma.

48Shi abyedo bei wo lo nu, ba dagma bai ci Shekwoyi ntu wo beda bo; aza akni-kniyi ntu wye-wyeyi nyalo-nyalo nya bo, ba bei ku gaiciya ga.

49Ezhi yi vinya kwa wo Shekwoyi beda laba.

- ⁵⁰ Amma a Yahudiyi atukwoda ba la gyikici ka. Ba zhin a nya Bulus ya n zhi yi.
- ⁵¹ Amma Bulus n Barnaba yi, ba kun abutukun ya n ba pita. Ba kun balo Ikoniya.
- ⁵² A Yesu viyi kwaba bwa bugba bui-bui yi sosai, n nunuyi n Zafun Gyi-gyi-yi.

Atnu-tnuyi Abozhin 14

- ¹ N Ikoniya Bulus n Barnaba yi, ba lo aduwa nyakun ba zhin wa'azi sosai nya. Har aza n mwa ba ga gaiciya.
- ² Amma a Yahudiyi ba ku kala ba da abo nukwoyi tu Bulus tukwo, bedo n Barnaba yi.
- ³ Amma Bulus n Barnaba yi, ba fi bai zhin wa'azi, Shekwoyi kuwa wa gaba ikwo har ba zhin abo wowoyi n mwa.
- ⁴ Aza n zhiyi kwa ba gna jeya, aza ho ba ye ge a wu ba, aza ho kwa ge a gye ba sun-sun.

Zabmazhi La Kagna Bwa

- ⁵⁻⁶ Sanu Bulus n Barnaba yi, bo kpe ge a yelo a luɓa sosai, ba busi n zhi yi ba lo Litra, Darbe n azhi biyi-biyi n Likaonia kni.
- ⁷ Ba da nabari na zhi ye laba.
- ⁸ N Litra ba gye zabmazhi ho, abo mawo n wu lonu nu.
- ⁹ Wa wo Bulus woi zhin wa'azi, Bulus kwa wa kukpe ge zaye n gaiciya gayi lo.
- ¹⁰ Bulus wa ciwo ge, "Omi zado lakala." Wa laka wa ya zan-zan.
- ¹¹ Shi aza bo gye lonu ba fi aku. Ba cige, "A shekwoyi ku be ya naiye."
- ¹² Ba yi Barnaba ge Zafas, Bulus kwa ba yi wo ge Hamis. Oba shekwoyi aye nu lo nu.
- ¹³ Har ba be n nakwo yi ntuge ba gba shan.
- ¹⁴⁻¹⁵ Amma shi Bulus n Barnaba yi bei gye lonu, ba ci ge, "Kai! Fye ku I fa mana! Ai yi zhin aza nu n gye fye. Yi cei pma fya fa shan gba nu fya vi Yesu n wa zhin anyi vinya nyi.
- ¹⁶ N sapai Shekwoyi bei fa ba zhin nya ba gye.
- ¹⁷ Amma Shekwoyi to bei fa wo hin n tna seida m, wa ga nuwan n anya manayi yi."
- ¹⁸ Dudu lonu ba bo fa dai ca nu, ba bo ye ba gba shan dole.

¹⁹Dna anyipyei fyewyi kawai a Yahudiyi ba kun n Antakiya bedo Ikoniya yi, ba la wahala kaia, ba kni Bulus akuta har a gni wo gni-gni a biwo ya n zhi mi, bai gye ge wo la fi.

²⁰Amma a Yesu viyi bo shekna wo, wa lakala wa lo zhi mi n labmi yi ba lo Darba.

²¹Shi a bei zhin wa'azi bo ba jeze be Listra, Ikoniya bedo n Antakiya yi.

²²Bai bma a Yesu viyi zhin n Yesu bedayi, ba gna ba ge ba to fa Yesu m. Kwo wahalai nu be, ntuge zokwo nu bwa sun nu n ko ba lo n yi n she.

²³Ba kni abyeda ga ba, ba zhin aduwa gaba n azumi yi sosai, ba fi ba n jesun n Shekwoyi akun.

²⁴Ba je lo ba duya Bisidiya ba lo Pamfiliya.

²⁵Ba zhin wa'azi n Perga ba lo Ataliya.

²⁶Ba jeze lo Antakiya n eya nuwan nya yi, ba bei ya, zan-zan ya nu. A bo fi ba n Shekwoyi akun n ya nu n jesun.

²⁷Sa n ba bo zhi, ba yi a Yesu viyi ba wu ba lafiya nya n ba bo zhin. Ba gna ba shi Shekwoyi bei gu zokwo ya ntuge abyedo ba kpe Yesu ye.

²⁸Ba ku mwasa nkunsun na Yesu viyi n Antakiya.

Atnu-tnuyi Abozhin 15

Atukwoda Shaula Kmisunyi

¹Esa nu Bulus n Barnaba yi bei fi Antakiya, azado ho ba kun n Yahudiyi ba be. Bai wu a Yesu viyi ge ndei ba ye gni-gni tile ba zhin ba kaciya, ba vi Musa owa njesun.

²Amma Bulus n Barnaba yi ba dna bedayi wye n naza hoi ngnisun. Har kwa ze ikklisiya Antakiya nya, ba tnu Bulus n Barnaba yi ba lo a tukwoda aba n Urushelima ntu wu-wu deye pya bo.

³Ikklisiya ku ba gnami ba kuka ba lo Urushelima, ba diya n Finishiya n Samariya yi ntu ge ba gye a Yesu viyi, ba da ba ngye shi abye do ga gaiciya lo n bai gbo-gbo.

⁴Shi ba bo ku si Urushelima, ba lo abyeda aba. Bulus n Barnaba yi, ba wu abyeda ngye shi Shekwoyi lo tnu-tnu lo n bai n abyedo aba.

⁵Amma Afarasiyi ho da lo ge, "Abyedo vinya nba ga gaiciya nyi, tile a zhin ba kaciya, ba vi Musa owa njesun."

⁶Abyeda ba yi aje zhi ba gundo, ntu ge ba zhin shaula tu n beda ho tukwo.

- ⁷Shi a bo la yezhi, Bitrus wa laka gni wa dabo, aza yi ge, Omi azaje, fye kpe lo ge Shekwoyi bo la mi kni, ntu ge ma da nabari manayi abyedo aba, ntu ge bahin ba ga gaiciya.
- ⁸Shekwoyi n wo kpe aza bugba nyi, wo bo la tabata n kwoi lo ge wo ye abyedo lo, ntu ge wo bo la Zafun Gyi-gyi-yi ga ba, ngye shi wo bei ga yi nyi.
- ⁹Wo to n gna yi tu lo n eyi atan-tasin nba yi m ntu ge wo la ba bugba zhanya ntu ba gaiciya ga bo ngye yihin.
- ¹⁰Shekwoyi bei bwi aba nu, nfye ba dna wo n zokwo har fya tu abyedo a kaya n yihin kwo eyi azakwoyi to bei mi ya la n?
- ¹¹Fye ta kpe lo ge gni-gni zhin kyauta nu, Dagayi Yesu Kristi nya, n aza ba n?
- ¹²Shi wo bo zo beda, aza vinya ba ku ce pi, ba wo ngye shi Shekwoyi zhin abo wowoyi lo, n Bulus yi bedo n Barnabas yi n abyedo aba.
- ¹³Shi ba bo ku zo da Yakub wa dabo n aza yi wa gna ge, "Omi azaje fye wo.
- ¹⁴Bitrus ku gna fye esa n Shekwoyi bo ya abyedo kni, ntu ge wa kni aza ba la owo ye tu.
- ¹⁵Anabi bei ku abyedo abuiye bo da, ko ku nu n yi esa. Wo nya nu anabi Amo bo da.
- ¹⁶"Dagayi bo gna ge, Avun deye, 'Mia jezebe ntu ge ma ze omi alkawali a woi-woi n jesun n Dawuda yi.
- ¹⁷" 'Ntu ge abyedo ba kpe Dagayi ye, ba zan wo shi njesun.'
- ¹⁸Dagayi kpe wo shiri vinya, Wo ba mi wa zhin abo ngye shi wo shiri nyi tunyi nkmisun-yi.
- ¹⁹"Ntu cenu enya ma gye kwonu nyi, yi to tu abyedo n ba ye abui nyi tile ge ba vi eyi a Yahudiyi awyidna m.
- ²⁰Amma yi ba kage ba to gyi a shan abum, ba fa anagbai zhin, to ba gyi nya a to zun sha m.
- ²¹Ntu ge ala hana anya deye yi vinya, n a Yahudiyi aduwa nyakun n Satiwiyi yi."
- ²²Ikklesiya atukwoda n Urushelima ba kni Yahuda n Sila yi, ntu ge bai gni lo n Bulus yi n Barnaba yi har Antakiya, ba lo bo da enya n na da.
- ²³Wasika nyi n ba bei lo cei, Wasika ye gmi n yi aba nu, eyi atukwoda bedo ikklesiya yi n Urushelima. Kwoi be fye a Yesu viyi aba n Antakiya, Suriya bedo n Silisiya yi, yi bi fye gna lo.
- ²⁴Yi ku wo ge a Yesu viyi ho n la kunya bai gmi fye abo aje ge, tile fya shi Musa awyidna bwa, yi nu to tnu ba m.

²⁵Yi ku shaula zhin ntu ce, Yi gna ge yi ba tnu n Yahuda, Sila, Bulus n Barnaba yi ba be fya ba.

²⁶⁻²⁷Yahuda n Sila yi ba ku ba wye-wyei ga ntu Kristi bo, Ba ba gna fye ngbei shaula n ya zhin.

²⁸Kwa da Zafun Gyi-gyi-yi bedo n yihin, to ya tu fye tile ge fye zhin abo ngye a Yahudiyi m.

²⁹Amma fye ba fa a shan nya gyi bo, n na nya yi n na to zun shan, to fya zhin anagbaya m. N fya zhin lonu ko la kun sai wyihoi.

³⁰Aza ngun anyi ye ba kuka ba lo Antakiya, shi ba bo si ba ye a Yesu viyi zhi ba ga ba wasika.

³¹A Yesu viyi vinya ba dagma bai ci Shekwoyi, ntu ge wasika yi bei mi ba bugba gni.

³²Sila n Yahuda yi, ba zhin wa'azi zhin-yi nu, ba zhin wa'azi bai mi a Yesu viyi gaiciya ga gni.

³³Ba bo ku anyipyei bwa fyewyi n bai, ba kpe jeze lo Urushelima, ba lo ngna bi yi n atukwoda aba n Urushelima.

³⁴Bulus n Barnaba yi, ba ku che fi n Antakiya anyipyei fyewyi.

³⁵Ba bei bma amalami zhin bo, bahin bai zhin wa'azi, bai wu aza Shekwoyi beda.

Bulus Ajegna N Barnaba Yi

³⁶N wyihoi Bulus wa gna Barnaba ge, "Yi lo njesun yi gye aza n ba bo ga gaiciya nyi. Azhi gbo-gbo ya gye shi ba mwalo."

³⁷Barnaba wa ye, ama wa ye ge wa la Markus ba gni lo.

³⁸Amma Bulus to bo ye ge, Yohanna Markus wa gnilo n bai m, ntu ge wo bo la jeze n Pamfiliya.

³⁹Deye bo la Bulus n Barnabayi dna abona, n mwa har ba gnaje. Zaho-zaho wa lo wo nya nwo bwai. Barnabas wala Yohanna Markus ba lo Saipiris.

⁴⁰Bulus wa kni Sila wa gni tnu-tnu zhin n woi.

⁴¹Ba lo Suriya n Silisiya yi bai mi ikklisiya zhi nbwai.

Atnu-tnuyi Abozhin 16

¹Bulus n Sila yi ba lo Darbe, n sayi ba lo Listra aba nu ba bo gye Timatawus. Timatawus n wo aza mayi ba bei zhin a Yesu viyi nu! Owo 'ya bo zhin Yahudiyi nu amma owo dada bo zhin Heleniyi nu.

²Timatawus ɓo zhin oza manayi nu, har ai kpe wo ye n Listra ɓedo n Ikoniya yi ntu wo hali manayi ɓo. Wo ɓo n seida manayi yi.

³Ntu wo seida Yesu viyi manayi ɓo, Bulus ɓo gna wo ge wo gni lo n ɓai. Ntu ge to Ayahudiyi ɓa zhi gbo n woyi m, Bulus wa ku wo zhin kaciya gama ozahozahoi bei kpe ge owo dada ɓo zhin Heleniyi nu.

⁴Ba zan azhi yakwo, ɓai gna a Yesu viyi shaula n na ɓo zhin ntu abyedo ɓo, n Urushelima nyi.

⁵Ntu deye ɓo, ikklisiya kwa mwa fyegyiyfyegyidna n gaiciya n begye yi njesun.

⁶Ba zan laba fi n Firijiya 'kni, ɓedo n Galatiya yi. Amma Zafun Gyi-gyi-yi ɓo la hana n ɓai, to ɓa zhin wa'azi n Asiya n sayi yi m.

⁷Sbi ɓa ɓo ku si Misiya ɓa zhin shaula ɓa lo Bitiniya, amma Zafun Gyi-gyi-yi wa hana n ɓai.

⁸Cenu ɓo zhin ɓa zan fi n Misiya 'kni, har ɓa ɓe Turas.

Bulus Bewyegye

⁹N Turas Bulus wa nu ena n sukwoyi. Wa gye Makidoniya yi za woi gna ge, "Piya ɓe n ya ha bma yi zhin."

¹⁰Ba zhin shaula ɓa lo Makidoniya ntu ge wo ɓo la tabata Ige Shekwoyi nu tnu n ɓai, ɓo zhin wa'azi nabari manayi nya n bwai.

¹¹Ya kun n Turowas ya lo eya ya lo Samatiras. Ya si Niyapolis n nyipyeyi bayi yi.

¹²Ya duya ya lo Filibi, ko ɓo zhin galu nu a Roma yi nya, Ezhi dnagmayi nu dna n Makidoniya, ya ku fi ɓo anyipyeyi fyewyi.

¹³N Satiwiyi ya lo ednagbe aba nu aza zhin ɓa yezhi ɓa zhin aduwa. Na bayi ya wu anyikwoza Shekwoyi ɓeda.

¹⁴Nyikwoza gmanyi a yi wo Lidiya, wo gmi n Tiyatera wo ɓo zhin bwazeyi nu, woi kun aje nakwoyi nu, wa ɓe ntuge wa ci Shekwoyi wa gu wo bugba ya, wa ye abui, ntu wa'azi ɓo n Bulus ɓo zhin nyi.

¹⁵Ya zhin wo baptizma n na zayi nwo puwa vinya, wa gyi yi wye ge yi shin fi n wo puwa wa ci ge, "Ngye fye ku ye ge, mi zhin oza gaiciya danu n Dagayi aba, fye ɓe fya shin fi n mi puwa". Ya ku ye ya lo wo puwa.

¹⁶N wyihoi, yi lo aduwa zhin n dnagbe, ya gye ɓinyikwoyi ho nu aljanu yi. Wo ɓei zhin woi da ɓo nba ɓa zhin abye, har deye kwoi ɓe owo adagayi n agyiwyeyi.

¹⁷Wa vi yi ɓe woi ɓewyi, "aza deye Shekwoyi abara nu, ɓa ɓe ntu ge ɓa gna fye, shi aba zhin fye alaifi gafara."

18Wo bo zhin lonu cici, har anyipyei fyewyi. Bulus wa gyi minagyi wa gnakni aljanu wa gna, “dna Yesu Kristi ye mi ye fya kun nwo.” Nsai-sayi yi aljenu ba kun.

19Amma owo a dagayi yi ba gyi minagyi n Bulus yi, ntu ge wo la agyiwye zokwo wun baya, ba wan Bulus n Sila ba lo n bai na wadai aba n gnikwo (ntu ge awadayi bei zhi bo nu).

20Ba da ge a Yahudiyi ye n ba zhi nyi, ba wun yi zhi ya lo.

21Bai gna aza ge ba to zhin a Romayi awyidna vi m.

Wan-wan Fi N Kurkuku

22Aza gyi minagyi, awadayi ba gna za ge ba lu Bulus n Sila yi.

23Shi ba bo ku ba lu dai-dai, ba ku ba gu fi n kurkuku, a gna kurkuku guyi ge wo to ye ge ba bu si m.

24Kurkuku guyi wa ku ba, wa ku ba gufi n mi mi, wa ku ba gyi n apita.

25N sukwo sadu yi Bulus n Sila yi ba ya anyi kwo ga Dagayi, akurkuku da aje ba wo bai ko anyi.

26Sa fyewyi ekni kwa ya ashan-shan, kurkuku kwa shan-shan abokunmi ba गया अगमा बा कन्या नबा अब्वा दुक ना पिता यी.

27Shi kurkuku guyi bo kun agyewyi wa gye kurkuku abokunmi la गया, wa gye ngye aza wan-wan yi la busi, wa la ebe yakwo ntu ge wa wu wohin.

28Amma Bulus wa sawyi, “To wu hohin, gye yi fi lo ya vinya.”

29Woi gni wo vin ntu edna bo, wa gna ge be n na yi. Wa lo be kurkuku wa chakwo-kwo shi n Bulus abye n Sila yi.

30Wa kun ba be cei wa nya ba ge, amalemi nba zhin wuna ma pwoo a?

31Bagna wo ge, “Ga Yesu Kristi gaiciya ho ba pwo n aza yi n ho puwa vinya.”

32Ba gna wo nabari manayi bedo azayi n wo puwa vinya.

33N sukwoyi yi wa zhan ba a ciya, owohin n wa 'zayi vinya nwo puwa a ku ba zhin baptizma.

34Wa ku ba wa lo bai nwo puwa wa ga ba nya gyi. Owo puwa vinya kwa dagma, ntu ge ba ku ze a Yesu viyi.

35N labmiyi awadayi ba tnu n dan-sanda yi ge wo gna kurkuku guyi ge a Bulus ba lo.

36Kurkuku guyi wa gna Bulus n Sila yi ge ba lo.

³⁷Amma Bulus wa gna “awo, ba ku yi lu n aza awye bai kuyi fi n kurkuku n tna wada, eyi n yi zhin Romayi, n sayi ba ye ya lo fiya kpe-kpe! Ba be n bahin ba loyi ya.”

³⁸Dan-sanda wa jeze lo wa gna awadayi, shi ba bo wo ge Bulus n Sila yi zhin a Romayi nu ba wo dna.

³⁹Ba be kurkuku ba gyi ba wye ge, ba la kun nzhi hi ba lo ba nya.

⁴⁰Bulus n Sila yi ba kun n kurkuku, ba lo Lidiya puwa, ba gye a Yesu viyi nfi bo, ba mi ba bugba zhi, ba kpe kala ku ba lo ba nya.

Atnu-tnuyi Abozhin 17

Bulus La Lo Azhingye

¹Avun ba duya n Amfipoli bedo Apoloniya yi ba lo Tasalunaika. A Yahudiyi aduwa nyakun bei gni bo.

²Bulus wa lo aduwa nyakun wa zhin wa'azi wo bo da Shekwoyi beda, har Asati ngun ata n vi do lo.

³Woi ga bayani anabci n na bei zhin tu Yesu wahala bo, bedo nwo kala layi n vingwo, wa wu shi Yesu nu zhin Kristi.

⁴A Yahudiyi ho ba ku gaiciya ga ge, Yesu nu zhin Kristi. A Helleniyi n mwabegye anugbayi na nyikwoza yi ba ku yabui ba ze a Yesu viyi. N mwa begye nba mi ba bo zhin aza dnagmayi nu n Tasalunaika.

⁵Amma a Yahudiyi, n ba to bei ye ba ga Kristi gaiciya nyi m, ba zhin aza ba la wahala kala. Ba lo Jason puwa bo kun a Bulus n Sila yi bei cei ba lo n bai n azhi tukwoda aba, a ga ba tata.

⁶Amma to ba gye ba fi bom, ba wan Jason ba gni wo be cei bedo nna Yesu viyi ho yi, ba ce akata fi ba nna iko da abye ba gna ba nu la wahala ka dna n zhi, n gye Bulus n Sila yi.

⁷Ba ce akata fi Jason ge, wo ku a Bulus so fi n wo puwa. Har ma ge Bulus n Sila yi, bedo n Jason yi, ba da lo ge Yesu nu zhin esu do, gbo n Kaiser yi.

⁸Shi a iko da bo wo a be deye tu Bulus tukwao, bedo n Sila yi, har n Jason yi ba ku je-je.

⁹A iko da ba Jason ya bedo na Yesu viyi, ai la ba gwo bwashi.

¹⁰N sukwoyi a Yesu viyi, ba gna a Bulus n Sila yi ge, ba lo Beriya. She ba bo si bwai ba lo a Yahudiyi aduwa nyakun.

11Aza n Beriya bei n yeyei du a Tasalunaikayi. Ba gwo Shekwoyi beda na gmadai, bai ba fyegyi-fyegyi dna n Shekwoyi beda, ntu ge ba kpe ge nya n Bulus da nyi kwo zhin gaiciya nu.

12Ntu deye bo, aza n mwa begye a Helleniyi anugbayi na nyikwozayi, ba ku gaiciya ga, ba ku ze a Yesu viyi.

13Amma shi a Yahudiyi atukwoda bo wo ge, a Bulus ku wa'azi Shekwoyi beda nya da, ba gyi minagyi, ba la wahala ka dna n zhi.

14A Yesu viyi ba gna Bulus ge wo lo ela gbe, amma Sila n Timatawus yi, ba ku ce fi n Beriya.

15Aza nba bei da Bulus apye nyi, ba gni lo n woi har Atina. Bulus wa tnu ga Sila n Timatawus yi ge ba be wolo-wolo. Aberiya yi n ba bei gni lo n Bulus yi nyi, ba nu bo jeze lo a Timatawus n tnu-tnu yi.

16Kafin Sila n Timatawus yi ba lo, Bulus bo ku ashan gyewye n Atina; wa ku kpe ge ba ta kpe Shekwoyi Gaiciya nya ye lo m.

17Walo aduwa nyakun, ntu ge wa zhin shaula n a Yahudiyi, bedo abyedo yi n ba ku gaiciya ga nyi, wo bei zhin wa'azi cici n gnikwo.

Bulus Nna Beyekpeyi

18Wa gye abeyekpeyi ho, shi wo bo gna ba Yesu efi bo, nwo kala la yi, ba ma wo san, ba kpe wo agye, ba ci wo wyegba ba gna ge, "Wo nuna nu kwo ge wa be n kunnu woi-woi nu."

19Ba la Bulus ba lo woi, aba a yi ge Arasa, ba gna, "Be ha gnayi ho kunu woi-woi bo."

20Ho da anya bo lo n yi ta kpe ba yelo m, yi ye ya kpe ba ye.

21Atina yi bedo azhibeyi zhin ba ye ntuge ba wo abo woi-woi.

22Bulus wa laka tu abaho ngye epe, wa da bo n bai wa gna, "Ofye Atinayi mi ku gye fye zhin a knunu bwashiyi nu.

23"Ntu ge ma zan, mi gye fye bagadi mi gni, n rubutu yi kakpe ge 'Shekwoyi n ata kpe woye m. Emihin mi da wo nu beda,' n fye ga wo mwa-mwa dna n wyegma nyi.

24"Owo nu na zhin anyi, anya yi vinya a ba fi n ba nyi, wo ta dna aduwa nyakun nami na bwai m, ntu ge eshe n 'kniyi wo nu zhin ba Dagayi.

25Oza ta mi wa biya n wo bukata yi m, ntu ge wo to anya kmayim. Wonu ga nyaho-nyahoi wye-wyei n sun yi, woi ga zaho-zahoi wo bukata.

²⁶Wo na zhin aza vinya tunyi n Adamu sa, wa gna abye ya zhin anyi tunyi kmisunyi, wo nu kpe abye ye n ba ba kuka n begyi, esa yi nba ba duya. Wonu na zhi ba n ba zhiba.

²⁷“Owo bemwi nu bei nyi ntu ge, abye ye vinya ba zanwo shin, wo ye ntuge ya ze owo nya, wo lo vivi n yi.

²⁸Nwo mi nu yi bwa wye-wyei yi zan. Ngye shi fye zhin fya da dna fye anyi besisi ge ‘Yi zhin Shekwoyi abi nu.’

²⁹Ndei deye gaiciya nu, kwo to bmiya ya gye Shekwoyi ngye ashan nu, n ’za zhin n zinariyi ko azurfa ko kuta m.

³⁰Esa n kwa duya nyi aza bei gba a shan, Shekwoyi wa zhin hankuri nbai. Amma nsaiye Shekwoyi ye aza vinya ba fa ashan gba, ba ga wo nu mwa-mwa.

³¹Ntu ge wo nyipyeyi shi lo, n wo bei da anyi wa cei dna befyece n oza aba n wo bei la wo ka n vingwo nyi, wo nu bo da aza wa.”

³²Shi Bulus bo da afifiyi kala ku bo, aza ho ba ma san. Amma azaho ba gna yi ye cei pma lo ya wo n sado.

³³Bulus beda kmaknayi nu n bai wa lo wo nya.

³⁴Azaho ba ku gaiciya ga. Diyonisisi shaula zhinyi n Atina bedo n nyikwoza hoi ai yi wo ge Damaris ba ku ye abui, n na azajei.

Atnu-tnuyi Abozhin 18

¹Bulus wa fa Atina wa lo Korinti.

²N Korinti wagye Akila n wo nyikwoyi Biriskila, ba bo ku sase n Italiya amma n sayi bai fi Korinti nu. A bo ma Akila n Pontus nu. Ba bo fa Italiya ntuge Kaisar Klaudi bei la Yahudiyi nya ya n ba bo fi n Roma nyi.

³Bulus wa knu tnu-tnu zhin n bai, ntu ge oba tnu-tnu bei zhin gmanyi nu watau alubui zhinyi.

Nba Lo Abyedo Aba

⁴Bulus bei zhin wa lo aduwa nyakun n satiwiyi doho-doho yi, woi wu a Yahudiyi bedo n a Helleniyi ge Yesu nu zhin Kristi.

⁵Timatawus n Sila yi ba fa Makidoniya ba be da Bulus n Korinti. Shi ba bo ku be da wo, Bulus wa gyi abye n wa’azi yi, woi wu a Yahudiyi Yesu nu zhin Kristi.

⁶Amma a Yahudiyi ba na wabo, wohin ce wa kun wo aje butukun ya wa gna, ofye ami ba tu lo nfyeyi, amma mi kni-kniyi lo, n sayi nba zhin wa’azi na byedo aba nu.

- ⁷Avun wa lo wa shin dna n Titus puwa. Wo bei zhin ebye do nu, amma wo bo zhin woi ye Shekwoyi, woi ga wo mwa-mwa. Owo puwa bei wu vivi n aduwa nyakun yi.
- ⁸Krispas nu bei zhin aduwa nyakun Itukwoda. Owo puwa vinya ba ku vi Yesu, aku ba zhin baptizma bedo nazadohoi.
- ⁹Shekwoyi wa dabo n Bulus yi dna n ena, wa gna wo ge, “To wo dna kwo ha busi m, dabo, to ce pi m.”
- ¹⁰Ntu ge mi gnisun lo n hoi, ozaho ta zhin ho nyaho m, mi azayi lo dna n ezhi deye n mwa.
- ¹¹Elonu Bulus wa gyi abye, woi wu Shekwoyi beda har eye gmanyi n tokun yi.
- ¹²Amma esa n Galiyo bo gyi gwamna dna Akaya, a Yahudiyi ba la gyikici ka n Bulus yi, ba zhin wo kala n gwamna aba.
- ¹³Ba gna ge, Bulus gna aza ge, ba ga Shekwoyi mwa-mwa n azokwoyi n ba zhin gaba n Romayi awyidna yi.
- ¹⁴Bulus woi ye wa dabo, amma Galiyo wa gna akala da ge, oza deye bo gna wo ku laifi zhin, mo kna fye beda Itnubua.
- ¹⁵Amma shi ko zhin adini bo nu nyi, fye da n fyehin yi, omi anuwan to dna lon.
- ¹⁶Wa ba kunya j n kotu.
- ¹⁷Sai a Yahudiyi ba wan Sostina, ba lu wo shi bmi wo nu bei zhin tukwoda woiwoyi, amma Galiyo to wa gye wa nuwan.
- ¹⁸Shi abo bo ku zo, Bulus wa dna bo anyipyei n mwa begye, wa kpe piya lo Suriya bedo n Biriskila n Akila yi. Bulus wa tukwo wun n Kankiriya ntu ge wo bo la nyasi si. A Yahudiyi knunu nu ba zhin lo nu.
- ¹⁹Shi yi bei si aya lo ba n Afisusu wa fa yi fi n eya wa lo aduwa nyakun wa dabo n a Yahudiyi n bo.
- ²⁰Ba gna wo ge wo la gni nbai, amma esa to bei nyi m.
- ²¹Wa gna dole ma lo mi sun dna Urushelima. Amma wa zhin ba alkawali ge, wo ba je be ndei Shekwoyi waye, ya lo yi nya.
- ²²Ya kpe zhi n jesun aya lo ba n Kaisariya, Wa lo wa bi ikklisiya gna ya kpe duya lo Antakiya.
- ²³Ya ku sun sa fi bo, avun wa laka wa lo Turki njesun, Wa duya n Galatiya bedo n Firijiya yi, Wa zhin ziyara woi bma a Kristi yi zhin, ba mwa dna n Dagayi.
- ²⁴N sayi Apollos bei dna n Afisus, wo bei zhin malami dnagmayi nu Shekwoyi beda nya, Wo bei gmi n Alekzandariya n Masar kni nu.

²⁵N Masar ozado ho ɓo ku Nabari manayi gna wo ntu Yohanna Baptisma zhin yi ɓo, n wo wu-wu yi tu Yesu tukwo, wo to bei n Shekwoyi yekpe yi n du deye m.

²⁶Wa ya wa'azi zhin n kala yi, n iko yi n mwa dna na duwa nyakun wa gna ge, Kristi be lo fye zhin shiri fya gwo wo. Briskilia n Akila yi bai fi bai wo, shi wo bei ku zo ɓa yi wo, ɓa zhin wo bayani ntu Yesu ɓo. Watau wo la be, woi la fi, woi la laka n vingwo, woi la gun lo eshe, woi jeze belo njesun.

²⁷Apollos wa ye ge wa lo Akaya, a Kristi yi ba mi wo gni ge wo lo. 'Ba ka a Kristi yi ge a gwo wo n agmadayi shi wo ɓo si ɓo. Shekwoyi wa zhin apma n woi, wa mi ikklisiya gni.

²⁸Nɓo wa wu a Yahudiyi dna n Shekwoyi beda ge, Yesu nu zhin Kristi n tna shaka.

Atnu-tnuyi Abozhin 19

Agaiciyagayi Nla Zafun Gyi-gyi-yi Gwo

¹Esa nu Apollos ɓo dna cei n Korinti Bulus wa duya n Turki wa lo Afisus wa sun abara hoi ɓo.

²Wa nya ɓa ge? "Fye ɓo la Zafun Gyi-gyi-yi gwo esa nu fye bei ga gaiciya nyi?" Ba gna ge, "Awo." Yi ta kpe Zafun Gyi-gyi-yi ɓo ye lon har ge ya gwo Wo m.

³Wa nya ɓa ge, "Fye ɓo ga kniyi nu gaiciya har a zhin fye batisma?" Ba gna ge, "anya n Yohanna batisma zhinyi ɓo wu nyi."

⁴Bulus wa gna ɓa ge, Yohanna batisma bei zhin nya nu nkwo wu abui ye n laifi. Aza na bei zhin ɓa batisma nyi abo zhin ɓa ntu ge ɓa vi Yesu nu. Aye aza vinya ɓa fa laifi ɓa zan Shekwoyi shin.

⁵Avun a zhin ɓa batisma dna Yesu Kristi ye.

⁶Bulus wa kpe ɓa abwa na tukwo Zafun Gyi-gyi-yi wa shinkpe nba, Nsai-sayi ɓa dabo anyitalayi bai zhin anabci.

⁷Abara yi bei nyi awocei-aba nu.

⁸Avun deye Bulus wa lo aduwa Inyakun cici, woi zhin wa'azi n ikoyi wo bei zhin lo nu n satiyi doho-dohoi har apya ngun-ata. Woi wu ge Yesu nu zhin Kristi.

⁹Amma aza ho ɓa nabo bai da beda nukwoyi tu Yesu tukwo. Wa fa ɓa to wa jeba wa'azi zhi m, ama wa ye a Kristi yi zhin n Tiranus makaranta wa zhin a wa'azi fyegy-fyegy.

¹⁰Wo bei zhin wa'azi ɓo aye ngun-aba, har aza vinya n Turki n Asiya yi ɓa wo Shekwoyi beda, a Yahudiyi bedo, a Helleniyi yi.

- 11**Shekwoyi wa ga Bulus iko wa zhin abo wo-woyi n bo.
- 12**Har owo amisa wunya je, sa nu a ya kwo kpe nyasanyi wa gwo kagna. Aljanu bai kun na za.
- 13**Amma a Yahudiyi a zan-zan yi ho, n ba zan azhi gbo-gbo bai kun aljanu ya, ba zhin tunani ge ba kun aljanu ya dna Yesu eye. Ba gna, “Ma gna fye dna Yesu eye n Bulus zhin wo wa’azi nyi fye kun.”
- 14**Aza deye bei zhin Sisiva abi nu ngun-tnaba wohin bei zhin a Yahudiyi prist nu.
- 15**Shi ba bei tumwi lonu, aljanu da wa gna, mi kpe Yesu yelo, n Bulus yi, amma nyikanu n fyei ya?
- 16**Aljanu da wa she pui ba ngun-aba wa lu ba, ba sakun n nyakun ntna wando fi yi n bahin wuwuyi.
- 17**Nabari ye kwa gnami fi Afisus vinya, a Yahudiyi na Helleniyi bawo, aza ba wo edna n mwa ba la Yesu eye tu.
- 18**Aza n ba bei ga gaiciya nyi ba be, bai da ba laifi duk na zoku shei.
- 19**Ba be nba azoku zhe nya yi, na laya yi, ba kpe ba ena. Atakarda azoku nya nba bo kpe na nyi oba gyewye bei ba sun ngye ₦3,000.
- 20**Deye bo wu ge ba la Shekwoyi bedo gwo n gaiciya yi dna.

Abona-kpaje N Afisus

- 21**Avun Zafun Gyi-gyi-yi wa wu Bulus ge, wo lo Akaya kafin wo lo Urushelima, wa gna dole ma lo Roma.
- 22**Amma wa tnu Timatawus bedo Arastis na bye ba lo Akaya, amma wohin wa ce dna n Turki. Aza n wo bo tnu nyi ba bei zhin owo abmazhin yi nu.
- 23**N sayi wahala kwa laka na Kristi yi n Afisus.
- 24**Pyada ho ai yi wo Dimitiriyus wo nu bei la wahala ka, wa gna apyada je ge ba zhin ashan azurfa nya a Helleniyi shekwoyi Diyana nya.
- 25**Wa yi apyada je wa gna, tnu-tnu nkwo nyi, yi bwa nyagyi nkwonu n agyiwyei.
- 26**N sayi fye kpe lo ge Bulus ku aza bugba wan, har eyi ashan n yi zhin nyi, ato gye balo ngye a shekwoyi nu m, ntu lonu eyi abwaze, ta gyi abye m, kwoi ta to yi nu bwa ya gmanyi m, amma du akni do yi.
- 27**N yi to zhin nyaho n za ye yin, yi ta bwi agyiwyeyi nu nuwan gmanyin, amma du n yi Diyana yi, okwo nu aza ga kwo mwa-mwa nyi vinya, anyi ba ku zamwi, fye ba ye lo nu?

²⁸Shi ƒa bei wo lonu oba minagyi kwa laka, n sai-sayi ƒa ya aku fi ƒa gna, “Diyana Afisus nya zhin nya Dnagmayi nu.”

²⁹Nsai-sayi yi aza yezhi ezhi kwa totu n sunu yi. ƒa wan Gayus ƒedo Aristakus yi ƒa lo ƒai n kwotu, nge ada ƒa wa. ƒa gna aza deye zhin, Bulus atnu-tnu kun-zhin-yi nu.

³⁰Bulus ƒo ye wa lo wo gye ƒa, amma a Kristi yi n Afisus to ƒa yem.

³¹A Romayi dan sanda tukwoda ƒa gna Bulus ge wo to lo m, kada ƒa wu wo. A dan-sanda tukwoda ye bei zhin Bulus anugun-do nu.

³²Aza ƒai ƒowoyi fi n kwotu, ngye anyasin yi, abo ƒa ku gmaje har azaho ma to ƒa kpe dalili nkwo zhin ƒa lo ƒo m.

³³A Yahudiyi ƒa wan Alikzanda ƒa gni wo lo cei na bye. Wa ku abwa wu n she woi ye wa da ƒo.

³⁴Amma shi aza bei kpe ge wo zhin Yahudiyayi zanu ƒa gna aku fi-fi har awa n gun aba. ƒai ci ge, “Diyana Afisus nya, ko zhin nya dnagmayi nu.”

³⁵Ezhi sakatare wa ƒe wa gna aza ge, “fye ku ce pi, fye kpe lo ge Afisus nu zhin adini Diyana nya tukwo, okwo nu nkwo degbe bei kaya ƒe da yi n she,

³⁶Mi gyi fye wye shi fye ku kpe ge ko nu zhin gaiciya n Afisus. Afisus nu zhin adini tukwo njesun ntu diye ƒo fye to gyi minagyi nbei na da nkwo tukwo m, fye to zhin nyaho dna n pye-pye m.

³⁷Gaiciya nu oza n fya ƒe cei nyi, wo to wyi Diyana nyahom, woi to ka kwo mwa-mwa ya m, nyaho to lo nkwo ka Diyana mwa-mwa ya m, ko cewyi.

³⁸“Ndei Dimitiriyus nƒo yi lo n ƒai, sai wa ƒe n kala yi n kwotu, alkali ƒa zo ƒa ƒeda vinya. Amma kwo bmiya fya vi owa.

³⁹Njesun nfyee abo do yi lo n ƒai aba mi a da fi n esu bokun.

⁴⁰Yi wo dna lo ntu ge a Romayi Gmamnati ƒa yi yi ƒa nya yi dalili wahal a nya. Deye to kunce lo, mi ta mi ma ga ƒa dalili m.”

⁴¹Shi wo ƒo zo da lonu, wa ku aza gnami vinya.

Atnu-tnuyi Aƒozhin 20

¹Shi abei ku abo wan zhi Bulus wa zhin wa’azi amigna nya wa kpe Akaya lo.

²Bulus bei zhin wa’azi lo cei na zhi yakwo woi lo Akaya.

³Wo bei dna Akaya har apya atnu, woi zhin shiri ge wa lo Suriya, a gna wo ge a Yahudiyi ye lo ƒa wu wo. Ntu ce nu wa lo Makidoniya.

⁴Sopata, Pihas nugun Biriya yi za, Aristakus n Sekundus a Tasalunikayi Gayus n wo gmi n Darba nyi. Timatawus n Tikikus yi bedo n Tirofimus yi aza ye vinya ba gni lo n Bulus yi ba lo Turki.

⁵Aza deye bo ku lo ba pmi yi zhi n Turowas.

⁶Shi Paska bo ku zo, ya lo eya n Filibi ya bwa anyi-pyei ngun atnu, ya kpe Turowas si. Ya fi bo har mako gmanyi.

Binuyi La Kaya Woi La Fi

⁷N Lahadi wyi a Kristiyi ba ye zhi ba gyi Dagayi tebur. Bulus wa zhin wa'azi n mwa kpa har sadu ntu ge efye ba gyi wa laka.

⁸Ena bei nyi n buzangna yi dai-dai n nyakun she n yi bei fi nyi.

⁹Shi Bulus bo gni woi dabo Utikus woi tu woi wan gye, wa kaya n nyakun she tahi wa fi.

¹⁰Bulus wa shin lo wa la wo shi, wa gna aza ge fye to damun wo wye-wyei lo, a da aza.

¹¹Ba jeze lo ba gyi abye n Dagayi tebur gyi yi. Bulus wa gyi abye n bedai har nya knaya. N labmi yi ba gna aje ammi.

¹²Sa fyewyi ba be n Samariyi nwey-wyei, a da aza n mwa.

¹³Bulus wa zan-zan wa lo Asos, ama yi da ya lo eya ya ku si nwa bye.

¹⁴Shi yi bo sun na jei bo, ya knu eya lo ya lo Mitilini.

¹⁵Shi efye bo gyi ya si Kos, nyipyeyi do ya si Samos ya be har Melitus.

Bulus Beda Amigna Nya Nafisus

¹⁶Nsa deye Bulus to bo ye ge wa kpe gni Afisus m, Wa lo Urushelima cewo ntu Paska bo.

¹⁷Shi yi bo si Melitus, Bulus wa tnu Afisus atukwoda bo, ba she gun yi n nuwan gbe.

¹⁸Shi ba bei be wa gna bage, "Fye kpe lo ge tunyi nyipyeyi kmisunyi n mi bei be Turki har sayi.

¹⁹Mi ku Dagayi tnu-tnu zhin ntukwo gba yi, saho ma ci bwi, mi-i sun wahala. A Yahudiyi ye cici ge ba wu mi.

²⁰"Amma mi to fa fye gaiciya gna bo m. Mi ku gaiciya gna fye naza bye har ma dna n fye a puwa.

²¹Nabari gmanyi nu n mi cei ntu a Yahudiyi bo bedo abye do yi, nabari ho ko nu nyi ge aza ba fa laifi ba be Shekwoyi aba. Tile zaho-zahoi wa ga Yesu gaiciya.

²²“N sayi mi lo Urushelima nu, ntu ge Zafun Gyi-gyi-yi na gna mi ge mi lo. Amma mita kpe nya ye lo nkwo bo zhin mi bo m.

²³Amma Zafun Gyi-gyi-yi ku gna mi ge wahala lo na bye.

²⁴Omi wye-wyei zhin gbeloyi nu sai dai ma zhin a pma n kwoi, ma zhin tnu-tnu n Shekwoyi ga mi nyi. Emi tnu-tnu nu ge ma gna azaje Shekwoyi yeye bo, nwo alheri yi.

²⁵“Mi kpe lo ge zaho-zahoi nfye mi, ta je mi wye gye m.

²⁶Gaiciya nu n mi da zaho-zahoi ami ta tu n min.

²⁷“Ntu ge mi to so Shekwoyi beda m, mi-i ku kwo gna zaho-zahoyi.

²⁸Suku-suku, fye kpa akni Shekwoyi nya wato owo ikklisiya nwa si n wo ami yi nyi, Zafun Gyi-gyi-yi na kni fye fya ze abo wyednayi.

²⁹Mi kpe lo ge shi mi fa fye a malami a nukwoyi ba gna fye gna-gna, ba zhin a cam-cam nu.

³⁰Azaho ma nfye mi ba ba shan gaiciya do, ntu ge ba gni aza ga bahin.

³¹Fye dnawye fya pa ngye shi ma gye ma nuwan n fyei esa nu ma sase n fya ba, har aye ngun ata. Saho ma cibwi ntu fye bo.

³²N sayi ma fa fye n Shekwoyi akun n wo beda yi, n kwo iko yi kwa mi fye gaiciya ga, wa ga fye gado anabarka nwo cei zhin shiri a owo aza nyi.

³³Mi to shin agyiwyee san gyi ko aje manayi m.

³⁴“Fye kpe lo n gye shi ma zhin tnu-tnu n ma bwai, ntu mi bukata bo bedo n ma tnu-tnu kun-zhin-yi yi.

³⁵Mi la ze gurbi nfye aba ntu ge ma ku bma awyekwoi zhin. Ma zhin lonu ntu ge mi pa Yesu Kristi beda bo n wa da ge, ‘Nyaga du gwo-gwo n anabarka.’”

³⁶Shi wo bei ku beda zo wa ca-kwo-kwo wa zhin aduwa n bai.

³⁷Ba cibwi n kala yi ba gna je ami.

³⁸Ba bo zhin bugba zhi-zhiyi, ntu ge wo bei gna ge ba ta je wo wye gye m. Ba kun lo n woi har eya aba.

Atnu-tnuyi Abozhin 21

Bulus Zan Kmaknayi Lo Urushelima

¹Shi yi bei ku aje gna mi, na Afisus yi a tukwoda yi, ya lo eya ya lo Kos Efyia gyi ya si Roda ya du ya lo Patara.

²N Patara ya lo eya kwoi lo Fonishiya n Suriya 'kni.

- ³Ya duya ya gye Saipurus, amma yi to bei kpe zhi ɓo m, sai n Tayar dna n Suriya kni, n ɓo nu eya bei lo na kaya yi.
- ⁴Ya kun ya lo ya sun a Kristi yi ya fi n ɓai har mako gmanyi. Shekwoyi wa daɓo n Bulus yi n ɓa gbe ge wo to lo Urushelima m.
- ⁵Shi Lahadi bei wu vi ya jeze lo eya aba n gnisun a Kristi yi nba anyikwo yi n ɓa abi yi. N nuwan gbe eyi vinya ya kniakwokwo ya zhin aduwa.
- ⁶Yaku ka, ɓahin ɓa jeze lo api.
- ⁷Shi yi ɓo ku a Kristi yi ɓi gna n Tayar, ya lo Pitolemi, ya kpe zhi ɓo n nyipyei yi gmanyi, ya ɓi a Kristi yi gna.
- ⁸Ya ku ka ɓo, ya lo Kaisariya, ya lo Filibbus puwa wa'azi zhinyi nu n woi, wo zhin gmanyi nu dna aza, tnaba abei kni ntu nyagyi gna ɓo nyi.
- ⁹Wo bei anyigun yi ngun-anyi ɓa bei zhin anabi nu.
- ¹⁰Sa yi ɓo fi ɓo, Agabus wa gmi n Yahudiya wa ɓe, wo bei n nyaga anabci nya yi.
- ¹¹Shi wo bei ɓe yi amisa, wa ku Bulus belti, wa pa wohin apita na bwa yi, wa gna, "Zafun Gyi-gyi-yi wa gna ge elo nu aba zhin n belti dagayi yi a Yahudiyi ɓa pa wo n Urushelima ɓa ga wo dna a Romayi akun."
- ¹²Shi yi ɓo wo lonu a Kristi yi n Kaisariya n yi gnisun n woi nyi, ya gna wo ge wo to lo Urushelima m.
- ¹³Amma wagna ge, "Kni nu zhin fyei ci bwi a? Fye bma mi bugba ya nu. Mi n shiri zhin lo to ge ma lo kurkuku n Urushelima gmanyi m, amma ma fi ntu Dagayi Yesu Kristi ɓo."
- ¹⁴Shi yi to ɓo mi n wo ɓo m, ya ku yi nya fa wa gna, "Shekwoyi ɓeye kwo ze lo nu."
- ¹⁵Ya kuka ya ku eyi a kaya ya lo Urushelima.
- ¹⁶A Kristi yi n Kaisariya fyewyi ɓa kun lo n yi har Urushelima, shi yi ɓo si ya lo Manason puwa Saipuriyi za, Kristi yi kmisunyi nu ɓei n woi.
- ¹⁷A Yesu viyi vinya ɓa gwo yi na gmada yi.
- ¹⁸Efya gyi Bulus wa ku yi wa lo cei n Yakubu aba ɓedo ikklisiya; atukwoda yi n Urushelima, ya yezhi n ɓai.
- ¹⁹Shi yi ɓo ku aje ɓi gna Bulus wa gna ɓa anya vinya n Shekwoyi ku zhin n ya ba n abye do a tantasin.
- ²⁰A da ɓa vinya ɓai ci Shekwoyi, ɓa gna omazado a Yahudiyi lo n mwa nba ku gaiciya ga, amma ɓa zhi ge har sayi a shi owa bwa na kunnu yi.

21A Yahudiyi a Kristi yi n ya ba ku wo ge ho zhin gaba lo n Musa owa yi na Yahudiyi kunnu yi, hoi gna ge a to zhin abi kaciya m.

22Yi ba zhin wunna? Ntu ge ba ba wo ge ho dna lo n ya.

23Yi ku kpe nya yi ba zhin, Aza lo n ya ngun-anyi nba ku shiri zhin ba wun tukwo ba zhin alkawali.

24Kun lo n bai a wun fye tukwo aduwa nyakun. Nha zhin lonu zaho-zahoi ba kpe ge ho ye lo na Yahudiyi kun-nu yi.

25Amma yi ta gna abye do lo, n ba vi Yesu nyi ge ba zhin kunnu ye m. Yi gna ge ba vi abo n yi bei ka fi ba n wasika nyi nu. To ba zhin anagbayin.

26Shi wo bei wo lonu, wa ye wa vi ba shaula wa lo aduwa nyakun wa ku kunnu.

27Ba ga sakirifais har anyipyei tnaba, nyipyei tnaba Yi a Yahudiyi ho a. Turkiyi, ba be Urushelima ba gye wo dna aduwa nyakun. Ba zhin aza ba la rigima ka n Bulus yi.

28Ba wan wo bai bo wyi bai gna A Israilayi fye yewu. Oza i nyi n wo zhin wa'azi gaba n yi, woi gna aza ge ba to shi a Yahudiyi owa n. Har ma woi tu aduwa nyakun cegye, woi lo be abyedo yi.

29Ba bo da lonu ntu ge, ba bo ku gye Bulus n Kunsun n Tirafimus yi. Wo bo zhin ebyedo nu, woi gmi Afisus n Turki 'kni. Ba gye ngye Bulus la lo be n woi nu na duwa nyakun.

30Ezhi vinya kwa ku wo bo na da tu Bulus tukwo. Ba gmi wo ya na duwa nyakun ba ku aba gu.

31Bai ye ba wu wo, amma a soja tukwoda wa wo sunu n zhi mi.

32N sai-sai yi wa tnu a soja yi ba lo rigima aba. Shi a Yahudiyi bo gye asoja bai be ba ku fa Bulus lu bo.

33Soja tukwoda wa Bulus wan, wa wo pa agmayi, wa nya a Yahudiyi bo enya n Bulus zhin.

34Ba je kala ku na beda yi ngye azhi n gnikwo. Amma to wa bwa bo kpalayi m, wa gna a soja ge ba lo n Bulus yi nba barki.

35A Yahudiyi ba vi lo ba zhin atna ge ba wu Bulus, amma a soja ba wo la tu agbe-gbegye ntu ge ba gni wo.

36Bai bowyi, bai gna a lo woi, a lo woi.

37Ai ye a lo dna n Bulus yi n nyakun, wa gna soja tukwoda ge, suku mi ye ma dabo. Soja tukwoda wa nya wo ge, "Wo wo Helleni lo?"

38Oho nu to zhin Masar za n wo bo la wahala ka aye fyewyi n ba duya nyi har haku aza wuyi 4,000 ha lo bai n zhabui m.

³⁹Bulus wa gna awo. Mi zhin Yahudiyayi nu mi gmi n Tarusus nu, n Silisiya kni. Mi ba ho ha ye ge ma daɓo na za deye yi.

Bulus Kna Aza Wyeya Tu Nwo Tnu-Tnu Bo

⁴⁰Soja tukwoda wa esa ga wo, Bulus wa tu n nyakun she bayi, wa gna za ba ce pi wa da abeda ye n Ibrahim bye yi.

Atnu-tnuyi Abozhin 22

¹Omi azaje n na dada yi fye wo mi be da.

²Shi ba bo wo woi daɓo n Ibrahim bye yi, ba ku gna cece pi.

³Mi zhin Yahudiya yi nu, a ma mi n Tarsus Silisiya kni. Ma zhin makaranta n ya nu n Urushelima. Galnaliyo nu bei zhin mi Malami, wawu mi shi mi ba shi a Yahudiyi owa bwa na kunnu yi, mi bei zhin mi yi la Shekwoyi tu cici, ngye shi fye zhin n naiye nyi.

⁴Ma ga ikklisiya wahala mi wan a Kristi yi anugbayi na nyikwoyi ma gu ba fi n kurkuku.

⁵Piristi dnagmayi kwo na shaula zhinyi, wo ba ci mi seda ge mi da gaiciya nu. Ntu ge n ba aba nu n mi bo zhin ma gwo takarda izni nya, ntu ge ma lo Dimashika ma wan a Kristi yi be cei n Urushelima ntu tata bo.

⁶N wyihoi mi lo Dimashika buzangna dnagmayi nshe kwa knaya she mi gun, kwo bo zhin n nyipyei bwai nu vivi n Dimashika yi.

⁷Nsai-sa yi ma miya shi n kni, ma wo begye kwoi gna, “Shawulu, Shawulu kniyi nu zhin hoi ga mi wahala?”

⁸Ma nya ge, nkanu daɓo mi ya, Shekwoyi mwasa hoi, Wa gna “Omi nu Yesu Nazaratiyi n ho ga wo wahala nyi.”

⁹Aza nba bei gnisun n mi nyi ba gye buzangna, amma to ba gane n bei na da m.

¹⁰Ma nya ge, “Dagayi nba zhin wuna?” Dagayi wa gna mi, “Laka ha lo Dimashika aɓo wu ho bo nho ba zhin na bye deye.”

¹¹Buzangnanyi bo ku awye bua mi, ashu mi busi bwa shishi nu ma lo Dimashika.

¹²Hananiya bei zhin Shekwoyi za nu woi vi a Yahudiyi o wa, bai kpe wo ye vinya n Dimashika ntu wo hali manayi bo.

¹³Oza ye wa be mi aba wa gni vivi n mi, Yi wa gna, “Omizado Shawulu. Gwo wyeba gye,” n sai-sayi ma mi ma gye wo wye n anya yi nba bo she mi gun nyi.

¹⁴Wa gna mi ge, Shekwoyi eyi dada nya n la ho kni, ha kpe wo bemwi ye, ha gye Masihu ha wo wo beda.

- ¹⁵Ho ƙa da owo nabari aba vinya. Ho ƙa da enya n ha wo n nya yi nha gye.
- ¹⁶Kniyi nu ƙa zhin ha zhin kalala? Laka azhin ho batizma a zhan ho alaifi ya, ha yi Shekwoyi.
- ¹⁷N wyihoi mi dna aduwa nyakun mi-i zhin aduwa ma nu ena.
- ¹⁸Ma gye Shekwoyi woi gna mi ge, Laka ha fa Urushelima ntu ge aza ta kna ho beda tnubua n ya m.
- ¹⁹Ma gna ge, Dagayi ƙa kpe lo vinya ge ma ku oho a viyi ga wahala, mi yi fi ƙa n kurkuku.
- ²⁰Sa aƙo wu Istifanus cei nyi mi bei gni, mi nu ƙo go aje n aza ƙo kma zhin, ƙa kpe wo akuta kni nyi.
- ²¹Amma Shekwoyi wa gna ge, “Fa Urushelima gama mi ye ma tnu ho n kpai nu abye do aba.”
- ²²Shi Bulus ƙo sa abyedo ye, ƙa je kala ku n wyiƙoyi n kala yi ngye anya-cei. Bai gna, alo woi, a wu wo, ko to kunce lo oza deye wa bwa wye-wyei m.
- ²³Ba gyi abye n wyiƙo yi, bai she aje ya gun she, bai she amwi ya laba.
- ²⁴A soja tukwoda walo dna n Bulus yi n nyakun, wa gna soja ho ge wo lu wo ntu ge wa da wo alaifi. Wo ƙo zhin lonu ntu ge wa kpe dalili nkwo zhin a Yahudiyi ƙa zhin aƙo ngye anyacei.
- ²⁵Shi ƙa ƙo la wo pa ge ƙa lu wo, Bulus wa nya soja yi ge, kwo wu lo dai-dai a lu Romayi za to ai da wo owan?
- ²⁶Shi wo ƙo nya wo lonu, wa laka wa lo asoja tukwoda aba, wa nya wo ge kni yi nu ho zhin a? Gye oza deye zhin Romayi nu.
- ²⁷Soja tukwoda wa lo wa nya Bulus ƙo, “Gna mi, ho zhin Romayi za nu?” Bulus wa gna mi zhin kwo nu.
- ²⁸A soja tukwoda wa ci ge kafin mi zhin Romayi za miƙo ku agyiwyewu n mwa. Amma Bulus wa gna wo ge mi da to sisi nu m, a ma mi mama nu n zhin Romayi za.
- ²⁹A soja n ƙa ƙo ye ƙa lu wo nyi, shi ƙa ƙo wo ge wo zhin Romayi nu, ƙa busi. A soja tukwoda n wohin wa wo dna ntu ge wo ku gna a soja ge ƙa pa wo ƙa lu wo.

Bulus Gni Nna Shaula Zhinyi Abye

- ³⁰Efyagyi a soja tukwoda wa wo loya wayi a prist dnagmayi ƙa yezhi, wa ƙe n Bulus yi n ƙa bye ntu ge wa wo dalili nkwo zhin ƙa lagyi-kici ka dna n zhimi.

Atnu-tnuyi Abozhin 23

- ¹Shi Bulus bo gni a shaula zhinyi abye wa gna, Omi azaje, mi ku zan-zan n Shekwoyi abye cici n bugba manayi yi.
- ²Nwo beda zun-zunyai Hannaniya prist dnagmayi wa gna zaho ge wo lu Bulus ngbe.
- ³Bulus wa gna ge Shekwoyi ba ce hohim pmi, oho nyakunpa bui-bui, kni alkali yi pya nu tu, to woi vi owan woi gna za ge wo ce mi pmi a?
- ⁴Aza nba bei zhi vivi n Bulus yi ba gna wo ge, bedanu n ho da n Shekwoyi piristi dnagmayi?
- ⁵Bulus wa gna, mi ta kpe lo ge wo nu zhin pirist dnagmayi m, ntu ge Shekwoyi beda gna ge to da beda nukwoyi tu n fye abegiyi tukwo m.
- ⁶Amma shi Bulus bo kpe ge a Sadukiya bei fi bo bedo Afarisiya wa gna, omi azaje mi zhin Farisiya nu emi azakwoi vinya bei zhin Afarisiya nu Mihin kwa a da mi owa ntu ge mi gaiciya ga ge efi kalaku lo nu.
- ⁷Shi wo bei da lonu aza yezhi, ba gnaj e ngun aba a Sadukiya na Farisiya.
- ⁸Ntu ge a Sadukiya gna ge efi kalaku to nyi m, amalaika to nyi m, Zafun nyalo-nyalo nya to nyi m, amma a Farisiya n gaiciya ga na beye vinya.
- ⁹Abo ba ku gmaje na shaula zhin ba. A Yahudiyi abye da bai gna ba to gye Bulus laifi m, Ba nabo najei. Ba gna kpesun Zafun ko malaika nu bei dabo n Bulus yi n Dimashika zokwo.
- ¹⁰Bai bowyi n kala yi, aza ku she Bulus gnu bai gni wo laba. Safyewyi a soja tukwoda wa gna asoja ge ba la Bulus lo cei n ba barki woi gye ngye a Yahudiyi ba wu wo.
- ¹¹Nsukwoyi Dagayi wa dabo n Bulus yi wa gna wo ge to damun, ngye shi ho ku mi seda zhin n Urushelima aza abye nyi elonu ho ba zhin n Roma.
- ¹²⁻¹³ N labmi yi aza bei du shinyi (40) nba bei la nyasi si ge ba ta gyi nyagyi kwo ba sin nuwan, sai ba la Bulus wu.
- ¹⁴Ba lo ba ku gna a Pristi dnagmayi na byeda yi enya ba ye ba zhin.
- ¹⁵“Fye lo fye gna asoja tukwoda” nji a prist bedo abye da yi “wa be n Bulus yi njesun a shaula zhin ba, shi a be n woi, ya wu wo n zokwo.”
- ¹⁶Amma Bulus zhalu wa ku wo, wa lo wa ku gna Bulus na soja barki.
- ¹⁷Bulus wa yi soja dnagmayi ho wa gna wo ge, “Lo n bi ye yi ngye tukwoda aba wo bo kpakala yi lo wa gna wo.”
- ¹⁸Soja yi wa lo woi wa gna, Bulus na gna ge mi be nbi ye yi nho aba, nge wo nbei lo wa gna ho.

- 19**A soja tukwoda wa la bihi wa gni n woi n gna-gna wa nya wo ge, Ho ye ha gna mi kni bo yi nu a?
- 20**Bihin wa gna nsu a Yahudiyi bei gna ho ge ho be n Bulus yi na Shaula zhin ba njesun.
- 21**Amma to bei ye m. Aza lo n du shinyi n bwi fi n gbe-gbe ge, shi abe nwoi ba wu wo n zokwo. Ba ta sin nuwan kwo ba gyi nyagyi m, sai ba la Bulus wu. Ba cei kma lo ba be ba nya ho.
- 22**A soja tukwoda wa gna obihi n ge to gna zaho-zahoi ge ho ku beye gna mi m.
- 23**Sai a soja tukwoda wa yi asoja dnagmayi aje wa gna ba ge, Ifye zhin shiri na soja yi 200 ba lo Kaisariya nsukwoyi naiye. Fye ku amashi da 200 a dokwo da yi 70.
- 24**Fya ga Bulus dokwo wa tu fya lo woi n Gwmna Fileks aba.
- 25**Wa ku wasika ka ga Feliks wa gna.
- 26**Wasikaye gmi n Klaudiyus Lisiyas aba nu kwoi be Gwamna Feliks aba Shekwo mwasa hoi, gnabi be ho aba.
- 27**Oza deye a Yahudiyi na wan wo bai ye ba wu wo, amma ma tnu na soja yi ba gwo wo nba kun ntu ge nbo ku wo ge wo zhin Roma yi nu.
- 28**Ma la wo ma lo cei nba shaula zhinba, ntu ge ma wo laifi n wa zhin.
- 29**Ma gye ko zhin oba a Yahudiyi adini bo nu n na kunnu yi. Behin-hin be ho to lo nkwo ba zhin adna wo n kurkuku m.
- 30**Amma shi ma wo ge ba ku shiri zhin ba wu wo, ce na zhin mi tnu n woi n ho aba. Mi ku gna owo akala zhinyi ge ba be n wo alaifi yi nho abye. Aku zo.
- 31**A soja ba la Bulus n sukwoyi ba lo woi n Antipata.
- 32**N Labmi yi a soja ba jeze be ba barki ba fa Bulus na dokwo da yi, ba lo woi n Kaisariya.
- 33**Shi ba bei si Kaisariya ba wasika ga Gwamna, ba wu wo Bulus njesun.
- 34**Shi wo bo la wasika ba wa nya Bulus aba n wo gmi, Bulus wa gna mi gmi n Silisiya nu.
- 35**Gwamna wa gna wo ge n bei wo ho beda, esa nho akala gayi bei ku be. Gwamna wa gna asoja ge ba la wo dna n kurkuku n Hirudus galukwo.

Atnu-tnuyi Abozhin 24

Bulus Gni Nna Romayi Ikoda Abye

- ¹A bwa anyipyei ngun-atnu Hananiya bedo a yahudiyi abyeda yi n Tetullus yi ba lo I Kaisariya. Ba be ntu ge ba da Bulus alaifi. Hananiya nu bei zhin prist dnagmayi, Tetullus Bei zhin loya nu.
- ²Shi Gwamna bo yi Tetullus ge wa da Bulus alaifi wa gna, “Shekwo mwasa, eyi a Yahudiyi yi kpe lo ge ho la salama, n loloya yi ga yi n ho kni.
- ³“Ntu deye bo a da yi lo n mwa.
- ⁴Yi ta ye ya wun ho sa ya m, amma yi ba ye ha wo yi, nba da anya n ba gna yi gna-gna n Bulus yi.
- ⁵Wahala gayi nu n woi, wo ku zhin a Yahudiyi vinya bai la gyikici ka, bai zhin gaba na Romayi gwamnati yi. Wo nu zhin a Kristi yi tukwoda.
- ⁶Wo bo zhin atna wa tu aduwa nyakun cegye ya wan wo. Yi bo ye ya da wo owa bisa ga eyi adini.
- ⁷“Amma Lisiyas asoja tukwoda wa wo gwo n ya kun na kala yi.
- ⁸Wa gna aba da Bulus owa bisa ga a Romayi wyidna Ho ba wo gaiciya n wohin aba.”
- ⁹A Yahudiyi vinya ba fi aku, ba gna, enya n Tetullus ku da nyi gaiciya nu.
- ¹⁰Kwa si Bulus sa, Gwamna wa gna wo ge wo laka wa daɓo. Bulus wa gna, “Shekwo mwasa hoi mi kpe lo ge ho la mwasa hoi da a Yahudiyi owa aye yi mwa begye, ada mi lo.
- ¹¹“Nya mi ye ma da nyi kwo ba wu ho ge, ma lo Urushelima ntu mwa-mwa ga bo nu, anyipyei awo-cei-aba nba duya nyi.
- ¹²Ho ba gye njesun ge, mi to shin gyikici kala la ko aduwa nyakun, ko ezhi dohodohoyi m.
- ¹³Aza deye ta mi ba ga seda, ntu anya bo n ba da ge ma zhin nyi m.
- ¹⁴“Enya mi zhin wa’azi tu ko cici okwonu zhin gni gni zokwo. Okwo nu n ba gna wuwu nukwoyi. Mi zhin ma zhin Shekwoyi bauta shi eyi a zakwoyi zhin. Mi gaiciya yi ga a Yahudiyi owa, na nyai vinya n ba kafi anabi a littafi nyi.
- ¹⁵Mi gaiciya yi ga n efi kalaku n vingwo, a befye-cei bedo aza nukwoyi, bahin lo nu ce.
- ¹⁶Ntu aɓo deye bo mi zhin atna n mi akala yi vinya, ma zhin bo ko bmiya n Shekwoyi abye, na za yi.
- ¹⁷“Mi bo la gmiya na ye yi mwa begye, ma je ze be Urushelima na gyiweyi shi ma bma a Yahudiyi zhin, ma zhin sakirifais ga Shekwoyi.

¹⁸Aza deye bo gye ml na sakirifais zhin ba nu. Mi la tukwo wun shi owa da. Zahozahoi to bei gni n ma ba m gyikici to bo nyi m, amma a Yahudiyi ho a Turki bei zhi bo.

¹⁹A Yahudiyi ye, bei gna ba zhi lo n ya, bo da laifi n ma zhin.

²⁰“Aza deye bo sun mi, mi yi zhin kni be nukwoyi nu’a?”

²¹Enya Pi gmanyi nu n mikpe lo, n mi bei da na wada ba ge, ‘Mi gni ai da mi owa ntu efi kalaku bo nu n vingwo.’”

²²Fileks kpe lo ge a Kristi yi ta la gyikici ka m, ntu ce nu wa gna Yahudiyi ge ba ku pmi sai Lisiyas la e kafin wo zo beda.

²³Wa gna a je ze lo n Bulus yi n kurkuku, amma a gye ba nuwan n woi daidai, a fa owo anugundo ba be wo aba ba gye wo, ba ga wo anya ntu ge wa bwa agmada.

²⁴Anyipyeyi fyewyi avun Feliks wa be n Dirasilayi owo nyikwo, wo bei zhin Yahudiyi za nu. Ba tnu Bulus bo ntu ge wa gna ba Yesu beda.

²⁵Wa dafo nbai tu efyece bo, n bemanayi zhin yi, n wa da yi nkwo bo lo nyi. Feliks wa wo dna shi wo bo wo abeye. Wa gna Bulus ge, “Lo kpa nba je ho yi mi la esa bwa.”

²⁶Wa gye ngye Bulus ba ga wo toshi, ntu ce nu wa tnu wo bo cici woi dafo n woi.

²⁷Wa gyi abye woi yi Bulus nasasayi, har aye ngun-aba. Amma Bulus to bei gawo toshi m, Avun a shan Feliks do, abe n Posho Festus yi. Feliks woi ye ge a Yahudiyi ba bwa agmada n woi, wa Bulus fa dna n kurkuku.

Atnu-tnuyi Abozhin 25

¹A nyipyeyi ngu ata shi Festos bei be Kaisariya wa lo Urushelima. Wo bei be Kaisariya ntu ge wa la Feliks tnu-tnu nu wato Gwamna eknihi nya nu.

²A Urushelima yi atukwoda ba gye wo nbo, ba gna wo Bulus beda vinya.

³Ba gyiwo wye ntuge wa be n Bulus yi n Urushelima, ba bei ye ba wu wo nu.

⁴Amma Festos wa ci ba ge, “Bulus lu Kaisariya du woi bei gni woi lo bo nu nwohin

⁵Ntu cenu aza n ba kpe beye ye lo ba be Kaisariya n bahin nabai a dawa nbwai.”

A Ya Bulus Wada

⁶Shi anyipyeyi ngu awo bei ku si, wa jeze lo Kaisariya. Efyay gyi wa ya Bulus wa da.

⁷Shi Bulus bei lo dna n kotu a Yahudiyi nba bei kun n Urushelima nyi, ba ku yezhi, bai da owo alaifi bo n tna asaida.

⁸Bulus wa na abo, wa gna, “Mi to n laifi yi lo m, ntu ge mi to zun Ayahudiyi awyidna gna m, ko ma da benukwoyi tu aduwanyakun tukwo m, ko ma zhin gaba n Roma yi gwanmati yi m.”

⁹Festus woi ye owo bo kwa da Ayahudiyi wa nya wo ge, “Ho ba ye halo Urushelima, mi da ho owa n bwai?”

¹⁰⁻¹¹ Ama Bulus wa ye wa gna, “awo, mi ba ye Esu Roma nya wa wo mi. Ho kpe lo ge mi to n laifi yi lo m. Ndei mi ku laifi zhin nkwo kunce lo n fi yi, mi ta nabo lo ge ma fi m, ama ndei mi zhin oza kni-kniyi nu, ozaho to iko yi lo wa dna mi n aza deye akun ntu ge ba wu min. Nba ye ma lo Kaisar aba.”

¹²Festus wa zhin shaula nwo shaula gayi, wa gna, abmiya lo la ye ge ha lo Kaisar aba, Kaisar aba nu n ho ba lo!

¹³Anyipyeyi ho fyewyi ba duya, Esu Agarippa n Banis yi ba be Festus gnabi.

¹⁴Dna anyipyeyi n ba bei fi bo nyi, Festus wa zhin shaula tu n Bulus tukwo n 'su yi wa gna wo ge, “Za-wan-wan ho dna lo n ya n Feliks bei ya wo beda shi ge ma da.

¹⁵Esa nu mi bei dna n Urushelima a malami adnagmayi beda Ayadudiyi abyeda yi, ba ku ba lafiya wu mi har ba gna mi ge mi la wo wu.

¹⁶Ma ku wu ba ge a Romayi owa ta zun oza kni to ai da wo owan, a zhin a esa ga wo ba da bo n za yi nbo nbai dna a je yi.

¹⁷“Shi ba bo be ya, efye kwa gyi, a beda kun zhi, ma be n Bulus yi.

¹⁸Ama ma wo abeda n ba bo da tu nwo tukwo nyi, to ma gye abo nu n mi bei cei mwi m.

¹⁹Obo nyi tu nba kunnu tukwo nu, oza ho ge a yi wo ge Yesu, wa fi, amma Bulus wa gyi tu ge wo n wye-wyeyi lo.

²⁰Ma ku jeje ngye shi mi ba zun beda ye ya, ma nya wo kwo wo ba ye a da wo owa tu abeye tukwo n Urushelima.

²¹Ama Bulus wa gna ge, wo ba ye wa lo n beda yi n Kaisar aba. Shi wo bo da lonu, ma gna ge a lo n woi, o la wo je gu, har ma zhin shiri ma tnu n woi n Esu dnagmayi aba.”

²²Agaribas wa gna ge, nba ye ma wo wo beda n mihin. Festus wa gna wo ge, Ho bei wo wo nsu.

²³Shi efye bo gyi, esu bedo n Barniki yi ba be kwotu nba mwa-mwa bedo asoja atukwo da yi, n aza adnagmayi ezhi hi Festus wa gna ge a be n Bulus yi.

²⁴Festus wa da ɓo na za yi wa gna, “Esu Agaribas ɓedo aza yi vinya, Ayahudiyi n ɓa 'ya ɓedo aza yi n ɓa lo n Urushelima, ɓa ce pma ge awu oza deye.

²⁵Amma n mi wyegye, wo to zhin nyaho nkwo kunce awu wom. Dudu lonu wo ku na ge wo ɓa lo nɓeda yi n Kaisar aba, omihin mi to nɓodo yi lo nmi ɓa zhin m, sai ma tnu woi.

²⁶Ama mba ka knibeyi ma ga Esu dnagmayi hi a? Ntu ge mi to gye wo laifi, na gna ge wa zhin m, cenu a zhin mi ɓe nwo yi n fye abye vinya, Oho Esu Agaribas ha mwi wo, ha wu mi nya mi ɓa ka.

²⁷Ntu ge kwo ta wu mi lo dei-dei ma tnu n za wan-wan yi n Esu dnagmayi abantna ɓo tukwo m.”

Atnu-tnuyi Abozhin 26

Bulus Wa Kna Wohin

¹Agaribas wa gna Bulus ge, “Gya bye ha gna yi ho ɓeda.” Bulus wa wu obwa, wa ya ɓeda da.

²Wa gna, mi gye mihin tukwo Esu Agaribas nzhin arzikida nu, shi mi ye ma da mihin ɓeda nho abye.

³Ntu gemi kpe lo ge, ho zhin oza nu, n wo kpe Ayahudiyi owa ye ɓedo n ɓa akunnu yi. Nsai mi gyi ho wye ha kna tɓubua.

⁴“Ayahudiyi kpe lo sarai ge ma ku makaranta Ayahudiyi nya zhin dna Tarsus, avun ma ɓe Urushelima ma ku aɓo zhin dei-dei.

⁵Ba ɓei ɓa ye ɓa da, ɓa kpe lo ge mi zhin Farisiyi nu nwo ta ye ge afua wye n Ayahudiyi owa yi ɓedo nɓa akunnu yi m.

⁶Ama dalili nkwo zhin ɓai ga mi laifi nyi kwo lo gbo, ɓa ga mi laifi ge mi na wyetu yi ntu alkawali nu ɓo n Shekwoyi ɓo zhin ga eyi azakwoyi nyi.

⁷A Israilayi abye ngun awo-cei-aba, ɓa zhin atna nyipyei n sukwoyi ge ɓa gye alkawali ye nunu nɓa 'sa, ama nsai ɓa la mi ze laifi da.

⁸Kwo zhin laifi nu ge oza wa ga gaiciya ge efi kala ku lo? Kwo to zhin gaiciya nu ge Shekwoyi n iko yi lo wa je za wye-wyei gan?

⁹“N ɓei zhin mi gye ngye kwo bmiya lo ma ga aza wahala n ɓa vi Yesu nyi.

¹⁰Nɓo ku aza fi n kurkuku n mwa begye n Urushelima, n iko amalami dnagmayi nya yi, esa nɓa da aza owa ofi nya, kwa da mi har ma ye nɓei nɓa zhin nyi.”

¹¹Mi ɓei zhin ma ga a Yesu viyi wahala abaho-baho yi, mi ye ge ɓa na Yesu aɓo. Mi ɓei pyena nɓayi, mi zan ɓa shin azhi yakwo, akniyi gbo-gbo.

12-13 “N wiyihoi mi lo ba zanshi n Dimashika, mi la izni gwo n malami, dnagmayi, n nyipyeyi na tukwo, buzangna dnagmayi ndu nyipyeyi nya, kwa bmiya fi yi bedo aza yi nba bo gnisun n mi yi.

14Eyi vinya ya miya zhi nkni, ma wo begye kwoi dabo n mi yi n Ibraniyi bye yi, kwoi gna Shawulu, Shawulu kniyi nu zhin hoi ga mi wahala? Ho ga hohin nu wahala.

15“Ma nya ge, ‘nkanu hoi ya?’ Dagayi wa ye ga gna, ‘Omi nu Yesu n ho ga wo wahala nyi.

16Laka! Ntu ge mi la ho kni ha ze mi fyenu n mi saida da yi, ce na zhin mi wu mihin tukwo n ho aba. Ho ba gna anyi abo ho ku gye, n abo n ho ba gye, esa n ma wu mihin tukwo n ho aba.

17Nba kna ho n ho azaje aba bedo abyedo yi. Nba tnu ho n abye do aba,

18ha kpe ba awye ya, ba gye gaiciya ba ye abui, ba zan-zan dna buzangna Shekwoyi nya, maimakon shetan wyegma, ntu ge ba bwa gafara oba alaifi nya, ba ze gado Shekwoyi nya, bedo aza yi abaho-bahoi vinya, oba nu a la oba alaifi zhan ya ntu ba gaiciya ga bo omi aba.’

19“Ntu deye bo, O esu Agaribas, mi to bei na bo n bewyegye eshe nya yi m.

20Ma ya wa’azi zhin ga aza n Dimashika mi, n Urushelima yi bedo n Yahudiya ekni yi, n jesun n abyedo aba, mi-i gna ba ge ba fwa alaifi ba pmibma be Shekwoyi aba, ba wu oba bmapmi a tnu-tnu manayi.

21A Yahudiya ba wan mi dna aduwa nyakun ntu wa’azi zhin bo, bai ye ba wu mi.

22Ama Shekwoyi wa mi gni, cenu zhin mi gni n wye-wyei n naiye, ma gna aza dnagmayi n aza anawyi yi gaiciya ye. Mi ta wu nyaho lo gbo n nya yi annabi edo n Musa yi bei da m.

23Nge Masihu ba sin wahala, wa ze oza kmisunyi n wo bo laka la evingwo, wa be n buzangna yi na Yahudiya aba bedo n abye do yi.”

24Festus wa da bo nkalayi ngye wa kaya nshe, wa ci ge, “Bulus ho la cenia. Oho nyaba nmwa la tukwo pmi ho ya!”

25Ama Bulus wa gna, “Mi ta cenia nu m, Festus duduyi, ama mi da gaiciya nu Behinhin.

26Esu Agaribas kpe abeye lo, Mi da beda ye n bugba kala yi, ntu ge abeye to zhin abo woi-woi nu nwo aba m, ntu ge ato zhin ba n vi nu m.

27Esu Agaribas ha ga annabi gaiciya! Mi kpe lo ha ga gaiciya.”

28Agaribas wa gna wo ge, n abedeye yi ho ye ma ze Yesu viyi-i?

²⁹Bulus wa ye wa gna, Mi gyi Shekwoyi wye lo omi beda kwa zhin ho bedo aza yi vinya nba zhi lo ya, ba ku ze ngye mi, sai dai to ngye agma n ba fi n mi nyi m.

³⁰Sai esu, n gwamna yi, Barniki aza yi vinya ba kukala ba kunya.

³¹Shi ba bo zhin shaula ba gna, “Oza deye to zhin laifi n wo ba fi ko a dna wo n kurkuku m.”

³²Agaribas wa gna Festus ge, wo to bei ku gna ge, wo ba lo n beda yi n Kaisar aban, o la wo loya.

Atnu-tnuyi Abozhin 27

Ozan Kwoi Lo Roma

¹Shi a bo ku shiri zo zhin, ntu geakuyialonyin Roman eya nuwan nya yi, a ku a Bulus bedo aza wan-wan ajei, fi n akurkuku guyi tukwoda ho akun, ai yi wo eye ge Jiliyos, esu gu yi nu bei n woi.

²Ya kuka n 'ya yi, nkwo ba lo kwoi kpegni aba yi mwabegye lo ce yi n Turki edna gbe. Aristakus bei gnisun n yi.

³Shi efye bei gyi ya si Sida, Jiliyos wa ye ge Bulus wo la gmi gni wa bi anugundo gna, ba gwo wo agmadayi.

⁴Shi yi bo je lo fi eya, ese dnagmayi kwa ci, to ya mi ya dna eya n zokwo m, har kwa zhin ya duya Saiprus sunbwa.

⁵Ya duya vivi n Silisiya yi, n Panfiliya yi, ya be ya kpezhi n Mira n Lisiya ekni.

⁶Nbo nu eyi tukwoda wato Jiliyos, wa gye eya a Masariyi nya, kwoi gmi Alekzanderiya, kwoi lo Italiya wa ku yi fi nkwo.

⁷⁻⁸Yi bo ku anyipyei bwa n mwa, yi sun wahala n eya dna yi, ya si Kimdus deca, ese kwoi gna kala bwa-bwa, ya duya vivi n Karita, ya lo Salmoni. N wahala yi, ya lo peceye peceye, yi lo edna 'gbe yi har ya be aba ho a yi kwo ge Akpezhiba Manayi, vivi ezhi hoi a yi kwo Laisiya.

⁹Ya ku kpe zhi bo anyipyei n mwa begye. Ntu ge wahala bo nyi n aba zan-zan n kpai nyi, ntu ge vinyikwo bo la shi, Bulus wa gna a kurkuku gu yi tukwoda ge.

¹⁰“Ofye, mi gye lo wahala lo abye, kpekni yi ba sin asala eya kwa baya, akaya ba bwi, aza ba bwa nyasan har efi.”

¹¹Ama akurkuku guyi tukwoda to wa wo Bulus be da m, sai aya dna yi tukwoda beda.

¹²Shi kwo nyi Akpezhiba Manayi to bei bmiya n ba ba zhi n vinyikwo yi m, ayadna yi ba gna ge a zhin atna a lo Finiksa bo fi bo n vinyikwo yi. Finiksa bei zhin ayakpezhi ba manayi nu.

13 Esa fyewyi ese kwa ya ci peceye ƒa gye ngye kwo bmiya lo ƒa kuka, ƒa lo eya ya, ƒa ya lo vivi edna 'gbe yi.

14-15 Esa sun fyewyi ese nyakwo kwa ya ci n kala yi, kwa ce eya abwaya lo cei nla. ƒa zhin atna ge ƒa jeze ƒe n eya yi la gbe, to ƒa mi m, ƒa fa kwo kwa ce kwa vi ese lo.

16 Ya duya n muse ƒiyi ho avun, a yi muse yi ge Kalauda, nƒo nu n yi ƒo wankma deca, n aya ƒiyi-ƒiyi bmazhin yi,

17 Ya mi ya gyi eya nawyi. Ayadnayi ƒai wo dna ge kpesun ese ƒa ce eya abwaya har kwa lo Afrika, kni, ntu deye ƒo, ƒa aje loya nƒa gyi eya she nyi.

18 Shi efye ƒo gyi, ƒa gye ese kwoi gna cici, eya atnu-tnu yi ƒa ya akaya kunya fi n nuwan.

19 Dna nyipyeyi tahi, ƒa kun eya atnu-tnu kaya anya yi vinya ƒa she ƒa ya.

20 Ese yakwo kwa ci nkala yi to kwoi shan fa m har anyipyeyi mwa begye, ngmayi, har ƒa bugba gmiya n pwo-pwo ƒo yi.

21 To aza yi gyi nyagyi m, ama Bulus wa yi aya tnu-tnu-zhin yi wa gna ƒa ge, "Ofye, fye ƒo gna fya wo mi ƒeda nkmisunyi, to ye kuka n Akpezhiba manayi m, to yo sin asara ye m.

22 Ama agu tu yi ngye apma, zaho-zahoi ta bwi wo wye-wyei nuwan, eya ƒa ƒaya.

23 "Ntu ge nsukwoyi naiye, Malaika omi Shekwoyi nya, n mi zhin wo bauta nyi, wa ƒe mi aba.

24 Woi gna mi ge, 'Bulus to wo edna m, ntu ge Shekwoyi ku howyegyiyi wo, sai ha gni agni n Kaisar abye, woi ƒa aza gni, nƒa gnifi n ya n hoi nyi'.

25 Ntu cenu fye ku mi zhi, ntu ge mi la gaiciya ga Shekwoyi, kwo ƒa ze lo nu ngye shi wa da.

26 Ama eya ƒa ƒaya ya wankma kpe n muse ho."

27 Dna nyipyeyi awo-cei-nyihi, ogma ƒedo n 'se yi n sadu sa, yi kpe n nuwan Adriya nya, yi lo nawyeyi, na vuyi ese yi ce yi abwa ya, aya dnayi ƒa gye ngye yi ku wu vivi nkma yi.

28 Ba mwi nuwa lolo ƒa gye kafa 120. Esa fyewyi ƒa je mwi, ƒa gye kafa 90.

29 Shi ƒa ƒo gye lonu, ƒa kpe ge yi ku ga okma si, ama ntu edna ƒo ge kpekni agye akuta nyi ndna gbe, ƒa ya eya akpegninya fi nuwan ngun-anyi, ƒai shin-shin ge efye kwo gyi.

30 Aya dnayi ho, ƒai ye ge ƒa busi ƒa fwa eya, ƒai la ya ƒai lo eya ƒiƒiyi ƒai zhin ngye ƒa ye ƒa ya eya kpegninya fi n nuwan nabye bwa.

³¹Ama Bulus wa gna asoja bedo nba tukwoda yi ge, “Fye ba ku fi vinya sai dai ozaho-zaho yi wa kpe dna n ya.

³²Asoja ba zun owun ya, ba fwa eya bibiyi kwa kaya.”

³³Shi efye bo la gyi, Bulus wa gyi aza wye ge ba ku nyagyi gyi wa ci ge, “Fye ku sun nu, a mako ngun aba to fyei to nyagyi wo m.

³⁴Mi gyi fye wye fye ku nyagyi ntu fye lafiya bo! Ntu ge kwo tukwoyi gmanyi oza ho nya, kwo ta bwi m.”

³⁵Shi wo bo zo da lonu, wa la breidi wa zhin Shekwoyi godiya nba abye vinya, wa sa wa gyi.

³⁶Nsayi-sayi oba vinya ba bwa sauki ba ya nyagyi gyi.

³⁷Aza vinya tagyi aba, ncei shi tnaba cei tnanyi (276) eyi yewa nu n yi bei fi n eya yi vinya.

³⁸Shi abo ku nyagyi gyi aya atnu-tnu yi ba kun alkama ba she ya fi n nuwan eya shanwo kwa ce gmiya.

Eya La aya

³⁹Shi efye bo la gyi, to ba kpe aba nba zhi-n ama ba ta wye ba gye okma n amwi yi, ba zhin shaula ge kwo ese ba ce ba bwaya fi akuta, kwa kun ba va kpe na mwi.

⁴⁰Ba gna ba ba zhin atna ba gbe awun ya ba fwa eya akpezhi nya ya fi n nuwan, ba ya eya avun, ba ku eje wu abye ba lo edna gbe.

⁴¹Ama eya tukwo kwa lo kwa bi dna n amwi. Eya tukwo kwa bi dna dei-dei, eya avun kwa la wu, nuwan dokwo kwoi be kwoi lu kwo nkalayi har eya kwa ya baya.

⁴²Asoja ba gna oba tukwoda ge, ba ku aza wan-wan wu vinya kada oza ho nba mi wa she nuwan wa piya wa busi.

⁴³Ama Jiliyos to bei ye ge awu Bulus m, wa gna ba ge a to zhin lo nu m. Wa gna ba ge oza n wo ba mi wa she nuwan wo she wa piya tu nkma.

⁴⁴Aza nba ce nyi, ba zhin atna ba wan eya apisayi ba wan kma. Elonu aza vinya ba ku wan kma n lafiya yi.

Atnu-tnuyi Abozhin 28

¹Esa fyewyi ya kpe ge muse n ya wankma kpe nyi, a yi kwo ge Malita nu.

- ²Aza nba bei fi bo nyi ba wu yi yeye, ba ku ena fin yi ya wye ntu ogma bo nkwo bo lu yi, ese yi fu yi nyi.
- ³Ngwe shi Bulus bo ku ashinwan wa ya kpe nna, gbezhi kwa kun ntu gugurgu bo, kwa knanyi Bulus nbwa.
- ⁴Shi a Malitayi bei gye kwo shegyi n Bulus bwa, ba gna aje ge, "Ozaye zhin zawuyi nu behinhin! Wo la pwo n nuwan, ama benukwoyi kwo nu ta ye ge wo pwo m."
- ⁵Ama Bulus wa mi kwo ya fi n na, wa ce wo nya gni ntna boho.
- ⁶Aza yi bwa zhi bai gye ge, esa fyewyi wo ba ya sun, wa miyashi wa fi, amma shi ba bo gye esa la mwa to boho kwoi zhin wo m, ba beda shando ba gna ge, wo zhin shekwoyi ho nu.
- ⁷Vivi aba yi n yi bo wankma nyi, oza ho bei nyi bo a yi ge Bublikus, wo nu bo zhin gwamna muse yi nya. Wa gwo yi n bugba bui-bui yi, wa ga yi nyagyi har anyipyei ngun-ata.
- ⁸Bublikus dada wo bo n nyasan yi, nayi nagun bedo n goro-san yi. Bulus wa lo wa zhin aduwa, wa to wo bwa wa wo kagna.
- ⁹Azaje vinya, nba to bei n lafiya yi m n muse yi, ba be a ba kagna.
- ¹⁰Ntu deye bo aza ba be yi n kyauta yi n mwa, esa nu yi bo ye ya kuka, aza ba be yi na nya yi gbo-gbo n yi ba zhin akma n cei n zokwo.
- ¹¹Apya bo ku sun ngun-ata, ngwe shi eya bei baya, ya kuka njesun, nsa deye yi bo zan-zan n eya Alekzandariya nya yi nkwo zhin vinyikwo shi n muse hi, ai yi kwo ge "Aza aba."
- ¹²Eyi akpezhiba kmisunyi sai Sirakusa, ya bwa anyipyei bo ngun-ata.
- ¹³Ya kuka bo ya pmi lo Rigiyum, ya bwa nyipyei gmanyi ese kudu nya kwa ya ci, nyipyei bahi yisi Butiyoli,
- ¹⁴Nbo ya sun a Yesu viyi hoi, ba gyi yi wye ge yi ku fi nba yi har anyipyei tnaba. Ya kpe kala ku ya lo Roma.
- ¹⁵Eyi azaje nba bei fi n Roma nyi, ba ku wo ge yi be lo, ba be shegun yi n Abiyu gnikwo. Azado ba shegun yi n Ashiragyi ngun-ata. Shi Bulus bo gye ba, wa zhin Shekwoyi godiya, wa bwa bugba kala.
- ¹⁶Shi yi bo si Roma, a ye Bulus ge wo dna wo nya abaho-baho n wo ba dna, sai dai soja bei zhin woi gu wo.
- ¹⁷Shi wo bo si wa bwa anyipyei ngun-ata, wa yi a Yahudiyi atukwoda wa da bo nbai wa gna, "Omi azaje, a Yahudiyi nba fi n Urushelima nyi, ba na wan mi bai dna mi a Romayi akun, ko shi ko nyi mi to zhin nyaho-nyaho yi m, ko ma zhi za wuya kwo bo n kwo zhin kunnu eyi azakwoyi nya m.

- 18“ A Romayi ba ku owa da mi, bai ye ba ya mi, ntu ge ba to sun nyaho n mi aba nkwo kunce lo nfi yi, ngye shi a Yahudiyi atukwoda bei gna ge awu mi nyi m.
- 19Shi a Yahudiyi atukwoda to bo ye a shaula yi m, to a wun aje bugba m, ma gye ko la mi ze tile ma gyi abye n beda yi kwa lo Kaisar aba.
- 20Ma yi fye ge fye be n naiye ge ya kpe ajeye, magna fye ge, mi dna n agma ye ge, mi n gaiciya ga yi lo ge Masihu wa be nu.”
- 21’Ba ye ba gna wo ge, “Yi to wo boho tu nho tukwo m! Yi to bwa wasika n Yahudiya, ko naza nba kun lo n Urushelima, bai be iya nyi m.
- 22Ama yi ce pma ya wo enya ho gaiciya yi ga, enya dei n yi kpe lo, okwo nu ge abahobahoi vinya, aza ta ye a Yesu viyi lo m.”
- 23Ba esa shi, nwyihi aza nmwa begye ba yezhi n wo puwa. Wa dabo n bai tu Shekwoyi ebemi bo, woi wu ba abo ntu Yesu bo ngye shi aka fi n Littafi Gyi-gyi-yi, wa ya ba wu n attaura Musa nya bedo anabi yi, Wa ya ba wu n labmi yi har wyeshe!
- 24Azaho ba ku gaiciya ga, ama azaho to ba gaiciya m.
- 25Ba na Bo aje yi n mwa, ba kuka n beda gmanyi shi n Bulus bo da ge, “Zafun Gyi-gyiyi bo ku beda da cewo n anabi Ishaya gbe ge,
- 26“Wa gna a Yahudiyi ge, ‘Fye ba wo fyei gye ama fye ta bwa awyega m,
- 27ntu ge ofye abugba shin-shin lo, ofye atnubua ta ye lo ba wo m, fyei ku fye awye kpe to fya bwa awye gam, ntu ge fye ta ye lo fya gye, fya wo, fya bwa awye ga, fya be ma ka fye gna m.’
- 28-29 Mi ye fya kpe ge, gni-gni Shekwoyi nya ye, kwo nyi ntu abyedo bo nu ce, bai ba gwo kwo.”
- 30Bulus wa wo nya dna n wohin haya nyakun har aye ngun aba, woi gwo azhibeyi doho-doho nba bei be wo wyegye.
- 31Woi gna ba Shekwoyi ebe mi bo, n Dagayi Yesu Kristi yi, zaho-zaho yi to bo wo wo bi m.

Aromayi

Aromayi 1

- ¹Anugundo ye-yeyi n fye fi n Roma nyi, Wasikaye gmi n Bulus akun nu, Yesu Kristi bara kni-kniyi ntuge wa zhi wa'azi, Shekwoyi Nabari manayi nya.
- ²Shekwoyi bei zhin nabari manayi ye alkawali tunyi nsapai, nwo anabi akun dna Alkawali kwo-kwoyi.
- ³Kwo zhin nabari manayi nwo Nugun tukwonu, Yesu Kristi eyi Dagayi n wo bei be ngye obi a mawo dna Dawuda Esu abe bi fye.
- ⁴Owo kalala n efi kwo wu ge wo zhin Shekwoyi ikoda Nugun nu, n Shekwoyi nayi Gyi-gyi-yi.
- ⁵Nsayi ye dna n Kristi, ala Shekwoyi alheri zeya pu eyi alaifi da n yi to kunce lo yagwo kwo gmanyi n amin. Nsayi ye wo tnuyi nge yi lo anyi, yi gna aza vinya n na bai vinya, afo ayakwo n Shekwoyi ku zhin ba nabai ba ga gaiciya ba vi wo bo.
- ⁶⁻⁷ Ofye, anugundo ye-yeyi n fye fi n Roma nyi, fye filo n na aza n wo ye, Yesu Kristi n la fye yi fya ze Shekwoyi anya, owo aza Gyi-gyi-yi. Shekwoyi sun-sun-gye n bugba fuyi vinya n bakun n Shekwoyi eyi Dada n Yesu Kristi, eyi Dagayi yi aba ba ze fye nya.

Kpema Shekwoyi Kwo Nu Zhin Wye-wyeyi

- ⁸Ma gna fye kmisunyi aba vinya n ma lo, mawo ai dafye gaiciya ga bo. Ntuge akpe fye gaiciya ga dna n Shekwoyi yelo n anyi vinya. Misa Shekwoyi ami dna n Yesu Kristi n tu nabari manayi ye bo, n zaho-zahoi n fye mi.
- ⁹Shekwoyi kpelo shi mi zhin ma zhin aduwa, ntu fye bo cici. Nyipyeyi n sukwoyi mi-i be nfyeyi n fya bukatai, n za aba n mi zhin wo tnu-tnu n mi kalayi vinya, miyi gna aza nabari manayi owo nugun nya.
- ¹⁰Mi zhin aduwa ma bwa esa n Shekwoyi beye nu, ma gye fye njesun, nkwa yezhin omi zan kwa ze lafiya nya.
- ¹¹⁻¹² Ntuge a wo mi pwa ma be fya ba n nabai ma be fye gaiciya ga, n ko ba zhi ofye ikklisiya kwa mwa dna n Dagayi. Miye fye bmazhin lo ce, ntuge mita ye ma be fye gaiciya ga nu gmanyin, amma ofye nya kwa be mi kala. Zaho-i zahoi n yi mi wa bwa anabarka n na aje aba.
- ¹³Mi n cei pmalo fya kpe omi azaje, nge mi bei ku shiri zhin n na bwai mwa-begye ma be fye aba, (ama to ayen) n na abai ma zhin tnu-tnu n fye aba omi bwa apma, shi mi zhin n ikklisiya aje.

¹⁴Ntuge mi n ta yakwoyi shi fye lo n azayi vinya, n na zayi n bala awye kna n na zayi n awye to kna fan, eh, n na beyekpe yi n na azayi n ba ta kpe beho yen.

¹⁵Ntu lonu shi mi ba mi n sun, mi n mihin yeye yilo ma be f a ba n Roma, ma zhin Shekwoyi nabari manayi wa'azi.

¹⁶Nabari manayi Kristi nya vinyiko ta wo milon, Shekwoyi ikoda zokwonu n wo be n na zayi ri Shemi n ba gwo ko. Abei zhin nabari ye wa'azi n kmisun na Yahudiyi aba nu, amma n sayiye ala aza vinya yi ba be Shekwoyi aba n zokwo yeyi.

¹⁷Nabari manayi ye gna yi ge, Shekwoyi zhin yi shiri ntu she bo, woi zeyi aza manayi n Shekwoyi awyeba. Esa n ya ga gaiciya ya kpema Yesu wa gniyi, nkwo ya-yai har okwo zo-zo, gaiciya ga nu gakwo. Shi a cei kafi dna n littafi "Oza n wa bwa wye-wyeyi woba bwa kwo dna n gaiciya ga n Shekwoyi aba nu."

Efi Ntna Bo Vi Aba

¹⁸Amma Shekwoyi wu wo minagyi, n kwo gmi n she n na a laifida, n na benukwoyi zhiyi tukwo, aza nukwoyi nba ce gaiciya abwa ya,

¹⁹gama ba kpe Shekwoyi gaiciya ga ye lo kwo to ai wu bam, Shekwoyi la beyekpeye dna ba n ba bugba mi.

²⁰Tunyi sapa, aza bei ku eshe gye n kniyi n Shekwoyi bei zhin, bai kpege wo lo n iko nyalo-nyalo nyayi. Ntu cenu bato nabezeyi lo lon sanu ba bei gni agni zhi n Shekwoyi abye n wada wyi yin.

²¹E, ba kpe owo be yelo, amma bato yen, ko ba gawo mwa-mwan, ko ba zhin wo godiya n tu nwo bmazhin bo fyegyiy-fyegyin. Safyewyi, baya a nubwozhin abanza nya shi Shekwoyi wu, n nyayi nwo ye ba zhin. Oba bugba tnaceyi kwa ze wwegma kwa ku jeje.

²²Bai gyege ba ce-cei lo n tna Shekwoyi, baku ze aza mama.

²³Nnavun, maimako ba ga Shekwoyi ikoda nyalo-nyalo mwa-mwa, baku ashinwa, na kutayi ba zela ashan ba gyiba wye, alu, anya fanya, awa n na gbayizanyi-kwo-ciye.

²⁴Ntuce nu Shekwoyi wa faba ba zhin anagbaya doho-dohoi nba ce yi pma, e, awye bwo bo n nabo nukwoyi bai zhin nnajeyi nanyi.

²⁵Maimakon ba ga enya gaiciya, n ba kpe ge ko zhin gaiciya nu n Shekwoyi tukwo, ba kni a nya bai gwo kpe, ba ga akata gaiciya. Ntu lonu ba zhin aduwa ga anya n Shekwoyi azhin, amma to ba vi n Shekwoyi anabarkada bo, n wonu na zhin anya vinya nyin.

²⁶Cenu bei zhin Shekwoyi wa yaba bwa, ba zhin abo nukwoyi ye vinya. Har oba nyikwo ba fa zokwo n Shekwoyi wa zhin gaba, ba ce bai zhin a nagbaya n na jeyi.

²⁷Aza nugbayi, maimako ƙa zhin ƙo n kwo kunce n na nyikwozayi, shakpe kwa ƙa duwyi ƙahin-ƙahin, azanugbayi wangye n na jeyi, ntuce nu ƙa gwo ƙa lada dna n ƙa wye-wyeyi, tata n kwo kunce ƙa gwo.

²⁸Ntu lonu sanu n ƙa bei ya Shekwoyi bwa to ƙaye a kpewoyen, Shekwoyi wa ya ƙa bwa ƙa zhin abe awyebwo nya, n ƙa bugba nukwoyi zhin nubwo n cei.

²⁹Oƙa wye-wyeyi ƙa ku nu n na ƙe nukwoyi n laifiyi, shakpe, n na je bmiyi, eshe, zawu, gusun, akatace, bugba nukwoyi, n na aje ƙedayi.

³⁰Ba bei zhin aza ƙetuyi nu, ƙai wun Shekwoyi nu, awyegba-ciyyi, a tukwo-mwayi, cici ƙai zhin azokwo woi-woyi nubwo shi ƙa ƙa zhin ƙenukwoyi, to ƙai vi oƙa zakwoyi ƙom.

³¹Ba ta ye awyegan, to ƙai nu alkawali n, n tna ye-ye, n tna sun-sun gye.

³²Ba bei kpe Shekwoyi tata, tu abeye tukwo ofi nu, amma ƙa gyi abye n zhin yi har, ƙai dna aza kwoce nge ƙa zhin lonu ce.

Aromayi 2

Tata Lo Nabye

¹To, kpesun, ho cilo ge, 'aza, ukwoyi nu n na dabo n ya. Amma lapmi, ho zhin oza laifi da nuce. Sanu n ha ci n cei ge ƙa zhin aza nukwoyi nu, kwoi bmiya lo a gaba tata, ho da hohin tukwo ƙo nu ce, ntuge ho zhin abeye lo ce.

²Yi kpelo ge, Shekwoyi bei da wa woi zun aza kni n ƙa zhin abeye pya.

³Ho gye ngye Shekwoyi bei da aza owa, Wo la hoi da fwa, hoi zhin aboho lo n hohin?

⁴Hota gye lo shi Shekwoyi zhin hakuri n hoi m? Ko ho ta kula lo ma? Hota gye lon, esaye vinya woi pmi ho to woi tahon, woi gaho sa ha pmi avun wu ho a laifin. Wo wuho alheri deye ntu ge haye abui nu.

⁵Amma, fyeta kna tnuhua lo n, fye ye minagyi nukwoyi zhi fyehin ntu fye abugba kala kpe ƙo, n ge fyeta pmi avun wu of ye alaifin. Minagyi nyipyei ƙelo n Shekwoyi bei da anyi vinya wa.

⁶Wo bei ga oza shi owa tnu-tnu a mu gawo n sun.

⁷Wo bei ga aza n ƙa zhin Shekwoyi ƙeye n hakuri yi, Wye-wyei nyalo-nyalo nya, ƙai zan mwa-mwa n latu yi shin n wyewye yi nyalo-nyalo nyai nwo ganyi.

⁸Ama wo bei ga aza tata n ƙa gni a papa n Shekwoyi gaiciya yi, ƙai zan-zan fi n na zokwo nukwoyi, abei ze Shekwoyi minagyi ya kpe ƙa.

⁹⁻¹⁰ Bugba wun, n na zhingye yi, bei bwa a Yahudiyi. Na a zayi n ƙato zhin a Yahudiyi m vinya, n ƙa gyi abye n ƙenukwoyi zhin yi. Amma aza nƙa vi wo ƙo,

ba bei bwa mwa-mwa n bugba fu yi, ko Yahudiyi nu kwo aza nbato zhin a Yahudiyim.

11Ntuge Shekwoyi zhin zaho-zahoyi bo n tna awyekwo.

12-15 Wo bei ta laifi aba n kwo nyi vinya. Wo bei ta ashan-gbaya, koda-yake, bato n Shekwoyi awyidna yi kashi lo n, gama nba bugba mi, ba kpe be manayi yelo n nukwoyi. Shekwoyi awyidna kafi lo n ba bugba mi. Oba la-ami kwoi zunba kni. Ko kwoyi daba wa, Shekwoyi bei ta a Yahudiyi ntu benukwoyi zhin bo, ntu ge ba n wo awyidna yi ka shi lo, ama to bai shi ba bwan. Ba kpe be manayi ye, ama bata zhin kon. Ata ga aza gni-gni n ba kpebeye n naba zhin sai aza n ba zhin kwo.

16Nyipyei belo n Shekwoyi bei da aza nukwoyi wa, nba bemwi nukwoyi, dna n Yesu Kristi. Deye kwonu zhin Shekwoyi shiri n mi zhin wa'azi.

17Ofye a Yahudiyi fye zhin nubwo ge beho to dnalo nfyee a tasin n Shekwoyi n, ntuge wo bei ga fye owo wyidna fyei zhin a bokwo, fyei gna n ge fye zhin owa nugundo manayi nu.

18Fye kpebeye lo nwo ye, fye kpe be nukwoyi yelo n be manayi fyei gna manayi ye, ntuge abe ku wyidna wufye, fyei n na binayi.

19Fye kpe Shekwoyi zokwo ye lo har nfyee bawu wyebuayi ko n bwanyi yi. Fye gye fyehin nge a fitila nu fyei wu aza zokwo n ba fi n wyegma, n bata kpe Shekwoyi ye n.

20Fye gye ge fye ba mi, fya wu aza n na bi yi Shekwoyi zokwo, ntu ge fye kpe owo wyidna yelo n ba zhin beyekpe n gaiciya yi nyi.

21E, fyewu aza knunu zhin, kninu zhin to fyei wu fyehin ma? Fye gla aza ge bato wyivi m, fyehin fyei wyivi?

22Fye gna ko to bmiya aza zhin anagbaya n, fyei zhin n fyehin? Fye gna ato gba ashan fyei ze agyiwe efye Shekwoyi.

23Fye zhin abekwo n ge fyekpe Shekwoyi awyidna ye, ama fyei dnawo vinyikwo to fyei shi ba bwan.

24Gaiciya nu n littafi a da, nge Anyi da beda nukwoyi n Shekwoyi tukwo n tu n fye bo.

25Ayi oza ye Yahudiyi nu kwo zhin be manayi nu, n ho shi wo awyidna bwa. Ama n ho to shi ba bwan, ho to du abe nukwoyi zhinyi lo n. (Atna-kaciya zhinyi).

26Ndei a shangbaya shi Shekwoyi awyidna bwa, Shekwoyi ta gaba mwa-mwa n yanci yi, n wa zhin shiri ge wa ga a Yahudiyi nyi n?

27Behin-hin ashan-gbaya boku dufye a Yahudiyi, n fye kpe Shekwoyi beye n mwanyi, n wo alkawali yi shinyi, to fyei shi owa wyidna bwanyin.

²⁸Fye to zhin a Yahudiyi hin-hin nu shifye azakwoyi zhin a Yahudiyin, kwo kuwa shifye zhin kaciyan.

²⁹A'a, Oza n wo bugba wulo cewo n Shekwoyi aba, wonu zhin Yahudiyi hin-hin. Ntuge Shewoyi ta dna aza wye nu n ba sa ba nayi yan n Kaciya zokwon, ama wo dna ozanu wye n wo bugba manayi. Oza n wo bugba do shanye kpe n wo wye-wei mi wo ba bwa latu n Shekwoyi abanu, to ge n fye abam.

Aromayi 3

Anabarka Yahudiyi-bye Nya

¹Mi gye ampanyi nza zhin Yahudiyi nyi? Gyiba manayi ho lo n Shekwoyi aba? Ampanyi ho lo n na Yahudiyi kaciya n ba zhin nyi?

²E, ampanyi lo n oza ba n wo zhin Yahudiyi, Kmisunyi Shekwoyi bei gaba owo awyidna. (N nabai ba kpe, ba zhin wo beye).

³Gaiciya azaho n ba mi to bei n aminci yi n, ntuge ba bei bma alkawali ya n Shekwoyi yi, kwa wu nu ge Shekwoyi ba bma wo alkawaliya?

⁴A'a, ko shi kwo nyi aza vinya n na anyi zhin aza kata nu, Shekwoyi to zhin zakatan nun. Ho pa enya lo n litafi n Zaburada n deye tukwo? Shekwoyi beda ta shan don, ci-ci kwo zhin gaiciya nu. Ko nyikadonu nu na nya ba bo.

⁵Ama, azaho ci ge, owo beda n yi to shi bwa nyi n, kwo n na ampanyi yilo, eyi alaifi ku ampanyi zhin, ntu ge aza ba gye shi Shekwoyi yeye nyi, esa ba gye shi yi zhin abe nukwoyi zan. Kwo bmiya lo n wo aba wa tayi, esa ya zhin be nikwoyi, eyi alaifi yi bwa wo go bmazhin?

⁶Shekwo sauka. Kni Shekwoyi pya nu to woi ta laifin ma? Wo ba zun oza kni n wu na?

⁷Ntuge wota mi wa da mi owa, wa zunmi kni ngye laifi da n, ndei omi tna gaiciya be wolo n mwa-mwayi koi wuge wo zhin gaiciya da nun.

⁸N ha vi kwo lo nu, ha gye shi yi gna benukwoyi zhin nu dudu. Shekwoyi wa gna kwo ye. Amma aza n ba da abeye pya knizun kunce lo n ba aba. Dudu lonu aza ho gye ge nya nu n mi zhin wa'azi.

⁹To, eyi a Yahudiyi du aza je lo? Ko fyewyi, ntuge, yi ku luwu ge aza vinya zhin a laifi danu. Ko a Yahudiyi ko aza nba to zhin a Yahjudiyin.

¹⁰She littafi a da, za manayi to lo n, zaknanyi to lon nna nyimi n wo to zhin laifi danu n.

¹¹Ozato lo n wo vi Shekwoyi zokwo cewo ko n wo n cei pma wa vin.

- 12**Zaho-zahoi la wonya pmiya, aza vinya nku benukwoyi zhin, oza to lo n bwaho n wo zhin be manayi ko zaknayin.
- 13**Oba beda tucegye, n ce asin ngye vingwo nkwo gu-guyi ya gni. Oba nyitala nu-nuyi n na katayi. Beda doho-dohoyi nba da kwo n mwi nukwoyi fi, n kwo ba wu oza.
- 14**Oba gbe, nu-nuyi n na aknikpe yi n minagyi yi.
- 15**Ba pye-pyeyi n za wu, bai wun za nu n wo to gwo ba bedan.
- 16**Abaho-bahoi n ba lo ba fa bugba wun n wahala yi n na azhingye yi.
- 17**Ba ta kpe enya ye n na yi ge, bugba fun kwo Shekwoyi anabarka m.
- 18**Ba ta gye ba nuwan n Shekwoyi, kwo enya n wo zhin nubo n ba tukwon.
- 19**Ntucenu Shekwoyi minagyi n wagi tulo mwa n na Yahudiyi, ntu ge oba tnu-tnu nu, ba shi Shekwoyi awyidna bwa, bace bai zhin abo nukwoyi, zaknayi n bami to n na benayi lo lon. Behin-hin anyi vinya to n na gmiba yi lon n Shekwoyi ikoda abyen.
- 20**Nsayi ye, hoku gye? Za to lo n naba zewo oza manayi n Shekwoyi abam, ntuge wo zhin bo n na awyid-na da m. Ntuge yi kpe Shekwoyi awyidnaye, ya gye to yi gna ba bwa shin, owo awyidna wu yi ge, yi zhin abe nukwoyi zhin yi nu.
- 21-23** Amma nsayiye Shekwoyi ku eshe zokwo do wuyi, gbo, n na wyidna bwashi yi, amma n zokwo woyi (ko-daya-ke zokwo woyi nu to n, ntu ge Shekwoyi beda ku gna yi tunyi n sapa). Nsaiye Shekwoyi wa gna ge woba gwo yi, wa zeyi a tna laifi da. N ya kpema Yesu Kristi wa zo yi a laifi, wa zhin yi gafara. A ba gni yi n zokwo deye n ya be Kristi aba. Ko hoi zhin nyika donu'a, Ko hoyo zhin kni laifi nu'a. Aza vinya nku laifi zhin bai ku gba kpekpe-gye n Shekwoyi mwa-mwa aba,
- 24**Ama nsayi yi ku ze aza akni-kni-yi, ntu wo alheli bo, nba be dna n gni-gni n Yesu Kristi aba nyi.
- 25**Shekwoyi wa tnu n Yesu yi ntu ge, wa ze doshan nya nya ntu oyi alaifi bo, ozaho-zahoi nwa ga gaiciya aku gafara zhin wo. Shekwoyi wa shin deye ntu ge wa wu ge wo zhin befyeci nu, nsa avun nya, wo bei la bugba bwa n laifi-i, to wa ga aza ta-ta m
- 26**wa zhin deye nsayi ye ntu ge, wa wu ge wo zhin oza kni-kni-yi nu, woi ba mi wa gmi oza ya tu nwa ga Yesu gaiciya, wohin ce wa ze oza kni-kni-yi.
- 27**Nyaho lo n zanyikwoci ba mwa wohin nkwo bo? Nge awo. Ntu knibehia? Ntu ge yi shi awyidna bwa? Awo, ama ntu gaiciya ga bo.
- 28**Onya gmanyi nu n yi kpe lo, okwo nu ge a ta bwa gni-gni n awyidna bwashi bo nu m, ama n gaiciya ga aba.

²⁹Mi nya ge, Shekwoyi zhin Ayahudiyi Shekwoyi nu gmanyi, Wo to zhin abyedo Shekwoyi nu ce n? Cewo wo zhin ɓa nya nu.

³⁰Shekwoyi gmanyi nu, owo nu ɓa gni Ayahudiyi ntu ɓa gaiciya ga ɓo, owo nu-i ɓa gni abyedo, ntu ɓa gaiciya ga ɓo.

³¹Shi kwo wu lo nu nyi, ta gye yi ɓa ku awyidna ze gboloyi n? Nge awo, awyidna ze gboloyi n? Nge awo, awyidna nba apmayi lo.

Aromayi 4

Besisi N Ibrahim Yi

¹⁻²Dna n nayi Ibrahim nu zhin eyi a Yahu-diyi dada. Ko bei wo n wuna dna nɓenya yemi'a, gaiciya ga n gni-gni yi'a? Ntu nwo atnu-tnu manayi ɓo nu n Shekwoyi bei gwo wo? Ngye lonu nu, yi n nyai lo n yi ɓa gma. Ama n Shekwoyi aba Ibrahim to n na abayi lo n wo ɓa gma kwo wa zhin abekwo n.

³Ntuge, Littafi ku gna yi ge Ibrahim bei ga Shekwoyi gaiciya, ntuce nu Shekwoyi wa zo wo alaifi wa yi wo oza gyi-gyi-yi.

⁴⁻⁵Ama wo to bei lo eshe ntu n wa aɓo amanayi ɓo nu n wo bei zhin nyin? Awo, gni-gni zhin Shekwoyi cauta nu. Aga aza nu n ɓa to zhin tnu-tnu n tu nkwo ɓo n. Ntuge Shekwoyi ze alaifi da a gyi-gyi-yi n wo awyeba, bai ya ga Kristi gaiciya, wa gni ɓa n Shekwoyi minagyi.

⁶Dawuda Esubei ku oza agmada ɓeda wato laifida n Shekwoyi la wo ze oza gyi-gyi-yi ntna laifi nwo abye.

⁷Anabarka da nu oza n Shekwoyi ku gafara zhin wo, wo la oza laifi kuya n wo awye ba.

⁸E, agmada yakwo nu n za aba n na aku abui zowo, to Dagayi shan wo alaifi ba m.

⁹Nsaiye ɓonya nyi ge; aga aza nu anabarka n ɓa ga Kristi gaiciya bai shi a Yahudiyi awyidna bwa, ko aga aza nu anabarka n bata shi a Yahudiyi awyi-dna bwan, amma bai kpe ma Kristi a? Ibrahim ma, n ya gna ge wo bei gwo anabarka ntu wo gaiciya gabonu. Gaiciya ga nu gmanyi? Ko ntu ge wo bei shi a Yahudiyi awyidna bwa nu'a?

¹⁰Ntu ge aga ɓonya deye amsa, sai a ga deye amsa kpa. Shekwoyi bei ga Ibrahim owo anabarka n kni sayi'a? Tun kafin wo ze Yahudiyi, kalm wo zhin kaciya.

¹¹Nna avun nu n Shekwoyi bei zhin wo alkawali ntu n wo gaiciya ga ɓo, a zhin wo kaciya. Kaciya zhin bei wuge Ibrahim n gaiciya ga yi lo, njesun ge Shekwoyi bei lawo lu gwo wa zewo tna-laifi da, oza manayi nwo awyeba kafin a zhin wo kaciya. Ntu lo nu Ibrahim nu zhin dada, zafun nya, n aza aba nba ku gaiciya ga,

ai la ɓa gni to ɓai shi Yahudiyi awyidna bwan. Yi ku gye nu aza nba ta shi awyidna bwan, Shekwoyi nu gniba ntu ɓa gaiciya ɓo.

¹²Ibrahim nu zhin a Yahudiyi dada dna n zafun n na ku kaciya zhin ɓa. ɓa ɓa gye n wo besisi nge kaciya zhin nu tagni ɓa m, ntu ge Ibrahim bei bwa Shekwoyi alheri ntu wo gaiciya ga ɓonu gmanyi, kafin azhin wo kaciya.

¹³Kwa wunu cewo ngye Shekwoyi alkawali, nwo bei zhin Ibrahim nwo byei nyi, nge wo ɓa gawo anyi vinya nyi. Woto bei zhin wo alkawali ye ntu ge wo bei shi Shekwoyi awyidna bwa nun, ama ntuge wo bei ga wo gaiciya.

¹⁴Ntuce nu n dei hoye gnalo ge Shekwoyi anabarka lo aza banu n ɓa zhin ɓemana, ho gna nu ge, Shekwoyi alkawali n na a gaiciya gayi aba kwo zhin gbeloyi nu, gaiciya ga n la ze nyaze.

¹⁵Ama gaiciya beda ye nya nu nyi. Sa nu n ya zhin atna ge ya bwa Shekwoyi anabarka n gni-gni yi, n na ɓemanayi zhin ɓo, n wo awyidna bwa shi yi, yi zhin ya zo fi n wo minagyi nu, ntuge ci-ci yi ta mi nba bwa shin. Zokwo gmanyi n yi ɓa fa awyidna bmaya ɓo, yito bwa wyidna kwo gmanyin.

¹⁶Ntu lonu, agayi Shekwoyi anabarka ntu gaiciya ga ɓo nu. Cauta nu yi ɓa gwo kwo to yi ya vi a Yahudiyi kunun, n yi n gaiciya gayi lo ngye Ibrahim. Ntuge Ibrahim nu zhin yi dada sa n kwa be gaiciya ga aba.

¹⁷Nya nu n littafi a da, sa n kwo ciyi ge Shekwoyi bei la Ibrahim ze oda aza begye nya. Shekwoyi ɓa gwo aza vinya n ɓa ga Shekwoyi gaiciya shi Ibrahim bei zhin nyi. Alkawali deye gmi n Shekwoyi aba nu, n wo zhin a zafi ɓai bwa wye-wyeyi n jesun nyi, woi da abo ɓo n ɓa bei zhin n abye n gyebaku luzhin.

¹⁸Ntu lo nu, sa n Shekwoyi bei gna Ibrahim nge, wo ɓa gawo ɓi n wo ɓa bwa ebye gawo n mwa, waze ebye yakwo, Ibrahim 'bei la Shekwoyi ga gaciya ko shi ko nyi kwo bei zhin ɓo ɓedna yi nu.

¹⁹Ntuge, owo gaiciya ga bei n kalayi, wo to bei damu ge wola kwo n, nna ɓa yi wo ge oda nyin. Woi aye yi tagyi, Saratu owo nyikwo aye ce Shi-ciwa-gmanyi, wo bei la du abima saya.

²⁰Ama Ibrahim to bei zhin Shekwoyi shakan, wa ga Shekwoyi gaiciya ntuge, owo gaiciya ga nwo awyetu yi bei n kalayi. Wa ci Shekwoyi ntu anabarka ye ɓo, to woi lu ɓa bwan.

²¹Wo bei n gaiciyai ga ge Shekwoyi ɓa mi wa nu ɓo n wa da.

²²Ntu Ibrahim gaiciya ga ɓo, Shekwoyi wa zhin wo alaifi gafara, wa ze oza ntna laifi.

²³Nsaiye, beda wo-wo yi ye nge abei gwo wo ntu nwo gaiciya ga ɓo nu, ko to bei zhin ntu Ibrahim gyi ba ɓo nu gmanyin.

²⁴Kwo zhin eyi nyanu, kwo wuyi ge Shekwoyi ba gwo yi n zokwo gmanyi, shi wo bei gwo Ibrahim nyi-sanu n ya ga Shekwoyi alkawali gaiciya, n wo bei la Yesu eyi Dagayi kala n efi nyi.

²⁵Wo bei fi ntu yi alaifi bo wa laka n vingwo ntu ge wa ze yi aza ye-ye yi n Shekwoyi aba. Woi nu yi n Shekwoyi be manayi.

Aromayi 5

Bugbafu N Shekwoyi Yi

¹Ntu lonu, nsayi ye shi aku yi ze abefyecezhin yi n Shekwoyi abye nyi, ntu yi gaiciya ga bo n wo alkawali. Yi ba bwa bugba fu hin-hin nsayi ntu n bo n Yesu Kristi eyi Dagayi ku zhin ga yi nyi.

²Ntuge, ntu n yi gaiciya ga bo nu n wa be n yi n aba n yi gni-agni zhin n saiye nyi. Yi n bugba kalayi n agmadayi, yi shiwe ya ze enya n Shekwoyi n ce yi dna n bugba ntu yi bo ya ze.

³Yi ba dagma ce sanu n ya lo wahala ncei, ntu ge yi kpe ge ko n na pmayi lo-lo n yi aba, ba wu yi shi yi ba zhin hankuri.

⁴Hankuri zhin kwa be n kala yi kwa bma yi zhin ya kpema Shekwoyi esayi vinya, ya zhin apma n kwoi har esa n yi awyetu n gaiciya gai ba bwa kala n mi gni yi.

⁵Nnavun, sanu n kwo zhin lonu, yiba mi ya bwa bugba kala ko knidonu na zhin yi'a, yi kpe ge nyaho ta zhin ntuge yi kpelo shi Shekwoyi yeyi, yi wo ye-ye yi lo n yi abugba mi, ntuge Shekwoyi zafun dnalo n yi mi, woi nuyi a bugba n wo yeye yi.

⁶Sanu n yi to bei n bmazhin yi, n tna gni-gni zokwo, Yesu wa bedna n sai dai-dai wafi ntu n yi alaifi bo, eyi n yi to bei n na pmayin.

⁷Ko yi n na pmayi, yi to bei dnace nge ozaho ba fi n yi bon, ko shiko nyi kpekni ko bei ba yezhin lonu.

⁸Ama, Shekwoyi wa wuyi owo yeye shiwa tnu n Kristi yi, wa fi tu n yi bo, tunyi yi ye zhin a laifi da.

⁹Shi kwo nyi nwo ami yi nu, nwa zhin abedeye gayi, yi ye zhin alaifi da, ai, woba gna zhin-zhin gayi nu n sayi, shi wo layi gni nyi. Nsayi wo ba gni yi n Shekwoyi minagyi vinya n kwo belo nyi.

¹⁰Tunyi, yi ye zhin wo anubayi, a jeze be n yi n Shekwoyi aba, ntu n wo Nugun efi bo. Anabarka yakwo nu, n yi ba gna bwa n sayi n yi ku zhin wo anugundo nyi, woi dna lo n yi mi.

¹¹Nsayi ye, yi dagma ntu jedobe woi-woi bo n Shekwoyi, ntu nya bo n yi Dagayi Yesu Kristi wa zhin gayi, nwa fi ntu yi alaifi bo nyi, woi zeyi Shekwoyi a nugundo.

Kristi Wu Lo Gbo N Adamu Yi

¹²Sanu Adamu bei zhin laifi, benukwoyi zhin a lo anyi vinya. Owo laifi kwoi gna efi laba n na anyi vinya, ntucenu anya vinya bai kwo, bai fi, ntuge aza vinya n ku laifi zhin.

¹³Yi kpelo ge Adamu laifi nu na be nbe deye yi, ntuge kodayake, aza bei zhin bai zhin Benukwoyi tun Adamu sa, har Musasa, Shekwoyi to bei zhin woi daba ofi wa ntuge ba bma wo a wyidna yan, gama woto bei gaba owo awyidnan, kwo wo gna ba enya n wo ye ba zhin.

¹⁴Ntu lonu sanu n ba nayi bei zhin kwoi fi, kwo to bei fi ntu n ba laifi bo nun, ntuge, ba to bei zun Shekwoyi owa gna, shi Adamu bei zhin nyi m. Dogbe lo n Adamu a tasin n Kristi yi n wo to bei lu be nyin.

¹⁵Doshan lo dna oza laifi n Shekwoyi gafara zhin yi. Ntuge zaknayi ye, Adamu bei be aza mwa begye n fiyi ntu nwo laifi bo, Ama zaknayi ye, Yesu Kristi woi be aza n mwa begye a gafara zhinyi dna n Shekwoyi sun-sun-gye.

¹⁶Adamu laifi gmanyi bei be aza nfi lada yin n mwa. Ama Kristi woi ku alaifi n mwa woi ga wye-wyeyi manayi nfi aba.

¹⁷Zaknayi laifi Adamu, kwo la zhin esu tu n na aza tukwo vinya, ama oza n wa gwo Shekwoyi cauta, gafara zhin n lo-lo, baku zhin wye-wyeyi asu ntu zaknanyi bo, Yesu Kristi.

¹⁸E, Adamu laifi bei be n tata yi n na aza tukwo vinya, ama Kristi be manayi zhin kwa ze aza abe-fyece zhinyi n Shekwoyi abye, n na bai ba pwo.

¹⁹Adamu wa zhin aza n mwa begye, ba ze alaifi da, bai zun Shekwoyi beda gna, ama Kristi wa zhin Shekwoyi woi gwo aza n mwa begye ntuge wo bei vi bo.

²⁰Abei ga awyidna ngun awo, n nabai zahozahoi wa gye aba nwa kaya n Shekwoyi awyidna bwashi. Ama, sanu ya gye eyi alaifi, ya gye Shekwoyi alheri dna ngafara zhin mi n mwa.

²¹Nsapai, laifi bei gyi 'be tu n aza tukwo vinya kwoi be n bai nfi, ama nsayi ye Shekwoyi alheri nu gyi be, kwoi gayi a gni-gni manayi n Shekwoyi abye, n wye-wyeyi nyalo-nyalo nyayi n Yesu Kristi eyi Dagayi.

Aromayi 6

Ala Iko Laifi Nya Bmaya

- ¹To, yi ba gyi abye n benukwoyi zhin yi, n nabai Shekwoyi wa gyi abye n yi alheri wuyi n gafara zhin yi?
- ²⁻³ Awo, yi ba gyi abye n laifi zhinyi to kwoi zhin dole nu? Ntuge abei la laifi iko bmaya n yi tukwo, sanu n yi be ze a Yesu viyi nyi, a zhin yi baptisma ya ze gmanyi n Yesu yi, ntu nwo efi bo, abei la ofye nanyi laifi zhin nya iko bmaya.
- ⁴Abei la of ye nanyi laifi nya bi dna n baptisma sanu n woi bei fi, sanu Dada Shekwoyi n wo iko dnagmayi, bei jeze be n Yesu yi n wye-wyeyi n efi, abei la owo wye-wyeyi woi-woyi ga yi ya dagma.
- ⁵Ntuge fyeku ze nanyi gmanyi n woi, ntu cenu fyeku fi n woi sanu n wo bei fi nyi, nsayi wo ga fye owo wye-wyeyi woi-woyi, fye bei kukala evingwo shi wo bei lakala.
- ⁶Abei la ofye a shakpe nukwoyi zundun n gnisun n woi, ofye nanyi n kwo ye laifi nyi, abei lakwo gwoya a tu kwo eci nukwoyi n nabai ofye laifi nanyi to kwo shan dna n laifi sirtan, to kwa ze laifi baran.
- ⁷Sanu, nfyeku fi n laifi aba fyeku pwo nkwo kwocedna n kwo ikoyi nfyeku tukwo.
- ⁸Tunda of ye nanyi kwo-kwoyi laifi ye nya bei lafi n Yesu yi, yi kpelo ge wo ba gayi owo wyewyeyi.
- ⁹Kristi la laka n vingwo wo ta shan fi n jesun, efi to n iko dohoi shan sun lo n wo tukwon.
- ¹⁰Wo bei fi bwazun gmanyi wa zo laifi iko, ama n sayiye wo n vrye-wyeyi lo n sase n Shekwoyi nyalo-nyalo.
- ¹¹Ntu lonu fye ze of yehin aza fi-fiyi n laifi aba, to fya ye laifi ayin fya ku ze awyewyeyi da n Shekwoyi aba fyei wo-wo dna n Yesu Kristi eyi Dagayi.
- ¹²Fyeto ye laifi kwa bwa iko tu nfyeku nanyi tukwo n shan sun, fye to ye okwo ashakpe nukwoyi n.
- ¹³Fye to ye ega doho nfyeku nanyi kwa ze benukwoyi zhin nyan, kwa ze laifi zhinya, ama fye ga fyehin tukwo vinya n Shekwoyi akun nfyeku aga yi vinya, ntu ge fye la kun n efi, fye ku ze apmanya n Shekwoyi akun, wa zhin apma n fyei n wo beye gmanyi.
- ¹⁴Laifi to shan fye tukwo da zen, ntuge fye to ye filo n ewa suntan, aba n laifi ba zefye owo baran. Ai fye n yanci yi lo dna n Shekwoyi alheri n sun-sun gyei.
- ¹⁵Kwo wunu ge yi ba gyi abye n benukwoyi zhin yi to ya gye yi anuwan n kwo beyin? (Ntuge eyi gni-gni to lo n ge sai ya shi awyidna bwanun, ama Shekwoyi alheri nu), awo.

16Fye ta kpe lon nge fye ba mi fya kni fye dagayin? Fye ba mi fya kni laifi (n fiyi) ko, bovi (n gyi-gyi-yi) oza nfya ga fyehin tukwo n wo a kun wonu ba lafye wa ze of ye dagayi fya zewo afyenu.

17Fye gode n Shekwoyi, ntu ge fye bei zhin laifi abara nu, nsaiye fyeku bovi n fye abugbaya vinya, enya n Shekwoyi wa wufye.

18Nsayi ye, fyela kun n ifye dagayi kwo-kwoyi akun, laifi, fyei ku ze ofye dagayi woi-woyi abara, befyece.

19Mi dafo n layi mi-i zhin apma n besisi abara nya n na dagayi nyayi, ntuge fya bwa awyega n pye. Shi fye bei zhin abara laifi gbo-gbo nya nyi, ntu lonu, nsaiye fye fa fyehin fya ze abara abe manayi nya nbeyi vinya n kwo gyi-gyi-yi.

20Nsapai n fye bei zhin laifi bara, fye to bei gye fye anuwan n be manayi zhin yin.

21Fya bwa kni gyiba yi'a? Gyiba to bei bmiyam, tunda vinyikwo wo fyelo fyei ya zhin abo nubo n fyebei zhin fyei zhin nyi. Ntuge abeye zofi n anapi nu n Shekwoyi minagyi yi.

22Ama n sayi ye fye la kun n laifi iko, fye ku zhin Shekwoyi abara, owo gyiba nwo ga fye okwo nu gyi-gyi n wye-wyeyi nyalo-nyalo nya yi.

23Gama laifi lada ofi nu, amma Shekwoyi cauta wye-wyeyi nyalo-nyalo nya nu dna n Yesu Kristi eyi Dagayi.

Aromayi 7

Loloya N Owa

1Fye ta kpelon omi azaje aye-yei, a Yahudiyi dna n Kristi sanu n oza lafi owa to n iko yi shan sun lo n wo aban?

2Ma ga besisi; sanu nyikoza pamula owa n lawo pa gyi nwo ba har ewyi n wa fi ncei. Ama n wa fi owa to n ikoyi shan sun lo n wo tukwon. Mula owa ta shan wo knizun.

3Nsayi, woba mi wa se enu do, n wa ye kwo bei ba zhin nukwoyi owo ba wo n wye-wyeyi, ama, kwo to zhin nukwoyi nu woi la fin.

4Ofye ba, ofye tukwo da kwo nu bei zhin owa a Yahudiyi nya, ama, fya ku fi n Kristi yi n zundu, tunda fye ku fi, fye to ye shan owa se lon, kohin to n ikoyi shan sun lo n fye tukwon. Fye a jeze be wye-wyeyi sa n Kristi a laka n vingwo fyei ku ze aza woi-woyi Nsaiye, fye ku se oza nwa laka la n efi n nabai fya zhin a tnu-tnu a manayi, a tnu-tnu amanayi Shekwoyi nya.

⁵Sanu, n oza kwo-kwoyi bei zhin woi ye lo tnu-tnu n fye mi abo nukwoyi zhin pwa bei zhin bai wo fye, fyei zhin obo n Shekwoyi a gna nge fye to zhin, fyei zhin abo anukwoyi a tnu-tnu efi nya.

⁶Ama nsaiye fye to gye fye anuwan n na Yahudiyi owa yin n ba knunu yin. Ntuge fyebo ku fi, fyei fi n ba bauta zhin, nsaiye, fye ba zhin Shekwoyi bauta to ge dna n zokwo kwo-kwoyi, fyei shi awyidna bwan, ama n zokwo woyi, (nfye abugbai vinya n fye awye-wyei vinya.)

⁷To, mi wu nu nge Shekwoyi owa zhin nukwoi nu? Awo, owa to zhin nyanukwoyi nun, owa nu bei wumi omi laifi, mi to bei ba kpe laifi ye n kwo dna n mi bugban, abo pwa wo nukwoi n ba be fi n mi bugba min, to owai a gna n ge, "To wo abo nukwoi shakpe n ho bugba min."

⁸Ama, laifi zhin a pma n owa yi, kwoi wumi nge shakpe deye pya to bmiyam, kwoi ku anya pwawo nukwoi kala n mi-mi. To owa bei lo n na ba zun gnana, to benukwoyi zhin yi yelon.

⁹Cenu bei zhin to ma gye mi anuwan sanu n mi to bei kpe nya ye n owa yen. Ama sa n mi bei kpe gaiciya ye, ma kpe ge mi la owa zungna, mi la ze laifi da n kunce n fiyi.

¹⁰Nmi aba, manayi n kwo bei kunce kwa wu mi wye-wyei zokwo, kwo nu a zhin a gami efi lada nu.

¹¹Laifi bei dna mi kwoce kwoi la owa manayi Shekwoyi nya kwoi zhin apma n kwoi, kwoi zemi oza n wo kunce n ofi yi.

¹²Ama owa n kwihin tukwo kwo zhin nya manayi nu n bmiya.

¹³Ama kwo ba ze nwuna? Owa nu to bwi min? Kwo ba ze manayi n wuna? Awo, laifi nu. Nya kasa-nu bei zhin apma n nyai n kwo bmiya, kwa zun mi kni ntu lonu fye gye, kwo zhin nya kasa nya nukwoyi. Ntu ge kwo zhin apma n Shekwoyi owa manayi kwa nu kwo beye.

¹⁴Ntu lonu owa bmiya, wahala to! Lo n kwoi nun, ama n mihin nu, ntuge mi kundna gni nu nbauta zhin, n laifi yi n ze omi tukwoda.

Obo Nkwo Gna Mi Gna-Gna

¹⁵Mi ta kpe, omihin tukwo be ganyi lon, ntuge, mi ye ma zhin obo n kwo bmiya, ama mi ta min. Mi zhin obo n mi to cei pman, enya n mi ta yen.

¹⁶Mi kpelo sarai enya n mi zhin nyi kwo to bmiya lon, emi nubo zhin wumi nge, mila ye n owa yei n mi zungna nyi.

¹⁷Ama mi ta mi ma bma mihin zhin, ntuge mi to ye zhin celon, laifi nu n kwo dna n mi, n du mi kala nyi, kwoi zhin mi mi-i zhin abo a nukwoyi.

¹⁸Mi kpelo nge mi la bwo n mi nai kwo-kwoyi, kwo n miya pmi lo n kni bwai nu'a, mi ta mi ma zhin mihin ma zhin be manan, mi n cei pmalo ama mita min.

¹⁹Sa n mi cei pma ma zhin be manayi, mi ta min, n ma zhin atna to ma zhin benukwoyin, ma zhin kwonu.

²⁰Ama ngye mi zhin bo lo n mi to n cei pman, kwo wunu ge laifi ye n mii shilo n kwo akun.

²¹Kwa wunu ge owa ye zhin tnutnu lo n mi, sanu n mi cei pma ma zhin obo n kwo bmiya ma ze ma zhin nukwoyi nu.

²²Miye ma zhin Shekwoyi beye, shi emi zawoi-woi ncei pma.

²³⁻²⁴ Ama nyalo n dna n mi mi, n mi oza kninya kwoi sun kun lo nmi-i, kwoi gyi nasara n mi-i, kwoi zemi laifi bara n kwo ye dnalo n mi. Nmi mi, mi cei pma ma ze bara Shekwoyi beye zhin yi. Ama ma gye mi ye zhin laifi bauta.

²⁵Omi za woi-woi gnami ge mi zhin be manayi, ama oza kwo-kwoyi nkwo dna nmi mi n cei pmalo kwa zhin benukwoyi. Ewuyi emi, mi la ze sun-sun nya. Nyi kadonu ba gni mi n nai efi nya ye'a? Ma gode n Shekwoyi, Yesu Kristi eyi Dagayi n lami gni woi la mi loya.

Aromayi 8

Ntuge iko Zafun wye-wyei ga nyaiko ye zhin mi nya nu dna Kristi Yesu-kwo la mi loya n laifi awun n ofiyi.

³Ato gni yi, n laifi akun ntuge yi kpe Shekwoyi awyidna ye lo nun, ntuge yita mi n ba kni ya shi bwan, ama Shekwoyi wa zhin zokwo do wa gni yi, wa tnu n wo Nugun yi dna n Zanyikwoci nayi ngye eyi nya, ama eyi anya n laifi yi wa wun laifi iko ya n yi tukwo. Wa ga wohin tukwo hadaya ntu yi alaifi bo.

⁴Ntu cenu, nsaiye yi ba mi ya vi Shekwoyi awyidna n ya vi Zafun Gyi-gyi-yi, to ya vi nayi kwo-kwoi n kwo dna n yi nyin.

⁵Aza nba fa oba nayi kwo-kwoi kwoi bwa iko tu n ba tukwo, ba vi bahin beye nu. Ama aza n ba vi Zafun Gyi-gyi-yi, ba nu zhin obo n kwo da Shekwoyi.

⁶Oza n wo vi Zafun beye wo ba bwa wye-wyeyi n bugba-fuyi. Ama oza nu wa vi nayi wo ba fi.

⁷Ntuge eyi oza kwo-kwoyi n kwo dna yi nyi kwo zhin nubayi nu n Shekwoyi, kwo ta ye kwa shi Shekwoyi awyidna bwan, kwoi ta min.

⁸Cenu zhin, aza n ba fi n ba nayi kwo-kwoyi iko sinta bai vi oba abo fawo n shakpe nukwoyi, ba ta mi ba zhin bo n kwo da Shekwoyin.

Oza Woiwoyi Nu Gyi Be

- ⁹Ama fyeto wu lo nun oza woi-woi nu zhin iko n fyei, ngye fye, n Shekwoyi Zafun yi lo n dna n fye mi, (Fya pa oza n wo to n Kristi Zafun yi dnalo n wo min, wo to zhin Kristi viyi nun kwo fyewyi.)
- ¹⁰Ko Idayake Kristi dnalo n mi ofya nayi ba fi ntu n laifi bo, ama of ya wyewyeyi ba pwo ntuge Kristi nku gafara zhin fye.
- ¹¹Ndei Shekwoyi Zafun nwa la Yesu kala n efi nyi, n dnalo n fyemi wo ba zhin ofye a nayi fifiyi, ba bwa wye-wyei nfyefi avun, ntu n zafun ye bo n wo dna n fye nyi.
- ¹²Ntu cenu, omi azaje yeyeyi kwo to zhin tilas nu nge fya vi ofye za kwo-kwoi bo fya zhin bo nwa gna fyem.
- ¹³Ntuge n fya vi kwo fye ku bwi, aba ta fye, ama dna n Zafun Gyi-gyi-yi iko fya bakwoya n kwa benukwoi zhin yi fye ba pwo.
- ¹⁴Aza vinya n Shekwoyi Zafun wu ba zokwo banu zhin Shekwoyi abi.
- ¹⁵Nlonu yi to ze ngye afyenu, yi wo dna n, ama yi zhin abo n gye Shekwoyi abi nwa gwo ba fi n wo iyali bai yiwo “Dada, Dada”.
- ¹⁶Ntuge owo Zafun Gyi-gyi-yi dabo n yi n ya bugba mi n ge yi zhin Shekwoyi abi nu.
- ¹⁷Shi yi zhin owo abi nu nyi, yi bei gyiwo gado – ntuge nya n Shekwoyi gawo Nugun Yesu kwo zhin eyi nyanu ce. Ama n yi ye owo mwa-mwa tilas ya gye azhin nkunsun nwoi.
- ¹⁸Wahala n yi sin n saiye nyi kwo to kunce lo a mwi kwo do n mwa-mwai n wo bei gayi nyin.
- ¹⁹Ntuge Shekwoyi anya zhin-zhin vinya zhi bai pmi nu, n hakuriyi, n awyetu yi nyipyeyi n Shekwoyi bei ku owo abi kala n fi.
- ²⁰⁻²¹ Ntuge dna nyipyeyi hi, akna wuyi atakanda, laifi, efi, nbwo-bwoyi-anya vinya nba gyi nasara tu n na anyi tukwo to n kwo beyei dna n Shekwoyi gbe ga-ba bei ku bwiwye- anyi vinya bei gwo mwa-mwa bai bwa loloya n laifi, n Shekwoyi abi bwa kwo agmada nyi.
- ²²Ntuge yi kpelo anya-zhin-zhin ngye anya-fanya n agbe-gbei na shinwa yi ba bwa nyasan bai fi nge ba pmi nyipyeyi ye.
- ²³Eyihin a Yesu viyi ko shiko nyi yi n Zafun Gyi-gyi-yi dna lo n yi mi ngye tuze eyi mwamwa nya, yi do dna n yi wye-wyei mi, a lo yi ya n na azhin-gye n wahala yi, yihin ce yi pmi nyipyeyi, wyi n Shekwoyi bei gayi eyi loloya towo abi nya bedo n nayi woi-woyi n wa zhin yi alkawali nyi, anayi n nyasan ta shan ba san, bai ta shan fin.

24A gniyi n gaiciya ga mi nu, gaiciya zhin awyetu nya n yi to ncei lo nsayi yen. Oza n wo n nyayi wota shan awye tun, waga gaiciya nge wo ƙa bwa kwon.

25Ama ndei yi ga Shekwoyi gaiciya n nya tukwo n kwoto zhin, kwo wu yi nge yi pmi n hankuri yi n bugba kalai.

26Dna n zokwo gmanyi Zafun Gyi-gyi-yi bmayi zhin n yi abesa yi fyegyiy-fyegyiy dna n yi aduwa zhin mi. Ntuge yi ta kpe nya ye lo n yi ƙa zhin aduwa n kwo tukwon, kwo n yi ƙa zhin cewon. Ama Zafun Gyi-gyi-yi zhin aduwa n tu yiƙo n bugba shanwo yi n na ta mi ada n gbeyi m.

27Eyi dada, n wo kpe eyi abugba ye n yi, wo kpe nya ye n Zafun da, sanu nwo gyiwye gayi dna n Shekwoyi beye nyi.

28Yi kpelo ge aƙo vinya nƙa bwayi ƙa lo tnu-tnu manayi n yi aba, ndei yi ye Shekwoyi lo, yi-i kunce lo nwo shiri yi.

29Ntuge, tunyi n kmisunyi, Shekwoyi bei ku da aza vinya n ƙa be wo aba, wo bei n cei pma-kpe aza nƙa ƙa be-ƙa ze ngye owo Nugun, n na bai owo Nugun wa ze oza kmisunyi dna nwo azaje.

30Shi wa kni yi, wa yi yi nge yi be dawo, sanu n ya be ncei wa ze yi ge, “tna laifi da,” Wa nuyi n Kristi bemanayi wa gayi agni-gni manayi n wohin yi, wa zhin yi alkawali owo mwa-mwa nya.

Shekwoyi Ma Lo N Yi Bwa

31Yi ƙa da gena tu aƙe a wo-woi ye tukwo’a? Ndei Shekwoyi malo n yi bwa, nyikado nu ƙa zhin gaba n yiya?

32Tunda wo to kni wo Nugun gnin, ama wa gawo ntu yi ƙo vinya, wota gayi anya vinya ngnisun nwoyin?

33Nyikado ƙa da beda nukwoyi tu n yi tukwo, Aza n Shekwoyi laƙa kni ƙa ze owo nya? Shekwoyi? Awo, owo nu na zhin yi gafara wa gayi agni-gni manayi n wohin yi.

34Nyikado ƙa zunyi knia? Kristi nu ƙa zun yi kni? Awo, gama owo nu na fi n yi ƙo, wa la kala n efi ntu yi ƙo, woi sase tulo n Shekwoyi aba, n latu dnagmayi aba, woi gyi wye gayi n eshemi.

35Nyikado nu ƙa gwo yi Kristi yeye ya? Sanu n ya sin wahala kwo a zhin, sanu n na zan yi shin kwo Zawuyi, ntuge wota ye yi lonu? Sanu mikun gunyi to yi ye n gyiwye yin, ko yi dna n na a-zhin-gye kwo aye awuyi, Shekwoyi n ku yi ya n nu?

36Awo, gama littafi a gnayi, ntu n wo ƙo tilas ya zhin shiri ya sin wahala n saho-sahoyi, yi wu ngye akni nu n ƙa pmi a wuba.

37Nna beye vinya, Nasara zhin yi nyanu dna Kristi n wa ye yi wa fi ntu n yi ƙo nyi.

³⁸Ntuge mila gaiciya ga nyaho tami kwa gnayi aje n Shekwoyi yeye yi n. Efi ta min, wyewyei ta min, a malayika ta min, anapi kala vinya ta min kwa gwo yi Shekwoyi yeye yan, Eyi dnawo n naiye nya, n bugba wun yi nsu nya yi.

³⁹Kwo aba n yi nyi, n eshe bmana, dna n nuwan yakwo min, Nyaho ta mi kwa gnayi ajeya n Shekwoyi yeye yin n wa wuyi dna n Yesu Kristi, Sanu n wa fi n yi bo nyin.

Aromayi 9

A Israilayi Gado

¹⁻³ O, omi aza a Israila yi! O, om azaje Yahudiyi, shi mi n cei pma lo n mwa fya be Kristi aba. Omi bugba wo mi shan lo, bugba yi wun mi n nyipyeyi n sukwoyi ntu n fye bo. Kristi kpelo, Zafun Gyi-gyi-yi kpelo, nge mi ta da egbe beda nun, Sanu n ma cige mi yelo a mi gmiya n Shekwoyi ebe mi, ngye deye ba zhin fye fya bwa gni-gni.

⁴Shekwoyi ku anya ga fye n mwa, ama fye ta wo wo lon. Wa kni fye n gye owo aza yeyeyi, wa kni fye wa gni fye busi n wo buzagna mwamwai, wa wufye shiwo n cei pma wa tu fye anabarka, wa ga fye owo awyidna ntu n fye a sese bo n na bai fya kpe enya n wo ye fya zhin. Wa fa fye fya zhin wo sujada wa ga fye alkawali a adnagmai.

⁵Aza dnagmai Shekwoyi anya efye zakwoyi nu Kristi nwohin, bei gmi nfye nuwo zhin Yahudiyi nu dna n nayi owo nwo gyibe tu n na anya she vinya nsaiye nyi. Mwa-mwa n Shekwoyi aba nyalo-nyalo.

⁶To, Shekwoyi ta mi lo nu wa nuwo alkawali n na Yahudiyi abarn? Awo: (Ntuge alkawaliye zhin aza nya nu nba zhin a Yahudiyi hin-hin nyi.) Aza vinya nu to n na maba fi n na Yahudiyi fye, n ba zhin a Yahudiyi hin-hin.

⁷Oba kun-kun n Ibrahim, ta zhin ba ba ze Ibrahim abin, Shekwoyi beda, nku da nge alkawali zhin Ishaku, Ibrahim nugun anyanu, n Ishaku ayawyi yi. Koda yake Ibrahim bei n na abi ajeyi.

⁸Kwa wu nu ge Ibrahim abi vinya nu to zhin Shekwoyi abin, ama aza nba ga alkawali gni-gni nya gaiciya n wo bei zhin Ibrahim nyi.

⁹Shekwoyi ku alkawali zhin nge, "Ntna, oho n Saratu yi n bei ga fye obi".

¹⁰⁻¹³ Aye n mwa begye n navun sanu n wo nugun Ishaku bei la wo nyikwo la, owo nyikwo Rifkatu, woi la ga abi ma a-za-ba, Shekwoyi wa gna wo Isuwa obi n na ba ma kmisunyi nyi, wo ba zhin Yakubu owo mado bara. Dna n Shekwoyi beda, "Mi la Yakubu kni ma tuwo anabarka to ge Isuwam". Shekwoyi bei dace to ai ma abi yen, to bai kpe bemanayi ye n benukwoyi n sapa. Wo to bei zhin ce ntu n nabo nu n na bi bei zhin m, ama nya n Shekwoyi bei ye wa kni.

- 14**Shekwoyi bei zhin benukwoyi nu? Awo.
- 15**Ntuge Shekwoyi bei ku gna Musa ge, n ba wu oza alheri n ma ye, magye oza sun-sun n ma ye.
- 16**Ntu lonu, Shekwoyi ta ga anabarka ntu ge oza kun ce wa bwa kwo nun, kwo wa zhin tnu-tnu n kala yi wa bwan, wo bwa ntuge, Shekwoyi gye oza sun-sun nu n wa ye ko n wa gye dama.
- 17**Firauna, Masar Esu bei zhin besisi nu gaiciya ye nya. Ntuge Shekwoyi bei ku gnawo ge wo la Masar ebe ga wo ntuge wa wuwo Shekwoyi iko n wo tukwo. N nabai anyi vinya ba wo Shekwoyi eye mwa-mwa.
- 18**Ntu lonu fye gye, Shekwoyi wu azaho alheri ntu ge wo n cei pmanu, wa zhin azaho n na tukwoi kwa gnana to ba wo bon.
- 19**To, kni nu zhin Shekwoyi woi gye ba laifi, nge bata wo lo n ma? Ba to zhin obo n wa gna ba ge ba zhin?
- 20**A'a to dalo nun, Ho zhin kni nua ha zan Shekwoyi zanshin n laifi a? Enya n na zhin ko, kwo ba mi kwa gna oza n wa zhin kwo nyi ge kni na zhin hoi zhin mi n layia?
- 21**Sanu n oza mi shakun, wo to n ikoyi lo wa zhin apma n ezun yi gmanyi wa mi shakun manayi ntu n zhedu bo wa mido ntu n pashe fi bon?
- 22**Shekwoyi to n ikoyi lo wa wu wo minagyi n na aza tukwo n ba kuncelo a wuban, aza n wa zhin hakuri nbai n sai mwa n?
- 23-24**Wo n zokwo yi lo-lo, nge eyi n na akuyi ze aza n wa ze owo mwa-mwa ya kpe ba, ko yi zhin a Yahudiyi nu, ko yi zhin abyedo nu, wa wuyi alheri n na bai aza vinya ba gye shi owo mwamwa nsun.
- 25**Fye pa lo enya n Hosia anabci a da? Shekwoyi wa cige, "Wo ba bwa abye do ga wohin (aza nba ta kun n na Yahudiyi byen) wa ye ba ko da yake oza to shin ba yen."
- 26**Aza n na bei zhin ai ciba ge, "Fye to zhin omi aza nun," aba yi ba nsai ge, Shekwoyi wye-wyei da abi.
- 27**Ishaya anabi bei da bo n na a Yahudiyi tukwo wa cige, Koda yake ba ba mwa begye ngye amwi n ela gbe, aza n bwasun ciwiyi nu n ba bei pwo n bami.
- 28**"Ntuge Dagayi bei dawa n na anyi tukwo wa zo owo atnu-tnu n bai wa zun ba ya kpekpegye."
- 29**Ishaya wa je gna n na abado nge nto n Shekwoyi sun-sun gyei nun, abei wu a Yahudiyi vinya, oba vinya shi abei wu aza vinya n ba bei fi n Sodon n Gomora zhimi nyi.

³⁰To, yi ba da ge nana n na beye tukwoa? Yi ba cige Shekwoyi la esa ga abye aje woi zhin ba gafara dna n gaiciya gami, ko da yake ba ta zan Shekwoyi zanshin.

³¹Ama, a Yahudiyi n ba zhin atna ba bwa agni-gni manayi ntu n na awyidna bwashi bo, bato gyi nasaran.

³²Ntu n knibei nua? Ntuge ba bei zhin atna ba bwa gni-gni ntu n na awyidna bwashi n atnazhinyi baze aza manayi maimakon baka gaiciya, baku ce bonyi n kuta bonyicenyi dnagmayi.

³³Shekwoyi bo ku pma ba gna dna nwo beda wa cige, “Mila Apma shi na a Yahudiyi zokwo, aza n mwa begye ba ce bonyi n wo (Yesu) aza n ba gawo gaiciya vinyikwo ta wo bam.”

Aromayi 10

Gaiciyaga N Seida-zhin-yi

¹Omi azaje omi bugba beye n mi aduwa yi nu nyi nge a Yahudiyi ba bwa gni-gni.

²Mi kpe ba bugbadna ye lo n ba cei lo ntu Shekwoyi latu bo, ama bugbadna deye zhin gbeloyi nu.

³Ntuge bata kpe genyi lo nge Kristi la fi ntu ge wa zhin ba zhi n Shekwoyi aba, ama bai zeze bai zhin atna ba zhin bemanana n na bai ba bwa Shekwoyi agmada dna n na Yahudiyi a wyidna n na knunu yi, ama ba nu to zhin Shekwoyi gni-gni zokwo m.

⁴Bata kpe genyi lo ge, Kristi ga aza nu n ba ga gaiciya, anya vinya n ba zhin atna ba bwa, dna n na awyidna bwashin. Wobo ku ce zo vinya.

⁵Ntuge Musa bei ku ka, ge ngye oza ba mi wa zhin bemanayi, to wa zhin benukwoyin, wa gyi nasara n jarabai dna n wo asese, n na ba yi nu, n naba zhin wo gafara wa pwo!

⁶Ama gni-gni n kwo be ntu gaiciya ga bo kwo cige, “Koto n na apmai lo ba zan nshemi ntuge ha gmi Kristi be n cei n wa bma ho zhin.

⁷Koto n na apmai lo ha lo ho zan wo shin dna n na azafin aba ha jowo ze be ncei n efin.”

⁸Ntuge gni-gni n kwo be dna n gaiciya ga n Kristi, ekwo nu zhin nya n yi zhin wa’azi, kwo to mwa kpa lon n zaho-zaho yin, behin-hin kwo wo viyi lo n yi ngye, eyi abugba n yi agbei.

⁹Ntuge n ha gna aza n ho gbeyi nge Kristi Yesu nu zhin ho Dagayi ha ga gaiciya nho bugbami nge Shekwoyi lawo laka n vingwo, ho ba pwo.

- 10**Gama dna n gaiciya ga nu nbugba n oza bwa gnigni manayi n Shekwoyi aba, n wo gbeyi nu njesun n wo gna aza owo gaiciya ga bo.
- 11**Gama Shekwoyi beda gna yi ge, oza to lo n wo ga Kristi gaiciya vinyikwo kwa wo won.
- 12**A Yahudiyi n na tna kaciya zhinyi gmanyi nu, oba Dagayi gmanyi nu n wo gaba anya vinya, n ba nya wo n bugbai gmanyi nyi.
- 13**Oza n wa yi Shekwoyi eye wo ba pwo.
- 14**Ama baƙa nya wo n wuna nge wo gniba a kpe baga gaiciya? Bai ba gawo gaiciya n wuna to bai wo wo bon ma? Bai ba wo wo bo n wuna to ozai gna ban ma?
- 15**Oza ba lo n wuna wo gna ba to ai tnu wo ma? Nya nu n Shekwoyi beda da sanu n kwa ci n cei ge, “Gye shi oba apita bmiya obanu nba zhin bugba fun nabari manayi Shekwoyi nya wa’azi, bai be n nabari a gmada nyai. Aza a yeyeyi nu aza n ba zhin Shekwoyi nabari manayi wa’azi nyi.”
- 16**Ama aza vinya nu to n ba wo nabari manayi ba gwon. Ntuge Anabi Ishaya bei ku da “Dagayi nyikado la gaiciya ga bo n ma gna ba nyi’a?”
- 17**Ama gaiciya ga be n Shekwoyi beda wonu, Nabari manayi Kristi nya.
- 18**Ama a Yahudiyi ma? Baku Shekwoyi beda wo? E, gama kwola lo aba n ba nyi vinya. Aku nabari manayi zhin wa’azi har anyi ce zhi ba.
- 19**Ama ba bei ku awyega bwa (nge Shekwoyi ba ga aza je gni-gni to bai ya gwon?) E, ntuge tunyi n Musa sa, Shekwoyi bei ku gna ge, wo ba zhin owo aza ba wo oshe, wa zhin atna wa kun ba agyewyi n wa gni-gni ga abyedo atna cei.
- 20**Ishaya bei je da ntna edna ge, aza nba to zan Shekwoyi shin ba ba bwa wo.
- 21**Nsaiye, wo zhin atna lo wa si a Yahudiyi kpe, ama ba gyi abye na benayi, to bai ye ge ba bem.

Aromayi 11

Shekwoyi To Na Wo Aza Bom

- 1**Ma nya bo, Shekwoyi ku owo aza a Yahudiyi yanu? Awo, ko fye wyi, Fye pa ge mi zhin Yahudiyi nu n mihin, Ibrahim yawyi n Banyami bye.
- 2-3** Awo, Shekwoyi to yawo aza n wakni tunyi n sapan, fye pa bolo n littafi a da tu beye tukwo? Anabi Iliya bei cibwi kpe Shekwoyi ntu n na Yahudiyi tukwo, shi a ku Shekwoyi anabi wu, ai la Shekwoyi a bagadi baya, Iliya bei gye ge owo nu bwa cedna n knihin n wo gmanyi woi ye Shekwoyi, ba zhin a tna ba wuwo n wohin.

- ⁴Fye pa amsa lo n Shekwoyi bei gawo? “Shekwoyi bei ciwo ge, awo, oho nu to ce n ho gmanyi yin. Mi n na azayi lo lo dubu tnaba n ƒa yemi lo, bai to gba shan.”
- ⁵Kwo wu lo lo nu n naiye. A Yahudiyi vinya nu to pmi avun wu Shekwoyin. Azalo fyewyi n na gniba ntu n Shekwoyi alheri ƒo n wa kniba.
- ⁶Ngye Shekwoyi alheri nu agye oba ƒemana zhin nu ton, nzokwoye cauta to shan kyauta nu zhin, kwo to zhin cauta nu, zai ya zhin tnu-tnu nu wa bwan.
- ⁷Kwo wulo n lonu, A Yahudiyi n mwa to bwa Shekwoyi alheri nƒa zanshin. Fyewyi n ku bwa aza n Shekwoyi wa kni-ama aza nƒa ce nyi awye n ku ƒa bua.
- ⁸Nyanu n Shekwoyi beda da sanu n kwo ci n cei ge, Shekwoyi laba shigye, woi guƒa awye n na tunbuayi n na bai to ƒa kpe obo ye n yi da, sa n ya gna ƒa Kristi ƒo n cei. Kwo wulo n lonu nu har naiye.
- ⁹Dauda Esu ƒei ku ce da sanu n wo ƒei ci n cei ge, “Fwa oba nyagyi manayi n anabarka do yi kwo pi ƒa agam ƒagye nge ƒeho to lo n ƒa; tasin n Shekwoyin. Fa anya a manayi ye ƒa je zekpe ƒa, ƒa wuƒa, ƒa ƒa ƒaya.
- ¹⁰Fa oba awye ƒa dna wyegma n na bai to ƒa gye wyeban, ƒa zan-zan n ya kpe ntu n na kaya shan wo ƒo.”
- ¹¹Kwa wunu, nge Shekwoyi ku owo aza ya har abada? Awo, Owo nufi n na bai abyedo ƒa bwa pwopwo. N na bai ƒa Yahudiyi ƒa wo she ƒa ya Shekwoyi gni-gni zanshin ga ƒahin.
- ¹²Nsaiye, ndei anyi vinya ku nya bwa ntu Shekwoyi gni-gni ƒo, sanu n na Yahudiyi ƒa ce bonyi to ƒa ye kwom. Ai anyi ƒei gna anabarka bwa sanu n a Yahudiyi ƒa gwo Kristi.
- ¹³Shi fye kpelo ge, Shekwoyi lami kni owo tnu-tnu yi nfyee aba abyedo, mi gnafye, mi-i ce a Yahudiyi ƒepa shi mi ƒa mi nsun.
- ¹⁴Nna bai n kwo yezhin ma zhin ƒa ƒa ye enya n fye abyedo n cei lo, n zokwoyi magni azaho nƒa mi.
- ¹⁵Kwo ƒei ze ƒe wowo ƒa ya ze a Kristi viyi. Sa n Shekwoyi ƒei pmiya n ƒa aba kwa wunu nge wo ƒei pmida anyi wa gaƒa gni-gni. Nsai ye kwo dulo n ƒewowoyi a Yahudiyi ƒa ƒe da Kristi. Kwo ƒei ze ngye aza fi nu na je kukala n efi.
- ¹⁶Shi Ibrahim n na anabi yi zhin Shekwoyi a zanu nyi, oba ƒi ƒa ze Shekwoyi aza ce, Ntuge n Shinwan gbegye gyi-gyi-yi okwa bwala ƒa ze a gyi-gyi-yi nu ce.
- ¹⁷Ama a bwala ho n Ibrahim shinwa, a Yahudiyi ho, ala ƒa kaya, efye abyedo a bwala a bmana nya, ngye zaitun bmana nya bwala, a fyefyegy. Nlonu n saiye fyei gwo anabarka n Shekwoyi ƒei ga Ibrahim n wo aƒiyi ƒa sin shinwa gma n Shekwoyi wa nu n wohin tukwoyi.

18Fye zhin peceiye kada fya gma ntuge aku fye fi n ba apita nu. Fye pa nge a kpe fye ye ntuge fye filo n Shekwoyi shinwa nu, Fye zhin abwala nu fye to zhin a gbege nun.

19“To” ko yezhin lo ha cige abei ibma a bwalai ya ntuge a fyemi nu gyi, ntu cenu mi zhin bo lo n kwo kunce.

20Fye zhin peceiye. Pa ge a bwala ho, a Yahudiyi a bei bma ba ya ntu ge bato bei ga Shekwoyi gaiciya nun, fye zhi n ya ntuge fya gawo gaiciya nu. Fyeto zhin abo-kwon, gye gba fyehin tukwo fya zhin igodiya, fya zhin peceiye.

21Ntuge n Shekwoyi to fa abwala nwafi ba tunyi n sapan, wo ta fa fyehin.

Shekwoyi Zhin Wa Nu Wo Alkawali

22Shi awye hagye shi Shekwoyi zhin alheri dna bo, wo gyiminagyi n na azai nba ta vi wo bon, ama wo zhin bemanaga fye fyei ya gyi abye fya yewo n gaiciya gayi, ama nfyeto zhin lo nu maba zun fye ya.

23N zokwo do, Nna Yahudiyi fa ba tna gaiciya ga ba jeze be da Shekwoyi, Shekwoyi ba je ba fyegy n shinwa. Wo n ikoyi lo wa zhin lonu.

24Ntu ge n gye shi Shekwoyi bei la ye wa gwo fye n fye bei mwa kpa n woi, n fye bei zhin zaitun bmana nya bwala, wa fye fyegy n wo shinwa manayi onya nna ta shin zhin-fye gye ge woto gni n shiri yi nu zhin wa je a Yahudiyi gwo n jesun n ba bei shin fi n kmisunyi nyin?

25Mi n cei pma fya kpe gaiciya ye n Shekwoyi aba, emi azaje yeyeyi n na bai nfyeta mwa fyehin tukwo fya ya abokwo zhin, E, kwo zhin gaiciya nu nge a Yahudiyi ho zhin gaba lo n Nabari Manayi-nsaiye, ama kwo ba bwa esanu la n fye abyedo fya ku be Kristi aba vinya, efye n fya ye fya be.

26N navun Israila vinya bapwo. Fye pa obo lo n anabi bo da n beye tukwo? “Gniyi ba gmi n Sihiyona, wa pmi a Yahudiyi awye ya n benukwoyi zhin.

27Nsaiyi mbei kuba a laifi ya, she ma zhin ba alkawali”.

28Nsaiye, a Yahudiyi n mwa begye zhin anuwuyi nu nabari manayi nya. Degye n la ze gyiba nfyeta aba, ntuge kola be efye abyedo n Shekwoyi cauta yi, Har nsaiye a Yahudiyi zhin Shekwoyi aza yeyeyi nu, ntu n wo alkawali bo n wo bei zhin Ibrahim, Ishaku n Yakubu yi nyi.

29Gama Shekwoyi cauta n wo yiyi-i kwo ta shan kman, wotajeze n na vunyi n wo alkawali n wa zhin nyin.

30Nsapai, fye bei zhin Shekwoyi a nubai nu, ama sa n na Yahudiyi bei na Shekwoyi cauta abo wa gye fyenu sun-sun.

31Nsaiyi ye a Yahudiyi nu zhin tawaye ama n wyihoi ba bei gni Shekwoyi sun-sun gye bwa n fyei.

³²Gama Shekwoyi ku ba ya ga benukwoi zhin n nabai wa gye aza sun-sun vinya.

³³O, Shekwoyi, bo wo-woyi danu n yi n cei. Owo wyemwa, n wo beyekpei n wo nyabwai kwo dna bo lo ya kpe owo shawara ye n wo azokwoi.

³⁴Nyikadonu n yi mi kpe Shekwoyi bugba yelo a? Nyikadonu n beyekpei lo wa ga Shekwoyi shawara wa wu wo zokwo a?

³⁵Nyikado nu ba ga Shekwoyi nya kunce kwa zhin wo wa zhin bo a?

³⁶Gama anya vinya kun n Shekwoyi aba nu. Anya vinya bwa wye-wyei dna nwo ikonu. Anya vinya nyi ntu wo latu bo nu. Mwa-mwa nwo aba nyalo-nyalo Amin.

Aromayi 12

Apma Zhin N Shekwoyi Anyaga Yi

¹Ntu cenu mi gyi fye wye fya gafye anayi n Shekwoyi akun, ba ze hadaya wye-wyei gyi-gyi-yi nya, odo pya n wo ba gwo. Nfya pa obo bo n wa zhin fye, deye duwyi lo wa nya fye?

²Fye to shan hali n na kunnu anyi nya yi n, ama fye ku ze aza woi-woi n nabo nfye ba n zhin, nfye nubo zhinyi. Nlonu fye ba kpe nfye abo-mutu shiwo zokwo ba fu fye nubo.

³Ngwe Shekwoyi tnu-tnuyi mi ga zaho-zahoi nfye mi Shekwoyi pmagna: Fye zhin gaiciya n fyehin tukwo bo, fyei mwi shi Shekwoyi wa ga fye gaiciya-ga n sun.

⁴⁻⁵ Shi agalo n mwa begye n fye nayi n lo nu Kristi nayi. Yi zhin aga nu owo nayi nya, zaho-zahoi n yi mi woi nu kwo ntuge yi n na tnu-tnuyi lo gbo-gbo.

⁶Shekwoyi, n gbai ga zaho-zahoi n yi mi nwo ba zhin ba n bmiya N Shekwoyi n la anabci zhin gba nu ga fye, zhin anabci nsai vinya n ho ba mi-n sai vinya, n ho gaiciya ga n kalai lo n ho ba gwo tnu-tnu-tnu Shekwoyi aba.

⁷Ngwe ho nyaga zhin aza bmazhin nyanu, bma ba zhin cewo. Ngwe ho zhin malami nu wu nya n bmiya.

⁸Ngwe ho zhin wa'azi zhin yi nu kpe ge eho wa'azi n kalai lo n bmazhin yi dna. N Shekwoyi la gyiwye gaho, bma azaje zhin n cei. N Shekwoyi la aza bwashi tnu-tnu ga ho woi ku azafiho n nakun zhin tnu-tnu n ho kala yi. Aza n Ba zhin abugba zhi-zhi da a tna ba zhin kwo n bugba a Kristi yi nya yi.

⁹To ye aza n gbeyin, yeba cewo. To ye enya n kwo to bmiyan, ye bemana ha zhin kwo.

¹⁰Fye ye n na ajei ngwe aya-bi, fya ga aje mwamwa n bugba buibui.

- ¹¹Fye to wo bwato n fye tnu-tnu yin, ama fye zhin Dagayi tnu-tnu n bugba bui, bui.
- ¹²Dagma n tu nyaɓo n Shekwoyi z hin gaho, zhin hakuri n wahalai, ha zhin aduwa ci-ci.
- ¹³Sanu Shekwoyi abi gyisan, bma ɓa zhin, zhin ha yi azhibei ɓa ɓe nyagyi n ho puwa ko kwa nɓa ye agyewan aba n sukwoyi.
- ¹⁴N oza zhin fye ɓenukwoyi ntuge fye zhin Kristi nya nu, to tu wo eknin, zhin adduwa Shekwoyi wa tuwo anabarka.
- ¹⁵Sa n na aza dagma ha dagma n ɓai, n ɓa wun bugba ha bma ɓa bugba wun.
- ¹⁶Fye zhin tnu-tnu n dagma ngnisun. To zhin n gye ho zhin zadnagmayin. To lodna n na aza yakwo aban, ama gnalo n ha sharayi. To ha ci a ɓo n gye ho kpe beho ye lon.
- ¹⁷To gba ɓenukwoyi ta n ɓenukwoyin. Zhin beho-behoyi cewo, aza kpe ge hoto zhin zakata nun.
- ¹⁸To wu anya n zaho-zahoi. Bwa bugba buyi n na azai vinya ngye shi ho ɓa mi.
- ¹⁹Emi anugundo ye-yeyi fyeto gba ɓe ta ga fyehin. Fa kwo ga Shekwoyi ntuge wo ku gna ge wo ɓa gba aza n kwo kunce. Fye to la owa dna n fye akun. (Wato fye to zun owa gnan).
- ²⁰Gaho nuwunyi nya gyi mikun ya gun wo, n nuwan mikun wo-wo gawo nuwan wa sin. Ho ye anakna nu kpe wo n tukwo, wato vinyikwo ɓa wo wo n ɓo woku zhin ho nyi.
- ²¹To fya ye ɓenukwoyi kwa gyi ebe tu n fye tukwon, ama fye zun ɓenukwoyi kni dna a bemanayi Izhin.

Aromayi 13

Kwo Bmiya A Yesu-viyi Ba Vi Bo

- ¹Fye ku ze abo vi-yi n na aza ba nɓa gyi ebe nyi, ntuge Shekwoyi nu na kpe ɓa n ɓo. Ebe ho to lo n Shekwoyi nu to shi kwo n wo iko yin.
- ²Ntu cenu aza n ɓata shi ekni awyidna bwan Shekwoyi nu n ɓa ta vi wo ɓom. Tata ɓa vi ɓa n na avun.
- ³Gama abusi-ɓiyi-da ta wan aza n ɓa zhin ɓefyecen, ama oza n wo zhin ɓenukwoyi tilas nu wa wo wo dna. Shi awyi-dna bwa ɓoho ta bwa hon.
- ⁴Shekwoyi tnu n na busi ɓiyi-da yi ɓa bma fye nu zhin. Ama n ho zhin ɓenukwoyi tilas ha wo wo dna ntuge wo ɓa wan ho. Shekwoyi wa tnu n woi n cenu.

⁵Shi awyidna bwa ntu a bo bo ngun aba, kmisunyi, n na bai to a wan hon, bayi, ntuge ho kpe lo ge kwo kunce lo.

⁶Fye gba gadu cewo, ntu aboye bo n gun aba. Ntuge a gba a tnu-tnu zhinyi n na bai ba gyi abye n Shekwoyi tnu-tnu zhin yi, bai zhin fye bauta.

⁷Fye gba ozaho-zahoi nya n kwo kunce, fye gba ofye gadu n bugba bui-bui, fye vi aza bo nba kpe n fye she. Fye ga aza mwa-mwa n kwo kunce nbayi.

⁸Fye gba ofye ata vinya, a kpe yeye ta fye to zo kwo gban, ntuge n fya ye n bayi fye zhin Shekwoyi beye nu, fyei shi wo awyidna bwa.

⁹N ha ye n ho zado yi shi ho ye n hohin sun, hota ye ha gyi wo fin, ho taye ha wu won kwo ha wyiwo vim. Hoi ta zhin be nukwoyi n wo nyikwo yin kwo ha ye enya n wo n ceyin, kwo ha zhin be n na awyidna ngu n awo agna nge ato zhin. Ngun awo vinya pupuru fi n gmanyi ye nu. Ha ye n ho zado yi shi ho ye n hohin tukwoyi.

¹⁰Yeye ta zhin za benukwoyin. Cenu zhin Kwoi nu zfiin abo vinya n Shekwoyi ye, wyidna gmanyi nu n fyeye.

¹¹Asese n bmiya dalili nyi n jesun. Fye kpe shi esa n la gba, esa busilo. La kun a gyewyi ntuge, Dagayi be be la gnawo vivi n du esa n yi bei ga gaiciya n cei.

¹²⁻¹³Sukwo n la duya, owo be-be nyipyeyi la ga be, Ntuce, fye kma be nukwoyi zhin ya, fya kpe bemana zhin. Shi kwo kunce a buzanga da sase. Fye zhin bemana fya zhin gaiciya n na abo vinya n fye ba zhin n na bai aza da fye bo manayi. Fye to wunsa ya n na gnikwo gniyi, n jesin yi, n na anagbayi zhinyi, n shakpeyi, n gu sun yi, kwo eshen.

¹⁴Ama gyi Kristi wye wa bma ho zhin, ha sase shi kwo kunce, to ha zhin shaula ha dagma dna n benukwoyi zhin m.

Aromayi 14

Fye To Ma Aje Bom

¹A Fye gwo oza n wo ye wa be da fye kwo owo gaiciya ga kwoi gba kala. To zunwo kni ntuge owo abonubozhin wulo gbo n ho nyai, tu abo tukwo n kwo bmiya n doi n kwo to bmiyan.

²Misali, to na abo n woi n na abugyi tukwo n na zun sha ga eshan. Ho ga gaiciya, nya ho to wunya lo nkwon, ama azaje gaiciyaga gba kala lo, ba gye kwo zhin nukwoyi nu, bata gyi abun sai dai ba gyi afintolo, cei ya cece ge ba gyi abuyi pya.

³Aza n ba gye kwo to wunya lo ba gyi abuyi pyan, bato ci aza wyegba n bata gyin. Nho ta gyin to gye ba laifi n ba gyi nyin. Ntuge Shekwoyi la ba gwo ba ze owo abi.

⁴Ba zhin Shekwoyi a bara nu, ofye nyanu ton oba nuwan lo n wo abanu toge nfyen aban, Fye fa wa gna ba kwo kwo bmiya lo, kwo kwo to bmiya lon, Shekwoyi bami wa zhin ba ba zhin shi kwo kunce.

⁵Azaho zhin nuboge a Yesu viyi ba shi a Yahudiyi anyipyeyi asun-sun nya nu bwa, anyipyeyi n ba ba ga Shekwoyi mwa-mwa n cei, ama aza ho ci ge kwo zhin gbelohi nu nya zenu za zhin abei pya, ntuge anyipyeyi vinya zhin Shekwoyi anya nu. Nna beye pya ozaho-zahoi nu ba zhin obo n kwo kunce.

⁶Nho n na anyipyeyi kni hoi ga Shekwoyi mwamwa, ho ye ha lawo tu ho zhin be manayi nu. Nlo nunce oza n wo gyi abu n na zun sha ga eshan. Wo sa Shekwoyi ami ntu nkwo bo, wo zhin be manayi nu, oza ce n wo ta to abuyi bwan, wo zhin atna nu wa zhin obo n kwo da Dagayi, Woi zhin godiya.

⁷Yi to zhin eyihin tukwo adagayi nu n, n yi bami ya kni ge yi bwa wye-wyei ko ya fin.

⁸Kwo yi n wye-wyei, kwo yi fi yi zhin Dagayi anya nu. Zokwo doho-dohoyi zhin wo anya nu.

⁹Kristi bei fi wa laka njesun ntu n na abeye bo nu. N na bai wo ba zhin yi Dagayi kwo yi nwe-wyei, kwo yi ku fi.

¹⁰Hoto n iko yi lo ha zun ho zado kni kwo ha ciwo wyegeban. Pa ge, ozaho-zahoi n yi mi wo bei gni agni gni n Shekwoyi wada a sese ba n wada wyi yi.

¹¹Ntuge, a cei kafi "Shi mi nyi", nyikutukwo dohodohoi bei ce a kwo-kwo n mi abye, nyitala doho-dohoi bei ye abui n Shekwoyi aba.

¹²Behin-hin, zahozahoi bei ga wohin tukwo nyadoku n Shekwoyi aba.

¹³Ntu cenu, fye to zhin aje laifi zanshin. Fye zhin atna fya sase, n fye ta zhin ofye do wa ce bwoyin, n na bo n wo ba gye ho hoi zhin n wo zhin nubwo ge bato bmiya lon.

¹⁴Nmi aba, mi kpelo lalle dna n Dagayi Yesu iko, nyaho to wunya lon, n na abugyi yi n na zun sha ga eshan. Ama, nza gna ge kwo zhin benukwoyi nu, to, wo to zhin m, ntuge n wo aba kwoto bmiya lon.

¹⁵Ngye oho zaho damu lon nyayi n ho gyi, hota zhin yeye be zhin nun, n ha gyi abye n gyi yin. To fa oho nyagyi kwa zhin oza n Kristi wa fi n wo bo wa bwin.

¹⁶To zhin obo n kwo ba be ho n wyegeba-ciyi, kwo hoi kpelo ge kwo bmiya lon.

¹⁷Gama abo kpakaiayi n yi a Yesu viyi aba, kwo nu to zhin nyagyi n nyasin yi, ama bemana, bugba fu, n na agmada yi n Zafun Gyi-gyi-yi aba.

¹⁸Nfya fa Kristi wa zhin Dagayi dna n na beye vinya, aba da Shekwoyi. N na azaje yi.

¹⁹Yi zhin atna ya zhin abo nba ba be nbugbafuyi, ya mi aje zhi.

²⁰Fye to wun Shekwoyi tnu-tnu ya ntu na abu bon. Fye pa nge nyaho towun ya lon, n na bugyi yin, ama kwo wunya lo sa nu n kwa zhin ozado wa ce bwonyi.

²¹Obo n kwo bmiya okwo nu ha fa abugyi, ko jesin, kwo nya zhin n kwo ba zhin ohozado wa ce bonyi, wa zhin laifi.

²²Ho bami ha kpe ge nyaho to wunya lo n nya yi n ho zhin, kwo n Shekwoyi aba, ama kuce shin hohin, to wu ho gaiciya ga nza aba n kwo ba zhin wo wa ce bonyin. N na beye pya, bugba bui-bui da nu oza n wota zhin laifi nbe yi n wo kpe ge kwo bmiya n.

²³Ama nza kpe ge bo nwo ye wa zhin nyi kwoto bmiya lon, wo to zhin kwon wo zhin laifinu woi ya zhin, ntuge wo zhin nubo ge kwo zhin benukwoi nu. Ntu cenu n wo aba kwo to bmiya lon. Nyaho-nyahoi nza zhin woi gye ge kwo to bmiya lon kwo zhin laifi nu.

Aromayi 15

¹⁻² Kwo yi-i gye ge abeye to zhin nyaho nu n Shekwoyi aba kwo yi ya zhin ban, yita mi ya gyi abye ya zhin ban, ntuge ya da yihin agman, tile ya pa azaje bo nba shakai n dna, nba gye ge abeye to bmiya lo nyin. Yi zhin bo n kwo ba da azaje to ge eyihin, ya zhin bo n kwo ba bma wo zhin kwa miwo gni dna n Dagayi.

³Kristi to zhin bo n kwo dawo num, She, zabura ka yi wa da “Wabe n tuge, wa sin wahala, n na za kun nba wun Dagayi nu nyi.”

⁴Abeye n na cei kafi n litafi tunyi n sapa nyi, a kafi ntuge ba wuyi-atnazhin n bugba kala bwayi nu. Nnabayi ya pmi peceiye n hakuri yi har ewyi n Shekwoyi be zun laifi kni n efiyi.

⁵Shekwoyi n wo ga hakuri, n migniyi, n bugba kala yi, wo bma fye zhin fya sase n na jeyi n bugba dayi za-zai wuwo do Kristi hali.

⁶Nsayi, eyi vinya yami ci Dagayi n begye yi gmanyi, yi ga Shekwoyi mwa-mwa, eyi Dagayi Yesu Kristi Dada.

Abyedo Ba Dagma

⁷Ntu lonu fye ye, n na jeyi n ikklisiya, shi Kristi wa gwo fye n bugba bui-bui n na bai n Shekwoyi eye ba latu.

⁸Fye pa ge, Yesu Kristi wa be wa wu ge Shekwoyi ta dabo wa pman, njesun wa bma a Yahudiyi zhin.

⁹Njesun fye pa ge wabe n na bai abyedo ba bwa gnigni, ba ga Shekwoyi mwa-mwa ntu wo sun-sun gye bo. Nyanu n Zabura kayi wa da, sanu n wo bei ka n cei ge, “Mba ciho dna n abyedo, ma la oho ye tu.”

¹⁰Nna abado, “Fye dagma, ofye abyedo ngnisun nwo azayi a Yahudiyi.”

- ¹¹Njesun, “Fye ci Dagayi, ofye abyedo, fa aza vinya ba ciwo.”
- ¹²Anabi Ishaya wa cige “Gado gyiyi ba gmi n Jese puwa, wa gyi be tu n abyedo tukwo, ba bei tu awye n wo nu vinya.”
- ¹³Nlonu mi zhin aduwa ga fye abyedo, n na bai Shekwoyi n wo gafye awye tunyi, wa ga fye a gmada n bugbafu yi, shi fya gawo gaiciya. Mi zhin aduwa n Shekwoyi ba nu fye n awyetu yi dna n Zafun Gyi-gyi-yi iko n wo dna n fye nyi.
- ¹⁴Mi kpe lo fye zhin aza manayi nu n ceceyi, omi azaje, fye kpe abeye ye lo n fye bami fya wu azaje ba.
- ¹⁵⁻¹⁶ Ama mi n bugba kalayi lo ma je fye abeye gna, mi kpe lo fye ye ma pa fye banu kawai, ntuge n Shekwoyi alheri yi, mi zhin tnutnuyi nu n Yesu Krisiti wa tnu fye n cei abyedo. Mi befye n Nabari manayi mi-i ga fye ngye hadaya n Shekwoyi akun, ntuge ala fye zhanya, fyei zhin bo wo ye dna n Zafun Gyi-gyi-yi.
- ¹⁷Ntu lonu mi gye kwo bmiya lo ma gma, ntu anya bo vinya n Kristi Yesu ku zhin dna n mi nyi.
- ¹⁸Mi ta ye ma dabo shi wa zhin tnu-tnu n na azajeyi nun, ama n nya yi n mi kpelo, woku a pma zhin n miyi woi wan abyedo be Shekwoyi n cei.
- ¹⁹Ma wan ba n wa’azi yi nu, n mi zhin njesun n mi asese manayi nba abye, n na afo a wowoyi n wa zhin n mi abwai atuze n Shekwoyi aba, vinya n Zafun Gyi-gyi-yi iko yi nu. Dna n Zokwo ye, miku wa’azi zhin nabari manayi Krisiti nya tunyi Urushelima har Ilirukum.
- ²⁰Ama omi beye nu, miye lo abye mi zhin wa’azi aba n Kristi ye to si kpan, afa aba zado la ikklisiya shi.
- ²¹Mi vi shiri nu, nna cei kafi n litafi, aba n Ishaya cige, “Aza n ba to shin Kristi ye won baba gye ba bwa awye ga.”
- ²²Behin-hin enyanu n kwo zhin mi n cei pma ma be fya ba.
- ²³Ama n na avun omi tnu-tnu ku zo n ya mi n shiri yi zhin lo ma be n na aye awyekwo nya ye avun.
- ²⁴Gama mi zhin shiri lo malo Asbaniya n ma lo mi bei bma n Roma, bayan yiku esa manayi bwa n na jeyi fye bei gnami ami.

Bma a Yesu-viyi Asangyi-yi Zhin

- ²⁵Ama kafin mi be tilas malo Urushelima malo a Yesuviyi n cau-tai n bo.
- ²⁶Gama fye gye, a Yesuviyi n ba fi n Makidoniya n Akaya yi baku enya ga ntu n na azaje bo n ba fi n Urushelima bai sin wahala nyi.
- ²⁷Ba bei zhin kwo n bugba bui-bui ntuge ba gyelo ba ntayi shi a Yesuviyi lo nbafi n Urushelima. Ntu n kni bei ya? Ntuge nabari manayi Kristi nya kun n

Urushelima nu kwoi lo abyedo aba. Tunda ɓa bei gwo cauta Zafun nya nabari manayi nya nbenu ɓa gye be n ɓa ɓa zhin ɓa, okwo nu ɓa gaba akaya nanyi nya.

²⁸Sanu n ma gaba agyiwye ye, ma zo n batnu-tnu manayi yei, mi bei be ma gye fye wye mi-i lo Asbaniya lo.

²⁹Mi kpe lo sanu n mabe, Dagayi bei gami anabarka ntu n fye ɓo, ma befye n cei.

³⁰Fye ɓa zhin aduwa ngnisun n miyi? Ntu n Dagayi Yesu Kristi ɓo, ntu nfye yeye ɓo nfye yemi nyi, n Zafun Gyi-gyi-yi ga fye-fye zhin aduwa n mwa n gnisun n miyi ntu mi tnu-tnu ɓo.

³¹Fye zhin aduwa n nyaho ta bwami n na aza kun n ɓa ta vi Yesu Kristi nyin, n ɓa fi n Urushelima nyi. Fye zhin aduwa njesun n na Yesu viyi bei gwo agyiwye n mi lo ɓa n cei nyi.

³²Nnavun nmi ɓa mi ma be of ye aba n bugba bui-bui dna n Shekwoyi beye, yi ɓa gaje kala.

³³Nsayi ye, Shekwoyi n wo ga bugba fu nyi, wo kun sun n fyei.

Aromayi 16

Gnabi Vinya

¹⁻²Fibi nyikoza Yesu viyi n Kankriya zhimi belo wa gye fye wye safyewyi. Woku tnu-tnu zhin n mwa n ikklisiya ye. Fye gwo wo n gye mapui dna n Dagayi. Fyawu wo a Yesu viyi yeye. Fye bma wo zhin n zokwo doho-dohoi n fye ɓami ntuge wo ku bma aza zhin n mwa dna n ɓa sangyi n mihin be.

³Gna Biriska n Akilayi nge mi ɓiɓa gnaio, Ba zhin omi atnu-tnu kun zhin yi nu dna Kristi Yesu.

⁴Behin-hin, har oɓa wye-wyei ye kwa bwi n miɓo. Omi gmayin nu ta saba amin, har n abyedo n ikklisiya yi.

⁵Suku-suku fye ɓi aza gna n ɓa yezhi ɓa ci Shekwoyi n ɓa puwa. Fye ɓi omi nugundo manayi gna Abainatus. Owonu bei kmi Yesu vi n Asiya.

⁶Fye ɓi Maryamu gna n wa zhin tnu-tnu n mwa n na bai wa bma yi zhin nyi.

⁷Fye ɓi Andarinikus n Yunuyas yi gna, omi bye n ɓa bei kunsun n miyi fi n kurkuku nyi. Amanzani gaba mwa-mwa. Ba bei ku vi Yesu n mi abye.

⁸Fya ɓi Ambiliyatus gna, oza n mi ye ngye Shekwoyi ɓi.

⁹N Urbanus yi eyi tnutnu kunzhin yi, n Istakiyi oza yeye yi.

¹⁰Fye ɓi Abalis gna gami oza n Dagayi ye, fya ɓi aza gna n ɓa fi ɓai zhin tnu-tnu n Aristo bulus puwa nyi.

- 11**Fye bi Harodiyana omi bye gna, fya bi a Yesuviyi gna n ba zhin afyenu fi n Narkissus puwa nyi.
- 12**Fye bi Tarifaina gna n Tarifusayi Dagayi a tnu-tnuyi, n Barsisa yi n wa zhin tnu-tnu mwa ga Dagayi nyi.
- 13**Fye bi Rufus gna gami oza n Dagayi a kni ga Wohin, wa ze wonya, n wo iya yeyeyi, n wo la ze omi iya yeyeyi nyi.
- 14**Suku-suku fya bi Asinkiritus gna n Filiguna, n Harmisayi n Batrubas yi n Harmasayi n na aza jeyi n ba kusun n bayi.
- 15**Fye bi Flubugusa gna n Juliya yi n Niriyus yi, n wo mapuiyi n Ulumbasayi, aza gyi-gyi-yi n ba kusun n bai nyi.
- 16**Fye dna aje abwado, ikklisiya n ya vinya tnu fye n ba gnabiyyi.
- 17**Nsaiye, beda gmanyi n mi cei lo ma da kafin mi zo n wasika ye yi. Fye la pmiya n na aza n babe n na ajegnayi bai shan aza gaiciya ga a shan. Bai be n wuwuyi nkwo wu gbo, n doyi n aku wu fye.
- 18**A zayi pya ta zhin tnu-tnu ga eyi Dagayi Yesu nun, ama baye gyiba ga bahin nu. Ba zhin a beda kpedayi nu, aza nbato ceceyin, bata wo ba kwoce dnan.
- 19**Ama zaho-zahoi kpelo nge fye gni-a-gni lo cewo dna n gaiciya. Deye dami a gmalo. Miye fya sase cewo dna n nya n kwo bmiya, fya abwa kunya n nya n kwo to bmiyan.
- 20**Safyewyi, Shekwoyi bugbafu nya wo ba bma shaitan ya n fya pita sin ta. Anabarka nba kun n yi Dagayi Yesu Kristi aba ba kun-sun n fyei.
- 21**Timatawus omi tnu-tnu kun zhinyi, n Lukiyus yi, n Yasunayi, n Susibatrus yi, omi ebye ba tnu fye n ba gna biyi.
- 22**Omi Tartiyus n mi ka Bulus wasikaye nyi, mi tnu fye n mi gnabiyyi ce n gye Yesu viyi do.
- 23**Gayus wa gna nge mi bi fye gna ga wo, mi zhin wo zhibeyi nu, ikklisiya yezhi lo nwo puwa nu n ya. Arastus ma'aji, tnu fye n wo gnabiyyi n lonu Kawartus eyi zado.
- 24**Sai n wyihoi, Alheri Dagayi Yesu Kristi nya kwo kusun n fyei vinya.
- 25-27** Mi fi fye n Shekwoyi akun, n wo ba mi wa ga fye kala, fya mizhi n Dagayi nyi shi Nabari Manayi da. Shi ma gna fye n wu nyi. Shekwoyi gni-gni shiri nyi ntu n fye bo abyedo n soshi tnuyi n sapa. Ama shi anabi bei ku pmada shi Shekwoyi wa gbe, a zhin Nabari ye wa'azi lo n na abaho-bahoi, n na bai aza vinya n na anyi, ba ga Kristi gaiciya ba vi wo bo. Shekwoyi gmanyi n cece wum wo nu nyi, mwa-mwa kusun n woi ntu n Yesu Kristi bo. Har nyalo-nyalo Amin.

Akorintiyi I

Akorintiyi I 1

¹Wasika ye gmi n Bulus aba nu, n Shekwoyi bei yiwo ntuge wa ze aza tnu-tnu yi Yesu Kristi nya, bedo n 'yi zado yi na yiwo ge Sastanisu nyi.

²Kwoi lo Shekwoyi aza 'ba n Korinto, n Shekwoyi wa yiba ba ze Wa za, Woi la ba gwo dna n Yesu Kristi mi. Kwa lo aza ba vinya njesun nba yi Yesu Kristi, eyi Dagayi nba nya yi.

³Shekwoyi eyi Dada bedo n 'yi Dagayi Yesu Kristi yi, wo ga fye alheri n bugba fuyi.

Shekwoyi Anabarka, Fye Bwa Jedobe

⁴Mi zhin ma sa Shekwoyi ami cici ntu alheri manayi bo n wa ga fye she fye ku ze Yesu aza nyi.

⁵Wo ku fye ze anyabwayi n mwa. Wo ku bma fye zhin fyei da bo ga Wo, Woi la yekpe nunuyi ga fye dna gaiciya.

⁶Nya mi bei gna fye ge Kristi bo mi Wa zhin ga fye, kwo ku zhin.

⁷Fye la alheri doho-dohoi bwa nna anabarka yi n sayi; zafun nyaga doho-dohoi n iko yi fya zhin Wo beye, ba zhin fye nya nu dna saye n na zhi ai pmi eyi Dagayi Yesu Kristi Jezebe nyi.

⁸Wo la ye har nyalonyalo ayi fye aza kni-kni-yi, tna laifi n benukwoi yi dna Wo nyipyeyi jezezhi nya.

⁹Shekwoyi ba zhin fye beye ntna kma-kma, ntuge Wo zhin Wa zhin bo Wa da cim-cim. Owoi nu na yi fye ge fya zhin nugundo nwo nugun yi Yesu Kristi.

¹⁰Ama, oma-zaje, mi gyi fye wye dna Dagayi Yesu Kristi 'ye, fye ku beda ajegna nya ya nfya tasin. Fye ku ze gmanyi, to ajegna lo aduwa nyakun m. Fye la ye bedo, efye bo nubo-zhin gmanyi, bemwi gmanyi njesun.

¹¹Ntuge, omazaje, azaho n ba kun n Kuluwi Puwa ba ku gnami pei-pey nge fye wu anya lo n najeyi.

¹²Ntuge azaho cige, "Mi zhin Bulus nya nu" Azaho cige, "Mi zhin Bitrus nya nu." Azaho cige, "Mi zhin Bitrus nya nu." Aza ho ge, "Mi zhin Apollos nya nu." Azaho kwa bai cige, "Mi zhin Yesu nya nu."

¹³Fyela Yesu gnajeya wyiwo-wyiwo. Omi, Bulus, nu bei fi ntu fya laifi bo? A bei zhin fye batisma dna n Bulus eyenu?

¹⁴Ma gode n Shekwoyi ntuge mi to bei zhin zaho batisma n fye m akpege Krisbus bedo n Gayus

¹⁵Ntuce nu zaho-zaho yi ta mi wa cige gye mi ya obo woyi mi-i shi “Bulus aduwa nyakun m.”

¹⁶E, kuwa, mi bei ku batisma zhin Istifanus a puwa da ama mi ta shan zaho ɓo palon n mi bei zhin wo batisma m.

¹⁷Yesu to bei tnumi ma zhin batisma num, ama ma zhin wa’azi Nabari Manayi nya. Mi to zhin wa’azi n na beda ayakwoi fi aza beyekpe nyam, kada ko wun iko ya n ko dna n wa’azi fa-fayi Yesu zundu nya nyi.

¹⁸Gama Yesu fi-fi ti zundu nabari ko zhin gbolo-yi nu n aza bwi-bwi-yi aba. Ama n eyi aza gni-gni-yi aba, ko zhin Shekwoyi iko nu.

¹⁹Ntuge Shekwoyi wa cige, “miba ze aza zokwo gni-gni nya gboloyi, kwo ko bei bmiya n ɓa ba wuna, har beda n na ɓo nubo-zhin a beyekpei agbamgbam nya yi.”

²⁰To mi gye awyega da, abeyekpei n naza yi n ɓa mi n gbegyi tu na anyi nya tukwo nyi. Shekwoyi ku ɓa ze amama da, woi ku wu ge oɓa wyega zhin gboloyi nu.

²¹Gama Shekwoyi dna n wa wyega, wa ku kpe ge anyi ta kpe wo ye dna naza wyegam. Amma wa zhin ntuge wa gni aza dna n wa’azi zhin mi, n nanyi gye ko ge gboloyi nyi.

²²Ko ze gboloyi nu na Yahudiyi aba ntuge ɓa ye tuze n ’she kwa wu ge obo na zhin ko wa’azi nyi, ko zhin gaiciya nu, kwoi ze gboloyi nu n na Heleniyi aba, ntuge ɓa bwa nya gaiciya nu ga n ko lodo nɓa ɓonubo-zhin yi, nɓa wyega yi jesun.

²³Ntu cenu sa ya zhin wa’azi ge Yesu wa fi Wa gni ɓa nu, Ayahudiyi ta ye bedayem ko fyewyi. N na Heleniyi aba kwa, ko zhin gboloyi nu.

²⁴Ama Shekwoyi la awye gu aza ya, na yi ɓa ga gni-gni nyi, a Yahudiyi dnado na Heleniyi yi, ɓa gye she Kristi nu zhin Shekwoyi iko kala Wa gni ɓa; Kristi n Wohin tukwo Wonu dna n Shekwoyi shiri ceceyi nya atasin, ntu ɓa gni-gni ɓo.

²⁵Gama Shekwoyi shiri ye na gye ko ge gboloyi nyi, ko du zanyikoci awyega lo n ceceyi. Shekwoyi a-kala-gba kuwa–Kristi fi-fi tu n zundu–ko du zanyikoci doho-dohoi lo n kala.

²⁶To ema zaje, fye dnawye n fya tasin fya gye, aza fyewyi nu bwasun nfye mi nfye vi Kristi nyi n ’naye dnagmai yi, ko iko, ko kuwa n duciya yi.

²⁷Gama Shekwoyi bei kni aza gbolo n zanyikoci awye ntuge wa dna aza ce-ce vinyiko. Njesun wa kni aza gba-gba yi ntuge wa dna akalada vinyiko.

²⁸Wa kni shiri n ’nanyi ye ta gyeko ngye nya hom, ntuge wa ze anya gboloyi n nanyi ye gye ngye ɓa nu zhin anya dnagmayi.

²⁹N nabai ge ko knobwai na, to zaho-zahoyi wami wa gma gni n Shekwoyi abyem.

³⁰Ntuge n Shekwoyi aba nu gmanyi nfyeyeyei yi lo dna Kristi Yesu. Owo na wuyi Shekwoyi shiri ntu gni-gni bo; Owo na zhin Shekwoyi Woi gwo yi: Owo na ze yi aza Gyi-gyi-yi, Wona ga Wohin tukwo Wa gni yi.

³¹Ai littafi Gyi-gyi-yi ku da ge, "Zaho-zaho yi wo cei pma wa gma, to wo gma dna n 'nya Dagayi ku zhin."

Akorintiyi I 2

Shekwoyi Shiri Mama Nya

¹Ema zado, esanu mi bei be fya aba ma gna fye Shekwoyi nabari ce yi, mi to bei zhan pma na beda dadai yi, ko beyekpe dnagmaiyim.

²Gama mi bei la tu ge mi ba bwa beda tu n Yesu tukwo nu n Wo fiyi tu n zundu.

³Ntucenu ma be fya ba dna n kalagba, n dnawo yi, n vinvin yi.

⁴Mi to bei zhin wa'azi n beda dadai yi zanyikoci beyekpe nyam, ama Zafun Gyi-gyi-yi bei dna n ma beda Woi wu aza nba ba wo nyi ge, tnutnu bo gmi n Shekwoyi aba nu.

⁵Nbei zhin lonu n nabai efye gaiciyaga kwa kpema Shekwoyi nu, toge zanyikoci ho beyekpem.

⁶Ama mi da bo beyekpe nya n nazayi n baku mwa dna zafun. Beyekpe ye ta gmi nanyi ye num, kwoi ta da bo ga aza-yako anyi ye nya nu nba zhi bai miya nyim.

⁷Eyi abeda zhin beyekpe nya nu, ntuge ba kun n Shekwoyi aba nu, bai wu Shekwoyi shiri beyekpe nya kwa lo yi na gmada eshe nya. Shiri ye bei bwi shi n sapa, ko da shike abo zhin ko ntu ya pma bwa bo nu kafin ma a zhin anyi.

⁸Ama aza-yako anyi nya to bei kpe ce yem, ntuge ba bei gna ba kpe koye nu, ba to bei ba zun Dagayi mwa-mwa nya du m.

⁹Nya nu n Littafi Gyi-gyi-yi kwa da cei ge zaho-zahoi to shin gye, ko wa wo, ko wa zhin bo nubo cei, enya Shekwoyi ku zhin shiri ntu naza bo nba yewo nyi m.

¹⁰Ama yi kpe abeye yelo ntuge Shekwoyi la tnu n Wo Zafun yi Wa gna yi, owo Zafun zhin wa bi aba ya vinya, Wa wuyi asiri shin-shin-yi Shekwoyi nya.

¹¹She zanyikoci zafun n ko dna womi nyi, oko gmanyi nu kpe wa benubozhin ye, n lonu zaho-zahoi ta kpe Shekwoyi abo nubozhin yem, sai Owo Zafun gmanyi.

¹²Yi to gwo zafun anyi ye nya num, ya gwo Zafun n Shekwoyi nu, Wa wu yi anyaga amanai alheri nya n Shekwoyi ku ga yi nyi.

¹³Ntu cenu abeda n'ya da vinya, Zafun Gyi-gyi-yi nu na gayi ba, abeda nu to n zanyikoca knim. Ntu cenu yi zhin apma n Zafun Gyi-gyi-yi abeda yi ba wu Zafun Gyi-gyi-yi aƙo n bahin yi.

¹⁴Ama oza n wo to n Zafun yim, wo ta mi wa gwo anya n Shekwoyi Zafun gayim, ntuge wo ta kpe ba wyegam, ba zhin gboloyi nu n wa ba. Sai oza nwo Zafun Gyi-gyi-yi, wonu ba kpe Zafun Gyi-gyi-yi aƙo ye.

¹⁵Oza wo n zafun yi wo zhin wa mwi aƙo vinya, wa ku ba kpeye. Oƙo nu kuwa nko dami nanyi da yi, ntuge wota kpe zafun-da 'boyem – ko fyefye.

¹⁶Wo ba mi wuna? Ntuge wo to zhin oza nu nwo shin Dagayi abonubozhin ye kpem ko wa daƙo Woyi, ko wa shin Shekwoyi bwa ashanje nwa duwa zhin mim. Ama eyi a Yesu viyi, yi n Kristi bugba yi shi lo n Wa be nubo zhin yi.

Akorintiyi I 3

Abi Nawyi Tnu-tnu

¹Oma zaje, mi daƙo lo fyei ngye abi putu nu, dna Yesu vi zokwo, to fyei vi Dagayi m, sai ofya beye, mi ta mi ma daƙo fyei ngye a Yesu viyi kalada nba nunuyi lo n Zafun yim.

²Kwa zemi dole ma gafye madara to ge nyagyi kpakala yi m, ntuge fye to bei yi kunce fya gyi nyagyi kpakala yi m. Har saiye ma fye to kunce m, fye ƙo sin madara nu kpa.

³Ntuge fyeye zhin a Yesu viyi-putu nu, fyei vi fya beye, toge Shekwoyi nya m. Sanu fye wun aje nu fyei gnajeya ntu nanya wu ƙo, kwo ta wu nu ge fye zhin abi-putu nu fyei ye fyehin zokwo m? Behin-hin, fye zhan ƙo lo ngye aza nba to zhin Dagayi nya num ko fye-fye.

⁴Fye ku gye, fye wu-anya najei ge ko omi nu du Apollos lo, fyei gna aduwa nyakun aje. Kwo to wu nu she fye mwa-mwa ye gbagbai lo dna Dagayi yekpe mim?

⁵Nyikanu mi-i, ko Apollos, n'yi ba ku ze dalili ajegna nya? Ntu ge na, yi zhin Shekwoyi atnu-tnuyi nu kawai, zaho-zahoi nwo nyaga yi, n'yi bmazhin yi nu, fyei ga gaiciya.

⁶Omi tnu-tnu nu bei ma bye anya n fya bugba mi, Apollos kwa wa kpe nuwan, ama Shekwoyi nu na zhin anyai pa nfy a bugba mi, toge eyim.

⁷Eza n wa bye-bye nyi ƙedo n za yi nwa kpe nuwan kpe-kpe nyi, ba to zhin nyaho nu m, ama Shekwoyi nu zhin tukoda gama Owo nu zhin anya yi pa.

⁸Apollos n’mi-i, yi zhin tnu-tnu n ngye bwadodna nya, n bomwi yrgmanyi, ko shi ko nyi a bei ga zaho-zahoi n’yi mi lada she wa zhin tnu-tnu n wohin yekpe sun.

⁹Yi zhin Shekwoyi atnu-tnu loyi nu ngnisun kawai. Fye zhin Shekwoyi fwa nu, toge eyi nyam; fye zhin Shekwoyi nyakun nu, toge eyi nyam.

¹⁰Dna n Shekwoyi alheri, Wo ku wu mi she mi ba ze nya-miyi ’gbada. Mi la nyakun shi, Apollos la nya mi tu ko she. Ama zaho-zahoi wo ba mi nya tu ko, wo zhin peceiye.

¹¹Ntu ge zaho to lo wa shan nyakun hin-hin shishi ndu do yi la lu bwanyim wato Yesu Kristi nu.

¹²Azaho ba mi tu nya shi-shiyi ye n zinariya yi, ko azurfa, ko a kuta a nabmiya yi. Azaho kwa ba mi na shinwan yi, ko agbe-gbe ko akpa-yi.

¹³Zaho-zahoi tnu-tnu dai abei pmi ko gye n’na nu. Wada wyi nu n Kristi bei pmi ko gye n wohin tukwo yi. Ena nu bei wu ko tnu-tnu yi bmiya lo, ko koto bmiya lo m.

¹⁴Oza wa mi tu nya shishiyi ye, kwa gmi gni to kwa gyinam, wo bei gwo lada.

¹⁵Ama n zaho-zahoi tnu-tnu ’aku gyina, wa bwi nuwan. Ama wo ba pwo n wohin tukwo, sai dai ngye wa shegmi n ’na nu.

¹⁶Fye ta kpe lo ge fye zhin Shekwoyi nyakun nu, Shekwoyi Zafun yi sase lo dna fye mim?

¹⁷Ntucenu zaho-zahoi nwa wun Shekwoyi nyakun ya, to Shekwoyi ba wun wo ya. Ntuge Shekwoyi nyakun gyi-gyi-yi lo. Ofye nu zhin anyakun yi.

¹⁸To zaho-zahoi wa dna wohin tukwo kwoce ge wo zhin za cece nu she anyi-da gye fyem. Ndei zaho gye wohin tukwo lo lonu, wo la ze mama ntuge wa bwa cece eshe nya.

¹⁹Ntuge nya n a’nyi ye gye ge cece nu, ko zhin gboloyi nu n Shekwoyi abye. She Ayuba littafi da, Shekwoyi zhin wa wan aza-ce-ce dna ba ce-ce mi nu.

²⁰Littafi’a jeda dna Zabura ge Shekwoyi kpelo sarai shi zanyikoci zhin afo nubo wu, bai zhin a gboloyi nu.

²¹Ntucenu, zaho-zahoi to gyigbe ge wo vi aza cece anyi nyam. Ntuge Shekwoyi la nyaho-nyahoi ga fye.

²²Wo la Bulus, n Apollos yi, n Bitrus yi ga fye ba bma fye zhin. Wo la anyi vinya ga fye fya zhan-pma ce yi, wye-wyei bedo n’fi yi ofya afyenu nu. Wo ku anya vinya ga fye nba lo n sayi ye bedo na nya yi nba ye bebelo. Ba zhin fyanya nu vinya

²³Fyehin fye zhin Kristi anya nu. Kristi kwa Wo zhin Shekwoyi nya nu.

Akorintiyi I 4

¹Ntu cenu fye ku yi ze a tnu-tnu yi nu nba gna Shekwoyi anabarka mi, bai wu Shekwoyi asiri njesun.

²Bo kpakalai nna ye n tnutnuyi aba okwo nu ge, wo zhin bo nna gna wo zhin, wato a sun wo dna n gaiciya.

³Omi ma? Mi zhin bara manayi nu? Mi to damu lo nfya bo nubo zhin yi tu mi tukwo da cem, ko abo zaho-zahoi zhin nubo ce yim. Mi to n mihin tukwo yi ga gaiciya lo tu ce m.

⁴Omi bugba ta zun mi kni lom, dudu lo nu ko to wu nu ge mi knikniyi lom. Shekwoyi nu zhin mi mwi yi.

⁵Ntu cenu fye to zun-bo ya wolo wolo, to Dagayi yi zhim, tu n zahozahoi tukwo ko wo zhin bara manayi nu ko nukwoyi m. Shi Dagayi bei be, wo bei kpe buzungna ya a gye shi zaho-zahoi wu lo har bugba mi. Zaho-zahoi bei kpe sayi nya ko zhin yi zhin Dagayi tnu-tnu. Dna sayi nu n Shekwoyi bei ga zahozahoi wo cici n ko zhin wo nya.

Fye To Kni Aza Kni-Knin

⁶Ma zhan-pma n Apollos yi bedo mihin yi, ma si bo si n mi da nyi: nge fye to kni aza kni-knim. Fye to mwa fyehin tukwo n Shekwoyi tnu-tnu yi hoi ngye wo du azaje lom.

⁷Ho zhin aboko kni bei na? Ho kninyi lo n Shekwoyi nu to ga ho ma? To kninu zhin hoi ci hohin ngye nya ho cei nyi ato gaho ga-ga nu ma?

⁸Fye zhin abo lo ngye fye ku zafun nyagyi lu bwa vinya n fye cei pma. Nubo ku fye fu dna zafun har fye ku gyi abe n yi ceya. A wo mi ngye fye ye ku abe yi nu gyi nu, ntuge sa n'sa bei si, fye bei gye yi gni abe gyi nfyeyi ce.

⁹Nsa hoi kwa wumi ngye eyi n yi zhin Shekwoyi atnutnu yi nyi, Shekwoyi ku yi kma navun vinya. Yi wulo ngye aza nu nba zhin laifi dnagmai har aye awuba. Yi ku ze awye shi nya na za ba bedo na malaika yi.

¹⁰Yi ku ze a ma-ma ntu Yesu bo, amma fye ku ze aza ce-ce ntu Yesu bo. Yi ku ze akala gbai, ama fye na kalayi lo. A kuyi ze aza gbolo, ama aku mwa-mwa gafye.

¹¹Har n saiye, mikun gnuyi lo, yi wo nuwan mikun, yi kpe aje sakun, ai lu yi, yi zan-zan laba ngye aza ba to na pi yim.

¹²Yi zhin tnu-tnu n'ya bwa yi ntuge ya bwa nyagyi. Esa na za kpe ya gye, ya tuba anabarka, esanu ba ga yi wahala, ya bwami nbai.

¹³Esa na dayi bo nukoyi, ya dnafo gbe na beda manai yi; yi ku ze findakulu, yi ku ze aza gbolo har naiye.

¹⁴Mi ta ka fye bedaye ge mi ye ma dnafye vinyiko nu m, ama mi kun fye nu ntuge fye zhin ma bi ye-ye yi nu.

¹⁵Ko fye bwa aza n lo dubu gun awo ba wu fye Yesu bo, fye pa ge mi nu bwa fye dada zhin gmanyi. Ntuge omi nu na gni fye be cei n Yesu aba, esa n mi bo zhin fye wa'azi cei nyi.

¹⁶Ntuce nu mi gyi fye wye, fye tumwi n mi, fya zhin she mi zhin.

¹⁷Cenu zhin mi-i tnu n Timatawus yi n fya ba wa bma fye zhin, Wo zhin mi bi yeye yi nu dna Dagayi, gbenuyi nu njesun. Wo ba pa fye abo mi wu dna ekklesiya dohodohoi nma lo.

¹⁸Azaho lo n fye mi bai mwa bahin tukwo, ba gye ge mi wo dna nu to mi-i be fya bam.

¹⁹N Shekwoyi aye yi, mi be lo safyewyi. Dna n Sayi nu n mi bei kpe abokoda-yi bo ye, ngye ba to zhin abeda dayi nu kawai yim, ko ngye ba n Shekwoyi iko yi kusun lo.

²⁰Ntuge Shekwoyi bemi to zhin aboda nya nu kawai yim, ama iko nya.

²¹Fye kni kni-dai na? Mi be fya ba n gnakni yi, n busi yi pma lawu bedo, ko mi be dna yeye n buga yami ya?

Akorintiyi I 5

Bulus Ge A To Bwa Jedobe Nzahim

¹Zaho-zahoi da lo ge benukwoi ku zhin n'fya tasin, benukwoi n na benai ta zhin ce pyam. Oza lo n dna fya duwa nyakun n dna laifi nwo dadanyikwo yi.

²To fya zhin aboko ge na, fye gye ge fye fi n zafun nu? Ai ko kamata lo bugba wunfye bedo vinyiko yi, har fya gye fye la zayi pya biya n fya tasin.

³⁻⁴ Ko da shike mi to gni lo nfya bam, mi zhin beye nubo lo zin. Dna yi Dagayi Yesu ye, mi la bo zhin nubo n na ba zhin sai ho gna ngye mi gni lo bo. Fye yi yezhi aduwa nyakun nya-iko Dagayi Yesu nya ba kunsun fyei dna fye yezhi mi, omihin ce n kunsun lo nfyeyi dna zafun

⁵a la zayi pya biya n na duwa nyakun, a gawo n shetan akun wa wu wo nayi, nna wyetu-yi ge owo wye-wyei bei po dna nyipyeyi n'yi Dagayi Yesu Kristi bei jezebe ncei nyi.

⁶Ko zhin bo nukwoyi nu fyei gma ntu fye gyi-gyi bo, ama fyei fa beye pya koi gyabye. Fye ta kpe lo ge n na fa zaknanyi dna wo laifi, sa fyewyi aba wan wo zokwo m?

⁷Fye la 'za nukwɔi ye gmiya n fye tasin, n na bai fya ze aza gyi-gyi-yi. Abei la Kristi-Shekwoyi Kugya Biyi-wu ntu yi bo.

⁸Ntu cenu yi nya agmada tu Wo, ya dna kala dna Yesu-vi zokwo, ya zokwo kwokwoi ya nko nuwun yi viyan bedo n ko kpi zhin yi. Yi nya gmada tu bredi Gyi-gyi yi, mwa-mwa nya, n gaiciya nya yi.

⁹Dna wasika n mi bei ka fye nyi, m'bei gna fye ge fye to ye bedo n na benukwoi zhin-yi yim.

¹⁰Mi to bei da a Shetan da nu bo n ba zhin anagbai nyi, ko abo wyedai, ko avi, ko ashan-gba yim. Ntuge fye ta kpɛfi n nanyi ye n tna aza deye pyam.

¹¹Nya mi bei zhin nufi cei ko nu nyi ge, fye to ye bedo n zayi nwo yi wohin ge wo zhin Yesu viyi, ama woi ce woi zhin anagbai, abowveda, woi gba a shan, ko woi gyi azafi laba, ko woi wyi 'vi, ko woi sin eje, ko woi kni aza akmi. Ko nyagyi, fye to gyi n'za deye pya yim.

Eyi Tnu-tnu Nu Ya Da Yihin Owa

¹²Eyi tnu-tnu nu to ya da abmida wam. Ama behin-hin eyi tnu-tnu nu ya da aza wa, ya zhin ba bo dai-dai In ba lo aduwa nyakun ge a Yesu viyi, bai gwo alaifi ye pya zhin nyi.

¹³Shekwoyi nwo gmanyi yi, Wo nu zhin abmida 'wadayi. Ama ofye fyehin ce, fye zhin n'zayi yi, fya gmi wo ya nfya duwa nyakun.

Akorintiyi I 6

¹Ngye bo nzai dna-do lo n wo zado yi, kni nu zhin fyei lo a wadayi aba n ba zhin a shetan da, to fya lo cei n na Yesu viyi aba nu, a wu oza n wo zhin oza gaiciya-da n'fya tasin ma?

²Fye ta kpelo ge eyi a Yesu-viyi bei da anyi ye owa n'wyiho yim? To kni bei nu zhin to fyei ba mi, fya ku abo a bi-biyi aje nfya tasin ma?

³Fye ta kpelo ge eyi a Yesu viyi bei da amalaika owa har ya ga ba lada n'she m? Ntu cenu ko bmiya lo fya mi fya ku abo abi-biyi aje n nanyi ye n tna bo dna yi.

⁴To esanu aboye pya be, kni nu zhin fyei lo awadai aba nba to zhin a Yesu viyi ma?

⁵Mi ye ma dna fye vinyiko nu. Ashe beyekpei to lo ko gmanyi n na Yesu-viyi nwo ba mi wa gna a bena ajeyam?

⁶Ama maimako deye, sai Yesu-viyi wa lo n wo Yesu-viyi doyi n na tna-viyi wada bokun.

⁷Aje kara zhin, ko zhin knizun nu n fya ba a Yesu-viyi. Fye ta mi fya bwa bugba n benukwoi yi n naba zhin fyem? Ko gna bmiya lo n Dagayi aba fya fwa a gyi fye fi.

⁸Ama maimako deye, fye nu n laifi lo n fyehin tukwo, fyei gyi azaje fi, har ma nfya 'jei be.

Azaho Ta Lo Shekwoyi Ebe Min

⁹Fye ta kpe lo ge aza n ba zhin aboi pya ba to n gado yi lo n Shekwoyi bemi m? Fye to dna fyehin tukwo wyi m, ntuge aza nba zhin anagbai, ko bai gba ashan, to bai zhin befyece m, ko kwa zanugbai woi wagye n zanugbai yi, nyikoza woi wagye n zanugbai yi, nyikoza woi wagye n nyikoza yi-ba ta lo Wo'be mim.

¹⁰Nlonu avi, ko afan-nada, a nyasin-yi, aza gyifi-yi, ko azaje-zaje-yi.

¹¹Esa lo n na zaho bei bwa wu lonu n fye mi, ama n sayi ala fya laifi zhan ya, a la fye kni ntu Shekwoyi bo. Wo la fye gwo ntu nya bo n Dagayi Yesu Kristi n Zafun Shekwoyi nya yi wa zhin nfye bo.

¹²Mifa mi ma zhin nyaho-nyahoi to Yesu yi na tu mi ko ghem, ama abo vinya nu to bmiya lo ntu mi bom, Ko ai bei la ye ge mi zhin abo vinya, mi ta ye ma zhin bo ko ba wan mi shi har to miyi mi ma fa ko zhin bo n'sa mi ye ce yim.

¹³Shekwoyi la nubo gayi ntu nyagyi bo, ama tuge ya gyi ndu ya nubo-fu yam. To zhin nubo ge nyagyi zhin bo yako num, ntuge Shekwoyi ba du a nubo ya bedo n nyagyi yi n wyiho yi. Ama anagbai zhin to bmiya lom ko fyefye: a to zhin ya nayi ga ce num, ama ntu Dagayi bo, woi cei pma lo wa nu ya nayi n wohin tukwo yi.

¹⁴Shi Shekwoyi bei la Yesu kala n vingwo, elo nu Wo bei kuyi kala ce n wo iko yi.

¹⁵Fye ta kpelo ge efye nayi zhin gmanyi nu n Yesu nya yim? To mifa la Kristi nayi ma be ko do n Karuwa nya yi? Ko fye-fye!

¹⁶Ko fye ta kpe lo ge oza wo lo wa wangye n Karuwa yi wo la ze gmanyi n woi ma? Littafi ku da peipei, oba ngun-aba, ba ze gmanyi.

¹⁷Ama oza n wa wohin ga Dagayi, wo la bedo n Kristi yi, ba ku ze ngye oza gmanyi.

¹⁸Fye bui anagbai zhin si. Laifi daho-dohoi n za zhin, ko ta to nayi bwa m, oza wa zhin anagbai, wo zhin wo nayi nu laifi.

¹⁹Fye ta kpe ge ofya nayi zhin Zafun Gyi-gyi-yi asese ba nu, n Shekwoyi bei ga fye nyi, Woi sase lo dna fye mim? Ofya nayi to zhin fya nya num.

²⁰Shekwoyi bei la fye si n kona ko-kwoyi. Ntu cenu fye ga Shekwoyi mwa-mwa n fya nayi-yi, ntuge owa nya nu bai.

Akorintiyi I 7

Abonya Tu Mula Pa Tukwo

- ¹Tu ɓenya tukwo, nɓye ɓei nyami dna wasika nɓye ɓo ka ga mi nyi, omi ɓe-ɓeɓedna nyi, ko ɓmiya lo n'za to la nyikwo m.
- ²Ama mulapa gna ɓmiya lo, zanugbai doho-dohoi nwo nyikwo yi, nyikwoza doho-dohoi ce nwo ɓa yi, sakun fya kaya fi n laifi.
- ³Zanugbai ɓa ga wo nyikwo nyaho-nyahoi ko kunce dna mulapa nlonu ce nyikwoza nwo ɓa 'ba.
- ⁴Binyikwoi nwo la senu, wo to nwo nayi iko yi lo n, sai dai owo ɓa; Njesun lonu, zanugbai to n wo nayi iko yi lo m, sai dai owo nyikwo.
- ⁵Ntucenu fye to wo aje nayi ɓi m. Sai dai n fysl zhin shiri deye ntuge fya zhin aduwa ntu esa fyewyi ɓo kawai. Ama n deye avun, fya je yebedo ntuge to fya kayafi n shetan jaraba ntu fyehin tna-wanshi ɓo.
- ⁶Mita da ge ko zhin tile nu 'za pa mulam, ama oza ɓa mi wa pa nwo bugba la tu nu.
- ⁷A womi ngye zahozahoi fye mi wa gni ngye mi ntna mula pa yi. Ama yi to wu lo gmanyi-gmanyi num. Shekwoyi ga azaho nyaga mula-pa nya, ko mula-nyiko, azaho kuwa zhi-zhi lonu na gmada yi ntna mula-pa yi.
- ⁸Ntu cenu mi gna aza n ɓa ta lo mulam, ɓedo na nyigbai yi ko gna ɓmiya lo fya gyi abye lonu ntna mula-pa yi nɓye ɓa mi, ngye mi.
- ⁹Ama ngye fye ta mi fya wan fyehin m, sai fya pa mula. Ntuge ko gna ɓmiya lo oza pa mula, ai ya gna wo gni woi fi da shakpe ɓo.
- ¹⁰To, ga aza n ɓa ku mula-pa nyi, mi gbetu yi lo, tuge shaula kawai m. Gbetu ye konyi emi nya nu to m, ntuge nya nyi n Dagayi ku da nwohin tukwoi, nyikwoza ta ya wo ɓam kpe-kpe.
- ¹¹Amma n wa wo ya, to, wo la bwa gni lonu, to wa shan nu sen, akpe wa jeze lo da wo ɓa Zanugbai ce, wo ta ya wo nyikwo m kpe-kpe.
- ¹²Mi ye ma ɓe a shaula ho emihin anya. Ba to zhin gbetu nu n Dagayi aba cewom, ama ɓa ɓmiva lo n'mi wyegye. N Yesu-viyi n nyikwoi dna lo n wo to zhin Yesuviyi m, ama nyikwo-yi laye wa sase woi, to, woto gna wa mim.
- ¹³Njesun ngye nyikwoza n ɓai lo n wo ta vi Yesu m, oba yi kwa wo la ye ntuge wa dna n woi, to, wo to gmi n wa ɓa m.
- ¹⁴Ntuge oba n wo ta vi Yesu m, owo nyikwo zhin wa gni wo ɓe cei vivi n Shekwoyi aba; n lonu nyikwo n wo ta vi Yesu m, owo ɓa zhin wa gni wo ɓe cei

vivi n Shekwoyi aba To bei lo nu, to, oba bi be ve ku ze; ngye a shetan da-ama she ko wu zhi lai nyi, ba Gyi-gyi-yi lo.

¹⁵To ama ngye oza nwo zhin tnaiviyyi n cei pma lo na jegna yi, sai wa gnaje, ko to zhin abui num. Nkwa ze lonu, oho Yesu-viyyi, to la gyitu ge sai oho puwada tnaviyyi wa sase n ho yim; ntuge Shekwoyi ye Owa bi ba sase fi n bugba-fu nu n na gmada yi.

¹⁶Oho nyikwoza, ha kpe n'wuna ge ho ba mi ha gni ho ba woi ya sase n ho ya? N lonu ce oho zanugbai ntu ho nyikwo bo.

¹⁷Zaho-zahoi wo gyi abye nwa sesei shi Shekwoyi cei pma, dna mula-pa ko tna-mula-pa, shi Shekwoyi wa wu zokwo n wo bma zhin yi, la gni aba doho-dohoi Shekwoyi wa yi ho gni. Deye konu zhin obo mi wu na ikklisiya vinya.

¹⁸Oza wo ku a Yahudiyi knunu vi nu kpa kaciya zhin nya-kafin wo vi Yesu, ko to ze wo bugba kni nyam, oza wo to zhin kaciya yim, wo to shan zhin m.

¹⁹Ntuge knunu kaciya zhin nya, ntna kaciya zhin yi, ba to zhin nyaho nu m. Ama obo dnagmai konu zhin oza vi Shekwoyi beye woi shi Wa wyidna bwa. Obo kpakalai nu.

²⁰Kwo bmiya zaho-zahoi wa gyabye nwo tnu-tnu-yi n Shekwoyi bei yi wo, woi dna ko zhin mi.

²¹Ho zhin fyenu nu? To ye kwa wun ho bugbam-to ama, n wyegye-a gu ho ya ha bwa hohin tukwo, zhan-pma kwoi.

²²N Dagayi wa yi ho hoi zhin fyenu tnu-tnu nu, pa ge Kristi la ho loya n iko laifi nya; oho na yi ho n pma loloi ya, pa ge ho la ze Kristi fyenu.

²³Kristi bei la fye si n konantuce nu fye la loya n nanyi ye tukwo-mwa nba dnawo yi.

²⁴Ntu cenu, oma-zaje yeye-yi, aba n'za vi Yesu woi gni nba, wo la gni bo, ntuge n saiye Dagayi gni lo bo Wa bma wo zhin.

²⁵Nsaiye mi ba dna fye gbe tu benya deyi tukwo. A bi anyikwoi n ba to sanu nyim ma? A fa ba ba sanu? Mi to n gbetu yi lo n ko gmi n Dagayi aba ntu ba bom. Ama Dagayi la awyega gami dna Wo sun-sun-gye nkwo kunce lo a gami gaiciya, ko ba damagma ma gna fye bo mi zhin nubo lo cei.

²⁶Wahala yi nu nyi; eyi a Yesuviyyi eya wye-wyei fi lo na zhin gye mi n saiye. Dna saye pya kuwa mi gye lo ngye ko gna bmiya lo oza gni lonu ntna mula-pa yi.

²⁷To, ama, nho ku mula lupa, to gna-kwaje m. Nho to pan, to gya-wyeya da ce n saiye m.

²⁸Ofye anugbai, nfyce ceipma lo fya gyabye na nyikwo kuyi nsaiye, benukwoi nu tom; Ko binyikwoi senu dna saye pya, abui nu ton. Ama ce, mula pa ba be a wahala bebe nu n mi to bo ceipma fya sin ba n saiye m.

²⁹Oma-zaje nya mida nyi, esa ta shan sun lon n mwam, nlonu, esa yi gba kpekpegye lo ntu Shekwoyi tnu-tnu bo. N tuce nu, oza n wo nyikwoi dnalo, wo la ze ngye woto i ceilo m, ntu Dagayi tnu-tnu bo.

³⁰Agmada, ko bugba-wun, ko nyabwa, ba to go zaho-zahoi Shekwoyi tnu-tnu yam.

³¹Aza nba zhin tnu-tnu na kaya anyi nya yi, ba zhanpma bai dna zokwo manayi, bai ye n'sai bwa. Ntuge anyi nba shi n saiye nyi, esa fyewyi, ba ba duya.

³²Nyaho-nyahoi fye ba zhin, mi to ceipma lo zaha zhin ko dna na besam. Oza wo to nyikwoi dnam, wo ba mi wa zhin apma nwo sayi woi zhin Dagayi tnu-tnu, she kwo ba da Dagayi.

³³Ama oza wo nyikwoi dna, wo ta mi wa zhin lonu dei-dei m, tile wa zhin anyibo-nubo i obo nwo ba zhin ntu ge kwa da wo nyikwo.

³⁴Owo abopuawo n gnaje lo. Binyikwoi nwa senu ce, obo gmanyi-gmanyi nu bwa wo sun. Binyikoi wo to senun, owo bo pua-wonu wa zhin bo nkwo ba da Dagayi-dna beho-behoi wo ba zhin. Ama nyikwo nusei tile nu wa zhin abo-aje nubo, shi wo ba zhin wo puwa aba, shi wo ba zhin obo nkwo 'ba da wo ba.

³⁵Mi gna fye beye ntuge ma bmafye zhin nu, toge ma kma fye mula-pam. Ama mi ceipma fya ga fyehin tukwo dna Shekwoyi tnu-tnu vinya, ntna bo ko ba gna fya bugbajeya.

³⁶Oza wo ta mi lo n wohin wan m, woi gyelo wo ba pa mula nu, to wo gyabye pai, abui nu to m.

³⁷Ama n zanugbai ho lo nwo ba mi wa tu wohin gbe nge wo ta la nyikwo m, har wa ku mi wa gni lonu ntna nyikwo layi, woi go wohin wan-fi, wo ku shaula manayi zhin!

³⁸Ntucenu oza wa pa mula wo ku zhin bmiya, ama oza wo to pa mula m, wo ku zhin gna bmiya.

³⁹Nyikwo-nusei dna nwo ba akun nu, esa nwo ye n wye-wyei lo; ama sa nwo 'ba fi ce, to wo la loya nwa wun, wo ba mi wa senu do n wo ceipma, ama sai onu wo zhin Yesu viyi ce.

⁴⁰Ama wo ba gna agmada bwa woi ya gni lonu, n mi wyegye nu; ama mi gye lo ngye Shekwoyi Zafun kunsun lo miyi n mi shaula n mi gafye nyi.

Akorintiyi I 8

Ashan Nyagyi

- ¹Obo ko jesun lo sai benya n fye bo nya tu n nyagyi tukwo na ku ashan gba cei nyi. Tu benya ye tukwo zaho-zahoi gyelo ngye owo begbe-dna nu gna bmiya lo. Beye-kpe bmiya 'za shi, ama obo na gna yelo ntu ikklisiya mimi bo ko nu zhin yeye.
- ²Oza wo gye ge wo kpe abo ye lo vinya, to, wo bwa wo tnayekpe nu bmi zo wu.
- ³Ama oza wo ye Shekwoyi behin-hin nya, owo nu bmiya shi lo n Shekwoyi ba kpe wo ye.
- ⁴To, yi ba gyi nya na ku shan gba cei? Yi kpelo ge oshan to ku Shekwoyi nu zhin m, yi-i kpelo ge Shekwoyi kwasun gmanyi nu.
- ⁵Azaho zhin ba da ge a Shekwoyi lo mwa begye n 'she bedo n 'kni yi.
- ⁶Ama yi kpelo ge Shekwoyi kwasun lo gmanyi nu, Owo nu zhin Dada nwa zhin anya vinya, Wa zhin yi ya ze Wa nya. Njesun Dagayi kwasun gmanyi nu – Yesu Kristi – Wo nu na zhin anya vinya, Woi ga yi-wyewyeyi njesun.
- ⁷Dudu lomu, a Yesu-viyi ho ta kpe beye ye lon. Ntu ba mida bo na shan yi, obo benubo-zhin gna ba ge ashan zhin anya awye-wyeyi nu, har ba ku gaiciya ga ge nyagyi na la ko ga 'shan, a la ku Shekwoyi nu ga. Ntu cenu she ba gyi nyagyi-yipya, kwa lu ba n bugba.
- ⁸Pa ge Shekwoyi to damu lo ko yi gyi, ko to yi gym. Ko ta zhin ya gba-gba m, n yi to gyi m, kwoi ta be yi mwa-mwa yi ya gyi m.
- ⁹Ama fye zhin peceiye n iko yi fye cei lo ntu ko gyi bo, sakun fya zhin Yesu-viyi ho, nwo bugba to kalai lon, wa kaya dna laifi.
- ¹⁰Obo nyi ko ba zhin; ngye zaho lo n wo to n bugba kalai lo dna na beye pyam, hoi kpe honya lo ge nyagyi ye pya ta zhin ho nyahon, hoi gyi nyagyi na 'shan nyakun, ai deye ba cewo bwa har wa lo o-shan nyakun ntuge wa gyi nyagyi, bugba yi gwo wo lu.
- ¹¹To, ntu ge ho “kpe lo ge ko to zhin nyaho nun hoyo gyi m,” ho ba zhin Yesu-viyi do n wo bugba to kalai lon wa bwi dna zafun, oho zado n Yesu wa fi ntu wo bo.
- ¹²Ko zhin laifi nu n Kristi abye ho ya ce ho zado bwa wa zhin bo n wo bugba zun wo kni da ce.
- ¹³Nuce nu, ndai ashan-bu gyi ba zhin mi zado wa zhin laifi, mi ta shan ba gym har nyalo-nyalo, ntuge mi ta ye lo ma zhin mi zado, wa zhin laifi m.

Akorintiyi I 9

Bulus Wu Shi Wo Zhin Shekwoyi Tnu-Tnui

- ¹Mi zhin tnu-tnuyinu Shekwoyi nya, toge ndna n zanyikoci ho sintan. Mi bei ku gye Yesu eyi Dagayi n'ma wye yi. Omi tnu-tnu nu na be n'fya wye-wyei doshan yi.
- ²Ndei na zaho wyegye mi to zhin tnu-tnuyi num, n'fyaba mi zhin ko nu, ntuge fya kpe Yesu ye n'ma kun nu.
- ³Omi begbe-dna nyi na za ba n ba nya benya.
- ⁴Mi to iko hoi lo ko fyewyim? Kwo mi ta mi, ngye a tnu-tnu-yi aje, ma zhin zhibei n'fya puwa ma?
- ⁵Mi bei nyikwoi lo, woi zhin Yesu-viyi nu, to mi ye zan-lo laba n woi ce, she a tnu-tnu-yi aje zhin nyi, she Dagayi-azaje zhin nyi, njesun she Bitrus zhin nyi m?
- ⁶Kwo Barnaba n'mi yi nu ba bwa tnu-tnu zhin n'ya bwa yi, ama fyei ga azaje anya?
- ⁷Fye shin soja ho gye woi gba wohim tukwo agyiwy? Fye shin fwa-yi ho gye to woi gyi wo fwa kaya m? Kwo fye shin Bolo-lo ho gye to woi sin wa nakwo madara ma?
- ⁸Mita gna fye zanyikoci bewyegye nu ge ko bmiya lon. Mi gna fye bo nu Shekwoyi wa da.
- ⁹Dna n'wa Shekwoyi bei ga Musa nyi, Wa cige, to pa nakwo gbe esa ko gni koi dna awyi ga ho nkwa pita yim. Fye gye ge Shekwoyi bo zhin nubon nakwoi nu gmanyi, esa Wo bei da cei lo nu nyi?
- ¹⁰Kwo woto bei zhin nubon n'yi nu ma? Sosai kuwa. Wo bo da lonu Wa wu yi ge a Yesuviyi a tnu-tnuyi ba go lada n naza ba nba bma ba zhin. N fwa-nuyi yi, n nawyi luyi yi, ba na wyetu yi ba gyi ofwa ampanyi.
- ¹¹Yi ku nyabye manayi zafun nya bye, n'fya bugba mi. Kwo duwyi lo nu yi-i ya nya nyagyi bo n na jeyi n'fya ba?
- ¹²Fye ga azaje ba, nba zhin fye wa'azi nyi, ko bmiya lo fya zhin lonu. Ama yi to gna bmiya zhilo n fya ba n ba yin? Dudu lonu yito zhan-pma n iko gna bmiya-zhi nya yim, ama ya zhin tnu-tnu n'ya bwa yi ntu na nya bo, n yi ba pmai lo, ntna fye bma-zhin. Yi to shin gna ge a gba yi tnu-tnu ta n nyaho-nyahoi yim, ntu dnabo ge sakun ya nya fya mawye-ya n Kristi beda, n'ya be fye cei nyi.
- ¹³Fye ta kpe lo ge Shekwoyi bei gna, a bmazhin-yi n na tnu-tnu zhinyi yi n na duwa nyakun ge, ba bwa ba lobo n ba nyagyi yi dna na nyagaga, n na nyagyi yi na be wo cei na duwa nyakun nyin?
- ¹⁴To ko wu lo nu, Shekwoyi ku da ge aza ba zhin wa'azi, ba bwa bmazhin n na za ba n ba gwo kwo nyi.

¹⁵Ama mito shin fye kobo bo nyam. Mi-i ta ka fye ma gna fye ge miye ma ya gwo nu n'saiyem. Sai dai ma gyi fifi ko n mikun yi, ceya cece ge mi bwi agmada nuwan, nmi bwa dna wa'azi n mi zhin fye n tna nyaho gwoi nyi.

¹⁶Wa'azi zhin to zhin bo gbegyi nya nu n'mabam-mi ta mi ma fa ko zhin bo ko mi ya kni ge m'ba fam, Miba ze obo sun-sun nya. Aiya m'ma ba to-miya zhin wa'azi m.

¹⁷Ndei ko bo lo ge omi bugba na la ma zhin tnu-tnu-ye Shekwoyi wo gami ko lada; ama ko to wulo lonu nun, ntuge Shekwoyi nu na kni mi Woi dna mi tnu-tnu ye n nakun mi-i to n mihin bo kni-yi lo n shan sun.

¹⁸Knihi nu zhin mi lada koi wuzhi la ya? Konu zhin agmada n'mi bwa dna wa'azi Nabari Manayi nya, n'mi zhin to miyi tu zaho azhin, mi-i gna a gbami lada wa'azi zhin nyam.

¹⁹Deye na pmai lo mwa; shi konyi mito dna lo n'zaho sinta ma viwo beye ge gye wo gba ma gyiwe lon, dudu lonu mila mihin ze aza vinya fyenu dna bugba-da n nabai ma gni ba ga Kristi.

²⁰Esa mi zhin tnu-tnu na Yahudiyi aba, ma ze ngye Yahudiyi n nabai ba wo Nabari manayi, ma gni ba be cei n Kristi aba. Esa mi gni na aza 'ba nba vi a Yahudiyi knunu, mi ta gni abena nela yin, ko da ya ke omi bugba to cei yelo lonum, ntuge mi cei pma ma bma ba zhin.

²¹Esa mi gni na benai aba, mi zhin ma bugba ga ba she mi ba mi, ama dole ma zhin bo ko bmiya a Yesu-viyi aba. Omi bugba ga n mi ga ba nyi, ko ba zhin ma ka ba bugba wan shi, ma bma ba zhin.

²²Esa mi gni naza-ba nba to n kalai lo dna gaiciya gam, ma ze tnakala-da, nnabai ma bma ba zhin. Ntu cenu mi la mihin gbodo n zahozahoi yi ntuge ko wuso-wuso, oza ye ge mi gna wo Kristi beda, n nabai Kristi wa gni wo.

²³Mi zhin aboye vinya ntuge ma si ba kpe n Nabari Manayi yi, njesun ntu na anabarka bo n mi bwa, sa ma gye bai be da Kristi.

La Hohin Yi Ha Gyi Nasara

²⁴Lalle fye kpelo ge nna wyefan ba, asubui vinya nu zhin ba busi, ama zaknayi nu zhin wa bwa lada kmisun-yi gwo. Ntucenu fye bui si ntuge fya gwo lada-yi.

²⁵Zaho-zahoi wo zhin wyefan-yi wo zhin wa gawo nayi wahala, woi tu abomwi, woi wan abo fi. Wo zhin lo nu ntuge wa gwo lada nu nkwo ta mwa sa m. Ama yi zhin ntuge ya gwo lada eshe nya nu n koba mwasa har nyalonyalo.

²⁶Ntuce nu mi busi n na wyetu yi na bye. Sa mi zhin dambye, ma sha akun ma ku ba mwi kpa, to ma she ba fi n'sem.

²⁷Cenu zhin mi-i ga mi nanyi tata, kwa zhin bo na ye cei, toge bonu ko yem. N mi to zhin lonun, odna wo mi lo ge sakun ma ku wa'azi zhin azaje ba ku lofi n na gbegy ba, ama aila miyi dai gmiya ge mi to kunce lom.

Akorintiyi I 10

¹Oma-zaje mi ye ma pa fye nya bo nko bei zhin ya dada n zhabui nyi. Shekwoyi bei tu ba fun n 'nyi yakwo yi, har Wa shi ba bwa ba pi ola yakwo ya, n na yi kwo ge Ola Byei nyi.

²A zhin ba batisma vinya dna ola yakwo ye, bedo n 'nyi ye yi ba ku ze Musa aviya.

³Oba vinya ba gyi nya-gyi zafun nya.

⁴Oba vinya njesun ba sin nuwan zafun nya. Ntuge ba bei sin n Napma zafun nya nu nko bei gni lo bai nyi. Kristi nu bei zhin Apma yi.

⁵Dudu lonu n mwa begye n ba mi, to ba zhin bo Shekwoyi ye ce yim. Ntucenu a wuba laba n zhabui.

⁶To, abeye vinya kwa ba zhin pmagna nu n ya ba ge, yi to ye abo nukwoyi shi ba bei zhin nyin.

⁷To ya gba ashan shi azaho n ba mi bei zhin nyi m. (Shi Littafi ku da "Aza bei sase zhi ba gyi bai sin, ba kuka ntuge ba nya-nya," bai ga nakwo biyi zhin-zhin mwa-mwa.)

⁸Yi to zhin anagbaya m, shi azaho n ba mi bei zhin har aza dubu shibacei ata (23,000) ba fi n nyipyeyi gmanyi.

⁹To ya mwi Shekwoyi hakuri gye m, shi azaho n ba mi bei zhin nyi m, awa sabaya laba cei har efi.

¹⁰To ya da gnunu-gnunu tu n, 'nya Shekwoyi la ga yim. Ngye shi azaho n ba mi bei zhin, cenu bei zhin Shekwoyi wa tnu nwo malaika yi wa wu ba.

¹¹Aboye bei zhin ba vinya ntu besisi bo nu. A ka ba fi n Littafi ntuge ba ceyi bepa, ntuge yi fi n'sa nu n nanyi ku ga zo.

¹²Ntuce nu zaho-zahoi nwo gye lo ge, wo migni lo woi zhin nubo ge, "Ai mita zhin lonun" ko la ze pmagna n ha ba. Ntuge kpekni hohin ba kaya dna n laifi ce.

¹³Jaraba daho-dahoi n kwo ba be haba, to oko pya nu be azaje aba ce. Ama Shekwoyi zhin gbenu-yi nu. Wo ta ye ge a zhin ho jaraba n ko ba duho kala wyim. Esa n ha lo jarab ho, Wo ba gaho kala ha gni agni dako, har Wa wu ho zokwo n ho ba gmiya nkwo mi.

¹⁴Ntucenu, oma nugundo, fye na ashan-gba dohodohoi pya bo.

Yi Ta Mi Nce Zhin M

- 15Mi dabo n fyei ngye a wyega da nu. Fye mwi mi beda n fyehin tukwo yi fya gye.
- 16N Dagayi tebur, esa yi tu nuwan byei anabarka, kwo to wu ge, yi gni anabarka bwa nu dna n Yesu amin? Esa yi sa breidi ya, ya gyi, kwo wu ge yi gni Yesu nayi apma bwa nu n najei.
- 17Kwo shi kwo nyi breidi kwasun gmanyi nu n'yi sagaje, eyi vinya kwa n mwa begye, yi zhin nayi gmanyi nu dna Kristi ntuge yi gyi breidi gmanyi nu.
- 18Fye dna a Yahudiyi wye, aza ba gyi nya na lako zhin hadaya cei, ba ku ze gmanyi dna hadaya tnu-tnu yi mi.
- 19Miye ma da gena na? Fye gye ge mi da nu ge ashan zhin anya awyewyei nu, ko anya na gba kpe ba nyi ge ba na 'pma hoi lo? A'a, ko fyefye.
- 20Obo nyi mi da ge enya na ku gba kpe n'shan to a ga Shetan nu, toge Shekwoyi m. Mito cei pma lo kwa fya ze gmanyi n shetan yim.
- 21Fye ta mi fya sin dna n Dagayi bwe, fyalo fyei je shetam nya sin m. Fye ta mi fya gyi Dagayi tebur fya lo fyei je shetan nya gyi m.
- 22Yiye ya la Shekwoyi shewo ka nu? Yi duwolo n kala nu?
- 23"Yi ba mi ya zhin nyaho-nyahoi," ama nyaho-nyahoi nu to bmiya lo m. "Yi ba mi ya zhin nyaho-nyahoi," ama nyaho-nyahoi nu to n bmiya lo m. "Yi ba mi ya zhin nyaho-nyahoi," ama nyaho-nyahoi nu to n bmazhin yi lom.
- 24Kwo to bmiya lo zaho zahoi, wa gna wohin ye wa zan wa gmada shin nwo gmanyi yi m. Pa ho zado bo n'bo yi nko bmiya lo n tu wo bo.
- 25Fye ba mi fya gyi nyaho-nyahoi n na 'bu-da kun n gnikwo ntna bo nya yi. Ntuge n ha nyafo, kpekni obo na ba dnaho 'gbe cei nyi, ko ba zun ho bugba kni.
- 26Ntuge ekni n nyaho-nyahoi ye nko dna ko, ko wun Dagayi nu.
- 27Ndei shetan da wa yi ho nyagyigyi, oho bugba la ge ho ba lo, to, gyi nyaho-nyahoi nwa beho cei n tna bo nyai, ntu bugba kni-zun bo.
- 28Ama n zaho'a gna ho ge, "Aku shan gba n nyagyi ye yi, to, to gyi nyagyi yi m," ntu zayi bo nwa gnaho nyi, njesun ntu bugba knizun bo.
- 29Zayi, bugba kni-zun nu nmi dabo, to ge oho nya m. Kpekni ha nya ge, "Ntu kni beyi nu zado bugba knizun kwa kma mi bo zhin n mi cei pma?"
- 30Knihi nu ba zhin nyagyi mi ba sa Shekwoyi ami ma gyi ko na gmada yi, zaho wa ci ma benya, shi ko nyi wo gye lo ge mi la bwa ba?
- 31Ntucenu, nyaho-nyahoi n ho ba zhin, ko hoi gyi nu, ko hoi sin nu, zhin ko ntuge ha ga Shekwoyi mwamwa.

³²Fye to ze dalili bonyicenya n zaho-zahoi abam, ko a Yahudiyi Ko a Heleniyi, ko ekklesiya Shekwoyi nyam.

³³Obo nu mi zhin, Mi-i yi mihin ma zhin bo ko da aza vinya n beho-behoi zhin, toge mi-i vi bo nu n'mi bugba ye ce yim, ko obo ko gna bmiya lo ntu mi 'bom, ama obo ko gna bmiya lo ntu na za bo, ntuge kpekni ba pwo.

Akorintiyi I 11

Anyikwo Beda

¹To, fye vi ma pita bwi, ngye shi mi vi Yesu anya nyi.

²Mi ci fye lo ntuge fye pa mi bo lo cici fyei zhin boho-bohoi she ma wufye.

³Ama mi cei pma fya kpe ge, Yesu nu zhin zanugbai doho-dohoi tukwo. Nyikwoza tukwo ce zanugbai nu; Shekwoyi nu zhin Yesu tukwo n kasun.

⁴Ntuce nu zanugbai doho-dohoi nwa zhin aduwa ko wa'azi n tanjiyai kun n wo tukwo, to, wo ci Yesu nu wyegba.

⁵Nyikwoza doho-dohoi kwa n wa zhin aduwa, ko wa zhin wa'azi gni nazaba to wa pui wo tukwo nya m, to, wo ci wo ba nu wyegba. Wo to shando lo n nyikwozai n wo la wo tukwo wun vinya n na pmi yim.

⁶N nyikwoza ta pui wo tukwo nya m, to wola wo tukwoyi gbeya. Ngye ko zhin obo vinyikwo nya nu n nyikwoza ba wa kma wo tukwo ya, ko wa gbe ko ya, to, sai wa zhin wa ku ko wan nya.

⁷Ko to bmiya lo zanugbai wa pui wo tukwo nyaho m, ntuge wo zhin Shekwoyi dogbei nu n wo latu yi be. Ama nyikwoza zhin zanugbai latu nya nu.

⁸Ntuge zanugbai kmisunyi to bei gmi n nyikwoza nun, ama abei gmi nyikwoza kmisunyi n zanugbai nu.

⁹Njesun ato bo zhin zanugbai ntu nyikwoza bo nu m, ama abei zhin nyikwoza ntu zanugbai Bo nu.

¹⁰Kwo bmiya lo nyikwoza zhin wa wu ge wo dnalo zanugbai sinta, njesun ge kwa da amalaika.

¹¹Ama pa ge dna n Dagayi shiri, nyikwoza n zanugbayi, ba ta mi n tna ajem.

¹²Ntuge shi a bei gmi nyikwoza n zanugbai nyi, njesun lonu nyikwoza nu zhin wa ma zanugbai, ama anya vinya kun n Shekwoyi aba nu.

¹³Fye mwi ko nfyehin tukwo fya gye, ko bmiya lo nyikwoza wa zhin aduwa gni naza ba n tna alufuta wan yi?

¹⁴Kwo kunnu n kohin tukwo kwa wuyi ge, ko zhin obo vinyikwo nya nu n zanugbai aba, wa ya tukwo tu cim n tna wun yi.

¹⁵Ama ko zhin nyikwoza mwa-mwa nu, n wo tukwo-yi mwakpa, ntuge a gawo ko lonu kwa ze wo nyapui nya nu.

¹⁶Ama ngye zaho cei pma lo wa gni-abona da ce, to, enya miba da konu nyi; nge yi ta shan kunnu doho wulo gbo-om, sai dai ge nyikwoza ku wo tukwo wan alufuta esa nwo ba zhin wa'azi ko aduwa cei dna naza begye. A ikklisiya Shekwoyi anya vinya nkoi bwa shi lo lonu nu.

¹⁷Ama enya mi ye mada n saiye nyi ko to zhin cici nu n fya ba m, ntuge ofye yezhin na duwa nyakun ta bma zhin lo m, sai koi wun-wun ya.

¹⁸Obo kmisunyi, a gnami lo ge ajegna lo nfya tasin sanu fya yezhi cei. Beye konyi, ma pwoko gaiciya ga.

¹⁹Ama ko bmiya lo ajegna lo fya tasin, ntuge aza ba fi lo n gaiciya, a kpe ba ye pei-pe.

Abonya Tu Dagayi Nyagyi 'Bo

²⁰Esa nu fya ye-zhi n na ba gmanyi fya gyi, fye ta gyi Dagayi nyagyi num,

²¹ama ofyehin nya. Ntu ge aku gna mige esa fya be nyagyi cei, zaho-zahoi wo wo nyagyi bo nu wa ya safi wohin nce azaje-ya, har azaho ba tna nyagyi bai ci mikun, azahoi ce bai gyi bai sin n duwiyi.

²²Fye to na puwai lo nfyee ba gyi fyei sin? Ko fye gna ye lo fya ci Shekwoyi puwa wyegba, fyei dna aza vinyikwo n ba to cei lo nyi ma? Fye gye ge miba da ge na n beye tukwo'a? Mi ci fye nu? Ko fye-fye, mi ta ci fye lo m.

²³Ntuge n Dagayi aba nu n ma gwo wu-wu ye n mi kafye wu nyi. Nge dna sukwo nna bei kun Dagayi Yesu nyi, Wa la bredi,

²⁴Wa zhin Shekwoyi godiya, Wa sa ko ya, Wa Cige, "Omi nayi nu nyi, n na ga ntu fye bo. Fye zhin ko ntu Mi bopa bo."

²⁵Njesun lo nu wa la kofi ai ku nyagyi gyi, wa cige, "Kofi ye, ko nu zhin Shekwoyi alkawali woi-woyi dna Ma'mi. Saho-sahoi nfyee ba sin ko cei, fye zhin ko ntu mi bo pa bo."

²⁶Ntuge saho-sahoi ya gyi bredi ye cei, yi sin n kofi ye, yi gna Dagayi efi nabari nu mi har Wa be.

²⁷Ntuce nu, zaho-zahoi wa gyi Dagayi bredi ye, ko wa sin n wo kofi dna zokwo, kota gawo mwa-mwa m, wo zhin Dagayi nayi nu n Wa 'mi yi laifi.

²⁸Ntuce nu, zaho-zahoi wo mwi wo-hin kpa wa kpe bredi ye gyi, woi sin n kofi ye njesun.

²⁹Ntuge 'za wa gyi brede yi, woi sin n kofi yi ntna wohin mwi yi, to woi pa Yesu nayi bo n kwa pma yin, to, wo gni Shekwoyi owa kpe wohin tukwo nu. Ntuge wo kpagye nu n Yesu fi bo yi.

³⁰Cenu zhin azaho n fye mi ba zhin anyasan-yi nu, a kala-gba-yi, har azahoi fi.

³¹Ndei yi ba mwi yihin tukwo kpa, ata shan yi kni zun n'wa yim.

³²Ama sa n Dagayi dayi 'wa Woi ta yi, Wo zhin lonu n nabai to abei zun yi kni bedo na 'nyi yi nun.

³³Ntucenu oma-zaje, sanu fya yezhi ntuge fya gyi Dagayi nyagyi, fye zhin fya ku pmi aje.

³⁴Ndei mikun gnu zaho lo, to, wo ku nyagyi pmagyi n wo puwa ntuge to wa lo Shekwoyi 'wa esa fya yezhi ceyim. Abo ba celo, m'bei zhin ba zhi miyi la be.

Akorintiyi I 12

Anyaga Zafun Nya

¹Nsaiye, omazaje, mi cei pma ma daɓo to na nyaga Zafun Gyigyi-yi nya bo. Mito cei pma lo fya fi nko wyegma m.

²Fye kpelo ge, esa fye bei ye zhin a shetan-da nyi, fye bei zhin fyei vi ashan nu n ba ta kpe bedan, bai wu fye zokwo nukwoi.

³Ama fye sun lo n na zai n ba yi bahin lo ge Shekwoyi Zafun nu wu ba bo nba da nyi. Fye ba kpe wuna ge ba zhin a Shekwoyi nya nu ko aza kata? Fye ba kpe baye lainu. Zaho-zahoi n Shekwoyi Zafun kun-sun lo woi, wota mi wa cige, "Yesu zhin knitu yi nun." Zahoi ta mi wa cige, "Yesu zhin Dagayi nu," har koi kufi nwomi lonun, akpe ge Zafun Gyi-gyi-yi kunsun woi.

⁴Anyaga lo gbo-gbo, ama Zafun gmanyi nu gaba.

⁵Azokwo lo gbo-gbo, n na zhin bauta ama Dagayi gmanyi nu n na zhin Wo bauta.

⁶Atnu-tnu lo gbo-gbo, ama Shekwoyi gmanyi nu lo tnu-tnu n naza mi vinya.

⁷Zafun Gyi-gyi-yi zhin Wa wu Shekwoyi iko n zaho-zahoi mi ntu naza vinya a pma bo.

⁸Zafun ga zaho beda wyemwa nya (genyikpe), zaho kwa wa bwa nyaga beyekpe, nya nu, du Zafun gmanyi nu ga ba.

⁹Zafun gmanyi nu ga zaho gaiciya-ga zaho gaiciya-ga zaho kwa wa gawo iko wa ka anyasan gna.

¹⁰Zafun ga zaho iko wa zhin abo wowoyi, zaho kwa wa bwa wa'azi zhin gba. Zaho wa bwa iko wa kpe ko a zafun nukwoi nu daɓo n naza gbe n ba yi bahin ge ba da Shekwoyi beda nyi, ko kwa zafun Shekwoyi nya nu ku beda n ba gbe. Zado

jesun wa bwa iko beda nya dna na nyitala gbo-gbo n'wo to shin ba mwitu m zado kasun wa bwa iko anyitala bmapmi nya.

¹¹Ama Zafun Gyi-gyi-yi gmanyi nu zhin afoye vinya, Woi gna anyaga ye n naza ba shi Wo wyeweyeyi cei pma.

¹²Eyi anayi na gai lo mwa begye, ama n na ye agayi bedo vinya, ba zhin nayi gmanyi nu. Kristi wulo lonu nu.

¹³Zaho-zahoi n'yi mi wo zhin oga nu dna Kristi nayi. Azaho n'yi mi a Yahudiyi nu, a zaho a Helleniyi, azaho zhin afyenu nu, a zaho kwa a loloiya nu. Ama Zafun Gyi-gyi-yi kuyi zhin batisma fi n Kristi nayi gmanyi, ai la Zafun Gyi-gyi-yi ho gayi n naba gmanyi.

¹⁴E, ntuge nayi to bwasun n'gai gmanyi nun, ama n na gai mwa begye.

¹⁵N pita cige, "Shi konyi mi to zhin obwa nun, mi to dna lo n nayi mi m," deye ta du kwa gmi koya n naga nayi nya m.

¹⁶Ntnubua cige, "Mito zhin ewye num, mi bwa tnubua nu zhin, ntu cenu mi to dna lo n nayi mim." Ashe deye ba zhin kwa gmiya n na 'ga nayi nya?

¹⁷Ashe nayi vinya bo zhin ewye nu, atnubua bowo lo numa? Kwoi bo zhin tnubua yako ho nu vinya, a wo a bua-sin wuna?

¹⁸Ama shi ko nyi, Shekwoyi bei fi a ga doho-dohoi n ba aba shi wo ye cei.

¹⁹Ogye nayi wuwuna nu, Kwoi bei ngai bwasun lo gmanyi nu a?

²⁰To, ama wo ku aga zhin mwa begye, ama nayi gmanyi nu.

²¹Ewye ta ci obwa ge, "Mi to ha pmai lom," Tukwo ta ci apita ge, "Mi to fya pmai lom."

²²Behin-hin, aga n'yi ci ba wyegba ntu ba kala gbabo, ba gna sun napmai mwa.

²³Ado yi gye ge ba to zhin nyaho nu m, obanu n yi wan kna du, ado kwa nba zhin a vinyikwo nya, ya ku ba so naza wyeba,

²⁴atna vinyikwo nya kwo n ba wu bmi pei-pe, yi to damu n ba knawan beyim. Ama Shekwoyi la nayi ye bedo n 'gbai n nabai ge aga n ba to kunce lo ba bwa aknawan daidai.

²⁵Kwo nu be n bwa doloyi n naga nayi nya, bai wanje akna shi ega doho-dohoi wan kohin akna nyi.

²⁶N nyasan san oga gmanyi, aga je vinya ba gye azhin n gnisun kwoi. N 'ga gmanyi a bwa latu, aje ba ce nyi, ba dagma n kunsun kwoi.

²⁷Ofye vinya fye zhin Kristi nayi nu, zaho-zahoi zhin oga nu nko mi.

²⁸Dna ikklisiya kwa, Shekwoyi ku aza zhin fi nko mi, kmisunyi a Nabari tnutnu loyi, bayi a anabi-a wa'azi zhinyi, tahi n nyawuyi; sai bewowo zhin-yi, aza

kagnayi, aza bmazhin-yi; aza n ba ba mi ba gyabye nazai ba zhin tnutnu n'gbei lodo, n nazai n ba da anyitala gbo-gbo.

²⁹Zaho-zahoi zhin Nabari tnu-tnu loyi nu? Nge awo. Zahozahoi zhin wa'azi zhin-yi nu? Awo. A zhin anyawuyi nu vinya? Zaho-zahoi n ikoi lo wa zhin afo wowoyi?

³⁰Ko wa ka anyasan gna? Ko wa da abye gbo-gbo to woi tuba mwi n? Ko zahozahoi nu ba mi wa wo 'za woi dabo dna nyitala-woyi, har wa go ko gna 'za to woi shin ko won?

Obo Nko Du Vinya NAnyi

³¹Awo, ama fye yi fyehin fya zan nyaga Zafun nya duduyi nu shin. Ama dei, miba wu fye zokwo nko gnaba bmiya lo vinya!

Akorintiyi I 13

¹Kwo mi-i mi, ma dabo n nabyei gbo-gbo har n na malaika nya yi be, ama mi-i to n yeyei lom, mi la ze ngye sugu wyibeyi, ko eshan bwiciyi kawai.

²Ko mi-i iko yi ngye anabi mi-i kpe beye nko ye bebelo kwa zhin, ko mi-i n yekpe anyi nyai vinya har mi-i kmi asiri anya-ya; ko mi-i n gaiciya ga yako yi har ma mi ma dabo n 'pe yi kwa shanba, ama ndei mito n yeyei lom, mi to zhin nyahonum.

³Ko mi-i ku mi nyabwa yaga vinya agna awyekoyi, har ma ga mi nayi ntuge a gyi ko 'na bedo, ama mi-i to n yeyei lom, ko la ze bo gbolo.

⁴Yeye n bugba-bwa yi, kwoi na tnazhin-yi mwa. Yeye ta wo 'shem, ko ta mwi kwihin 'zayi, ko kwa la kwihin tum.

⁵Yeye ta zhin bo ntna hankali m ko ta zan kwihin tukwo nya shin m; ko ta pye n minagyi gyi yim.

⁶Yeye ta wo agmada ntu benukoyi bom, ama ko zhin kwa nya agmada ntu gaiciya bo.

⁷N'ho ye za, ho ba viwo beye komi nko nako yi; ho ba gawo gaiciya n nabo vinya; oha wyetu lo n'wo; hoi ba bwa atna n 'woi n beho-beho yi.

⁸Yeye ta shan zon. Anabi beda ba duya; beda n na nyitalai gbo-gbo du ba ba diya; Ko beyekpe nu, ko ba duya.

⁹Ntuge n'saiye, yi kpeye lo kpe n'she-she nu, du na nyaga beyekpe yi n na beda kpeda nya yi, ba to shince lo n kni yim.

¹⁰Ama shi abei ku yi ze nunuyi anya ga atna nuyi ye, ba ba duya.

¹¹Esanu m'bei zhin obi nyi, omi beda, oma benubozhin yi, n'ma bezhin-zhin yi vinya ba bei zhin binai nya nu. Ama nsaiye mila zhin zadnagmai, ntuce nu mi ku binai abo ya.

¹²Nlonu, nya yi gyelo n'saiye, yi kpawyega tu n Shekwoyi tukwo nyi, ko wulo duru-duru ngye shi oza zhin wa gye wohin duru n maganyi cegyeda nyi; ama n wyihoi yi ba gye Wo pei-pe shi Wo nyi dna Wo nunu-ntuge Wo bei ce yawye yihin yi ce Wawye. Obo mi kpeye lo nsaiye, mi kpeyelo kpe n'sheshe nu, ama n wyihoi, m'bei kpeye n shince n'kni yi, n nunuyi njesun ngye shi Shekwoyi kpe miye lo n nunuyi nyi.

¹³Nsaiye dei abo ngnu-ata nu mizhi lo-oba nuzhin; gaiciyaga, awyetu, n yeye yi; nya ko dulo vinya, ko nu zhin yeye.

Akorintiyi I 14

¹Ntucenu, fye la bugba shi yeye nu; ama dudu lonu fye ba ntuge fya bwa anyagaga Zafun Gyi-gyi-yi nya tun ba ga Shekwoyi beda kpeda ba.

Beda Nkwo Du Vinya N Anyi

²Oza wo dabo n nabyei gbo-gbo, wo ta dabo n azai nu, ama n Shekwoyi yi. Ntuge zaho-zahoi ta wo nya wo dam ko da shike wo da abo nu nba bwi zhi dna n Zafun iko.

³Ama oza wo gwo Shekwoyi beda gna aza, wo bma ba zhin nu ba mwa dna n Dagayi, woi mi ba zhi n natna-zhin-yi be.

⁴Oza wo dabo n nabyei gbo-gbo, wo mi wohin nu gni n'wo gmanyi yi, ama oza wo go Shekwoyi beda gna aza, wo mi ikklisiya nu gni vinya.

⁵Miba ye ntuge ofye vinya fya dabo na nyitalai gbo-gbo. Ama mi gna ye lo ofye vinya fya bwa nyaga n fye ba da Shekwoyi beda. Ntuge oza wo da Shekwoyi beda, wo gnasun napma yi ndu'za wo dabo na nyitalai gbo-gbo. Akpe wa pmi wo beda bma ga aza 'n navun abo wa da nyi, ntuge kwa mi ikklisiya gni vinya.

⁶Oma-zaje, ndei ma be fyaba mi-i dabo na nyitalai gbo-gbo nfyete ta wo ba lon, kni-apmai nu nfyete ba bwa? Ama n'ma gna fye pei-pe enya Shekwoyi la kpanyaya wu mi, ma gna fye bo mi kpeye lo, n beyi nko belo kwa zhin, n gaiciya Shekwoyi beda nya yi-obo nu fye yelo, obo nu ko ba bma fye zhin.

⁷Ko anyikonya nba to wyewyei yin-nyete mwayi ko gojegye-ba zhin dogbe nu ge ko kamata lo a dabo n seseiya, a fwa beda na nyitalai gbo-gbo. Ntuge nna bye mwayi, ko a san gojegye to a ze ba bwam, ba cibwi gbo-o, nyikado ba kpe beye n ba da?

⁸Njesun ndei oza wo bye okun mwayi n wo to byeko dai-dai m, nyikado ba kpe ge a ye a lo kun nu wa zhin shiri'a?

- ⁹To-ko wu lonu, aza ba kpe nya ho da n wuna ndei ho to da n byei n nazaje ba wo ma? Oho beda ba zo fi n'se.
- ¹⁰Abye lo gbo-gbo n nanyimi, ama doho-dohoi to celo ntna kwa wyegam.
- ¹¹Ama n mi to wo nyitala n nada nyim, oza nwo dako nyi, wo ba ze ngye zhibeyi ebye do nya m'ma ba, omi ce ma ze zhibei ebyedo n wa ba.
- ¹²Shikwonyi fye ye lo fya bwa nyaga zafun nya, to, sai fye ye fya bwa ado nfy e ba zhin apma cei ntu ikklisiya migni bo.
- ¹³Ntuce nu oza wo dabo n nabyei gbo-gbo, ko bmiya wa zhin aduwa ntuge wa bwa iko bmapmi nya.
- ¹⁴Ntuge n ma zhin aduwa n nyitala doyi, m'mi ta kpe kwa wyegan, to, omi zafun nu bwa aduwa zhin, ama omi bugba bemwi nya to na pmai lo dna na duwa yi mim.
- ¹⁵To, mi ba zhin wuna na? E, mi ba zhin aduwa n nyitala doyi, mii ba jezhin n nyitala yi n zaho-zahoi ba wo mi cei. Mi ba ko anyi n nyitala doyi, mi-i ba jeko n nyitalai n zahozahoi ba womi, mi ba kpe mihin ce she mi la Shekwoyi tu lo n wu.
- ¹⁶Esanu ho zhin Shekwoyi godiya dna zafun kawai, hoi da nyitala woyi ho, aza ba gnifi hoi n nyakun nyi, ba ba wo wuna ba gni Shekwoyi godiya zhin n'ho ya? Ba ba kpe cige "Amin," wuna to bai wo bo ho da ma?
- ¹⁷Kwo oho godiya zhin yi bmiya n Shekwoyi aba, ko to mi azaje zhi n ba kunsun lo hoi n bugbam.
- ¹⁸Ma gode n Shekwoyi yi ntuge mi dabo na nyitala woyi yi ndu zaho-zahoi n'fye mi.
- ¹⁹Ama dna na duwa nyakun, mi gnaye lo ma da abeda ngun atnu, n naza ba wo mi nyawu ba bwa bmazhin, aiya gna ge mi da abeda dubu gun-awo dna nyitala woyi.
- ²⁰Omazaje, fye to ku wu ngye abi dna fye abenubozhinm, fye ku ze abi dna benukwoi zhin mi, ama fye ku ze azayakwo dna nfya be nubozhin mi.
- ²¹Acei kafi lo n Littafi ge, "Mi ba dabo nazaye yi n nabyei gbo-gbo, nna zhibeyi nyitalai jesun, ama dudu lonu, bata wo mi bedam," Shekwoyi nu na gna lonu.
- ²²Ntucenu nyaga abeda nya na nyitalai gbo-gbo ko zhin tuze nu na tnaviyi aba toge a Yesu viyi m, Ama nyaga Shekwoyi beda wa'azi nya ko zhin a Yesu viyi nya nu toge atna viyim.
- ²³To, ko n fya ye fi na duwa nyakun, ofye vinya fya ya beda na nyitalai gbo-gbo, tna beyekpei ho ko tna viyi ho wa lobe aduwa nyakun, wo ta gna nyace nu gnu fyem?

²⁴Ama n fya zhin Shekwoyi beda wa'azi efye vinya, esanu zaho ngye tnaviyi ho, ko tna-beyekpei ho ba lobe aduwa nyakun, wa'azi yi ba zun wo kni tu nwa laifi tukwo, kwa dawo bugba 'wa njesun.

²⁵Owa benubozhin ba kun zhi n bmi, har wo ba ce ako-ko wa ga Shekwoyi mwa-mwa woi cige, "Behin-hin, Shekwoyi dnalo ya n fye atasin."

Azokwo Dagayi Cici Nya

²⁶To, emazaje, obo nyi mi gna fye; esanu fya yezhi na ba gmanyi, zaho ba ko-anyi, zaho ba wu'nya, zaho wa da bo woyi n Shekwoyi a kpeya wuwo; zaho kwa, wa dabo n nyitala woyi yi, zaho kwa wa pmi nyitala woyi beda bma. Azhin a pma n bai vinya ntu ekklesiya migni bo.

²⁷Aza to du ngun aba ko ata yam n ba ba dabo n nyitala woyi yim, bai ba bwada bai caba gaje nu; tile nu kwa a gye za gnibo nwo ba pmi beda bma.

²⁸Ama n zaho to gnilo n wo ba mi wa pmi beda bmam, to zaho-zahoi to dabo n nyitala woyi yi dna n begye m, sai dai wa da fi nwo mi san-san ga wohin tukwo n Shekwoyi aba yi njesun.

²⁹Aza ngun aba ko ngun ata n ba Shekwoyi bedai shi lo to sai ba da gmanyi-gmanyi, aza ba ce nyi kwa, Ba mwi nya nba da nyi.

³⁰Ama ngye zaho dnalo na duwa nyakun yi Shekwoyi beda be dawo dnafo, to oza kmisunyi nwo bo dabo nyi, wa a ce pi n kasun.

³¹Ofye vinya nfye nyaga yi pyai lo, fye ba mi fya da Shekwoyi beda fye caba ga je, n nabai aza vinya ba bwa bmazhin n migni yi jesun.

³²Oza nwo nyaga Shekwoyi beda da nyayi, wo ba mi wa wan wohin tukwo ko wa pmi owo 'sa nwo ba dabo ce yi.

³³Ntuge Shekwoyi to yi yi ntu nafo ajegmi bo nu m, ama n bugbafu bo nu, ngye shi ko nyi n na ikklisiya aza Gyi-gyi-yi nya vinya.

³⁴Anyikwo ba ku ce pi fi na duwa nyakun. Ato ye ge ba dabom, shi ko nyi ba fi n na nugbai sinta nu shi Littafi Gyi-gyi-yi ku da.

³⁵Ndei ba benyahoi lo, sai ba nya ba 'ba n napi, ntuge ko zhin vinyiko bo nu nyikwoza wa dabo dna na duwa nyakun.

³⁶Fye to ye cen? Fye gye ge Shekwoyi beda yekpe kwa pa nfya ba nu, ko ko zozhi nfya ba na? Fye ku bwi aba.

³⁷Ndai zaho gyelo ge wo zhin Shekwoyi tnu-tnuyi nu, ko kwa ge wo n Zafun nyagai lo, to sai wo kpe ge beda ye nmi kaga fye nyi ko zhin Shekwoyi gbetu nu.

³⁸Ama oza n woto shi beda ye bwam, fye fawo dna nwo tnayekpe.

³⁹Ntucenu omazaje fye la bugba gna shi fya bwa nyaga Shekwoyi beda da nya nu, ama fye to gna beda n na nyitalai gbo-gbo zhin benukoi num.

⁴⁰Ama fye zhin nyaho-nyahoi tu zokwo n bmiya bmiyai.

Akorintiyi I 15

Nabari Manayi Tukwo

¹Nsaiye dei mi cei pma ma cefye bepa Nabari Manayi nya n mi bei zhin fye kwo wa'azi nyi, fya gwo ko, ofye gaiciya-gai mitu n konu nyi.

²Nabari Manai ye nu ba gni fye, fyei ya gyi abye nko bwashi yi kam-kam, sai dai ngye fye to bo shin gaiciya manai nu ga n kmisunyim.

³N'bo ku gna fye pei-pe, tunyi n kmisunyi, ngye she mi bei gwo kwo nge Yesu bo lafi ntu yi alaifi bo, she littafi ceida

⁴Abo lawo bi, ama dna nyipyeyi tahi wa laka n vingwo shi a cei kafi n Littafi nwo tukwo.

⁵Wa wu wohin tukwo n Bitrus aba, n na vun nwa bara awo-cei-aba aba.

⁶Wa pmi Wa wu wohin tukwo nwa viyi aba aza n du tagyi gnu-atnu (500) ya n sagmanyi yi, n mwa begye nbami ye wyewyeyi lo, ama azaho ku wangye n bami.

⁷Nsaiye wa wu wohin n Yakubu aba, n navun deye nwo atnu-tnuyi aba vinya.

⁸Nnavun kmasun vinya, Wa wu wohin tukwo n ma ba, sai ho gna oza n na mawo esai ye kwa duya.

⁹Ntuge minu zhin oza gbagbayi dna na bara vinya, mii to kunce lo ayi mi ge owo baram, ntuge maku Shekwoyi ikklisiya dna na zhin gye n mwa.

¹⁰Ama dna Shekwoyi alheri, mi la ze nya miba ze, alheri kuwa nwo bei gami nyi ko to ze gboloyim. Mi ku tnu-tnu zhin n mwa n du atnu-tnuyi aje vinya, kwo shi kwo nyi emi bo zhin nu tom, ama Shekwoyi alheri nu bei lo tnu-tnu dna mi mi.

¹¹To, kwo koi gmi n maba nu, kwo koi gmi n ba ba nu, wa'azi Nabari nya nu n ya zhin fye, fya ga ko gaiciya lonu.

¹²Tunda yi zhin wa'azi lo ge Yesu bo la laka n vingwo, knihin nu zhin azaho nfyeyi mi bai cige azafi ta kukala ma?

¹³Ndei bedaye zhin gaiciya nu, to ko wu nu ge Yesu to laka n vingwom.

¹⁴Ndei Yesu to bei lakalam to, eyi wa'azi zhin gbeloyinu, efye gaiciya ga ce ko zhin gbeloyi nu.

¹⁵Ai eyi a wa'azi zhin-yi ku ze a zakata Shekwoyi anya, ntuge yi ku da ge Shekwoyi bola Yesu lakala n vingwo to woi gowo kalalalam, ndei beda ye zhin gaiciya nu ge azafi ta kukalam.

¹⁶Ai ngye ato bei ku azafi kalan, to agye Yesu to bei lakala nu m.

¹⁷Ngye Yesu to bo laka lam, to ofye gaiciyaga la ze gbeloyi, har saiye fye ye zhin aza bwi-bwiyi nu fi nfya laifi mi.

¹⁸Kwa wu nu ge azafi n ba bei zhin bai vi Yesu nyi, ba to n pwo-pwoi lo cen.

¹⁹Ndei eya wyetu n Yesu kwasun lo n nanyi ye nu kawai, to yi zhin anya sunsun nya nu n mwa n naza ba n nanyi ye.

²⁰Ama gaiciya nu ge Yesu la lakala n 'fi. Deye kwa wu nu ge wola ze kmisunyi n naza mi nba ba kukala n 'fi nyi.

²¹Ngye shi efi bei be kwa vi zaknayi zokwo, n kasun lonu kalaku na vingwo ba bwa n zaknayi zokwo nu vi (wato Adamu n Yesu yi.)

²²Zaho-zahoi fi ntuge yi pa bye n Adamu nu vinya. Owo laifi ko vi zaho-zahoi. Ama zaho-zahoi nwa yeto Yesu, wo ba je kalala

²³Ama zaho-zahoi n wo sayi, Yesu nu bo ya kalala, she Yesu bei jezebe n sayi aza vinya nba vi wo ba bei je wyewyei bwa.

²⁴Nsayi esa kmaknayi ba be, esa nu Yesu bei ga ebe n Dada Shekwoyi akun, woi ku nasara zo zhin tu na nuwunyi doho-dohoi pya.

²⁵Ntuge ko zhin tile nu Yesu gyi be, sai wo ku wa nuwunyi vinya zofi n wa pita sinta.

²⁶Nuwunyi kmaknayi nwo bei du ko boya ko nu zhin efi.

²⁷Ntuge littafi'a cige, "Shekwoyi ku anya fi vinya n wa pita sinta." Yi kpe lo nu ge Shekwoyi to dna lo n kun m, ntuge Owo nu na fi anya vinya n Yesu apita sinta.

²⁸Ama esanu anya vinya bei kufi n Yesu 'be sinta, Owo n wohin tukwo Shekwoyi Nugun, wo bei dna wohin n Shekwoyi ye gyi 'be tu nanya vinya tukwo.

²⁹To, azayi na zhin ba batisma tu na zafi bo nyi ma? Ba cei pma ba bwa kninya? Ndei ko zhin gaiciya nu, shi ba da nyi, nge azafi ta kukalam, to knihi nu zhin ai zhin ba batisma ntu na zafi bo'a?

³⁰Eyi n'yihin ce, knihi nu ba zhin ya la ba yi zhin azhin n 'Yihin mafi lonu ci-ci a?

³¹Oma-zaje, mi zhin ma gundo n 'fiyi fyegyiy-fyegyiy. Mi daboye ntuge mi n 'gbegyiy yi lo n fye tukwo dna Yesu Kristi.

³²Kni-apmai nu lo dna n gusun na nyawannyawan yi shi anugbai zhin dna n Afisusu mi-nge gye za bwaye wa gmiye dna na'nyi ye na? Ama ngye kalaku tolo n 'fin, to, "Yi wu ya gyi yi sin, efyeagiy yi fi," shi aza da.

³³Fye to ku ze aza gbolo m, “Anugundo nukwoi zhin ɓa wun aza manayi ya.”

³⁴Fye lo fyehin hankali, fya zhin ɓefyece, fya fa laifi. Mi da deye fya wo vinyiko nu, ntuge azaho nfyem mi ta kpe Shekwoyi ye lom.

Eyi Anayi Woiwoyi

³⁵Zaho ɓa nyage, aza-fi ɓa mi ɓa bwa wye-wyei njesun wuna? Ba jezebe n kni nayi pya ya?

³⁶Oza gbolo, esanu ho bye nyabye dna nkni, woi-woyi ta gye bmim, sai kokoi la fi kpa.

³⁷Nya ho bye nyi kuwa ho ta pma nayi nu bye n ko zhin kwa pa nyim, sai nyabye kawai nu n ho yadna n’kni, ko ewyi byegye, ko nyabye ho pya nu.

³⁸Shekwoyi zhin wa ga nyabye yi nayi shi wo cei pma, wo zhin wa ga nya bye doho-dohoi nayi gbo n nyabye do yi.

³⁹Anyawye-wyeyi nayi to wu gmanyi num. Azanyikwoci n nayi gmanyi anyafanya n banya yi, awyisala n banya yi kasun.

⁴⁰Anayi eshe nyalo, anayi anyi nya lo jesun, bmiya-bmiya anayi eshe nya wu gbo n bmiya-bmiya anayi anyi nya yi.

⁴¹Nyipyei nko nabmiya yi lo, epya ce nko nyayi wu gbo, akpasu nba nyai lo kasun; ko dna na akpasu mi, ɓa n nabmiyai du aje.

⁴²Kwo bei wu layi nu esa na zafi bei kuka n cei nyi, nayi na bi nyi, ko zhin boboi nu, she ko bei laka, efi ta shan ko gye aigna ko bom.

⁴³A bi ko dna n wyegbaci ntna kala jesun, ese ko bei lakala, ko bei laka dna latu nu n kalai jesun.

⁴⁴Esa na bi ko cei, ko zhin nayi abu nu. Esanu ko bei laka, ko bei laka dna n nayi zafun nya nu. Ngye shi nayi abu nya lo nyi tile nu abwa nayi zafun nya.

⁴⁵Ntuge Litafi ku da ge, oza kmisunyi Adamu ɓo ze wye-wyeyi da; ama Adamu kmaknayi wo nu ga wye-wyeyi zafun nya.

⁴⁶Zafun nya nu to ɓe na bye m, ama nayi nya nnavun nu zafun nya kma ɓe.

⁴⁷Adamu kmisunyi azhin wo n’kni nu, butukun nya, ama Adamu bayi wo gmi n’she nu.

⁴⁸Zanyikoci doho-dohoi n nayi wu ngye Adamu nya n na zhin ko n’kni butukun nya, ama oza n wa ze Kristi nya, wa bwa wo nayi pya nayi nko gmi n’she.

⁴⁹Ngye shi yi wu ngye oza na bei zhin wo n’kni nyi nlo nu yi bei wu ngye oza n wo gmi n’she nyi.

⁵⁰Obo mi gna fye, emazaje, nayi nami yi ko ta gye Shekwoyi bemi wyem. Eyi anayi aboboyi ye nu to zhin a nyalo-nyalo nyam.

⁵¹Fye wo asiri ye, eyi vinya nu ta fim, ama abei shan yi do vinya.

⁵²Kwo bei wu para nu n'wye kpata yi, ai ku mwayi kmaknayi bye. N mwayi ho byebye, a Yesu viyi n ba kufi, ba bei kukala n na nayi shandoshan-shan yi n ba ta shan fim. Eyi ce n'yi bei cezhi n wye-wyeyi nyi, abei shan yi anayi do n sagmanyi yi.

⁵³Ntuge eyi anayi n'yi cei lo n saiye nyi, ba zhin afifiyi nu. Tile nu ba bwa doshan, n'nayi eshe nya yi, nko ta shan fim.

⁵⁴She ko bei ku zhin lonu, dna n'sayi nu n Littafi beda bei nu nkwa cige, "Aku nasara gyi tu n'fi tukwo."

⁵⁵O efi, oho nasara gyi gni na? Efi, oho iko wu-wu nya gni na?

⁵⁶Efi bwa ko iko 'zawu nya n laifi nu, laifi kwa ko bwa iko n owa nu.

⁵⁷Ama yi zhin Shekwoyi godiya n wo gayi nasara dna Yesu Kristi nyi.

⁵⁸Ntucenu, emazaje yeyeyi, fye ku gni mizhi dai-dai. Fye gyi abye n Shekwoyi tnu-tnu yi n'wyei nyice, Shikonyi fye kpelo ge efye tnu-tnu dna Dagayi ta ze gboloyim.

Akorintiyi I 16

Zokwo Wu Kmaknayi

¹Miba dabo n saiye ntu agyi wye bo n fye ba yezhi fya ga Shekwoyi aza n ba fi n Yahudiya nyi. Tile nu fya zhin nya ma gna a ikklisiya Galatiya nya ge ba zhin nyi.

²N Ladiwiyi doho-dohoi yi, zaho-zahoi ba kni agyiwye shi wa bwa n sun, wa so ba zhi ntuge esa ma be cei, fye ta shan zhi ge fye ye agyiwye ho zhi m.

³Esa ma be cei, m'bei tnu nazayi n fye ye cei, miye la wasika ma ba ba lo nfyeyi nyaga yi n Urushelima.

⁴Ndei ma gye ko bmiya lo ma lo ce to, sai ba gnilo n miyi.

⁵M'bei be fya ba mi-i la zhi Makidoniya, ntuge mi ye ma vi Makidoniya bwa nu.

⁶Mi gye lo ngye n'bei la mwasa fyewyi nfyaba, kpekni har ma zhin vinyiko vinya, ofye nu bei ka mi bma zhin har mi ye lo aba n'bei kalo.

⁷Mi to cei pma lo ma gye fye mi-i duduyam, ama mi na wyetu yi lo ma sunsa fyewyi nfyaba, n Shekwoyi wa ye.

⁸Ama mi ba dnaya n Afisus kpa har Pentikos sa.

⁹Abokunmi guguyi yalo ya n mwa pata n maba ntu tnutnu bo, ama anuwunyi lo ce n mwa begye.

¹⁰Ndei Timatiwus wa be fye aba, to, sai fya gwo wo abwa-baba ntuge wo zhin tnu-tnu ga Shekwoyi nu shi mi gyi fye wye, omazaje,

¹¹fye zhin wyegbam, ama fye bma wo zhin ntuge wa gyi abye nwo zanyi har wa be maba n bugbafuyi, ntuge mi shi wo bebe awye lo bedo nazaje yi.

¹²To, ntu eyi zado bo ngye Apolos, ma ku wye gyi wo nmwa n nabai wabe fyaba ngnisun nazaje yi, ama ko to lo wo do wa be n saiye m. Ama esa wa bwa esa cei, wo ba be.

¹³Fye ku zhi gu, fye ku mizhi n gaiciya ga mi, fye ku edna ya, fye ku kala dna.

¹⁴Fye zhin boho-bohoi vinya dna ye-ye mi.

¹⁵Fye kpelo ge Istifanus n wo puwa yi, banu bei kmi Yesu vi nabye n Akaya, bai pmi baku bahin tukwo ga ntu Shekwoyi aza bmazhin bo, mi gyi fye wye, mi azaje,

¹⁶fye zhin bo nba gna fye ge fye zhin, fya vi azaje bo nba zhin tnu-tnu ngye ba.

¹⁷Adamilo n mwa ntuge, Sitifanas, Fartinatus bedo n Akaikus baku be ma ba, baku tnu-tnu zhin n fye bei ba zhin nyi.

¹⁸Bala awyeko gyimi bai gami agmada she ba bei zhin fye nyi.

¹⁹A ikklisiya vinya n Asiya kni ba safya milo. Akila n Biskila yi, bedo n ikklisiya yi n ko yezhi n ba puwa nyi, ba safya mi lo n mwa dna Dagayi.

²⁰Azaje vinya ba safye amilo. Fye bi azaje gna vinya n bwadodna gyi-gyi yi.

²¹Mika deye n ma bwa yi nu. Omi, Bulus, mi bi fye gna lo.

²²Zaho-zahoi wo to ya Dagayi m, eknil tu lo n wo. Eyi Dagayi, be.

²³Alheri Dagayi Yesu nya ko sase kunsun fye yi.

²⁴Omi ye-ye ko kun-sun nfyeyi vinya dna Yesu Kristi. Amin.

Akorintiyi II

Akorintiyi II 1

¹Wasika ye gmi n mi aba nu Bulus, oza kni-kniyi Shekwoyi nya, wa ze Yesu Kristi tnu-tnuyi, bedo n Timatawus yi eyi zado, kwoi lo a Yesu-viyi aba nba fi n Korinti nyi n Akaya yi vinya.

²Shekwoyi eyi Dada n Yesu Kristi eyi Dagayi, wo tu zaho-zahoyi nfyen anabarka, wa ga fye bugba fu njesun.

Shekwoyi Nu Bma Yi Zhin Lo

³Yi zhin Shekwoyi godiya, owo nu n wo zhin eyi Dagayi Yesu Kristi Dada nyi. Ntu ge bmazhin vinya gmi nwo aba nu.

⁴Owo nu bma yi zhin woi fu yi bugba dna eyi wahala vinya, nabai n yi ba mi ce, ya bma aza zhin nba fi lo n wahala gbo-gbo nyi. Esa n ya wuba wahala pya n ya sin, njesun ngye shi ya kun zhi nkwo, n Shekwoyi akala yi.

⁵Shi yi sin wahala ngnisun n Yesu yi dna nwo a wahala nyi, elonu yi ba bwa owo bmazhin bedo n bugba fu yi.

⁶Ndei ya sin wahala, yi sin ntu fye bmazhin bo nu, nfyen gni-gniyi, ndei yi n bmazhin lo fyehin fye cei lo, nkwo nu ba bma fye zhin, fya bwa hankuli n wahala yi n yihin bo sin nyi.

⁷Ntuce nu eyi awyetu n fye, kwo ta sha-sha m. Yi kpelo ge shi fye sin wahala lo ngnisun n yi nyi, fye zhin fya bwa eyi atnazhin hi pya lo ce.

⁸Omi-azaje mi cei pma ma pa fye n wahalai ya sin dna Asiya nyi. Wahala bei la yi mwa bo sosai, har to yi kpe ge yi ba pwom.

⁹Yi bei gye ge yi ku pma aza fi-fiyi ze nu. Ama deye bei zhin ntuge to ya kpema eyihin tukwom, ama n Shekwoyi, n wo ku azafi kala nyi.

¹⁰Dna efi wahala yi pya wa gni yi woi bo gniyi nabye. Yi na wyetu yi lo nge wo ba gyi abye wa gni yi.

¹¹Shi fye bma yi zhin n aduwa yi nyi. Har kwa ze ge aduwa nfyen zhin laba ntu yi bo nyi, ba gyi nasara, Shekwoyi wa tuyi anabarka, har aza mwa kwa ba zhin wo godiya.

¹²Eyi bugba bui-bui nyi, har eyi bemwi-i wu yi ge, eyi zan-zan dna nna anyi ye, tun ba ga eyi abozhinzhin nfyeni, ba ku ze n Gyi-gyi-yi, n gaiciya yi, n Shekwoyi aba. Ya zhin lo nu, to ge dna n anyi beyekpe nu m, ama alheri Shekwoyi nya nu.

¹³Yi ka fye enya nu nfyen ba ba fye bwa awyega njesun. Omi wyetu nu nge fya bwa kwo awyega vinya.

¹⁴Nya fye kpeye n saiye nyi ko to nu-nuyi lo m. Ama, Esa Yesu bei be n cei, fye bei kpe beho-behoyi ye vinya, fye bei gyigbe n yi-i ngye shi yihin bei gyigbe n fyei.

¹⁵Mi bei kpe deye tunyi sapa, cenu na zhin ma ye ntuge, ma je fya ba be, n nabai fye bwa anabarka zunba.

¹⁶Gama mi bei ce pma ma be fya ba, esa n mi bei lo Makidoniya nyi, njesun esa yi nma jeze be, n nabai ma bwa bmazhin nfyehar n kwo ba lo mi-i n Yahudiya'kni.

Knihin Nu Be Nkalalai Ya?

¹⁷Ama esa mi zhin shiri deye pya ma, mi zhin ma vi omi beye nu? Mi zhin ma mwi anya dai-dai? Har ma cige, E, ma jeci ge a'a nsa gmanyi?

¹⁸Shekwoyi kpelo ge mi to bo zhin fye alkawali, Eh nya nu bedo n a'a yi m.

¹⁹Ntuge Yesu Kristi Shekwoyi nugun n Sila bei zhin fye wa'azi n wo tukwo nyi. Har Timatawus bedo nmi yi ya kuje fye gna nyi, wo to zhin oza nu nwo ci ge, Eh, woi je ci ge a'a m. Ama wo zhin wa ci ge Eh nu, deye kwa, ko gmi n Shekwoyi aba nu.

²⁰Gama owo nu zhin wa nu Shekwoyi alkawali vinya, cenu zhin yi ci ge, Amin dna Yesu, yi ci lonu dna Shekwoyi mwa-mwa nu.

²¹Shekwoyi nu mi yi awye-wyeyi zhi, bedo n fye nya yi dna Yesu. Shekwoyi nu la yi kni zhi.

²²Woi la yi tu ze nge yi zhin owo nya nu. Woi la Zafun Gyi-gyi-yi gayi kwa wu ge lalle wo ba zhin nyaho ntu yi bo na bye.

²³Shekwoyi nu zhin omi saida da. Wo kpemi bugba lo, mi bei ye ntuge fya pwo nu, cenu bei zhin to ma ye ma be Korinti m.

²⁴Yi ta tu fye dole nu ge fye vi nya yi da nyi m, gama fye gni-agni lo so-sai dna gaiciya, yi zhin tnu-tnu nfyehar ntuge fya dagma.

Akorintiyi II 2

¹Ntuce nu ma cige mi ta be fya ba njesun ntu ge ma zhin fye fya wun bugba m.

²Gama n ma zhin fye fya wun bugba, nyika nu ba gami agmada? Sai of ye n mi la fye wun bugba nyi.

³Cenu bei zhin ma ka fye wasika hi, mi to bei cei pma ma be fye aba fya zhimi ma wun bugba m. Gashi kwa ofye nu na gmadai lo.

⁴Mi bei ka fye n bugba wun yi n gaiciyai har n bwi ci yi, ntuge to ma zhin fya wun bugbam, ama ma wu fye fya kpe shi mi ye fye lo vinya.

⁵Ndei zaho la bugba wun zaho nfyе, wo to zhin minum, wa zhin fye nu, ko kwa zaho nfyе tun da shike mi to cei pma ma ga zaho-zahoi wahalam.

⁶Kwo la kun ce wa bwa tata ye pya, nfyе ku zhinwo nyi.

⁷Ama sai fya zhin wo gafara, fya cewo bwa njesun, n nabai to wa godiya n bugba wun yi, har fya gye woi fa Yesu vi bom.

⁸Mi gyi fye wye nu, fye zhin wo wa kpe ge fye yewo lo.

Nyikanu Kunce Lo Ntnu-tnu Ye A?

⁹Cenu bei zhin ma ka fye wasikahi mi bei ce pma ma kpe shi fya gyi nasara n wu, njesun ko fye zhi lo n shiri zhin ntuge fya vi nya ma gna fye.

¹⁰Esa nu fya zhin 'za gafara n laifi wa zhin nyi, mihin mi ku wo zhin gafara ce, gama esa ma zhin wo gafara ncei ndai gye nyaho lo, ma zhin gafara ntu kwo bo, to mi zhin kwo ntu Yesu bo nu, ntu fye bo njesun.

¹¹Nna bai to shetan wa gyi nasara n yi m, ntu ge yi kpe wo shiri ye lo vinya.

¹²Esanu mi bei si Taruwasa ntuge ma zhin wa'azi bo, ma gye Shekwo la zokwo guya ga mi.

¹³Ama mi bei la damu n mwa, ntuge mi to bei gye Titus wye m. Ntucenu ma lakala ma lo Makidoniya.

¹⁴Ama godiya ga Shekwoyi, ntu nasara bo, n Yesu Kristi ku zhin, tu n yi tukwo nyi, ngye shi wo zhin ampanyi n yi abaho-baho yi n ya lo, ntu ge ya da owo Nabari manayi n aza aba, ngye turare sundayi.

¹⁵Gama yi zhin ngye turare sundayi nu, n Yesu zhin kwo hadaya ga Shekwoyi nyi. Kwoi lafa n a Yesu-viyi aba bedo azayi nba to go wom.

¹⁶Ga aza nba fi lo n bwi-bwi Turare ye zhin nya nukwoyi nu n kwo wu za. Ama ga aza ba filo n pwo-pwo kwo zhin nya manayi nu n kwo be wye-wye yi. To, nyika nu ba mi n tnu-tnu ye pya?

¹⁷Ai, yi to wu lo ngye aza nu, n ba la Shekwoyi beda kwa ba ze gyiba nya m. Ama shi Shekwoyi nu na tnuyi, yi dabo n gaiciya yi, ntuge yi zhin Kristi abara nu.

Akorintiyi II 3

Efye Gaiciya Nu Zhin Yi Tnu-tnu Seida

¹Fye gye lo ge yi ci yihin nu? Fye gye lo ge dole nu, ngye shi azaho zhin, ya be n awasika yi shi ntuge ya wu yihin tukwo n naje aba?

²Of ye nu zhin eya wasika, n yi ku ka fi n ya bugba mi, ntuge zaho-zahoi wa kpe woi ce woi ba.

³Wasika ye wu lo pei-pei ge, Kristi na ka kwo, woi ga yi kwo ge ya lo n cei. Kwo to kakpe lo n allo kuta nya nu n inki yim, ama nna 'za bugba, n Shekwoyi Zafun yi.

⁴Yi da deye ntuge yi kalai lo n Shekwoyi dna Kristi.

⁵Nyahonyahoi to lo, n yi bami ya cige ya zhin tnu-tnu ye n ya kalai nu m, Eya kala kun n Shekwoyi aba nu.

⁶Owo nu na zhin yi mi har yi zhin alkawali woi-woi ye bauta, nkwo to nyi owa kakayi fi nyi m, ama n Zafun nya. Owa zhin kwa be n fi-i ama Zafun zhin wa ga wye-wye yi.

Kristi Mwa-mwa Woiwoyi

⁷A bei ka owa kpe n akuta nu, Shekwoyi mwa-mwa kwa be esa n wo bei ga n cei nyi. Kwo shi ko nyi mwa-mwa n kwo bei kpe n Musa wyeba bei la duya, kwo bei mwa har to a Israilayi ba mi bai shi wa wyem, ndai Owa n kwo be n fi nyi, bei be aza ba n mwa-mwa yeyi.

⁸To ai mwa-mwa n kwo lo n Zafun tnu-tnu nyi, kwo du deye lo.

⁹Tnu-tnu n kwo wu aza kwo mwa-mwa yi belle tnu-tnu n kwo gni aza? Ai kwo mwa-mwa yi gnasun lo.

¹⁰Yi ba mi ya ci ge mwa-mwa n saiye nya kwo mwalo, mwa-mwa nkwo bei nyi n sapai nyi kwo la duya.

¹¹Gama ndai mwa-mwa bei nyi n kwo to bei mwasa dai-dai m, to aba ka mwamwa deyi gye wuna n kwo lo har abada nyi'a?

¹²Shi yi n wyetu yei lo nyi, yi ku ze abugba kala da.

¹³Yi to wulo ngye Musa nu, n kwo bei zewo dole wa pui eje, n wa wyeba nyi ntuge to a Israila yi ba gye shi mwa-mwa lo konya n wu m.

¹⁴Oba bo-nubozhin bei gu-gu yi, Har n saiye ma oba bonubozhin kwo-o gu-gu yilo n eje yi, esa nu ba ba littafi alkawali kwo-kwo yi nya. Eje ye zhin kwa kpeya esa oza ga Yesu gaiciya n cei.

¹⁵Kwo n saiye ma esa ba ba Musa owa ncei ejehin zhin kwa gu ba bonubozhin.

¹⁶Ama a zhin a kpe kwo ya shi litafi ku dage, "Musa eje bei la kmaya esa wo bei lo Dagayi aba nyi."

¹⁷To Dagayi n ya wo nu zhin Zafun, aba Zafun Dagayi nya lo, to, pwo-pwo lo.

¹⁸Ntu cenu, eyi vinya wu Dagayi mwa-mwa ntna awyeba pui, yi mwa-mwahin konu kwa, ko kun abanu, nwo nu zhin Zafun nyi, kwo zhin kwa yi ze n gye owo degbe, n latu yi mwa so-sai.

Akorintiyi II 4

¹Shekwoyi nagayi tnu-tnu ye, dna nwo sun-sun-gye, ntuce nu yi ta gmi bugba yam,

²Yi ta dna aza kwoce nu ge ba ga gaiciyam, yi to ce pma aza ba ga gaiciya nbo n Shekwoyi beda to dam. A vinyikwo bo yi, yi ta ye bam. Ama yi da gaiciya nu n Shekwoyi abye, ntuge oza nwa wo yi beda wa gwo kwo.

³Gama ndai wa'azi ye n yi zhin nyi, ko bwi shi nu, ko bei bwi shi n aza ba nu kawai, n ba to wye-wyeyi lo m.

⁴Ba ta ga gaiciya lom, ntuge oba bo nubozhin fi lo a wyegma. Shetam nu nafi ba bo. Wo ta ye ge ba gye buzangna n kwo be oba 'ba nyi m. Buzangna n kwo kun n nabari manayi aba n ko wu Yesu Kristi latu nyi, n wo nu zhin Shekwoyi degbe nyi.

⁵Gama yi ta zhin eyi hin nu wa'azi m, yi zhin Yesu Kristi nu wa'azi, n wo zhin Dagayi nyi, eyihin ce yi zhin fye abara nu, ntu Yesu Kristi bo.

⁶Shekwoyi n wa cige, "Buzangna ba knaya n wyegma aba nyi," owo nu na zhin owo buzangna kwoi be ya bugba, kwoi be yi buzangna n Shekwoyi latu yekpe yi, nkwo nyi n Yesu awyeba nyi.

Ashanpa Awun-wun-yi Ya

⁷Kwo shiko nyi yi arziki zafun nya ye yi lo, yi wu lo ngye ozun shakun mi nya nu kurum. Kwa wu ge iko lo n Shekwoyi aba nu, toge n yi aba m.

⁸Yi sin wahala ci-ci ama kwo taviyi yam, nsahoi ya zhin shakka, ama eyi wyetu ta zo m.

⁹Anuwun yi lo n mwa, ama yi to tna nugundo lom, njesun nsahoyi, yi zhin ya bwa aci n mwa yi to fi ntu ce m.

¹⁰Nsahoi yi zhin ya la Yesu fi-fi dna n yi anayi n nabai agye owo wye-wyeyi dna n yi anayi.

¹¹Dna yi wye-wyeyi vinya, yi fi wahala efi nya ntu Yesu bo, ntuge aza ba gye Yesu n yi anayi fi-fi-yi.

¹²Deye kwa wu ge efi lo tnu-tnu lo n yi, ama wye-wye yi lo n fye.

¹³Littafi'a da ge, "Mi bei dabo ntuge mi la gaiciya ga." Dna zafun gaiciya nya ye yi dabo ce, ntuge yi ku gaiciya ga.

¹⁴Yi kpe lo ge Shekwoyi n wo bei la Yesu kala n vingwo nyi, woi bei kuyi kala n Yesu yi, har woi be n yi bedo n fye yi n wo aba.

¹⁵Deye vinya kwo nyi ntu fye bo nu kurum, gama shi Shekwoyi alheri bei si aza ba n mwa, ba zhin aduwa n mwa godiya nya ntu ge Shekwoyi wa bwa latu.

¹⁶Ntucenu yi ta bwa bugba bmayam. Ko shi kwo nyi eyi nayi bwa konya lo-lonu, ama eyi zafun be-be nu ci-ci.

¹⁷Wahala biyi ye n yi sin kwo nyi kwa, kwo ta mwasa m. Amma kwo babe yi mwa-mwa dnagmayi nyalo-nyalo nya, n du eyi wahala ye.

¹⁸Gama yi zhin ya hankali dna, n anya nu n nata gyeba wyem. Nya aza gye kwo ta mwa sam, ama nya aza ta gyem, okwonu mwasa so-sai har nyalo-nyalo.

Akorintiyi II 5

¹Gama yi kpelo ge, esa tent ye n yi fi nkwo nyi wato eyi nayi n anyimi ye, esa kwa miya Shekwoyi bei gayi puwa n she, puwa n wa mi n wohin tukwo yi, puwa n kwo ta shan miyam.

²Nsaiye kwa aku yi be, yi cei pma lo ya bwa puwa eshe nya ye.

³Esa ya kpe puwa ho kwo nu kwa, a ta shan yi gye n nayi yem,

⁴Esa yi ye filo n nayi ye, yi do mi lo n wahala yi, ko to nyi ge yi ta yelo n nayi yei num, ama ge yi ye puwa eshe nya nu. N nabai nya kwo zhin fifi yi, a kpekwo wye-wyeyi.

⁵Shekwoyi nu layi zhin shiri, ntu doshan ye bo. Woi ga yi owo Zafun, n nabai kwa zeyi, behin-hin ntu anya bo vinya n wo cei lo n tu yi bo nyi.

⁶Ntu cenu yi wyepai lo, yi kpe lo g'e esa yi fi nayi ye, yi to lo n Shekwoyi puwam.

⁷Gama eyi zan-zan zhin gaiciya ga nya nu, to yi gye wye m.

⁸Yi wyepai lo so-sai ama yi gna ye lo ya fa nayi ye, ya lo Shekwoyi puwa.

⁹Ama nya kwo du lo vinya, yi cei pma ya gawo agmada, kwo yi-i fi anyi ye kwo kwa n wo aba n'she.

¹⁰Gama kwo zhin tile nu, eyi vinya ya yezhi n Kristi ba, wa da yi owa. Zaho-zahoi bei gwo nya kwo kunce shi wa zhin n wu. Ko manayi kwo nukwoyi dna anyimi ye.

Kristi Atnu-tnuyi

¹¹Yi kpelo ge kwo bmiya lo yawo Dagayi dna, ntu ce yi gna aza. Shekwoyi kpe yi ye lo. Ama mi zhin nubo lo ge, dna n fya bugba, fye kpe mi ye lo vinya.

¹²Yi to cei pma ya wu eyihin tukwo n fya ba nu m, ama yi cei pma ya ga fye dalili n fye ba gma n yi, n nabai n fye ba mi fya dna aza be gbe n ba gma nazaje bmiya-bmiya nyi ama to bai gma n wo hali yi m.

- ¹³Yi ku ze anyacei nu? Ai ntu Shekwoyi bo nu. N yi zhin aza alafiya da nu, ofye nu na ampanyi lo.
- ¹⁴Yesu ye-ye nu tulo n yi she vinya, she yi kpelo ge zaknayi nu bei fi n aza bo, vinya. Deye kwa wu ge aza vinya ba ku fi ngnisun woi.
- ¹⁵Wa fi aza bo vinya, ntuge aza n ba wye-wyeyi, to ba laba bahin tukwom bom, ama ntu oza bo n wo bei fi wa laka n vingwo ntu ba bo nyi.
- ¹⁶Ntu cenu yi ta da zaho-zahoi owa dna oza bemwi m, ko n sahoi ma ngye yi bei ku Yesu da owa dna aza bemwi, yi ta shan zhin lo lonu m.
- ¹⁷Esanu oza la vi Yesu, wola ze oza woi-woyi, oza kwo-kwoyi la duya, hali woi-woyi la be.
- ¹⁸Deye vinya Shekwoyi nu zhin, gama ntu Yesu bo, wo bei la yi shan do. Eyi n yi bei zhin owa nuwunyi, yi ku ze owo anugundo. Woi ga yi tnu-tnu, n yi ba be n nazajeyi ba ze owo anugundo.
- ¹⁹Eyi beda nu nyi ge, Shekwoyi bei ze aza owo anugundo.
- ²⁰To, yi zhi nyi, yi zhin Kristi atnu-tnuyi nu. Wato kwo wu lo ngye Shekwoyi nu gyi fye wye, ntu Yesu bo, yi gyi fye wye fye fa Shekwoyi wa shan fye do, fya ku ze owo anugundo
- ²¹Yesu to bei zhin laifi da num, ama ntu yi bo Shekwoyi wa zhin wo, har wa ze laifi da, ntuge ya kuze aza manayi.

Akorintiyi II 6

- ¹Ngye atnu-tnu kun zhin yi n She kwoyi yi gyi fye wye nu, alheri Shekwoyi nya nfyen la gwo nyi fye to fa kwa ze banzan.
- ²Fye wo bo n Shekwoyi da, “Mi bei wo fye bwichi, ntuge ma wu fye sun-sungye, Ma bma fye zhin ntuge ma gni fye.” Fye wo, Esa nyi n fye ba gwo Shekwoyi sun-sun-gye, Nnaiye zhin gni-gni nyipyeyi nu.
- ³Yi to cei pma, zaho wa gye ge eyi tnu-tnu to bmiya lom, ntu cenu to yi ye, ya be n wahalai n zaho-zahoi aba m.
- ⁴Maimakon lo nu dna nyahonyahoi n ya zhin, yi wu ge yi zhin Shekwoyi abara nu, dna n hakuri bwa na wahala yi.
- ⁵Esa mwa a kuyi lu, akuyi fi n kurkuku, avi bai wiyi anyan, tnu-tnu ku yi duwyi har ma nsahoi to yi mi n nyagyi m, balle a cige yi wangye.
- ⁶Yi ku yihin tukwo wu ge, yi zhin Shekwoyi abara nu dna n yi zan-zan gyi-gyi-yi, n yeye gaiciya nya yi, n hakuri yi dna n Zafun Gyi-gyi-yi.

⁷Dna yi beda gaiciya nya, njesun dna Shekwoyi iko, yi zhin wo nya nu Befyece nu zhin eyi agu okun nya, yi ba sunkun n kwoi nu, ya kna yihin.

⁸Nsahoi a gayi mwa-mwa, sahoi kwa a ciyi wyegba; Nsahoi a kpeya gye, nsahoi a layi tu. Kwo shi kwo nyi yi da gaiciya, a zhin a gye yi ngye aza kata.

⁹Aza kpeyi ye vinya ba wu ngye ba ta kpe yi ye m. Nsahoi kwa wu ngye yi ku fi, ama shi fya gye nyi, yi n wyeweyi lo, aku yi lu, ama yi to fi m.

¹⁰Yi bugba wun yi lo, ama yi n agmada yi lo ci-ci, yi wu lo n gye yi to n nyaho yim, ama yi ga azaje arziki lo, ko yi to arzikim, yi n nyaho-nyahoi lo vinya.

¹¹Omi anugundo a Korintiyi, yi ku bo da cewo n fye yi, yi la eya bugba guya vinya ga fye.

¹²Yi to so eya bugba n fya ba m. Ofye nu ku ofya bugba so yi.

¹³Mi dafo n fyei ngye omi abi nu, fye wu yi ye-ye pya, n yi cei lo n fye bo nyi. Fye gu ofya bugba ya vinya.

Fye To Ye Bedom

¹⁴Fye to laba ngye fye wu gmanyi gmanyi n natna-viyi. Gama kwo to bmiya lo lonu m. Bemanayi nbenukwoyi ba gyi nugundo n wuna? Buzangna n wyegma yi ba mi ba gni zan-zan?

¹⁵Kristi n Shetan yi ba ye na jeyi n wuna? Yesu-viyi n kni nu lo n wo ba gni zhin n tna-viyi a?

¹⁶Shekwoyi puwa ba gyi nugundo nwuna n ashan puwa yi a? Gama yi nabari manayi n wa be yi n cei n fye zhin Shekwoyi aduwa-nyakun nu, shi Shekwoyi ku da n wohin, "Ma zhin emi puwa n ma azayi nu, ma sa-se nba mi, ma ze 'ba Shekwoyi ba ze 'mi aza."

¹⁷Ntucenu Shekwoyi ku da, "Dole fya fa ba, fye la gnaje n bai, Fye to zhin nyaho-nyahoi n nyayi n kwo to gyi-gyi-yi m. Mi ba gwo fye."

¹⁸Miba ze of ye da-da, Fye ba ku ze omi abi, Shekwoyi nu na da lo nu.

Akorintiyi II 7

¹Ntu n na alkawali dnagmayi bo n na a cei gayi nyi, omi a nugundo ye-ye-yi, yi la awye pmi ya n bonukwoyi doho-doho yi, Ko dna n zafun, ya ze yihin a gyi-gyi-yi, ya zan-zan n Shekwoyi dnawoyi, yi ga yihin tukwo n wo akun.

²Yi gyi fye wye fye la abugba guya gayi njesun, ntuge yi to zhin zaho benukwoyi nfyemin, yi to dna zaho zokwo nukwoyin, yi to gyi zaho fin nfyem.

³Mi ta da beye ntuge ma kpe fye agye num, ko ma zun fye knim, gama shi mi ku shinda nyi, fye filo n mi bugba har abada, ma pwo kwo ma fi bedo n fyei.

⁴Mi n bugba kalayi lo n fye nmwa, mi gma n fyei n mwa, fye la bugba kala ga mi n mwa, fye la bugba buyi gami ko shi ko nyi mi ku wahala sin n mwa.

San-san Ba Mi Kwa Be N Kagna Yi

⁵Esa n yi bei si Makidoniya, yi to bei shegun yi n bwa doho-doho yi, n yi mi eyi abugba bei nunuyi n vi-vin yi n dnayi.

⁶Shekwoyi n wo fu abugba bma-bmayi ya nyi, wa fu yi bugba n Titus be-be-yi.

⁷Owo be-be nu to gayi bugba buyi gmanyin, ama nabari manayi n wa be yi n cei n fye tukwo nyi. Esa n wo bei gna mi ge fye bei shi omi bebe awye, shi bugba bei wun fye n tu nya bo n kwo bei zhin nyi. Nfye bovi, n ye-yeyi n fye n cei lo-lo n mi bo nyi, mi bei la nu n bugba buyi har koyi gyi ya.

⁸Bugba ta wun mi lo nge mi bei tnu fye n wasika yin, kwo shi bugba bei la mi wun nsaho yi, mi yi pa shi kwo ba san fye, ama kwa san fye esa fyewyi nu kawai.

⁹Nsayi ye a dami lo, shi mi bei tnu n koyi, to ge shi kwo bei kni fye bugban, ama ntu ge okwo san-san n la fye pmi awye wu n Shekwoyi bwa. Bugba wun manayi nu n fye bei zhin, bugba-wun pya n Shekwoyi n cei pma owo aza ba bwa, na bayi n mi ta shan fye aba be n minagyi yim.

¹⁰Gama nsahoyi Shekwoyi zhin apma, n bugba-wun yi n ya ba, n na bai kwa bma yi zhin, ya pmi awye ya n benukwoyi, ya zan wye-wyeyi nyalo-nyalo nya shin. Bugba to wun yi, ngy shi wa tnu yi n kwoyi m. Ntu ge bugbawun tna-viyi nya to zhin abuye nya num, kwoi ta gni 'za n efi nyalo-nyalo nya m.

¹¹Fye gye nya n bugba-wun nkwo gmi n Shekwoyi aba, nku zhin ga fye. Kowi zhin fye, fye ku ze aza gaiciya da, abefyece-viyi, fyei zhin atna fya fa laifi nma ka fye nkwo tukwo nyi. Fya wodna n bei nkwo bei zhin nyi, ai wo fye ngye mi be ma bma fye zhin. Fye la kni, fyei la fyehin kun n laifi, shi fya ye fyei ta laifi-da, fye ku bo zhin nkwo bmiya.

¹²Mi to ka fye ntu 'za bo nu nwa izhin laifi nyim, kwo oza nna zhin wo laifi nyim, ama ntu ge n Dagayi ba zhin fya gye, ngye shi fye pa yi bo lo n sun.

¹³N bugba kalayi n fye bei ga yi, n fye ye-yeyi nyi, yi bei ku bugba bui-bui bwa n Titus be-beyi, shi fya gwo wo nna gmadayi.

¹⁴To woi lakam, ma ku gna wo ge mi gyi 'gbe n fyei nu, ofyehin kwa fye to ye ge omi gbegyi kwa ze gbeloyim, ngye shi mi zhin ma gna fye gaiciya ci-ci, Titus nwohin tukwo, wo ku gye ge, omi gbegyi n fyei, kwo zhin gaiciya nu.

¹⁵Wo ye fye n mwa, saho-sahoi nwa pa shi fye bei wo owo beda n bugba yi gmanyi fya gwo wo n pwawo-yi, n bugba manayi.

¹⁶Deye da mi bugba lo, shi mi kpelo ge nyaho to dnalo n yi atasin, njesun mi n bugba kalayi lo n fye aba.

Akorintiyi II 8

Amakidoniyyai Nku Nyaga

- ¹Nsayi mi ye ma gna fye ɓo, Shekwoyi ku zhin ga ikklisiya Makidoniya dna nwo alheri.
- ²Kwo shi kwo nyi ɓa fi lo n wahala nsa nukwoyi, ɓa ku oba bugba buyi gmaje nɓa sangyi-yi, deye kwoi zhin ɓa, ɓai mi ɓa ga nyaga, ntu azaje ɓo nbugbayi gmanyi.
- ³ɓa to ga nyaga ye ngye shi oba nyabwa lo num, ama ɓa ga kwo ndutu, mi ga saida ge, ɓa zhin lo nu ntu ge oba bugba beye nu, ɓa to zhin kwo ntu mi gna-gna ɓo num.
- ⁴Har ma ɓai gyi yi wye ge, yi gwo agyiwye ye, ntuge ɓahin ɓa dnabwa n na Yesu-viyi ɓmazhin ɓo, dna Urushelima.
- ⁵ɓemanayi du-duyi nɓa zhin, har ndu ngye shi eyi awyetu bei nyi, kwo nu ge, ɓa ku ɓahin tukwo ga n Shekwoyi akun ɓedo n yi, ntu ge ya dna ɓa n zokwo ngye shi Shekwoyi ɓa wu yi.
- ⁶ɓa bei zhin kwo n bugba bui-buyi, har ya tnu n Titus yi, n wo bei gafye bugba kala dna n nyaga kmisunyi nyi, wa ɓe fye aba, wa ga fye bugba kala, n na ɓai fya nu fye rabo dna tnu-tnu nyaga nya ye.
- ⁷Fye zhin aza dnagmayi nu na zokwoyi mwa begye, fye n gaiciya gai lo, a wa'azi zhin yi manayi, a beye-kpeyi mwa, n pwawo ɓmazhin nya, n ye-yeyi mwa ntu yi ɓo. Nsayi ye mi ye fya ze aza dnagmayi dna n zafun nyaga nya.
- ⁸Mita ga fye wyidna num, mita ci ge tilas fya zhin n lo num, ama a wo azaje pwa lo n zhin yi. Zokwo nyi n kwo ɓa wu ge ofye ye-ye zhin ɓehin-hin nya nu, kwo du ɓeda asan lo.
- ⁹Fye kpe lo shi eyi Dagayi Yesu bei nu n ye-yeyi, n na aza ɓmazhin yi. Kwo shi kwo nyi wo zhin nyabwa-yi nu, ama wa ze wyekwoyi nabayi, dna n wo awyekwo wa ze fye a nyabwayi.
- ¹⁰Mi ga fye shaula ge, fye zo obo zhin n fye bei ya zhin eye bwigyi n kwa duya nyi, gama ofye nu to zhin kmisunyi n fye bei ɓe n nubozhinye pya yin, ama ofye nu zhin aza kmisunyi n fye bei ya ce zhin.
- ¹¹Shi fya ya beye n bugba pwawo yi nyi, fye zhin kwo har fya zo n bugba bui-buyi, fyei ga enya n fye ɓa mi, dna n nyaho-nyahoi n fye n cei lo, ofye yaya pwawo, kwa wu dai-dai n fye aɓe zhin yi.

¹²Ngwe a kufye pwawo lo, fya ga nya, to, kwo to zhin nyaho nu shi fya ga n sun, Shekwoyi ye fya ga enya nfyen ceilo nu, wo ta ye fya ga nya nu n fye to n cei lo n.

¹³Mita da lonu ge, aza nba gwo fye nya ga, ba bwa sauki, atu fye da akaya num.

¹⁴Ama gye ga ba, ngye shi fye cei lo nsayi ye nmwa nyi, nwyihoyi bahin bo gafye esa nba cei lo nmwa, n sa yi nfyafi nsangyi, kwo ba ze ngye fya gna dai-dai.

¹⁵Ho pa aya bo lo nba ci ge, “Oza nwo bei yezhi nmwa, nya to bei ce wo shim, oza njesun nwo bei yezhi fyewyi wo to bei gyisan m?”

¹⁶Mi zhin Shekwoyi godiya lo shi wa ga Titus bugba efye bopa nya, shi mi n cei lo nyi.

¹⁷A da wo lo wa vi mi shaula zhin, nge wo be fye aba njesun, ama mi gyelo n gye wo bei ba be koto miyi a gnawon, gama awo wo pwalo ngye wo be wa gye fye.

¹⁸Mi tunlo n gnisun nwoyi zado, ye-yeyi, Nabari manayi wa’azi zhin dna n na ikklisiya vinya.

¹⁹Behin-hin, a ikklisiya nu bei kni zagye, wa zan ngnisun n mi yi, yalo n na nya gayi n Urushelima, deye ba la Shekwoyi tu, kwa wu eyi pwawo ntu azaje bmazhin bo.

²⁰Eyi zan-zan n kun-sun Ba wu eyi gaiciya, oza ta da beda kasa tu n yi tukwon, gama yi to n cei pmalo zaho wa bwa laifi tu n yi tukwon, dna n zokwo n yi shi anyaga ye nyim.

²¹Shekwoyi kpelo shi gaiciya sun. Mi n cei pmalo aza vinya ba kpece, cenu a zhin yi zhin shiri deye.

²²Mi tnu fye lo n eyi zado yi n yi kpewoyelo da bemana zhin bo nyi. A wo wo pwalo wa be, gama mikun gnawo shi fye pwawoi lo ntu bmazhin bo.

²³N oza nya fye ge nyikadonu zhin Titus’a? Fya gna ge, wo zhin omi zadonu, omi bmazhini dna nfyen bmazhin, fya gna nge azaje ngun aba zhin wakili nu a ikklisiya nya, bai zhin misali nu aza nba zhin Dagayi anya.

²⁴Fyewu fye ye-ye n na aza deye aba ntu mi bo, fya zhin ba enya vinya n mi gma n fyei nyi, ntuge aza vinya ba gye.

Akorintiyi II 9

¹Mi kpelo ge ko to zhin tile nu, ma ka ga fye ntu Shekwoyi aza bmazhin bo m.

²Gama mi kpelo shi a wo fye pwa lo fya zhin ce, har ma gma n a nugundo aba n Makidoniya nge, fye bei n cei pma fya tnu a bmazhin tunyi ntna. Behin-hin, efye bugba napye nu, na ga aza be pwawo ba bmazhin.

³Ama mi tnu n naza deyeyi ya kpe dei-dei ge fye n shiriyi zhin lo, shi ma gnaba fye n cei zhin lo, n fye agyi-wyei yezhi, mito n cei pmalo kwa ze n saye ngye mi la bwi aba n mi gma gma yi nfyee bo m.

⁴Vinyiko ba wo mi n mwa – nfyeei be, n na azan Makidoniya be n gnisun n miyi, to ba gye fye nshiri yi zhin mi-i ku gna ban.

Ga, Shekwoyi Ba Gba Ho Ta

⁵Ce na zhin mi-i tnu n na aza deye yi, n mi abye ba kpe dei-dei cauta ye n fye bei zhin alkawali nyi ala yezhin ai pmi yi. Mi n cei pma kwa wu n gye cauta hin-hin, toge ngye atufye tile nu fyei gam.

⁶Ama fye pa ge n fya ga fyewyi, fye bei bwa fyewyi, Fwaiza n wa bye nyabye fyewyi wo zhin wa bwa ampanyi fyewyi, ama n wa bye n mwa wa bwa n mwa.

⁷Ozaho-zahoi vinya wo ba dna nwo bugba shiwo ba ga n sun. Fye to tu oza kala wa ga, ndu shi wo ncei pma wa ga n sun, ntuge Shekwoyi ci azanu nba ga n bugbayi gmanyi.

⁸Shekwoyi bami wa ga fye enya n fye to n cei lon, har ndu du bo, nnabai n fye ta gba o fye a bukata nu gmanyin, ama har n ko ba ce fya ga azaje n bugba bui-buyi.

⁹Kwo wu shi littafi a danu, “Shekwoyi ’za zhin wa ga awyekwoyi nya n bugbayi gmanyi. Owo bemana zhin ba ze owo mwa-mwa nyalo-nyalo.”

¹⁰Gama Shekwoyi n wo ga fwaiza nyabye, wa bye nyi, n na avun wa do nyabye n mwa wa gyi nyi, wo ba ga fye ndudu fya bye wa zhin kwa pa n na bai fya ga nya ndudu dna nfyee ampanyi.

¹¹E, Shekwoyi ba ga fye n mwa n nabai fya ga n mwa, esa n ya lo aza nfyee nya gayi n na aza aba bei sa Shekwoyi ami, bai ciwo n tu nfyee bmazhin bo.

¹²Abo ngun aba na zhin ntu nfyee bmazhin bo, aza n ba sangyi yi lo ba bwa bmazhin, bai ci Shekwoyi n jesun.

¹³Aza nfya bma zhin aba daba, to n tukwoyi tu n fye bmazhin n fya zhin ba n na azajeyi nyin, ama ba bei ci Shekwoyi, ntuge ofye a bezhin wu lo dei-dei nfyee wuwuyi.

¹⁴Ba be zhin addu’a gafye n bugbayi gmanyi, ntu n Shekwoyi alheri bo n na wuba nfyee aba nyi.

¹⁵Yi sa Shekwoyi ami ntu wo Nugun bo, owo cauta n ko du beda asan.

Akorintiyi II 10

Aba N Bulus Iko Kun

- ¹Omi Bulus, mi gyi fye wye pecei-ye shi Kristi n wohin tukwo ƚa zhin, ama azaho nƚe mi cilo nge, “Bulus wasika woshan esa nwo gni n tagni, ama esa nwo si n ya, edna ƚawo wo wa dabo nkalayi.”
- ²Mi to cei pma lo ma wu fye, esa n mi ƚa ƚe fye aba n cei, shi mi gyi mina-gyi nwun, mi to n cei pma lo ma zhin omi ƚemwi n na aza aba n ƚa gye ge omi ƚeda zhin oza ƚeda nu kawai m.
- ³Kwo zhin gaiciya nu ge, mi zhin zanyikwoci nu n kalagbaya, ama mita zhin apma n zanyikwoci shiri yi ko dabalai nu mi-i gyi nasaran.
- ⁴Mi zhin apma n Shekwoyi akun kaya akalada, to ge ado n zanyikwoci wa zhin nwo abwa yin, mi-imi shetan aba anukwoyi akalada ya m.
- ⁵Akun kaya ye zhin ƚa bma tukwo mwa doho-dohoi ya, nkwo zhin gaba n Shekwoyi n nyai nkwo ƚa pmi aza awye ya nwo. Nna akun kaya ye yi nu, mi wan a wyenakpeyi ya, mi-i jezebe n ƚai n Shekwoyi aba, ai shanƚa do ƚa ze aza nƚa bugba ƚeye nu ge, ƚa vi Kristi ƚo.
- ⁶Mi ƚa zhin apma n na akun kaya ye yi, tu n tukwo gnanakwoi doho-doho, mi ƚei zhin apma nƚai nu nƚe, fya ga fyehin tukwo n Kristi akun.
- ⁷Oƚo gmanyi nƚe aba, okonu fye shimi awye, mi wu n gba kala gbagba yi, ntna kala, ama fye ta shi awye n fmin. Ama ngye oza lo nwo ƚa gma n Kristi kalayi n ikoyi mi ƚa mi ma gma ndu wo.
- ⁸Kwo wu lo n gye mi gmalo nmwa n mi ikoyi tu nƚe tukwo, iko ma bmafye zhin, to ge ma tu fye ci, mi ƚa zhin apma manayi n mi gma gmayi.
- ⁹Mi da deye, to fya gye nge mi ƚewyi nu, esa n ma lanu n fyei dna n mi wasikan.
- ¹⁰Aza ho gna ge, “Fye to damu nwo wasikayin, wo da ƚo n mwa ama wo ƚewyinu. Esa n wa si n ya fye to ƚei bwa ƚeho manayi nwon, owo pwa to ƚei shan fye fin.”
- ¹¹Nsayi ye omi ƚebe ƚa du, omi awasika dudu n shanwo.
- ¹²O, fye to wun bugban, mita ci ge mi du aza de ye lo, nƚa gna fye shi ƚa gma nsun, Oƚa wahala bwasun nge ƚa mwi ƚahin do n na ajeyinu. ƚai mwi ƚahin do gaba nƚa ƚeye-kpeyi, ƚo kasa.
- ¹³Ama yi ta gma n ikoyi n yi to ncei lon, Eyi ƚemwi, ya nu Shekwoyi shiri n wo cei zhin n yiƚo, shiriye zhin eyi tnu-tnu zhin n gnisun n fyeyi.
- ¹⁴Yi ta bwi aba nu, ya wu yi iko n yi cei lo tu nƚe tukwon. Gama eyi nu ƚei kmi efye aba ƚe n Nabari manayi Kristi nya yi.
- ¹⁵Kwo to wu ge yi ye ya gwo mwa-mwa n zado nku zhin m. Yi ye efye gaiciya ga kwa mwa n na ƚai eyi tnu-tnu nƚe aba kwa mwa pata.

¹⁶Ndeye avun yi ba mi ya zhin a zhido wa'azi n ba kpalo n fye yi, aba n zado ta zhin tnu-tnu lon. N lonu zaho ta shan ci ge yi fi n zado fwan.

¹⁷Shi Shekwoyi beda da, "Ndei oza ba gman, wo gma n nyayi n Shekwoyi n ku zhin, to ge nwohin tukwoyin."

¹⁸Esa n zaho a gma nwohin tukwoyi n beyi nkwo ku zhin, ko to zhin nyaho nun, ama esa n Dagayi wa ciwo, kwo da wu lo gbo.

Akorintiyi II 11

¹Mi ye fya bwa omi n miyi shi mi dabo n gye mama. Fye bwa emi n miyi ma dabo n ko n mi yi fi n bugba.

²Mi n shewo yi lo nfyeyi, shewo Shekwoyi nya pya, wato of ye ye-ye kwa ze Krisiti nyanu gmanyi. Shi binyinkwoyi gyi-gyi-yi zhin wa sewo ye-ye shi ntu n enu bo nu n woye nyi. Oza nwo ba zhin owo ba.

³Ama mi wo dna lo n vinvin yi, mi-i wodna sakun zaho wa pmi fye awyeya n fye gaiciya ga dna n Dagayi, shi shetan bei dna Hawawu kwoce dna n Adini ofwa nyi.

⁴Fye wu lo ngye fye to mi zhi lon, fyei ga nyaho-nyahoi gaiciya n na gna fye, ko oza woi zhin fye Kristi do n wa'azi gbo ndoyi n yi zhin nyi, ko zafun do ndu Zafun Gyi-gyi-yi nfyeyi bei gwo nyi ko ai wu fye zokwo do n fye ba pwo, fya gwo ko lo abwa 'ba-ba.

Aza Gyifiyi

⁵Ama mi tagye lo ngye aza nba yi bahin ge Shekwoyi atnu-tnuyi nyi, ge ba du mi lon.

⁶Ngye mi ta kpe wa'azi zhin, amma mi kpebeye lo n mida, shi mi gye fye ku awyega bwa nsa yi ntuge yi ku wu fye pei-pey.

⁷Ma zhin benukwoi nu, mi-i gba mihin nfyeyi aba, shi ma zhin fye wa'azi Shekwoyi nabari manayi nya, to ma gna fye ge fye gba nya hon?

⁸⁻⁹ Ama ma gwo a ikklisiya je cauta n ba tnu mi n cei, n nabai ma zhin fye tnu-tnu to fye yi gba nyahon. Sa deye bei ku zo mikun kwa yami gun, ama to ma nya fye behon, gama a-Yesu-viyi n Makidoniya bei ku bemi n nyaga yi. Mi to nya fye gyiwye bon, mi-i ta shan fye nyan.

¹⁰Mi ku alkawali zhin, ngaiciya ga yi n mi ceilo dna n Yesu nyi, nge mi ba ku gna aza vinya n Helleni.

¹¹Ntu knibehi'a? Ntu ge mi ta ye fye lon? Shekwoyi kpe lo ge mi ye fye lo.

12Ama, mi ɓa zhin ma zun aza kni n ɓa gma ge ɓa zhin Shekwoyi tnu-tnu nu shi yi zhin nyin.

13Shekwoyi nu to tnu n na aza ye pyayin. Kwo fyewyi, ɓa zhin akataceyi nu, ɓa dnafye kwoce n gye ɓa zhin Kristi atnu-tnu yi.

14Ama ce ta wo mi lon! Shetan zhin wa pmi wohin bma ngye malaika buzangna nya.

15Ntuce nu kwo to zhin obe wo-woyi nu, owo abara ɓami ɓa zhin lo nu ce, ɓa ze n gye a tnu-tnuyi, manayi. N navun ɓa ɓa gwo tata doho-dohoyi, nɓa atnu-tnu nukwoyi kunce lo n cei.

16Mi gyi fye wye n jesun, fye to gye ngye mi zhin mama num, ko fyei gye lo nu, fye wo mi beda nabai ma mwa mihin tukwo ngye ɓa.

17Dagayi to ga mi iko ge mi mwa mihin tukwo lo num, ntu ge mi zhin aɓo lo ngye mama nwo ton na pwo yi m.

18Ama aza deye ɓai gyi abye, ɓai gna fye, shi ɓa kpe ɓeye lo nsun, omihin ɓa mwa mihin tukwo.

19-20 (Fye gye ge fye cecei-lo, ama fyei kna a mamahi beda tɓubua n bugba buyi, fye ta damu lo, esa ɓa zefye oba fyenu, ɓai gwo anya vinya nfye n cei lon, ɓai gyi gyiba tu nfye tukwo, ɓai ci fye wyegba.

21Vinyiko wo mi lo maci ge mi to n kalayi lo n migni yi n lonun, ama enya n ɓa mwa ɓahin tukwo n cei mi ɓami ma mwa mihin tukwo ce.)

22Ba ta mwa ɓahin tukwo ge ɓa zhin Ibraniyi nun? Mi zhin kwo nu. Ba zhin a Israilayi nu? Mi zhin kwo nu. Ba zhin Ibrahim ayawyi nu? Mi zhin kwo nu.

23Bai gna ɓa zhin Kristi nu bauta? Ama miku bauta zhin wo ndu ɓa. (Mila zenya nu mi-i gma nsun layi). Miku tnu-tnu zhin n duɓa. Ayi dnami n kurkuku n na bwai mwabegye. A zhin mi bulala n na abwayi mwa begye. Mi sun n fiyi ci-ci.

24A Yahudiyi zhin mi bulala n ɓa knalufin n nukwoyi, shita-cei ciwagmanyi har abwa ngun atnu.

25Abwa ta ai lumi n na abusiya. A knimi akuta bwa zungmanyi. Abwa ta eya kwoi ɓaya nmiyi, bwa zun gmanyi mi yi dna n ela nsukwoyi vinya n kwo nyipyeyi be.

26Miku zan-zan n na abai mwa kpa, mi-i sin wahala anuwan yako nya. N na a viyi, n ma za akun Yahudiyi n naabyedo yi, miku wahala sin, n na azhi yakwo, n efiyi n bmana n na nuwan yi n na zakun nɓa yi ɓahin ge ɓa zhin Kristi aza.

27A ɓe mi n nanyi san yi, n tnagye-wan yi n sukwoyi, nsayi mwa-begye mi lo n mikunyi, nunwa mikunyi, mi-i zan n tna nyagyi, eseyi fumi mi-i vin, n tna aje nɓa bwi mi'se.

28Ndeye avun mi n damuwa yi lolo shi ikklisiya zan-zan lo n wu.

²⁹Nyikadonu bwi aba to mi-i wun bugba n wo bon ma? Nkadonu miya to ai wo mi pwa n ge mi bmawo zhin ma? Nkadonu la gbidokunnu n zafun to minagyi yi gyi mi n zayi n wa zhin woi gbidokunnu nyin ma?

³⁰Ama ndei n mi ba gma, ma gma n na anyayi nu n ba wu emi kalagba.

³¹Shekwoyi eyi Dagayi Yesu Kristi dada n na ciwo nyalo-nyalo nyi, kpelo ge mi da gaiciya nu.

³²Ngwe, gwamna n Dimaska, n Esu Aretas yi ba gu ezhi ntu ge ba wan mi.

³³Ama a kamishi n na awunyi dna n katakpa n ebwo nkwobei ce n ganuwan nyakun pa, ma lo minya!

Akorintiyi II 12

Shekwoyi Iko Dna N Kalagba

¹Gmagma yepya zhin acije nu, ama fye fa ma gyi abye, ma gnafye abewyegye bo, n na bei n Dagayi ku wu mi.

²⁻³Aye ngunawo-cei anyi n ba duya nyi abei lami lo cei n 'she mazhin ziyara. Fye to nyami ko dna n mi nayi kwo dna n mi zafun. Ntuge mita kpe genyi lon. Shekwoyi gmanyinu kpe ce lo. Ama mi bei la lo 'she.

⁴Mawo afo wo-woyi n ba du zanyikwoci asan wa da (ama ato bei ye nge mi gna aza abeyem).

⁵Beye-kpe ye pya kun ce lo oza gma, ama mita gman, miba bwa gma n mi kalagbai nu, njesun shi Shekwoyi n ikoyi wa zhin apma n zakala-gbai n tu nwo mwa-mwa bo.

⁶Mi n na abeyi lo n mwa, n mi ba gma n ba bo, mi-i ta ze mama nge mi gma ntu nba bon, ama mito cei pmalo oza zhin nubon n mi tukwo ndu enya n wo gye n mi zan-zan, woi ce woi ce woi wo n mi wa'azin.

⁷Miba da beye, gama ebeye zhin afo adnagmayi nu, Shekwoyi bei wodna sakun miba mwa mihin tukwo n bai nu, ntu cenu a gami kalagba dna n nayi, kola ze ekna dnami nayi, she tan tnu-tnuyi ko knimi kwoi gnami-gna-gna.

⁸Abwa ngun ata mi-i gyi Shekwoyi wye, wa ga mi lafiya n jesun.

⁹Ama wa gnami ge, "Awo, mikunsun lo nhoi, nyanu n ho n cei pma lo. Omi iko wu kohin n du, n na aza kala gbayi aba'a." Nsayi ye a damailo mi-i gna shi mi to n kalayin, adamilo mi sase ngye oza n wo wu Kristi iko maimakon mi wu emihin iko n beye-kpeyi.

¹⁰Shi mi kpelo ge ntu n Kristi bo nu nyi, bugba ta wun mi lo n ekna yi bon, n na agyeyi, n wahalayi, azhin n gmagma sin yi, gama esa n mi gba kala, n sahi nu n mi n kalayi.

¹¹Fye zhin mi, mi-i zhin abo ngye mama, mi-i gma n lanyi, ko bei kunce efye nu fya ci mi, to ge ma ci mihin tukwom. Ntu ge nyaho to lo nna aza deye ncei lo, n mi to cei lon ko shi kwo nyi mi to zhin nyaho num.

¹²Esa nmi bei kunsun nfyeyi, mi bei ku wu fye pei-pe, nge mi zhin tnu-tnuyi nu, n Shekwoyi wa tnu n miyi n wohin tukwoyi, gama mi bei ku abo awo-woyi n na atnu-tnu yakwoyi zhin nfyeyi aba.

¹³Enya gmanyi n mito bei zhin fyen, n mi bei zhin n na a ikklisiya aje, ekwonu mi to ze akaya n fye aban. Mi to bei gnafye ge fye gami nyagyi magyi, n na abai n mi ba wangyen. Mi gyi fye wye fya zhin mi gafara, ntu laifi ye bo.

Mi Je Fye Aba Be Lo

¹⁴Nsaiye mi je fye aba be lo, bwa tahi, mi-i ta nyafye nyaho bom, mi ta ye efye agyiwyeyi lon, mi ye fyenu, nzokwo doho-dohoi fye zhin omi abinu, fye kpelo abi ta gba oba dada n oba ayayi nyagyi ba gyin. Abi danu ga abi nyagyi.

¹⁵Mi nbugba bui lo, ma ga fye omihin tukwo n nyayi vinya n mi n cei, ntu n fye bo dna n zafun. Ko shikwo-ny, 'fye yeye to mwa lo n mi aba, ngye shi mi ye fye nsun nyim.

¹⁶Azaho n fyemi bai gna ge "Ko zhin gaiciya nu yi ta wu nyaho n wo beben, ama wo zhin oza ce-ceyi nu, woi dnayi kwoce, yi tabbata lo tilas wo bei la gyiwyeyi go n yi n zokwo doho."

¹⁷Ama n wuna? Aza n mi bei tnu n cei nyi ba bei ku gyibaho gyi tu n fye tukwo?

¹⁸Esa n mi bei gna Titus nge wo be n eyi zado yi n jesun, ba bei ku gyi baho gyi tu n fyenu? Awo, gama yi n Zafun Gyi-gyi-yi gmanyi yi nu, yi zan-zan gmanyi, yi zhin bo n zokwoyi gmanyi.

¹⁹Mi zhin nubo fye gye ngye mi da abeye vinya, n nabai fya ye n mi-i nu, ko ngye ma bmiya mihin shi nfyeyi aba. Ko to wu lo nu m. Mi da deye n Shekwoyi abye, ngye aza nba dna n Kristi, emi anugundo ye-ye-yi ntu ge ma mi fye zhi dna n zafun.

²⁰Gama edna wo mi lo esa n ma be n cei, anya n mi bo gye ta damin, enya n mi ba zhin ceta da fyen, edna wo mi lo mi bei gye fye fi fyei wu anya. Fye wo aje 'she, fyei gyi minagyi n na ajeyi fyei mwa fyehin tukwo, fyei da bo a nukwoyi n na aje tukwo n nunuyi n tukwomwayi n na ajegna yi.

²¹E, edna womi lo ntu ge n ma be fye aba Shekwoyi ba gbami n fye abye, bugba wunmi ma ci bwi, ntuge n mwa-begye nfyeyi, n ku laifi zhin bai ku ze alaifida to bai damu n benukwoyi, abo cegye nya n fye ku zhin, n na aje anyikwo gwoyi.

Akorintiyi II 13

¹Ebwa tahi nyi n mi be fye aba, Littafi a gnayi nge n aza gun aba ko ngun ata nku benukwoyi gye tilas atako, (To emi gnakni bwa tahi nu nyin.)

²Mi bei la gnaknin aza n ba zhin laifi nyi, esa n mi bei be fye aba cei nyi, nsayi mi gna kni ba njesun, shi mi bei shin gnaknin ba nyi, du n na azajeyi be n ge n ma be, miye ma ta banu mi ta gye ba sun-sun m.

³Mi ba wu fye enya n fye ye vinya fya kpe n ge Kristi dabo n fyei dna nmi, Kristi to gba kala lo n wo abo zhin n fye yin, ama wo zhin iko yakwo nu dna n fye.

⁴Ewo nayi kala gbayi bei lafi tu n zundu, ama nsayi ye wo n wye-wyeyi lo dna n Shekwoyi iko. Eyi n yi cenyi yi gba kala gba-gbaya lo dna n nayi, shi wo bei gbakala, ama nsayiye yi sase n kalayi shi wo ncei nyi, n Shekwoyi ikoyi vinya n wo abo zhin n fye yi.

Fye Mwi Fyehin Tukwo Gye

⁵Fye dna fyehin wye, Fye zhin a Yesu viyi nu? Fye gyi nasara lo? Fye wo Kristi aese lo nwo ikoyi n fye a bugbami? Ko fye dna fyehin kwoce nu ge fye zhin a Yesu viyi to fye yi zhin ma?

⁶Mi zhin nubo nge fye ba ye, fya zhin saida nge miku nasara ho gyi, mi zhin Kristi nyanu.

⁷Mi zhin aduwa nge fya se ase manayi, to ge ya bwa enya n yi ba gma n cei n, koi wu nge enya n yi wunyi ko zhin gaiciya nu. Awo, gama yi n cei pmalo fya zhin bemana kwo ai ci yi wyegba.

⁸Eyi tnu-tnu nu ya ga bemana zhin bugba kala, to ge ya zhin nubo n benukwoyin.

⁹Adayi lo shi yi to n kalayi lon ai ciyi wyegba, ama fye n kalayi lo. Eyi bemwi n yi aduwa zhin yi, okwo nu zhin fya ku ze a Yesu vi yi kalada.

¹⁰Mi ka deye ga fye n na awyetuyi, mi ta shanbe ma ta fye esa n ma be n cei n, gama mi cei pma lo ma zhin a pma n Dagayi ikoyi n wa gami nyi, to ge ma ta fyen, ama ma zhin fye fya ze a kalada.

¹¹Mi zo emi wasika n na be da ye yi. Fye da gma fye mwa fi n Kristi fye kna abo tunbua n mi ku da nyi, Fye sase n bugba-doloyi, n bugba fuyi. Shekwoyi ye-ye nya, n bugbafu nyayi wo kunsun n fyei.

¹²Fye bi aje gna dna n Dagayi.

¹³A Yesu viyi n ya ba bi fye gna lo.

¹⁴Alheri eyi Dagayi Yesu Kristi nya ko kunsun nfyeyi vinya. Shekwoyi ye-ye n Zafun jedoƙe yi ko kunsun nfyeyi. Amin.

Agalatiyayi

Agalatiyayi 1

1-2 Wasika ye gmi n mi aba nu, omi Bulus wa'azi zhin yi, n na Yesu viyi ajeyi, n ba nyi n ya nyi. Kwoi lo a ikklisiya aba n ba nyi n Galatiya nyi. Aza nu to bei yi mi nge mi be ma zhin wa'azi yen, Yesu Kristi nu bei yi mi n wohin, n Shekwoyi Dadayi n wo bei lawo kala n efi nyi.

3Fa bugba fu, n anabarkai, n ba kun n Shekwoyi Dada aba nyi n Dagayi Yesu Kristi yi ba ze efye nya.

4Wa fi ntu yi alaifi bo shi Shekwoyi Dada bei zhin shiri, wa gni yi n anyi nukwoyi ye n yi fi n ba nyi.

5Mwa-mwa vinya kwo zhin Shekwoyi nya nu nyalo-nyalo. Amin.

Nabari Manayi Do To Lom

6Ce womi lo, shi fye pmi awye ya n Shekwoyi n pye, dna n wo yeye nu n sun-sun gyei, n wa yi fye fya vi, fya bwa wye-wyei nyalo-nyalo, n wo ga dna n Kristi nyi. Fye ce fyei vi zokwo do nkwo ta si fyei n she n.

7Gama zokwo do to lo n du odo n ya wu fye nyi m, aza n ba shando bai pmi Kristi gaiciya bma, banu dna fye kwo ce.

8Fa Shekwoyi knitu kwa tu n zaho-zahoi, n mihin be, n wo zhin gni-gni zokwodo wa'azi n du do n yi bei wu fye nyi, e, ko malaikai gmi n she wa zhin wa'azi do gbo n yi nya yi, fa Shekwoyi knitu kwa tu n wo.

9Miba je ce da. N za zhin Nabari manayi do wa'azi gbo n doyi n fya gwo nyi, fa Shekwoyi knitu kwa tu n wo tukwo.

10Fye gye lo nfyehin, mita ye ma fu fye bugba nu n na beda manayi yin. Miye ma zhin bonu n kwo da Shekwoyi. Ndei mi zhin atna ma fu aza bugba nu, ha gye mi to zhin Kristi fyenu nu m.

11-12 Omi anugundo ye-yei, mi si nyasi behin-hin nya, nge zokwo n kwo lo 'she nyi, n mi bei zhin fye kwo wa'azi nyi, ko ta gmi n zaho aba nu, ndu Yesu Kristi n wohin tukwo, n wa wumi nya n mi ba da. Zaho nu to shan mi wun.

13Fye kpe lo shi mi bei wu sanu n mi bei ye vi a Yahudiyi kunnu nyi, shi mi bei zan a Yesu viyi zanyi n tna sun-sun, ma wu ba to a shan ba ye won.

14Omi nu bei zhin a Yahudiyi kunnu viyi hin-hin n yi kni n sahi yi, ma zhin atna shi mi ba mi ma vi akunnu n na be kniyi eyi adini nya.

15Ama nya ho a zhin. Gama tunyi to ai mamin Shekwoyi bo la mi kni ma ze wo nya, wa yimi, n ye-ye dnagmayi n alheri yi.

¹⁶Wa wu owo bi n mi mi, n na bai ma lo a byedo aba, mi wu ba Nabari manayi Yesu nya. Sanu n beye bei zhin lo nu n mi-i, mi to bei lo zaho-zahoi aba ma wu won.

¹⁷Mito bei lo Urushelima ma wu aza lafiya, nba bei zhin abara n mi abye nyin.

¹⁸Mi to bei lo Urushelima n, sai n aye ngun ata avun, ma gye Bitrus, ma dna nbo n woi anyipyei n gun awo-cei-atnu.

¹⁹Bara gmanyi n mi bei jegye n sahi, owo nu zhin Yakubu, Yesu mado.

²⁰(Fye wo obo n mi gna fye nyi gama mi gna fye beye n Shekwoyi awyeba nu. Nyanyi n kwo bei zhin, mi ta ce akata nu fi fye n.)

²¹N ziyaraye avun ma lo Suriya n Kilikiyayi.

²²Har nsayi a Yahudiya yi a Yesu viyi to bei kpe shi mi wun.

²³Nya nba bei bwa kpe gmanyi, kwonu ge ba bei wo aza bai cige, “Oza n wo bei zhin yi nuwun yi nyi. Wo zhin gaiciya ga hi nu wa’azi n sayi, n wo bei ye wa wunkwo ya nyi.”

²⁴Ba ga Shekwoyi mwa-mwa ntu mi bo.

Agalatiyayi 2

¹N aye awo-cei-anyi avun, ma, jeze lo Urushelima n gnisun n Barnabas yi n Titus yi.

²Mi bei lo nbo n tnu-tnuyi nu n Shekwoyi bo tun mi, mi-i gna ema zaje nya n Shekwoyi zhin lo n abyedo aba. Mi bei ku boda n na tukwoda yi n nya tukwo n mi zhin kwo wa’azi, mi zhin nubo ba bei ku kpe beye n mi da ba.

³Ba ku ye, ba to bei damu ko ba cige, Tutus emi tnu-tnu kun-zhin yi, a zhin wo kacyan, ko da yake wo zhin ebyedo nu.

Abona Tu Owa Tukwo

⁴Ko ma, benya deye pya to bei ba ben, sai dai aza n ba yi bahin ge a Yesu viyi, a Yesu viyi a katai n ba be, ba pmi be gye n yi zhin, ba gye a gmada pya n yi n cei dna n Yesu, ko yi shi a Yahudiyi awyidna bwa lo. Ba zhin atna ba payi gyi n ba wyidna n gye a fyenu pa zhi na gmayi.

⁵Ama, yi to bei kna ba tnuuban kwo fyewyi, gama yi to bei n cei pma fya gye ge a bwa gni-gni dna n kaciya zhin mi nun, kwo a Yahudiyi awyidna bwa shin.

⁶A ikklisiya tukwoda dnagmayi bei zhi bo, ama ba to bei bwa enya n ba babe n mi wa’azin (Ko-dayake ba zhin a tukwoda dnagmayi nu ba to zhin nya ho nu n mi aban, gama eyi vinya yi zhin gmanyi-gmanyi nu n Shekwoyi aba).

7-9 Behin-hin, sanu Bitrus, Yakubu n Yohanna yi n na kpebaye n ge ba zhin aza dnagmayi nu fi n ikklisiya, bei gye shi Shekwoyi wa zhin apma n miyi n na abyedo gni-gni, shi wo bei zhin apma n Bitrus yi wa zhin a Yahudiyi wa'azi nyi, ntuge Shekwoyi gmanyi nu bei gayi nyaga ye pya, ba ga yi bugba kala ge yi gyi abye n wa'azi zhin yi n na byedo aba. Bahin ce, ba gyi abye n cei n na Yahudiyi aba.

10 Enya gmanyi n ba bei gayi shaula tu kwo tukwo okonuge, yi pa awyekwoyi bo, emihin ce ai wo mi pwa lo nu.

11 Ama sa n Bitrus bei be Antakiya, ma lanu n woi pei-pe, ntu nya bo n wo bei zhin ntuge kwo to bei bmiyan.

12 Ntuge sanu n wo bei kmi be, wo bei gyi nyagyi n na abyedo yi a Yesu viyi nbata zhin kaciya zhinyin ko na Yahudiyi awyidna m. Ama n navun sanu n a Yahudiyi Yakubu a nugundo bei be, to wa shan nyagyi gyi n na abyedo yin, ntuge wo bei wo ebo dna n na Yahudiyi abe kniyi ye ba da, n ba gna ge dole nu a zhin kaciya oza kpe gni-gni bwa.

13 Nnavun, a Yahudiyi a Yesu viyi baku ze a munafici da har n Barnaba yi be, ba zhin bo n Bitrus bei zhin nyi ko da yake ba kpe beye lo n kwo bmiya.

14 Sanu n mi bei gye bo n ba zhin, maku gye bata zhin belo n kwo kuncen, ko ba vi gaiciya Nabari manayi nyan, ma gna Bitrus n na aza bye, "Kwo da yake Yahudiyi nu na maho, sala mwa shi ho bei ya a Yahudiyi kunnu, ho zhin wuna na hoi zhin abyedo a Yesu viyi bai vi abeye njesun a?"

15 A Yahudiyi nu na maho n miyi, yito zhin abyedo abo nukwoyi zhin yi nun.

16 Yi kpelo ge eyi a Yahudiyi a Yesu viyi, yi ta bwa gni-gni n Shekwoyi aba ntu n ba kni bon. Ama gaiciya ga gmanyi n Yesu Kristi, kwa zhan yi alaifi ya. Ntu cenu yi kpema Yesu Kristi n na bai Shekwoyi wa gwo yi ntu gaiciya bo, to ge ya shi a Yahudiyi awyidna bwan. Ntuge zaho to lo n wo ba pwo n tu ba bwa shi bon.

17 "Ama kni nu ba zhin eyi gaiciyaga, n Kristi to gni yin ma, sai a zhin yi kaciya ya shi a Yahudiyi awyidna bwa? Yi ta cige gaiciya ga n Yesu kuyi zhin agman? Shekwoyi to ye oza zhin nubo lonu, tu n yi Dagayi tukwon.

18 Ai, yi zhin a laifi da nu, yi ya je anya kwo-kwo yi mi n yi la ba laya nyi, ko ya zhin atna ge ya shan gni-gni bwa, ntu n na Yahudiyi awyidna bwashi bo.

19 Gama dna n Shekwoyi beda ba nu, n ma kpe ge mita bwa Shekwoyi gni-gni dna n mi kukari zhin, n mi kalagbayi ge ma shi awyidna bwan. Ma kpe ge Shekwoyi go oza nu n wo ga Kristi gaiciya.

20 "Alami zundu n gnisun n Yesu yi, emi n mihin mito ye lon, ama Kristi nu dnalo n sayi ye n mi-mi. Wye-wyeyi hin-hin n mi ncei lo-lo dna n nayi ye n saiye nyi,

kwa be ntuge ma ga Shekwoyi Nugun gaiciya nu, n wa yemi wa gawo wyewyeyi ntu n mi bo nyi.

²¹Mito dna lo, n na aza nba ta gye Kristi efi ngye nyaho nu nyin. Gama n gye yi bei ba pwo ntu n na awyidna bwa shi bo. Kristi to bei ba shan fin.”

Agalatiyayi 3

A wyidna Ta Mi Nza Gnim

¹O, a Galatiyayi, aza tna cei. Nyikadonu na dna fye kwoce ye, woi zhin fye bo n sun layi'a? Gama fye bei zhin fyei gye Yesu Kristi efi pei-pe, n gye ma wufe hoto n Yesu yi tu woi fi tu n zundu.

²Miye ma nya fye bo gmanyi, “Fye bei gwo Zafun Gyi-gyi-yi ntu n na awyidna bwashi bo nu?” Awo, gama Zafun Gyi-gyi-yi bei be fye mi, fyei ku Kristi bo wo, fyei ku wo ga gaiciya ntu ge wa gni fye.

³Fye ku je a cinu? Gama dnan na a tnazhin ge fya shi a Yuhudiyi awyidna bwa, fye to bwa wye-wyeyi Zafun nyan n kmisunyi n, fye zhin nubo n wuna nu ge oba bwashi nsaiye nu ba zhin fya ze a Yesu viyi a kalada?

⁴Fye ku wahala sin n mwa ntu n Nabari manayi bo. Fye ye fya ya kwo nu nsayi? Kwo dnami belo ma gace gaiciya.

⁵Ma nya fye bo njesun, Shekwoyi wa ga fye Zafun Gyi-gyi-yi iko wa zhin abo a wo-woyi n fya ba ntuge fye shi a Yahudiyi awyidna nu bwa? Awo, ceto wolo nun, kwo nyi nsa nu fya ga Kristi gaiciya fya kpema wo.

⁶Ibrahim bei bwa zhin n lonu. Shekwoyi bei gna ge wo kunce lo wa lo she ntuge wo bei ga Shekwoyi alkawali gaicianu.

⁷Fye gye deye, nge Ibrahim abi a hin-hin vinya ba nu zhin aza nba ga Shekwoyi gaiciya bai kpema wo cewo.

⁸⁻⁹Knido nu shan sun a? Littafi bei shi esa ye nu awye n Shekwoyi ba gni abyedo ntu ba gaiciya ga bo. Shekwoyi bei ku ce gna Ibrahim tunyi n sapai ge, “Mi ba tu aza anabarka nba fi n kni doho-doho n ba gami gaiciya, shi fye gami nyi.” Kwo wulonun, aza n ba ga Kristi gaiciya ba bwa anabarka shi Ibrahim bei bwa nyi.

¹⁰E, Aza n ba kpema a Yahudiyi awyidna ba gni ba, ba filo n Shekwoyi knitu sinta gama litafi a ku da pei-pe, “Ekni n za tukwo n wa bma owa ye ya, n kwo kafi n Shekwoyi Littafi Owa nya nyi.”

¹¹A ku wuyi pei-pe ge, za to lo n wo ba bwa Shekwoyi alheri ntuge wo shi a Yahudiyi awyidna bwan, ntuge Shekwoyi ku luda ge zokwo n yi ba bwa gni-gni, konu zhin gaiciya ga. Shi Anabi Habaku bei da nge, “Oza n wa bwa wye-wyeyi, wo ba bwa ko dna n gaiciya ga nu n Shekwoyi.”

¹²Gaiciya ga zokwo wulo gbo n na wyidna zokwoyi, n kwo gna nge a gni za n wa shi Shekwoyi awyidna bwa vinya, “to woi bma ko gmanyi yan.

¹³Ama Kristi n la yi si, woi layi kunya n zokwo bednayi ye, woi la yi knitu benukwoyi zhinya tu n wohin tukwo. Gama a cei kafi n littafi. Knitu n za ba n na zun wo du tu n shinwa.” Shi a bei zun Yesu du tu n zundu shinwa nya nyi.

Shekwoyi Alkawali Nu Gyi Nabye

¹⁴Nsaiye, Shekwoyi ba tu abyedo anabarka, n anabarka yi n wo bei zhin Ibrahim alkawali nyi, Eyi vinya n yi zhin a Kristi viyi, yi ba bwa Zafun Gyi-gyi-yi n na zhin yi wo alkawali nyi, ntu gaiciya ga ye bo.

¹⁵Emi azaje ye-yei kwo dna n yi asese mi, esa oza ku alkawali zhin zado aku kwo ka, a bwatu, wota shan kwo don, Wota shan nubo zhin n na vun wa shan kwo don.

¹⁶Nsaiye, Shekwoyi bei ga Ibrahim alkawali o wo biyi, waku kpe nge ato cige owo abin ngye a dabo n wo abiyi vinyan – a Yahudiyi–ama abei dabo ga wo Bi-Wato Kristi.

¹⁷Nya nyi n mi da. Shekwoyi bei zhin alkawali nge wo ba gni aza n ba ga gaiciya, Waku kwo kakpe, wa bwa tu, ato bei ba mi a shan kwo do kwo a wun kwo ya n aye tagyi ngun anyi-cei-kpe shita avun, n Shekwoyi bei ga awyidna ngun awo nyin.

¹⁸Ngye awyidna yi bwashi bei ba gni yi, kwa wunu ge zokwo do nu gbo n za ba bwa Shekwoyi alheri n Ibrahim nyayi. Ntuge wo bei gwo Shekwoyi alkawali nu kawai.

¹⁹To, knihi bo zhin a ga awyidna ye’a? A bei be ba n na alkawali avun nu, kwa wu aza shi ba bma Shekwoyi awyidna ya. Ama zokwo ye bei be har esanu n Kristi ba be n cei, Ebi n Shekwoyi bei zhin kwo alkawali (Ko kaka yi lo fyewyi, Shekwoyi bei ga wo amalaika nu owo awyidna ba ga Musa wa ka za ga.)

²⁰Ama esa n Shekwoyi bei ga Ibrahim owo alkawali wo bei ga wo n wo gmanyi nu, a malaika ko Musa to bei zhi bon. Zaho to bei dna n ba tasin.

²¹⁻²²To, Shekwoyi awyidna nwo alkawaliyi ba zhin gaba lo n na ajei nu? Awo, kwo to wolo nun. Yi bei gna yi ba bwa gni-gni n na awyidna bwashi bo, Shekwoyi to bei ba shan zokwo do ga n kwo ba gni yi n laifi akun. Ntuge littafi ku da ge, yi zhin laifi afyenu nu vinya. Zokwo gmanyi n yi ba kun nkwo, okwonu zhin gaiciya ga n Yesu Kristi. Zokwo pwo-pwo nya गया gni lo ntu oza bo n wo ba ga gaiciya.

²³Sai esa n Kristi bei be, owa nu bei zhin yi guyi, kwoi kai wye har sa n yi ba ga anyi Gniyi gaiciya.

²⁴Mi ba dakwo lai, a Yahudiyi owa nu bei zhin yi nyawuyi kwoi wuyi zokwo sai sa n Kristi wa be wa gayi agni-gni manayi n Shekwoyi abye dna n yi gaiciya ga.

²⁵Ama shi Kristi la be nyi, yito n na pma yi lo n owa yin, kwa wu yi zokwo lo wo abam.

²⁶Gama nsaiye yi zhin Shekwoyi abi nu, dna n gaiciya ga n Yesu Kristi.

²⁷Eyi n na kuyi zhin baptisma fi n Kristi nyi, akuyi sofi n Kristi mi.

²⁸Yi to shan a Yahudiyi nu zhin, kwo a Heleniyi, kwo a fyenu, kwo a puwa dan, kwo a zanugbayi kwo anyikwozan, ama a Yesu viyi, yi zhin gmanyi nu dna n Kristi Yesu.

²⁹Nsaiye she yi ku zhin Kristi nya nyi, yi ku ze Ibrahim ayawyi. Shekwoyi alkawali n wo bei zhin wo nyi ba zhin yi nya nu n sayi.

Agalatiyayi 4

¹Ama fye pa ge n za dada fi, wafa nyabwa dnagmayi ya zhi wo bi, n woto mwan, bihi to du fyenu lon, sai wola mwa koda-yake, anya vinya n wo dada bei fa nyi ba zhin wa nyanu.

²Tile wa zhin bo n wa guyi a gna wo ge wo zhin, sai wo la si 'ye n wo dada bei da.

Shekwoyi Nu Na Lo Yi Ya

³Kwo bei wu lonu n yi-i kafin Kristi wo be, Yi bei zhin a Yahudiyi awyidna, n na bo kni yi afyenu nu, ntuge yi bei gye ge ba ba mi ba gni yi nu.

⁴Ama sa n sa manayi bo la si, sa n Shekwoyi bei kni, wa tnu n wo Nugun yi n nyikwoza ba, n na Yahudiyi mi.

⁵Wa si lo-loya gayi n yi bei zhin kwo afyenu nyi, n nabai wa zeyi wa 'bi.

⁶Ntuge yi zhin wa 'bi nu, Shekwoyi la tnu n wo Nugun Zafun yi n yi abugba mi, ntu cenu yi ba mi ya yi Shekwoyi ge eyi Dada ye-ye yi.

⁷Yito ye shan a bara nu zhin, ama Shekwoyi abi. Shi yi zhin wa 'bi nu nyi, nya wo cei vinya kwo zhin yi nya nu, gama nya nu Shekwoyi wa zhin shiri.

⁸Kafin ofye abyedo fye kpe Shekwoyi ye, fye bei zhin ashan afyenu nu n ba to n wye-wyei nyin.

⁹Ama nsaiye shi fyela Shekwoyi bwa nyi (ko miba cige Shekwoyi nku fye bwa) ko ba zhin wuna nu fya jeze n na vunyi, fya ze afyenu n jesun nya aba n kwo to n kalayin, wyekwoyi, adini n kwo to na pmayi n, fyei zhin a tna fya lo she ntu owa bwashi bo?

10Fye zhin atna fya bwa Shekwoyi agmada n nya yi n fye zhin, kwo nfye ta zhin m, n na anyipyeyi hoyi, ko apya ho, ko ayeho yi m.

11Edna wo mi lo ntu fye bo. Edna wo mi lo, kwo emi tnu-tnu vinya n fya ba ba ze gbeloyi.

Bulus Bugba Zhi-zhiyi

12Omi azaje ye-yeyi, a wo mi lo ngye fye ku ze ngye mi, fya wo shi a wo mi lo tu abeye tukwo, gama mi kni-kniyi lo n na agma ye shi fye bei kni-kniyi nyi. Fye to bei ci mi wyegba esa n mi bei kmi fye wa'azi zhin nyi m.

13Ko dayake, nyasan bei san mi esa n mi bei kmi fye be n Nabari manayi Kristi nya yi nyi.

14Ko da shike emi nyasan bei dami n fyei fye to bei nami abo fya nya mi yan. Awo, fye bei lami fya zhin mi bo ngye Shekwoyi malaika ko ngye Yesu Kristi n wohin.

15Zafun agmada nya gni na n yi i bei gni bwa nyi a? Gama mi kpe lo n na anyipyeyi hi fye bei ba kun fya wye n na agmadai fya ga mi-fye bei gna fya gye kwo n bmazhinyi n ma ba.

16Nsaiye, mila ze fye nunbaya nu, shi ma gna fye gaiciya.

17A malami a katai n ba ye fye n tu n fye nyabwa bo nu nyi, bata zhin ce ntu fye bmazhin bo nun. Nya n ba zhin atna ba zhin nyi, ba ye ba ka fye ya n minu, n na bai fya wo banu.

18Kwo zhin bemana nu aza ye fye, n ba ye fye n na bugba manayi n bugbayi gmanyi, ngye bata ye fye ntuge mi kunsun lo nfyei nun.

19O, emi abi, fye knimi cilo, mi gni miyi gye azhin shi gye n biya zhi wa gye, woi pmi wa ma bi nyi. Mi-i pmi sa n na bei nu fye n Kristi yi nyi.

20Awo mi lo ngye miye gnilo n fyei to ma shan beda layin, ama ntu na ba kpa mwa bo layi, mita kpe beye lo n mi ba zhin.

21Fye wo mi beda, efye a nugundo n fye zhin nubo ge, sai za shi awyidna bwanu za pwo nyi, knido nu zhin to fyei ba nya awyidna ye awyega bon ma?

22Gama a cei kafi, Ibrahim bei n na biyi ngun aba, gmanyi owo nyiko bara bi, gmanyi owo nyikwo la-layi 'bi.

23Nyaho to lo n kwo zhin nukwoyi lo n owo nyikwo bara biyin. Ama abo ma nyikwo la-layi bi n Shekwoyi alkawali avun nu ge wo ba tnu n woi.

24-25 Nsaiye, nabari gaiciya nya ye zhin yi misali nu n Shekwoyi a zokwoyi n gun aba n wo bma za zhin. Wo bei zhin ce n Sinai pe sanu n wo bei ga Musa awyidna ngun awo. A Larabawa yi Sinai pe nge Hajaratu pe; dna n mi misali, Ibrahim

nyikwo bara bi zhin Urushelima nu, a Yahudiyi yi nba vi zokwoyi nyi banu zhin bara bi.

²⁶Amaeyi zhimi zhin Urushelima eshe nya nu, kwoi to zhin a Yahudiyi abo kni fyenu nun.

²⁷Nyanu n Ishaya bei da sanu n wo bei zhin anabci ncei ge, “Nsaiye fye ba mi fya dagma. Lama, ho ba fi aku n na agmadai koda yake hoto shin 'bi man. Ntuge miye ma ga ho abi nu n mwa begye, ndu do n ho nyikwo-fyenu bei n cei.”

²⁸Efye n miyi, emi azaje, eyi nu zhin abi n Shekwoyi bei zhin alkawali, shi wo bei zhin Ishaku nya nyi.

²⁹Ntu cenu, eyi n Zafun Gyi-gyi-yi la yi ma nyi, yi sin wahala n aza kun n ba ye ya shi a Yahudiyi awyidna bwa nyi. She Ishaku obi alkawali nya bei sin wahala n smailu akun n wo nu bo zhin fyenu nyikwo-bi nyi.

³⁰Ama littafi a da ge, Shekwoyi bei gna Ibrahim ge, wo la fyenu-nyikwo n wo ebi yi nyaya, ntu ge fyenu-nyikwo bi ta gyi Ibrahim puwa gado n kni gado yi n gnisun n nyikwo la-layi 'bi yin.

³¹Emi azaje, yito zhin afyenu abinun, n yi ba vi a Yahudiyi awyidnan, ama nyikwo la-layi abi nu, aza a gwo-gwoi n Shekwoyi aba ntu gaiciyaga bo.

Agalatiyayi 5

Kristi Ku Yi Ze Aza Lo-loiya

¹Ntu cenu, Kristi la yi loya. Fye ku kpe behin-hin, ge fye filo n yanci ye to fya je fyehin pa fi n na Yahudiyi abokni n na knunu yin.

²Fye kna t nubua, ntuge beye zhin bo dnagmai nu, ngye fye ye kpe lo n Kaciya zhin nu n na Yahudiyi awyidna bwa shi yi nu ba ze fya aza manayi n Shekwoyi abye, agye Kristi ta mi wa gni fyen.

³Mi ba je ce da, oza n wa zhin atna wa bwa Shekwoyi bugba da ntu n kaciya bo n na Yahudiyi awyidna bwashi yi tile wa vi ba bo kni vinya kwo kuwa wa bwi.

⁴Kristi to n na pmayi lo n fye aba n, ndei fye gye ge fye ba ku ta zo Shekwoyi gbanu kpa n na wyidna bwa-shi yin; fye ku bwi n Shekwoyi alheri aba.

⁵Ama, dna n Zafun Gyi-gyi-yi bma-zhin yi kpe ma Kristi 'fi nu, wa kuyi alaifi ya, wa ze yi aza manayi n Shekwoyi aba.

⁶Eyi, n Kristi la wye-wyei nyalo-nyalo nya gayi nyi, yi to n na apmai lo ya damu kwo yi kaciya yi zhin lon, ko yi shi a Yahudiyi awyidna bwa lon, ntuge nya n yi ye kwonu zhin gaiciya ga tnu-tnu dna n ye-ye.

⁷Fye bei zan-zan cewo, nykado nu la bo dna fye do, to fyei ba shan gaiciya vi ma?

- ⁸Shekwoyi nu to wu fye lonun, ntuge owo nu na yi fye woi lo fye ya dna Kristi.
- ⁹“Ama zanukwoyi gmanyi nu, n fye mi n wa wun fye ya.”
- ¹⁰Mi kpe ma Dagayi nu wa je fye ze be cei, fya vi a beye shi mi vnyi. Shekwoyi ba zhin n zahi yi, kwo nyikadona n wo dami n fyei woi dna fye kwoce nyi.
- ¹¹Azaho gnalo ge, mi zhin kaciya, n na Yahudiyi awyidna yi wa’azi lo, nge ba zhin be shi-shi-yi nu n gni-gni zokwo. To, ngye mi zhin cenu wa’azi, ata shan mi wahala gan, ntuge wa’azi ye ta kni zaho-zahoi bugban. Wahala n na ga mi nyi kwa wu nu ge, mi zhin gni-gni dna n gaiciya ga n Kristi zundun gmanyi nu wa’azi.
- ¹²Mi cei pma lo, a malami nba dami n fyei nge fye sa fye nayi ya n kaciya yi, ba ba ka n fye to baye zhin dmi n fyei m.
- ¹³Emazaje, ala loloya ga fye, to ge loloya fya zhin benukwo yin, ama loloya fya ye na jei fya bma je zhin.
- ¹⁴Gama owa vinya dna n wyidna gmanyi ye, “Fye ye na zajei, shi fye ye n fyehin tukwoyi,”
- ¹⁵Ama ndei maimakon fye wu ye-ye, fye ce fyei wu anya n na jei, fyei wun aje nu, fye zhin peceiye. Fye zhin peceiye n na jebwi yi.

Vi Zafun 'Bo

- ¹⁶Mi ga fye shaula, fye vi Zafun Gyi-gyi-yi bowu nu, wo ba gna fye aba n fye ba lo n nyai n fye ba zhin, n lonu fye ta zhin benukwoyi zhin n fye nayi nukwoyi ye fya zhin.
- ¹⁷Gama yi gna ye ya zhin bo n yi nayi a gnayi ge yi zhin, gbo n nyai n Zafun Gyi-gyi-yi ye ya zhin. Anya manayi n Zafun ye ya zhin ba wu gbo n nyai n nayi ye ya zhin. Anya deye ngun aba n bafi n yi nayi nyi, ba sunkun na jei n na bai ba gyi nasara n yi tukwo, bai gna ya bomwi gna-gna.
- ¹⁸Sanu Zafun Gyi-gyi-yi wa wu fye zokwo fye to n apmai lo fyavi a Yahudiyi abeknin.
- ¹⁹Ama nfya vi fyehin beye, fye ba zhin abenukwoyi ye, abonubozhin nukwoyi, shakpe nukwoyi abo awyeda nya.
- ²⁰Shangba, alijanu bauta zhin, aza wyegbaci n ba to zhin honyan, nuwun n gusun yi, eshe n minagyi yi, n atnazhin yi.
- ²¹Eshe anya pwawo nya, zawu, jesin, n na wyefan kasa yi, n na be deye pyai vinya. Ma gna fye njesun shi mi bei shin fye gna, oza n wo zhin abeye vinya wo ta lo Shekwoyi bemin.
- ²²Ama, n Zafun Gyi-gyi-yi nu gyi be tu n yi tukwo wo ba be n na abeye pyai n yi mi. Yeye, bugba-buyi, bugba fu, hakuri azaye n cei bemanana zhin.

²³Befyece, zawanshi, peceiye. Abeye vinya ta zhin gaba lo na Yahudiyi abeknin yin.

²⁴Aza nba zhin Kristi nya ba ku nayi zundu n kwa shakpei vinyan kpe nwo zundu.

²⁵N yi sase lo nsaiyei n Zafun Gyi-gyi-yi iko yi, yi vi Zafun Gyi-gyi-yi bowun n yi asese vinya.

²⁶Nnavun yi ta shan mwa-mwa zanshin akpeyiye na za ba nkwo be nshewo yi nyim.

Agalatiyayi 6

¹Omi azaje, ndei Yesu viyi wa zhin laifi ho, ofye nfyce ce zhi n Gyi-gyi-yi nyi, fya bma wo zhin fya jeze be n woi, n na atnanyi n zokwo manayi, fyei pa nfyehin ge kpekni nsu fye bei ka laifi zhin.

²Fye wo aje akaya, fya bma aje zhin dna n wahala, kwo damuwa, nlonu fye vi yi Dagayi owa.

³N zaho gye ge wo du wyi lo wa zhin lonu, wo dna wohin kwoce nu, wo to zhin nyaho nun.

⁴Zaho-zahoi la tabata ge wo zihn hakuri lo n bemanana zhin, n na bai nu n wo ba bwa bugba da, to wa zhin atna wa mwi wohin do n zado yin.

⁵Ozaho-zahoi n yi mi tile wa lawo alaifi kaya, ntuge zaho to lo n wo nu ngun awon.

⁶Aza n na wuba Shekwoyi beda kow bimya ba bma 'ba malami zhin ba gba wo.

Fye To Gmi Bugba Yam

⁷Fye to ye a dna fye kwocen, fye pa, hota ya Shekwoyi na vun yi fya bwa lafiya n. Oza ba bwa nyanu do nwa bye.

⁸Nwa bye ge wa fu wohin afo pwawo nukwoyi bugba nu, wo fo bye nyabye nukwoyi nu, woi fo do nya bwodo zafun nya n 'fiyi. Ama nwa bye nyabye manayi Zafun nya wo ba do wye-wyei nyalo-nyalo nya. N Zafun Gyi-gyi-yi ba gawo.

⁹Ato beyi n bemanana zhin yin, gma safyewyi yi ba do anabarka n yi to bma bugbaya ya fan.

¹⁰Cenu zhin esa vinya n yi bami ya bma aza zhin, tun ba ga eyi a Yesu viyi aje.

¹¹Miba kma bedaye ka n mi abwayi fye gye shi mi kanya nsun-sun.

12Ofye amalami hi nba zhin atna ba zhin fye fya zhin kaciya nyi, ba zhin lonu ntu n nya gmanyi bo nu: N na bai n na ba kpeba ye, to ba sin wahala bai ya ye ge Kristi zundu gmanyi nu gni azan.

13A Malami hi nba vi kaciya nyi, ba ta shi a Yahudiyi awyidna bwan, ama, baye fya zhin kaciya n nabai ba zhin abokwo nge fye zhin ba bara nu.

14Nmi aba dai Shekwoyi kiyaye ma mwa mihin tukwo, sai dai dna Dagayi Yesu Kristi zundu mi. Ntu ge n zundu aba nu emi shakpe anyi da nya bei la duya tunyi n sapa, anyi boda n kwo dna-mi nyi bola fi.

15Kwo to shan do lo m, kwo ai ya zhin yi kaciya ko to ai zhin yin, obo dnagmayi gmanyi kwonu ge, kwo alai shan ma, yi ku ze aza woi-woi.

16Shekwoyi sun-sungye n bugba fuyi ba kunsun n fyei, nfye wan zokwoye na zayi nba zhin Shekwoyi a nya na baho-bahoi vinya.

17Nsaiye, fye to shan dami n miyi ntu n na beye tukwon, gama mi n na aci gusayi kpelo n mi nayi n na Yesu anuwun yi bei lumi ntu n wo bo, kwa wunu ge mi zhin wo fyenu nu.

18Omi azaje ye-yei, Eyi Dagayi Yesu Kristi alheri ba kunsun n fyei vinya. Amin.

Afesusuyi

Afesusuyi 1

¹Eyi anugundo a Yesu viyi n fye fi n Afisusu, fyei vi Dagayi bo cici nyi, mibi fye gna lo. Bulus nu ka ga fye, n Shekwoyi wa kniwo wa ze Yesu Kristi tnu-tnuyi nyi.

²Fa owo anabarka n bugba fuyi ba ze fye nya, n Shekwoyi eyi Dada tnu n cei n Yesu Kristi eyi Dagayi nyi.

³Yi ci Shekwoyi lo, eyi Dagayi Yesu Kristi Dada n wa tuyi anabarka n anabarka doho-dohoi n shemi, ntuge yi zhin Kristi a nya nu.

Shekwoyi Shiri Dnagmayi

⁴Tunyi n sapa, to ai zhin anyi n, Shekwoyi wa kni yi n na bai ya ze wo nya, ntuge wa zeyi aza agyi-gyiyi n wo awyeba, ntna laifi, eyi n yi gni-agni zhi n wo abye n wo ye-yei pwi.

⁵Owo shiri, tna do shanyi nu nyi wa ze yi owo abi, cenu a zhin wa tnu Yesu Kristi yi wafi ntu yi bo. Wa zhin ce ntuge wo bei n cei pma nu.

⁶Mwa-mwa n Shekwoyi aba ntu n wo alheri bo n wo ye-yei nwa zeya puyi, ntuge yi zhin owo Nugun ye-ye yi abi nu.

⁷Owo alheri mwa lo n yi aba har wa eyi alaifi kuya n wo Nugun ami yi, oza n wa gni yi nyi.

⁸Woi la owo alheri mwa-mwayi ze kpeyi. Gama wo kpeyi ye lo sarai n nya yi n kwo gna bmiya ntu yi bo n sayi vinya.

⁹Shekwoyi ku owo asiri wu yi nkwo bei so shi, dalili n wa tnu n Kristi yi, enya n wa zhin shiri dna n sun-sun gye tunyi n sapa.

¹⁰Owo nufi nu nyi, nge sanu nsa lasi wo ba yei zhi n gnisun, aba n yi nyi vinya n eshe kwo n anyi, ya gnisun n woi dna Kristi nyalo-nyalo.

¹¹Ntu nya bo n Kristi n ku zhin, yi ku ze a cauta n Shekwoyi aba n ba da wo agma, gama dna n Shekwoyi shiri wo bei kni yi tunyi n sapa, abo vinya bei zhin shiwo bo zhin shiri nu.

¹²Shekwoyi beye vinya kwonu ge ya la Shekwoyi tu, ya gawo mwa-mwa ntu n na abo a yakwo ye nwa zhin yi nyi, n yi zhin aza kmisunyi n ba ga Kristi gaiciya nyi.

¹³Ntu nya bo n Kristi wa zhin nyi, ofye vinya ce n fya wo nabari manayi shi oza ba pwo, fya ga Kristi gaiciya nyi, a tufye eze n Zafun Gyi-gyi-yi ge fye zhin Kristi nya nu, oza n na bei zhin wo alkawali ga a Yesu viyi nyi.

¹⁴Owo ase-se n yi mi zhin Shekwoyi tuze nu ge, wo ɓa gayi anya vinya n wa zhin yi alkawali, Zafun ase-se n yi mi wuyi ge Shekwoyi la yi lu si, wa ɓe yi n wohin tukwo aba, dalili nyi n jesun n kwo ɓa zhin ya ci yi Shekwoyi.

¹⁵Cenu zhin, tunyi esa n mi ɓei wo fye gaiciya ga ɓo dna n Dagayi Yesu, n ye-yei n fye wu a Yesu viyi n nna aba vinya nyi.

¹⁶⁻¹⁷ Mito fa Shekwoyi godiya zhinbo ntu fye ɓon. Mi zhin fye aduwa n esai vinya mi-i nya Shekwoyi, Dagayi Yesu Kristi Dada, wa ga fye ɓeyekpe, fya gye dei-dei, fya bwa awyega kwo nyikado nu zhin Kristi a, n na abei vinya n wo ku zhin fye nyi.

¹⁸Mi zhin aduwa, n na bai of ye abugba ɓa bwa buzangna, n na bai n fye ɓa gye nya wye n na bye, n wo yi fye fya gni nya bwa n wo yi nyi. Miye fya kpe ge Shekwoyi la ze nyabwai, ntu ge eyi n yi zhin Kristi a nya nyi aku yi gawo.

¹⁹Mi zhin aduwa ge fye ɓa ya awyega bwa, shi owo iko nyi ge kwa bma aza zhin nu nba gawo gaiciya.

²⁰Iko dnagmayi ye nu bwa jesun n kwo ɓei la Kristi kala n efi, kwa se wo ase tu n Shekwoyi bwai-zhe-bwa n eshe.

²¹Ndu esu doho-dohoi, kwo abegiyi doho-dohoi. E, owo mwamwa du zaho-zahoi nya lo, n na anyi ye kwo anyi do n ɓaye ɓebelo nyi.

²²Shekwoyi ku anya fi n wo apita sinta woi lawo ze Tukwoda ikklisiya nya vinya.

²³Nkwo zhin wo nayi nyi n nu-nuyi n wohin tukwoyi Tukwoda n Nyagayi doho-dohoi nya, abaho-bahoi.

Afesusuyi 2

Sapai Nsayiye-yi

¹Nsa dohoi fye ɓei fi n Shekwoyi knitu sinta, n zunkni zhi nyalonyalo ntu n fye alaifi ɓo.

²Fye ɓei gni zan-zan n begye yi, n gye azaje, n nu-nuyi n na laifiyi, fyei zhin Satan ɓeye, esu dnagmayi anyi bmana nya, n wo zhin tnu-tnu lo n saiye n na aza bugba, n ɓa zhin gaba n Dagayi nyi.

³Yi ɓei wu lo nu n sapai, eyi ase-se yi wu enya n kwo dna n yi mi, yi zhin aɓo nukwoyi doho-hohoyi shi eyi a shakpe, kwo eyi a nubo zhin nukwoyi gnayi. Yi ɓei ya n tna bmiya yi shi a ɓei mayi n nayi nukwoyi, nfi n Shekwoyi minagyi sinta ngye zaho-zahoi.

⁴Ama Shekwoyi n sun-sun gye mwa, wa yeyi n mwa.

⁵Kwo da yake, yi bei fi-fiyi n zafun, akni zun yi ntu eyi alaifi bo, wa ga yi eyi a wye-wyei n jesun esanu n wo bei la Kristi kala n efi, ntu n wo ye-ye bo nu yi ku gni-gni bwa.

⁶Wa kuyi kala n vingwo fi n mwa-mwa n gnisun n Kristi yi. Aba n yi sase n gnisun n woi n eshe mi, ntu nya bo n Yesu Kristi bei zhin nyi.

⁷Nsaiye Shekwoyi ba mi wa wuyi misali shi wo alheri mwa, n gye shi wa wuyi dna n nya n wa zhin gayi, dna n Yesu Kristi nyi.

⁸Ntu n wo alheri bo ala fye gni, n tu gefya ga Kristi gaiciya, gaiciya ga n kwo nyi kwo to zhin efye nya nu n, kwo zhin Shekwoyi cauta nu n wa ga fye.

⁹Gni-gni to zhin lada, ntu bemanana zhin bo nun, n ya zhin n ntu cenu, zaho-zahoi to kunce lo a sawo ami da cen.

¹⁰Shekwoyi nu na zhin yi, yi ze anya n yi ku ze n saiye nyi, woi gayi wye-wyeyi dna n Kristi Yesu. Tunyi n sapa nu n wa zhin shiri ye, ntu ge ya bma azaje zhin dna n wye-wyeyi ye, n yi la bwa nyi.

¹¹Fye to ze amwi n ge nsapai fye bei zhin aza nu n tna kaciya, a Yahudiyi bai yi fye ge aza nba ta wo Shekwoyi dnan, aza tna gyi-gyi (ama oba bugba ce, bei ye tu cegye koda yake ba bei zhin bai zhin abo ngye a Shekwoyi dnawo yi, gama ba bei zhin bai zhin kaciya, tuze nu nge ba zhin Shekwoyi anya.)

¹²Fye pa ge nsapai fye bei nyi n tna Yesu, fye bei zhin Shekwoyi abi nuwunyun nu, woi to bei zhin fye alkawalin n wo ba bma fye zhin ma, fye bei ku bwi n tna Shekwoyi, n tna awyetu.

¹³Ama nsaiye, fye zhin Yesu Kristi anya nu, kwo shi kwo nyi fye bei mwa kpa n Shekwoyi, n saiye aku be n fyei vi-viyi n woi, ntu n nya bo n Yesu Kristi wa zhin ga yi n wo amiyi nyi.

Yesu La Yi Tagyi Do

¹⁴Gama Kristi nu zhin zokwo eyi bugba fu nya. Wo la yi ga jedoƙe na Yahudiyi yi n fyei abyedo, woi zeyi zaknanyi abi, ngye shi wa ba nyakunpa ya n kwo bei n yi gna aje nyi.

¹⁵Owo fi la nuwun gmiya, n kwo bei dna n yi atasin nyi, n na Yahudiyi awyidna bei be n cei n na byedo bwayi gmi-gmi ya nyi, gama wa fi n na bai wa zo zokwo yi nu, wa ku aza n gun abaye n ba bei zhin bai zhin gaba n na ajeyi nyi, wa zeba owohin nya. Wato wo la yi ye bedo ya ze oza woi-woi gmanyi, n sayi bugbafu yi la be.

¹⁶Shi yi ku ze aga nayi gmanyi nya nyi, minagyi n kwo bei dna n na tasin nyi kwo ku zo, wo la yi ga jedoƙe n Shekwoyi, ngye shi wa fi tu n zundu ntu yi bo.

¹⁷Woi la be fye n Nabari manayi bugbafu nya yi efye abyedo, n fye bei mwa kpa n woi nyi, eyi a Yahudiyi yi bei wo viviyi n woi.

¹⁸Nsaiye eyi vinya, ko Yahudiyi kwo abyedo, bami wa be Shekwoyi Dada aba, n Zafun Gyi-gyi-yi bmazhin yi, ntu n nya bo n Kristi ku zhin ga yi nyi.

¹⁹Nsaiye fye to zhin a zhibei nu n Shekwoyi aban, kwo a zhibei n; eshen, ama fye zhin Shekwoyi apuwa da nu, Shekwoyi-kni abi, fye zhin Shekwoyi puwa azanu, n gnisun n a Yesu viyi ajei.

²⁰Fye gni agni kpe n sayi n nyakun goro manayi nu, atnu-tnuyi n na nabiyi. Nyakun bwakwonu kuta ho, Yesu Kristi nu n wohin tukwo yi.

²¹Eyi n ya ga gaiciya nyi akuyi bedo peceiye n Kristi yi, n gye nyakun manayi n kwo mwa cici ntu Shekwoyi bo.

²²Akuyi bedo n woi n yi azajei dna n Zafun, yi-i ku ze Shekwoyi ase-se ba.

Afesusuyi 3

Shekwoyi Iko N Yi Mi

¹Omi Bulus Yesu Kristi fyenu, mi dyna n kurkuku ntu n fye bo nu, ntuge mi zhin wa'azi ge efye abyedo fye zhin Shekwoyi nya nu ce.

²⁻³Lale fye kpelo ge, Shekwoyi la tnu-tnu ye gami, ma wu fye Shekwoyi alheri n fye aba, shi mi bei gna fye n mi wasika ho, Shekwoyi nu bei wumi shiri ye asiri nge abyedo filo ce n wo alheri.

⁴Mi da deye ntuge fya kpe ge mikpe abei yelo vinya.

⁵Nsapai Shekwoyi to bei wu wo shiri ye nwo aza aban, ama nsaiye wola kwo guya wu owo atnu-tnuyi n anabi yi dna n Zafun Gyi-gyi-yi.

⁶Asiriyi honyi, nge abyedo ba bwa oba robo dna n wo nyabwa ngyisun n Shekwoyi abiyi, ala ba gni, yi ba ze owo ikklisiya. Shekwoyi alkawali adnagmayi vinya zhin ba nya nu ce, dna n Kristi, sanu nba gwo Nabari manayi Kristi nya, n bei nwa zhin ga ba nyi.

⁷Shekwoyi la esa manayi gami, ma gna aza owo shiri ye bo, woi la ikwo gami n kpezhin yi ma zhin kwo n bmiya.

⁸Fye dnawye fa gye kwo shi ko nyi mito bei zhin beho nu a gami kwon, emi nu nmi zhin. Yesu viyi gbeloyi n wolo n na anyi, dudu lonu a bei kni mi nu n na agmada manayi ye bo, ma gna abyedo Nabari Dagayi nyabwa n kwota shan zon, n kwo lo ntu n ba bo dna n Kristi nyi.

⁹Ma wu aza vinya nge Shekwoyi nu zhin abyedo gniyi ce, shi oza n wa zhin anya vinya nyi, wa zhin shiri tunyi n sapa.

¹⁰Ntu knibeyi a? Ntu ge wa wu abegyi yi n anyi bmana shi wo cecei, esa nu n agye owo abi a Yahudiyi n abyedo yi n bedo fi n wo ikklisiya.

¹¹N zokwo n wa zhinkwo shiri dna n Yesu Kristi eyi Dagayi nyi.

¹²Nsaiye yi ba mi ya be Shekwoyi aba cewo n tna edna, ya be ntna bugba ashan-shan, sanu n ya be n gaiciya ga yi dna Kristi.

¹³Ntucenu fye to bma bugba ya ntu nyabo n ba zhin mi n ya nyin, Mi sin wahala ntu fye bonu, kwo bmiya lo fya gma fya bwa bugba kala ntu ce.

¹⁴⁻¹⁵Sanu mapa owo beyekpe bo nwo shiri mwa-mwa yi, ma ce akwo-kwo ma zhin aduwa ga Dada Ikklisiya nya.

¹⁶Ma zhin aduwa ge dna n wo nyabwa dnagmayi n kwo ta shan zo nyin wo ba ga fye awyega n fye bugbami owo Zafun Gyi-gyi-yi nya.

¹⁷Mi zhin aduwa n na bai Kristi wa dna n fye a bugba mi n mwa cici, wa sase dna n fye mi, shi fye gawo gaiciya. Fa fya mi zhi dna n Shekwoyi ye-ye bo wo-wo nya.

¹⁸⁻¹⁹Fya mi fyabwa awyega shi Shekwoyi abi kunce ba bwa, ngye shi wo ye-ye nyi nkwo kpayi, nkwo pata yi, n kwo lo-loyi, n kwo lawu yi, fya wo ye-ye shan n fyehin, kwo da yake kwo mwa lo, n fye ta gye okwo abwa yazhi ban, kwo fya kpe kwo ye vinyan, nna bai n fye ba ze anu-nuyi n Shekwoyi n wohin tukwo.

²⁰Nsaiye, mwa-mwa n Shekwoyi aba, n wa lo tnu-tnu n wo ikwo dnagmayi n yimi, wo bami wa zhin enya ndu ngye shi yi ba mi ya nya, kwo ya nuna n duyi aduwa dnagmayi zhin, eyi abo pwawo nubo zhin, n ya awyetu yi.

²¹Fye gawo mwa-mwa nyalo-nyalo ntu n wo shiri gni-gni nya bo, ntu ikklisiya bo dna n Yesu Kristi.

Afibusuyi 4

¹Mi gyi fye wye, emi nmi dna n kurkuku ntu Dagayi bauta bo nyi, fye zan-zan fya zhin abo n kunce n na zayi n na la ba kni, ntu n anabarka wo-wo yi ye pya bo.

²Fye gba fyehin tukwo fya zhin peceiye, fye zhin hakuri n na ajeyi, ntu ye-ye bo to fya gye aje laifin ngye nya ho nun.

³Fye zhin atna fya fa Zafun Gyi-gyi-yi wa dna fye n zokwo nlonu fya sa-se n najei n bugbafu yi.

Abo Zaho-zahoi Ba Mi Wa Zhin

⁴Yi zhin aga nanyi gmanyi nyanu, yi n Zafun gmanyi nu, ai la yi yi ntu n na abo a manayi bo.

- ⁵N yi aba, yi n Dagayi gmanyi nu, gaiciya ga gmanyi, baptisma gmanyi.
- ⁶Yi n Shekwoyi gmanyi nu, Oda nwo tu n na aza sin vinya, woi sase dna n yi vinya woi lo tnu-tnu n yi.
- ⁷Kristi n la ƙe-kpezhin ga zaho-zahoi enya nwo n cei pma ya bwa dna n wo nyabwa gna.
- ⁸Zabura kayi bei kuci ge sanu n Kristi bei jeze lo eshe dna n nasara n wo kalala avun n vingwo, n nasarayi n shetan tukwo, wa ga aza acauta n mwa begye.
- ⁹Woi cige wo bei jeze lo eshe mi, kwa wu nuge wo bei gmi n eshe mi wa kashi be anyi har anyi sinta.
- ¹⁰Oza n wa kashi benyi, owo nu na jeze lo, n na bai n wo ƙa nu anya vinya n wohin, n anyimi har n she yi be.
- ¹¹Azaho n yimi a ku ƙe-kpezhin gaba, ngye atnu-tnuyi, aza ho wa gaba wa'azi kpe-zhin, azaho ƙami ƙa gni aza be cei n Kristi aba, ƙai bma ƙa zhin ƙa kpema wo ngye oba Gniyi. Azaho ƙa shi Shekwoyi aza bwa, ngye a knikna yi ƙai wuba, ƙai dnaƙa n Shekwoyi zokwo.
- ¹²Kni nu zhin woi gayi ƙe-kpezhin n nabai ya kpe aƙo zhin n bmiya? N na abai Shekwoyi aza ƙami ƙa zhin tnu-tnu manayi gawo, ƙa mi ikklisiya, Kristi nayi kwa mwa kwa bwa kala.
- ¹³Har ya ga gaiciya gmanyi ntu n yi gni-gni ƙo, n yi Gniyi, Shekwoyi Nugun, ya mwa fi n Dagayi, E, har ya si aba n Kristi ƙa dna n yi mi dei-dei.
- ¹⁴Nnavun yita shan ze ngye abin, yi shan abugba do na anya ƙo n yi ga gaiciya n, ntuge aza be yi n wuwu akata nya yi, yi gye ngye gaiciya nu.
- ¹⁵⁻¹⁶Nkwo apita yivi gaiciya dna n ye-ye nsai vinya, yida gaiciya, yi zhin aƙo dna n gaiciya, yi sase dna n gaiciya, n na bai ya ze ngye Kristi n wo zhin owo nayi tukwo danyi, wato Ikklisiya, Dna n wo ƙewu nayi vinya nku aje dei-dei, oga dohodohoi n kwo zokwoyi, kwai bma do zhin, n na bai n nayi vinya ƙa bwa lafiya, kwa mwa n nu-nuyi n yeyi.

Zan-zan Dna Wye- Wyeyi Woiwoyi

- ¹⁷⁻¹⁸Mi dabo n fyei dna n Dagayi, fyeto shan ase-se ngye a tna viyin, ntuge awye nku ƙa bua, aƙo ku ƙa gmi aje. Oba bugba gu-guyi lo n nunuyi n wyegmayi, ƙa mwa kpalo n wye-wyeyi Shekwoyi nya yi, ntuge ƙaku ƙa bugba gu, to ƙa wowon, ƙa ta kpewo a zokwo ye lon.
- ¹⁹Bata damu lo n be nukoyi kwo bemanayin, ƙa ku bahin ga a benukwoyi zhin. Bata fa beho zhin ƙo, nƙa bugba nukwoyi, nƙa shakpe yi gna ƙa ge ƙa zhin m.
- ²⁰Ama Kristi to bei wufye n lo nun.

- ²¹Ngwe fye ku owo begye wo, fyei ku owo fyei ku owo gaiciya tumwi,
- ²²To, fyeku a nanyi kwo-kwoi ya, n kwo bei zhin abe a nukwoyi nyi, n kwo la bo vinya n nu-nuyi n shakpei.
- ²³Nsaiye efye hali n fye a nubo zhin yi, tilas ba shando cici ba ze amanayi.
- ²⁴E, tilas fya ze aza woi-woi, n gyi-gyi-yi n bmiya. Fye ku nanyi woi-woi ye kpe.
- ²⁵Fye to zhin akata cefi ajen, fye da gaiciya, ntuge yi zhin aje aga nu, idan ya ce a kata fi aje yni aje bugba nu.
- ²⁶N ha gyi minagyi to zhin laifi ha fa minagyi yi fi n ho min, to fa nyipyeyi kwa shin hoi gyi minagyin, ku kwo ze amwi npye.
- ²⁷Gama n ha gyi minagyi, ho ga shetan apita tu ba nu.
- ²⁸Ndei oza wyivi lo, tilas wa fa evi wyibo, wa ya tnu-tnu zhin n wo abwayi, n nabai wa bma azaje zhin n ba gyi san lo.
- ²⁹To da beda nukwoyin, bwa bedanu da n kwo ba bma aza zhin n ho dabo n bai, enya n kwo ba gaba anabarka.
- ³⁰Fye to wun Zafun Gyi-gyi-yi bugba yan, ntu n fye zan-zan bon, Fye pa ge owonu na tufye ze har nyipyeyi n gni-gni n laifi bei nu ncei.
- ³¹Fye kufa napye bo n minagyi yi, anyawu, beda nukwoyi, fye to fa a tna ajeje kwa lo dna n fya tasin m.
- ³²Fye bwa bugba manayi n na jeyi, fyei ye n na jeyi, fyei zhin aje gafara shi Shekwoyi wa zhin fye gafara ntuge fye zhin Kristi nya nu nyi.

Afirusuyi 5

Zhin 'Bo Nkwo 'Ba Da Shekwoyi

- ¹Fye vi Shekwoyi abozhin n na abo vinya n fye ba zhin, shi obi ye-yeyi zhin wa shan owo dada nyi.
- ²Fye ku nu n ye-yei ga aje, fya shan Kristi nwa ye n fyei nyi, wa ga wohin n Shekwoyi akun ngwe hadaya, wa ku fye alaifi ya nyi. Ce a da Shekwoyi, ntuge Kristi ye-ye nfve aba, kwo zhin ngwe tulare sunda yi nu nwo aba.
- ³A to sun anagbayin, kwo cegye kwo shakpe n fye min, fye to ye zaho wa sa fye ye n na bei pyan.
- ⁴A nabari nukwoyi, beda nukwoyi n na awyefan kasayi, bato zhin fye nyanun, fye pa aje Shekwoyi alheri bo, n wo zhin ga fye nyi fyei zhin godiya.

- ⁵Mi ye fya kpe ge, Kristi ebemi, n Shekwoyi ebemiyi kwo to zhin oza nyanu nwo tu ceyen, kwo shakpe woyi gama shakpe woyi zhin eshan gbayi nu. Woi ye anyi nya woi ga ba mwa-mwa ndu Shekwoyi.
- ⁶Fye to ku vi akwoednayin n ba fan ye n laifi nyin, ntuge Shekwoyi minagyi nukwoyi tulo n na aza tukwo nba zhin abeye.
- ⁷To gyi anugundo n na azai pya yin.
- ⁸Gama koda yake n sapai efya bugba bei nu-nuyi n wyegmai, n saiye kwonunuvi lo n Dagayi buzangna yi, efya be zhin kunce lo ba wu lonu.
- ⁹Ntu n buzagna ye bo n kwo dna n fye nyi fye bwa enya nu zhin n kwo bmiva, n nya yi n kwo zhin gaiciya.
- ¹⁰Fye tumwi fya zhin bo n kwo da Dagayi.
- ¹¹Fye to dnabwa n anyi gmada nukwoyi n wyegmayin, ama fye gnakni ba, fya kpeba asiri ya.
- ¹²Kwo zhin avinyikwo bo nu fya sa abei pya ye n ya, anyi gmada nukwoyi, n na a tna-befyece zhin yi.
- ¹³Ama esa n fya kpe ba asiri nya ya, buzagna kwa wu ba laifi bmi, sanu n bagye oba ababwi, azaho nba mi, kpekni ba ze buzangna abi.
- ¹⁴Cenu zhin Shekwoyi woi dabo, n wo beda wa cige, "Fye kun agyewyi, o, gye-wanyi, fye kukala n efi, Kristi ba ga fye buzangna."
- ¹⁵⁻¹⁶Fye zhin peceiye shi fye zhin abo ntu ge anyipyei abodnai nu, fyeto ku ze aza ma-man, fye la ce, fye zhin apma n sai n fye n cei lo, ntu bemana zhin bo.
- ¹⁷Fye to zhin bo n tna nubo zhin, ama fye zhin atna fya kpe enya n Dagayi ye fya zhin.
- ¹⁸To sin eje n, ntuge abo nukwoyi lo n mwa n kwo be n cei, ama fye nu-nu n Zafun Gyi-gyi-yi wa dna fye n zokwo.
- ¹⁹Fye ta aza n na ajeyi n Dagayi tukwo, fyei da zabura, fyei kwo anyi agyi-gyi-yi. Fyei kwo anyi ga Dagayi nfyebugbami.
- ²⁰Fye zhin godiya ntu anya bo vinya ga Shekwoyi eyi Dada, dna n eyi Dagayi Yesu Kristi eye mi.

Puwa Asese N Lafiya Yi

- ²¹Fye ga Kristi mwa-mwa, fyei gba fyehin tukwo n na aje aba.
- ²²Efye anyikwoza fye ga fyehin n fye aba akun, shi fye ga fyehin n Dagayi akun nyi.

²³Gama nyi kwoza dna n wo ba akun nu, shi ikklisiya dna n Kristi akun nyi. (Wa gawo wye-wyeyi, wa shi kwo bwa, wa ze okwo gniyi.)

²⁴Ntu cenu efye anyikwoza tile fya vi efye aba beda, shi ikklisiya zhin kwa vi Kristi beda nyi.

²⁵Efye aba, fye ye nfye anyikwo yi, shi Kristi bei ye ikklisiya yi, wa fi ntu n kwo bo nyi.

²⁶Wa zekwo gyi-gyi yi ntana cegye, n zhan-zhan yi ya n batisma yi n Shekwoyi beda yi.

²⁷Nna abai wa ga wohin tukwo kwo, ngye ikklisiya mwa-mwai ntana benukwoi, kwo laifi ci gusa, n gyigyi yi n tana cegye.

²⁸Nlonu nu aba baye nba anyikwoyi, bei ye n bai n gye bahin. Shi oza n wo nyikwoi ba ku ze gmanyi, bai oza ye nwohin nu woi zhin wohin be mana, n wa ye n wo nyikwoyi.

²⁹⁻³⁰Oza to lo n wo taye n wohin nayi n. Ama wo ye nkwoi woi zhin kwo bo n kwo bmiya. Shi Kristi lura n wo nayi, wato, ikklisiya n yi zhin kwo aganu nyi.

³¹Shekwoyi beda n la wu pei-peii nge zanugbayi nwo nyikwoyi ba zhin nayi gmanyi nu, sanu nkwa ci ncei ge, "Tilas zanugbai wa fa owo dada n owo 'yai, sanu wa pa mula, n na bai wa nyima owo nyikwo, oba ngun aba ba ze gmanyi."

³²Mi kpe lo ge kwo dnabolo n na awyega bwa ba, ama mi si besi nu ngye shi yi zhin aga nu dna n Kristi nayi nyi.

³³Ngye shin ma cige, Tile oza ye n wo nyikwoyi ngye wohin tukwo nyikwoza ce tilas wa zhin atna wa ga owo oba mwa-mwa n mwa, woi vi wo beda, woi ciwo, woi gawo mwamwa.

Afibusuyi 6

¹Abi fye vi efye a dada beda, nya nu n kwo kunce fya zhin, gama Shekwoyi nku ba kpe n efye eshe.

²Gaho dada mwa-mwa n ho yai, deye kwo nu zhin wyi-dna kmisunyi n Shekwoyi awyidna n gun awo, nkwo zo n alkawali yi nyi.

³Alkawali yi nu nyi, nge nha gaho dada mwa-mwa n ho yai, oho wyewyeyi ba mwakpa n nu-nu yi n anabarka yi.

⁴Efye abida ce fye wo, fye to zhin efye abi ba gyi minagyin, fyeto wan ba sun. Ama fye wuba zokwo ba mwa fi n Dagayi zokwo, dna n tata manayi fyei ga ba shawara manayi.

⁵A fyenu fye vi fye a dagayi beda, fye zhin ba tnu-tnu n pwawoyi dna, fye zhinba tnu-tnu shi fye ba zhin Kristi nya nyi.

6-7 Fye to zhin tnu-tnu n kalayi n fye dagayi awyeba nu kawai n, ama fye zhin tnu-tnu cewo n sai vinya a gye fye zhin Kristi nya, fya zhin Kristi nya, fye zhin Shekwoyi beye n bugbayi gmanyi.

8 Fye pa ge Dagayi ba gba fye ta ntu fye a tnu-tnu amanayi bo, kwo hoi zhin fyenu nu, kwo to hoi zhin fyenu nun.

9 Efyehin ce a dagayi fye zhin efya fyenu bo n bmiya, shima gnaba ge ba zhin fye bo nyi, fye to fi ba edna n, fye pa nge fye zhin Kristi a fyenu nu, efye Dagayi gmanyi nu n bai, woi ta zhin taran.

Eyi Akala Kun N Shekwoyi Aba Nu

10 Nkmasun miye ma gnafye ge, efye akala bakun n Dagayi aba nu n ikwoyi dna n fye mi.

11 Fye kpe Shekwoyi akun kaya vinya, n na bai nfyen bami fya gni-agni n Shetan yi, n wa dabara yi.

12 Gama yita sunkun n na azai nu, n ba zhin nayi n na amiyin, ama n na azai nbato n nayi n, esu a nukwoyi n awyegma nya, n ba gyibe n anyi deye n na aljanuyi n ba fi n na anyi bmana nyi.

13 Ntu cenu fye zhin apma n Shekwoyi a kun kaya doho-dohoi, fya sunkun n na anuwunyi n zokwo doho-dohoi nba kun da fye, sanu n na ku zo fyami zhi n na agni.

14 Ama ntuge fya mi fya zhin n lonu, tile fya pa shinpanya wao gaiciya n fye eshin, fya ku kpata wato befyece kpe n na agu n Shekwoyi boye nya.

15 Fye fi abuada n ba ba da fye zan-zan fyei lo Nabari Manayi da bugbafu nya n Shekwoyi.

16 Nkun doho-dohoi fye ba pma gaiciya ge, kwa ze fye kpata, kwa gwo fye aknawyi ya n shetan shefye nyi.

17 Fye ba kun kata gnigni-nya, n Zafun ebe yakwoyi, wato Shekwoyi beda.

18 Fye zhin aduwa cici, fye nya Shekwoyi beho-behoi n kwo dna n Zafun Gyi-gyi-yi beye. Fye zhin atna n woi, fye pawo efya bukata bo, fye zhin aduwa ntu n na a Yesu viyi aje bo n na aba do.

19 Fye zhin mi aduwa fya nya Shekwoyi, wa gami abeda n ba kunce, shi mi gna aza Dagayi beda n tna edna, mi-i wuba ge gni-gni zhin abyedo nyanu ce.

20 Mi dna n na awun nsaiye, ntu ge mi zhin Shekwoyi beda ye wa'azi nu, ama fye zhin aduwa n na bai n mi ba gyi abye n beda yi, n tna edna n kurkuku aba n mi dnanyi.

²¹Tikikus, emi zado ye-yei gaiciya da, nwo bmami zhin dna n Dagayi tnu-tnu nyi, wo ɓa gna fye shi mi lo n ya.

²²Mi tnu n woi ntu n cenu wa gna fye eyi nabari, n na bai fya bwa bugba kala n bei n wa gna fye.

²³Shekwoyi wo ga fye bugbafu, emi a Yesu viyi aje, n ye-yei, n gaiciya gayi, n Shekwoyi Dada aba n Dagayi Yesu Kristi yi.

²⁴Shekwoyi alheri n anabarkayi, ɓa kunsun n na azai nɓa ye eyi Dagayi Yesu Kristi n bugbai gmanyi.

Afilibiyi

Afilibiyi 1

- ¹Bulus n Timatawus yi, Yesu Kristi a fyenu, eyi nu ka ga fye a Pasto n na abyedo yi n na Yesu viyi vinya n fye fi n Filibi zhi mi nyi.
- ²Shekwoyi anabarka ba kunsun n fyei vinya. E, mi zhin aduwa ge Shekwoyi eyi Dada, n Dagayi Yesu Kristi yi ba ga zaho-zahoi n fye mi owo anabarka nu-nuyi, n wo bugba fuyi n fye abugbami, n fye awye wyei n jesun.
- ³Omi aduwa vinya ba nu-riuyi lo n Shekwoyi Latuyi.
- ⁴Sanu n ma zhin aduwa ga fye, emi bugba nu-nuyi n na agmadai.
- ⁵Ntu fye bmazhin bo, fyei zhin aza bai kpe Nabari manayi, Kristi nya beye, tunyi esa n fye bei wo har nsai ye.
- ⁶Mi tabata lo Shekwoyi n wa ya tnutnu manayi n fye mi nyi, wo ba gyi abye n fye bmazhin yi, fya mwa fi n wo alheri, sai esa n owo tnu-tnu n fye mi nku zo zhin, ewyi n Yesu Kristi bei jeze be cei.

Bulus Yeye Nba Ba

- ⁷Kwo wulo cewo ma wo n mi mi ntu fye bo ngye shi mi wo nyi, ntuge, fye dnalo n mi bugba mwa. Yila gni bwa ngnisun Shekwoyi anabarka esa n mi bei dna n Kurkuku nyi, n esayi n mi bei la gmi nyi. Mi-i sunkun ntu gaiciya bo mi-i gna aza Kristi nabari.
- ⁸Shekwoyi gmanyi nu kpe lo shi mi ye fye lo n sun, n Yesu Kristi bugba ye-ye nya pyai.
- ⁹Emi aduwa zhin ga fye ekwo nu fya nu n Shekwoyi ye-yei na za aba, fya gyi abye n mwa-mwa yi dna n Zafun, n awyega yi.
- ¹⁰Gama mi ye Ifya kpe be nukwoyi ye n bemanayi cewo. Fye ku ze a gyi-gyi-yi n fye mi, to oza mi wa gye fye laifin har esa n Dagayi ba jeze be n cei.
- ¹¹Fye zhin bemanu nu ci-ci, abo n ba ba wu ge fye zhin Shekwoyi abi nu. Ntuge de ye ba be n latu yi, n mwa-mwa yi n Shekwoyi aba.
- ¹²Mi cei pma lo fya kpe, omi azaje, abo vinya n ba bwa mi ya, kwo la ze apma nya kwoi zhin aza bai wo Nabari manayi Kristi nya.
- ¹³Ntuge aza vinya n ya, n na soja yi be n ba kpe n ba abarki nyi, ba kpe lo ge mi dna n na awun, ntuge mr zhin Yesu viyi nu.
- ¹⁴Ntu n mi dna-dna bo n kurkuku n ya a Yesu viyi n mwa ba ku agmada nya. Omi atna zhin, n ku bugba kala ga ba, har bai gna aza Kristi nabari ntna edna.

15 Azaho zhin wa'azi ntuge ba wo she, shi Shekwoyi zhin apma n miyi. Baye a ciba nge ba zhin wa'azi n tna dna. Ama azaho zhin n bugba yi gmanyi.

16-17 Bai zhin wa'azi ntuge ba yemi, gama ba kpe lo ge Dagayi wa be miyi n ya wa zhin apma n miyi ma kna gaiciya. Azaho zhin wa'azi ba zhin mi ma wo she, bai gye ge oba abye gyi ba bemi bugba zhizhiyi dna n Kurkuku ya.

18 Ama kwo bai zhin wa'azi n kni nufi yi nu'a, nya gmanyi n mi kpelo, a zhin Nabari manayi Kristi nya wa'azi lo, ai da mi lo.

Nya Kwo Zhin To Mi-i Fim

19 Mi ba dagma, gama mi kpe lo shi fye zhin mi aduwa Zafun Gyi-gyi-yi bmami zhin, deye vinya ba ze bemanana n mi aba.

20 Gama mi zhin nubo n na awyetuyi, mi ta zhin beho n kwo ba zhin mi ma wo mihin vinyikwon, ama ma gni n shiri yi zhin n saho-sahoi, ma da Kristi nabari n bugba kalayi, sa n mi dna n na a zhin gye n ya, shi mi shin gye n sapa n na abai ma ga Kristi mwa-mwa, kwo mi-i n wye-wyeyi kwo mi ya fi.

21 Gama n mi aba wye-wyeyi zhin esa bwa nu ntu n Kristi bo, efi kuwa, n gna bmiya lo.

22 Ama ngye n mi wye-wyeyi ba ga mi esa ma gni aza ga Kristi, to a gye mita kpe edo ye lo n kwo gna bmiya lon, Wye-wyeyi ko efi m.

23 Nsahoi mi n cei pmalo ma gni wye-wyeyi sahoi mi to n cei pmalo n. Gama mi n cei pma lo ma lo mi kunsun n Yesu yi, Kwo ba gna ma gmada n mwa ma ndu n mi wye-wyeyi lo ya.

24 Ama mi ba gnasun n na apmayi n fye aba mi-i ya gni n wye-wyeyi n ya.

25 E, aye n mi bo yi pmalo n ya n na anyi ye, mi kpelo mi beye dna n na anyi ye n sa fyewyi kpa, ama ma bma fye zhin, fya mwa, fya bwa bugba buyi dna fye gaiciya ga.

26 Omi gni-gni n na anyi ba ga fye bugba buyi, kwoi ga fye dalili n fye ba la Kristi Yesu tu, n wo shi mi bwanyi, sanu n ma jeze be efye aba n cei, ma zhin fye ziyara.

27 Ama kwo kni be nu yi bwa mi'a, fye pa, fya zan-zan ngye a Yesu viyi n na bai kwo to mi-i shan fye gye n shasun, mi ba wo nabari manayi nge fye mi zhin lo n bugbai gmanyi, fyei da Nabari manayi.

28 Ntna edna, kwo ofye anuwunyi zhin fye n wuna na. Kwo ba wu ba nge bala kaya, ama n fye aba kwo ba wufye nge Shekwoyi kunsun lo n fyei. Woi la wye-wyeyi nyalo-nyalo nya ga fye n gnisun n woi.

29 Gama n fye aba ala esa ga fye, to ge fya kpema wo kawai m, ama fya gye azhin ntu wo bo.

³⁰Yi filo n okun ye n gnisun, fye ku gye mi-i sin wahala Intu wo bo n sapai, har sayi mi ye dna lo n wahala atan-tasin, ngye shi fye kpe lo.

Afilibiyi 2

Yi Zhin Ngye Yesu

¹Enya lo n na a Yesu viyi ai yi ge atna-zhin? Fye ye mi lo har fyei ye fya bmami zhin? Kwo zhin nyaho nu n fye aba nge yi zhin a zaje nu dna n Dagayi, yi n Zafun gmanyi lo? Ofye abugba n na atnazhin yi lo n bugba bwa yi?

²To fye zhin mi ma dagma behin-hin nya, fya ye n na jeyi n bugbai gmanyi, fyei zhin tnu-tnu n gnisun n bugbai bedo n bemwi gmanyi.

³To ye hohin tukwon, to zhin bo n na bai aza ci hon, gba hohin tukwo, ha gye azaje ndu hohin.

⁴To zhin hohin tukwo abonu nubo gmanyi n, ama zhin nubo n na zaje nyai be, n bei n ba zhin.

⁵Kwo bmiya efye hali kwa wu ngye odo n Yesu Kristi bei wu yi nyi.

⁶Oza nu, kwo da yake wo bei zhin Shekwoyi nu, wo to bei gyima nge wo zhin Shekwoyi nu n.

⁷Ama wa kma owo mwa-mwa ya zhi n ikoyi, wa gba wohin tukwo wa ze zanyikwoci ngye fyenu.

⁸Wa gba wohin tukwo n du-du, wa fi ngye evi fi tu n zundu.

⁹Ntu cenu Shekwoyi bei la wo kala tu n eshe wa ga wo eye ndu aye aje vinya.

¹⁰Nnabai n Yesu ye nyikutukwo doho-doho n she mi, n anyi mi yi, n anyi sintai bei ca kwokwo.

¹¹Nyitala doho-dohoi bei cige, Yesu Kristi nu zhin Dagayi dna Shekwoyi Dada mwa-mwa.

¹²Omi a nugundo yeye yi, sanu n mi bei gnisun n fyei, fye bei vi mi bo-wu peceiye. Shi mi to gni lo n saiye nyi n, fye zhin peceiye fya vi abo vinya n ba be n gni-gni, avun Shekwoyi mwa-mwa ga, n dna yi, fyei ta na avun yi n nya n kwo ba wun wo bugba ya.

¹³Ntuge Shekwoyi nu zhin tnu-tnu n fye mi, Woi bma fye zhin n nabai fya wowo beda, fya zhin bo n wo cei pma fya zhin.

¹⁴Nyaho-nyahoi n fye ba zhin, fye bui gunu-gunu da si na bena yi, na jeyi.

¹⁵Nna bai n zaho ta bwa fye laifin. Fye sase n gyi-gyi-yi. Ntna cegye, Shekwoyi abi nfi n wyegma anyi ye nya n na za nukwoyi n ba ta wo bon. Fye bmiya na n ba mi ngye a fitila. Fya ku ze a buzangna.

¹⁶Fyei wuba Nabari wye-wyeyi nya. Sanu n Kristi bei jeze be ncei, abei da mi n mwa, nge emi tnu-tnu n fya ba to ze gbeloyin.

¹⁷Ngye aba emi ami zeya nu ntu n fye gaiciya ga bo n mi ga Shekwoyi kwo ngye hadaya nyi, wato ngye mi ba fi ntu fye bo nu, aba dami n mwa, mabwa agmada ngnisun nfyeyi.

¹⁸Gama kwo kunce lo fya bwa bugba bui-bui ntu n ce, fya dagma n mi yi ntu n esa bo n mi la bwa ma fi ntu fye bo nyi.

Bulus A wyekwo

¹⁹N Dagayi wa ye, mi ba tnu n Timatawus yi esa fyewyi wa gye fye wye. N wa jeze be wo ba fu mi bugba wa wu mi efye lafiya, shi fye zhin lo.

²⁰Oza to lo woi ye mi ngye Timatawus n.

²¹Zaho-zahoi ce woi wo wohin nu bo, to woi shan Yesu Kristi bo won.

²²Ama fye kpe Timatawus ye lo. Wo la ze n gye mi binu, woi bma mi nabari manayi wa'azi zhin.

²³Mi batnu n woi sa fyewyi, n ma ku kpe nya ye n kwo ba bwa mi ya.

²⁴Mi ga Shekwoyi gaiciya lo ge, esa fyewyi mi ba be ma gye fye wye.

²⁵Nsaiye mi gye kwo bmiya lo matnu n Abafraditus yi nfya ba. Fye bei tnu woi wa bma mi zhin dna n mi bukata, to, owo n miyi, yi ku ze aya bi, yi ku ze yi zhin tnu-tnu, yi sunkun n gnisun.

²⁶Nsaiye mi tnu woi lo n na api n jesun, ntu ge api awye n lawo kwo, woi la damu shi fye bei ku wo ge nyasan bei ku san wo.

²⁷Nyasan bei ku san wo n mwa, har wo bei la wo viwiyi n fiyi. Ama Shekwoyi bei ku gye wo sun-sun, n mi yi be, to wa ye ge ma bwa bugba zhiyi tu n deye tukwo n.

²⁸Ntu cenu a gnami wolo n gye mi tnu n woi n fya ba njesun, gama mi kpelo shi abei da fye nsun fyei yagye wo. Ce ba da mi kwa cemi bugba wum bma.

²⁹Fye zhin wo amabe dna n Dagayi n bugba buyi, fya wu fye agmada.

³⁰Gama wo beye wa fi ntu n Kristi tnu-tnu bo, sanu n wo bei zhin atna, wa zhin mi bo n fye to mi zhin ntu ge fye lo n kpai.

Afilibiyi 3

¹Beho-behoi n kwa zhin, emi anugundo fye dagma fi n Dagayi, ata be mi n fye ce gna yi n. Kwo bmiya lo n fya ba fya wo ce ci.

Peceye Nna Malami Nukwoyi

²Fye zhin peceiye n na za nukwoyi, amwi, nba gna ge sai oza zhin kaciya nu a kpe wo gni nyi.

³Gama eyi nayi zunya nu ta ze yi Shekwoyi abin, mwa-mwa ga nu n yi Zafun yi, kaciya hin-hin nu, eyi a Yesu viyi, yi dagma fi n nya n Kristi Yesu ku zhin gayi, yi kpe ge yita mi n yihin bma-zhin ya gni yihin tukwon.

⁴Ndei oza lo n wo gye ge wo bei ba mi wa gni wohin, emi nu, ngye aza bei ba pwo ntu n nya bo n wo n cei, mi bei ba mi ma pwo.

⁵Gama nyipyeyi nyimwa-nyimwai nu n na bei zhin mi kaciya, a mami dna Yahudiyi hin-hin puwa, Banyami bye. Ntu cenu mi zhin Yahudiyi za hin-hin nu. Knido nu shasun, mi bei dna n na a Farisiyi fye nu, n ba vi a Yahudiyi awyidna n na akunu yi n kala yi nyi.

⁶N wyenyi? E, har ma ma ga ikklisiya wahala ma zhin atna ma shi a Yahudiyi awyidna bwa vinya.

⁷Ama anya deye vinya n mi bei gye ba n na pmai, nsaiye mi ku ba ya vinya n na bai ma kpema, ma tu awye n Kristi nu gmanyi.

⁸E, anya vinya zhin gbeloyi nu, n na mwi ba do n gyibai nza ba bwa woi ya kpema Kristi Yesu emi Dagayi. Miku anya ya vinya, mito ze ba n gye nyahon n na abai ma bwa Kristi.

⁹Maze gmanyi n woi, to a shan gna ge ma bwa gni-gni ntu n mi be manayi zhin bo nu m, ko Shekwoyi awyidna bwa shin, ama ma ga Kristi gaiciya wa gni mi nu, gama Shekwoyi zokwo n wo zeyi aza befyece da, ko nu zhin gaiciya ga dna n Kristi gmanyi.

¹⁰Nsaiye mi ku anya vinya ya, miku gye okwonu zhin zokwo gmanyi n za ba kpe Kristi ye, oza kpe iko ye n kwo bo je wo wye-wyeyi ga nyi, ma bwa awyega wahala sin nya, n fi yi ngnisun n woi.

¹¹Nya n kwa zhin, emi nu ba zhin oza n wo bwa wyewyeyi woi-woyi dna na za n ba ku fi ba je wye-wyeyi bwa.

¹²Mita ye ma ci ge mi la ze oza tna-laifi da nu n, mito tu abo mwi n kwo kunce ma tu mwi n. Ama mi zhin tnu-tnu lo abye har ewyi n mi bei ze enya n Kristi wa gni mi ntu ce, woi yemi ma ze nyi.

¹³Omi azaje, har sayi mi to ze enya n mi ye ma zen, Awo, ama mi zhin atna n mi akala yi vinya ma zhin beye gmanyi. Mi-i ze abo amwi n ko la diya, mi-i shi obo awye n kwo lo na bye.

¹⁴Mi zhin atna masi asibui cezhi ba, ma gwo lada n Shekwoyi wa yi-yi ya lo she, ntu nya bo n Kristi Yesu wa zhin gayi nyi.

¹⁵Mi n na wyetu yi lo efye n fye ku mwa fi n Yesu vi nyi, fye ba gye abeye n gnisun m miyi pei-pe. N fye to bwa awyega n na dohon, mi kpelo Shekwoyi ba ga fye awyegan n ba,

¹⁶n fya vi gaiciya n fye n cei nyi.

¹⁷Emi azaje, fye se ase n gye emi, n na ajeyi.

¹⁸Gama miku gna fye n kmisunyi, ma je fye ce gna n saiye n na awye nyi yi, aza lo n ba zan-zan fi n a Yesu viyi zokwo, ama ba zhin Kristi zundu a nubayi nu.

¹⁹Oba kpegni ba abwi nu, gama oba Shekwoyi kwo nu zhin ba shakpe, bai mwa bahin tukwo n ba kunce ba wo vinyikwo, enya nba zhin nubovinya, okwo nu, zhin anyi ye n ba nyai vinya.

²⁰Ama eyi a-yi lo n 'shemi, aba n yi gniyi, Dagayi Yesu Kristi nyi. Yiye zlii yi pmi wo nu, wa jeze zhi.

²¹Sanu n wa jeze be, wo ba la anayi fi-fi ye waga yi anayi mwamwa nya, ngye owo nya, woi zhin apma n iko dnagmayi, n wo bei zhin apma n cei wa gyi nasara n na ba vinya nyi.

Afilibiyi 4

Beda Kmaknayi N Wyegy-i

¹Omi Yesu viyi aje, mi ye fye lo, ofye awye ko milo, ntuge ofyenu zhin mi bugba buyi, n mi tnu-tnu ladayi, Omi a nugundo yeyeyi, fye ku mi zhi dna Dagayi.

²Mi cei pma lo ma tna Afodiya abwa n Sintikiyi, mi gyi fye wye dna n Dagayi fye to je anya wun. Fye ku ze anugundo n jesun.

³Ma gna fye, emi a tnu-tnu kun-zhin yi n gaiciya yi, fye bma anyikwoza ye zhin. Ntu ge ba bei ku tnu-tnu kun zhin n miyi dna n Nabari manayi wa'azi zhin. Ba tnu-tnu ngnisun zhin Klement n mi azaje yi n ba aye kafi lo n lifafi wye-wyeyi nya nyi.

⁴Fye nu-nu agmadai cici n Dagayi, ma jeci ge, fye dagma.

⁵Fye fa aza ba kpe ge fye ta gna fyehin tukwo ye lon, fyei zhin bo n kwo kunce. Fye pa-ge Dagayi belo esa fyewyi.

⁶Fye to damu ntu n nyaho-nyahoi bon, fye gna Shekwoyi efye abukata, to fya ze amwi fya sawa mi ntu na amsa bo n.

⁷Nfya zhin lo nu fye ɓa bwa Shekwoyi bugba fu, n kwo du gbagyiza bugba kala wa kpe kwo ye. Owo bugba fu ɓa wan fye anubo zhin shi, efye abugba ɓa bwa sunsun, fyei ya ga Kristi gaiciya.

⁸Nsaiye emi azaje, shi mi zo wasika ye nyi, wuye ma gna fye beye n kma-sun. Fye la wye dna n gaiciya, ni ɓoyi n kwo bmiya. Fye zhin aɓo nubo n ɓa gyi-gyi-yi n bmiya, anya n ɓa gyi-gyi-yi n fi n na azaje, fye zhin nubo n nyai n fye ɓa ci Shekwoyi, fyei dagma.

⁹Fye gyi abye n na aɓe zhinyi n fye bei tumwi n mi, fya gye mi mi-i zhin.

¹⁰Adami lo, mi-i ci Dagayi shi fye bmami zhin njesun, mi kpe lo a zhin a wo fye fwa fya tnu mi n nya yi n fye ɓa mi, ama n sadohoi fye to bei n sayin.

¹¹To ge mi bei dna n esan gyi n, gama mila tumwi ma sa se n bugba buyi kwo mi n nyai mwa ko to mi-i n cei n.

¹²Mi kpe lo shi mi ɓa sa se n tnanya ho kwo mi-i n nyahoi. Mi la tumwi shi mi ɓa sase n nyahonyahoi, kwo nubo fu, ko mikun, kwo nyabwa ko sangyi.

¹³Gama mi ɓa mi ma zhin nyaho-nyahoi n Shekwoyi a gnami dna n Kristi bmazhin n wo gami kala n iko yi nyi.

¹⁴Ama dudu lo nu, fye ku zhin n bmiya n fya bma mi zhin dna n mi wahala n saiye nyi.

¹⁵Shi fye kpe lo nyi, sanu n mi bei kmi fye ɓe n nabari manayi nyi, ma godiya ma fa Makidoniya, ofye a Filibiyi nu bei bwami a nugundo zhin n nyaga ngwo-gwo yi. Ikklisiya ho to bei shan deye pya zhin.

¹⁶Har esa n mi bei dna n Tasaluniki fye bei tnu mi n bmazhin yi abwa ba.

¹⁷Ama ko da yake adami lo n fye acautayi, enya n kwo gnami agmada lo okwonu zhin lada yakwo, n fye bei bwa n she ntu n fye alheri ɓo nyi.

¹⁸Nsaiye, mi n na anya yi lo-lo n mi ye n mwa, anya n fye bei ga Abafraditus wa bemi n cei nyi, Ba zhin nyaga sundayi nu n kwo da Shekwoyi agma n mwa.

¹⁹Owo nu ɓa ga fye anya vinya dna n wo nyabwa n mwa-mwa, ntu n nyaɓo n Kristi Yesu ku zhin gayi nyi.

²⁰Nsaiye mwa-mwa vinya kwo kunsun n Shekwoyi eyi Dadayi, nyalo-nyalo. Amin.

²¹Fye ɓi a Yesu viyi gna vinya n ɓa nyi n ɓo nyi. Azaje n ɓa nyi n miyi nyi ɓa ɓi fye gna lo.

²²A Yesu viyi n ɓa nyi n ya nyi ɓa ɓi fye gna lo, tun baga aza n ɓa zhin tnu-tnu n Kaisar puwa nyi.

²³Eyi Dagayi Yesu Kristi anabarka ɓa kunsun n fye zafun yi. Amin.

Akolosiyi

Akolosiyi 1

- ¹Wasika ye gmi n Bulus akun nu n Ti-matawus yi, aza n Shekwoyi wa kni ba, ba ze Yesu Kristi a tnutnuyi.
- ²Kwoi lo eyi azaje aba a Yesu viyi, Shekwoyi aza n ba fi n Kolosi zhimi nyi. Fa Shekwoyi eyi Dada wa tu fye anabarka wa nu fye n wo bugba fu dnagmayi.
- ³Esa vinya n ya zhin aduwa ntu fye bo, yi zhin ya zhin Shekwoyi eyi Dagayi Yesu Kristi Dada godiya.
- ⁴Gama yi ku wo, shi fye kpema Dagayi n jesun shi fye ye owo aza n sun.
- ⁵Fye pmi agmada eshe nya nu, tunyi esa n na bei kmi fye wa'azi nabari manayi nya zhin nyi.
- ⁶Nabari manayi n kwo bei be fye abanyi, kwo laba lo n na anyi kwoi shan aza wye-wyeyi do. She ko bei shan fye nya do nyi, tunyi ewyi n fye bei wo, fya gane n Shekwoyi alheriyi n na alaifida aba.
- ⁷Abafras, eyi za yeyei, tnu-tnu kunzhin yi, owo nu bei be fye n Nabari manayi yei. Wo zhin Yesu Kristi fyenu gbenuyinu. Wo lo woi bma yi zhin n ya nfyemaimako.
- ⁸Owo nu na gnayi ye-ye dnagmayi bo, nfyeci lolo n na azaje aba nyi, n Zafun Gyi-gyi-yi wa ga fye nyi.
- ⁹Ntucenu, tunyi ewyi n yi bei wo of ye bo nyi, yi zhin aduwa ga fye lo, yi nya Shekwoyi nge wo bma fye zhin, fya kpe enya ye nwoln cei pma fya zhin, yi nyawo wa ga fye ce-ce dna n zafun zokwo.
- ¹⁰Yi nya wo n na abai efye asese ba da Dagayi agma kwa la wo tu, n na bai nfyeba bwa be manayi zhin, fyei zhin aza be manayi, fya tumwi fya kpe Shekwoyi ye lo abye-abye.
- ¹¹Yi zhin aduwa n jesun, wa nu fye n wo kala yi n mwa-mwa n na bai fya gyi abye ko knidonu yi na zhi'a. Fya ze nu-nu yi n Dagayi agmada yi cici.
- ¹²Yi sa Dada ami n tu ge wa zhin yi, yi ku kunce ya bwa anya awo-woyi, n ba zhin aza nya n ba fi n buzangna ebemi nyi.
- ¹³Gama wo la yi kun n wyegma n Shetan ebemi, woi fiyi n wo Nugun ye-yeyi ebemi.
- ¹⁴Nwa siyi n wo amiyi, wa zhin yi alaifi gafara vinya.

Latu Ntu Nya 'Bo N Kristi Ku Zhin

15Kristi nu zhin dogbe Shekwoyi nya, n na ata gyewye nyin. Wo bei nyi tun to Shekwoyi zhin nyahonyaho yin.

16Behin-hin, Kristi nu na zhin anya vinya n ba fi n 'she mi n anyi miyi, anya n yi gye n na anya yi n yi ta gyen. Anya, a zafun nya n kwo asuyi, n na abemi yi n kwa iko dayi. Vinya Kristi nu na zhin ba n tu wohin latu bo.

17Wo nyi kafin nyaho-nyahoi ya, owo iko nu n na i nya vinya yi shi.

18Owo nu zhin Tukwo, owo nayi nya, wato ikklisiya-nwo bei ya, owo nu zhin shugaba aza nya nba kukala n efi, n na abai wa zhin kmisunyi n na anya vinya.

19Gama Shekwoyi bei ye owohin tukwo wa dna nwo Nugun.

20Ntu n nya bo nu n wo Nugun a zhin, Shekwoyi wo fin zokwo ya nyaho-nyahoi kwa beda wo. Anya vinya n esbe n ekni yi, gama Kristi efi tu zundu kwo na be n jedofoe yi n Shekwoyi.

21Fye filo n bo n fye bei mwakpa n Shekwoyi nyi. Fye bei zhin owo anubayi nu to fyei ye won. Fye bei gnajegna-gna yi ya n wo. Ntu fye abo anubo zhin nukwoyi bo, n na abe zhin nukwoyi, ama nsaiye wo la fye jezebe n cei ngye owo anugundo.

22Wa zhin ce dna n owo efi mi n wa fi dna n nayi tu n zundu nyi ntu n ce nu Kristi ku be n fyei n Shekwoyi abye, fyei gni agni zhin wo abye n sayi ye n tna laifi, n kwo ba zhin n wo ba nya fye ya.

23Nya gmanyi, okwo nu fye ku gaiciya ga, fya ku mi zhin kwo, n kalayi dna n Dagayi fya ku tabata Nabari manayi nge Yesu bela fi ntu n fye bo, to fya shan-shan, n wo gaiciya ga wa gni fyen, Nabari wowoyi n kwo bei be fye aba, kwoi laba lo nsaiye n na anyi, emi Bulus, mi na agmadai lo ma gna azaje.

24Ama emi tnu-tnu nu ma sin wahala ntu fye bo, ai dami lo, gama mi bmazhin lo ma nu Kristi azhingye n tu wo nayi bo, wato ikklisiya.

Asiri La Kpe Anya Ya

25Shekwoyi, la tnu n mi yi ma bma ikklisiya zhin, ma wu abyedo owo asiri.

26-27 Wo bei nwo asiriyi soshi tunyi n sapa, ama kwa dawo wa gna aza n ba yewo bai se-ase ntu n owo bo, n mwa-mwa yi anabarkayi owo shiri nya ba zhin fye nya nu. Asiriyi nu nyi, Nge, Kristi n efyemi, owo nu zhin efye awyetu, n mwa-mwa yi.

28Ntucenu aba vinya n ya lo ya gna aza Kristi nabari n ba ba wo, yi zhin ba gargadi, yi wu ba shiyi kpeye lo nsun, yi n cei pma yami ya be n zaho-zahoi n Shekwoyi abye n Gyi-gyi-yi ntu n nya bo n Kristi ku zhin ga zaho-zahoi nyi.

²⁹Omi tnu-tnu nyi mami ma zhin kwo, ntuge Kristi iko dnagmayi gami kala lo nu n mi mi.

Akolosiyi 2

¹Awomilo ngye fye kpe shi mi sunkun lo, mi-i zhin aduwa ga fye bedo ikklisiya yi n kwo nyi n Lawudikiya nyi, n mi anugundo yi n ba ta shin mi ye kpe lon.

²Nya nyi n mi nya Shekwoyi ntu fye bo, fya bwa kala fya nyimaje dna n ye-ye, fya kpe Kristi ye dei-dei, n tna wye-gma. Gama Shekwoyi shiri asiri, n na ala guya wuyi nyi, okwo nu zhin Kristi n wohin tukwo yi.

³Dna n wo nu a beyekpe n cece yakwo yi sofi.

⁴Mi da deye ntu ge mi wo dna kada zaho wa be fye aba n beda dadayi, wa dna fye kwoce.

Fye To Ye A Wun Fye Gaiciya Yam

⁵Gama ko mi lo n kpai n fyei, omi bugba kunsun lo n fyei, ai dami ntu fye gaiciya ga kalada bo dna n Kristi.

⁶Nsaiye shi fya kpema Kristi wa gnifye nyi, fye kpema wo lonu fyegy-i-fyegy-i, fyei nyima wo cici.

⁷Fye fa efye agbegye ba mifi n wo, fya bwa nyagyi zafunya nwo. Fye gyi abye n mwa-mwa yi dna n Dagayi, fya ku dna kala n mizhi n gaiciya, n na bei wu fye nyi. Ofye awye-wyeyi ba nu na gmadayi n godiyayi ntu n nya bo n wo ku zhin.

⁸Fyeto fa aza ba wunfye gaiciya ga ya n ye-ye yin, n na anyi beyekpe yin, oba amsa nukwoyi, akpe-kpe gyei n na mi ba kpe n aza beyekpe na bo mwi yi, mai-makon nya n Kristi wa da.

⁹Gama dna Kristi Shekwoyi wa wu wohin tukwo dna n nayi.

¹⁰Ntu cenu fye n na anya yi lo vinya n dei fye n Kristi yi lo, ai ku fye nu n Shekwoyi ntu n fye gmanyi ze bo n Kristiyi. O wo nu zhin Begyi yi dnagmayi ndu zaho-zahoi n wo n ikoyi.

¹¹Sanu n fya be Kristi aba wa lo fyeya n fye ashakpe nukwoyi to ge n kaciya zhin bon, ama dna n zafun Baptisma ofya wye-wyeyi nya.

¹²Gama dna n baptisma fye gye shi efya anayi akwo-kwoyi, anukwoyi bo ku fi n gnisun woi, aku fye bi n gnisun n woi, fya kun n 'fi n woi, dna n wye-wyeyi woi-woyi ntu ge fye bei ga Shekwoyi ikoda beda gaiciya n wo bei la Kristi kala n 'fi nyi.

¹³Fye bei ku fi fi n fye alaifi, ato bei zun fye a shakpe a laifi nya yan. Wa ga fye aba dna n Kristi wye wyeyi gama wo bei ku fye zhin gafara.

¹⁴Wa zo of ye knizun vinya, owo awyidna vinya nfye to bei shi ba bwa nyin. Wa ku alaifi ye vinya wa zunbadu tu n Kristi zundu.

¹⁵Dna n zokwoye nu n Shekwoyi bei wun Shetan ikoya, n wo zan fye laifi zanyi nyi, Shekwoyi wa wu anyi vinya pei-peii Kristi nasara tu n zundu, aba n na abei lo n fye alaifi yi nyi.

¹⁶Ntucenu fye to fa oza wa zan-fye laifi zanyi ntu n na anya bo n fye gyi ko nfye sin. Ko ntu ge fye ta shi a Yahudiyi anyipyei agyi-gyi yi bwa lon, ko epya woi ko asabar woyi m.

¹⁷Gama adeye bei zhin awyidna ntu n esa fyewyi bonu, n ba bei zo esa n Kristi bei be n cei nyi. Ba bei zhin ofun behin-hin nyanu. N kwo be lo, wato, Kristi n wohin tukwo.

¹⁸Fye to ye zaho-zahoi wa ci fye ge fye ku bwi, ntu ge fye ta zhin a malaika sujada lon. Shi ba gna fye ge tilas fya zhin nyin, bai gna ge baku gye ruya bai kpela nge ko kuncelo fya gye. Aza tukwo mwayi (koda yake ba gna nge bata mwa bahin tukwon.) Ba ce-ceyi lo dna n ba abemwi.

¹⁹Ama bato bedolo n Kristi yin, tukwo n yi zhin okwo nayi nyin, gama yifi n wo nayi nu yi mwa, yi bwa nyagyi n kalayi n Shekwoyi aba.

²⁰Shi fye ku fi, n Kristiyi, deye la fye loya n anyi bemwi ngye shi oza bo pwo nwu, dna n bemana zhin n na wyidna bwashi-kninu zhin fye ye viba n pa payi n na awyidna yi ge,

²¹to gyin, to towon, harma nge ato to anya gyiho pya bwan ma?

²²Abo kni ye pya ba zhin aza bowu nu kawai, ntuge abei zhin nya gyi agyi nu a zhin apma n cei.

²³Abo kni ye wulo ngye ba bmiya, gama abokni ye pya ye n na abo bwashi n kala yinu, ndna bo, bai ga ba nayi wahala. Ama bato n kalai ba gyi nasara tu n oza a nuboo zhin n na shakpe nukwoyin. Ba bwa oza zhin wa zhin abokwo nu.

Akolosiyi 3

Fye La Eshe Bo Shi Nabye

¹Shi fye bei bwa wye-wyei n jesun, esa n Kristi bei laka n efi nyi, fye la awyetu, nwo nyabwa yakwo, n na gmadayi eshe nya, aba n wo sase tu lo n Shekwoyi bwaizhebwa, n she n mwa-mwai n ikoyi nyi.

²Fye zhin abo nuboo nu n ba lo eshe, fyeto la esa n mwa n na anyibonuboo zhin yin.

³Anyibo to fi fye pwan, ngye oza n wo lafi. Ofye wyewyeyi hin-hin lo n eshe n Kristi yi bedo n Shekwoyi.

⁴Esa n Kristi nwo zhin eyi wye-wyeyi hin-hin, wa jezebe fye bei bmiya na fyei bwa owo mwa-mwa.

⁵Fyeku abo anukwoyi anyi nya ya, fye ku abo anukwoyi wu n ba fi n fyemi nyi, fye la abwa kun n na anagbai zhi, cegye, shakpe n na abo pwawo vinyikwo nya yi, fyeto gyi anya manayi anyi nya wyen, gama deye kwo zhin shangba nu.

⁶Shekwoyi minagyi tulo n na aza, n ba zhin abeye pya nyi.

⁷Fye bei zhin fyei zhin ba esa n fye bei zhin anyi nya nu nyi.

⁸Ama nsaiye, esa la si n fye ba kma anya gye ya, fya kma jekpe kwo-kwoyi minagyi nya ya, nbmi-bmiyi, akmi, na beda kasayi.

⁹Fye to ce akata fi ajen, ofye wyewyeyi kwo-kwoyi nu bei zhin kwoi zhin lonu, nsaiye kwo la fi.

¹⁰Nsaiye fye se ase woi-woi nu, kwoi tu bemana mwi ci-ci, kwoi zhin atna kwa wu ngye Kristi, n wa zhin wyewyeyi woi-woi n efye mi nyi.

¹¹Dna n wye-wyeyi woi-woi ye, oza ekni, ko ilimi, ko oza masei kwo to zhin nyaho nun, anya gye vinya to zhin nyaho nun, ndei oza n Kristi yi lo okwo nu zhin nyaho, woi gni n na aza bonu vinya.

¹²Tunda Shekwoyi la fye kni, n wa ga fye wye-wyeyi woi-woi nyi, ntu n wo ye-ye lolo yi bo n fye aba, fye tu sun-sun-gye mwi, n bugbafuyi n na azaye n cei. Fye to damu n bei n ba ba dan, ama fye sin wahala dna n na atnazhin n hakuri yi.

¹³Fye zhin peceye fyei zhin shiri fya zhin aza gafara. Fye to shi za n fye min, fye pa ge Dagayi n ku gafara zhin fye, ntucenu tilas fya zhin azaje gafara.

¹⁴Nkwo sin vinya, fye fa ye-ye kwa gyi be n ofye awye-wyeyi nlonu ikklisiya vinya ba sase nbugbai gmanyi.

¹⁵Fye fa bugbafu n kwo gmi n Kristi aba nyi, kwa dna n fye abugbami cici, gama efye tnu-tnu nyi n fye sai n fye zhin owo nayi aganyi. Fyei zhin godiya cici.

¹⁶Fye pa enya bo n Kristi bei wu nyi, fye fa owo abeda kwa dna n fye abugba mi, kwa ce fye. Fye wu fye azaje, fyei kwo ba n zabura yi, n anyi zafun nyayi, fyei kwo anyi ga Dagayi n bugba dayi.

¹⁷Enya vinya n fya zhin kwo fya da, fye fa kwa ze wakili Dagayi Yesu nya, fya be n gnisun n woi n Shekwoyi Dada abye fya zhin wo godiya.

Jedobe Manayi

¹⁸Ofye anyikwoza, fye vi efye aba bo gama nyanu n Shekwoyi wa zhin shiri ga fye.

¹⁹Ofye azanugbaya tila fya ye n fye anyikwozayi, fyei wuba alheri, to fya gyi minagyi nbai, ko fya wun bugba n ba yin.

²⁰Ofye abi tilas fya vi ofye azakwoyi bo-efye adada n efye ayai-gama deye kwo da Shekwoyi agma.

²¹Adada, fye to wun efye abi bugba, har bugba bma ba ya m, ba fa kukari zhi bon.

²²Efye afyenu tilas fya vi efye adagayi anyi nya bo to fya zhin atna fya zhin obo n kwo daba bai zhi nu gmanyin, ama fye vi ba bo cici, ntu n fye Dagayi ye-ye bo n fye n cei pma fya dawo bugba nyi.

²³Fye zhin tnu-tnu n kalayi n bugba bui-buyi n esa yi vinya, n gye fye zhin Dagayi tnu-tnu nu to ge ngye efye adagayi nyan.

²⁴Fyei pa ge, Dagayi Kristi nu ba gba fye ta, woi ga fye anya vinya n wo cei. Owo nu nfye zhin wo tnutnu.

²⁵Nfye to la fyehin yin, wo bei gbafye n nya yi n fye to n cei pman, gama wo ta kni oza kni-kni n na awa daban, n oza ba laka ai dawon.

Akolosiyi 4

¹Ofye afyenu adagayi, fye zhin ofye afyenu bo cewo, fye pa n fyehin ge fye n Dagayi lolo n eshemi n wo kafye wyelo.

²Ato be fye n na aduwa zhin yin, fye pmi Shekwoyi amsa, fya pa fya zhin wo godiya esa n ba be n cei.

³Fye to ze amwi, fye zhin yi aduwa ntu yi bo n na bai Shekwoyi wa gayi aba n yi ba zhin Nabari manayi Kristi nya wa'azin n mi dna n Kurkuku n tu kwo bo nyi.

⁴Fye zhin aduwa, n mi ba zhin wa'azi n bugba kalayi, n nu-nuyi n jesun, ma wu kwo pei-peishi kwo kunce ma zhin.

⁵Fye zhin apma n esa yi n fya bwa vinya, fya gna aza nabari manayi, fye la ce, shi fye dafo n bai n wu.

⁶Fye fa efye azata ba ze a manayi n tukwoyi gyi, n na bai fya bwa amsa manayi n fye ba ga aza.

Gnabi

⁷Tikikus eyi zado ye-yei, wo ba gnafye shi mi wulo, wo zhin oza nu n wo zhin tnu-tnu n kalayi, woi zhin Dagayi tnu-tnu n gnisun n mi yi.

⁸Mi tnu n woi n na bai wa gye she fye wu, wa fumi bugba wa gami bugba kala njesun.

⁹Mi tnu n Onisimus yi, eyi za ye-yei bemanayi zhinyi, oza nfye mi, owo n Tikikus yi ba ga fye nabari vinya.

- 10** Aristarkus, n wo gnisun n miyi n ya nyi wo dnalo n kurkuku, wo tnu fye n wo gnabiyi n Markus yi Barnaba, zhalu shi ma gnafye nyi fye gwo Markus n na agmadayi n wa be fye aba.
- 11** Yesu Yustus wo tnu fye lo nwo gna biyi a deye zhin a Yahudiyi a Yesu-viyi nu, n ba kunsun lo n miyi, bai fumi bugba.
- 12** Abafras, n wo gmi n fye ayi nyi, Yesu Kristi fyenu, wo tnu fye n wo gnabiyi, wo zhin aduwa cici ntu fye bo, woi nya Shekwoyi wa ga fye kala, wa bma fye zhin fya kpe wo nufi ye n sai vinya n na abo vinya n fye ba zhin.
- 13** Mi gnafye behin-hin, woku tnu-tnu zhin fye n mwa n wo aduwa yi, n na a Yesuviyi n bafi n Lawudikiya n Hiyarabokis nyi.
- 14** Likita Luka wo tnu fye n wo gnabi yi, n Dimas yi.
- 15** Fye bi a Yesu-viyi gna n ba fi n Lawudikiya nyi, n Nimfas yi n na azai n ba ye zhi n wo puwa nyi.
- 16** Sanu n fya wasikaye ba, fya tnu n kwoi n Lawudikiya. Efyehin fya ba wasika n ma ka gaba nyi.
- 17** Fya gna Arkibbus, “La tabata lalle ho zhin obo lo n Dagayi wa gnaho ge ho zhin.”
- 18** Emi gnabi nyi n mi rubutu yi n ma ka. Fye pami bo dna ya n kurkuku, Shekwoyi anabarka ba shekna fye, Amin.

Atasalunikayi I

Atasalunikayi I 1

¹Wasika ye gmi n Bulus aba nu, bedo n Silwanus yi, n Timatawus yi, kwoi lo ikklisiya aba n Tasaluniki, ofye nfyē zhin Shekwoyi; Dada nya, n Dagayi Yesu Kristiyi nyi. Anabarka, n bugbafu yi, ba ze efye cauta dnagmayi nba kun n Shekwoyi eyi Dada aba n Yesu Kristi eyi Dagayi nyi.

²Yi sa Shekwoyi ami lo cici ntu fye bo, yi zhin aduwa ga fye nsayi vinya.

³Yi ta ze ofye atnu-tnu ye-ye nya amwi, esa n yi dabo n Shekwoyi Dadayi, ntu fye bom, nfyē gaiciya ga kalada yi, nfyē awyetu yi nfyē cei ntu Dagayi Yesu Kristi jezebe bo nna anyi nyin.

Gaiciya-ga Kpakalayi

⁴Yi kpelo ge Shekwoyi la fye kni, eyi azaje ye-yeyi n Shekwoyi ye fye n mwa nyi.

⁵Gama esa n yi bei be fye n Nabari manayi nyi, kwo to bei ze obo gbeloyi nu n fye aban, ama fye bei kna tñubua n na gmadayi. Enya n yi bei gna fye, kwo bei ku tnu-tnu yakwo lo nfyē mi, ntu ge Zafun Gyi-gyi-yi bei ku buzangna ga fye, fya kpe lalei ge beda n yi gna fye nyi kwo zhin gaiciya nu. Fyēi kpe lo shi eyi ase-se bei ku wu fye nge eyi beda zhin gaiciya nu.

⁶Ntu ce nu fye ku ze eyi aviya n Shekwoyi anya yi, ntu ge fye bei la eyi beda gwo n bugba buibuyi n Zafun Gyi-gyi-yi aba, to fyēi gye efye anuwan n wahala yi nbugbawun yi n kwo bei be fye n ce yin.

⁷Ofye nfyehin fye ku ze besisi n a Yesu-viya aba, nba fi n Helleni kni nyi.

⁸Nsaiye Dagayi beda nla kun nfyē aba, kwoi gnami lo azaje aba vinya, kwoi lo aknido, ntu ge abaho-bahoyi n ya lo ya wo aza bai gna yi efye gaiciya ga bo.

⁹Ntu ge ba gnayi shi fye bei gwo yi n wu, shi fye bei pmi avun wu efye ashan-gba, fya vi Shekwoyi, n nabai nsayi ye Shekwoyi wye-wyeyi da n gaiciya da yi, wo nu gmanyi ba ze fye tukwoda.

¹⁰Bai da lo ngye shi fye nawyētuyi lo ntu Shekwoyi Nugun jezebe n 'she, wato Yesu, n Shekwoyi bei la wo kala n vingwo nyi, wo nu zhin eyi Gniyi n Shekwoyi minagyi n kwo be lo nyi.

Atasalunikayi I 2

¹Fye kpelo nfyehin, omi azaje, shi eyi ziyara bei ku zhin ampanyi.

²Fye kpelo shi a bei zhin yi bo n tna bmiya yi n Filibi, kafin yi be ofya ba, shi yi bei sin wahala n sun. Ama Shekwoyi wa gayi kala ya je fye wa'azi zhin, koda yake anuwun-yi bei sheyi gun.

³Ntu cenu fye ku gye, yi to bei zhin wa'azi n nufi nukwoyi nu kwo shakpen, yi bei zhin fye n gaiciya yi nu behinhin.

Atnu-tnuyi N Shekwoyi Wa Tnu

⁴Gama yi daɓo n gye Shekwoyi a tnu-tnuyi nu, n wa ye n bai, woi gaba tnu-tnu nge ba da gaiciya, yi to shan beda ye do ko fyewyin, n nabai kwa da aza n ba won, gama yi zhin Shekwoyi nu tnu-tnu gmanyi, n wo dna eyi abugba wyenyi, n ba aɓo nubo zhin yi.

⁵Yi to zhin a tna kwo fyewyi ya wan fye hankali n beda dadayin, shi fye kpelo, Shekwoyi kpelo, yi to bei dna fye kwoce nu n na bai fya ga yi agyiwyen.

⁶Yi to shin ye n ge zaho ciyin, koda yake yi n iziniyi lo fya ga yi mwa-mwa ntu ge yi zhin atnu-tnuyi nu.

⁷Ama yi bei zhin peceiye n efye aba, shi obi ya zhin wa gawo bi nyagyi peceiye nyi.

⁸Yi bei ye fye n mwa har ya ga fye Shekwoyi beda, n yi awye-wye yi be.

⁹Fye to ye palon, omi azaje, shi yi bei zhin tnu-tnu n fye aba n sun, Nsukwoyi n nyi-pyei, ye zhin tnu-tnu, ya bwa nyagyi n na abai to ya tu azaho akayan, yi zhin Shekwoyi Nabari manayi wa'azi n fye aban.

¹⁰Fye zhin yi asaidada nu n fyehin, n Shekwoyi yi, nge yi to n laifiyi lo n zaho aba n fye min.

¹¹Yi bei daɓo n fyei ngye shi obidada zhin wa daɓo n wo abiyi. Fye to palon, shi yi bei tna fye abwa, yi gyifye wyen?

¹²Nge, fye to ye, efye ase-se, kwa wun Shekwoyi bugban, ama fye gawo bugbabuiyi n wa yi fye fi n wo ebemi nyi, fya gwo wo mwa-mwa nyi.

¹³Yi ta fa Shekwoyi ami sa bo n tu ce n, ngye esa n yi bei zhin fye wa'azi, fye to bei zhin nubwo nge eyi beda nun, ama fye bei gwo eyi beda ngye Shekwoyi bedanu, Okwoi nu behinhin. Kwa shan fyedo esa n fye bei gakwo gaiciya cei nyi.

¹⁴Njesun emi azaje fye ku wahala sin shi ikklisiya n Yahudiya bei sin nyi. Wahala n fye aza akun, shi ba bei sin wahala n na a Yahudiyi akun nyi.

¹⁵Sanu n ba bei ku anabi wu, n na avun ba wu Dagayi Yesu, n saiye ba kuyi ga wahala n tna sun-sun gye, ba la yi nya ya. Ba zhin gaba n Shekwoyi n na azayi.

¹⁶Bai zhin atna to ba ye ge yi zhin abyedo wa'azin, bai wo dna ge azaho ba pwo. Ntu cenu oba laifi ce kwoi mwa. Ama Shekwoyi minagyi n la ba wan.

¹⁷Omi azaje, n na avun, yi ku fye fa yi to ye zhi lo n fye aban esa fyewyin (eyi abugba to fa fyem) ya zhin atna n mwa ya jezebe ya gye fye.

¹⁸Yi bei n cei pma ya be, emi, Bulus, mi zhin atna ci-ci ma be, ama shetan to wa yen.

¹⁹Gama yi sase, n kni bei nua kwoi gayi awyetua, bugba bui, n yi lada yi n yi ba gma? Ofyenu, E'e fye bei be yi n bugba buyi n mwa, yi gni-a-gni zhin n gnisun n Dagayi Yesu Kristi abye esa n wa jeze be n jesun.

²⁰Gama efyenu zhin eyi arawani n bugba buyi.

Atasalunikayi I 3

Nabari Manayi N Timatawus Aba

¹Esa n yi to bei shan min, ya pmin ya zun shaula ya ge kwo bmiya lo ya ku cefi n Atina.

²⁻³Ya tnu n Timatawus yi, eyi zado n tnutnu kunzhin-yi, Shekwoyi tnu-tnu yi wa be efye aba, wa be fye gaiciya ga kala n bugba kalai, n nabai to fya zun fi ko fya bma bugba ya ntu wahala bo n fye sin nyin. (Ama fye kpelo wahala ye pya dna n Shekwoyi shiri ntu n yi bo.)

⁴Ko esa n yi bei kunsun n fyeyi nyi, yi bei ku gna fye ge safyewyi wahala ba be, kwoi la ku be.

⁵Shimi bei danyi, esa n mi to bei shan mi to mi yi gye fye wyen, ma tnu n Timatawus yi wa kpe kwo efye gaiciya ga ye n kalayi lo, mi bo wodna kwo shetan ku nasara gyi tu n ofye tukwo, eyi tnu-tnu kwoi la ze gbeloyi.

⁶Nsaiye Timatawus la jeze be, woi gna mi ge, of ye gaiciya ga, n ye-ye yi ba gyi abye lo. Fyei pa eyi ziyara bo n bugba bui buyi shi fye n cei pma fya gye yi wye, shi yihin cei pma ya gye fye wye nyi.

⁷Ntu cenu omi azaje bugba kuyi fu, dna n yi wahala n yi sin n ya nyi, tunda yi kpelo ge fye mi zhi lo n Dagayi nyi.

⁸Yi ba mizhi dna nyaho-nyahoyi ndei yi kpelo ge fye kpema Dagayi lo.

⁹Yi ta mi ya sa Shekwoyi ami n kunce, ntu fye bon! Ntu bugba buibui bo n fye gayi ngye shi Shekwoyi wo yi aduwa ntu fye bo nyin.

¹⁰Nsukwoyi n nyipyeyi yi zhin aduwa ntu nfyeyi bo, yi gyi Shekwoyi wye, ya gye fye njesun ya nu enya n kwo ce yalo n fye gaiciya ga.

¹¹Fa Shekwoyi eyi Dada nwohin tukwo, n yi Dagayi Yesu yi, wa tnu n yi, nfyeyi aba njesun.

¹²Fa Dagayi wa zhin ofye yeye kwa mwa lo abye-abye, kwa nu, kwoi gyi ga efye azaje n na azayi vinya, shi eyi ye-ye be fye aba nyi.

¹³Deye ƙa zhin ofye abugba ƙa bwa kala, n tna laifi, n Gyi-gyi-yi n Shekwoyi eyi Dada yi. N na bai fya gni-gni zhi n wa abye n tna laifi, ewyi n eyi Dagayi Yesu Kristi bei jezebe n gnisun n na azayi n ƙa zhin owo anya nyi.

Atasalunikayi I 4

Fye Ku Ze Aza Gyi-gyi-yi

¹⁻²Omi azaje fye kpelo, shi fye ƙa da Shekwoyi bugba, dna n fye asese fyegyiyegyiyi, gama fye kpe wyidna ye lo n yi bei ga fye dna n Dagayi Yesu, Nsaiye yi gyi fye wye dna n Dagayi Yesu, nge fye zan-zan shi ya wu fye.

³⁻⁴Cama Shekwoyi n cei pmalo fya ze aza Gyi-gyi-yi, ntna cegye, Fya bui anagbaya si n na abai zaho-zahoi wa pa mula n gyi-gyi-yi.

⁵To ge n shakpe yin, shi abyedo zhin nyin, ntu n tna Shekwoyi yekpe ƙo n wo azokwoyi nyin.

⁶Deye kwonu zhin Shekwoyi beye, nge fye to gyi efye zado fi fya a ezado nyikwon, ntuge Dagayi ƙa ta fye n mwa, shi yi bei shin fye gna nyi.

⁷Gama Shekwoyi to yi yi, ya ze aza nu nƙa bugbaya nu-nuyi n cegye yi nun, n nuyi n shakpe yin, ama ya ze aza agyi-gyi-yi.

⁸Oza n wo to vi wyidna yen, wo ta zun aza beda nu gnan, ama Shekwoyi nya n wo ga fye owo Zafun Gyi-gyi-yi nyi.

⁹Ama ntu n na azaye n cei ƙo, n kwo kunce a bwa kwo n na Shekwoyi aza ba nyi, mi to n na apma yi lo ma da beho tu n kwo tukwon, Gama Shekwoyi n wohin wo wu fye lo, shi fye ƙa ye najeyi.

¹⁰Behin-hin ofye ye-ye n kalai lo nfyeyi a Yesu-viyi aba, n fye kni vinya. Har nsaiye yi gyi fye wye fye ye ƙa lo na bye.

¹¹Fye fa deye kwa ze fye bemwi, fya sase n lafiyai, fyei zhin fyehin tnu-tnu, shi yi bei shin fye gna nyi.

¹²Nnabai aza nƙata vi Yesun ƙa ga fye gaiciya ƙa ga fye mwa-mwa, n fye ta zhin akma fya kpema aza ntu fye bukata ƙom.

Yesu-viyi Fi

¹³Nsaiye, omi azaje, mi n cei pmalo fya kpe oƙo n kwo bwa Yesu viyi, esa n wa fi n cei. N na abai n kwa bwa fye, fyeta wun bugba n duwyin, ngye aza n ƙato n na awyetu yin.

¹⁴Shi yi ku gaiciya ga nge Yesu la fi, wa lakala n vingwo n jesun nyi, yi ga gaiciya n jesun n ge esa n Yesu ƙa jezebe, Shekwoyi bei jezebe n na a Yesu-viyi, n ƙaku fi n gnisun n woi nyi.

¹⁵Nba gna fye deye Dagayi wu-wu nu, nge eyi n yi n wye-wyeyi, esa n Dagayi bei jezebe nyi, yi to bei kukala ya gyi aza apye-apye n ba fi n vingwo nyin.

¹⁶Gama Dagayi nu bei kashi be n eshe, n wyisa kalai, wyisa a malayika esu begye nya, n Shekwoyi mwayi yi. A Yesu-viyi n ba ku fi, banu bei kukala n na abye ba sun n Dagayi.

¹⁷N na avun, eyi n yi cezhi n wye-wyeyi n fi n na anyi nyi, a bei ku yi ya shegun Dagayi n 'she bmana, elonu yi bei kunsun n woi nyalo-nyalo.

¹⁸Ntucenu fye fu aje bugba, fya ga aje kala n beda ye yi.

Atasalunikayi I 5

¹Abeye vinya bei zhin n knisayi a? Kwo to zhin tilas nu ma da beho tu n kwo tukwon, omi-zaje.

²Gama fye kpelo sarai, nge zaho-zahoi ta kpeye lon, Dagayi nyipyeyi bei be n tna esa dnai nu, ngye evi n sukwoyi.

³Sanu n aza bei ci nge, "Lafiya lo sarai nyaho to wunya lon bugba fulo." Nsa gmanyi yi wahala ba beba tukwo, shi kagna zhin kwa be nyikwoza aba to woi dna ce nyin. Aza deye to bei bwa asibui ban, gama abwi-ba to lo n.

⁴Ama emi aza je, fye to filo n wyegma n na abeye tukwon, Dagayi nyipyeyi to bei be efye aba ngye evin.

⁵Gama fye zhin abuzangna binu anyipyeyi abi njesun fye to zhin wyegma nyanu kwo sukwo nyan.

⁶Ntucenu fye ku zhi fya pmi, fyeto wangye n gye azajen. Fye pmi owo zhi-zhi fya ku awye shi.

⁷Sukwo zhin gyewan sanu, n esai n aza sin eje, kwo zhin ba.

⁸Ama eyi n yi fi n buzungna nyi, yiku hankali bwa, n gu-gui n gaiciya ga yi, n ye-ye yi, ya kun kata eyi gni-gni nya.

⁹Gama Shekwoyi to kni yi wa zewo minagyi yakpe yi nun, ama wa gni yi dna n eyi Dagayi Yesu Kristi.

¹⁰Wafi ntu nyi bo n na bai ya sase nwoi nyalo nyalo. Kwo yi kufi, kwo yi-i ye n wye-wyeyi, esa n wo bei jeze be n cei.

¹¹Ntu cenu fye ga aje bugba kala, fye mi aje zhin shi fye shin zhin lo nyi.

A wyidna N Na 'Bo Pa Yi

¹²Omi azaje, fye ga efye ikklisiya tukwoda mwa-mwa, nba zhin tnu-tnu n kalayi n fye aba nyi, bai dabo n fyei tu na abo tukwo n bato bmiya lo nyin.

13Fye gaba mwa-mwa fya ye ba nfyē abugbai vinya ntuge ba bmafyenu zhin. Fye pa to fya wu anya n na jeyin.

14Omi azaje, fye gnakni aza n ba wo bwato, fye fu aza bugba n ba bugba la wunya, Fya zhin aza atna nba to n kalai lon, fya zhin hakuri n na azai vinya.

15Fye to ye nge oza wo gba benukwoyi ta n benukwoyi yin, ama fye zhin atna fya zhin aje bemana, n na azaje vinya.

16Fye dagma cici.

17Fye zhin aduwa cici.

18Beho-behoi n kwa bwa fye, fye zhin Shekwoyi godiya, gama Shekwoyi nufi nyi n fye aba, n fye zhin Kristi Yesu nya nyi.

19Fye to wo Zafun Gyi-gyi-yi tnu-tnu bi nfyē abugba min.

20Fye to ci aza wyegba n ba wu nyanyin

21ama fye mwi belo-behoi n na da, fya kpe kwo gaiciya nu, ndei kwo zhin gaiciya nu fya gwo kwo.

22Fye bui benukwoyi doho-dohoi si.

23Fa Shekwoyi bugbafu nya n wohin tukwo wa ze fye agyi-gyi-yi. Fa efye zafun, wye-wyeyi, n nayi ba bwa kala n tna laifi, har ewyi n eyi Dagayi Yesu Kristi bei jezebe n cei.

24Shekwoyi n wa yi fye fya ze owo abi nyi, wo ba zhin fye abeye vinya shi wo bei zhin fye alkawali.

25Omi azaje fye zhin aduwa ntu yi bo.

26Fye dna abwa do gami n na a Yesu-viyi ajeyi n bo.

27Mi gna fye, dna n Dagayi eye fye ba wasikaye ga a Yesu-viyi vinya.

28Anabarka dnagmayi n ba kun n eyi Dagayi Yesu Kristi aba nyi, ba kusun n zaho-zahoi n fye mi.

Atasalunikayi II

Atasalunikayi II 1

¹Wasika ye gmi n Bulus akun, n Silwanus yi, n Timatawus yi, Kwoi lo ikklisiya aba n Tasalunika, n fye zhin Shekwoyi eyi Dada n Dagayi Yesu Kristi nya nyi.

²Shekwoyi Dada n Dagayi Yesu Kristi yi wo tu fye anabarka n mwa, n bugba fuyi nu n fye a bugba.

³Omi azaje, Shekwoyi godiya zhin ntu fye bo kwo to zhin be mana nu kawain, eyi tnu-tnu nu n Shekwoyi aba, ntu fye gaiciya ga mwa-mwa yi bo, ntu ofye ye-ye bo n kwo mwalo n na aje aba nyi.

Dalili Wahala Nya

⁴Adayi lo n mwa har yi gna a ikklisiya aje ofye hakuri bo n gaiciya ga yi n Shekwoyi, dna n fye wahala n fye sin nyi.

⁵Zokwo gmanyi nu nyi n Shekwoyi zhin tnu-tnu, gama wo zhin a pma n wahala yi, woi zhin fye shiri ntu wo bemi bo.

⁶Njesun woi zhin owa shiri bedo n tatai, ntu n na aza bo nba ga fye wahala nyi.

⁷Ntuce nu nba gnafye, n fye sin wahala nyi Shekwoyi ba gafye sunlsun n gnisun n yi, esa Dagayi Yesu ba be, esa n Yesu ba kashi be n eshe, to yi dna cem, bedo n wo amalaika iko nya yi.

⁸Woi be n owai, tu na aza tukwo n bata ye ba kpe Shekwoyi yen, bai to ye ba gwo wo shiri wa gni ba dna n eyi Dagayi Yesu Kristi n.

⁹Abei taba fi n anapr nyalo-nyalo nya, n gnajegna-gnanyi ya n Dagayi, ba ta gye owo iko mwa-mwa wyen, har abada.

¹⁰Sanu n wo bei be, wa gwo latu n mwa mwayi n wo aza gyi-gyi-yi aba. Fyehin bo la wo tu ce, ntu ge fye ku gaiciya ga, n beda n ya gnafye tu nwo tukwo nyi.

¹¹Ntu cenu yi zhin aduwa ntu fye bo cici, nna bai eyi Shekwoyi, dna nwo iko, wo ba zhin fye fya ze abi manayi, ngye shi wo ye fya ze, wa zhin fye fya nu ofye abomwi manayi, ntu fye gaici-ya ga bo.

¹²N lonu aza vinya ba ci Dagayi Yesu Kristi eye, ntu n na abo bbo gye n n fye. Ofye mwa-mwa dnagmayi nunyi vinya, nge fye zhin Kristi nyanu. Sun-sun gye dnagmayi eyi Shekwoyi nya, n Dagayi Yesu Kristi yi nu na zhin deve kwoi si fye.

Atasalunikayi II 2

Yesu Jeze Be Lo.

- 1-2** Nsaiye, Eyi Dagayi Yesu Kristi bebe njesun, n yi yezhi yi n wo aba ma? Mi gyifye wye, agu to vin fyen, omi azaje, shi fye wo ai ce akata nge Dagayi nyipyeyi la lu ben. Nfya wo aza bai gna ge, ba gye ruya, kwo ge Shekwoyiwa tnu ba tnu-tnu, kwo wasika n fye zhin nubwo ge kwo gmi n mi aba, fye to ga gaiciyan.
- 3**Fye to ye zaho-zahoi wa dna fye kwoce kwo fyewyin. Gama nyipyeyi ta ben sai anya ngun aba nku zhin, kmisunyi esa n aza bei na Shekwoyi abo, n sayi oza kala kpeyi anapi bi wo bei be.
- 4**Wo bei tu Shekwoyi cegye n nya doho-dohoi n na gakwo mwa-mwa, Wo bei lo wo sase tu n Shekwoyi nyakun ngye Shekwoyi, woi cige wo zhin Shekwoyi nu.
- 5**Fye to ye palo nge mi bei ku ce gna fye, esa n mi bei kunsun n fyei nyin?
- 6**Fye kpe enya ye lo n kwo ye n woi shi, to woi be yan, wo ba bwa be owo sai lasi nu.
- 7**Tnu-tnu n oza kala kpei n anapi nyayi bei zhin, esa n wa be, kwo gyi abye lo n saiye, ama owo nwohin tukwo ta ben, sai oza n wo hana n woi nyi wola laka.
- 8**Nsai oza nukwoyi ye bei be, oza n Dagayi Yesu bei bmiwo na n wo gbe osun yi, woi wu wo, esa n wa jeze be n cei.
- 9**Benukwoyi zhin-hi ye, wo bei be ngye Shetan a tnu-tnu kaya, n nunuyi n Shetan ikoyi, woi dna aza kwoce n na abe wo-woyi n wo bei zhin.
- 10**Wo bei dna aza kwoce kpekpe n ba lo anapi nyi-gama bala gaiciya abo na, bato ye kwo, ba gakwo gaiciya, n na bai kwa gni bam.
- 11**Ntucenu Shekwoyi bei fa ba, ba ga akata gaiciya n ba bugbayi vinya.
- 12**Abei da ba owa dei-dei shi ba ga akata gaiciya, bai na gaiciya abo, bai gyi abye fi n ba a laifi.
- 13**Ama tilas ya zhin Shekwoyi godiya cici ntu fye bo, eyi aza je n Dagayi ye fye nyi, gama Shekwoyi a bei kni fye tunyi n sapa, wa ga fye gni-gni, woi zhan fye ya n Zafun Gyi-gyi-yi ntu fye kpema bo n gaiciya.
- 14**Wo bei zhin apma n yi, wa gna fye Nabari manayi. Wa yi fye fya be fya bwa mwa-mwa eyi Dagayi Yesu Kristi nya.
- 15**Nna abeye vinyai fi n bugba, omi azaje, fye ku mi zhi fya ku gaiciya shi dei-dei, n yi bei wu fye nyi n doyi n yi bei ka fi fye n wasika nyi.
- 16**Eyi Dagayi Yesu Kristi n wohin tukwo n Shekwoyi eyi Dada, n wa ye yi wa gayi atnazhin nyalo-nyalo nya n na awyetu yi n yi to kunce ya bwan.
- 17**Wo zhin fye bugba a tna, n na atnazhinyi vinya, wa bma fye zhin n bo manayi vinya, n fye ba zhin fyei da.

Atasalunikayi II 3

La Gaiciya Shibwa

- ¹To, mi ye ma zo nu, mi azaje, shi mi zo n wasika ye nyi, mi, ye fya zhin aduwa ntu yi bo. Fya zhin aduwa n na abai Dagayi beda ba gyi abye, kwoi gyi nasara abaho-bahoi n kwa lo. Kwoi gyi nasara aba vinya shi kwo bei zhin esa n kwo bei be fye aba nyi.
- ²Fye zhin aduwa, ya pwo n na aza nukwoyi akun, gama aza vinya nu taye Dagayin.
- ³Ama Dagayi zhin egbe-nuyi nu, wo ba ga fye kala wa gu fye n Shetan agam.
- ⁴Yi n gaiciya ga yi lo ge, fye zhin abolo n yi bei wu fye nyi, fya zhin ba cici.
- ⁵Dagayi ba ga fye awyega fya gane n Shekwoyi ye-ye yi, n hakuri yi n kwo gmi n Kristi aba nyi.
- ⁶Wyidna nyi n yi ga fye, omi azaje, dna n eyi Dagayi Yesu Kristi eye n wo ikoyi. Fye to gyi nugundo n Yesu-viyi doho-doho yi n wo wo bwato, to woi ye wa vi tnu-tnu zhin zbo n kalai, ngye shi yi bei gna fye nyin.
- ⁷Gama fye kpelo tilas fya vi eyi fye, n fye bei gye to yi ka nkwo nyin.
- ⁸Yi to gwo nyagyi n zaho aba to yi-i gba won, ya zhin tnu-tnu mwa, n sukwoyi n nyipyeyi n na abai ya bwa agyiwyeyi, n yi bei cei pma ya zhin apma n cei nyi, ntuge yi to bei cei pma ya tu fy akayan.
- ⁹Kwo to wu ge yi to bei n izini yi nu ya nyafye fya gayi nyagyin, ama yi bei cei pma ya wu fye, shi fye ba zhin tnu-tnu n tu fye asese bo.
- ¹⁰Esa n yi bei nyi n fye aba nyi, yi bei ga fye wyidna ye ge, "Oza n wo ta zhin tnu-tnun wo to gyi nyagyin."
- ¹¹Ama yi wo lo ge, aza ho n fye mi ba wo bwato lo, to bai ye ba zhin tnu-tnun, bai wun esaya dna n na agnagba zhin nu.
- ¹²Dna n Dagayi Yesu Kristi eye, yi gna aza ye pya, yi gaba wyidna, baku zhi pi, ba zhin tnu-tnu ba bwa nyagyi.
- ¹³Ofye nfyeyi ce nyi, omi azaje, ato be fye n bemanayi zhin yin.
- ¹⁴Oza n wo to vi beda n yi cei kafi n a wasika ye nyin, fya kawo wye, fya pmiya nwo aba, n na bai n vinyikwo ba wowo.
- ¹⁵Fye to shi wo awye ngye efye nubaim, ama fye dafo n woi ngye ozado n wo ye a wuwo zokwo n galgadiyi.

¹⁶Dagayi bugba fu nya, wo ga fye owo bugbafu, kwo knidoi nu bwa fya, Dagayi wo kunsun n fyei vinya.

¹⁷Nsaiye omi gnabi nyi nmi ka n mi abwayi, shi mi shin zhin n mi wasika, kwa wu nge emi nu na ka, emi abwa nu kakpe n ya.

¹⁸Eyi Dagayi Yesu Kristi anabarka ba kpe n fye tukwo vinya. Amin.

Timatawus I

Timatawus I 1

¹Wasika ye kwo gmi n Bulus akun nu, Wa'azi zhin yi Yesu Kristi nya, n Shekwoyi eyi gniyi n Yesu Kristi eyi Dagayi-eyi awyetu.

²Kwoi lo Timatawus aba, Timatawus bei zhin ngye omi-bi nu dna n Dagayi. Fa Shekwoyi eyi Dada, N Yesu Kristi eyi Dagayi wa wu ho owo alheri n sun-sun gyei, wa ga ho bugba fu yakwo n ho bugba mi n ho nubo zhin yi.

Fye Na Abayi (Amalam) Katayi Bo

³⁻⁴ Shi mi bei da esa n mi bei lo Makidoniya nyi, la dna n Afisus ha zhin atna ha kma aza n ba wu nya akata nya nyi. Ku oba asita n ba abyetnuyi ce n ba nubo-zhinyi n ge a ba gni aza dna n na abe a desi n na malaikai bei sido n Shekwoyi abye n bato n na akpegnin bayin. Anubozhin n na abe mwi deye pya zhin ba la abena kala. Maimakon ba bma aza zhin ba gwo Shekwoyi shiri gaiciya ga nya.

⁵Enya n kwo womi pwa lo kwonu ge a Yesu-viyi n bo vinya ba ku nu n ye-yei n kwo gmi n na bugba gyi-gyi-yi oba bemwi n gyi-gyi-yi, oba gaiciya ga kwa bwa kala.

⁶Ama a malami deye ba ku bwi zokwo, bai gyi bahin esa, bai na abo, bai dabo n tna ce-ce.

⁷Ba ye a kpe baye nge Musa a wyidnaye wuyi, ama ba ta kpe ye lo kwo fyewyi enya n na awyidna ye wuyi n.

⁸Awyidna ye bmiya lo, yi ya zhin apma n bai shi Shekwoyi bemwi nyi.

⁹Ama ato zhin ba n yi bonu m, n Shekwoyi gni-gni yi n, ntu n na laifi da bonu n bata ye Shekwoyi nyi n, ba n na abugba kala kpenya yi, bai tu ekni, bai si nyasi, bai zhin gaba n ba dadayi, n ba ayai, aza wuyi.

¹⁰⁻¹¹ E, awyidna ye a zhin ba ntuge ba wu a alaifi da nu, a cegye da aza tna gyi-gyi-yi, n azai n ba wangye n na azanugbayi, abi wanyi, akata ceyi n na azayi n ba zhin obo n kwo gni apapa n Shekwoyi anabarkada Nabari manayi, n mi zhin wo tnutnu yi nyi.

¹²Mi zhin Kristi Yesu eyi Dagayi godiya n mwa, shi wa kni mi ma zhin wo tnu-tnu yi, woi gami kala ma zhin wo befyece.

¹³Koda-yake mi bei zhin mi-i kpe Kristi eye agye, mi-i zan ba fazan, mi-i zhin ba bo n mi ba mi. Ama Shekwoyi wa gyemi sun-sun, gama mito bei kpe be ye n mi zhin ntuge mito bei kpe Kristi ye n sayin.

¹⁴O, eyi Dagayi, zhin alheri danu gama wa wumi shimi ba kpema wo, ma nu n Kristi Yesu yeyeyi.

¹⁵Kwo zhin gaiciya nu, mi n cei pma lo aza vinya ba kpe ce ye, n ge Kristi Yesu wa be anyi mi wa gni alaifi da, omi yi nu zhin oba esu.

¹⁶Ama Shekwoyi wa gye mi sun-sun, n na bai Kristi Yesu wa zhin apma n miyi, wa wu shi wo zhin hakuri n na alaifi dayi, har n ba dnagmayi yi, n na abai, n ba ba kpe nge ba ba mi babwa wye-wyeyi nyalo-nyalo nya.

¹⁷Latu n mwamwayi ba zhin Shekwoyi nya nu nyalo-nyalo Amin. Wo nu zhin Esu esa vinya nya, n na ta gye won, woi ta shan fin, owonu zhin Shekwoyi gmanyi, n nunuyi n beyekpeyi. Amin.

¹⁸Nsaiye, Timatawus, omi-bi, omi gbe ga nyi n ho aba. Sun okun n kalai Dagayi okun, shi Dagayi gna n na annabi egbe nge ho ba zhin nyi.

¹⁹La gaiciya ga shi n kalai dna n Kristi ha anubo-zhin ze agyi-gyi-yi, ha zhin obo n kpe ge kwo zhin bemana nu. Gama azaho n la oba anubozhin zungna bai zhin obo n ba kpelo ge kwo to bmiya lon, kwo to zhin be wo-woyi nu shi ba ya ba gaiciya ga dna n Kristi, bai la Shekwoyi eye abo na lo nun.

²⁰Himinayus n Iskandari yi ba zhin misali nu n kwo bei lami ze tilas ma gaba n Shetan akun wa ta ba, har esa n ba ba tumwi to ba zhin Kristi eye vinyikwo dna m.

Timatawus I 2

Shi Yi Ba zhin Aduwa Nwu

¹Omi beda nyi n ho aba, zhin aduwa n mwa ntu azaje bo, gyi Shekwoyi wye wa gye ba sun-sun. Zhin Shekwoyi godiya ntu nya bo nwo ba zhin ba nyi.

²Zhin aduwa ntu asu bo, na za yi n ba zhin a iko da vinya tu n yi eshe, kwo n ba n na tnu-tnu yakwoi shi, n na abai n yi ba sase n lafiyai, n bugba-fuyi, ya se ase manayi yi zhin nubo n Dagayi bo.

³Deye bmiya lo, kwoi da eyi Dagayi bugba.

⁴Gama wo ye aza vinya ba pwo, ba bwa gaiciya ye awyega.

⁵Nge Shekwoyi gni n sepa gmanyi, aza vinya zhin n sepa gmanyi, n Kristi Yesu n wohin tukwo zanyikwoci n dna n ba tasin wa be n bai n na aba gmanyi.

⁶Wa gawo wye-wyeyi ntu n na aza bo vinya. Beda nyi n Shekwoyi wa tnu n cei dna n esa manayi n na lanyi.

⁷Ai la mi kni gaiciya nu n mi da-ma zhin tnu-tnuyi n nabari da yi, Shekwoyi nya, ma wu gaiciya ye n na abyedo aba, ma wuba Shekwoyi shiri gni-gni nya dna n gaiciya ga.

⁸Ntu cenu miye aza vinya ba zhin aduwa bai ku abwa a gyi-gyi-yi wu Shekwoyi n tna laifi, ntna minagyi, ntna nuwun.

⁹⁻¹⁰Anyikwoza ce baku ze lo nu, baku ce pi ba zhin bo kwo bmiya, bai pa aje cewo. A Yesu-viyi anyikwo a kpebaye ntu n ba bemana zhin bo, to n zokwo shiba zhin bahin aba, kwo tukwo knin, kwo anya shi-shi, kwo aje anakwoyin.

¹¹Anyikwoza, ba kna tñubua ba tumwi peceiye n tukwo gbayi.

¹²Mita ye anyikwoza ba wunya kwo ba ze a tukwoda n na azanugbai tukwon. Baku cepi n na aduwa nyakun n yezhi sa.

¹³Ntu knibei ya? Ntuge Shekwoyi bei zhin Adamu nu nabye wa kma Hawawu zhin.

¹⁴Shetan to bei dna Adamu nu kwocen, ama Hawawu nu, laifi kwa be.

¹⁵Ntu cenu Shekwoyi wa tnu anyikwoza n na azhinyi, esa n ba ma abi n cei, ama woba gniba wyewyeyi bai ya kpema wo, bai se ase pi-pi-pi, n bmiya bai ye n na azai.

Timatawus I 3

Hali Tukwoda Nya

¹Beda ye kwo zhin gaiciya nu nge ndei oza ye wa zhin pasto, wo bemwi manayi dnalo n bugba.

²Gama tilas Pasto wa zhin oza manayi n na ta dawo beda nukwoyi n, n nyikwoyi gmanyi. Woi zhin tnu-tnu n kalayi, woi zhin nubo, cewo n nu-nuyi n na abemana zhinyi. Wa bwa bugba bui a zhibeyi bai ya be wo puwa, wa zhin malami manayi dna n Shekwoyi beda.

³Wo to zhin eje sin yin, kwo anya wu yin, amma wola ze hankali da, mi bwayi, to wa ze oza nu n wo ye agyiwyen.

⁴Owo apuwa da baku ze aza manayi, hankali da n na abiyi n ba vi bo n pye, n tna gnunu-gnunu dayi.

⁵Gama ndei oza to mi n wo iyali bwashin, wo ba mi n wuna wa shi ikklisiya bwa vinya?

⁶Pasto tola ze Yesu viyi woi-woi n, kada wo zhin abekwo nge alawo kni n pye abekwo gyi n kakaya abye. (Shetan bei kaya lonu).

⁷A tna viyi ba zhin wo seida manayi, n na bai Shetan ta piwo a gam n na beda nukwoyi n wo tukwon, wa fa wo n tna gbebwa n wo ba wu owo akni zokwon.

⁸Abyeda, baku ze aza manayi n gye a pasto. Bato ku ze aje sin yi yakwon, n na gyiwyeye ye yin.

⁹Baku ze aza gaiciya da, bai vi Kristi n bugbai gmanyi, n wo zhin yi gaiciya ga tukwo nyi.

¹⁰Kafin a gaɓa abye, aku tnu-tnu gaɓa n ikklisiya amwiɓa gye n ɓa haliyi, n kpe zhinyi, n ɓa ɓa zhin bmiya, ami a kniɓa ɓa ze abyeda.

¹¹Oba anyikwo ɓaku ɓahin wan shi to ge a jesin yakwo yin, to ge a ɓo shanyi n, ama a gaiciya da dna na abo vinya n ɓa zhin.

¹²Byeda wa bwasun n nyikwoyi gmanyi, n na abi abo viyi ɓai dagma n na ajei.

¹³A byeda n ɓa zhin tnu-tnu n bmiya aza ɓa gaɓa mwa-mwa, njesun ɓa ɓa bwa bugba kala n Dagayi abye dna n gaiciya ga.

¹⁴Mika abo deye gaho, koda-yake mi n na awyetu yi lo miɓa be ho aba esa fyewyi.

¹⁵N na bai n mi to ɓe n pyen ha kpe a za pya ye n ho ɓa kni, ɓa zhin a tukwoda fi n ikklisiya, Shekwoyi wye-wyeyi da nya, n ɓa fi ɓai shi Shekwoyi gaiciya ɓai la kwo tu nyi.

¹⁶Kwo zhin gaiciya nu asese manayi dna n Shekwoyi, kwo to zhin oɓo fafayi nun, amma amsa lo n Kristi, n wa ze zanyikwoci wa ɓe anyi, a gye wo n gyi-gyi n tna laifi dna n wo Zafun, amalaika ɓa zhin wo bauta, a zhin wo wa'azi n anyi vinya, aza gwowo n na aba vinya laba, a gwo wo njesun wo lo eshemi.

Timatawus I 4

Wu-Wu Nukwoyi

¹A Zafun Gyi-gyi-yi gnayi pei-peɪ n ge dna n sa pmaknayi azaho n ɓafi n ikklisiya ɓa ɓei na Kristi abo, bai vi a malami n ɓa lo tnu-tnu n Shetan ɓeye yi.

²A malami ye ɓa ce akata n bugbai gmanyi, har oba Zafun nubo zhin nya to kwoi ceɓa ɓepan.

³ɓa ɓei ci ge kwo to bmiya a pa mulan, kwo to bmiya a gyi abun, koda-yake Shekwoyi wa ga anya gye vinya, n na Yesu viyi abanu ɓa gyi ɓa n bugba bui-bui ɓai zhin godiya.

⁴Gama anya vinya n Shekwoyi wa zhin ɓa bmiya, yi ɓa mi ya gyi ɓa n bugbai gmanyi yi zhin godiya.

⁵Ndei ya nya Shekwoyi wa tu kwo anabarka, gama aze kwo manayi n Shekwoyi ɓeda yi n aduwa yi nu.

⁶Nha zhin azaje bayani ye pya, ho nu ho tnu-tnu nu n gye Pasto, n wo n nuboi fu n gaiciya gai n nyawu gaiciya nya yi n ho vi nyi.

⁷To wun esaya hoi nabo tu n abo nba to tukwoi n, kwo abeda a tna cei, gyi esa n ho kalayi tu abo nu nba ba zhin ho ha mwa dna n Zafun.

⁸Nayi tnu-tnu n bmiya, amma Zafun tnu-tnu n du, kwoi bmaho zhin n nya n ho zhin. Ntu cenu tumwi ha ze Yesu viyi manayi, kwo ta bmaho zhin dna anyi ye nu gmanyin, ama har n doi n kwo ye be-belo.

⁹⁻¹⁰Gaiciya nu nyi kwo bmiya lo ozahozahoi wa gwo kwo. Yi zhin tnu-tnu n mwa, yi sin wahala n mwa, ntuge aza ba ga kwo gaiciya. Gama eyi awyetu lo n Shekwoyi wye-wyeyi da nu, n wa fi ntu na za bo vinya nyi tun бага aza nba la wo gni-gni gwo.

¹¹Wu anya ye vinya ha tabata aza tu ba mwi lo dei-dei.

¹²To ye zaho wa ci ho wyegba ntu ge hoye zhin binuyin. La ze ba bemwi-tu nya. Fa ba vi ho nya wu n ho ase-sei, la ze ba efye dna n yeye, nho gaiciya gayi, nho abonubazhin manayi.

¹³Sai mila be, ba Shekwoyi beda hoi zhin kwo bayani ga ikklisiya, zhin Shekwoyi beda wa'azi.

Zhin Apma Nho Nyaga Yi

¹⁴Zhin apma n ho kpezhinyi, n Shekwoyi wa gaho dna n wo anabi esa n na ikklisiya tukwo da bei kpe ho abwa n tukwonyi.

¹⁵Zhin apma n ho nyaga yi, la hohin ga n tnu-tnu ye, n na abai aza gye ho abye gyi.

¹⁶Zhin peceiye n na abei n ho zhin, n ho anubo zhin yi n jesun. La kpema n bo n kwo zhin gaiciya, Shekwoyi ba tuho anabarka, wa zhin apma n hoi ha bma azaje zhin.

Timatawus I 5

¹To dabo n minagyi yi n zayi n wo kwo hon, ama dabo n woi peceiye ngye oho dada, da bo n na za nawyi yi ngye oho azaje ye-ye yi.

²Zhin anyikwoza anyigbakwoyi bo ngye oho aya, abi anyikwoyi n gye oho amapui, hoi zhin nubomanayi n ba tukwo.

³Ikklisiya kwo shi anyikwoza bwa n oba aba n kufi, ndei bato n zayi lo n wo ba zhin.

⁴Ama ngye ba n na biyi lo kwo ayawyi, obanu ba bma ba zhin, gama kwo bmiya bemana zhin kwa ya na api nu. Hoi bma a zakwoyi awyekwoyi zhin. Bo nu n kwo da Shekwoyi n mwa.

⁵Ikklisiya kwo bma a nyigbai zhin n bato n nyahoi n, bai to na zayi lon, ndei ba kmi awye shi Shekwoyi bai zhin aduwa n esai vinya.

⁶Ama to ge bai gyi esa, bai zan laba, bai zhin agnagbain, kwo bai da aza bon, bai zan anyi gmada shin ga bahin, n lonu bai wu bahin wyewyeyi n.

⁷Deye kwo la ze ofye ikklisiya wyidna n na bai aviya ba kpe, ba zhin obo n kwo bmiya.

⁸Ama oza n wo to kula n wo azai esa n ba gyi san, tun baga aza n ba fi n oza puwan, woto n iko yi lo wa ci ge wo zhin Yesu viyi nun. Oza deye pya wo du tna viyi lo n nukwoyi.

⁹Nyigbaya n wo cei pma pma wa ze ikklisiya tnu-tnu-yi, wo to kasa n na aye shitnaya n, woi bwa mula pa bwa zun gmanyi.

¹⁰Azai dawo beda manayi ntu n wo atnu-tnu manayi bo n wo ku zhin, woku owo abi shi n bmiya? Woku bemana zhin a zhibei n na a Yesu viyi ajeyi? Wo ku bma a nyasan yi zhin n na bugba wunyi? Wo n cei pma n sai vinya wa zhin bemana?

¹¹Anyigbai n ba to kon, bato filo n bon, gama esa fyewyi sai ba pa mula n jesun ba na ba alkawali bo n ba zhin Kristi nyi.

¹²Ntuce nu baku zunkni ntuge bato shi ba alkawali kmisunyi bwan.

¹³Nko avun, kwoi wulo ba wo bwato, ba gyi esa bai laba bai vi apuwa, bai zhin agnagbai, bai fi aza abo abwa.

¹⁴Ntu cenu mi gye kwo bmiya lo anyigbaya a nawyi ba senu njesun, ba ma abi ba shi bahin puwa, n lonu ata da beda nukwoyi tu ba tukwon.

¹⁵Gama edna wo milo azaho n bami bala awye pmiya n ikklisiya, shetan n la ba dna kwoce.

¹⁶Ma paho n jesun nge, nyigbai azanu ba shiwo bwa, bato fa deye n ikklisiya akun. Ikklisiya ba wu agyiwy kpe anyigbai tukwo nu nba to na zahoyi lon, kwo aba yi n ba ba kpe awye shi ban.

Fye Shi A tnu-tnu Yi Bwa Nbmiya

¹⁷A Pasto nba zhin tnu-tnu cewo n bugbai gmanyi, a gbaba dei-dei, a ciba dei-dei, tun baga aza n ba nyi-wye da wa'azi zhin n nyawu yi.

¹⁸Gama Shekwoyi beda gna ge, "To pa jaki egbe esa n kwo gni kwoi dna awyi n cein, fakwo kwa gyi kwoi gwo tnu-tnu lo." Nna abado njesun kwa ci ge, "Tnu-tnu yi gwo lo n wo ladayi."

¹⁹To wo gnunu-gnunu tu Pasto tukwon, sai dei n aseida da lo ngun aba kwo ngun ata ba zun wo kni.

²⁰Ndei wo ku laifi zhin, a gnakni wo n eklisiya abye vinya, n na abai n zaho ta viwo zokwon.

²¹Mi ga ho wyidna ye n Shekwoyi abye n Dagayi Yesu Kristi yi, n wo a amalaika a Gyi-gyi-yi, fya zhin lonu kwo pasto yi zhin ho nungundo nu kwo to woi zhin ho nungundon. Fye zhin aza ɓo gmanyi.

²²Awyeto ya fye n Pasto kniyin, sakun fya ze owo alaifi pita, kwa ze ngye fya pui ɓa nya nu.

²³(Deye to ci ge ho to ye zhin eje to won nun, kwo bmiya lo ha towo nsahoi gama kwo zhin, shigbe nu n ho aba, shi nyasan ta faho nyin.)

²⁴Pa ge aza ho, har n na a Pastoyi ɓa se-ase fi n laifi azai kpe. Nna abeye pya ho ɓa mi ha zhin ɓoho. Ama n na a ɓoho, nyipyeyi wada nya nu bei kpe gaiciya anya ya.

²⁵Elonu zaho-zahoi kpe lo ngye shi a pasto ho zhin ɓemana, ama ata kpe oba ɓemanayi ɓo n saho yim, sai esa la mwa.

Timatawus I 6

Tnu-tnu-n Agyiwye Yi

¹Afyenu a Yesu viyi ɓa zhin oba dagayi tnu-tnu ɓai gaba mwamwa, fye to fa a ci ge a Kristi aza zhin a bwatoyi nun, fyeto ye a ma Shekwoyi eye san kwo owo beda ntu n deye ɓo m.

²Ndei oba dagayi zhin Yesu viyi nu, kwo to wunu ge ɓa ɓa fa tnu-tnu zhin ɓon, kwo bmiya ɓa ɓahin yi nu ntuge zado dna gaiciya ga ɓa bwa bmazhin dna n ɓa tnu-tnu. Timatawus abeye nɓa zhin gaiciya nyi ha gna aza, ɓa vi ɓa.

³Azaho ɓa na abeye ɓo, ama ɓanu zhin wuwu hin-hin Dagayi Yesu Kristi nya. Oba nu zhin tushi asese manayi nya.

⁴Oza n wa da bedo gvo wo zhin abekwo nu, n za gbeloi, wo la pmiya n Kristi beda, woi ze kwo abona n kwo ɓa zo fi n shewo, n minagyi yi n kwo ɓe n na agyekpei laifi zanshi n na abemwi nukwoyi.

⁵Abenaiye n ɓa bugbai nunu yi n benukwoyi, ɓa ta kpe gaiciya da m, n ɓa aba Nabari manayi zhin agyiwye bwa zokwo nu fye la bui ɓa si.

⁶Ho cei pma ha zhin nyabwayi hin-hin? Ho la ze nyabwayi n gye ho zhin ɓemana lo hoi dagma.

⁷Nshiinsun, yi to bei ɓe n na agyiwyei shin, esa n yi bei ɓe anyi n cei nyin. Yin to bei gmi n nyahoi shin esa n yi ɓa fin.

- ⁸Ntu ce yiku eyi abugba zhin pi kwo to yi n na agyiwyei n, ndei yi n nyagyi yilo n na jekpeyi.
- ⁹Ama aza nba ye ba bwa nya, sa fyewyi sai ba ya benukwoyi zhin ntuge ba bwa agiwye, enya nkwo tuba eci, kwaze ba abugba nukwoyi zhin yi, kwa wu ba har ana pi.
- ¹⁰Gama agyiwye ye nu zhin oza zhin a benukwoyi aje. Azaho la avun pmi wu Shekwoyi ntu n na gyiwye bo, ntuce baku be bahin n bugba wun yi n mwa.
- ¹¹O, Timatawus, ho zhin Shekwoyi zanu, bu abo nukwoyi ye si vinya, ha zhin obo n kwo wu cewo n bmiya, hoi tumwi ha kpema wu, hoi ye azaje, ha zhin hankuri n mi bwai.
- ¹²Shunkun ga Shekwoyi, la nyima wye-wyeyi nyalo-nyalo nya n Shekwoyi la gaho nyi. N ho ku kwo seida zhin n na za abye n mwa begye nyi.
- ¹³Mi ga ho wyidna n Shekwoyi abye, n wo ga aza wye-wyeyi vinya nyi. N Yesu Kristi abye n wo bei ga seida manayi n tna dna n Bunti Bilatus abye nyi
- ¹⁴nge ho nu abo vinya n wa gnaho ge ho zhin, n na abai to a bwa laifi n ho aban, har eyi Dagayi Yesu Kristi wa jeze be.
- ¹⁵Gama esa fyewyi Shekwoyi anabarkada n ikoda yi gmanyi, woba wu Kristi n'she bmana asu aje Esu Dagayi a dagayi aje nya.
- ¹⁶Owo nu gmanyi n wo ta shan fin, n wo dna n buzangna yakwo n zanyi-kwoci ta mi wa wu viyi n woyi m. Zanyikwoci to shin wo gyen, woi ta shan wo gyen. Nwo aba, mwa-mwa n iko nyalo-nyalo amin.
- ¹⁷Gna aza n ba n nyabwai nyi nge bato mwa bahin tukwon, to ba kpema oba nyabwan. N kwo ba zo esa fyewyi nyin, ama ba gma bai kpema Shekwoyi wye-wyeyi da, n wo gayi anya vinya n yi n cei pma ntu n yi agmada bo nyi.
- ¹⁸Gna ba ba zhin apma n ba agyiwyei dna n bemana zhin. Ba ku ze anyabwai dna n bemana zhin, bai ga aza n ba gyisan lo n bugba bui-buyi, n shiri yi zhin ba gni n na azai enya n Shekwoyi wa ga ba.
- ¹⁹Nba zhin nlai ba so nya bwa hin-hin shi nu nshemi, nyaso shi manayi nu nyalo-nyalo nya. Ba se ase manayi n kwo kunce n na a Yesu viyi n na anyi deye.
- ²⁰O, Timatawus, to gba a kala na beye zhin yi, n Shekwoyi wa fi ho n na akun nyin. To vi abenai, a cije nya n ba gma n ba beyekpe yi nyin. Bai wu nu nge ba to n beyekpe yi lon.
- ²¹Aza deye pya n ku gyi nya manayi san n ba asese, bata kpe Shekwoyi yen. Shekwoyi sun-sun gye kwo kunsun n hoi.

Timatawus II

Timatawus II 1

¹Wasika ye kwo gmi n Bulus akun nu, Yesu Kristi wa'azi zhin yi, n Shekwoyi wa tnu n woi wa gna azanugbai n na anyikwozai n na aba vinya wye-wyeyi nyalo-nyalo nya beda, nwa zhin kwo alkawali dna n gaiciya ga n Yesu Kristi nyi.

²Kwoi lo Timatawus aba omi bi ye-ye yi. Shekwoyi Dada, Kristi Yesu eyi Dagayi wo gaho owo alheri, sun-sungye n bugba fuyi.

Bulus ye ye n Timatawus aba

³Mi zhin Shekwoyi godiya ntu ho 6o, Timatawus nsukwoyi mi gyi emi Shekwoyi wye, nge wo tu ho anabarka n mwa, wonu zhin emi adada Shekwoyi, omi Shekwoyi nu n woi ce. Omi bomwi n mi asese vinya okwonu ma zhin 6o n kwo dawo.

⁴Awo mi pwa ma gye ho njesun, abei dami n mwa, gama mi paho awyenyi be lo, esa n yi bei fa aje nyi.

⁵Mi kpe lo shi ho kpema Dagayi n sun, shi oho ya Afniki n oho nyikwo-wyi yi Lois bei zhin, mi tabata lo ho ye kpemawo lo, shi ho bei kpema wo nsapai.

⁶Miye ma paho ha hohin yi, dna n ho wyepa n na akalai n ho n cei lo, tunyi ewyi n mi bei tuho bwa n tukwo, ma tuho anabarka nyi.

⁷Gama Zafun Gyi-gyi-yi, Shekwoyi cauta, to ncei pma lo ha wo aza dnan, ama ha ce, ha bwa kala, ha ye 6a, ha dagma n ho asese n bai.

⁸Ndei ha zhin apma n ikoyei n kwo dna n ho nyi, hota wo aza dnan, n Dagayi beda gnayi n, kwo bai kpe ge mi zhin ho nugundo nu, koda-yake mi dnalo n kurkuku ntu n Kristi eye 6o. Ho 6a gni n shiri yi zhin-ha sin wahala n miyi ntu n Dagayi-6o, gama wo6a gaho kala dna n na azhingye.

⁹Owonu na gni yi, wa kni yi, n tu n wo tnu-tnu gyi-gyi-yi 6o, to ge yi kunce lo nun, ama ntuge owo shiri nu tunyi kafin asa anyi, n na bai wa wuyi owo alheri n ye-yeyi dna n Kristi.

¹⁰Nsaiye wo ku wuyi pei-pe, sanu eyi gniyi Yesu Kristi wa 6e n cei, n wa bma efi iko ya wa wuyi wye-wyeyi nyalo-nyalo nya zokwo, dna n gaiciya ga nyi.

¹¹Shekwoyi la mi kni ma zhin wo wa'azi zhin yi, ma zhin abyedo wa'azi mi-i wu 6a.

¹²Cenu zhin mi-i sin wahala dna n ya n kurkuku vinyikwoi ta wo mi lo n tu cen. Gama mi kpe ezaye lo n mi kpema wo, mi-i kpe lo nge wo 6a mi wa gu enya n mi la gawo har ewyi n wo 6a jeze be n cei.

¹³La gaiciya zokwo shi cewo, n mi bei wu ho nyi, tun baga gaiciya ga n ye-yei n Kristi bei ga ho nyi.

¹⁴Mi ye ha gu kpezhin, cauta dnagmayi n Shekwoyi wa gaho nyi, n ho bei gwo n Zafun Gyi-gyi-yi aba n wo dna n ho mi nyi.

¹⁵Shi ho kpelo, a Yesu-viyi vinya n ba kun n Asiya, bala busi ba ku mi ya, har Fimallus n Harmojanis yi.

¹⁶Dagayi wo tu Onisifurus anabarka nwo puwa yi vinya, gama wo zhin mi ziyara woi gami bugba kala. Owo ziyara gami kala n gye ese manayi, to wa wo vinyikwo ge mi dna n kurkuku n.

¹⁷Behin-hin esa n wo bei be Roma wa zan mi shin la ba, wa kpe aba n mi dna, wa gye mi wye.

¹⁸Dagayi wo tuwo anabarka ewyi n Kristi bei jeze be n cei. Ho gna kpelo shi wo bei bmami zhin n Afisus.

Timatawus II 2

La Gni-agni N Yesu Akala Yi

¹0, Timatawus emi nugun, la dna kala dna n kala n Kristi Yesu wa gaho nyi.

²Gama dole ha wu aza afo n hohin bedo na azajei bei wo mi-i da. Wu aza agaiciya da nba bami ba ka azaje wu.

³La oho robo dna n wahala sin ngye soja manayi Yesu Kristi nya. Shi mi zhin nyi.

⁴Ngye Krist soja to da hohin dna n anyi gmadan, gama ho ta mi ha zhin ofo n kwo da oza n wa kni ho nyin.

⁵Vi Dagayi awyidna owo tnu-tnu zhin nya, shi asibui zhin agbetu sibui nya kwo bai bwa lada kwo to bai bwa ladan nyin.

⁶Zhin tnu-tnu n kalayi n gye fwaiza n wo bwa lada n mwa woi ya nufwa n mwa nyi.

⁷Zhin nubo n na amisali yei n gun ata n mi gaho nyi, Dagayi wo wu ho shi ba n na apmai lo n ho aba.

⁸To ze gaiciya amwi n ge Yesu Kristi bei zhin zanyikwocinun, a mawo dna n Esu Dawuda efyen, woi zhin Shekwoyi nu, shi owo kala la n efi kwo wu yi.

⁹Ntuge ma zhin wa'azi gaiciya yakwo ye nya nu, cenu zhin mi-i dna gni n wahala n ya, ai lami dna n kurkuku ngye benukwoyi zhin yi. Ama ato pa Shekwoyi bedan, kwo ai la mi pan.

¹⁰Mi shiri lo ma sin wahala, ndei okwo nu ba be n gni-gni yi, n mwamwa nyalo-nyalo nya yi, dna n Kristi Yesu ga aza n Shekwoyi n la ba kni nyi.

¹¹Gaiciya deye zhin kwa fu mi bugba, nge Esa n ya sin wahala ya fi ntu n Kristi bo, kwo wunu ge yi ba ya asese n woi n eshemi.

¹²N ya z'hin nubo nge owo tnu-tnu n yi zhin nyi kwo dna belo, pa ge n wyi-hoi yi bei se ase n woi ya gyi ebe n woi. Ama n ya fa wahala sin bo ya pmi avun wu Kristi, wo bei pmi avun wu yi ce.

¹³Kwo esa n yi gaiciya ga gba kala, wo zhin gaiciya da nu, woi bmayi zhin gama wo ta nayi abon, yi zhin wo aga nu, Wo ba nuwo alkawali.

Bui Abena Gboloyi Si

¹⁴Pa oho aza a gaiciya ye bo, ha gaba wyidna dna n Kristi eye ba to na abo tu n abo nba to na apma yin, abenaye pya to n na apmayin, bai dna abo wyegma har bai be n wahalai.

¹⁵Zhin tnu-tnu n kalai, n na bai Shekwoyi ba cihoge, "Sanu n tnu-tnu yi." Ha ze tnu-gnu zhin yi manayi n vinyikwo ta wo won, esa n. Shekwoyi a dna wo a tnu-tnu wye n cei. Kpe nya n wo beda da kwoi wu njesun.

¹⁶La bui abeda kasa si n ba zhin aza bai gyi minagyi n na ajei nyi.

¹⁷Aba da abo n ba ba san za har nsai mwa. Himinayus n Filitus yi zhin aza nu n ba ye n na beye pya yi.

¹⁸Ba ku gaiciya zokwo fa, bai zhin wa'azi akata nya nge kala ku n efi la diya, bai la azaho gaiciya ga shan-shan n ba gwo ba beda nyi.

¹⁹Ama Shekwoyi gaiciya gni agni lo ngye apma, nyaho ta shan kwo ashan. Fandashen kuta nyanu, n na abedaye yi ka kpe n kwo, "Dagayi kpe aza yi lo n ba zhin owo anya." Njesun, "Oza n wo yi wohin nge Yesu viyi wo to zhin abo nukwoyi zhin."

²⁰Nna anyabwayi puwa akwanu zinariya nya nyi n azurfa nya yi, adoho n shinwayi nzun yi, anakwoi a zhin azhibei dnagmai bo nu cei, a tna nakwoi azhin apma n cei n gace kwo a ya anya nukwoyi fi.

²¹Ndei ha bui laifi si, hoba ze ngye kwanu n na zhin a zinariya manayi, kwanu manayi du-duyi vinya n puwa, n nabai Kristi n wohin wo ba zhin apma n hoi n wo beye manayi bo.

²²Bui enya si nkwo ba be ho n na nubo zhin nukwoyi, n kwo be samari aba, ama la nyima enya vinya n kwo zhin ho ha wo bemana zhin pwa. Bwa gaiciya ga n ye-yei, ha gyi nugundo n na azayi n ba ye Dagayi, n na bugba manayi.

²³Njesun ma ci ge to lo dna n na abena n ba lo n azayi n minagyi n.

²⁴Shekwoyi aza ta ku ze anya wuyin, tilas baku ze amishiya, hakuri da, bai wu aza nba ku bwi aba.

²⁵Gba hohin tukwo esa n ho wu aza, n gaiciya nku ba gmi aje. Gama n ha dabo n bai peceiye n na atnazhin yi, kpekni, dna n Shekwoyi bmazhin ba ba pmi be ba vi gaiciya.

²⁶Nsayi ba kpe genyi, ba pwo shetan agam, fyenu laifi nya n wo zhin apma n cei woi wan ba nyi, nsayi ba ya Shekwoyi beye zhin.

Timatawus II 3

Wahala Nabye

¹Kwo bmiya lo ha kpe deye n jesun, Timatawus nge dna n na anyipyei kmaknayi, Yesu vi bei la dna bo.

²Gama aza bei ye bahin tukwo n ba agyiwyeyi, ba bei zhin abokwo bai gma, bai ci Shekwoyi wyegba, to bai wo oba zakwoyi bedan, to bai zhin godiyan, abi a nukwoyi.

³Ba bei kwo atukwo agnana to bai wo aza bedan, ba bei ze aza kata, bai la wahala kala, bai zhin benukwoyi doho-dohoi n tna nubo zhin. Ba to bei wo bon, n tna sun-sun gye, bai kpe aza agye n ba zhin bemanan yi.

⁴Ba bei kun oba anugundo, a tukwo gnana-kwoyi n nu-nuyi n na abokwoyi, bai gna agmada ye ndu Shekwoyi mwa-mwa ga.

⁵Ba bei lo aduwa nyakun, ama bato bei ga nya ho gaiciya n ba wo n bon. To ye ba dna ho kwocen.

⁶Azayi pya nu lo aza puwa bai gyi nugundo n na anyikwo tna ceceyi, alaifi yi nu bugba, ba wu anyikwozaye oba zokwo woi-woyi.

⁷Anyikwozaye pya vi a malami a woi-woi, ama bata ye ba kpe gaiciya ye m.

⁸A malami ye pya gni apa-pa n gaiciya yi, shi Yinisu n Yambrisu yi bei gni apa-pa n Musa yi nyi. Ba n na abugbayi tu cegye, n pmi-pmi yi ya n Yesu viyi gaiciya.

⁹Ama ba ta si n kpa yin, nwyihoi oba kwoce dna bei kpe anya ya aza gye vinya, shi Yinusi n Yanbrisu alaifi bei kpe anya ya nyi.

¹⁰Ama ho kpelo shi ho kamiwye mito zhin aza yi pya nu m. Ho kpe nya yelo n mi ga gaiciya, n jesun shi mi sase n wu, n nyai n mi ye, Ho kpe mi gaiciya ga ye lo dna n Kristi, shi mi sin wahala n sun.

¹¹Ho kpelo shi mi sin wahala n sun n tuge mi zhin nabari manayi wa'azi. Ho kpe be ye lo n na bei zhin mi esa n mi bei lo Antakiya nyi, n Ikoniya yi, n Listra yi, ama Dagayi bei lami gni.

¹²E, aza n baye ba zhin obo n kwo da Kristi Yesu, ba ba sin wahala n aza kun n ba wun wo nu nyi.

¹³Behinhin, a malami akatayi, n na aza nukwoyi ba ba gyi abye abye n benukwoyi, bai dna aza kwoce n mwa, n bahin ce shetan n la ba dnakwoce.

¹⁴Ama gyi abye n gaiciya gai, dna n na anya n ria wu ho, Ho kpe lo bazhin gaiciya nu, gama ho kpe lo ho ba mi ha kpema yi n ya wu ho nyi.

¹⁵Ho kpelo shi, esa n ho bei zhin binayi nyi, abo ki Shekwoyi beda wu ho, okwonu la ho ce ha gwo Shekwoyi gni-gni dna n gaiciya ga n Kristi Yesu.

¹⁶Rubutu ka vinya littafi gyi-gyi-yi nya Shekwoyi nu bei da nwo'gbei, kwo n na apma yi n yi aba ntu n nya wu bo, n kwo zhin gaiciya, ya kpe enya ye n kwo to bmiyan, dna n yi asese, kwo gayi kala ya zhin obo n kwo bmiya.

¹⁷Shekwoyi zokwo nu n wa zhin yi shiri zokwo doho-dohoi, ya zhin aza vinya bemana.

Timatawus II 4

Bulus Shaula Zafun Nya

¹A Ntuce nu mi zhin ho gargadi n Shekwoyi abye, n Kristi Yesu yi, n wo bei da aza wye-wye yi n na azafiyi owa n wyihoi nyin. Esa n wo bei be nwo begyi-yi.

²Zhin Shewoyi beda wa'azi n esayi vinya, Esa n ha bwa bednu n sayi vinya. Zhin eho aza aba, esa n bednu nyi kwo n tna bednu, ha gnakni ba esa vinya n kwo kunce, ga ba kala ba zhin bemana n esai vinya, nu ba n Shekwoyi bedayi.

³Ntu ge esa belo n aza to bei shan gaiciya t nubua knan, ama ba bei zan laba bai zan a malami zanshi n ba ba gna ba obo n baye ba wo.

⁴Bato bei kna beda t nubua n Shekwoyi beda dan, ama ba bei vi o ba anubo zhin zokwo bwi-bwi nya.

⁵La mi gni to wo wahala dna n ho ba sin ntu n Dagayi bo m. Gni aza je be n cei n Kristi aba. To fya beho n tna zhinyi n kwo kunce ha zhin.

⁶Mi da beye gama mi to gnilo n mi ba bmaho zhin, Emisa la gasi, Esa fyewyi mi ba wan zokwo malo'she.

⁷Miku okun sun n mwa ntu n emi Dagayi bo, Dna n kwo vinya miku befyece zhin. Nsaiye esa lasi n mi ba fa kun sunbo ma sun.

⁸N Eshe mi rawani pmi milo n Dagayi Alkali gaiciya da bei gami ewyi n wo bei jezebe n cei. To ge emi n mi gmanyin ama har na zai be n ba sase n wyetuyi ge ba pmi owo jezebe lo n Jesun.

Zokwodna kmaknayi

⁹Mi gyi ho wye be npye.

¹⁰Gama Dimas nla miya, wa wo anyi nya shakpe wa lo Tassalunika, Kiristis wo du Galatiya, Titus wa lo Dalmatiya.

¹¹Luka nu bwa ce gnilo n miyi, Gnibe n Markus yi esa n ha be n cei gama mi n wo apmayi lo.

¹²Mila Tikiku tnu n Afisus.

¹³Esa n ha be, to bo ze amwi ha bemi n jekpeyi n mi bei ya zhi n Taruwasa nyi m N mi bei yazhi n Karbus emi zado aba nyi, njesun n mi a litafiyi, tun-baga a takarda opa nya.

¹⁴Iskandari Epyada sinknabyeyi nya waku mi wu anyi n mwa. Dagayi ba tawo.

¹⁵Ama zhin peceiye n woi, gama wo bei la gni apa-pa n nya yi n yi bei da.

¹⁶Esa kmisunyi n na abei be n mi na alkali abye ada mi owa ezaho-zahoi to bei gni n, aza vinya bola busi, mi n na awyetu yilo ata ba laifi ye n ba tukwon.

¹⁷Ama Dagayi bei gnisun n miyi wa gna mi esa ma zhin wa'azi tna edna anyi vinya ba wo. Wa gni mi n na agaba 'gbe.

¹⁸E, Dagayi ba gni mi n na abo nukwoyi vinya, wa lo mi dna n wo ebemi eshe nya. Mwa-mwa kwo kunsun n Shekwoyi nyalo-nyalo. Amin.

¹⁹Bi, Biskila gna n Aikla yi n na aai n ba fi n Onisifurus puwa nyi.

²⁰Arastus dnalo n Korintus, mafa Turufinus dna n Militus nyasayi sanwo.

²¹Zhin atna ha be n ya kafin vinyikwo, Afbulus saho ami lo bedo n Budis yi n Linus yi n Kalafidiya yi n na azayi vinya.

²²Dagayi Yesu Kristi wo kunsun nfye zafun yi.

Titus

Titus 1

- ¹Wasika ye kwo gmi n Bulus akun nu, Shekwoyi fyenu, Yesu Kristi tnu-tnuyi.
- ²A tnu mi ma be n gaiciya gai n aza ba nu n Shekwoyi la ba kni nyi, ma wu ba Shekwoyi gaiciya gaiciya n kwo shan aza wyewyeyi do nyi. N na bai ba bwa wyewyeyi nyalo-nyalo nya n Shekwoyi bei zhin ba alkawali tunyi kafin a sa anyi, woi ta ce a katan.
- ³Dna n owo esa manayi, wa wu yi Nabari manayi, wa gami izini ma gna aza vinya. Dna n Shekwoyi eyi gniyi egbega, wo la ye ma zhin wo tnu-tnu ye ga wo.
- ⁴Kwoi lo Titus aba n wo zhin emi obi dna n Dagayi zokwo nyi. Shekwoyi Dada n Kristi Yesu eyi gniyi, wo gaho anabarka n bugba fuyi.

A tukwoda Kni

- ⁵Ma fa ho tu n muse Karita n na abai ha zhin bo n ho ba mi ha bma a ikklisiya zhin nu n ba nyi nbo. Mi ye ha kni a pasto n ezhin doho-dohoyi ha vi ngye shi mi bei wu ho nyi.
- ⁶Aza n ha kni a kpe ba ye ntu n ba asese manayi bo, nyikwoza gmanyi da oba bi bai ye Dagayi, to ge a tukwo gnana-kwoyin, nbata vi oba azakwoyi bedan.
- ⁷Tilas pasto wa ze oza nu n nata ciwo abenya n wo asesen, gama ba zhin Shekwoyi atnu-tnu zhinyi nu, bato zhin abekwo zhin yi, kwo a tna mi wanshi yi, to ba ze ajesin yin, agusun yin, kwo agyiwyē shakpe; woyin.
- ⁸Ba ze azhibeyi goyi n ba puwa, ba ye enya n kwo bmiya ba ze aza awyega da, bai zhin bo n kunce, bai zhin abo manayi nubo to ge a tukwo-gnana kwoyin.
- ⁹Tile oba gaiciya ga kwa migni n kala yi, n na bai n ba ba mi ba wu azaje, ba wu aza n ba ta gwo oba bedan. Ba wu ba aba n ba bwi aba.
- ¹⁰Gama aza lo n mwa begye n ba ta vi bon, Deye kwo zhin gaiciya nu tun ba ga na aza aba n ba gna nge tilas a shi a Yahudiyi awyidna bwa nyin. Ama deye zhin beda gbeloyi nu, kwo bua za wye, to ba gye gaiciyan.
- ¹¹Tile a hana n kwoi, ala aza pmi awye ya n Shekwoyi alheri, amalami ye pya bwa agyiwyē nu ye.
- ¹²Zaho n ba mi, anabi n wo gmi n Karita wa ci ge, “A Karitayi zhin akataceyi nu, ba wu ngye anyafanya abwatoyi nu, n ba asese bwasun ba fu bahin nubo nu.”
- ¹³Deye zhin gacyanu, ntucenu dabo n na Yesu-viyi n kala yi, shi kwo kunce kwa mi ba gaiciya gagni.

¹⁴Ba fa tñubua kna ɓo n na a Yahudiyi esi n na aza beyei n ɓa la avun pmin wu gaiciya nyi.

¹⁵Oza n wo bugba gyi-gyi-yi wo gye anya vinya n gyi-gyi yi, ama oza n wo bugba tucegye n tna gaiciya, wo gye nyaho-nyahoi n tna bmiya yi nu, gama owo bugba cegye nya n bugba kala kpei nu zhin woi wo lonu, woi gye lo nu njesun.

¹⁶Azayi pya ci ge ɓa kpe Shekwoyi ye, ama nha gye nya n ɓa zhin, ha ku kpe ge bata kpe wo ye lon. Ba wun-wun yi ya, to ɓai vi ɓom, n tna a pma dna n ɓe manayi zhin.

Titus 2

Shaula N Bayi Aba

¹Ama ohohin, daɓo n kwo kunce n na asese manayi n ɓa kunce n Yesu-viyi gaiciya nyai.

²Wu azakwoi ɓa ku ɓahin wanshi, ɓai zhin ɓe manayi, ɓai kpe gaiciya ye ɓai zhin beho-behoyi n ye-yei n bugba bwayi.

³Wu anyigbakwowoyi ɓa ku cepi ɓai ga mwa-mwa dna n na ɓo vinya n ɓa zhin. Bato zan laba ɓai zhin agnagba n na aza tukwon, to ɓa ze ajesinyi n mwan, ama ɓaku ze aɓo manayi wuyi.

⁴Anyigbakwoyi ye ɓa wu anyikwo aza-zayi ɓa sase pi-pi ɓaye n ɓa ɓayi, ɓedo n ɓa ɓiyi.

⁵Ba ku ze aza manayi, abugba manayi da, ɓai zefi n ɓa puwa, aza nunuyi, ɓai vi oba aɓa beda n na abai to a sa a Yesu viyi eye nukwoyi, n aza aba n ɓa kpe ɓa ye m.

⁶Elonu, gna abi-a-nuyi ɓa zhin peceiye ɓai wan ɓahin shi naɓo vinya.

⁷N ya tilas ohohin ha ze efye manayi dna n na aɓo vinya. Fa nyaho-nyahoyi n ho ɓa zhin kwa wu n ge ho ye gaiciya lo n nwyeyi kana.

⁸Oho azata la ze cewo n tukwo yi ku, n na abai oza n wo ye wa na aɓo n hoi vinyikwo a wowo, ntuge aɓenya-ci ɓa to lo dna n obo n ha dan.

⁹Gna afyenu ɓa vi oba adagayi ɓo, ɓa zhin atna ɓa zhin atna ɓa zhin obo n kwo da ɓa. To ɓa da beda kasam.

¹⁰Kwo ɓa wyi evim, ama ɓa wu ge ɓa zhin azanu aɓa mi a kpema, Nlonu ɓaba zhin aza ɓaye ɓa ga eyi Gniyi n yi Shekwoyi gaiciya.

¹¹Gama cauta gni-gni nya ala ga aza vinya.

¹²Bedo n na awyegayeyi yekpe n ge Shekwoyi ye ya pmi avun wu aɓo nukwoyi n na aɓo awyeda nukwoi, ya ze aza manayi, ya wo Shekwoyi dna fyegy-i-fyegy-i.

¹³Yi shi esayi awye n yi pmi nyi, n na abei gyewo mwa-mwa wye n cei nyi, mwa-mwa eyi Shekwoyi dnagmayi n eyi Gniyi Yesu Kristi yi.

¹⁴Wo bei fi Zafun Gyi-gyi-yi nya n yi abugbami dna n Shekwoyi owa ntu yi alaifi bo nu, n na bai wa gni yi to ya je kayafi n laifi ci-ci, wa ze yi owo aza, n na abugba manayi n pwa wo yi, ya zhin azaje bemana.

¹⁵Tile ha wu abedye, ha ga oho aza kala ba zhin ba, hoi zhin ba fi n zokwo n sai nkwo kunce n gye oza n wo n ikoyi lo wa zhin lonu. To ye ozaho wa zhin nubo nge obo n ho da nyi kwo to kunce lon.

Titus 3

Bepa N Pmagna Yi

¹Pa oho aza ba vi abegyiyi bo n na atukwodayi vinya, ba zhin n shiri yi zhin ba zhin abo manayi.

²Ba to da beda nukwoyi n zaho-zahoi tukwon, kwo ba wu anyan ama ba zhin peceiye bai zhin bemana n aza ba vinya.

³N sapa yi bei zhin aza mama n tna cei, yi kwo tukwo agnana. Aza bei dna yi woice ya ku ze afyenu abewyeda nya n shakpe nukwoyi nya yi, eyi awye-wyeyi bei wun azanu bahin bai wunyi nu.

⁴Ama shi esa be la si n Shekwoyi eyi Gniyi bei wuyi owo alheri n ye-yei.

⁵Wa gniyi, tu ntuge n eyi bemana zhin bo nu wa gni yin, ama ntu n wo alheri bo n sun-sungye yi, wa zhan yi alaifiya, wa gayi agmada Zafun Gyi-gyi-yi nya n yi abugbami.

⁶Nwa zeya kpe yi ntu nya bo n Yesu Kristi wa zhin nyi.

⁷Nnabai n wo ba yi yi aza manayi n wo abye ntu n wo alheri bo, nsaiye yi n roboi lo dna n wo anyabwa wye-wyeyi nya n wa gayi nyi, n yi zhi yi pmi ya gwo nyi.

⁸⁻⁹ A nyaye n ma gnaho nyi ba zhin gaiciya nu, la nyimaaba n na abai a Yesu viyi ba zhin peceiye, ba zhin bemana n sai vinya, gama kwo to bmiya lonu gmanyin, ama kwo zhin kwa be n na ampanyi.

¹⁰N oza ho belo n ajegnayi nfyemi, fya gnakniwo a bwa aba, Ndeye avun fyeto shan efye anuwan gye n woi n.

¹¹Fye kpe ge oza deye wo la pmiya n gaiciya, wo zhin laifinu, woi kpe.

¹²Mi zhin shiri lo ma tnu n Artimas yi kwo Tikikus, n ho aba. Esanu n Zaknanyi n ba mi wabe ha zhin atna ba be dami n Nikobolos n pye, gama mi ku shaula zhin ma Izhin vinyikwo dna bo.

¹³Zhin nya n ho ɓa mi ha bma Zinas zhin, Owa-yekpei-n Apolos yi n ɓa zan, to ɓa gyi nyaho san n zokwon.

¹⁴Gama tilas eyi aza ɓa tumwi ɓa bma aza zhin n ɓa kunce a bma ɓa zhin, nɓa wye-wyeyi ɓa zhin ampanyi.

¹⁵Aza vinya n ya tnu fyelo n ɓa gnabiyi. Bi a Yesu viyi gna gami n ɓo Shekwoyi anabarka ɓa kunsun n fyeyi.

Filimon

Filimon 1

¹Wasika ye gmi n mi aba nu Nabari manayi Yesu Kristi nya ɓo, ɓedo Omi zadoyi, Timatawus.

²Kwoi lo Filimon aba, eyi tnu-tnu kun-zhinyi, oza ye-yeyi, n ikklisiya yi n kwo zhin kwa yezhi n eho puwa nyi, n Abfiya eyi mapui ɓedo n Arkibbusa yi n wo zhin Yesu soja n gye mi nyi.

³Fa Shekwoyi eyi Dada n Dagayi Yesu Kristi yi wa ga fye owo anabarka n bugba-fuyi.

Bulus Wyegy

⁴Mi zhin Shekwoyi godiya cici esa n ma zhin aduwa ntu ho ɓo, Filimon, omi 'za ye-yeyi.

⁵Gama mi wo oho ye-ye n kpemayi ɓo lo n Dagayi Yesu n wo aza yi.

⁶Mi zhin aduwa mi gna aza oho gaiciya ga ɓo, kwo ɓa shi ɓa wye-wyeyi ce, shi ɓa gye anya a manayi n ho, n ɓa kun n Kristi Yesu aba nyi.

⁷Omi n mihin mila gyiba bwa, bugba buyi nya n emi fuyi n ho ye-yeɓo, emi zado, ntuge oho ɓemana-zhin, bma Shekwoyi aza bugba zhin lo.

⁸⁻⁹Nsaiye, miye ma nyaho bmazhin gmanyi. Mi ɓa mi ma nya ho ce dna n Kristi, gama nya manayi nu, n kwo kunce ha zhin. Ama mi ye ho lo, mi gnaye ma nya ho. Omi, Bulus, zakwoyi n saiye dna n kurkuku ntu Yesu Kristi ɓo.

¹⁰Omi wyegy, nge, ha wu Onisumus alheri, n na gniwo ga Yesu dna n ya, mi yi dna n na agmanyi.

¹¹Onisumus nwo ma'ana ge, ("Apma") wo to ɓei n na apma yin n sapain, ama nsaiye wo n na apma hin-hin yi lo, n yi aba vinya.

¹²Mi tnu n woi n ho aba njesun, emi bugba gnisun lo n woi.

¹³Mi ɓei n cei pma ma wo shi n ya, esa n mi dna n cei n ya n na agma, ntu Nabari manayi wa'azi zhin ɓo, owo bmazhin ɓei ɓa ze ngye oho nu bma mi zhin.

¹⁴Ama mi to ɓei n cei pma ma zhin ce n tna ho ayen. Mi to ɓei n cei pma ha zhin ɓemana tilas nun, ama n ho bugba yei.

¹⁵Kpekni ho ɓa zhin kwo nubo n lai, nge wa busi n ha aba esa fyewyi ntuge wa ze oho nya nyalonyalo.

¹⁶Wo to ye zhin fyenu nu, ama nyaho n du ɓo, Madoyi ye-yei, tun baga n mi aba ba, nsaiye wo ɓa gna sun n na pmayi n ho aba, ntuge wo to zhin fyenu nun gmanyin, ama oho mado dna n Kristi.

- 17**Nmi zhin ho nugundo hin-hin yi nu, gwo wo n na agmadai, shi ho ba gwo mi nyi, emi yi nu a be ho aba.
- 18**Ngwe wo ku benukwoyi nu zhin ho, kwo wa wyi ho vi nu, bi mi nu ta, mi ba gba ho.
- 19**Mi ba gba ho kwo ta, (“emi Bulus mi la ye mi ba gaho, cenu zhin mi yi kakwo fi n ya n mi abwayi,”) Mita wu ho shi ho n tayi shi mi lon, Behin-hin ho n hohin wye-wyeyi tainu shi mi.
- 20**E, emi zado ye-yei, gami agmada dna n ye-ye n na bai emi bugba ba ci Dagayi.
- 21**Mika wasika ye ntuge mi kpelo ho ba zhin obo n ma gna ho, har n diya bo.
- 22**La a zhibei nyakun zhin aba gami, gama mi n na wyetuyi lo Shekwoyi ba wo fye aduwa ma be fye aba esa fyewyi.
- 23**Abafros emi kurkuku kun zhinyi, n wo dnalo n ya, ntu n Kristi Yesu wa’azi zhin bo nyi, wo tnu fye lo n gnaviyi.
- 24**N Markus yi, Aristakus yi, n Dimas yi n Luka yi, emi atnu-tnu kun zhin yi.
- 25**Anabarka eyi Dagayi Yesu Kristi nya ba kunsun n ho zafunyi.

Aibraniyi

Aibraniyi 1

Shekwoyi Bei Dabo

¹Nsapai Shekwoyi bei dabo n azokwoi mwabegye nsasai. Wa dabo n bai n ruya yi, n-enayi, Njesun wa dabo ga eyi adada n anabi 'gbe.

²Ama nsaiye Shekwoyi dabo yi n wo Nugun 'gbe Yesu. Anya vinya wo nu zhin ba gado gyiyi. Owo nu na zhin ba.

³Yesu nu wu Shekwoyi buzangna behin-hin nya, wonu zhin Shekwoyi degbe, Owo iko nu shi afo bwa vinya. She wo bei pwo ya laifi zhanya bo, n wo ami yi wa lo wa sase n Shekwoyi shinkpegye bwaizhe-bwa.

⁴Abei la Yesu ze oza ndu a malaika. Aga wo eye ndu oba nya.

⁵Shekwoyi shin malaika ho gna ge, "Ho zhin mi nugun nu, mi la ho ma n naiye n jesun ma ze ngye oho dada?" Awo.

⁶Ama wa ci Yesu ge, "Ho zhin omi 'bi nu, amalaika vinya ba la hotu."

⁷Shekwoyi wa gna ge, a malaika wu ngye ese nu nkwo zhin kwa ci barkete nsaho-sahoyi nyi, ntu ge ba zhin Zafun nu. Owo a bara wu ngye ena yitala nu.

⁸Ama wa ci obi ge, "Oho begyi ta shan zon, ko ba ze busi kwa wu befyece. Oho busi tnu-tnu nya befyece nu."

⁹Ho ye atnu-tnu manayi to haye alaifi m. Ntu ce nu oho Shekwoyi gmanyi, wa gaho agmada duduyi.

¹⁰Ha zhin eshe, ha zhin ekni n ho ikoyi.

¹¹Eshe n ekni yi baba diya, ama ho ta shan fi m. Ngye aje kokoyi oba asa bai zeye. (Wato eshe n 'kni).

¹²Ho ba ya ba ngye aje sakun, oba asa ba zeya, Amma ho ta shan don, oho anyipyei ba bebe nu.

¹³Shekwoyi shin a malaika gna ge, "Fye sase nmi bwaizhe-bwa har ma ze fye nuwunyi efya abara?" Awo.

¹⁴Ba zhin amalaika a tnu-tnu loi nu n na tnu n bai ba bma a Yesu viyi zhin. Njesun nazai n ba be Shekwoyi aba nyi.

Aibraniyi 2

Yesu Fi Ntu Aza Vinya Bo

¹Ntu gaiciya bo n yi ku wo nyi yi zhin peceiye, Ntuge wada lo n ya jeze navun yi.

- ²Anya amalaika bei da nyi, gaiciya nu. Owa gnanazun n tna bo vi ko bei la be n tatai. Yesu kwa duduyi nu. (Wo du amalaika lo. Owo beda du ba nya lo njesun).
- ³Ntu cenu, yi ba po n wuna n ya na gni-gni dnagmayi ye a bo'a? Gama Yesu bei da nabari manayi. Owo abara, n ba bo wo wo nyi, ba ka yi be cei.
- ⁴Abo wo-woi nwo abara bei zhin nyi: acauta zafun nya, gaiciya ga, aza ka gna beda n wa'azi, ba ga seida ge Shekwoyi bo kunsun n bai.
- ⁵Ya je kpe ge nabari manayi Yesu nya ko du amalaika nya lo ntu ge, Shekwoyi to bei ga ba nu begyi a nyi nya m, wo bo ga Yesu nu.
- ⁶Behinhin, Zabura gna ge, "gbaizanyikwoci, wo zhin kni nu ha zhin tunani ntu wo bo a? Owo bi zhin kni nu nho ba bmawo zhin a?"
- ⁷Ho bo la woze n gna amalaika gba n sai fyewyi. Avun ha knu wo lowonyi latu nya n mwa-mwa nya yi, njesun ha tu wo n anya she vinya n ha zhin nyi.
- ⁸Behin-hin, ho la iko ga wo, har owo nu shi anya bwa vinya. Shekwoyi to kni nya ho yan. Ama yi ta gye ce kpam sai Yesu la be.
- ⁹Ama yi gye Yesu lo n wo bo la ze ngna amalaika gba. Nsaiye dei Shekwoyi la wo latu, woi la wo ga mwa-mwa ntu ge wa fi ntu yi bo. E, ntu Shekwoyi yeye bo Yesu wa fi ntu zaho-zahoi bo n nanyi.
- ¹⁰Deye kwa lo dei-dei n Shekwoyi nufiyi nwa zhin anya ntu wohin latu bo nyi. Wa zhin bezheyakwo ntu wo wahala bo. Ntu lo nu wa mi wa be n nazai n mwabegye n gni-gni zokwo.
- ¹¹Yesu n wa zhan yi ya nyi, beda n yi nna lai zhan ya nyi, Eyi dada (wato Shekwoyi) gmanyi nu, cenu zhin Yesu to woi wo vinyikwo n, wa yi-yi ge owo azaje m.
- ¹²Zabura gna ge, "Nba ga emazaje oho ye. Nba kwo anyi ma la ho tu dna n na aduwa nyakun."
- ¹³N abado wa je da ge, "Nba wo ze omi akpe ma ba. Omi, n mi abi yi n Shekwoyi wa ga mi nyi, yi zhi nyi."
- ¹⁴She yi zhin nanyi n nami yi nyi, wohin wa ze lo nu. Ntu ge wa wu Shetan n wo ikoyi, efi nya yi.
- ¹⁵Wo bo ye ntu ge wa gni aza nba wo efi dna tunyi nba ma wyi. (Nna bai ba po har abada).
- ¹⁶Wo ta bma amalaika nu zhin, ama wo bma Ibrahim ayawyi nu zhin.
- ¹⁷Ntu lo nu wa ze ngye owo azaje, n anya vinya. Deye kwa ga wo iko wa zhin pirist dnagmayi. Wo kpe lo shi wo ba gye yi sun-sun wa zhin gaiciya n Shekwoyi abye. Ce na zhin wami wala aza laifi. Woi la yi ye beda n Shekwoyi yi.

¹⁸Wa sin wahala jaraba nya. Ntu lo nu, wo ɓa mi wa bma aza zhin n na zhin ɓa jaraba nyi.

Aibraniyi 3

A Yesu-viyi Zhin Shekwoyi Nyakun Nu

¹Ntu deye ɓo, ema zaje Gyi-gyi-yi, yi zhin Shekwoyi aza kni-kni yi nu. Fye ku efya bugba ga Yesu na tnu nwoi nyi. Eyi pirist dnagmanyi gaiciya ga nya.

²Yesu bei zhin gaiciya n Shekwoyi aba ngye shi Musa bei zhin nyi.

³Ama Yesu ɓo du Musa n mwamwa. Ko wu ngye ozanu n wa mi nyakun wo du nyakun n mwa-mwa.

⁴Gama yakun doho-dohoi oza nu na mi, ama Shekwoyi nu na mi anya vinya.

⁵Musa ɓo zhin tnu-tnu n Shekwoyi azai sosai. Ama wo bei bwa fyenu nu zhin. Deye kwo bei zhin dogbe nu n anya yi n ɓa ɓelo n abye nyi.

⁶Ama Yesu bei zhin gaiciya tu Shekwoyi puwa ntu ge wo zhin nugun nu. Yi zhin wo azanu n ya mi dna gaiciya, har nyalo-nyalo.

⁷Ntu deye ɓo, she Zafun Gyi-gyi-yi ku da, “Kna tɓubua n mi beda n naiye,

⁸to ha kpe bugba akala ngye a Israila yi m. Pa a Israila yi ɓo dna n jaraba sa n zhabui. Fye to kpe bugba a kala ngye shi fye azakwoyi bei zhin fi n zhabui nyi m.

⁹Ofya dada bei tu mi mwi ɓa mwimi gye, ɓa gye a ɓo wowoi aye shinyi, ama ɓa dudu ɓa kpa kala.

¹⁰Ntu deye ɓo ma gyi minagyi n bai. Ma ci ge ɓa zhin abugba nukwoyi danu. Balle ma bata kpe mi ‘zokwo ye lon.

¹¹“ ‘Ntu cenu ma si nya-si ge, Bata lo emi sun-sun m.’ ”

Abugba Kala Kpey i

¹²Omi-zaje fye zhin peceiye, n na ta bwa bugba nukwoyi da n fye m. Ko ɓa zhin fya ya gaiciya.

¹³Fye zhin aje gargadi cici, esa ye nyi, to zaho wa kpe a kala m, woi zhin laifi cici m. Ko ɓa ɓe fye n fiyi n bugba wun yi n jesun.

¹⁴Yi kuze agado gyiyi n Kristi yi, yi zhin wo aɓi behin-hin nya nu, N ya mi zhi dna gaiciya ga har nyalo-nyalo.

¹⁵Gama wa gna, “N naiye nha wo mi beda, to ha kpe bugba a kala n gye aza n sapayi m.”

¹⁶A nyikadonu bei wo to ba zhin biyaya ma? O ba nu n Musa bei kun ba n Masar kni.

¹⁷Shekwoyi bei gyi minagyi na nyikayi nu har aye shinyi a? Wo bei gyi minagyi nazai nu n ba bei zhin laifi fi n zhabui nyi.

¹⁸Shekwoyi bei si nyasi ga nyika nu ge ba ta lo wo sun-sun ma? Banu bwa sun njesun.

¹⁹Ntu lonu bato bei lo asun-sun ba m, (wato a Israila yi) ntu n ba tna gaiciya ga bo.

Aibraniyi 4

A Sun-Sun Ba Woiwoyi

¹A Yila alkawali gwo pwo-pwo nya, ntu deye bo yi zhin peceiye, Ko ta bmiya to ya lo Shekwoyi ebemi m.

²Nabari manayi bei la be yi aba, ngye ba baku wo ce, ama ko to bei zhin ampanyi m, ntu ge ba to wo n gaiciya gai m.

³Ama eyi n yi ku gaiciya ga nyi yi ba lo wo sun-sun. Ama Shekwoyi bei gna atna gaiciya gayi. “Ma gyi minagyi ma si nyasi ge, ba ta lo mi sun-sun, ko da shike owo atnu-tnu bo ku zo zhin, tunyi anyi zhin sa.”

⁴Shekwoyi Beda gna ge Shekwoyi bei zhin anya vinya dna anyipyeyi ngun tnaba. Kwa gna ge, “N nyipyeyi tnaba yi Shekwoyi wa sun.” Nlo nu yi gye Shekwoyi la lo sun-sun.

⁵Njesun, Shekwoyi wa da Ayahudiyayi bo, wa gna ge, “Ba ta lo mi sun-sun m.”

⁶Asun-sun ba lo ntu aza bo har nsaye. Yi to ku ze n gye aza tna boviyi da m. Oba tna gaiciya ga n laifi yi ba zhin ba, to ba lo Shekwoyi sun-sun aban.

⁷Njesun n Dawuda sa, Shekwoyi wapa ba shi aza bei fi n zhabui nyi. Wa gna ba ge, “Kna emi beda tnubua n saiye. To ha kpe bugba kala n gye aza n ba bei zhin ma gyi minagyi nyi m.” Wato aza n Dawuda sa bei ku Shekwoyi sun-sun bo wo nu.

⁸Ko shi Joshua bei lo n bai nu alkawali kni, wo to beimi wa lo n bai n Shekwoyi fun. Wo bei gna ge wa lo nbai nu, to Shekwoyi je sun-sun ho bo dam.

⁹Deye kwa wu ge sun-sun yelo ntu Shekwoyi aza bo.

¹⁰Zaho-zahoi nwa lo Shekwoyi fun wo ba bwa sun-sun. Ko ba ze ngye Shekwoyi sun-sun nwo bei sun woi ku anya zo zhin nyi.

¹¹Ntu cenu, yi zhin atna ya lo ofun deye Kada tna gaiciya ga kwa hana n yi.

¹²Gama Shekwoyi beda zhin wyewyeyi nu. Ko gyi-gyi-yi sosai. Behinhin, ko du beyakwo n gyi-gyi. Kwa fin za har bugba. Kwa wu asiri bmi pepei.

¹³Shekwoyi kpe anya ye vinya. Nyaho-nyahoi to bwi shi n wa ba m. Dole ya ga bayani anya yi ku zhin.

Yesu eyi Prist Tukwoda Dnagmayi

¹⁴Yesu eyi pirist dnagmayi wo du she. Wo nu zhin Yesu Shekwoyi nugun. Ntu cenu yi kpema wo dei-dei.

¹⁵Gama Yesu eyi pirist wo kpe yi a kala gbabolo, ntu ge a bei ku jaraba zhin wo ngye yi. Ama wo to zhin laifi m.

¹⁶Ntu cenu yi ku kala ya zhin aduwa, ga Shekwoyi. Yi ba bwa sun-sun gye. Yi ba bwa alheri kwa bma yi zhin esa nu ya gyisan ncei.

Aibraniyi 5

¹Pirist dnagmayi doho-dohoi a kni a za nu. Awoi tu, wa gni aza busi n Shekwoyi abye. Wa ga sadaka ntu n laifi gafara zhin bo.

²Dole pirist dnagmayi wa zhin peceye n amamai bedo n atnaganyi-kpe yi. Dole wa gye aza sun-sun ntu ge wohin to zhin oza nunuyi nu m.

³Ntu cenu dole wa ga sadaka ntu wohin a laifi bo. Kafin wo ga sadaka ntu aza bo.

⁴Ozaho-zahoi ta mi wa dna wohin n tnu-tnu manayi ye m. Shekwoyi nu kni za Shekwoyi nu bei kni Haruna pirist kmisunyi.

⁵Kristi nu to bei kni wohin, Shekwoyi nu bei kni wo?—?Shekwoyi wa ci wo ge, “Emi nugun, n naiye mi la ho kni.”

⁶Zabura 110 kwa gna ge, “Ho wu gye Malkizedek.” Wo to bei gmi na pirist puwa nu m, ama wo bei zhin prist nyalo-nyalo nya nu. Shekwoyi nu bei yi wo.

⁷Sanu Yesu bei dna n anyi nyi, wo bo zhin aduwa n gaiciyai. Owo zafun kwa damu. Abo ku aduwa wo wo ntu ge wo bei gba wohin na aduwa zhin. Wa gyi Shekwoyi wye nabai to wa fi woi ye bwasin ciwyi m.

⁸Yesu nu zhin Shekwoyi nugun, ama wa dudu wa vi bo dna n wahala.

⁹Ntu deye bo wo bei la ze oza nunuyi. Woi ga aza nba vi wo bo gni-gni nyalo-nyalo nya.

¹⁰She Shekwoyi bei yi Malkizedek nyi, wo bei yi Yesu lonu wa zhin pirist dnagmayi.

Fye Zan Nyagyi Kpakalayi Shin

¹¹Anya mwabegye lo n mi ba da n Yesu tukwo ama mi ta gnafye m, ntuge fye to n yekpei lo m.

¹²Gama ko la kunce fya zhin amalemi. Ama fye ye zhi lo n fa gbe, fye cei pma ai wu fye Shekwoyi. Fye ku ze n gye abi-nawyi. Fye y madara. Fye ta mi fya gyi zafu nyagyi m.

¹³Oza nu wo ye madara wo to mwa dna Zafun m.

¹⁴Nyagyi kala da zhin aza dnagmayi nya nu dna Zafun. Wato aza nba ga bahin tata nyi, ba kpe be manayi ye lo n be nukwoyi. Baku zhin ajigwo ntu ganyikpe bo.

Aibraniyi 6

¹Ntu cenu yi shi beda bwa n yi ku wo nyi wato Yesu wuwu, to ya wu kwo nu cici m, ama yi gyi abye dna gni-gni zokwo har ya mwa. Atnu-tnu ta mi ba gni yi m, ntu cenu, yi mi zhi dna gaiciya ga. Yi ku atnu-tnu anayi nya fa. Ba ba lo yi na bwi-bwi ba.

²Ko to kamata lon ya ye wufye batisma bo m. Abwa kpe ntukwo, n jesun n azafi kalaku n wadayi.

³Ama yi gyi abye n Shekwoyi a kala yi.

A Zhin Ta-Taya Nya

⁴Fye wo bo ko zhin mi gna fye ge fye gyi abye nyi. Awe la azaho knaya, baku zafun gyiba gyi, Baku owo tnu-tnu gye wye.

⁵Ba kpe lo ge Shekwoyi beda bmiya lo, baku anyi dehi asin wo n kwo ikoyi.

⁶Ndei ba fa vi bo bata mi ba je ze be m. Ntu ge ba na zafun abo fyegyigye. Ba zun Yesu du cici, ba gawo vinyikwo.

⁷Ekni lo abye gun aba, Manayi lo. Kwo zhin kwa pa agbe-gbe manayi ntu fanu bo. Afayi ye kwo pya nu. Dagayi zhin watu kwo anabarka njesun.

⁸Ama ekni do kasun lo, kwo nu zhin nukwoyi. Ko zhin kwa sin nuwan to koi ga ampanyi m. Ko zhin kwa pa aknawuyi n gbe-gbe nukwoyi. Ekni deye a zhin a tukwo kni, a fa kwo ntna nyaho, akpe ko ena.

⁹Aza to lo n wu ngye ekni nukwoyi ye m? Alo, ama emi azaje fye to wu lo ngye ba m. Fye na tnu-tnu manayi lo. Njesun Shekwoyi zhin wa tu fye anabarka.

¹⁰Shekwoyi ta gyi za fim wo ta gyi za atam. Wo ku yeye gye, n fye wu aza ntu wo bo nyi, wo ta ze ko amwim. Fye gyi abye lonu.

¹¹Behin-hin, yi cei pma fya zhin lonu, fye la gni-gni shi bwa har Yesu wa be.

¹²Fye to wo bwato m. Fye vi anabawa kwo-kwoyi bwi. Gama ba dagma lo n sayi n Shekwoyi aba. Bala Shekwoyi alkawali gwo.

Ibrahim Dogbe

¹³Esanu Shekwoyi bei zhin Ibrahim alkawali nyi, wo bei si nyasi n wohin nu ntu ge zado to du wo lo n wo ba si nyasi n woyi m.

¹⁴Wo bei gna ge wo ba tu wo anabarka njesun. Wa ga wo bi, Owo bye kwa mwa begye.

¹⁵Ibrahim bei bwa hankuri sosai, navun wa ma Ishaku.

¹⁶Fye kpe lo ge yi zhin ya si nya si n ya zakwoyi nu n ba du yi nyi. Yi zhin ya zhin lonu, ntuge ba ko yi lo. Deye wu ge yi da gaiciya nu.

¹⁷Shekwoyi bei zhin lonu nu. Wo bei si nyasi nwohin ntu ge wa wu gaiciya n kwo ta shan do nyi m.

¹⁸Deye kwa wu ge Shekwoyi alkawali zhin gaiciya nu. Kmisunyi Shekwoyi la wo beda ga, ko ta shando n. Bayi, Shekwoyi la nyasi si, Wo ta ce akata m. Aza nba be Shekwoyi aba, ba bwa abwi ba n bmazhin yi.

¹⁹Eyi gaiciya ga ta shan-shan, yi ku po sosai ngye nyakun nkwo tu n na pma. Yi ku mi zhi.

²⁰Yesu la lo eshe n ya bye. Wo zhin eyi pirist dnagmayi nu. Owo begyi pirist nya har nyalo-nyalo nya nu. Ko wu ngye Malkizedek nya nu.

Aibraniyi 7

Malkizedek Dnagmayi

¹Malkizedek bei gyibe dna Salima nu. Wo bei zhin Shekwoyi pirist nu, njesun wa shegun Ibrahim woi zhi kun-sun, n asuyi, wa tu Ibrahim anabarka.

²Ibrahim wa ga Malkizedek zakka. Malkizedek awyega ge, “Bemanayi zhin yi.” Wo bei gyibe dna n Salima nu Salima awyega ge bugbafu nu. (Wato Esu bugbafu nya).

³Malkizedek to bei n eya yi m. Eda ton, obi ma to nyin a takpe esa ye n na bei ma wo m, ko esa nwo bei fi m. Wo bei zhin ngye Shekwoyi nugun dogbe nu. Wo zhin pirist nu nyalo-nyalo.

⁴Wo to bei zhin oza dnagmayi nu m? Ibrahim, Shekwoyi za kni-kniyi bei ga wo nu zakka.

⁵A Levi hi bei zhin Shekwoyi a pirist nu. Ba bei zhin Levi a yawyi nu. Shekwoyi bei gna babe ba gwo Sadaka n naza. Ba bei gwo n ba zaje nu kwa bma ba zhin. Shekwoyi nu bei gna ba ge ba zhin lonu.

⁶Amma Malkizedek, to bei zhin Ibrahim za nu n Amma wo bei la sadaka gwo n Ibrahim. Wohin kwa wa tu Ibrahim anabarka. Ibrahim bei zhin ozanu n Shekwoyi anabarkai tu.

⁷Yi kpe lo ge zadnagmayi nu zhin watu zanawyi anabarka.

⁸A Israilayi pirist ba to ku fin, amma Malkizedek bei wu gbo, Wo nyi har nyalo-nyalo.

⁹Levi, wonu bei zhin pirist dnagmayi dada, Wohin kwa wa ga Malkizedek sadaka dna n Ibrahim.

¹⁰Ko a to bei ma Levi nyin, owo bye bei dna n Ibrahim mi sanu Ibrahim bei ga Malkizedek Zakka nyi.

¹¹Levi puwa bei zhin a pirist puwa nu, Kni nu bei zhin Yesu wa je pirist zhin a? Malkizedek wa ze degbeyi ama to Haruwa nu ma? Ai a pirist vinya bei kun n Levi puwa nu.

¹²Da shike a pirist tnu-tnu bei la shando dole a shan wyidna do, Shekwoyi nu bei shando ce n wohin.

¹³Yesu eyi pirist wo to bei gmi n Levi puwa nun.

¹⁴Yesu bei gmi n Yahuda bye nu. A Yahuda yi to bei zhin a pirist nu m. Ntu ge Musa to bei kni ba nun.

¹⁵Deye kwa wu yi ge Shekwoyi zokwo bei la shan do da shike pirist zokwo bei la shan do da shike pirist zokwo bei la shando. Ko laze ngye Malkizedek nya nu.

¹⁶Yesu to bei zhin pirist nayi nya num. Amma wo bei ze pirist n iko yi n ko ta shan zo m.

¹⁷Shekwoyi wa da n Zabura 110 ge, "Ho zhin mi pirist nu nyalo-nyalo, Ho zhin n gye Malkizedek nu."

¹⁸Deye kwa wu ge abei la pirist zokwo kwo-kwoyi zunya. Ko to bei n kalayi dei-dei m, Kwo to bei mi kwa gni za m.

¹⁹Kwo to bei ga za n befyece m, Kwo to bei mi kwo lo n zai n Shekwoyi aba m. Amma Yesu bei la be nu wyetu yi, Owonu na be n yi vi-viyi n Shekwoyi aba.

²⁰Shekwoyi bei la nyasi si nge Yesu zhin pirist nyalo-nyalo nya nu.

²¹Shekwoyi to bei zhin lonu n pirist a je yi m. Amma n Yesu tukwo, wo bei si nya si wa gna ge, "Ho zhin pirist nu nyalo-nyalo nya."

²²Ntu deye bo Kristi ta gba kalam, ntuge Shekwoyi la nyasi si, Kristi ba gyi abye har nyalo-nyalo.

²³N sapai, a pirist bei mwa begye, n nabai n zaho wa fi, sai a dna do.

- ²⁴Amma Yesu ta shan fi m, ata mi a shan wo do m, ntu cenu ata ye zado lo m.
- ²⁵Gni-gni nwo ga nyi, kwo nu-nuyi lo njesun kwo zhin nyalo-nyalo nya nu. Yesu nyi nyalonyalo. Ntu cenu Yesu ba mi wa gni aza nba be wa ba nyi. Wo zhin wa gyi Shekwoyi wye ntu yi bo.
- ²⁶Wo bei la ze ngye 'yi kodashike wo to bei zhin laifi m, Oza gyi-gyi-yi nu, n tna zamba. A woi knaya n na alaifi da, a mwa-mwa gawo n eshemi.
- ²⁷Yesu to wu ngye a pirist a je nun, Wo to bei zhin sadaka ntu wa alaifi bom; amma ntu na za bo nu. Wo bei bwa fi zun gmanyi nu ntu ya laifi bo.
- ²⁸Wyidna wato Musa owa, kwo nu bei kni a gbaizanyikwoci dna a pirist tnu-tnu. Ba bei zhin a laifi da nu. Amma wyidna woi-woyi nu na kni Yesu, Shekwoyi nugun. Wo to bei zhin laifi da Shekwoyi nu na kni wo pirist nunuyi nyalo-nyalo.

Aibraniyi 8

Yesu Na Ga Sadaka

- ¹Bedakpakalayi nu nyi. Yesu Kristi wo nu zhin pirist dnagmayi. Owo asese ba n lo n eshe mi nu n kun-sun n Shekwoyi, n wo bwaizhe bwa.
- ²Owo nu zhin yi bmazhin yi n Shekwoyi abye, dna n tent n Shekwoyi wa mi n wohin, to ge n zanyikwoci abwa yim.
- ³Pirist dnagmayi tnu-tnu nu wa zhin sadaka, ntu aza laifi bo. Wo dna n azanyikwoci a tan-tasin n Shekwoyi, ntu cenu dole wa ga sadaka.
- ⁴N na alkawali kwo-kwo yi sa Yesu to bei ba bmiya dna bom, ntu ge wo to bei gmi n pirist bye nu m. Ntu cenu ato bei ba ye ge wo zhin tnu-tnu ye pya m.
- ⁵Zokwo kwokwoyi nu bei zhin gnabye. Kwo nu bei zhin foto eshe nya. Ya gye shi na bei zhin lubui n wu. Wo bei gna Musa ge wo zhin lubui (tent) shi wo bo wu wo.
- ⁶Amma Kristi pirist tnutnu ko du a pirist aje nya n daraja. Owo nu zhin bmazhin yi n Shekwoyi abye n saiye.
- ⁷Shekwoyi awyidna kmisunyi bei dna bo na vi ba. Kwo to bo bma zhin. Ntu cenu wa je do ga.
- ⁸Shekwoyi n wohin tukwo, wa cige, "dnawye esa belo nba zhin alkawali n Israila yi bodo n Yahudiyi yi.
- ⁹Mi bei la alkawali kwo-kwo yi wu ntu ge efya dada to bei shi kwo bwam-sanu ba bei kun n Masar nyi. Alkawali kwo-kwoyi bei wu gbo n woi-woyi."
- ¹⁰Dagayi wa gna ge mi ba zhin alkawali ye n na Israila yi, wyihoi nba dna ba emi awyidna nba bugba. Nba ze o ba Shekwoyi bahin ba ze ema za.

¹¹Nsahi, ato bei je zaho-zahoi nya wun, ntucenu ato bei ye a malami nba bo wuza Dagayi m, "Zaho-zahoi bei kpe mi ye, binayi n na zadnagmayi, Vinya abei kpe mi ye.

¹²Mi bei gye ba sun-sun dna nba aba bwi, mi bei ku ba laifi zamwi."

Shiri Kwo-Kwoyi

¹³Shekwoyi wa gna ge wola awyidna kwo-kwoyi ga avun, woi la woi-woyi ga.

Aibraniyi 9

za nyi. Wo bei ku awyidna ga shi aba la wo tu nwu.

²Tent (lubui) bo nyi ntu wo latu bo, ko bei safi n gun aba, Nyakun kmisunyi a yikwo ge aba gyi-gyi-yi.

³Eje bei sa, Nkwo avun yakun do bonyi, kwo nu bei zhin aba gyi-gyi-yi du-duyi. (Shekwoyi zafun bei dna bo nu.)

⁴N nyakun bayi bagadi bei shi n cei zhin n zinariya yi, abei zhin a gyi tulale na bo nu. Akwati zinariya nya bei nyi ko nu bei zhin akwati alkawali nya. Nkwo mi Musa awyidna bo ya dna n nyagyi yafi n ba bei zhin bai gyi n zhabui nyi. Wato mana nu. Haruna busi bei dna bo, n kwo bei kmi nyi.

⁵Nkwo she ba bei n nazai zhin kpe, wato Shekwoyi amalaika. A yi ba ge Cherubim, ba bei n nabminayi laya kpe n na kwati yi Akwati she, a yi kwo ge Shinkpegye sun-sungye nya. Yi ta mi ya da shi kwo bei nyi vinya n.

⁶Shi ba ku anya zo zhin vinya, sai pirist wa lo nyakun gyi-gyi-yi, wa be n sadaka yi ntu n naza bo.

⁷Amma pirist dnagmayi nu bei bwa mi wa lo dna n nyakun bayi. Wo bei zhin wa bwa lo zungmanyi nu n eye gmanyi. Wo bei zhin wa lo n nami shi wa zoya kpe n Shinkpegye sun-sungye nya, n Shekwoyi abye. Kwo bo zhin kwa bwi ba laifi n na babwi yi. Kwo bei nyi ntu piristi bo na zai vinya.

⁸Zafun Gyi-gyi-yi cei pma wa wu yi nya nu n kwo mi. N zokwo kwokwoyi aza bei gnaje gna-gnanyi n Shekwoyi, ba to bei mi ba lo fi n naba gyi-gyi-yi du-duyi ba lo da Shekwoyi m. Eje bo sa n kwo bei ba gnaje ya. Ntu ge zokwo woi-woyi to bei गया ai lo Shekwoyi aba m.

⁹Deye kwo wu yi nya nu bo. N zokwo kwo-kwoyi, nyaga n sadaka yi bo zhin dole nu, amma deye to bei mi kwa zhan ba bugba ya m, oba bugba bei zhin laifi nya nu, ba bei gnaje-gnagnayi n Shekwoyi. Shekwoyi ta ye laifi m, wo ta ye ba bedo n laifi da yi m, aza n na to zhan ba laifi ya m.

¹⁰Zokwo kwokwoyi bei wu abo nu nba ba zhin a da Shekwoyi. Awyidna bei nyi ntu nyasin bo, n nyagyi, nuwan fu bedo n na nyajei mwa begye. Dole owo mwa-

mwa gayi ɓa nu aɓoye. Kwo ɓei zhin dole nu ɓa zhin aɓo deye ntu ge ɓa zhin shiri ntu Yesu ɓebe ɓo. Yesu la zokwo woi-woyi गया kwoi lo Shekwoyi aba.

11Yesu nu zhin eyi pirist woi-woyi duduyi. Womi woi ɓe n yi n Shekwoyi abye, wo du Shekwoyi puwa n eshe mi; Abwa nu to mi api ye m, kwo to nyi n na nyi ye nu m, ama n eshe mi.

12Wo ɓei la wo ami nu wa lo n cei n naba gyi-gyi-yi. Wa ze ɓa kpe n shinkpegye sun-sungye nya, ena ami nu to n, Nyakpa dohodohoyi ami nu to n. Owo hin ami nu, owo ami ku yi ta-ta ta gba. Eyi gni-gni la nu, gni-gni tnu-tnu ku zo zhin.

Shiri Woiwoyi

13N zokwo kwo-kwoyi, aɓei zhin ampanyi n na nakwoyi, ɓedo n anayi, oɓa mi ɓei zhin ɓa zhan za ya nɓa laifi nayi nya.

14Amma Shekwoyi nugun ami gyi-gyi-yi du oɓa nyalo. Zafun ɓei zhin woi bma wo zhin, owo ami n kala yi lo. Kwo ɓa shan yi do kwapmi ya bugba bma, kwa zhan yi alaifi ya. Kwo la ednawo gmiyi ya ntu na awyindna ɓo, kwo ga yi kala ntu ge ya zhin wo atnu-tnu.

15Yesu wo la ɓe n alkawali woi-woyi. Kwo nyi ntu naza ɓonu n Shekwoyi la ɓa yi nyi, n na byei gbogbo, ɓa gwo Shekwoyi anabarka. Yesu fi-fi la yi loya, gama wo ɓei ku ta-ta ta gba ntu ya laifi ɓo. Anabaraka ye cauta nu.

16Nza fi, wo zhin wa gado ya shi n navun, ama ata mi a gna oza gado, to woi fi num.

17Ntu cenu aɓa zhin ampanyi n wo ɓeda yi woi la fi nu. Zaho ta gwo nyaho sai wo la fi.

18Shekwoyi alkawali ɓo ce hatimi n ami. Kwo ɓei wu kwotonci n Musa sa, owo fifi nya. Yesu wa fi, ntuge a gayi owo gado nu.

19Musa ɓei ga aza Shekwoyi awyidna. Nsaiyi wa ze ami ya kpe n na wyidna yi ɓedo n na azayi. Wa zhin ampanyi n afintolo hoi ɓedo n lulu byei-byei yi n nabai wa ze ami ya kpe aza ɓedo n nuwan yi.

20Wo ɓei gna ami ye, “ɓa zhin alkawali nya nu, Shekwoyi gbega nu, fye shi kwo bwa.”

21Wo ɓei lakwo zeye kpe n tent ɓedo n nabayi n ɓa gyi-gyi-yi nyi.

22N alkawali kwo-kwoyi ami nu ɓei zhin ɓa zhan nya ya vinya. Deye kwa wu ge, efi, kwo nu zhin laifi tagba nya. Gafara zhin to lo n tna ami zeyan.

23Tent n Musa ɓei zhin n anyai vinya nkwo mi, aɓei laba degbe n she nu. Dole Musa zeba gyi-gyi-yi n anyakpa ami yi. Amma Tent nkwo lo n eshe nyi, aɓei zekwo Gyi-gyi-yi n enya yi nu n kwo du deye lo n daraja.

²⁴Yesu bei lo eshe nu n kwohin tukwo, to ge aba gyi-gyi-yi nna mi n nabwa yi m, Wo lo n she Woi wu wohin tukwo n Shekwoyi abye ntu yi bo.

²⁵Wo taga sadaka ntu yi bo cici m, Yesu sadaka zungmanyi nu. Ama pirist dnagmayi bei zhin wa ga a sadaka cici n na ba gyi-gyi-yi dudu yi eye dohodohoyi.

²⁶Shekwoyi ta ye sadaka ye cici nu m. Dole nu Yesu wa ga wohin zun gmanyi. Owo sadaka bei la eyi tata goya.

²⁷Zaho-zahoi ba fi zungmanyi. Amma n fi avun Shekwoyi bei da zaho-zahoyi owa.

²⁸Ntu cenu Yesu bei fi ntu yi bo zungmanyi, wo bei fi eyi a laifi fi nu. Amma wo bei la laka n vingwo, wo je ze be lo wa gni aza nba vi wo nyi.

Aibraniyi 10

Domwi Woiwoyi N kwokwoyi

¹A Yahudiyi awyidna bei bmiya amma kwo bei zhin foto nu, kwo bei zhin ofun nu anya manayi n Kristi bei zhin ntu yi bo. A bei zhin a ga sadaka cici, eye dohodohoi.

²Sadaka yi bei gna ge kwo ba gni aza nu, to ai bei ga cici m. Kwo bmiya mwa-mwa ga yi wa ze gyigyiyi nyalo-nyalo, to wa zhin tunani laifi nya m.

³Amma sadaka to bei mi kwa nya ba tunani nukwoyi ya m, kwo bei zhin kwa pa ba a laifi bo nu cici.

⁴Kwo to bei zhan ba a laifi ya m. Anakwo ami, na ana miyi ta mi ba zhan za a laifi ya m, sai dai Yesu Kristi ami gmanyi.

⁵Ntu cenu Yesu wa be anyi mi, Yesu bei da bo nu anabi ho aba wa ci ge, “Anyakpa ami ta siho ebemi — O Shekwoyi, ntu cenu hoi ga mi nayi ye, Emi nayi nu n ho ye sadaka.

⁶Sakada anyakpa nya to ga ho bugbafu m, kwo sadaka a pirist nya bata mi бага ho bugba fu m.”

⁷N deye avun, fye gye, “Mi la be ma ga mi wye-wyeyi ntu naza laifi bo. Nyanu n littafi ku da ntu mi bo.”

⁸She Kristi bei ku da ge, anyakpa ami ta mi kwa ga yi enya n Shekwoyi ye nyi m, njesun sadaka n na gyina ntu na laifi bo nyi ba ta fu wo bugbam, A Yahudaiyi awyidna ta dawo bugba m.

⁹Yesu wa je bo da n jesun wa gna, “Mi la be ma ga mi wye-wyeyi, Mi ga kwo ntu n naza laifi bo nu. Ala zokwo kwo-kwoyi gaya. Ala be n woi-woyi.”

¹⁰Shekwoyi wo ku gafara zhin yi n zokwo woi-woi. Wola ya laifi zhanya nyalo-nyalo. Yesu nu na zhin afo deye ntu yi fo, sanu wo bei fi ntu ya laifi fo nyi.

¹¹Nsa kwokwoyi sa, pirist bei zhin wa laka gni n nabye fyegyiyegyiyi, wo bei zhin wa ga sadaka ntu naza laifi fo, ama kwo ta mi kwo gni za m.

¹²Ama Yesu fo ga wohin zun gmanyi ntu sadaka fo ga Shekwoyi, wa ga wo nayi ntu ya laifi fo. Wo tu lo naba duduyi vinya n iko yi n kun-sun Shekwoyi n shemi.

¹³Wo tu lo naba iko nya n kun-sun Shekwoyi yi, Owo anuwun yi fo fi n wo sunta. Enya nu n wo pmi, wo bei gyibe tu 'ba tukwo nyalo-nyalo.

¹⁴Wo ku yi ze aza gyi-gyi-yi n Shekwoyi aba. Owo ami layi alaifi zhanya har nyalo-nyalo.

¹⁵Zafun nu zhin yi seida n ge yi gyi-gyi-yilo.

¹⁶Zafun Shekwoyi nya gna ge, "Alkawali woi-woyi nyi nba zhin na Israila yi. Nba kami awyidna kpe nba bugba, nba ku awyidna ya fi ba n bami, deye ba zhin ba kpe mi nufi ye ba vi ma wyidna."

¹⁷Wo bei je da ge, "Mi ku ba zhin gafara. Mi ta je ba laifi fo pa m, kwo kwa ofa bonukwoyi zhin."

¹⁸Mi ku fye zhin gafara, mi ku fye alaifi ze, amwi nyalo-nyalo, kwo zhin fo gboloyi nu fya ga sadaka ntu fya alaifi fo. Yesu ku deye zo zhin n wa mi yi.

¹⁹Emi azaje, yi ba mi ya lo Shekwoyi aba, Yesu ami la zokwo गया गायी.

²⁰Yesu la zokwo woi-woyi गया गायी. Kwo zhin kwa ga wye-wyeyi, Wo la zokwo zhin yi kwoi lo Shekwoyi aba. Owo nayi bedo n wo ami yi nu bei zhin zokwo ye.

²¹She Yesu Kristi wo nu zhin Pirist Dnagmayi, woi gyi be tu n Shekwoyi puwa nyi.

²²Emi azaje, yi lo Shekwoyi aba n bugbayi guguyi ya. Yi ku gaiciya ga n ge wo ba gwo yi, ntu ge Yesu ami layi zhanya sarai. Zafun kwa woi zhan yi ya cici.

²³Yi zhin aza gniyi nu kuma yi wyewyeyi lo. Yi to zhin shakka, n yi gnigni yi m, gama eyi Gni yi zhin za gaiciya da nu wohin kwa wo ba nu owo alkawali.

La Wye Ce N Bemanayi Zhin

²⁴Yi zhin godiya ntu nya fo Yesu ku zhin gayi nyi. Yi yenajeyi, yi bma aje zhin yi ce aje bwa. Deye ba wu ge yi zhin Yesu abara nu hin-hin.

²⁵Ema zaje yi to ci aduwa fo wyegba m, enya nu n na zaho zhin, amma yi ce aje bwa yi dna aje zokwo, Yesu jezebe fo kwo la wu viwyi.

²⁶Yi to gyi abye fi n na laifi m, ntu ge yi kpe gaiciya ye lo. Amma n ya gyi abye n laifi zhin, Shekwoyi ta zhin yi gafara m, ya zhin yi gwo kpe m.

- 27**Shekwoyi ba ta za nwa gyi abye n laifi zhin yi, Wo zhin Shekwoyi nuwun yi nu. Shekwoyi minagyi bo zopui nwo anuwun yi n nyipyeyi kmaknayi.
- 28**Abei tu aza dole ba vi Musa awyidna, aza n ba bei zungna nyi babei ku fi n tna sun-sungye. Sa n za bei zhin laifi, sai a bwa aseda da ngun aba kwo ngun ata laifi kwa tabbata.
- 29**Aza ho lo bai kpe Shekwoyi bi apita, bai zhin abo ngye owo ami to bai gyi-gyi-yi m. Ba la Zafun Gyi-gyi-yi la minagyi ka. Oza n wo zhin abo deye pya, wo ba gwo tata dnagmayi, wo to bei lo Shekwoyi bemi m.
- 30**Shekwoyi bei da ge, “Tagba kwo zhin mi nya nu. Nba ga ba amsa.” Nba ka abei da ya. “Nba da aza owa, nba ta abenukwoyi zhin yi.”
- 31**Nkanu ba kpe Shekwoyi minagyi bo ye a? Kwo zhin bo dnawoyi nu oza lo Shekwoyi wada.
- 32**Ho kpe sa lo n ho bo ya Yesu vi ncei yi? Emazaje, fye to ze wyihi amwi m. Anyipyeyi gmada nya n nabo wowoyi: Fye ku wahala sin ntu Yesu eye bo, amma fye hin kwa fye, ku hakuri bwa. Fyeto na wo abo m amma fye vi wo cici.
- 33**Mi pa salo naza bei zhin bai lu fye, bai ma fye san. Fye gye aza sun-sun nba bei zhin bai sin wahala n gye fye nyi, kwo zhin hali manayi nu. Shekwoyi kwa wo dagma lo n fyei.
- 34**Fye bei sin wahala bedo n naza yi n bafi n kurkuku. Fye to bei damu sa n na bei ku fye akaya m, fye bo ku Shekwoyi kpeye har fyei kpema wo. Fye kpe lo ge, gyiba dnagmayi lo kwoi pmi fye n’shemi.
- 35**Fye to fa kpema Shekwoyi bo m, kwo n wuso-wuso, fye to fa m. Shekwoyi n lada yi shi fye lo n’shemi.
- 36**Fye zhin peceiye, fya zhin hankuri. Deye fye zhin Shekwoyi beye nu. N fya zhin Shekwoyi beye, fye bei gwo lada n mwa.
- 37**Sa fyewyi, Yesu jezebe lo, wo ta mwa sam. Fye zhin hankuri fya pmi wo.
- 38**A Yesu viyi zhin Shekwoyi abi nu vinya, dole ya zan-zan dna n gaiciya ga. Nna bo vinya la kpema wo fyeto fa Dagayi vi bom, Shekwoyi ta wo agmada n nazai n ba jeze n navun yi m.
- 39**Ama yi zhin wo aviya nu behin-hin nya. Yi to ye ya jeze navun yi m Eyi gaiciya ga kwo ci seda lo ge yi wye-wyeyi nyalo-nyalo nya yi lo.

Aibraniyi 11

Gaiciyaga abo wowoyi

- ¹Kni yi nu zhin gaiciya ga? Gaiciya ga kwo nu zhin bugba shi ge nya yi ye kwo ba zhin. Ko nu zhin gaiciya ga n bugba ge nya lo na bye kwo da shike yi ta mi ya to kwo bwa m, kwo kwa ya gye m.
- ²N sapai aza bei nyi n gaiciya ga yi sosai. Abei zhin a kpe ba ye ntu ba gaiciya ga bo.
- ³Dna gaiciya ga, yi kpe lo ge Shekwoyi nu bei zhin anyi n nanyai vinya n ba fi n ba nyi. Owo beda nu bei zhin ba, nsasayi kwa zhin.
- ⁴Gaiciya ga nu bei zhin Habila wa vi Shekwoyi bo. Wo bei be n nyagayi n kwo bei da Shekwoyi ndu Kayinu nya. Shekwoyi bei la Habila gwo bedo n wo nyaga yi. Habila gwo bedo n wo nyaga yi. Habila lafi amma dole ya dna wo wye ya gye wo bei kpe ma Shekwoyi.
- ⁵Enoch bei zhin zanu n gaiciya gayi. Wo bei la kpema Shekwoyi. Shekwoyi kwa wa dagma n wo gaiciya gai. Ntu cenu wo to bo fi m. Shekwoyi bei la wo la lo n cei n 'shemi.
- ⁶Shekwoyi ta wo ho agmada m ndei ho to n gaiciya ga yi m. Oza n wo ye wa be wa ba dole wa ga wo gaiciya. Wa kpe ge Shekwoyi zhin wa ga aza lada n ba zan wo shin nyi.
- ⁷Nuhu bei zhin 'zanu n wo bei kpema Shekwoyi. Shekwoyi bo wu wo anya n ba ba zhin. Nuhu bei la gaiciya ga Shekwoyi wa zhin eya ntu ge kwa gni wo puwa. Aza je bei gyi abye ba zhin laifi. Ba to bo ga Shekwoyi gaiciya m. To ba viwo begye m, Shekwoyi bo gwo Nuhu ntu wo gaiciya ga bo, n wo bo vi yi.
- ⁸Ibrahim kwa wo bei kpema Shekwoyi sosai. Dna n gaiciya ga wa wo Shekwoyi begye. Shekwoyi bo gna wo ge wo fa wa yi wa lo ekni do. Shekwoyi bo ku gna ge wo ba ga Ibrahim ekni yi. Wo bolo, to woi kpe aba n wo lo m.
- ⁹Wo bei zhin zhibeyi nu dna ekni alkawali nya. Ama wo bei la kpema Shekwoyi. Wo bei dna n na lubui n wo puwa yi vinya Ishaku bedo n Yakubu yi ba bo fi n na lubui ce. Shekwoyi bei ga ba alkawali ngye Ibrahim.
- ¹⁰Ibrahim bei pmi Shekwoyi wa be n woyi n zhimi. Ezhi n Shekwoyi wa mi n wohin yi.
- ¹¹Saratu bei n gaiciya ga yi, Owo gaiciya ga bo zhin wo wa ma obi woi la kwo. Wa gaiciya ga ge Shekwoyi ba nuwo alkawali.
- ¹²Ntu cenu, Israila yi bye bei pa n Ibrahim nu oza nwo bei la kwo sosai. Wonu zhin ebye dnagmayi ye dada. Owo abi n mwa begye n gye amwi kwo akpasu ayiwo ge oba dada. Wo bei la api mi ba n 'shemi.
- ¹³Aza ye vinya baku kpe ma Shekwoyi. Nya wo bei zhin ba alkawali, ba bo la kwo ga gaiciya. Amma ba to bo gwo anya vinya n Shekwoyi bei zhin ba alkawali

m. Ba bei la ye ba gwo alkawali, amma ba ku ba nya fi. Amma ba bei nagmadayi ntu ge ba bo kpe ge anyi ye to zhin ba nya num. Eyi puwa lo n 'shemi nu.

14Oba beda kwo wu ba wyetu. Aza bei zhin bai shi awye n 'she nu, oba puwa nu.

15Ba bei n sai nyi ba jeze lo anyi gmada. Ama ba to be ye lo bo m.

16Maimako ba bei kni agmada eshe nya nu, ntu cenu a da Shekwoyi lo.

17Sanu Shekwoyi beitu Ibrahim mwi cei nyi wo bo dudu wa kpema wo. Ntu cenu wa ga Ishaku owo bi. Har wa ku shiri zhin wa zun wo sha ntu sadaka bo.

18Wo bei ku shiri zhin wawu Ishaku. Koda shike Shekwoyi bei ku gna wo ge Ishaku ba zhin obeye tukwo da.

19Wo bei ku kpe ge Shekwoyi ba je Ishaku wyewyeyi ga. Enya nu kuwa nkwo bo zhin, Ama n Ibrahim aba Ishaku bola fi ama wa jeze be anyi.

20Dna n gaiciya ga Ishaku bei tu Yakubu anabarka bedo n Isuwa yi ntu na bye bo.

21Yakubu bei fi woi la kwo, ama kafin wo fi wo bei yi Yusufu abi vinya wa zhin aduwa kpe ba, wa tu ba anabarka. Duk dna n gaiciya ga nu n wo bo zhin abo ye.

22Yusufu bei n gaiciya gayi, wo bo fi woi la kwo ce. Wo bei da a Israila gni-gni bo n Masar. Wo bei ku kpe ge kwo ba zhin lo nu. Ntu cenu wa gna ba ge ba bei la wo asunkun ku lo ncei dna n gaiciya ga nu n wo bo da ce.

23Musa dada n wo'ya yi bei n gaiciya ga ce. Ba bei la gaiciya ga ge Shekwoyi ba gni ba bi n fi. Cenu bo zhin ba sowo har apya ta. Amma ba to bei zhin bai wo Firauna dna m.

24Musa wohin bei gaiciya ga. Wa mwa har wa zhin zayakwo dna Masar, to wa ye ayi wo ge Fir'auna nyigun nugun m.

25Wa ye wa sun wahala n Shekwoyi azayi, wo to bei ye wa dagma dna n laifi m.

26Wo bei gna wo ta ye wa zhin abo n gye a Masar yi abin, ama wo bo gye kwo ba wo du wa sun wahala ntu Shekwoyi alkawali bo, Wo bei la gaiciya ga ge Shekwoyi бага wo lada n du Masar nya.

27Dna gaiciya ga wa fa Masar, wo to bei wo dna ge esu ba gyi minagyi m, wo bei kpe ge Shekwoyi kunsun lo n woi, Wa kpe ma Shekwoyi iko.

28Wo bei ku kpe ge Shekwoyi ba gni wo aza, ntu cenu wa gna aza ge ba wu kugya ba pmiya kwo ami n na bokunmi she, sanu malaika efi nya bei duya wo to bo wu ba bi kmisunyi m. Amma puwa doho-dohoi nkwo to bei ami yi kpem, wa wu abi kmisunyi.

29A Israila yi bei la kpema Shekwoyi. Ba pi ola dnagmayi ya n gye ba piya n kni kawai. Ama sanu na Amasar yi bei tumwi ge ba lo, ba ku bwi nuwan.

30Dna n gaiciya ga Jerikwo galu kwa 'baya, A Israila yi bei she galu gun anyipyei tnaba. Shekwoyi gbega nu bei. Bavi gbega yi kwa.

31Rahab bei zhin karuwanu. Ama wo bei la gaiciya ga Shekwoyi iko, wo to bei fi n kunsun nwo azaje yi m, ba bei fi ntu ge ba to bei vi Shekwoyi begye m. Amma Rahab bei la azhi-pmigye yi gwo.

Aza manayi nba bei du anyi kala

32To, mi ba shada gena? Esa lami gba, n mi ba da aza gaiciya ga bo n gye Gidion, Barak, Samson, Jepheta, Dauda bedo n Samuila yi.

33Oba vinya ba bei kpema Shekwoyi, Ba bei gyi kun, ai ku asu ya n ba gyi nyi, bai gyi be, ba gwo anabarka. Har ba wu agagwo, to agaba mi nba nyaho zhin.

34Ena to bei shin ba gyin. Abeyakwo to bei shin ba wu m, Azaho bei ku kala bwa. Aza ho baku ze abezhe-yakwo dna soja. Ba nya a soja je ya har bai busi.

35Azaho bai ku aza kala n vingwo, Azaho ba ye ge ba sun wahala ba vi Shekwoyi. Ba bei ku kpe ge Shekwoyi bei je ba kala ku ba bwa wye-wye yi nyalo-nyalo nya.

36Abei zhin a ma azaho san, azaho a sa ba naiya n busi yi, azaho kwa a pa ba a ya ba fi n kurkuku.

37Abei kni azaho akuta har ba fi. A sa azaho pisa n gun aba n'bei. Ama abei ku ba wu n abe-yakwo yi, azahoi vi ana-pa na kugya pai. Mikun yi gun ba har nyai san ba a zhin ba bo ntna sun-sun gye.

38Aza ho bei zhin aza manayi nu sosai, ama ba bei zan fi n Zhabui, n na pai. Ba fi n nabwo nkni.

39Ba bei Ikpema Shekwoyi a zhin shiri ntu yi ye n bai, ama zaho-zahoi nba to bei gwo anya vinya n Shekwoyi bo zhin ba alkawali m.

40Lada lo n du ba nya n Shekwoyi a zhin shiri ntu yi bo, ntu cenu Shekwoyi yelo ba pmi yi ya kun gna.

Aibraniyi 12

1She azalo n mwa bai shi ya, wye nyi, yi ku akaya shanwoyi ya, yi ku a laifi fa nba shi yi nyi to bai ye ge ya gyi abye nyin. N nabai ya zan-zan dna n gaiciya n hakuri yi n Shekwoyi la shi n ya bye nyi.

2Yi shi Yesu nu awye, wo nu zhin yi gnabye. Vinyikwo to bei wo wo wa fi ntu ya laifi bon. Wo bei kpe ge kwo ba be wo n mwa-mwai. Nsaiye kuwa wo tu lo n naba duduyi n kunsun n Shekwoyi n 'shemi.

³Aza nukwoyi bei ga Yesu wahala, ama wa zhin hakuri. Yi dna wo wahala wye wa ze eyi gnabye. Deye ba bma yi zhin ya bwa kala.

⁴Kwo dama yi to shi gusun n laifi yi kwo n jarabai har yi la amisa kpe bedo n ami yin.

Shekwoyi ta-ta bmiya ntu yi bo

⁵Hola Shekwoyi beda zamwi nu? Wo bei gna ge, “Omi nugun to gyi minagyi 'sa Shekwoyi wa gaho tata. To bma bugba ya esa n wa wuho oho doknunnu gbi m.

⁶Shekwoyi zhin wa dna owo abi zokwo wa ga ba tata. Sanu wo ga yi tata, kwo wu gye yi zhin wa nya nu.”

⁷Shekwoyi zhin yi-fi n zokwo shi aza je zhin oba bi fi n zokwo nyi. Zaho-zahoi ta mi wa shi n wabi to wa dna wo zokwo m. Yi zhin wa bi nu, ntu cenu woi ga yi tata.

⁸Dole ata abi, oba dada ba zhin Ba fi n zokwo. Amma n Shekwoyi to ga ho tata m, ho to zhin wo nya nu m.

⁹Yi zhin ya ga ya dada mwa-mwa. Yi ta nya ba bo m, bai ya ga yi tatam. Ntu cenu yi gwo Shekwoyi tata n na gmadayi. Shekwoyi ye yi n du eya dada anyi nya. Wa ga yi tata ntu ge wo ye yi lo.

¹⁰Eya dada anyi nya dna yi zokwo aye fyewyi nu kawai. Amma Shekwoyi zokwo dna, gaiciya nu n saho-sahoi. Wo ye ya gwo wo gyi-gyi, wo ta zhin wye m.

¹¹A tada oza sanu na ta won, sai dai ko la duya. Kwo zhin ha fa a zokwo nukwoyi ya vi zokwo do na gmada yi bedo lafiya yi.

¹²Laka la kwo da shike a laho be, ha bwa kala njesun.

¹³Zhin ha pita zokwo manayi. Aza tna kala na nyasan yi n ba vi kwo ba ta miya ba wu bahin m. Amma baba ku ze akala da dna n gaiciya ga.

¹⁴To je zaho-zahoi m, ha zan-zan gyi-gyi-yi cici, Ntu ge aza n ba to gyi-gyi-yi m, ba ta gye Shekwoyi wye m.

¹⁵Fye dna je wye n fye ba bwa Shekwoyi anabarka n fye to ye ge nuwun kwo lo fye a tasun. Ko zhin kwa be n wahala yi, kwa to aza wye-wyeyi bwa.

¹⁶To fya zhin anagbaya m, to fya shi Shekwoyi lafya-lafya, n gye Isuwa m. Wo bei kun wo gado ntu mikun bo. Kwo bei zhin bo gboloyi nu n wa ba.

¹⁷Sanu awye bei kna wo ya, sai la duya, ko da shike wo bo ci bwi ntu wo laifi bo, ama duk gboloyi nu. Ato bei je woyem.

Shekwoyi begyi

¹⁸Ho to shin wahala sun n gye a Israila nya m. Ba bei ku lo ena, ba ku lo wyegma, ba ku lo ogma nukwoyi, abo deye ba bei gye ba n Sinai pe nu har bai wo edna njesun, Shekwoyi bei ga ba owo awyidna n ya nu.

¹⁹N wyihi, ba wo ai bye a kna-knaci, ba wo Shekwoyi begye n gye ogma har kwoi shan ekni ashan. Har ba gna Shekwoyi ge wo la fa beda bo, ntu dna bo kurum.

²⁰Ba to mi ba mizhi m, ntu nwa awyidna bo. Gama nyakpa doho-dohoi n kwo bei to epei, kwo bei la fi.

²¹Kwo bei zhin obo dnawo nya nu, Musa nwohin wo bei ku dna wo, wa gna ge, "Mi vin lo mi-i wo dna."

²²Amma fye ku be Sihiyona pe, kwo nu zhin Urushelima eshe nya. Fye ku be amalaika yezhi ba, agmada 'ba.

²³Fyehin kwa wato zaho-zaho n wo eye katu lo n Shemi, fye be Shekwoyi-wada yi aba, fye be azafun aza gni-gni yi nya aba. Ba lo n 'she, ba ku ze n nu-nuyi.

²⁴Fye ku be Yesu aba n wo zhin yi viye yei n alkawali woi-woi aba nyi. Fye ku be Yesu ami aba n ba zhin za gafara nyi. Owo ami du Habila nya lo. Habila ami bei zhin nya nu n na ba gbata.

²⁵Kna wo beda t nubua n wo dabo n hoi nyi. Abei ga a Israila yi tata ntu ge ba bei zun Shekwoyi beda gna-na n Musa 'gbe, oza n wo zun wo beda gna-na n Yesu gbe wo ba gna fifi nu.

²⁶Shekwoyi begye nu kawai bei zhin anyi ba shan-shan, sanu wo bei da bo tu n Sinai pe nyi. Sanu wa je bo da duk bedo n 'she yi kwo bei shan-shan.

²⁷Shekwoyi bei shi nya ya nkwo to na gbegye yi lon, anya n ba mi zhi lo ba nu bei ce zhi kawai.

²⁸Shi yi nbegyì lo, n zaho ta mi nkwo gwoya nyin, yi zhin bo nkwo ba da Shekwoyi, yi zhin wo bauta, nbugba godiya nya yi, yi ga wo mwa-mwa ndanwoyi.

²⁹Ntu ge eyi Shekwoyi zhin ona nu, nkwo gyi aba nyi.

Aibraniyi 13

Zokwadna n gnabi-i

¹Yi ye najeyi ntu ge yi zhin gmanyi-gmanyi nu.

²Yi ye na zhibeiyi Aza ho bei ku zhin lo nu na malaikayi amma ba to bei kpe m.

³Pa za bo nba fi n kurkuku nyi, gye she a ga aza wahala. Sun wahala n kun-sun bai. Sun wahala yi n gye kwo zhin ho nya nu.

⁴Fye la mula bo shi dei-dei. Kada a zhin fye agma fya wunya. N fya wunya Shekwoyi bei dafye wa.

⁵Fye to ku ze agyiwye ye yi m. Zhin godiya n nya yi n ho cei lo. Shekwoyi bei gna ge wo ta ya yi m. Mi kun-sun lo n fyei nyalo-nyalo. Nba ga fye nyagyi cici.

⁶Ntu na alkawali ye bo yi ba da bo ntna edna, "Shekwoyi nu zhin mi bmazhin yi mi ta wo oza dna m."

⁷To fya ze ofye azakowyi amwi dna n Yesu ye m, Ba bei kpema Shekwoyi ba zan-zan n dna woyi. Fye vi ba pita bwi.

⁸Yesu ta shan do n, Nya wo bei nyi n su nyi, wo zhin kwo nu n naiye kuma har nyalo-nyalo.

⁹Shi Shekwoyi ta shan do nyin, to ye a malami doho-doho ba dna fye kwoce n nyawu nukwoyi m. Fa Shekwoyi alheri kwa ga fye kala. To ge anyagyi ho pya awyidna ko kwa zhibaje m, ba zhin banza nu-nnaza ba nba gyi ba nyi.

¹⁰Eyi nyagyi gyi zafun nya kwo zhin zundu nu oza n wo dna awyidna kwo-kwoyi sunta wo to deye anabarka yi lo m.

¹¹A Yahudiyi bei zhin apma n na nyakpa yi nu ntu sadaka bo, ba bei zhin ba wu nyap-kpa ba lo ba gyi kona n zhimi avun. A mi da ba be n cei n Shekwoyi nyakun. Deye bei zhin sadaka ntu alaifi bo nu.

¹²Cenu bei zhin a wu Yesu n pifun, wa ga sadaka owo nyai nya ntu yi a laifi bo.

¹³Yi shegun Yesu n zhimi avun. Wato to ge nanyi ye mi m. Yi sun wahala bedo n vinyikwo yi n kun-sun woi.

¹⁴Anyi ye to zhin yi nya nun, yi pmi eya 'pa, nyalo-nyalo nya nu, wato eshe.

¹⁵Yi ga Shekwoyi mwa-mwa, kwo nu zhin yi sadaka ga. Yi zhin dna n Yesu ye. Yi gna azaje owo eye mwa-mwa bo, yi ci wo.

¹⁶To ze bemana zhin amwi m, zhin abo manayi. Ce nya ga aza n ba to cei lon. Nyaga nu Shekwoyi ye n cei.

¹⁷Ga aza mwa-mwa n ba du ho, nwyihoi ba bei wu Shekwoyi oba tnu-tnu. Ndei fya ga ba mwa-mwa tnu-tnu ba da ba zhin. Ko ba bma fyehin zhin ce.

¹⁸Fye zhin aduwa ntu yi bo, yi ye ya zhin tnu-tnu behinhin nya nu n befyece yi.

¹⁹Ntu cenu fye zhin aduwa ntu mi bo, ko n naiye ma fye ya zhin, mi cei pma ma be fya ba sa fyewyi.

²⁰Shekwoyi wo tu fye anabarka, wonu bei la Yesu ka. Yesu kwa wo nu zhin knikna yi, wotu fye anabarka ntu owo ami zeya bo, dna n na alkawali woi-woyi.

²¹Shekwoyi wo gba fya bukata ntu ge fya zhin wo beye. Wo zhin bo n yi-i, nwo cei pma, wo zhin ntu Yesu bo. A ga Yesu mwa-mwa nyalo-nyalo.

²²Omi-azaje, kna tñubua n ßo mi ku da dna n wasika ye mi.

²³Ala Timatawus loya n kurkuku, yi ßa kun ße n woi. Kpekni sa fyewyi wo ßa ße ma ba.

²⁴Fye ßi fya atukwo da gna ga mi, a Yesu viyi dna nu Italiya, ßa ßi fye gna lo.

²⁵Shekwoyi alheri ßa kun-sun n fyei nyalonyalo. Amin.

Yakubu

Yakubu 1

¹Wasika ye gmi n Yakubu akun nu, Shekwoyi bara n Dagayi Yesu Kristi nya yi. Kwoi lo a Yahudiyi a Yesu-viyi aba, n ba busi yafi laba nyi, mi tnu fye lo n gnabiyi.

Azhingye Mi Alu

²Omi azaje ye-yeyi, fye sin wahala lo, fyei gye azhin? Fye dagma.

³Ntu ge esa wahala nyi, efye bugba-bwa zhin kwa mwa.

⁴Fa efye bugba bwa kwa mwa har fya ze aza hin-hin, nfyen ta gyi nyaho san.

⁵Nfyen n cei pma fya kpe enya n Shekwoyi ye fya zhin, fye nya wo, wo ba wu fye n bugbai gmanyi, gama wo n shiri yi zhin lo wa ga oza beyekpe n bugbai gmanyi, oza nwa nya wo, wo ta na bon.

⁶Ama n ha nya wo, la awyetu n ge woba gaho, gama bugba shaka zhinyi wu ngye anuwan dokwo nu n ese zhin kwa cekwo abwaya nyi.

⁷⁻⁸Shaula doho-dohoi nha zhin, hoi to n bugbai shi lo pin, shi ho pmi lo bwaye ha pmilo bwaye. Nhoto nya n gaiciya gayin, to gye ge Dagayi бага ho amsan.

⁹Yesu-viyi nwo to zhin nyaho nu dna n na nyin, a dawo, gama wo zhin nyaho nu n Dagayi abye.

¹⁰⁻¹¹Ama nyabwayi dagma n tuge owo nyabwa to zhin nyaho nu n Dagayi aban, gama esa fyewyi wo ba duya ngye mamawyi n kwo bmiya-bmiya la duya kwoi la bwa, kwo la fi ntu n nyipyeyi wo-wo bo. Anyabwai wulo, nu Safyewyi ba ba fi ba fa ba nyabwa n ba avun.

¹²Bugba bui-da nu oza n wo wan wohin shi, to wa kaya dna n jaraban, gama n na avun wo ba bwa rawani wye-wyeyi nyalo-nyalo nya, n Dagayi a zhin aza alkawali nba ye wo nyi.

¹³Pa esa n oza ye wa zhin benukwoyi, Shekwoyi nu ta zhin wo jaraban, gama Shekwoyi ta zhin benukwoyin, woi ta zhin aza jaraba n benukwoyin.

¹⁴Jaraba kun n oza bugba nu, oza n wo n shakpei fi n wo mi.

¹⁵Abonubo-zhin nukwoyi ye zhin oza wa zhin abo nukwoyi, n na avun kwa zhin oza wa gwo tata efi nya n Shekwoyi aba.

¹⁶Ntucenu fye to bwi zokwon, emi azaje.

Bemana Gmi N Shekwoyi A ba Nu

¹⁷Ama enya manayi doho-dohoyi nkwo bmiya kwo gmi n Shekwoyi aba nu, Owo na zhin buzangna, woi bmiyana nyalo-nyalo, n tna jejelu kwo kuwa wyegma.

¹⁸Njesun nyipyeyi a gmadanya nu n wo aba ewyi n wo bei gayi awye-wyeyi woi-woi n cei nyi, ntu gaiciya owo beda nya ɓo, ya ku ze, aɓo kmisunyi, Owo puwa woi-woi nya.

¹⁹Omi azaje ye-yeyi fye to ze amwi ge, kwo gna bmiya oza kna beda tnubuan n mwa, ama oza dabo cewyi, to oza gyi minagyin.

²⁰Gama minagyi ta zhin yi ya ze aza manayin, shi Shekwoyi ye ya zen.

²¹Ntu cenu fye la anya nukwoyi kunya nfyeyi awye-wyeyi nɓa to bmiyan, n na ɓo yi n ɓa she fye kna, fya gba fyehin tukwo fya dagma shi fye la nabari manayi woi-woi gwo, gama kwo ɓami kwa gni yi awyewyeyi, ngye shi kwo shi yi abugba bwa nyi.

²²Fye pa ge beda nu n oza ɓa zhinkwo, to ge oza knatun-bua kawai n, Ntu cenu fye to dna fyehin kwocen.

²³Gama n oza wo, to wa zhin, wo wu ngye ozanu n wo shi wohin awye n maganyi.

²⁴Shi wo la kala wo ta shan wohin awyeshi wa shan pa ngye shi wo wun.

²⁵Ama n oza shi wohin awye biwu n Shekwoyi owa, nkwo zai lo-lo yi ya nyi, wo ta pa kwo ɓonu gmanyin, ama wo ɓa zhin obo n kwa da. Shekwoyi ɓa tu wo anabarka dna n ɓeho-ɓehoyi n wo ɓa zhin.

²⁶Oza nwa ci ge wo zhin Yesu-viyi nu, to wa wan wo nyitala shi nkwo gyi-gyi-yi ngye ebe nyin, wo dna wohin kwoce nu, owo knunnu zhin gbeloyi nu.

²⁷Yesu-viyi nwo gyi-gyi-yi ntna abe nya n Shekwoyi Dada awyeba, ozanu n wo shi a kuwyi bwa, n na anyigbaya, n zayi n wo kpema Dagayi n gaiciya yi, to wun-wun yi ya, kwo n tucegye n na anyi nya yin.

Yakubu 2

To Kni Aza Awyem

¹Omi aza ye-yeyi fye ɓa gna n wuna nu ge fye zhin Dagayi Yesu Kristi nya nu, Dagayi latu nya, fye gna ye n na anyabwayi nu fyei zhin awyekwoyi nukwoyia?

²N oza lobe efye aduwa nyakun, n na aje nakwoyi kpe, n zinariya abwanyayifi, njesun ozado wa lobe n wo naje sakunyi kpe.

³Fya gnaye n nyabwayi nu, fya ga wo aseseba manayi fya gna wyekwoyi ge, “La gni n bwai kwo ha sase.”

⁴To, fye ye n zayi n tu n wo nyabwa ɓo kwa wanu ge fye kni aza kni-kni le nu.

⁵Fye wo, emi azaje, Shekwoyi nla awyekwoyi kni ba ze anyabwayi dna n gaiciya ga, Eshebemi zhin ba nya nu, gama cauta nu n Shekwoyi zhin aza alkawali nba ye Wo.

⁶Ama dna n na aza ngun abahi fye la wyekwoyi ci wyegba, fyei dnawo vinyikwo. Fye ta palo ge anyabwayi nu lo n fyei n na awada ban, ai gyi fye tara ai gu fye fi n wyegma nyakun.

⁷Nsai mwa begye obanu ma Yesu Kristi esan. Oza n na yi fye n woye manayi nyi.

⁸E, behin-hin, kwo bmiya fya shi Dagayi wyidna bwa, “Tilas ha ye nho kunzhinyi ha bmawo zhin shi ho ye hohin tukwo.”

⁹Ama fye ta shi Dagayi owa ye bwa lon, nfya gnaye n na anyabwayi fya labatu, kwo zhin benukwoyi nu.

¹⁰Oza n wa shi awyidna bwa vinya wa fa gmanyi wo n iaifiyi lo ngye oza nwo to shiba bwan vinya.

¹¹Gama Shekwoyi n wa ci ge hota la nyikwo n wo ebayilon, wo na ci ge hota wu zan, ntucenu kwo ho to zun mula owa gnanan ha zhin anagbayin, ama ho la oza wu, ho la Shekwoyi owa zungna-na vinya, hola ze owa gnazunyi, laifida nu nwa bye.

¹²Abei da fye owa, kwo fya zhin kwo to fya zhin obo n Kristi yen. Ntucenu fye zhin peceye n nyayi n Ifye zhin n nyayi n fye da.

¹³Gama ato bei gye aza sun-sun n ba to gye aza sun-sun. Ama nha gye oza sun-sun Shekwoyi bei gye ho sun-sun esa n wo bei da ho wa cei.

Gaiciyaga Nna Tnu-tnu-yi

¹⁴Emi azaje ye-yeyi, mi gye kwo apma, nfye cige fye n gaiciya gailo, fyei zhin a Yesu-viyi nu, ama to fyei bma azaje zhin. Gaiciya-ga yi pya ba gni oza?

¹⁵Ndei ho nugundo yilo n wo to n nyagyi yi lo na jekpeyin.

¹⁶Ha gna wo ge, “To, lohonya Shekwoyi tu ho anabarka, ha bwa jekpe, ha gyi nyagyi n bugbai gmanyi,” To ha gawo ajekpe kwo nyagyin, mi gye kwo ampanyi?

¹⁷Ntucenu fye gye, gaiciyaga to kunlo n kwo gmanyin, Tilas ha zhin bemana ha wu ge ho n gaiciya gailo. Gaiciya ga n kwo to wu kwohin n na tnu-tnu manayin, kwo to zhin gaiciya ga nun, kwo zhin gbeloyi nu, fi-fiyi njesun.

¹⁸Ama zaho ba nabo ge “Fye gna, zokwo n kwo lo Shekwoyi aba gaiciya ga nu gmanyi, to ma cige atnu-tnu n na pmailo n mwa, gama n tna atnu-tnu manayi, ho takpe kwo ho n gaiciya gai lo, kwo ho to n cei lon. Ama zaho-zahoi bakpe ge mi n gaiciya gai lo ngye shi mi zhin abo n wu.”

¹⁹Aza lo n fyemi n ba ye n cei shilo ge gaiciya ga gmanyi nu kun lo? Gaiciya ga n Shekwoyi gmanyi, To, pa ge aljanu ga gaiciya lo nu ce, n kalayi, har bei vin n dnayi.

²⁰Azacije, fye bei tumwi n kniwyiyi nu ge, gaiciya ga to n na pmayi lo ntna abe zhin n Shekwoyi yen ma? Gaiciya ga n kwo ta wu kwohin n na tnu-tnu manayin kwo to zhin gaiciya ga nun.

²¹Fye to ye palo ge kwo Ibrahim eyi dada abei yiwo oza manayi ntu n wa tnu-tnu manayi bo nu n wo bei zhin nyin, n wo bei ye wa zhin Shekwoyi beye, har wa ga owo nugun Ishaku bigba gmanyi, wa fi tu n bagadi n?

²²Ho ku gye, wo bei kpema Shekwoyi, n mwa har woi cei pma wa zhin obo n Shekwoyi wa gna wo ge wo zhin, owo gaiciya ga bei nunuyi ntu n wo atnu-tnu manayi bo n wo bei zhin n Yi

²³Ntucenu kwo bei zhin shi Shekwoyi beda da n ge Ibrahim bei kpema Shekwoyi. Dagayi wa yiwo oza manayi n Shekwoyi abye, har ayiwo nge, "Shekwoyi nugundo."

²⁴Ntucenu ho ku gye, agni oza ntu n nya bo nu n wa zhin, n nyayi n wo ga gaiciya.

²⁵Rahab Karuwa zhin misali deye nya nu. Abei gniwo ntu nya bonu n wo bei zhinyi, oza n wo bei so atnutnuyi fi, wa tnu n bai n zokwo do gbo.

²⁶Shi nayi n kwo to n zafun yi n zhin fi-fiyi nu nyi, elonu gaiciya ga n kwo to n na atnu-tnu manayin, zhin fi-fiyi nu.

Yakubu 3

Wan Ho Nyitala

¹⁻²Omi azaje ye-yei, fye to gna ye, fya ze anya-wuyi num, gama yi zhin ya bwi aba nsayi mwa begye. Esa yi adini wuyi, n yi kpe bemanayi ye nyi, n ya zhin benukwoyi eyi tata bei la du azaje nya. N'za mi wa wan wo nyitala, kwo wunu wo ba mi wa wan wo nayi shi vinya, n zokwo doho-dohoyi.

³Yi bami ya pmi doko awye, shiyi ncei pma ntu na luzami bo n yi dna n kwo gbe nyi.

⁴Eya busi nawyi kwo zhin kwa pmi eya awye lo, aba vinya n eyada n cei pma kwo lo, kwo esayi dnakala.

⁵Nlonu nyitla zhin enya biyinu, ama kwo wun anya ya n mwa, nakna biyi zhin kwa kuci yakwo dnana.

⁶Nyitala zhin ena gwo-gwoi nu. Kwo nunuyi n na anya nukwoyi, kwa du nayi vinya n mui, anapinu ku kwo ena n kwohin, kwa zeyi awye-wyeyi ena gwo-gwoyi bwi-bwi nya n wahalayi.

- ⁷Aza bami ba kpa, kwo ba wu anyafanya n na luyi n na awyisala yi.
- ⁸Ama zanyikwoci ho to lon n wo ba mi wa wu nyitalan, kwo n shiri yi zhin kwa da beda kasa.
- ⁹Nsahoi kwa ci eyi Dada n wo dna n 'she nyi, nsahoi kwa tu aza kni nna zhin ba dna n Shekwoyi dogbe nyi.
- ¹⁰Nlonu beda nukwoyi n anabarkayi bai kun ngbe gmanyi. Omi azaje ye-yei kwo to bmiya lo lonun.
- ¹¹Nuwan manayi n nuwan nukwoyi, zhin kwapi n obwo gmanyi?
- ¹²Ho ba ka zaitun n gbayi shinwan? Awo, ho ta bwa nuwan manayi n snakpegye nuwan.
- ¹³Ngye hoce-ceyi lo, zan-zan cewo n bmiya ntuge be manayi zhin, n hohin tukwo-gbayi nu ba zhin akpe ge ho ce-cei lo.
- ¹⁴Dna n zokwo doho-dohoi to gna ge ho cei-cei lon, ndei ho gyi minagyi lo, hoi woshe, hoi ye hohin tukwom, deye kwo zhin akata nu.
- ¹⁵Gama shewo n hohin tukwoye yi, ba to zhin Shekwoyi ce-ce pya nun. Abeye pya zhin anyi nyanu n tna zafun, shetan nu ce abeye pya bwa.
- ¹⁶Gama aba n Shewo nyi, n tukwoye yi, aba bwa benukwoyi doho-dohoi n bo.
- ¹⁷Ama wyemwa n kwo gmi n 'she, kwo gyi-gyi-yi, n nasuwayi, kwo ye bugba fu n bemanazhin yi, kwo ye n na aza tayi, kwo ga kwihin n na aza ba, kwo nunuyi n sun-sun-gyeyi, n na bimana-zhinyi, kwo n bugbayi gmanyi, n lo cewo n tna kata.
- ¹⁸Aza n ba ga bugba-fu, ba ba bye nyabye bugbafu nya, ba do bimana.

Yakubu 4

- ¹A Kni donu be fye n na anyawuyi n guyia? Abo pwawo n na shakpe nukwoyi nu n ba fi fyemi bai sunkun n fyei nyi?
- ²Fye ye nya n fye to n cei lon, ntu cenu fyei wu aza ntuge fya bwa. Fyei wo anya she n'za cei lo, to fyei bwan, ntuce fya Iya anya n guyi ntuge fya gwo ba kwo, Duk dalili n kwo zhin fyei to n nyayilo n fye ye nyin ntuge fye ta nya Shekwoyi bon.
- ³Kwo n fya nya fye ta bwan, ntuge fye nya n na bugba nukwoyi nu, fye ye nya nu n kwo ba ga fye agmada n fye nayi.
- ⁴Fye wu ngye nyikwoza nu nwo to gaiciya yi nwo ba aban, woi ye nwo ba anuwuyi. Fye ta kpe lo ge nfya gyi nugundo n anyi yi, kwo ba zhin fye fya ze

Shekwoyi anubayi n? Ma gna fye ndei fye ye anyig-mada lo, fye ta mi fya zhin Shekwoyi anugundon sai owo anuwuyi.

⁵Kwo fye gye ge litafi a gna ge na na, esa n kwa ci ncei ge Zafun Gyi-gyi-yi, n Shekwoyi wa dna wo n yi mi nyi, wo dna yi wye n Shewo manayi'a?

⁶Ama wo gayi kala ci-ci n na bai ya gyi nasara, n na bo pwawo nukwoyi yi, shi littafi a da, Shekwoyi ga za nu kala n wo gba wohin tukwo, ama wo gyi minagyi n 'zayi n wo zhin abokwo, woi gma.

⁷Ntucenu fye ga fyehin n Shekwoyi a kun ntna tukwo mwa.

⁸Esa n ha be viwiyi n Shekwoyi, Shekwoyi ba wo viwiyi n hoi. Fye la abwana nfyee a laifi, fya fa Shekwoyi wa nu fye abugba, wa ze ba agyi-gyi-yi, agaiciya da n wo aba.

⁹Fye ci bwi ntu na bonukwoyi bo n fye ku zhin, Fye wun bugba, fya wunwye, fye wun bugba to fya masan, maimakon a gmada, fye zhin bugba zhi-zhiyi.

¹⁰Nnavun, n ha gye ho akalagba n Dagayi aba, wo ba la hotu, wa gaho kala, wa bma ho zhin.

¹¹Fye to ci aje wyegeba, fya zan aje laifi zanshin, fya da aje bon, emi azaje. Nfya zhin lonu, fye sunkun n Shekwoyi wayi nu n kwo gna ge, fye ye n na jeyi nyi, fyei gna kwo to bmiya lon, ama, of ye tnu-tnu nu to fya kni, kwo owa ye bmiya lo kwo kwo to bmiya lon, ama fye vi kwo.

¹²Oza n wa zhin owaye nyi wonu ba mi wa da owa n yi atasin. Owo nu ba mi wa kni kwo wa wuyi kwo wo gniyi. Ntu cenu kni ikoyi nu n ho cei lo ha da owa, kwo ha zan za laifi zanshin a?

¹³Fye gye wye, ofye nfyee cige, "Nna ye kwo n su yi bei lo 'zhi deye, kwo 'zhi dehi ya fi bo eye bwugyi, ya ze abwa ya gyi gyiba."

¹⁴Ho kpe beye lo n kwo bei zhin n su? Gama oho wye-wyeyi kparamwa wu ngye bwigye nu, hague kwo nsaiye esa fyewyi kwo la duya.

¹⁵Nya n kwo kuncce ha da okwonu nyi, "N Dagayi wa ye, yiiba sase ya zhin deye kwo dehi."

¹⁶Nto lonu, fye mwa fyehin tukwo nu, tukwo-mwa ye pya ta da Shekwoyi n.

¹⁷Fye pa ge, oza nwo kpe bemanayi ye to wa zhin kwon, kwo zhin laifi nu nwa ba.

Yakubu 5

Pmagna Ga Anyabwayi

- ¹Dnawye, ofye anyabwayi, esa nyi nfyē ba cibwi fyei do mi, nbugbawun yi ntu n wahala ɓo n kwo belo nfyē abye nyi.
- ²Ofye nyabwa nkubo ofye aje manayi anya ku gyi, ɓaku ze aje sakun.
- ³Ofye zinariya n azurfayi ampanyi nla kniya, kwo zhin efye benukwoyi saida. Kwa gyifye abu ngye na, Nyanu n fye ku sozhi fyehin, fya bei gwo n wada nyipyeyi n kwo belo nyi.
- ⁴Fye kna tñubua fya wo atnu-tñuyi bwici, nfyē la ɓa gyifi to fyei gba ɓa nyin. Oɓa bwici kusi Dagayi azabegye nya atñubua.
- ⁵Fye ku sun fi n na anyi, dna n anyida, fyei fu fyehin bugba, nsaiye efye abugba awye-wyeyi zhin ɓa pmi shazun nyipyeyi nu.
- ⁶Fye ku aɓo manayi-zhin-yi zun kni, fyei ku aza wu n ɓa to n kalayi lo ɓa gni bahin n fye akun.
- ⁷Nsaiye n fye aba omi azaje, nfyē zhi fyei pmi Dagayi jezeɓe nyi, fye zhin hakuri, ngye shi fwai-za zhin wa pmi har mikegye wa do wo ofwa ampanyi nyi.
- ⁸E, fye zhin hakuri, fya bwa bugba kala gama Dagayi la ga ɓe.
- ⁹Fye to da gunnu-gunnu tu n na je tukwon, omi azaje, Ho du laifi akpeya lo nu? Gama gye, Owadayi dnagmayi belo, wo la gabe, (Fye fa wa wan wyebwo dohodohoyi n kwo kunce.)
- ¹⁰Ntu hakuri ɓo dna n wahala, fye shi Dagayi anabi wye kwa ze fye ɓesisi.
- ¹¹Yi kpelo shi ɓa dagma lo n saiye, ntu ge ɓa bei la kpema wo nsahi yi, kwo dayake ɓa bei ku wahala sin n mwa. Ayuba zhin misalinu oza n wo ɓei kpema Dagayi dna n wo azhin-gye, dna n wo wahala, yi ku gye shi Dagayi shiri bei zofi n bemana, gama wo nu-nuyi n sun-sungye yi.
- ¹²Ama dna aɓo vinya omi azaje, fye to si nyasi n 'she yi kwo anyin, bwaci ge e, kwo a'a nnabai n ho ta zhin laifi a zun ho kni n.

Kagna n bmazhin yi

- ¹³Zaholo n fyemi woi sin wahala? Wo zhin aduwa ntuce, Aza n ɓa n bei lo n ɓa ɓa sa Shekwoyi ami ɓa gyi abye ɓai kwo anyi ga Dagayi, ɓai la Wo tu.
- ¹⁴Nyasan san Zaho lo? Wo yi a ikklisiya atukwoda ɓa zhin aduwa gawo, ɓa shin wo emi, ɓai yi Dagayi wa kawo gna.
- ¹⁵Oɓa aduwa nɓa zhin n gaiciya yli ga, ɓa ɓa kawo gna, gama Dagayi ɓa ka wo gna, ndei nyasan n kwo sanwo nyi laifi nu na bewo n kwoi, Dagayi ɓa zhin wo gafara.

16Fye zhin aje gafara fyei zhin aduwa ga je, n na bai fya bwa lafiya Befyece zhinyi aduwa ba zhin ikoyi mwa, kwa be n amsa manayi.

17Iliya bei zhin oza nu n gye yi, ama wa mi wa zhin aduwa nge ogma to zhin, to kwa zhin har eye ngun ata n na pyai kpe ngun tnanyi.

18N navun wa je aduwa zhin ge ogma kwo zhi, agbe-gbe ba je ya pa, anya ya pa njesun n na fwa.

19Omi azaje, ndei zaho la bma n Shekwoyi zokwo to woi ye kpema Dagayin, oza ho wa bma wo zhin wa gye Gaiciya.

20Ozahi n wa jezebe n woi n Shekwoyi aba nyi, wo la wyewyeyi bwi-bwiyi gni n efi, kwoi be n owo a laifi gafara zhin yi n mwa.

Bitrus I

Bitrus I 1

¹Wasika yi gmi n Bitrus akun, Yesu Kristi tnu-tnuyi, Kwoi lo a Yahudiyi a Yesu viyi aba n na nya ba ya n Urushelima, bai gnami fi laba n Buntus, Galatiya, Kapadokiya, Asiya, n Bitniya yi nyi.

²Oma nugundo, Shekwoyi Dada bei kni fye tunyi n sapa, Wa ku pma kpe ge fye ba ze owo abi, Zafun Gyi-gyi-yi lo tnu-tnu lo n fya bugba mi woi zhan fye ya n Yesu Kristi ami yi, woi zhin fye fyei zhin obo kwo dawo, alheri n bugba-fuyi ba la lakpe nfya ba.

Agmada N Mwi-mwi Yi

³Mwa-mwa vinya Shekwoyi nya nu n Dadayi, eyi Dagayi Yesu Kristi nya, ntuge owo sun-sungye tnazoyi nu na gayi esa a shan yi ma. Nsaiye yi sase n na awyetu wye-wyeyi nyalo-nyalo nya yi, ntuge Kristi bei la laka n efi.

⁴Shekwoyi n cauta dnagmayi so shi owo abi lo n 'she; kwo gyi-gyi-yi lo, kwoi ta shando aigna kwo bom kwoi ta shan zom.

⁵Shekwoyi, dna n wo iko yakwo, wo ba shi fye bwa fya si bo n lafiyai n nabai fya bwa fya si bo n lafiyai n nabai fya bwa kwo, ntuge fye kpema wo lo. Kwo bei ze ofye nya dna n nyipyeyi kmaknayi n kwo belo nyi zaho-zahoi wo gye.

⁶Ntu cenu a da fye n mwa, a gmada yakwo lo n fya bye, kwoda shike ezan dna bo lo n saiye kpa ntu mu-mugye bo nba be fya ba nyi.

⁷A wahala ye be da fye ntuge, a mwi fye gaiciya ga gye nu, agye kwo kwo n kalayi lo, n gyi-gyi-yi, a mwi kwo gye shi ena zhin kwo mwi zinariya gye nyi kwa zhan kwo ya, ofye gaiciya ga du zinariya lo n latu n Shekwoyi aba, ntu cenu n fye gaiciya ga migni n kalayi n kwo mutu, avun, dna n wahala abednai, kwo ba be fye n ci-ci yi, n mwa-mwayi, n latuyi ewyi n Yesu Kristi bei jezebe nyi.

⁸Fye yewo lo, kwo da yake fye to shin wo gyen. Fye ta gye wo lon, ama fye kpma wo lo, kwo nsaiye a da fye lo n na gmadayi n na ta shin kwo bedan,

⁹Efye lada n na bye deye ntu fye gaiciya ga bo, okwonu zhin efya wye-wyeyi gni-gni.

¹⁰Gni-gni ye zhin enya nu n na anabi to bei n kwo awyega yin, kwo da yake ba bei ku ka nkwo tukwo, ba bei n na benya-nyai mwa n kwo awyega tukwo.

¹¹Ba bei ye ba kpe esa ye n 'za yi n Kristi Zafun, nkwo bei dna bami nyi, bai da bo tu n ba tukwo, esa wo bei gna ba ge baka nya tu n Kristi azhingye tukwo n latu yi nkwo ba vi azhingye yi nyi.

¹²Aku gna ba ge abeye ta zhin n ba wye-wyeyi sa nun, ama nna aye begye avun nu. Nsaiye aku Nabari Manayi ye wuyi pei-pe, Abei zhinyi kwo wa'azi dna n iko

Zafun Gyi-gyi-yi nya n wo gmi n 'she, n wo bei da bo n bai nyi kwo zhin obo wo-woyi nu, obo agmada nya njesun, ntuge har amalaika ma ba cei pma lo ba kpe beye awyega.

¹³Ntucenu fye ku fyehin wan shi, fya pmi n na wye tui tu n Shekwoyi alheri nkwo be fya ba lo, esa n Yesu Kristi ba jezebe cei nyi.

¹⁴Fye vi Shekwoyi bo, ntu ge fye zhin owo abi nu, fye to jezelo fya zokwo kwokwoyi benukwoyi zhin nyam, ntuge fye to bei zhin fyei kpe bemanai ye num.

¹⁵Ama fye ku ze agyi-gyiyi n beho-behoi n fye zhin, ngye shi Dagayi zhin gyi-gyi-yi nu n wa yi fye nyi.

¹⁶A cei kafi lo n Littafi ge, "Fye ku ze a gyi-gyi-yi, ntuge Mi gyi-gyi-yi lo."

¹⁷Fye pa ge, ofye Dada n fye zhin aduwa ga wo dna n 'she nyi, wo ta kni za kni-kni, esa n wa da owa cei n. Wo bei daho wa cewo n tna gyifi tu n nyaho-nyahoi tukwo n ha zhin, ntucenu zhin beho-behoi n wo dna woi be kafin ho si eshe.

Aku Ota Gba

¹⁸Shekwoyi bei gba efye shan-shan agyiwyen ntuge wa gni fye n zokwo n kwo to bei ba lo fyei n 'shen n fye azakwoi bei wan nyi, tagba n wo bei gbani zinarya nu ton kwo azurfa shi fye shin fye nya kpelo.

¹⁹Ama wo bei gba n Kristi ami gyi-gyiyi nu, Shekwoyi kugya n tna laifi n tna ecigusa.

²⁰Shekwoyi bei kni wo tunyi n sapa to ai zhin anyin, ama n na anyipyei kmaknanyi ye kwa ze anabarka n fya ba.

²¹Ntu cenu efye gaiciya ga nyi n Shekwoyi nu n wo bei la Kristi kala n efi, wa gawo mwa-mwa n jesun nyi. Nsaiye efye gaiciya ga n na wyetui ba bwa kpema n wo nu manyi.

²²Nsaiye fye ba mi fya ye n na zai n tuge ala fya bugba zhan ya n tukwo ye yi, n nuwun yi, esa n fye bei kpema Kristi wa gni fye nyi, ntucenu fye ku kpe lalei ge fye ku yelo n jei, n bugbai manyi.

²³Ntuge fye n wye-wyeyi woi-woyi lo, fye to bei bwakwo n fya zakwoyi nun, ntuge wye-wyeyi n ba bei ga fye nyi kwo ba zo, woi-woyi deye ta shan zon, ntuge kwo gmi n Kristi nu - Shekwoyi Beda wye-wyeyi n na za aba.

²⁴E, eya wye-wyeyi anyinya ba zo, she a gbe-gbe zhin ba bmi ba wo akawu nyi. Zanyikwoci latu bwa wu ngye ama-mawyi nu n ba bwa ba kaya nyi.

²⁵Ama Shekwoyi beda ba gni-gni har nyalo-nyalo. Owo beda ye nu zhin Nabari Manayi n na bei zhin fye kwo wa'azi nyi.

Bitrus I 2

Shekwoyi Aza

¹Ntu cenu fye la nuwun gmiya n bugba. Fye to zhin abo n gye fye zhin aza manayi n munaficiyi gwo dna n mim, Fye ku tna-gaiciya ya, n eshei, n na za bedai n ba vun.

²⁻³Nsaiye shi fye kpelo shi Dagayi ye fye nsunyi, fye ku benukwoyi ya vinya, kwocedna, eshe, n na katai. Fye zhin atna fya mwa fi n fye gnigni, fyei zan madara zafun nya shi n bwi-ci yi, she obi zhin wa cibwi woi zan bebe shin nyi.

⁴Fye be Kristi aba, owo nu zhin Nyakun shishiyi Apma nya n Shekwoyi mi nya tu nyi. Koda shike aza la wo ciwyegba wo na pmailo n latui njesun n Shekwoyi aba n wa kni wo tu naza she nyi.

⁵Nsaiye fye ku ze akuta awyewyeyi, Shekwoyi wa zhin apma cei wa mi nyakun, kniyi du lo bo'a? Fye be Wa ba, (ofye n fye ku zhin anya go-go yi nwa ba ntu Yesu Kristi bo nyi,) fya ga wo anya n ba dawo.

⁶Shi littafi ada, "Shawye, mi tnu n Kristi yi wa ze kuta kni-kniyi nyakun-bwakonu nya omi ikklisiya nya, mi ta dna aza vinyikwo n ba kpema won."

⁷E, wo n latu yi lo n fya ba n fye ku gaiciya ga nyi, n na zaba n ba la wa bo na nyi, To, "Kuta ho n na a nyakunmiyi la kwa bo nanyi, kwo la ze kuta nyakun-bwakonu nya nkwo du n mwa-mwa n na pmai dna nyakun mi nyi."

⁸Littafi a je ci ge, "Wo zhin kuta bonyi-ce nya nu n na zaho aba. Apma n kwo bei zhin ba miya." Ba bei kni a bonyi ntuge bata ye ba wo Shekwoyi Beda, kwo ba vi wo beyem, ntu cenu tata ye mimiya nya, bei vi ba.

⁹Ama fye to wulo lonun, ntuge Shekwoyi la fye kni n wohin yi, fye zhin Esu a pirist nu, fye gyi-gyiyi lo n bmiya, fye zhin Shekwoyi anyanu, abeye vinya ntu ge fya wu aza shi Shekwoyi wa yi fye n wyegmaa mi woi lo fye fi n wo buzangna bewowoyi nya.

¹⁰Nsapai fye to bei zhin nyaho nun, nsaiye fye zhin Shekwoyi anya nu, nsapai fye to bei kpe Shekwoyi alheri ye n mwan, nsaiye okwo nu la fya wye-wyeyi shando.

¹¹Oma zaje, fye zhin azhibeyi nu ya. Shikwonyi ofya yi hin-hin lo n 'she mi nu, mi gyi fye wye fya bui anyi dada nukwoyi ye nya si, ba to zhin ofye nun, ntuge ba sunkun n 'fya wye-wyeyi.

¹²Fye zhin peceiye shi fye sase n fya knuzhiyi n ba zhin atnaviyi nyi, ntuge ba gye fye ngye abo nukwoyi zhin yi, shi ba gye fye bemana ba bei ci Shekwoyi ntu fya tnu-tnu manayi bo esa n Kristi ba jezebe cei.

¹³Ntu Dagayi bo, fye vi gwannati doka doho-dohoyi bo kwo esu anya nu ngye ekni tukwoda.

¹⁴N esu abmazhinyi yi, ntuge wa tnu n bai bata abenukwoi zhinyi yi nu, ba ci aza n ba zhi bemanai ce.

¹⁵Shekwoyi nufi nu efya sese manayi ba kun aza gbe n ba ci Nabari Manayi abenya to bai kpe oboye n kwo ba mi kwa zhin ba nyim, ntuge ba to shin kwo iko towom.

¹⁶Fye ku pwo owa, ama kwo to wu nu ge fye zhin benukwoyim, fye sase n gye aza nba ku pwo, ba zhin Shekwoyi beye nu gmanyi n saho-sahoi yi.

¹⁷Ga zaho-zahoi mwa-mwa, Ye n na Yesu-viyi yi nbwaho-bwahoi vinya, wo Shekwoyi dna, ha ga gwamnati mwa-mwa.

¹⁸Afyenu, fye ga fya dagayi mwamwa fya zhin obo ba gna fye vinya to ge sai bai nsunsun gyei nu kwo ye-yem, ama kwo bai zhin aza nukwoyi nu.

¹⁹Fye zhin Shekwoyi godiya n na ga fye wahala ntu bemanai zhin bo.

²⁰Gaiciya, gyiba to lon, n na ga fye wahala ntu be nukwoyi zhin bom, ama n fya zhin bemanayi fya sin wahala ntu ce har fya zhin hakuri dna n na zhin-hi mi, kwo zhin kwa da Shekwoyi n mwa.

²¹Wahala ye pya dna lo n tnu-tnu mi n Shekwoyi wa ga fye. Kristi nwo bei sin wahala n fye bo nyi, wonu zhin fye e-fye, fye vi wa pita 'bwi.

²²Wo to bei zhin laifim, to wa ca katam.

²³A kni wo akmi, to wa gba akmi tam, esa na bei gawo wahala wo to bei kun akalam, ama wa wohin fa dna n Shekwoyi akun n wo da owa ntna awyekwo nyi.

²⁴Wonu bei la eyi alaifi kaya n wohin nayi, esa n wo bei fi tu n zundu nyi, n na bai ya ze afifiyi n laifi aba, ya se ase gyi-gyi-yi nsayi. Ntuge ntu wo aci bonu yi-i bwa kagna.

²⁵Ngye akni fye bei ku bwi Shekwoyi zokwo, ama nsaiye fye la jezebe da fye 'kniknayi ofye awye-wyeyi guyi n wo gu fye n nanya kasayi nyi.

Bitrus I 3

Awyidna Ntu Puwa Agmada 'Bo

¹⁻² Anyikwoza, fye vi fyaba bo, n nabai kwo to bai kna tnuhua n Dagayi beda nfye gnaba nyin, ba ye abui ntu fye bovi bo n hali manayi. Ofye hali manai ba gna beda nbai afa beda n 'gbeyi.

³Fye to gye fya huwan n bmiya-bmiya yi n kwo be ntu nyigun zhin; bo, n na kaya nabmiyai anyi nya yin ko aje manayi, kwo tukwokni manayin.

- ⁴Ama fye ku bmiya n mi n fye abugba mi, n bmiya-bmiya yi n kwo mwasa dna n zafun, konu zhin nya manayi n Shekwoyi abye.
- ⁵Ntuge anyikwoza agyi-gyiyi sapa-nya, nba bei na wyetu yi n Shekwoyi aba nyi, bei zhin bahin nyigun lainu-ba ku ze oba 'ba beda-viyi.
- ⁶Fye la dogbe n Saratu yi. Wo bei vi wo ba Ibrahim bo, wo gawo mwa-mwa ntuge wonu bei zhin puwa tukwoda, har woi yiwo ge, "Omi dagayi." Fye vi owo fye, fya zhin obo manai ngye wo, ntuge efyenu zhin wa nyigun n saiye; obo edna nya ta shan shi n fya byem (ko misali ge fye ba wun ofyaba bugba yam.)
- ⁷Ofye aba, fye zhin peceiye n fye anyikwoyi fye zhin nubo n ba bukatayi, fyei gaba mwa-mwa ngye aza nba to n kalayin, pa ge oho nho nyikwoyi, fye kun Shekwoyi anabarka gwonu, ntu cenu, n ho to zhin wo shikwo kuncen, ata wo fye aduwam.
- ⁸Nsaiye beda ye kwo be fye abanu vinya. Fyeku ze ngye puwa yakwo bai dagma, fyei gye aje sun-sun fyei ye najei n bugba manayi n tukwo-gba yi.
- ⁹Fye to gba benukwoi ta n benukwoyi yin. To gba aza ta n ba da beda nukwoi tu n fye tukwon. Ama zhin aduwa Shekwoyi wa bmaba zhin, ntuge kwo bmiya ya zhin aza alheri, Shekwoyi ba tuiy anabarka ntu ce.
- ¹⁰Nho cei pma ha bwa agmada, ha gye anyipyei manai jesun, to laho nyitala wanshi, ha gu ho gbe n na katace.
- ¹¹La bui benukwoi si ha zhin bemanai. Zan bugbafu shin kwo hoi ba nyakwo na sipitai nu, ha vi ko dei-dei.
- ¹²Ntuge Dagayi shiwo abi awyelo, woi wo oba aduwa njesun. Ama Dagayi awyeba gyi minagyi nnaza yi n ba zhin benukwoyi.
- ¹³Nshinsun-sun zaho tolo n wo ba zhin fye benukwoyi n tu ge fye zhin bemanayim.
- ¹⁴Ama kwo kola ze ge fye ba sin wahala ntu befyece zhin bo, anabarkada nu fyei. Fye to wo ba dnam, to efya bugba kukalam.
- ¹⁵La Kristi shi nho bugba mi n gyi-gyi-yi ngye Dagayi. N zaha nya bo nko zhin hoi kpema wo lonu, ha gni n shiri yi zhin n saho-sahoi yi ha gna wo dna na tna n mwa-mwa gai be.
- ¹⁶Fye zhin obo kwo bmiya, n naza dabo tu fye tukwo, bai yi fye n naye nukwoi yi she fye vi Yesu, vinyikwo a woba ntu ba beda nukwoi bo.
- ¹⁷Pa, n Shekwoyi cei pma fya sin wahala, kwo gna bmiya oza sin wahala ntu bemanai zhin bo, afa wahala sin ntu benukwoi zhin bo.

Apma Azhigye Nya

¹⁸Kristi bei ku wahala sin, wo bei fi bwa zungmanyi ntu eyi vinya alaifi bo. Koda-yake owo wohin tukwo wo to bei n laifiyi kwo gmanyi n, nnabai wa be yi n Shekwoyi aba n tna Benukwoi. Koda-yake owo nayi bolafi, owo zafun ye n wye-wyeyi lo.

¹⁹Dna n zafun ye nu n wo bei lo a zafun aba nba fi n kurkuku, wa zhin ba wa'azi

²⁰a zafun aza nya nu tunyi dna n Nuhu anyipyei, n ba to bei wo Shekwoyi nyin ko da yake wo bela pmi ba dna bugbabwa esa n Nuhu bei ji eya nyi. Ama aza ngun nyimwa-nyimwa nu bei bwa pwo, to ba bwi nuwan yakwo yim.

²¹(Nlonu batisma zhin dogbe, dna n batisma, yi wu ge alayi gni n efi n bwi-bwi yi dna n Kristi kalala n vingwo; to ntuge ala nayi cegye shinya n, ama ntuge dna n batisma zhin, yi pmi awye wu Shekwoyi nu, yi ba wo wa zhan ya bugba ya n laifi.)

²²Nsaiye Kristi dnalo n 'she, n sase tu n mwa, mwa aba n Shekwoyi bwai-zhe-bwa, amalaika, n na iko yi n 'she mi ba yazhi lo n wa bye bai vi wo beda.

Bitrus I 4

¹Shikonyi Kristi bei ku wahala sin wa dna n na zhin gye, fye ku wo bugba pya fi, fya ku zhi n shiriyi fya sin wahala ce. Ntuge fye pa ge, esa n nayi kwa sin wahala laifi kala kwa gba.

²Fye ta shan asese fyei vi abepwawo nayi nyam, ama aba wo fye pwa ngye fye zhin Shekwoyi beye nu.

³Abo anukwoyi ye ku fye kun, n fye bei zhin fyei zhin n sapa, n na a tna Shekwoyi yekpei zhin ba dagma fi n ba nyi, ajesin ajeshin, shakpe, jesin, awye-fan kasa ngye a nyacei shangba, n na benukwoi aje yi.

⁴Ai ceba wo of ye nugundo kwokwoi, shi fye to ye-yelo fya zhin abo nukwoi n gnisun bai, shi fye bei zhin fyei shin zhin nyim, ntucenu, ba ba mafye san bai kpe fya gye.

⁵Ama fye pa ge tilas ba zhi n Wadayi vinya abye, awye-wyeyi da n na zafi yi, abei taba ngye shi ba sase wu.

⁶Ntucenu a zhin azafi Nabari Manayi wa'azi n nuwan bei wan ba nyi, ntuge koda-yake abei taba nayi n efiyi ba mi ba sase fi nba azafun ngye Shekwoyi.

Yeye Pui Alaifi Anya Nmwa.

⁷Anyi zo belo esa fyewyi, ntucenu fye lace, fya zhin aduwa nubo cici.

⁸Nya kwo du vinya, fye gyi abye fyei wu aje ye-ye dnagmai ntuge yeye zhin kwa pui alaifi nya mwa begye.

- ⁹Fye ye n najei, fyei gaza nyagyi n na gyewanba yi, nba filo n 'san ntna awyice.
- ¹⁰Shekwoyi la abozhin-zhinyi ga zaho-zahoi n, fyemi, fye zhin apma bai, ntu naza bmazhin bo, fye ce Shekwoyi anabarka ga azaje nwo ga fye nyi.
- ¹¹Ala ho yi ha zhin wa'azi? To zhin wa'azi ngye Shekwoyi nu dabo nho 'gbe yi. Ayiho ha bma aza zhin nu? Zhin kwo n kalayi vinya n Shekwoyi wa gaho, n nabai a la Shekwoyi tu dna n Yesu Kristi, mwa-mwa n ikoyi owo nya nu har nyalonyalo. Amin.
- ¹²Oma nugundo, ceto wofye fye ya sin wahala napyei n na bye deyen, ntuge obo woyi honu toye kwa bwa fyen.
- ¹³Ama ada fye dada nu ntuge awahalaye ba ze fye gmanyi n Kristi yi dna n wo wahala, n na vun fye bei bwa agmada yakwo dna nwo latu n kwo belo nyi.
- ¹⁴Fye dagma n na kni fye akmi ai tu fye 'kni she fye vi Yesu, ntuge n kwa bwa fye lonu Shekwoyi Zafun ba be fye aba n mwa-mwa yakwoyi.
- ¹⁵Fye to ye mawo fye wahala sin bo ntuge fya wu oza kwo fya wyi 'vim, kwo benukwoi zhin, kwo ge fye laba fyei fi azabo abwam.
- ¹⁶Ama kwo to zhin vinyiko bonu oza sin wahala she wo vi Yesun, ci Shekwoyi she ho zhin Yesu nya nu, har ai yi ho n wo 'ye latu nya yi.
- ¹⁷Ntuge esalasi wada nya, tilas kwa ya n Shekwoyi abiyi nu. Tunda aba da a Yesu viyi owa, aza n ba to ga Dagayi gaiciya nyi ma, a bei ka zozo nbai wuna?
- ¹⁸N na a-be-fyece-zhin-yi a pwo deca, atna Shekwoyi-viyi nna benukwoyi zhin yi ma, abei papa agye ba da ma?
- ¹⁹Ntuce nu fye sin wahal a ntu Shekwoyi beye zhin bo, gyi abye n be-manai-zhin-yi, fya kpema Shekwoyi n wa zhin fye nyi, ntuge wota yafyen.

Bitrus I 5

Beda ga Abyeda

- ¹Nsaiye ofye a eklisiya tukwoda, omi n mihin mi zhin tukwoda nu, n ma wyei m'bei ku gye Kristi woi fi tu n zundu, n mihin m'bei bwa wo mwa-mwa, n wo latu yi esa n wa jeze be cei, Oma tukwodaje, emi wyegy nfy ba ge:
- ²Fye ga Shekwoyi akni nyagyi, fyei shi ba bwa n bugbai gmanyi ntna wyice, to tu enya bo nfy ba bwa dna ko mim, ama ntuge awo fye pwa lo fya zhin Dagayi tnu-tnu.
- ³Fye toku ze abegy yin, ama fye ku ze e-fye n nakni ba mi ba vi.
- ⁴Esa n Kniknayi tukwoda bei jeze be fye bei gwo lowonyi nkwo bmiya-bmiya ta shando nyin.

- ⁵Ofye abi kasa, fye vi aza beda n ba gyilo nfya bye. Ofye vinya fye zhin aje bauta dna tukwo gba, ntuge Shekwoyi tu aza anabarka nba gba bahin tukwo, ama wo zhin gaba n nazai n ba mwa bahin tukwo.
- ⁶Nfya gba fyehin tukwo fi n Shekwoyi ikoda akun, wo ba ku fye wu n sayi nkwo wu dei-dei.
- ⁷Fye ku efya besasa yakpe Wo vinya, ntuge wo pa fye belo woi dna fye wye cici.
- ⁸Fye zhin peceiye fya ku zhigu, ntuge shetan, ofye nuwun-yi yakwo, wo zan laba ngye gaba mikunyi nu woi boh, woi ye oza n wo ba wan wa saya.
- ⁹Lami-gni esa n wo abeda ho, lakpe ma Dagayi, ha pa ge a Yesu viyi-aje n na nyiye vinya ce, sin wahala lo n ho sin nyi.
- ¹⁰Esa n fya ku wahala sin esa fyewyi, eyi Shekwoyi, n wo nu-nuyi n sun-sun gyei dna n Kristi nyi, wo ba ga fye mwa-mwa nyalo-nyalo nya. Owo n wohin tukwo wo babe wo ku fye, wa mi fye zhi, wa ze fye akala-da ndu sapa.
- ¹¹Iko zhin wonya nu har nyalo-nyalo. Amin.
- ¹²Mi ka fye wasikaye n Sivanus bmazhin yinu, n mi wyegye, wo zhin eyi zado gbenu-yi nu. Mi nna wyetu yi lo mi la bugba kala ga fye dna n wasikaye, ntuge mika seida gaiciya nya ga shi Shekwoyi tu anabarka wu. Nya ma gna fye dna ya nyi kwo kunce lo kwa bma fye zhin fya mi zhin dna wo ye-ye.
- ¹³Ikklisiya n kolo ya dna n Roma – kwo zhin fye mapuinu dna n Dagayi, - kwo tnu fye lo n kwo gnabiyi, n Markus yi be emi nugun.
- ¹⁴Fye dna aje bwa-do n na a Yesu viyi ye-ye yi. Bugba fu kwo kun-sun nfyeyi n fye zhin Kristi nya nyi.

Bitrus II

Bitrus II 1

¹Wasika nkwo gmi n Siman Bitrus aba, Yesu Kristi fyenu n tnu-tnuyi. Kwoi lo aza ba vinya n ba ku gaiciya ga latu nya bwa eyi-nya pya nyi, dna n befyece eyi Shekwoyi, n eyi Gniyi Yesu Kristi nya yi.

Fye Kpe Wo Ye Ndudu

²Fye ye Shekwoyi alheri lo woye ga fye lo abye? To, fye tumwi fya kpe woye lo abye-abye.

³Ntuge n fye kpewoye labye, wo ba ga fye, dna nwo iko yakwo, anya vinya n fye ba pmai, ntu na sase manai bo: har wo zhin wa gayi owo latu n bemanai yi.

⁴Dna wo iko yakwo, woku anyabwaje gayi n anabarka manai yi nwa zhin yi alkawali nyi. Wato woku alkawali zhin ge woba gniyiya n shakpe, n cegyeyi nkwo sheyigun ba nyi, wa pmi wa gayi owo befyece.

⁵Ama kafin fye gwo anabarka ye, fye n na pmailo n nyai n kwo du gaiciya ga, tilas fya zhin atna fya ze aza manayi; har ma kwo to zotu lo bon, ntuge fye na pmailo fya kpe Shekwoyi ye lo abye-abye, fya kpe enya ye n wo cei pma fya zhin.

⁶Nnavun fye tumwi fya ga ofye bopwawo nnabai fya ze amizhiyi nna Shekwoyi zokwo viyi yi, fyei fa Shekwoyi wa wu fye zokwo dna na gmada.

⁷Deye nu ba zhin fya wo azaje agmada, fya yeba ce har n shince n 'kni yj.

⁸Nfya gyabye lonu, fye ba gna kala bwa-bwa dna zafun har fya ze aza apmada n yi Dagayi Yesu Kristi aba.

⁹Ama oza nwo to vi abeye n gaiciya ga avun, wo zhin wyebuai nu, kwo wo ta gye wyeba cewon, woi la zamwi ge wa bwa kala wa sase manai ga Dagayi.

¹⁰Ntucenu, oma zaje, fye zhin tnu-tnu fya fyehin yi, fya wu ge fye filo n naza n Shekwoyi wa yi, woi kni. Nlonu fye ta ce bwonyin, kwo fya miyan.

¹¹Shekwoyi ba gu fye eshe abwokun-mi ya bmam, ntuge fya lo owo ebemi nyalo-nyalo nya eyi Dagayi nya, n 'yi gniyi yi, Yesu Kristi.

¹²Miye ma ce fye bepa cici n na beye tukwo, kwo shikwo nyi fye kpeba yelo, fyei viba lo cewo.

¹³⁻¹⁴ Ama Dagayi Yesu Kristi ku wumi ge ema nyipyeyi n na nyiye, baku ga nu, miba fi esa fyewyi sa n mi ye wye-wyeyi lo kpa, miba tnu fye na bepayeyi cici,

¹⁵nna wyetui ge ba lo fye mi dei-dei n nabai fye-e paba bo mi yi la-laka n nanyi.

¹⁶Ntuge yi to bei zhin yi ta fye aza cece osi nun, esa yi bei wufye iko eyi Dagayi Yesu Kristi nya nwo jeze-bei nyin. Oma wye ku gye owo mwamwa n wo latu yi.

17-18 M'bei tu n epe Gyi-gyi-yi sanu wo bei bmiyana n mwa n Shekwoyi owo Dada bei gawo nyi. M'bei ku wo, begye yakwo, ikoda, latu nya, kwoi gmi n 'she kwoi ci ge, "omi Nugun ye-yei nu nyi. Owo bo dami n mwa."

19Ntu cenu yiku gye yi-i ku kpe ge obo na anabi bei danyi kwo laze gaiciya. Kwo ba bma fye zhin, fya ku bugba ga enya ba bei kanyi, ntuge she buzungna zhin kwa bmiyana fi n na wyegma ba nyi, obo beda bmayi zhin yi kpe abo ye n ba bei ba dna yi wyegma n dnabo. Ama esa nfya dna gaiciya manai a anabi nya wye, buzungna bmiya fi n fya bugba n sayi Kristi-Kpasu Labmi nya-wa bmiya fi fye n fya bugba mi.

20-21 Ama fye ku kpe ge a anabi beda doho-dohoi to lo n kwo kadna n litafi n ba bei zhin ko nubo nbahin tukwo yim. Zafun Gyi-gyi-yi nu bei dna n na befyecei-ye mi, woi ga ba nabari gaiciya nya n kwo gmi n Shekwoyi aba.

Bitrus II 2

Amalami Akatai Nba begbednayi

1Ama a anabi akatai bei nyi nna nyipyeyi avun nyace, ngye shi amalami akatai ba kun nfye mi nyi. Ba bei ce akata n'gbai tu n Shekwoyi tukwo, bai pmi avun wu ba Dagayi nwo bei si ba nyi; ama wahala bwi-bwi nya belo tu nba jtukwo npye-pyei.

2Aza n mwa begye bei vi obo kata, nge anagbai zhin to zhin benukwoi nun. Ntu ba bo, abei kpe Kristi n wo zokwoi agye.

3Amalami ye, ntu ba shakpe bo, ba bei gna fye beho-behoi ntuge ba bwa fye agyiwyeyi. Ama Shekwoyi bei laba zunkni tunyi n sapa, obo bwi-bwi tulo n zokwo.

4Gama Shekwoyi to bei fa amalaika n ba bei zhin laifi nyin, ama wa sheba yafi n anapi, nfi agma fifiyi fi nabmi awyegmanya ba pmi wadawyi.

5To wa fa aza a sapa yim akpe Nuhu, oza n wo bei dabo ga Shekwoyi, n wo puwayi aza ngun tnaba, ama Shekwoyi wa wu anyi vinya n nuwan yakwo yi.

6Nnavun wa ze Sodom n Gomora azhiyi otnu, wa wun baya nanyi wyeba, wa zeba mutu nya na tna?-?Shekwoyi viyi aba n nabye, ba pa ba wodna.

7-8 Ama dna n esa gmanyi Dagayi wa gni Lutu, n Sodom ntuge wo bei zhin oza manayi nu, abo nukwoi n wo bei zhin woi gye laba fyegyiyi-fyegyiyi nyi, ba bo zhin bai san wo nya.

9Ntu cenu, Dagayi bami wa gni yi n na jaraba n ba shegun yi laba nyi, wa gyi abye n na abo nukwoi tayi har owa da nyipyeyi-a be.

10Wo gna minagyi gyi n na zai n ba vi ba abo nukwoi, abo pwawo shakpenya, n na zai n ba mwa bahin ttukwo, bai kpe Shekwoyi aza agye ntna edna.

- 11**Koda-yake amalaika n ba zhi n Dagayi abye nyi, ba iko yi lo n kala yi ndu a malami a katai ye, bata da ba benukwoyi n Shekwoyi abam.
- 12**Ama a malami a katai ye zhin aza mama nu, ba wu gmanyi-gmanyi n na nyakpai nu, bai zhin abo ba cei pma; ngye anyakpa nna maba a wan ai wu nyi. Ba zhin ba ma iko wyegma nya esan nba ta kpe kwo yem; ai aba duba boya bedo na aljanu yi viyan n iko anapi nyai be.
- 13**Lada nyi n na malami ye bei gwo ntu ba laifi bo. Ntuge ba sase fi nanyi da nukwoi fyegyiy-fyegyiy, ba zhin a vinyikwo nya nu n na aci gusai n fyaba, ba dna fye kwoce, bai sasefi n na laifi nukwoi n sahoi, har bai lofi nfyagmada ye-ye nya ngyeba zhin aza manayi.
- 14**Nyikwoza to lo n ba ta shi wo ashakpe wyem, anagbai zhin yi ta kun bam, bai dna aza kwoce n ba to mizhi m, bai tu bahin mwi ba ze ashakpewoyi, abi bwi-bwi-yi nu aknituyi.
- 15**Baku bwi zokwo baku ze ngye Balamu Basura nugun, nwo bei kayadna n ye-ye n na gyiwyeyi, n wo bei ye wa bwa dna n benukwoi zhin nyi.
- 16**Ama abo la wo kun ntu wo laifi bo, esa nu zhagawoyi bei dabo n woi n zanyikwoci begye yi, kwa kma anabi benukwoiy-zhin.
- 17**Aza deye pya to na pma yin ngye adnabminu nbaku wo, nwu gye a ba bwa nyaho-manai nba, ama awo, bato mizhim ngye ogma gyesa, n ese ku kwo ya nyi. Aku ba zunkni lo cei 'bwo tna ceiy wyegmaanya.
- 18**Bai gma n ba laifi yi n gbegyiy yi, bai zhin apma n nayi shakpe yi, bai je aza gnifi n benukwoi zhin n sato mwa shi ba pwo cem.
- 19**Bai ci ge, "Ata gnifye ntu bemanai zhin bo nun, ntu cenu fye ba mi fya zhin benukwoi bedo, fye zhin bo kwo dafye, fye la bugba leya." Ama a malamiye n ba ga fye loloya n owa nyi, n bahin tukwo ba pa-pai lo n zhin alaifi fyenu, n bwibwi. Ntuge oza zhin enya fyenu nu nkwo woi wan shi.
- 20**Esanu oza la pwo n abenukwoiy anyi nya zokwo, ntu yi Dagayi n Gniyi yi Yesu Kristi yekpe bo, wa je lodna n laifi wa ze kwo fyenu njesun, wo zhin wa gna sapa wunya.
- 21**Kwo bei ba gna bmiya ngye to wo ye kpe Kristi zokwo yem, afa odo n wo ku kpeye, wa pmi avun wu owa wyidna gyigyiy-yi n na bei ku gawo nyi.
- 22**Anyi besi-si kwo-kwoi lo ai cige, "Omui zhin kwa jeze be da okwatu, a fu burutu nuwan kwa jezebe kwa nya kma-kma dna na denbi nu." Kwo wu lonu, n naza ba n ba jeze beda ba laifi.

Bitrus II 3

esu Ba Jezebe

1-2 Omi wasika bayi nyi nfyaba, oma zaje, n ɓa gun aba mi, mi zhin atna ma cefye ɓe pa n fya yemi, nna nyaɓo n fye shin ye kpelo, aɓo n fye ɓei tumwi n na anabi agyi-gyi-yi aba n 'yi ɓedo atnutnu-yi, n 'yi ɓei ɓe fye n ɓeda eyi Dagayi, n Gniyi nyai nyi.

3 Kmisunyi, miye ma pa fye ge dna n na nyi-pyei kmaknayi, agyekpei ɓei ɓe nɓa ɓei zhin aɓo nukwoi doho-dohoi nɓa kpelo, ɓai ma gaiciya 'san.

4 Ba ɓei ɓaɓo n layinu ge, “Ce Kristi ɓei ku gna ge wo jeze ɓelo ko? Woi gnina? Wota shan ɓem. Tunyi n sapa shi zaho-zahoi pa ɓelo sun, anya to shando shiba ɓei wun esa n na ɓei zhin anyi nyim.”

5-6 Ba yi ɓahin ge ɓa zamwi ɓai gwokpe ge Shekwoyi ɓei ku anyi zo n nuwan yakwo yi, n na anyi zhin avun, n wo ɓeda egbe nyai, woi ɓo bwa apma zhin n nuwan yi nu wa gmi anyi shi n nuwan yi shekwo-gun njesun.

7 Shekwoyi la gbetu ga njesun ge ala anyi ye n eshe yi pmi shi n tu ena ɓo, n wada nyipyeyi wiyi, wyi yi naza nukwoi ɓei bwi cei nyi.

8 Ama fye to ze deye amwin, oma nugundo yeyeyi, nge aye dubu, kwo nyipyeyi gmanyi ɓa wu ngye nsu nu n Dagayi abam.

9 Wota zhin kalala nu n tu wo alkawali jezeɓenya ɓon, kwo da yake ko wu lonu n saho. Ama wo pminu, n dalili manai-ge woto cei pmalo zaho-zaho ya bwim, wo ye ga a ɓenukwoi zhinyi esa nu ɓa ye abui.

10 Dagayi nyipyeyi ɓelo ntna kmakma, ntna esa dnayi ngye evi, nsayi eshe ɓei kmi kwoi duya wyeɓo yakwo yi, anya ɓa kpe na nyibmana ena ɓei gyi ɓa, ekni nna nyai ɓa kpe kwo, ena ɓei gyiɓa vinya.

11 Tunda anya vinya n shegunyi laba ɓa ɓei wuya, ashe ko to ɓmiya lo ya se ase gyi-gyi yin?

12 Fye shi nyipyeyi yi awye, okwo ɓe-ɓe pwai wo fye, ewyi n Shekwoyi ɓei dna eshe cei nyi anya ɓa kpe nanyi ɓmana vinya ɓa ɓei wuya fi nna nyitala.

13 Ama yi pmi Shekwoyi ɓahin ɓeye, ɓai ye ɓeda ɓmapmi kasa-ɓala wo a wasika pmibwa ɓai da aɓo n wo to ɓei zhin nufin, shi ɓa shin zhin n na littafi ajeyi-oba gyiɓa kuwa bwi-bwinu alkawalinu, eshe woyi nya, n nanyi woyi yi, aba n ɓefyece nu bwa sese.

14 Oma nugundo ye-yeyi, sa fye zhilo fyei pmi nyipyeyi ye, Owo ɓebe nya, fye zhin kukari fya sase ntna ɓenukwoi zhin yi, fya sase n gyi-gyi-yi, n bugba fuyi n wa bye.

15-16 Fye pa nya kwo zhin woyi pmi. Wo ga yi 'sa nu, yi lo azaje n gni-gni ɓeda yi. Eyi zado ce-cei, n ye-yeyi da yi Bulus, woku abeye kafi n wo a wasika homi. Owa ɓeda ho dnaɓo lo a kpeɓa awyeɓa, aza lo kuwa n ɓa ku ze a acijeyi dna n ɓahin

beye, bai ye beda bmapmi kasa, ba la wo wasika pmibwa bai da afo n wo to bei zhin nufin, shi ba shin zhin n na littafi ajei oba gyiba kuwa bwi-bwi nu.

¹⁷Mila atnubua pmafye gni to esayi bem, ema-zaje-ye-yei, n nabai nfyē ba kawye to aza nukwoi ye pya ba dna fye kwoce har fya miya nfyē mizhi mim.

¹⁸Ama fye mwa fi n alheri, n yekpe yi eyi Dagayi n Gniyi yi Yesu Kristi nya. Mwamwa vinya n latu yakwo yi, ba kunsun woi nyalo-nyalo. Amin. Sai wyihoi.

Yohanna I

Yohanna I 1

Shekwoyi Zhin Buzangna Nu

¹Kristi bei n wye-wyeyi kafin a zhin anyi, har emi n mihin tukwo maku gyewo nmi awyei, maku wo wo woi daɓo, ma wo to bwa nmi abwai, Wo zhin Shekwoyi beda wye-wyeyi nya nu.

²Oza deye n wo zhin wye-wyeyi nyi, woi gmi n Shekwoyi aba nyi, aku wo wuyi, yi zhin seida ge yiku gye wo. Mi da Kristi nu ɓo, n wo zhin wye-wyeyi nyalo-nyalo nya nyi, wo bei kunsun n Dadayi a wuyi wo.

³Ma gnafye njesun, yi gnafye obo nu n yi ku gye yi ku to bwa, nna abai fya bwa jedoɓe n na gmadai n yi cei lo n Dadayi n Yesu Kristi owo Nugun.

⁴Nfya zhin shi ma kafi n wasika ye, efyehince fya ku nu n bugba buyi, n yihinɓe.

⁵Beda nyi n Shekwoyi wa da nge yi gnafye, nge Shekwoyi zhin buzangna nu wyegma to nyi n wo aban.

⁶Ntucenu n ya ci ge yi zhin owo anugundo nu, ama ya gyi abye n zan-zan yi fi n wyegma n laifi yi, yi ce akatanu.

⁷Ama n yi zan-zan fi n buzangna Shekwoyi nya, shi Kristi bei zhin nyi, yi n jedoɓe yi lo n bugba buyi n na ajei, Yesu owo Nugun ami ɓa zhanyi ya na laifi vinya.

⁸Nyacige yi to n laifi yi lon, yi dna yihin kwoce nu, yi na gaiciya abo.

⁹Ama n ya da eyi alaifi nwo aba, yi ɓa mi ya kpema wo wa zhin yi gafara. Wa zhanyi ya n benukwoyi vinya. Kwo wulo cewo n Shekwoyi aba, wa zhinyi lonu ntuge Kristi bei lafi ntuge wa zhanyi alaifiya.

¹⁰N ya gna yi to zhin laifin, yi ce akata nu yi-yi Shekwoyi ge zakata, gama wa ci ge, yi ku laifi zhin.

Yohanna I 2

¹Omi abi, mi gna fye abo deye ntuge fya bui laifi si, ama nfya zhin laifi, oza lo n wo ɓa gyiwye ga fye n Dada aba. Ayi woye ge, Yesu Kristi oza n wo zhin befyece yi, woi da Shekwoyi agma.

²Owo nu bei shin Shekwoyi minagyi n yi tukwo wa tu wohin, wa ga yi jedoɓe n Shekwoyi, owo nu zhinyi alaifi gafara, to ge eyi anya gmanyin ama har anyi nya vinya.

Gaiciya Ga Mwi-mwi

³Yi ba kpe nwuna nu ge yi zhin owo anya nua? N ya shi yihin awye, yi zhin atna lo ya zhin obo n wo ye?

⁴Ozaho baci ge, “Mi zhin Yesu viyi nu, mi tu lo n zokwo mi-i lo eshe, mi zhin Kristi nyanu.” Ama nwo ta zhin obo lo n Kristi a gna won, wo zhin zakata nu.

⁵Ama aza n ba zhin obo n Kristi a gna ba ge ba zhin, ba ba tumwi ba ye Shekwoyi ndudu, nlonu yi kpe kwo yi zhin a Yesu-viyi nu.

⁶Oza n wo ci ge wo zhin Yesu-viyi nu, wo zan-zan shi Kristi bei zan.

⁷Omi azaje, mi ta ka wyidna woiwoi nu ga fye fya shibwan, ama kwo-kwoyi nu nfyee bei ncei shinsun tunyi n kmisunyi. Fye ku kwo shinwo.

⁸Ama kwo zhin woi-woi nu, kwoi zhin fye apma shi kwo bei zhin Kristi nyi, n yaa shi wyidna ye bwa, fye ye n na ajei, wyegma n yi a wye-wyeyi ba busi, Kristi buzangna, wye-wyeyi nya ba bmiyana fi n yi mi.

⁹Oza n wa ci ge wo zan-zan dna lo n Kristi buzangna, ama woi wun owo zado nu, woye dna lo n wyegmaa.

¹⁰Ama zaho-zahoyi n wo ye nwo zadoyi, wo zan-zan dna lo n buzangna, woi gyewo zokwo ntna bonyi-ce dna n wyegma ko laifi.

¹¹Gama oza nwo ta ye nwo zadoyin, woye dnalo n wyegma zafun nya, to woi kpe aba nwo lon, gama wyegma n ku wo bwi awye to woi gye wyebam.

¹²Mi ka abeye ga fye nu efye vinya, emi abi, gama aku fye a laifi zhin gafara dna n Yesu eyi Gniyi.

¹³Mi gna fye abeye azakwoyi ntuge fye kpe Kristi ye lo. Oza n wo wyewyeyi tunyi n Kmisunyi. Efye abi anuyi, mi dabo n fyei, ntuge fye ku nasara gyi n Shetan tukwo, mika ga gye abi anuyi n abi anyikwoyi, ntuge fye ku tumwi ce, fya kpe Shekwoyi eyi Dada ye.

Fye To Ye Anyim

¹⁴Ntucenu, mi dabo n fyei a dada n fye kpe Shekwoyi nyalo-nyalo nya ye lo nyi, nfyeei abi-anuyi nfyee na kalayi lo n Shekwoyi Beda yi nfyee abugba nyi, fyei ku nasara gyi n Shetan yi.

¹⁵Fye ku fa anyi ye bo, na nya yi n anyi ga fye vinya, gama n fye ye anya ye, fye wunu ge fye ta ye Shekwoyi lon.

¹⁶Gama anyi nya ye vinya, anyikwo shakpe abo awyeda, anya si n ba lo ha wye, ntukwo mwayi n kwo be n nyabwa aba nyi, abeye vinya to zhin Shekwoyi nya nun. Ba kun n anyi nukwoyi ye nu.

¹⁷Anyi ye duyalo, nna anya nukwoyi yei vinya ba beilo n gnisun nbai, ama oza n wa gyi abye n Shekwoyi beye-zhinyi wo ba bwa wye-wyeyi nyalo-nyalo nya.

¹⁸Emi abi, anyi ye esa kmaknayi nla be, Fye ku Kristi Nubayi bo wo, oza n wo zhin gaba n Kristi nyin-saiye azahi pya n mwa begye nku be, deye wuyi ge anyi zo sa la ga si.

¹⁹Aza n ba zhin gaba n Kristi yi nyi, bei fi n yi aduwa nyakun, ama ba to bei kunsun n yin to baye kun, esa nba bei fa yi nyi kwo ku wuyi ba to bei zhin eyi anya num.

²⁰Ama fye to wu lo nlonun, gama Zafun Gyi-gyi-yi la be nfyekwo, fyei kpe gaiciya yelo.

²¹Ntu cenu, mi taka fye ngye aza nu, n ba cei pma ba kpe gaiciya yen. Ama mi pma fye gna nu, ngye aza n ba kpe gaiciya ye, n na akatayi.

²²Nyikadonu zhin akata esua? Oza n wo ci ge Yesu to zhin Kristi nun. Ozahi pya zhin Kristi nubayi nu, ntuge wo to ga Shekwoyi gaiciya n wo Nugun yin.

²³Gama oza nwo ta ga Kristi Shekwoyi Nugun gaiciyan, wo ta bwa Shekwoyi Dadan, ama oza nwo n Kristi Shekwoyi Nugun yi lo, wo n Shekwoyi Dada yi lo.

²⁴Ntucenu fye gyi abye n gaiciya gai n nya n na ku wu fye, tunyi n sapa. Nfya zhin lonu fye ba bwa jedobe n Shekwoyi n owo Nugunyi.

²⁵Nwohin tukwo wo ku deye alkawali zhin yi wato wye-wyeyi nyalo-nyalo nya.

²⁶Omi beda tu n Kristi nubayi bo, mi da aza nu bo n ba ba ye ba bwi fye awye, ba dna fye n zokwo kasa.

²⁷Ama fye la Zafun Gyi-gyi-yi gwo, wo dnalo n fyemi, n fya bugba mi, nna bai n fye ta sun nzaho apmai wa wu fye nyahon n kwo bmiyan. Gama wo wu fye anya vinya, owo nu zhin Gaiciya, ntu cenu, shi wo ku da, tilas fye sase fi n Kristi, to fya shan ka n won.

²⁸Nsaiye emi abi, fye ku fi n zumunta agmada n Dagayi n na bai n wa be fye ku kpe nge beho to lon, vinyikwo to bei wo fye, fyei ta n na avun yin esa n wa be n cei n.

²⁹Shi yi kpelo ge Shekwoyi zhin oza manayi nu, woi zhin bemana n esai vinya, yi ba mi ya ci ge, aza nba zhin be mana, ba zhin owo abinu.

Yohanna I 3

¹Fye gye shi eyi Dada eshe nya yeyi nsun, har woi ye ge a yi yi ge owo abi-gaiciyai nu yi zhin wo abinu, ama aza n mwa begye nba ta kpe Shekwoyi yen, bata kpe lo ge yi zhin owo abi nun,

²E, omi anugundo, yi zhin Shekwoyi abinu nsaiye, yi ta mi ya kpe enya ye nkwo be lon, ama yi kpe lo ge, esa, n wa be n cei yi ba wu ngye wo, ntuge yi bei gyewo shi wo wu.

- ³Oza n wo ga beye gaiciya wo ba shi wohin n gyi-gyi-yi, shi Kristi nwohin gyi-gyi-yi nyi.
- ⁴Ama aza n ba gyi abye n laifi zhinyi, ba zhin Shekwoyi nuwunyi nu, gama ata zhin alaifi doho-dohoyi n Shekwoyi beye yi nun.
- ⁵Fyei kpe lo ge wo bei la ze zanyikwoci n na bai wa ku yi alaifi ya, woi to n laifi owohin nyan, wo to na Shekwoyi beye zhin bo nsaho-sahoyi n, n zokwo doho-dohoyin,
- ⁶Ntu cenu n yi wo vivi-wyi n woi, yi vi wo bo, yi ta gyi abye n laifi zhinyin, ama aza nba gyi abye n laifi zhin yi nyi, kwo kunce ba kpe ge, Ba zhin alaifi ntu ge ba to shin woye kpe nun, kwo ba to ze owo anyan.
- ⁷O, Omi abi, fye toye zaha wa dna fye kwoce n, nfyia zhin bemana n esai vinya, kwo wunu ge fye zhin aza manayi nu ngye wohin.
- ⁸Ama n fya gyi abye n benukwoyi zhinyi, kwo wunu ge fye zhin Shetan nyanu, oza n wo bei ya laifi zhin to wa shan ka nkwon, ama Shekwoyi Nugun bei be ntuge wa wun shetan atnu-tnu ya nu.
- ⁹Oza n na la wo ma dna n Shekwoyi abi wo ta gyi abye n laifi zhin yin, ntuge nsaiye Shekwoyi wye-wyeyi dnalo n wo, ntuce wo ta gyi abye n laifi zhin yin, ntuge ala wye-wyeyi woi-woyi ye ma dna nwo, kwoi wanwo shi, alawo shanma.
- ¹⁰Nlonu yi ba mi ya wu oza n wo zhin Shekwoyi bi, n zayi n wo zhin shetan nya. Oza nwo sase dnalo n laifi to woi ye nwo azaje yin, wa wunu ge woto dnalo n Shekwoyi abin.
- ¹¹Gama nabari n yi bei wo tunyi n kmisunyi, okwonu ge yi ye n na ajeyi.
- ¹²Yi to ku ze ngye Kayinu, nwo bei zhin shetan nya, wa wu owo mado nyin. Kninu bei zhin wa wu woa? Ntuge Kayinu bei zhin woi zhin benukwoyi, wo bei n cei kpe n ge owo mado zan-zan bei gna wo nya bmiya.
- ¹³Ntucenu ce to wo fye n, emi anugundo ndei anyi wun yi nun.
- ¹⁴N ya ye n na a Yesu-viyi ajeyi kwa wunu ge alayi gni n na anapi, ai la wye wyeyi nyalo-nyalo nya gayi. Ama oza n wo taye n wo aje yin wo lo efi nyalo-nyalo nya.
- ¹⁵Oza n wa wun owo Yesu-viyi do nu, wo zhin zawuyi nu. Fye kpelo ge oza to lo n wo wu oza nwo wye-wyeyi nyalonyalo nyayi lo-lo nwo min.
- ¹⁶Yi kpelo ge ye-ye hin-hin kun n Kristi aba nu, ngye shi wa fi ntu nyi bo nyi, ntu cenu kwo kunce lo ya gayi awye-wyeyi ntu n yi a Yesu-viyi aje bo.
- ¹⁷Ama ndei oza n wo zhin Yesu-viyi wo n na agyiwyeyi lo nwo ba sase n dagma, wa gye zado n na awyekwoyi to wa bmawo zhin, Shekwoyi ye-ye dnalo n wuna nu nwo mi'a?

¹⁸Omi abi, yi fa beda bo n gbeyi ge yi ye eyi azaje lo, yi ye ba cewo ya wu ba n yi afo zhin-zhin.

¹⁹Nnavun yi be kpe dei-dei n yi abezhin, nge yi malo n Shekwoyi bwa, nsai eyi abugba be bwa lafiya, kwo esa n ya gni-agni zhin n Dagayi abye.

²⁰Ama n yi n na abugba anukwoyi, kwa gnayi ge yi ku benukwoyi zhin, Dagayi ba gna kwo wo, gama wo kpe beye lo vinya n yi zhin.

²¹Ama emi a nugundo ye-yeyi ndei eyi abugba gyi-gyi-yi lo, yi ba mi ya be Dagayi aba n bugba kalayi n tna edna.

²²Ya bwa enya n yi nya, ntuge yi vi wo bo lo, yi zhin obo n wo ye.

²³Enya nyi n Shekwoyi wa gna ge yi zhin, Yi ga gaiciya n Yesu Kristi owo Nugun eye, ya ye n na jeyi.

²⁴Aza n ba zhin enya n Shekwoyi wa da ba sease lo fi n Shekwoyi owohin nba mi, Yi kpelo deye kwo zhin gaiciya nu, n tuge Zafun Gyi-gyi-yi n wa gayi nyi wo gna yi nlonu.

Yohanna I 4

¹Omi a nugundo ye-yeyi fye to ga afo vinya gaiciya nfye won, ntuge aza gna fye ge Shekwoyi beda nun fye mwi kwo kpa fya gye kwo Shekwoyi beda nu. Gama anya wuyi a katayi lo.

²Zokwo nfye ba kpe ge beda ye zhin Zafun Gyi-gyi-yi nya nu, okwo nu ge fya nyabo ge beda ye da lo ge Yesu Kristi, Shekwoyi Nugun bo la ze Zanyikwoci wa be dna na anyi n nanyi ku ngye za? Nkwo wu lonu agye bedahi gmi n Shekwoyi aba nu.

³Nkwo to wo lonun, to bedahi ta gmi n Shekwoyi aba nun, ama n Kristi nubayi aba, Kristi Nubayi n fye ku owo bo shinwo nge wo belo nyi, owo a tnutnu nukwoyi n ba zhin gaba Kristi nyi, ba fi lo anyi.

⁴Omi anugundo ye-yeyi fye zhin Shekwoyi anyanu, fyei ku nasara gyi n na azayi n ba wun Kristi nu, Ntuge oza dnalo n efye abugbami n wo du amalami akatayi ye lo n kala, n ba fi n na anyi nukwoyi ye nyi.

⁵Aza deye zhin anyi nya nu, ntu cenu bai vi anyi nya, anyi yi kna ba t nubua lo.

⁶Ama yi zhin Shekwoyi abinu, ntu cenu aza n ba kpe Shekwoyi ye ba nu knayi beda tunbua. Azado ta won, Zokwonu njesun n yi ba kpe kwo beda gmi n Shekwoyi aba nu, ntuge n kwo gmi nwoabanuanyitawon.

⁷Emi anugundo, yi tumwi ya ye n na ajeyi, gama ye-ye gmi n Shekwoyi abanu, aza nba ye n na zayi, bai zhin bemana ba wunu ge ba zhin Shekwoyi abi nu, bai zhin atnalo baye kpewo ye lo na bye.

⁸Ama ndei oza to n ye-yei lo woi zhin bemanan, kwo wu nu ge wo ta kpe Shekwoyi ye lon gama Shekwoyi zhin ye-yenu.

⁹Shekwoyi bei wu shi wo ye yi nsun esa n wo bei tnu n wo Nugun, bigba gmanyi yi dna n na nyi nukwoyi ye, wa be yi n wye-wyeyi nyalo-nyalo nya yi, dna n wo fi.

¹⁰Dna n tnu-tnuye yi ku gye shi yeye hin-hin wu, kwo to zhin eyi yeye nu n Shekwoyi aban, ama, owo yeye nu n yi aba, esa n wo bei tnu n wo Nugun yi wa ya Shekwoyi minagyi zhi n yi alaifi tukwo.

¹¹Emi anugundo, shi Shekwoyi ye yi lo n sun lonu nyi, kwo kunce lo ya ye n na ajeyi ce.

¹²Gama kwo da yake yi to shin Shekwoyi gyen, esa n ya ye n na ajeyi, Shekwoyi dnalo n yi, owo ye-ye n yi mi kwa dnakala lo abye-bye.

¹³Wo la owo Zafun Gyi-gyi-yi dna n yi abugba mi, seida nu ge yi sase fi lo nwo, owohin n yi mi.

¹⁴Har sahi, yiku gye n yihin awyeyi, yi gna anyi, nge Shekwoyi la tnu n wo Nugun yi wa ze anyi Gniyi.

¹⁵Zaho-zahoyi n wa ga gaiciya wa ci ge Yesu nu zhin Shekwoyi Nugun, Shekwoyi dnalo n owo mi, owohin ce dna n Shekwoyi mi.

¹⁶Yi kpelo shi Shekwoyi ye yi nsun, ntuge yi ku owo ye-ye woshan, ntu ge yi ku gaiciya gawo esa n wa gnayi nge wo ye yi lo n mwa. Shekwoyi zhin ye-ye nu, zahozaho yi nwo dnalo n ye-ye, wo dnalo n Shekwoyi, Shekwoyi dnalo n wo.

¹⁷Shi yi sase fi n Kristi, eyi ye-ye kwa mwa lo abye kwa nu, nlonu vinyikwo n ednayi to bei woyin, nwada-wyiyin, ama yi bei gye wo n bugba kalayi n na agmadayi, ntuge wo ye yi lo, yihin yewo lo ce.

¹⁸Yi to n dna apma yi lo n za aba nwo ye yi lo cewon, owo ye-ye n yi aba n la afo dna nya nyayi ya, n woba zhin yi nyi. N ya wo edna, yiwo obo dna nu n wo ba zhinyi, kwa wu nu ge yita kpelo shi wo ye yi nsun.

¹⁹Ntu cenu, yi yewo ntuge wona ye yi n na bye.

²⁰Ndei oza gna ge, “mi ye Shekwoyi lo” ama woi wun owo zado nun, wo zhin za kata nu, woba ye Shekwoyi n wuna n wo to shin wo gye-nyin, ndei wo ta ye wo zado lo n wo gyewo wye nyin ma?

²¹Shekwoyi, n wohin tukwo wo ku ci ge oza taye Shekwoyi nu gmanyin ama wo ye nwo zadoyi.

Yohanna I 5

- ¹Nza ga gaiciya ge Yesu nu zhin Kristi, woi zhin Shekwoyi Nugun nu n ho Gniyi, agye ho zhin Shekwoyi binu. Oza n wo ye n Dadayi, wo ye lo nu n wo Nugun yi.
- ²Ntu cenu fye ba kpe shi fye ye Shekwoyi abi n sun wato efye azaje n na amapwi dna n Dagayi, shi fye ye Shekwoyi fyei vi wo bo nsun nyi.
- ³Shekwoyi yeye nwu ge ha zhin obo nwo ye, behin-hin kwo to dnabon.
- ⁴Gama Shekwoyi 'bi doho-dohoyi bami wa vi wo, woi gyi nasara n laifiyi, n na shakpe nukwoyi anyi nya yi, n wa kpema Kristi ntu ge wa bma wo zhin.
- ⁵Ama nyikado bami wa sunkun wa gyi nasara n okun ye yi, to oza ga gaiciya nu ge, Kristi zhin. Shekwoyi Nugun nu ma?
- ⁶⁻⁸Yi kpelo ge - wo zhin wo Nugun nu, ntuge Shekwoyi bei ku da lonu n begye yi nkwo bei gmi n eshe, esa n na bei zhin Yesu baptisma, n esai n wo bei ye wa fi nyi. E, to ge esa n na bei zhin wo baptisma gmanyim, ama n esayi n wo bei ye wafi nyi. Zafun Gyi-gyi-yi gaiciyada vinya bei ku da lonu ce. Ntu cenu yi n na seidada yi lo ngun ata, Zafun Gyi-gyi-yi begye n yi abugbami, begye nkwo bei gmi n eshe, esa n na bei zhin wo baptisma nyi, n begyeyi kafin wofi, Ba bei da bo gmanyi nu, nge Yesu Kristi zhin Shekwoyi Nugun nu.
- ⁹Yi zhin ya ga aza gaiciya n ba gmi seida n na awadaba nyi, ntu cenu yi ba mi ya ga obo gaiciya n Shekwoyi'a da. Shekwoyi wo gna ge Yesu zhin owo Nugun nu.
- ¹⁰Aza vinya n ba ga beye gaiciya nba bugba, ba kpelo ge kwo zhin gaiciya nu. Zaho-zahoyi n wo to ga beye gaiciyan wo yi Shekwoyi nu ge za kata. Ntuge wo ta ga gaiciya lo tu obo n Shekwoyi ku da n wo Nugun tukwon.
- ¹¹Knido nu n Shekwoyi n kuda? Nge wo la wyewyeyi nyalo-nyalo nya gayi, wyewyeyi ye kwo dna lo n owo Nugun nu.
- ¹²Ntu cenu oza n wo n Shekwoyi Nugun yilo, wo n wye-wyeyi lo, oza n wo to n Nugun yi lon woto n wyewyeyi n lon.
- ¹³Mi ka deye ga fye n fye ku gaiciya ga n Shekwoyi Nugun nyi, n na abai fya kpe ge fye n wyewyeyi nyalo-nyalo nya yi lo.
- ¹⁴Yi kpelo lallei, nge woba wo yi, wa gayi nyaho-nyahoyi n ya nyawo n lodo n wo beye yi.
- ¹⁵N yi kpelo ge wo wo yilo, esa n ya dafo n owoyi, yi gyi wo wye yi kpelo nu nge wo ba ga yi amsa.
- ¹⁶Nha gye Yesu-viyi woi zhin laifi n kwo ta be n efiyin, ha gyi Shekwoyi wye wa zhin wo gafara, Shekwoyi wa gawo wye-wyeyi, saidai woku laifi zhin nkwo kunce n efiyi. Ama laifi lo n kwo be n efi yi nwo ku kwo nu zhin, apma to lo a zhin aduwan.

17Benukwoyi dohodohoyi zhin laifinu. Mita da alaifi fafayi nu bon, mi da laifinu bo n kwo be nfi yi.

18Oza to lo n wo la zhin Shekwoyi obi n wo ba gyi abye n laifi zhin, gama Kristi, Shekwoyi Nugun, wo yi shilo n kalayi, shetan ta mi wa to wo bwan.

19Yi kpelo ge yi zhin Shekwoyi abi nu, anyi vinya n ba cenyi bafi n shetan sinta nu nwo ikoyi.

20Yi kpelo ge Kristi, Shekwoyi Nugun, nla be wa bmayi zhin, yakpe, ya bwa Shekwoyi hinhin ye, Nsayiye yi filo n Shekwoyi ntuge yi fi lo n Yesu Kristi owo Nugun. Nwonu zhin Shekwoyi gaiciyada gmanyi, owonu zhin wyewyeyi nyalo-nyalo nya.

21Omi abi, fye bui enya si n kwo ba gwo Shekwoyi aba dna nfy e abugbami.

Yohanna II

Yohanna II 1

¹Wasika ye gmi n Yohanna byeda, zakwoyi ikklisiya nya aba nu, kwoi lo nyikwoza ye-yeyi aba n Shekwoyi wa kni nyi, n wo abiyi n mi ye n mwa nyi shi azaje ye wo dna ekilisiya nyi.

²Shi Gaiciya dnalo n yi mi nyalo-nyalo nyi.

³Shekwoyi Dada n wo Nugunyi Yesu Kristi, ba tu yi anabarka n sun-sungye dnagmayi n bugba fuyi, n gaiciya yi n ye-yeyi.

Fye Zhin Peceiye Nna Byeda Akata Nya Yi

⁴A damilo n mwa shi ma gye oho abiho n ya, bai zan-zan shi kwo kunce, bai vi gaiciya, bai vi Shekwoyi gbega.

⁵Nsaiye mi cei pma lo ma ce fye bepa, emi, anugundo, wyidna kwokwoyi n Shekwoyi bei ga tunyi n kmisunyi nyi, nge kwo bmiya a Yesu-viyi ba ye n najei.

⁶N yi ye Shekwoyi, ye ba zhin obo n wo ye ya zhin, wa ku gnayi tunyi nsapa nge yi ye najei.

⁷Fye ka atukwoda akatai wye, n ba sheyi gun laba nyi, n bata ga gaiciya nge Kristi bei la be anyi dna n nayi ngye eyi nya pyan. Aza deye pya gni apapa n gaiciya yi, n Kristi yi.

⁸Fye zhin peceiye to fya ze ngye ban, fya bwi lada nuwan, n fyehin, nmihin zhin tnu-tnu n kalayi ya bwa nyin. Fye la fyehin yi fya bwa lada nu-nuyi n Dagayi aba.

⁹Gama nfye to kpetu Kristi wuwun, fye la Shekwoyi fa nu n na avun. Ama n fya vi Kristi nyawu, fye ba bwa Shekwoyi. Fya bwa Dada n Nugun yi.

¹⁰N za be wa wu fye, to woi ga gaiciya n nya n Kristi bei wun, fye to yi wo ma wa be fye puwan, fye to gawo bugba kala n zokwo dohodohoyin.

¹¹Nfya ye, fya ku ze aza nukwoyi nu bedo nwoi, dna n wo abe nukwoyi zhin-zhin.

¹²To, mi n cei pmalo maye daɓo be ama mito n cei pmalo ma dakwo fi n wasikayen, gama mi n bugbayi dnalo ma be ma gye fye esa fyewyi, nsahi yi bei da abeye n gnisun, yi dagma.

¹³Oho mapui, Shekwoyi obi knikniyi, owo abi bi ho gna lo.

Yohanna III

Yohanna III 1

- ¹Wasika ye gmi Yohanna byeda aba nu kwoi lo Gayus emi za yeyeyi aba, n mi ye wo n gaiciya nyi.
- ²Emi nugundo, mi zhin aduwa lo ge oho nayi n lafiya yi lo shi oho wye-wyeyi n ceilo nyi.
- ³Eyi azado-hon ba zan-zan bai wan zokwo n ya baku bugba bui-bui gami, shi ba gnami ge ho zan-zan lo bmiya n gaiciya yi, hoi sase lo shi nabari manayi da.

Vi Bo Nkwo Bmiya

- ⁴Bugba buyi do to lo nkwo ba du deye ngye shi mi wo abeye pya n mi abi aban.
- ⁵Omi nugundo ho zhin Shekwoyi tnu-tnu manayi lo, nha bma, a malami zhin n na a wa'azi zhinyi, n ba diya n ho aba nyi.
- ⁶Baku oho alheri bo gna eklisiya n ya, nho yeye atnu-tnu yi. A dami lo shi ho bei tnu n na a cauta yi n aza kun nba diya nyi.
- ⁷Gama a zan Dagayi ezan nu to bai go, kwo nyagyin, ajekpe, agye wanba kwo agyiwyeye n na azaba n ba ta vi Yesun, kwo da yake baku wa'azi zhin ba.
- ⁸Ntucenu eyi n yi hin tukwo yi bma ba zhin n na bai yaku ze a Dagayi tnu-tnu kun-zhin yi n bai.
- ⁹Mi tnu ikklisiya n wasika biyi yei ntu ce nu, ama Diyoturifus, tu kwomwayi, n wo ye wa duwohin gyi n na abye, ngye a Yesu-viyi tukwoda nyi, wo ta gwo mi iko tulo n wo tukwon to woi ye wa womin.
- ¹⁰Esa n ma be n ba gnaho abo n wo zhin lo, n na abo a nukwoyi n wo dalo n mi tukwo, n beda nukwoyi n wo da. Wo ta na awa'azi zhinyi gwobo nu gmanyin, ama wo ta ye ge azaje ba gwon, n ba gwo wa kunba ya n na aduwa nyakun.
- ¹¹Omi nugundo, to gwo zokwo nukwoi yen, vi obo n kwo bmiya hapa ge, aza nba zhin bo mana, ba wunu ge ba zhin Shekwoyi abinu, aza n ba gyi abye n benukwoyi zhinyi, ba wu nu ge ba mwakpalo n Shekwoyi.
- ¹²Ozaho-zahoyi bedo n Gaiciya yi n kwihin tukwo bei zhin Dimitriyus seida, emi n mihin tukwo mi ba da bo gmanyi nu, hoi kpelo ge mi da gaiciya nu.
- ¹³Mi n na bei lo n mi n cei pma ma gnaho, ama mita kafi n yan.
- ¹⁴Gama mi na awyetu yilo mi babe daho, yi bei dabo n mwa n gnisun.
- ¹⁵Ntucenu sai esahoi. Anugundo n ya ba tnu ho lo nba gnabiyi, bi aza vinya gna gami.

Yahuda

Yahuda 1

¹Omi Yahuda Yesu Kristi bara n Yakubu madoyi. Kwoi lo a Yesu-viyi n na aba vinya a za ye-yeyi n Shekwoyi wa kni.

²Fa Shekwoyi alheri, bugbafu n sun-sungyei, ba mwa nfyee aba lo abye abye.

Agnigni Ntu Gaiciya Bo

³Omi anugundo ye-yeyi mi zhin shiri maka ga fye ntu n gni-gni bo n Shekwoyi la gayi, Ama nsaiye kwo la ze dole ma ka fye n nyaho tukwo gbo, ma gna ge fye sunkun n wyei bmi ntu n gaiciya bo n Shekwoyi bei ga owo aza, bwa sun gmanyi, ba shikwo ntna doshanyi, aye yi mwa begye.

⁴Mi da deye ntu ge amalami ho a tna Shekwoyi yekpeyi, baku lofi n fye mi, bai ci ge n ya ku vi Yesu, na avun, yi bami ya zan-zan shi yi n cei pma n tna Shekwoyi ta ta dnawo. Abei ka oba knizun tun-yin sapa, ntu ge bala pmi da eyi Tukwoda, wato Dagayi Yesu Kristi.

⁵Omi amsa n ba aba okwonu nyi ge, Fye pa gaiciya ye bo nfyee shin kpeye lo nyi nge, Shekwoyi bola wo aza gni n Masar kni, n na avun wa wu, aza vinya n bato bei gawo gaiciya ba zhin owo be yen.

⁶Ma pa fye njesun, amalaikayi bo, n ba bei gyi-gyi-yi n tna cegye nyi, ama ba pmi da benukwoyi zhin. Nsaiye Shekwoyi nbai fi agma filo n kurkuku wyegmanya bai pmi wada nyipyei.

⁷Fyeto ze Sodom kni n Gomara yi amwi m, n na azhiyi nba bei shegun ba nyin, vinya n nu-nuyi n shakpe doho-dohoyi. Azanugbayi bai wo aje shakpe, Azhihi abei ku ba kpe ena, baku ze misali n yi aba nge anapi lo aba n na ta, abenukwoyi zhinyi.

⁸Ama amalami a katayi ye bai gyiabye n na zan-zan nukwoyi, bai zhin laifi, ba gba bahin nayi, bai kpe aza agye n ba gyi abe tu n ba tukwo nyi, har bai kpe a malaika a gye.

⁹Ama mikailu, amalaika esu, esa n wo bei gni Musa nayin n Shetan yi, wo to bei zhin atna wa gnawo beda kasan, ko wa kpewo agyen, ama wa ciwo ge, "Dagayi wo gnakniho."

¹⁰Ama aza deye, ba kpe anya agye, bai kni anya akmi n ba to nba awyegayin, ngye anya fanya bai zhin abo n ba gye dama, bai lo n ba awye-wyeyi n na abwi.

¹¹Aiya n ba aba, gama baku vi Kayinu fye, n wo bei wu owo mado nyi, ngye Balamu bei zhin behobehoi ntu agyiwyee bo, n gye Kuraha bo la Shekwoyi beda zungna, ba fifi n owo knitu.

¹²Esanu n na aza deye ye bedo n nfyeyi n na abuki aba n na aduwa nyakun yi, ba zhin aza nukwoyi fi n fyemi, bai masan bai gyi abye, bai kna bahin, to bai pa azaje bon, bawu ngye alkawali to bai nun, bawu ngye ashinwa a gyi-gyi-yi n ba ta gyi nba sayin. Bato fifi yi nu gmayin ama ba fifi yi abwa aba: Ntu ge ala ba shiya n na agbegyeyi vinya a kpe ba eria.

¹³Enya nba fa n ba avun, okwo nu zhin vinyikwo, ngye alazhenya n nuwan kma kwa yaba zhi n edna gbe nyi. Bai zan laba ngye akpasu, buzangna nya, ama nba abye wyegmaa nyalo-nyalo nya n bugba wunyi n Shekwoyi nla zhin shiri gaba.

¹⁴Inok n wo bei zhin oza tnbayi n Adamu avun, bei kpe aza deye bo wa ci ge, "Gye, Dagayi belo n wo azagyi-gyiyin mwa begye.

¹⁵Wo bei be n na azanyikwoci yi n owada abye, bo gwo tata cewo ai wu abo anukwoyi n ba ku zhin gaba n Shekwoyi, woi wu obo n ba zhin nwo tukwo."

¹⁶Aza deye zhin anya abwa shiyi nu nyaho ta kunba, bai zhin benukwoyi doho-dohoi n ba gye, bai mwa bahin n gbeyi, n ba ga aza mwa-mwa ba ga ntuge ba ye nyaho nu.

Mi Nyakun Tu N Nyakungoro Manayi.

¹⁷Emi a nugundo, fye pa abo n eyi Dagayi Yesu Kristi abara bei gna fye.

¹⁸Nge n na anyipyeyi kmazoyi agyekpe yi bei be, oba nufi vinya ba dabahin agma dna n zokwo nukwoyi doho-dohoi.

¹⁹Bai be na jegnayi bai ye anya nukwoyi anyinya, bato n Zafun Gyi-gyi-yi dna n ba emin.

²⁰Ama efye, emi a nugundo, fye mi fyehin fi n tushi eyi gaiciya ga gyi-gyi nya, fyei tumwi fyei zhin aduwa dna n Zafun Gyi-gyi-yi iko, n kalayi.

²¹Fye ku fi aba n Shekwoyi ye-ye nyi, Wa tu fye anabarka, fye pmi n hakuri yi, wye-wyeyi nyalo-nyalo nya n eyi Dagayi Yesu Kristi dna n wo sun-sun gye ye wo ga fye nyi.

²²Fye bma aza zhin nba nabo n fye mi nyi, fye gye aza sun-sun nba zhin shaka nyi.

²³Gni aza ho ngye ho kun ba, n anapi, Azaho kuwa, bma ba zhin ba bwa Dagayi, ama fya zhin peceiye n na abai n fye ta bwi fi n ba laifin, fye na ba alaifi bo, ama fya gye ba sun-sun n bahin tukwo nba zhin alaifida nyi.

²⁴⁻²⁵Nsaiye, mwa-mwa vinya n wo aba n wo zhin Shekwoyi gmanyi nyi, n wa gni yi ntu Yesu Kristi bonyi, e, mwa-mwa n kalayi vinya, iko vinya n ebe yi owo nya nu tunyi n kmisunyi, ba zhin owo nya nu tunyi n kmisunyi, ba zhin owo nya nu bai bo zhin owo nya nyalo-nyalo. Wo n ikoyi lo wa shifye bwa to fya taya fya

miya, wabe n fye yi ntna laifi n gyi-gyi-yi, n wo abye, mwa-mwa n kasun ci agmada nya yi, nyalo-nyalo. Amin.

Yohanna Bewyegye

Yohanna Bewyegye 1

¹Littafi ye kpe anya, anyaya n ba ba zhin esa fyewyi, n Yesu Kristi asesemi, Shekwoyi bei ga wo Izini ge wo kpe ba nya ya wu Yohanna owo bara. A tnu n Malaikayi n eshe wa be wa wu wo oba awyega.

²Yohanna wa kaba kpe vinya, Shekwoyi beda, n Yesu Kristi yi n na abei vinya n wo bei wo, woi ce woi gye.

³Nha ba anabci ye dna ikklisiya ai wo, ho ba gwo anabarka n Dagayi. Aza nba wo ba knatunbua ba zhin obo n kwa da ba bwa anabarka. Gama esa la wo viwiyi n na abeye vinya ba zhin.

⁴Daga Yohanna, zuwa a ekilisiya n gun tnaba n ba fi n Asiya nyi, Turki. Omi anugundo, Alheri, n bugbafuyi, nba kun n Shekwoyi aba, nwo nyi nyi, n wo bei nyi, woi ye wa be, n na zafun ngun tnbayi nba zhi n wo abye nyi.

⁵N Yesu Kristi yi n wa nu egbe woi wuyi gaiciya vinya nyi. Owo nu zhin Kmisunyi n wo bei lakala n efi, to wa shan fin. Wo du esu dohodohoyilo n esayi vinya, n wa loyiya, n yi alaifi, shi wa ze owo ami ya ntu yi bo nyi.

⁶Wola yi yezhi fi n owo ebemi, wa zeyi a pirist Shekwoyi owo Dada anya. Fye gawo mwa-mwa nyalo-nyal-o nya, wo gyi ebe nyalonyalo Amin.

⁷Gyewye, wo zhilo, n na anyi yi shewo gun, awye vinya ba gyewo, e, aza nba bei fin wo eshanyi, Akni vinya bei cibwi bai wun bugba esa nwa be ncei. E, Amin, ko ze nlonu.

⁸Ominu zhin A n Z yi, kmisunyi n kmaknayi, anya vinya n ya Shekwoyi na dace n wo zhin Dagayi nyi, oza nwo ikoyi vinya nyi, n wo nyin, woi bei nyi, woi belo njesun.

⁹Ominu, efye zado, Yohanna, wahala kun-sunyi ntu n Yesu bo, n wo ka fye wasika ye, emihin ce, mila hakuri bwa n Yesu ga, yi bei gyi ebe n woyi. Mi bei tu n muse n na yi kwo ge Batmus, n na bei nyami ya ntu ge mi zhin Shekwoyi beda wa'azi, mi-i da obo n mi kpeyolo n Yesu Kristi tukwo.

Yohanna Wa Gye Mwa-mwa

¹⁰Dagayi nyipyeyi nu bei, mi-i gawo mwa-mwa, esa fyewyi mawo begye yakwo n mi avun, begye n wo n gye a bye kna-knaci.

¹¹Kwoi ci ge, "Ominu zhin A n Z yi. Kmisunyi n kmazoyi," Nna vun ma wowo woi cige, "Ka anya vinya n ha gye, ha tnun n ho wasika yi n na ikklisiya ngun tnaba aba, n ba fi n Turki nyi. Ikklisiya n Afisus, n doi n kwo dna n Simiruna nyi, n na adoyi n ba fi n Pargamus, Thiatira, Sardisu, Filadalfiya, n Lawudikiya yi nyi."

¹²Esa n mi bei kpe awye ma gye oza n wo dabo n miyi, nbo n mi avun ma gye a kandle busi ngun tnaba zinariya nya, n gni agni zhin.

¹³Ma gye zaho gni agni dna n ba atasin, ngye Yesu nwo yi wohin ge, Oza nugun, n eje Yakwoyi kpe n cei pa n na agu n zinariya belt yi.

¹⁴Owo apita nwu n bui-bui ngye lulu kwo snow, owo awye wu ngye ena gwogwoyi.

¹⁵Owo apita bai bmiyana n gye sinkna byei prnia-pmiaiya. Owo begye kwoi Sawyi ngye a nuwandokwo n ba luya n na akuta.

¹⁶Wo n na a kpasi ttabayi shi n wo bwai-zhe bwa, n ebe yakwoi shi n Gyi-gyi-yi asepa aba-ba n owo gbe, owo awyeba bai bmiyana ngye nyi-pyei n kwo wo n tna anyi n ba ba gwo kwo ya.

¹⁷⁻¹⁸Esa n mi bei gyewo ncei. Ma miya shi n wo apita ba ngye zafi, amma wa tomi bwa n wo bwaizhebwai wa cimi ge, To wo ednan, kwoda yake emi nu zhin, Kmisunyi n kmaknayi. Wye-wyeyi da n wo bei fi, woi wye-wyeyi lo nsai ye nyalonyalo, n wo n na a mabudi anapi nya yi n efi nyai nyi-to wo ednan.

¹⁹Ka enya n ho ye bwagye nyi, n na anyai n na ba wuho esafyewyi.

²⁰Akpasu tnaba n ha gye n mi bwai-zhe bwa nyi, n na kandle busiyi ngun tnaba nyi, oba awyega nu nyi. Akpasu ngun tnaba obanu zhin a ikklisiya tukwoda ngun tnaba, a kandle busi ngun tnaba, oba nu zhin a ikklisiya.

Yohanna Bewyegye 2

¹Ka wasika ga ikklisiya tukwoda n Afisus ha gnawo ge: “Mika ma gna ho tnu-tnu n kwo gmi n wo aba n wo zan-zan dna n na ikklisiya nyi, nba tukwo-dai shi n wo bwai-zhe bwa nyi.

²“Wo ciho ge, Mikpe lo shiho zhin abo manayi nsun, miku gye oho kukari n hakuri yi, mi kpelo hota ye n laifiyi n ho aza aban, hoi la aza pmi nba ci ge ba zhin atnu-tnu-yi bai to zhinba nun, Ho ku kpe n gye shiba ce a kata.

³Hoku wahala sin ntu mi bo, to hoi fa min.

⁴“Amma enya lo gmanyi n kwo wunya lo, ho ye milo ngye kmisunyi.

⁵Zhin nubo n esai n ho bei kmi mi ye nyi, kwo shandolo nsai ye, ha je zebe dami, ha zhin tnu-tnu shi ho bei shin zhin, kwo mabe ma gni ho kandle busiya n na a eklisiya aje.

⁶“Amma obo lo n ho aba n kwo bmiyalo: Hota ye n Nikolawuya ashakpe yin, shi mi ta ye nyin.

7“Fa bedaye kwa lo zaho-zahoi tñubua n wo kna tunbua woi wo obo n Zafun gna a ikklisiya. Oza n wa gyi nasara, miba gawo, shinwa wye-wyeyi nya n kwo dna n Shekwoyi paradise wagyì.”

8Kwo lo ikklisiya tukwoda aba n Simiruna: “Tnu-tnuye gmi n o-wo aba nu nwo zhin Kmisunyi n kmazoyi, n wo bei la fi wa lakala n wye-wyeyi nyi.

9“Mikpelo shi ho sin wahala ntu Dagayi bo nsun, mikpe oho awye kwoye lo, (amma ho n nabwa eshe nyayi lo.) Mi kpe aza kwoce dnai yelo n ba gni apa-pa n hoi nyi, nba gna ge ba zhin a Yahudiyi nyi Shekwoyi abi, bai to zhin owo abi nun, gama ba ce Shetan zokwo golo.

10To zhin wahala dnawo n ho ye ha sin nyin, gama esa fyewyi shetan ba she a zaho yafi n kurkuku wa mwi fye gye. Aba ga fye wahala anyi-pyei ngun awo. La mi gni, ha nu egbe kwo efii nu, mihin ce mi ba gaho rawani wye-wyeyi nya. Abye, mwa-mwa tna zo yi.

11Fa zahozahoi n wo wo atnubua bo wa wo obo n Zafun gna a ikklisiya. Oza n wo gyi nasara. Efi Bayi ta gye wo wyen.”

12Ka wasikaye ga ikklisiya tukwoda n Pargamus: “Tnu-tnuye gmi n oza banu nwo ebeyakwoyi shi ngyi-gyi yi abwa aba-ba nyi.

13Mi kpelo ge ho dna n ezhi nu n shetan n gyi ebe, shetan mwa-mwa ga aba a tasin, har hoi vimi, to hoi ye ha nami abo m, kwo esa n Antibas, emi seida zhinyi, gbenuyi bei fi n na shetan a viyi akun.

14“Ama mi na bei shilo n hoi, Ho fa aza ho nba wu aza ge ba zhin shi Bilamu bei zhin, wa wu Balak shi wo ba bwi a Israilayi abi dna n na anagbayi zokwo, wa ga ba bugba kala nge ba lo ahangba ba.

15E, ho n na azayi filo n ba vi Balamu efye.

16“Shan oho bugbado n ho abezhin yi, kwo kuwa mabe oho aba ntna esa dnayi, ma sunkun n bai n ebeyakwo emi egbe nyai.

17“Fa oza nwo wo atnubua bo wa wo obo n Zafun gna a ikklisiya. Oza nwa gyi nasara, wo ba gyi n manna n kwo so shinyi. Asiri lafiya ganya n kwo soshi n eshe mi nyi, ma ga zaho-zahoi kuta buyi, n kuta yi mi bei ka eye tu n zahota kpe kwo yen, sai: oza n wa bwa kwo.”

18Ka wasikaye ga ikklisiya tukwoda n Tiyatara: “Tnu-tnuye gmi n Shekwoyi Nugun abanu, n wo awye gye wyeba ngye ena nyintala nyi, nwo apita wu ngye sinkna byei nagi yi.

19“Mi kpeho atnu-tnu amanayi yelo. Oho bmazhin n na awyekwoi aba. Oho cauta n tnull-tnu yi n ba aba, njesun mikpeho, ye-ye yelo, n gaiciya gayi n hankuriyi, mi gye she abye gyilo dna n na abeye n ho zhinyi.

²⁰“Amma mi n na abeyi shilo game n hoyi, Ho fa nyikwozayi Jezebe, n wo yi wohin ge anabi woi wu emi abara nge anagbai to zhin benukwoyi nun, woi ye ena fiƙa nge ƙa zhin cegye tnu-tnu, nge ƙagyi enya n na ala zunsha ga ashan.

²¹Ma gawo esa nge wo shan owo bugba do n wo abe zhin-zhin yi

²²Gye ho anuwan n ebei n mi danyi, mi ƙa wan wo gye tu n gado n nyasan nukwoi, ngnisun n wo aviya, akpe ƙa pmi ƙe dami njesun, ƙa ye abwi alaifi n ƙaku zhin n woi nyi.

²³Mi ƙa wu wo abi eklisiya vinya ƙa kpe ge emi nu dna aza abugba wye n ƙa anubo-zhinya, miƙa ga zaho-zahoi n fye mi nya n kwo kunce.

²⁴⁻²⁵ “Ofye nƙe ce fi n Tiyatara nyi, fyei to vi ababwi ye pyanyin, (a gaiciya loloyi, shiƙa yiƙa nƙu, ama shetan abo aloloyi nu) mita shan-fye ƙeho nyan fye ku enya shi n kalai nƙe cei, kafin mi ƙe.

²⁶“Oza-n wa gyi nasara, wa zhin obo n kwo dami har nyipyei kmaknaya, miƙa ga wo iko tu n na akni tukwo.

²⁷Wo ƙei gyi ebe tu n ƙa tukwo n sinknanya bwai, shi emi dada gami iko tu n ƙa tukwo, abei ƙa ƙaya ngye shakun, n na ƙakwo ya wyiwo-wyiwo nyi.

²⁸Miƙa gawo kpasu labminya!

²⁹“Fa ozaho-zahoyi nwo wo atnubua ƙo, wa wo obo n Zafun gna a ikklisiya.”

Yohanna Bewyegye 3

¹Zuwa ikklisiya tukwoda n Sardisu: Tnu-tnuye gmi n oza aba nu nwo n na Zafun Shekwoyi nyai n gun tƙabai shi, n na a kpasu yi n gun tƙaba. Mi kpe hoye lo n ge ikklisiya wye-wyeyi n tnutnu-zhinyi, amma ho fifi yilo.

²Nsaiye kun agyewyi la enya n kwo ce gnilo nyi kwo la gafi. Oho atnutnu mwakpalo n ƙemanayi n Shekwoyi awyeba.

³Jeze lo da enya n ho ƙei wo ha ga gaiciya n kmisunyi, la kwo shi deidei ha jeze ƙe da mi n jesun, mi ƙa, ƙe daho n tna esa dnai ngye evi, ma taho.

⁴“E, har nsai ye azaho n Sardisu ƙato gmi oƙa aje amwi n anyi cegye yi n, ƙa ƙa zan-zan n mi yi n na aje abuyi ntuge ƙa kunce lo.

⁵Ozahozahoyi n wa gyi nasara, abei kpewo aje abuyi, mi to ƙei wun owo eye ya n Littafi wye-wyeyi nyan, amma mi ƙei zhin wo se-ida n emi Dada abye n wo a malaikayi nge wo zhin emi nya nu.

⁶Fa aza vinya n ƙa wo atnubua ƙo ƙa wo obo n Zafun gna a ikklisiya.

7“Ka wasikaye ge tukwoda nwo dna n eklisiya n Filadalfiya nyi: ‘Tnu-tnu ye nkwo nyi oza n wo Gyi-gyi-yi, n gaiciya yi n Dawuda makuliyi shi, wa gu enya ya n zaho ta mi n gun, wa gu enya n zaho ta mi n guyan, wonu na tnu.’

8“Mikpeho yelo sarai, hoto n kalayi lon, ama hoku kukari zhin ha zhin obo n mi da, hoi to na emi eye abon, Ntucenu mila abokun-mi guho ya n zaho ta gun.

9“Wo ga, miba tu azayi tile n ba ce shetan zokwo gwolo bai gwo gna ge ba zhin emi nya nu nyi (amma bato zhin emi anya nun – bace akatanu,) ba ya zhi n ho a pita ba bakpe nge oho nu zhin oza n mi ye.

10“Ntuge hoku bo vi n hakuriyi ko da yace ho sin wahala lo ntucenu mi ba guho n wahala yakwo esa n jarabai nkwo babe n na anyi tukwo a mwi zaho-zahoi gye n wo n wyeweyei.

11Shi wye, mi belo esa fyewyi, kushi dei-dei enya nho n cei lo n hakalayi n na bai n zaho ta gwoho oho rawanin.

12“Oza n wa gyi nasara, miba ze wo jigo n mi Shekwoyi yakun, nyaho ta bwawon wo ta shagmin nyalo-nyalo miba ka emi Shekwoyi eye tu n wo, wa ze ekni bi n emi Shekwoyi aba. Wobei bwa emi eye n katu n wo.

13“Fa oza n wo n na atnubuai wa wo obo n Zafun gna a Ikkliisiya.”

14Ka wasikaye ga ikkliisiya tukwoda n Lawudikiya: “Tnu-tnuye gmi n oza aba nu n wo gni agni n kalayi, Seida zhinyi egbe nuyi, gaiciya dayi (n na anya vinya nba nyi, kwo bei nyi, kwo n kwoye bebe lo) Shekwoyi nyazhin yi kmisunyi.

15“Mi kpe hoyelo sarai, hoto pyena lon, hoi to fu-fui lon. Awo mi pwa ngye ho ye gunna lo kwo n fufuyi.

16Amma shi ho wolo bwala-bwala n u nyi, mi ba kunho ya n emi egbe.

17‘Ha cige, ’min nyabwayilo, n na anya, vinya n mi n cei pma.’ Hota kpelo ge dna n Zafun ho zhin wyekwoyi nu, enya sun-sun nyan, wyebuai, bwotoloi n.

18“Omi shaula nho aba okwonu ha si zinariya hin-hin n mi, n na alakwo pmiaya n ena yi, nsayi nu nho ba ze nyabwayi, hi-hin, Hasi n mi, a je abui n gyi-gyi-yi, n nabai n hota gni n bwotolo yin, n vinyikwo yin, ha bwa shigbe n mi kwa kaho awyesan gna, kwa jeze beho n wyeba gyei.

19Mi zhin ma ta ozaho-zho yi nmi ye, ntu ce nu nba ta ho, akpe ha je ze n benukwoyi zokwo, ha zan abo shin nba zhin Shekwoyi nya.

20“Shiwe esa la mi sun gni n na abokun mi, mi-i lu, oza-ho-zaho-yi n wa wo mi yiwo wa gu abaya, mi ba be dawo ya zhin zumunta n woi, owo n miyi.

21Mi ba ye zaho-zahoi n wa gyi nasara wa sasetu n miyi n mi akujara-ebanya shi mi bei sase tu n gnisun n mi Dada nyi n mi bei gyi nasara nyi.

22Fa zaho-zahoyi n wo wo atnubua bo wa wo obo n Zafun gna a eklisiya.”

Yohanna Bewyegye 4

Oshe A Bokunmi Nguyagni

¹A Shi mi bei shi awye ma gye abokunmi n गया gni n she, mawo begye n mi bei shinwo nyi, kwo bei wo n gye abye knaknaci yakwo, kwa dafo n miyi kwa ci ge, “Be ya ma wu ho abo nba ba zhin n na abye.”

²Nsayi-sayi, mi dna n zafun, n bo n eshe ma gye, okwo mwa-mwa, esushikpegye n zahoi sasetu nkwo.

³Ena buzangna yakwo bei kun n owo n gye ba kun n diamond na bmiya yi, n Shanyin-pmana yi kwoi bmiyana n shewo shinkpegye gun.

⁴Esu ashinkpegye a biyi n gun shiba cei anyi n she Esu Shinkpegye dnagmayi gun, n na atukwodai 'shiba-cei-anyi n sase kpe n ba, n na ajei kpe n bui-bui n rawani zinariya nya yi wan n ba tukwo.

⁵O gma-na bmiya n ogma-wyisai bei kun n wo Shinkpegye, a begye bei fi n ogmawyisai. Nwo shikpegye abye, afitila n gun tnaba n wan enazhi, ba zhin misali Zafun ngun tnaba Shekwoyi anya.

⁶N nuwan yakwoyi n wu ngye cristal kwoyi kun n shinkpegye-esu nya. Anya awye-wyeyi n gun anyi n zhi n wo shinkpegye aba, n na aba ngun anyi, bai be n na awyei, avun n abye yi.

⁷Nya wye-wyeyi kmisunyi bei wu ngye gaba, bayi bei wu n gye nakwo biyi, tayi bei n na awyebai n gye gbagyiza. Nyiyi n wu n gye zunkwo n na abminai laya ngye kwo gye afu.

⁸Doho-dohoi n na anya a wye-wyeyi ye n na abminai gyi ngun tnanyi, oba abmina atasinya n fuya n na awyei, sukwo n nyipyeyi bai ci ge Gyi-gyi-yi, gyi-gyi-yi, gyi-gyi-yi Dagayi Shekwoyi ikoda, oza n wo bei nyi, n wo lo, owoi nu zhin bebeyi.

⁹Esa n na Anya a wye-wyeyi a ga mwa-mwa, latu n godiyai n oza aba nwo tu n esu-shinkpegye, n wo n wye-wyeyi nyalo-nyalo nyi.

¹⁰A tukwoda shiba cei anyi ye, ba miya zhi n wo abye ba gawo mwa-mwa, wye-wyeida nyalo-nyalo nya ba ya oba a rawani zhi n wo abye, bai kwo anyi bai cige.

¹¹O, Dagayi ho k uncelo ha gwo mwa-mwa n latuyi n ikoyi, gama ohonu na zhin anya vinya. Abei zhin ba ba bwa wye-wyeyi dna n ho beye nu.

Yohanna Bewyegye 5

Kugya N Littafi Yi

- ¹Ma gye takarda n kmishi n za bwaizhe nwo sase tu n esul shinkpegye nyi, takarda n kmishi nya yi kafi n mi n ebmi yi, n cei gugui n na hatimiyi ngun tnaba.
- ²Mala'ika kalada wa sawyi n begye lyakwoyi wa nyabo ge, "Nyikado nu kuncelo wa sa hatumi ye ya n takarda kmi-kmiyi, wa lokwoya?"
- ³Ama to a bwa zaknayi n eshemi vinya, kwo dna n na anyi n wo kuncen, kwo dna n na a zafi n wo ba gu kwoya wa ba kwon.
- ⁴Ma ci bwi n bugba wunyi, ntuge zaho to lo n bwaho nwo kuncen wa gnayi obo n kwo kafin.
- ⁵Ama zaknayi n na a Tukwoda shiba cei anyi yi, wa gna mi ge, "Mila bwi fa gama gyewye! Gaba Yahuda ebye nya, Dawuda Gbegye, nku nasara gyi, woi ku wu ngye wo kun celo wa gu takarda kmi-kmiyi ye ya, wa bma kwo a hatimi tnabaye ya."
- ⁶Ma shi awye magye, Kugya n gni-agni-gni n a tukwoda shiba cei anyi yi abye, n esu shinkpegye n a nya awye-wyeyi abye, kugya yi n na acigusai kpe n ba bei wu wo n sadohoi. Wo n na amwai tnaba, n na awyeyi tnaba, n ba zhin misali n na Zafun ngun tnabai Shekwoyi anya, n na tnu n cei n sepa dohodohoyi n na anyi.
- ⁷Wa lakala be abye wa gwo takarda kmi-kmiyi n za akun n wo bei sase tu n esu-shinkpegye nyi.
- ⁸Shi wo bei gwo takarda kmi-kmiyi a tukwoda shiba cei anyi ho, ba yazhi n kugya yi abye, zaho-zahoi n ba mi n molo yi shi n Zinariya papai n tulare yifi, Shekwoyi aza aduwa.
- ⁹Ba kwo anyi woi ge, "ho kuncelo I hala takarda kmi-kmiyi. Ha lo hatimi ya ha gu kwo ya. Gama abei la ho zun sha, oho ami n la aza si gaho n na abye vinya, ngye nyaga ntu n Shekwoyi bo.
- ¹⁰Hoi la ba yezhi n ebemi, hoi ku ba ze a pristi ieyi Shekwoyi anya, ba bei gyi ebe tu n na anyi tukwo."
- ¹¹Dna n mi bewyegye, mawo amalaka n mwa-begye n na wye! Wyeyi dayi n na Tukwodayi, bai kwo anyi.
- ¹²"Kugya n na abei zunsha. Wo kuncelo wa gwo iko, n kalai, n latuyi, n mwa-mwai n anabarka yi.
- ¹³"Nna vun mawo aza vinya n eshe nanyi yi, n na a zafiyi n ekni mi, n na anuwan yakwoyi bai gna, Anabarka, n mwa-mwai, n latu yi, n ikoi, zhin oza nya nu n wo sase tu n esu-shinkpegye nyi, n kugyai nyalonyaloi."
- ¹⁴Awye-wyeyi da bai ci ge, Amin. A tukwodayi shiba cei anyi bai yazhi nwo abye bai ga wo mwamwa.

Yohanna Bewyegye 6

Bewyegye Adokwo Nya

¹Shi mi bei shi awye, ma gye kugyai lo hatimiyi kmisunyi ya. Wa ya takarda kmikmiyi leya, zaknayi n na awye-wyeyi da n gun anyi yi mi. Wa sa ewyi n begye yi wo ngye ogma wyisa, wa ci ge, “Be.”

²Ma shi awye magye dokwo buyi gni n mi abye, okwo gunyi n taishi, n rawani yi wan n owo tukwo, wa gun wa gmiyalo, wo sun a kun, woi gyi nasara n akun yi mwa begye.

³Nna vun wa lo hatimi bayi takarda kmi-kmiyi nya ya, wa lokwoya. Mawo wye-wyeyi da bayi woi cige, “Be.”

⁴Nsa deye dokwo byei nu bei gmi be. Aga kwo gunyi ebe yakwo n mwakpa, n ikoi wa bugbafu n na anyi la ya wa be n bugba zhiyi, okun n azawuyi ba cepwo n na aba vinya.

⁵Esa nwo bei la hatimi tayi baya mawo wye-wyeyi da tayi woi ci ge “Be.” Ma gye Dokwo zhiyi, okwo gunyi n na anya mwiyai shi n owo akun.

⁶Begye kwa gmi n na awyewyeyi dayi mi kwa ci ge, “Bredi sule gmanyi nu, mudu ngun ata barley nya sule gmanyi nu, amma olive emi n anab-nuwan yi to lon.”

⁷She abei lo hatimi nyiyi ya, mawo wye-wyeyi da nyiyi woi gna, “Be.”

⁸Nsa deye ma gye dokwo sawyi-sawyi yi, okwo gunyi eye efinu, n dokwo doi viwo n na avun ai yi ge Anapi a gaba ikwo tu n na anyi sopa ngun anyi wa wu n okunyi, n mikun yi, n nyasan yi n na anya fwanyai.

⁹Shiwo bei lo hatimi tnuyi ya, ma gye bagadi, n kwo sinta magye awye-wyeyi azanya n na bei wu ba ntu Shekwoyi Beda wa’azi zhin bo, ntu n oba gbenu bo dna n seida zhin.

¹⁰Bai yi Dagayi n begye kalayi bai gna, “O Dagayi ikoda vinya, gyi-gyi-yi, gaiciya da, ho bei da anyi da owa n kni wiyi nu, tu abo tukwo n ba bei zhin yi nyi’a? Ho gba efi ami ta ga yi n kniwyi yi’a, n na aza n ba fi n anyi nyi’a?”

¹¹Aga zahozahoi n bami aje abui-bui, a gna ba ge, ba sun esa fyewyi, sai aku oba azaje wu n anyi, nba zhin Yesu afyenu nyi, ba ku be da ba.

¹²Ma shi awye shi wo lo hatimi tnanyi yi ya, ekni kwa shan-shan n mwa, nyipyeyi kwa dna wyegma zhiyi, ngye eje zhiyi, epya kwa wu n byei-byei ngye ami.

¹³Nsai akpasu n eshe bawu ngye ba kaya n gye shi ese yakwo zhin kwa, ka gbayi tna biyi ya nyi.

¹⁴Eshe bmana kwa duya ngye a kmi pece, Epe doho-doho n na museyi vinya ba shan-shan ba cetala.

¹⁵Asu vinya n na anyi, n na a tukwoda yi, n na anyabwayi, n na aza yakwoi n soja, n na azayi vinya, a yakwo n na abiyi, a fyenu n na dagayi, ba so bahin fi n na a kuta bmi n na ape bmi yi,

¹⁶Bai ci bwi kpe ape ge ba wu ba, bai gyiwe bai ci ge, “Kaya kpe yi, fya soyi n oza awyeba nwo tu n esu-shinkpegye nyi, n kugya minagyi yi.

¹⁷Ntuge nyipyeyi yakwo oba minagyi nya n la be, nyikadonu ba pwo kwo’a?”

Yohanna Bewyegye 7

Shekwoyi Bara Gaiciya Nya

¹Ma gye a Malaika ngun anyi n gni agni zhin n anyi abwakwonu n gun anyi, bai hana n esei ge kwo to cin n na anyi, n na bai kwo fintolo ta shan-shan, a nuwanyi to bei ci abon, ba ku wo pi-pi-pi.

²Ma gye malaika do woi gmi n nyipyeyi kpe bwa, n Hatimi Yakwo Shekwoyi wye-wyeyi danya yi shi. Wa sawyi dna a malaika yi ngun anyi n na bei gaba iko ba ga anyi n na anuwan yakwoi nyasan nyi.

³“Lakmi, to zhin nyaho kpan, to ga ekni, kwo anuwan yakwo, kwo a shinwan nyasa, sai yila Shekwoyi Hatimi tu n wo abara nyikunmi.”

⁴⁻⁸Aza ngun a kniyi nu bei bwa hatimi ye’a? Mawo oba begye, 144,000 n Israila abye awo cei aba vinya. Yahuda 12,000 dubu awocei aba, Reuben 12,000 dubu awocei aba, Gad 12,000 dubu awocei aba, Asher 12,000 dubu awocei aba, Naftali 12,000 dubu awocei aba, Manase 12,000 dubu awocei aba, Simeon 12,000 dubu awocei aba, Lawi 12,000 dubu awocei aba, Issakari 12,000 dubu awocei aba, Zebulun 12,000 dubu awocei aba, Yusufu 12,000 awocei aba, Banyami 12,000 dubu awocei aba.

⁹Ndeye avun ma gye aza begye, n na ata mi aba ban n na abye vinya, n akniyi, n na nyitalai n gni agni zhin n esu-shinkpegye abye n kugyai, n na aje buyi kpe, n na a zunyi bwala yi shi n ba akun.

¹⁰Bai sa ewyi n kalai, “Gni-gni gmi n eyi Shekwoyi abanu n wo tu n esu shinkpegye nyi n kugyai.”

¹¹Nsai amalaika vinya ba yezhi bai shegun esu-shinkpegye n na a tukwodayi n awye-wyeyi dayi bai yazhi bai ga Shekwoyi mwa-mwa.

¹²Bai ci ge, “Amin, anabarka, mwa-mwa, beyekpe, godiya, latu, Ikoyi, n kalayi zhin eyi Shekwoyi nyanu Nyalo-nyalo. Amin.”

¹³Nnavun zaknayi n na a Tukwodayi shiba cei anyi ho, wa nyami ge, “Ho kpe azayelo nbanyi nba n na aje bui kpenyi, n na abai nba kun?”

¹⁴Maci ge, Awo, Shekwo Mwas, mi gyiho wye, ha gnami. “Aza nyi n ba kun n wahala Dnagmayi, bala oba aje zhanya n bui-bui fi n kugya ami.

¹⁵Cenu zhin bai zhi n Shekwoyi Esu-shinkpegye abye, bai zhinwo tnu-tnu n sukwoyi n nyipye dna n wo aduwa-nyakun. Oza nwo sasetu n Esu-shinkpeye nyi woba tuba ofun.

¹⁶Mikun ta shan ba gun, kwo nuwan mikun, nyipyeyi ta shan ba won.

¹⁷Gama kugya n wo gni n esushinkpegye abye nyi, wo ba gaba nyagyi, wa knaba wa lo nbai n Nuwan wye-wyeyi nya aba. Shekwoyi ba wunba awyenyi ya vinya.”

Yohanna Bewyegye 8

¹Esa n kugya bei lo hatimi tnbai ya, aku ce pi fi n eshe mi ngye minti shita.

²Ma gye amalaika tnaba nba zhi Shekwoyi abye nyi, a ga ba a mwayi ngun tnaba.

³Nnavun malaika nwo n Zinariya shapai shinyi wa be wa gni n bagadi I aba a gawo a tulare ge wa gmi kwo aje n Shekwoyi aza aduwa yi, wa ze kpe n bagadi zinariya nya n esushinkpegye abye.

⁴Tulare yiho ashin kwo bedo n Shekwoyi aza wyegyiyi nyi, kwa gunlo Shekwoyi aba daga bagadi aba n malaika bei zekwoya kpe.

⁵Nna vun malaika wa ce ena n bagadi wa fi kwo n shanpa wa zekwoya kpe n anyi ogma bmiya, anyi ba shan-shan.

⁶Nnavun, amalaika ngun tnaba n ba n na a mwayi tnbai shinyi ba zhin shiri ba bye a mwayi.

⁷Malaika kmisunyi wa bye owo mwayi aze agma-kuta ya n enayi, n gmi aje n amiyi fi n anyi. Anyi ajegna ngun ata. Kwa gwo ena shinwan ajegna ngun ata ena gyi ba n na agbe-gbe putuyi vinya.

⁸⁻⁹ Malaika bayi wa bye wo mwayi, a she nyaho ya dna n ela ngye epe yakwo nagyi, kwa wun aya nuwan ajegna ngun ata ya, ela ajegna ngun ata kwa wu ngye ami, awyesala ajegna ngun ata bafi.

¹⁰Malaika tayi wa bye mwayi Kpasu yakwo nagyi yi kwa kaya n eshe tu anuwan n adnanyi ajegna ngun ata.

¹¹Ayi kpasuyi ge, “Bedobedoyi,” ntuge kwo bei fi emwi a nuwan ajegna ngun ata, aza n mwa begye bafi.

¹²Malaika nyiyi wa bye owo mwai, n sai-sai yi, nyipyeyi ajegna ngun ata kwa dnawye-gma n epya yi n na akpasu ajegnayi ngun ata, n na abai nyipyeyi a dna wyegma sukwo kwa gna wyegma dna-dna.

¹³Shi mi bei shi awye magye zunkwo, nkwo gmanyi n na anyi bmana, kwoi sa ewyi n begye kalai ge, “owyi-owyi, owyi n na aza aba nba fi n na anyi nyin, ntu a na abo a nukwoyi bo n ba belo esa fyewyi nyi, esa n na amalaika ngun ata-ka ba amwayi bye n ba cenyi.”

Yohanna Bewyegye 9

Obwo Tnaceyi

¹N navun malaika tnuyi wa bye owo mwayi, ma gye oza woi kaya n eshe dna n na anyi a gawo makuli obwo dnagmayi tna cei nya.

²Shiwo bei gu kwoya, awu ba kun ya ngye apinagyi yakwo ho, nyipyeyi n eseyi ba dna wyegma ntu n awui bo.

³Abó ba kun be n awu yi a ga ba iko ba kni aza ngye anapisi.

⁴A gna ba ge bato kni agbe-gben, kwo shinwan doho-dohoyin, amma ba kni aza nba to n Shekwoyi hatimi yi tulo n ba nyikunmin.

⁵Ato bei ye ge ba wu ban, amma ba wuba anyi apya ngun atnu shi napsin san n wu nyi.

⁶Dna anyipyeyihi mi, aza bei zhin atna ba wu bahin, ama bato bei min efi to bei ben. Ba bei ye ba fi, amma efi bo la busi.

⁷Abó hi bo wu ngye a dokwo n na zhin-zhinyi n gye ba lo kun, N na anya hoi kpe n ba tukwo n gye rawani zinariya nya, oba awyeba wu ngye aza nyikwoci nya.

⁸Oba oyi n mwakpa ngye anyi-kwoza nya, oba anyikna n wu ngye a gaba nya.

⁹Ba n na akpata yi shi ngye asunkna, oba abmina yi ci abó ngye a karusa kunsun nya lo okun.

¹⁰Ba n na a zhin-zhin yi gyi ngye anapisi n ba sesiyi, oba kala ba ce oza apya ngun atnu fi n ba sesi yi nu.

¹¹Oba esu nu zhin Esu obwo tnacei nya n na yiwo Ibranaciyi nge, Abaddon, n Helenanciyi Apollyo n, (n Nasara gbei Nyawunya yi.)

¹²Azhin gmanyi nku zo nu, acelo n gun aba.

Azafun Nukwoyi Ngun Anyi

¹³Malaika tnanyi yi wa bye owo mwayi, ma wo begye kwoi dafo n na amwayi ngun anyi n ba gyi n bagadi zinariya nya n kwo gmi n Shekwoyi esu-shinkpegye abye nyin.

¹⁴Woi gna malaika tnanyi yi, “Lo aljanu yakwoya n gun anyi n na bai pa kpe n ola yakwo Affaratis nyi.”

¹⁵Abei zhin shiri zhi ntu n eye ye fo nu, n epya yi n nyipyeyi n esayi. Nsai ye, a lobaya ba wu azanyi kwoci ajegna ngun ata nu anyi.

¹⁶Ba ye a soja zhi miliyan tagyi n gun aba, (200,000,000) mi bei ku wo shi babei nyi n sun.

¹⁷⁻¹⁸Magye oba adokwo bai gnami, dna n mi begye, oba gunyi n na akpata byei shi adoho wu ngye anyi – a doho wu ngye bmina-bmina, ena n adokwo tukwo nwu ngye agaba nya, awu n ena yi, n sulfa nagyi bai kun n ba egbe, ba wu aza ajegna gun ata vinya.

¹⁹Oba iko efi nya to bei nyi n ba egbe nu gmanyin, ama n ba sesiye, gama oba asesi yi bei wu ngye awa tukwo nu kpewu, kwoi sa aza har efi.

²⁰Amma aza nba bei ce zhin n wye-wyeyi n nato wuba n nba anyasan dna-gmai yin, to ba ye ba ga Shekwoyi mwa-mwan. To ba na alijanu bauta zhin bon, kwo oba ashan n ba zhin n zinariya yi n azurfa yin, n sinkna byei, n na akutayi, n na ashinwan yin, n ba ta mi n zan-zan kwo ba dabon.

²¹To ba shan oba bugba do tu nba azokwo azawu nya, n aguzhenyi yi, anagbai n aviwyi yin.

Yohanna Bewyegye 10

Shekwoyi Shiri Nku Nu

¹Nnavun ma gye malaika yakwo woi kashi n eshe, enyi yi Shegunwo, n Shanyi-pmanayi shegun n wo tukwo, owo awyeba bai bmana n gye nyipyeyi, owo apita bai gwo ena.

²Wo bei n takarda biyi shi n kmi-kmiyi, wa tu owo pita bwaizhe nya n ola, wa tu owo pita bwai-pmi nya n anyi,

³Wa sa wyi n kalayi ngye gaba bwi-ogma sawyi har abwa ngun tnaba.

⁴Esa n mi bei ye maka enya n ogma wyisayia da, mawo begye n eshe kwoi yi mi n ge, “To ka kwon”, Ata wu oba abeda ebmin.

⁵Malaika dnagmayi n wo gni agni-gni tu n nuwan n ekni yi nyi, wa la wo bwaizhe bwa wu n she.

⁶Wa si nyasi, n ozai n wo n wyewyeyi nyalo-nyalo n wo bei zhin eshe n nyai n kwo dna n kwo nyin, n anyi yi n anya yi n ba fi n kwo vinya, n ola yi anyayi n ba fi kwo vinya, “Nge ato shan esa wun-yan.

⁷Ama shi malaika tnbayi bei bye mwayi, n sayinu n Shekwoyi shiri-n kwo bei so shi tunyi n sapai kafin owo a bara anabi bei da kwo, kwo ba nu.”

⁸Njesun begye kwa gmi n eshe kwa dabo n mi yi kwa cige, “Lo ho gwo takarda kmi-kmi yi n malaika dnagmayi akun, nwo gni a gni tu n nuwan n ekni yi nyi.”

⁹Malo owo aba wa gami takarda yi. Wa gna mi ge, “E, gwo kwo ha gyi kwo.” “Nkmisun yi kwo ba wo ngye osunu, amma esa n hami kwo, kwo ba pmiho nubo.”

¹⁰Ma gwo kwo n wo akun, shiwo bei gnami, kwo bei da n mi egbe, ama kwa pmi mi nubo esa n mi bei mikwo n cei.

¹¹Nnavun wa gnami, “Tile ha ye zhin anabci be n na aza tukwo n mwa begye, n na akniyi, n abyeyi, n na asuyi.”

Yohanna Bewyegye 11

Aku Shekwoyi Anabi Wu

¹A gami busi nyamwi nya, a gnami ge milo mi mwi aduwa nyakun, wato Shekwoyi nyakun. “N nyakun omi nya yi n bagadi dnanyi, ma ba a sujada zhinyi.

²Ama a gnami ge ato mwi akpeda ebmi nyan. Gama ala kwo ga abye do. Ba bei dna ezhi gyi-gyi-yi har apya shinyi-cei-aba.

³Mi bei ga emi aseida-da ngun aba ba zhin anabci, anyipyeyi, dubu gmanyi n tagyi yi ngun aba n cei kpe shi tnanyi. (1,260) n na aje sakunyi kpe.”

⁴Anabi ngun aba ye nu zhin a zaitun ashinwan ngun aba, nna kandle busiyi ngun aba nba gni agni zhi n Shekwoyi anyi vinya nya abye nyi.

⁵Oza n wa zhin atna wa wuba, ena ba kun n ba egbe kwa wu wo.

⁶Ba n ikoyilo ba gu eshe to ogma zhin har aye ngun ata n tokunyi (3.5) shi ba bei zhin anabci. A pmi, ara n na anuwan yakwoyi ba ze ami, ba tnu n na anyasan a dnagmayi cici shi ba n cei pma.

⁷Esa n ba bei ku zo n ba seida yi aye ngun ata n tokunyi, oza nukwoyi n wo gmibe n obwotnanceyi nyi, wo bei ya okun n bayi, woi gyi nasara n ba tukwo woi wuba.

⁸⁻⁹Oba anayi bei yakpe n Urushelima azokwo yakwo har anyipyeyi ngun ata n tokunyi (deidei nu n na yikwo ge Sodon kwo Masar) aba n na abei zun ba Dagayi

dunyi. Ato bei ye ge zaho-zahoi wo bi ban, aza n mwa begye n na akni do, n ba bei be bai gye ba nayi.

¹⁰Abei sun n na anyi vinya, abei da aza n na ba vinya bai zhin aje cauta, bai yi aje ba yezhi bai dagma n tu n na anabi n gun abaye efi bo, gama baku wahala gaba n mwa.

¹¹Ama n anyipyeyi ngun ata n tokunyi avun, Zafun wye-wyeyi nya n kwo gmi n Shekwoyi aba nyi, kwo bei lo ba mi, ba kuka zhin n na agni aza bai wo edna n mwa.

¹²N avun begye yakwo bei sawyi n eshe, nge, “Gunzhi be,” bai kukala gun eshe oba nuwunyi gye.

¹³N esa gmanyi-i, anyi bei shan-shan bai wu ezhi yi ajegna ngun awo, kwoi wu aza dubu tnaba (7,000), n na vun aza nba ce zhi n wye-wyeyi ba bei wodna n mwa, ba ga Shekwoyi mwa-mwa, n wo dna n Eshe nyi.

¹⁴Owui, bayi nla duya, ama tayi to shan zegin.

¹⁵Gama n sayi nu n malaika tnbayi bei bye mwayi abegye yakwo bai da bo n eshe, nge, “Ebe anyi nya nsai ye zhin, eyi Dagayi nyanu n wo Kristi yi wa gyi ebe nyalo-nyalo.”

¹⁶A tukwoda shiba cei anyi nba sase kpe n ashinkpegye-esu nya n Shekwoyi abye nyi, ba yazhi ba ga wo mwa-mwa bai gna.

¹⁷Yi zhin godiya, Dagayi Shekwoyi ikoda nwo nyi, n wo bei nyi, nsaye ho la ya bebegyi, n ho iko yakwo yi.

¹⁸Akni vinya ba gyi minagyi n hoi, ama oho esa nyi n ho ba gyi minagyi nbai, esa la si n ho ba da azafi owa, ha ga oho abara lada anabi n na azajei nba wo ho Eye dna, – dnagmayi n nawyi yi vinya, wa wu aza n ba be n bwi-bwi yi n na anyi.

¹⁹N navum dna n eshe, a gu Shekwoyi aduwa nyakun ya, n na ba gyewo akwati alkawali nya. Ogma bmiya, kwoi sawyi agmakuta yakwoi be, anyi ba shan-shan n asha-sha dnagmayi.

Yohanna Bewyegye 12

Nyikwoza Nwo 'Bi Yi

¹A gye obo wo-woyi n eshe n kwo wu afo n ba ba zhin, Magye nyikwoza n nyipyeyi kpe, n epyai zhi n wo apita sinta, n na a kpasu rawani yi kun ngun awo cei aba. N wo tukwo.

²Woi gni n nuboi woi fi aku, nyasan kagna nyai sanwo, woi pmi owo kagna.

³Esa fyewyeyi Dragon byei-byei kwa gmibe n na tukwo yi gyi ngun tnaba, n na amwayi gyi ngun awo, n na a rawani yi kun n kwo atukwo agun tnaba.

⁴Owo sesi kwa gni akpasu ajegna ngun ata wa yaba fi n anyi, wa gni agni n nyikwozayi abye, woi laga obi ma, n shiri yi zhin wa gyi obi yi n sahoi-sahoi n na mawo n cei.

⁵Wa ma obi nugbayi n wo ba gyi ebe tu n na aza tukwo vinya, n ebwa kalayi a cewo pa, ga Shekwoyi n wo esu-shinkpegye yi.

⁶Nyikwoza yi wa busi lo bmana, aba n Shekwoyi n cei zhiwo, wa shiwo bwa har anyi-pyeyi dubu gmanyi n tagyi gun aba n cei kpe shi tnanyi (1,260).

⁷Asun okun n eshemi, Mika'ilu n na a malaikayi nba fi n owo sinta ba sun kun n Dragon yi n wo amalaika anukwoyi.

⁸A gyi Dragon n okun yi, a nyawo ya n eshemi.

⁹Dragon yakwoye, owa kwo-kwoi n na yiwo Guzhenyi n satan yi nyi, n wo dna anyi vinya kwoce nyi, a shewo ya dna n anyi bedo n wo amalaika yi.

¹⁰Navun, mawo begye kwoi sawyi dna n eshe, kwo-ku kma zhin, "Shekwoyi gni-gni, n ikoi, n ebei, n fukunci Kristi nyayi la be n ya, gama owo n wo zhin ba sara n Shekwoyi abye n sukwoyi n nyipyeyi, alawo sheya dna n anyi.

¹¹Ba gyi nasara n wo tukwo n kugya ami yi nu, n ba seidayi gama bato ye ba wye-wyeyi m, ba gakwo ntu wo bo.

¹²Fye dagma o, eshemi, ofye n fye zhin eshe abinyi. Ama aiya n fye aba aza nfyefi n anyi nyi, gama shetan n la be dafye n minagyi yakwoi, Ntuge wo kpelo owo esa to ye kun lon."

¹³Esa n shetan bei gye alawo sheya dna n anyi, wa nya nyikwozayi n wa ma obi nyi.

¹⁴Ama a gawo a bwase n gun aba ngye zunkwo, wa gye afu lo bmana, aba n na cei zhin gni wo, aba n na bei shiwo bwa, ai guwo n owayi, Dragon, aye ngun ata n tokunyi.

¹⁵Nuwan yakwo kwa kun n owa yi egbe, kwa zhe yalo nge kwo wan nyikwozayi, n na abai kwa wu wo.

¹⁶Ama ekni kwa bma wo zhin kwa lo egbeyi kwa sin nuwan yakwoyi.

¹⁷Nnavun Dragon kwa gyiminagyi kwa nya owo abi-aje vinya n ba vi Shekwoyi owa bai gna ba zhin Yesu anyi nu. Wa gni woi pmi n ola gbe.

Yohanna Bewyegye 13

Nyawan-nyawan Abo Wowo

¹Ma gye nyawan-nyawan ho kwoi gmi be n nuwan-yakwo, n Ina aye awyebwo nyayi kakpe n amwayi ngun awo n a rawani n gun awoyi kun n kwo amwayi

ngun awo, N na bara kugya nya aye yi kakpe n kwo atukwo doho-dohoi n ɓa mi kwoi sa Shekwoyi ye n cegyei n na akmiyi.

²Nyawan-nyawanye wu ngye nakmi, ama n apitai wu ngye bear nya, n gaba, egbe yi gyi, Dragon kwa gawo wo iko, n esushinkpegye yi, n begyi dnagmayi.

³Ma gye owo tukwo gmanyi n ciyitu, nkwo ta shan bin, ama, eciyi ho kwa ɓi. Ce'a wo anyi vinya ntu n wo a tnu-tnu awo-woi ɓo n wo zhin nyi aza ɓa vi Nyawan-nyawan yi n dnai.

⁴Ba ga Dragon mwa-mwa, ntuge wa gawo ikoyi pya, ɓai ga nyawan-nyawanyi mwa-mwa, ɓai gna, "Oza lo n kni bwa yi nu ngye owo'a? Nkado ɓa mi wa sunkun n owo yi'a?"

⁵Nna vun Dragon ho wa ga nyawan-nyawan kala n ge wo sa Dagayi eye n wyebwoyi, wa gawo iko wa gyi ebe tu n anyi tukwo apya shinyi cei aba.

⁶N sai vinya wa tu Shekwoyi eye cegye n wo aduwa nyakunyi n azayi vinya nɓafi n eshe.

⁷Dragon wa gawo iko wa sunkun n Shekwoyi azayi, wa gyi nasara nɓa tukwo, wa gyi ebe tu n na anyi tukwo vinya, n na abyei vinya, n na anyi.

⁸A zanyikwoci vinya, na ato n ɓa aye yi kafi n kugya wu-wuyi Littafi wye-wyeyi nya kafin anyi zhi san, ɓa ga Nyawan-nyawan nukwoyi mwa-mwa.

⁹Ozaho-zahoyi n wo n na atnubua yi, wo la tnubua kna peceye.

¹⁰Shekwoyi aza n na ɓai zhi n kurkuku ɓo, abei wanɓa, ai lo n ɓai, aza n na n ɓai zhi n efi ɓo abei wuɓa, Amma fyeto wo ednan, gama efye sa nyi hankuri nya n bugba kalayi.

¹¹Nnavun magye nyafanya ho, kwoyi gmi n ekni, n na amwayi ɓiyi ngun aba, ngye kugya, n begye yakwoi ngye Dragon.

¹²Wa lo tnu-tnu n nyawan-nyawan ikoyi n eci n lawo ɓinyi, n wo ye anyi vinya ɓa ga wo mwa-mwa nyi.

¹³Wo ɓei zhin abo wo-woyi, woi zhin ena kwoi kaya ɓe nshe zaho-zahoi woi gye.

¹⁴Wa zhin abo awo-woyi ye wo ɓei mi wa dna aza kwoce n na aba vinya, wo ɓei mi woi zhin abo a wowoi ye esa vinya n Nyawan-nyawan kmisunyi gni woi gye wo. Waga aza wyidna n na anyi nge ɓa zhin Nyawan-nyawan kmisunyi dogbe, n na ɓei la wo wu waje lakala nyi.

¹⁵A gawo izini nge wo ga zazhi-zhinye esun wa zhinkwo kwa da ɓeda. Nnavun nya zhin-zhinye kwa ga wyidna ge oza n wo to ga kwo mwamwan wafi.

¹⁶Wa ga gbe, dnagmayi n nawyi yi, nyabwayi n sanyi, fyenu n dagayi vinya ge aku eze tu zaho-zahoi n bwaizhe, kwo n nyikunmi.

¹⁷Zahozahoyi ta bwa tnu-tnu, kwo wa si nyaho-nyahoyi n gni kwoho n tna tuze yin, n kwo nu zhin Nyawan-nyawan yi eye, kwo owo eye tuze.

¹⁸Obo bednayi nyi sai oza zhin nubo nu kpa oza kpekwoye. Aza n baɓa mi ɓa zhinkwo awyega okwo nu zhin tnanyi-tnanyi a ku ngun ata (666) wato tagyi tnanyi n cei kpe shi tnanyi cei tnanyi.

Yohanna Bewyegye 14

Anyi Woiwoyi

¹Nnavun magye kugya gni agni tu, n Sihiyona epe n gnisun n na azayi dubu tagyi n cei kpe shinyi cei anyi (144,000) nba bei nwo eye n wo Dada eye yi kakpe n ɓa anyikunmi nyi.

²Ma wo kasun kwoi ci she, ngye anuwan yakwo kwo ngye ogma wyisa. Kwaya nu bei ko anyi ɓedo n na muloyi.

³Kwaya dnagmayi ye-aza dubu tagyi n cei kpe shinyi cei anyi, (144,000) ɓa kwo anyi woi-woyi, n Shekwoyi shinkpeggye aba n na anya wye-wyeyi dai ngun anyi, n na tukwo dai shiba cei anyi, zaho to bei kpe anyi yen, sai aza dubu tagyi ncei kpe shinyi cei anyi yi ho (144,000). N na gni ɓa n na anyi nyi.

⁴Gama ɓato tucegye lo dna n Zafun n gyigyi yi ngye abianyi-kwoyi n nato shin gyewan n bai n, bai vi kugya aba vinya n walo. Ala ɓa si n na aza mi n na anyi nge hadaya kni-kniyi Shekwoyi nya n Kugyai.

⁵Ata ce akata fi ɓan, ɓato n laifi yi lon.

⁶Magye malaika doho woi gye afu n na anyi bmana, n Nabari manayi shi, wa zhin aza wa'azi ba akni doho-doho, n na abyei, n na anyitalayi.

⁷Woi sawyi woi gna, "Wo Shekwoyi dna, ha lawo mwa: mwa tu, gama esa lasi nwo ɓa sase tu ngye Alkali, ga wo mwa-mwa nwa zhin eshe n na anyi-i nyi, anuwan yakwo n na anyayi vinya nba fi n ɓa nyi."

⁸Malaika doho wa viwo n na avun, n na anyi bmana woi gna, "Babila n la miya, kwola miya, ezhinyakwoyi gama kwo dna akni anyi nya kwoce, kwa dnaɓa asisi ɓo zhin n laifi yi n mwa."

⁹Malaika tayi wa viba woi sawyi nge, "Ozaho-zahoyi n wo ga Nyawan-nyawan mwa-mwa nkwo gmi n nuwanyi, n wo nya zhin-zhin yi, wa gwo owo zetu, nwo nyikunmi kwo obwa.

¹⁰Tile wa sin nuwan nukwoyi Shekwoyi minagyi nya, azekwo fi n tna buyi Shekwoyi kop minagyi nya, a bei gyi ɓa ena n sulfa yi, n wo amalaika gyi-gyi-yi abye n kugya yi.

¹¹Awu oba azhinya ba gun lo eshe nyalo-nyalo, bato bei shan sun n sukwoyi n nyipyeyi-gama ba ga Nyawan-nyawan mwa-mwa n wo nya zhin-zhin yi, bai la owo eye tuze gwo.”

¹²Fa deye kwa ga Shekwoyi aza kala, ba zhin hakuri dna n wahala doho-dohoyi n nazhinyi, gama aza n ba mi zhi n kalayi dna n wo awyi-dnai vi, bai kpema Yesu, ba zhin aza gyi-gyi-yi nu.

¹³Mawo begye n eshe bmana, n mi eshe kwoi cige, “Ka abeye kpe, esa n la si nsai n awo aza a fifiyi ba lo oba sun-sun, E, Zafun nu na da, bazhin anabarkada nu, gama nsaiye baba sun n ba azhin, ntnu-tnuyi, gama oba atnu-tnu manayi viba lo har eshemi.”

¹⁴Abo ba shando, magye a nyin bui-buyi n Zahoi sase tu n ba n wu ngye Yesu, n na bei yiwo ge, “Oza Nugun.” N Rawa ni Zinariya, nya yi kun n wo tukwo, n Limizhegye gyi-gyi-yi shi n wo akun.

Okni Nyabye Ku Bi

¹⁵Nnavun Malaika gmiɓe n Aduwa nyakun wa yi wo, “Ya apma zhin n Limzhegye yi, gama esa n laho si ha ya do, gama ampanyi anyi nya n la bi.”

¹⁶Nsai oza nwo sase tu n na anyi nyi wa dna limzhegye anyi, wa ye ampanyi zhi.

¹⁷Ndeye avun malaika ho woi gmi n aduwanyakun n eshe n Limzhegye gyi-gyi-yi shi ce.

¹⁸Dna n sayi malaika, n wo n ikoi wa zo anyi n enai nyi, wa sawyi dna malaika nwo n Limizhegye shi nyi “Zhin akma n ho Limzhegye yi nsaiye, ha do anab shinwa anyi nya gama ba ku bi ntu n owa dabo.”

¹⁹Malaika ya limzhegye dna wa do anab wa yezhi n anab abazhinba, n Shekwoyi minagyi aba.

²⁰A dna anab n kwo aba zhinba nzhi yakwo avun, ami ba zeya ngye edna mile tagyi ngun aba (200) n lo-loyi n kwo ba si dokwo lonzami.

Yohanna Bewyegye 15

Musa Anyi Bedo N Kugya Bi Yi

¹Ma gye n eshe obo wowoyi, ai wu obo n kwo belo. A tnu n na a Malaika yi ngun tnaba, ba be anyi n anyasan a nukwoyi n kma-sun ngun tnaba. N na vun Shekwoyi minagyi kwa zo.

²Ma gye nyaho tazhi nmi abye n wu ngye ena n maganyi yi, n na azayi gni agni kpe, nba bo gyi nasara n Nyawan-nyawan nukwoyi n owo nya zhin-zhin yi, n wo tuzei n lambai, oba vinya n Shekwoyi amuloyi shi.

³⁻⁴ Bai kwo Musa anyi, Shekwoyi fyenu n kugya anyi yi, “Oho afo zhin-zhin Shekwoyi ikoda, oho azokwo vinya zhin befyece nu n gaiciya yi, O, Esu esa vinya nya, nyikado nu tawo edna n ma, O Dagayi, wa la oho eye tun ma? Gama oho nu zhin gyi-giyi n ho gmanyi yi. Akni vinya babe ba ga ho mwa-mwa, gama aku oho afo zhin manayi wu.”

⁵ N na avun mashi awye ma gye aba gyi-gyi-yi vinya, n na aduwanyakun n eshe mi, n guya gni.

⁶ A malaika ngun tnaba n na bei kniba ba ze anyasan anukwoi ya fi n na anyi ngun tnaba nyi, ba kunbe n aduwa-nyakun yi, n na aje abuyi kpe lonen n (fan-fan yi) n tna cegye, n na a belt zinariya nyai pa n na agu.

⁷ Zaknayi n na a wye-wyeyi da n gun anyi yi ho, wa ga zaho-zahoi nba mi papa Zinariya nya n nu-nuyi n Shekwoyi wye-wyeyi da minagyi yakwoyi, n wo nyi nyalo-nyalo nyi.

⁸ Aduwanyakun n nung-ni n na wuyi n wo-ikoyi n mwa-mwayi, to zahozahoi wa mi wa lo bon, sai a malaika ngun tnaba yi, nku a nyasan nukwoyi ngun tnaba sheya fi n anyi.

Yohanna Bewyegye 16

Amalaika Ngun Tnaba

¹ Mawo begye yakwo kwoi gmi n aduwa-nyakun kwoi dabo n na amalaika tnabai, “Fyelo n saiye fye ze a papa tnaba Shekwoyi minagyi nya ya fi n na anyi.”

² Nlonu malaika kmisunyi wafa aduwa-nyakun wa ze papa kmisunyi yafi n anyi, a gbago, a cisa nukwoyi a sansanyi, ba kunkpe n na aza vinya, nba n Nyawan-nyawan lambayi lo bai ga wo mwa-mwa nwo nya zhin zhinyi.

³ Malaika bayi wa zewo papa yafi n anuwan yako, baku ze ngye oza fifiyi ami, anya vinya nba fi n na nuwan yakwo baku fi.

⁴ Malaika tayiwa ze owo papa yafi n na ala, n na adna biyi vinya, baku ze ami.

⁵ Mawo malaika a nuwanya woi gna, “Kwo wulo cewo shi ho tnu n wadaye pya yi, O, Oza Gyi-gyi-yi, nwo nyi wo bei nyi.

⁶ Gama aku ho aza gyi-gyi-yi n anabi yi wu ai ze oba ami ya fi n anyi, nsaiye, n kasun ho ka aza ami zeya nba bei wu Banyi, oba lada nu n kwo kunce n bai”.

⁷ Mawo malaika nwo gni n bagadi aba nyi woi gna, “E Dagayi, Shekwoyi ikoda oho tata wulo cewo dei-dei.”

⁸ Nnavun malaika nyiyi wa ze owo papa ya kpe n nyipyeyi, kwa gyi aza ena n kwo ena yi.

⁹Zaho-zahoi vinya okwo ena aku gyiwo, ɓa tu Shekwoyi eye ekni n wa tnu n na anyasan dnagmayi nyi, to ɓa shan oɓa bugba don n ɓa aɓe zhin yin, ɓa gawo mwa-mwan.

¹⁰Nna vun malaika tnuyi wa ze owo papa ya kpe n Nyawan-nyawan nkwo gmi n nuwany, a yakwo ebemi dna n wyegma, owo aviyyi vinya ɓai gyi oɓa anyitala ntu n sansan ɓo.

¹¹Ba tu Shekwoyi eshe nya ekni ntu nɓa aci ɓo n nyasanyi, ama to ɓa ye abwi n ɓa aɓe nukwoyi zhin ɓon.

¹²Malaika tnanyi wa ze owo papa yakpe n ela dnagmanyi. Affratis kwo wo n na ɓai asu n ɓa nyin n gabas ɓa bwa zokwo ɓa duya n ɓa asojayi ɓa lo nyipyeyi shin bwa ntna wahala.

¹³Ma gye azafun nukwoyi ngun ata n wu ngye adug-ba ɓai kun n Dragon egbe, n Nyawan-nyawan egbeyi, n owo Anabi Katayi egbei.

¹⁴A zafun, aɓo wowoyi zhinyi ye, ɓa si egbe do n asu anyi nyayi vinya, ɓa yeɓa zhi ɓa sunkun n Dagayi n nyipyeyi yakwoyi owadawyi, Shekwoyi ikoda nya.

¹⁵“Fye wo, mi ɓei ɓe ntna esa; dnayi ngy evi, anabarkada nu aza vinya n ɓa kmimilo n ɓa nu ajei zhin shiri lo, ɓato n na a pmayi lo ɓai zan-zan n na bwotolo yin n vinyikwoyin.”

¹⁶Ba ye a soja anyi nya zhi vinya n aba n na yi Ibrananciyyi nge, Arma-giddon, Magiddo Epe.

¹⁷Nnavun malaika tɓabayi waze wo papa ya fi n ese, wyisa yakwo kwa gmi n aduwa-nyakun n eshe mi kwoi gna, “Aku zo zhin.”

¹⁸Ogma sawyi kwa ci aɓo, kwa bmiyana, eknia shan-shan n nato shin kwo pya zhin dna n zanyi-kwoci asesemi n na anyin.

¹⁹Ezhi yakwo Babila kwa gna aje ngun ata, azhi yakwo nɓa shegun ɓa miya laba n na anyi, nlo nu Shekwoyi wa pa Babila alaifi ɓo vinya n wo bugba mi, a tawo to a ce minagyi wan har owo minagyi kwa zo.

²⁰A muse vinya ɓa busiya laba, Ape vinya ɓa ɓaya.

²¹A gma kuta a yakwo ɓakun n eshe, agma kuta n woshan, har laba tagyi ɓa kaya kpe aza n anyi, ɓa tu Shekwoyi ekni ntu n na agmakuta a nukwoyi ye ɓo.

Yohanna Bewyegye 17

Nyikwoza Byei-byei

- ¹Zaknayi n na amalaika n ba bei ze anyasan anukwoyi ya nyi, wa be wa dabo n mi yi, wa gna, “Be ngnisun n miyi, ma wuho obo n kwo ye kwa bwa Karuwa Tawobo ye, n wo sase tu n na anuwan yakwo anyi nya nyi.
- ²Asu anyi nya nku abo a nukwoyi zhin n woi. Aza n bafi n anyi nyi n ku wo nuwan nukwoyi sin, a benukwoyi nya.”
- ³Malaika wa lami dna n Zafun, yalo bmana. Nbo magye nyikwoza n sasetu n Nyawan-nyawan, n wu n byei-byei ciwu, n na atukwoyi ngun tnaba, n na amwayi gyi ngun awo, n nya yi kakpe nba, n ba tu Shekwoyi eye cegye.
- ⁴Nyikwozai n jekpei kpe bmina-bmina ndohoi kpe ciwu, n nyigunyi zhin n Zinariya yi, n lu-lu manayi, n na akutabmiya-bmiya yi, n ebwe yi shi zinariya nya, n nunuyi n wye bwo yi, asisi nya, a cegye owo anagbai nya.
- ⁵A na a sigyi eye yi kakpe n wo nyikunmi, “Babila Dnagmayi, a karuwa 'ya n na Ashan yi n na gba vinya n na anyi mi.”
- ⁶Magye eje kwoi zhin nyikwozayi, eje aza gyi-gyi-yi ami nya, azafi Yesu anya n wa wu. Ma shiwo awye, ednayi womi.
- ⁷Malaika wa nyami ge, “Kninu zhin cei wo hoa? Mi ba wuho owo, ma wuho nyawan-nyawan n wo gun nyi, nya n wo zhin kwo dogbe.
- ⁸Wo bei n wye-wyeyi ama nsaiye woto lon. Ama esafyewyi woba gmibe n bwokun tna cei, walo bwi-bwi nyalo-nyalo nya. N azai nba fi n anyi n ba aye to kafi lo n Littafi wye-wyeyi nya nyin, kafin a zhin anyi, ce bei woba nba bei gyewo n wo efi avun.
- ⁹“Nsaiye, zhin nubo n mwa, owo amwayi ngun tnaba zhin ezhi yakwoho nu, n mitu n ape ngun tnaba, aba n nyikwozaye sase nyi.
- ¹⁰Ba zhin dogbe asu ngun tnanu, ngun atnu nla miya, tnanyi yi gyi ebelo nsa ye, tnbayi to be kpan, ama woto bei gyi ebe n mwasan.
- ¹¹Nyawan-nyawan ciwuyi ye n wa finyi, owo nu zhin esu nyimwanymwayi, woku ebe shin gyi ngnisun n na asu tnbai, wobei gyi ebe n jesun n wo begyi bwabayi ye, avun woi lo a bwi.
- ¹²Owo amwayi ngun awo zhin asu ngun awo nu, n ba to gyi ebe kpan, abei kni ba, bai gyi ebe esa fyewyi, ngnisun n woi.
- ¹³Oba vinya bei tu obwa n takarda boi gawo oba kala vinya n ikoi.
- ¹⁴Ngnisun, ba bei sun okun n Kugyai. Kugya bei gyi nasara nba tukwo, gama owo nu zhin a dagayi Dagayi. Esu aje Esu, owo aza nu zhin ayi-yi-i a kni-kniyi, a gbenuyi.”
- ¹⁵Anuwan yakwo, ala, n na adnai n nyikwozai sase tu nyi, banu zhin aza vinya n na abyei vinya n na akniyi.

¹⁶Nyawan-nyawan byei-byei n wo amwayi ngun awo, zhin dogbe n na asu yi ngun awo n ba bei gyi ebe ngnisun n woyi – ba wun nyikwozai nu, ai cewo okun ai fawo n bwotoloyi ena kwoi gyi wo.

¹⁷Gama Shekwoyi bei dnaba shiri nba nubo zhimi, shiri n kwo banu wo beye. Ba bei gun egbe ba ga nyawan-nyawan byei oba ebegy, n na abai Shekwoyi beda kwa nu.

¹⁸Nyikwoza yi n ha gye n ho ruya nyi, owonu zhin ezhi dnagmayi n kwo gyi ebe tu n asu anyi nya tukwo nyi.

Yohanna Bewyegye 18

Ezhi Yakwo La Miya

¹N deye avun vinya, ma gye malaika woi be n She n begyi yakwoi, anyi ba bmiyana nwo mwamwayi.

²Wa sawyi n kalai, “Babila Dnagmayi nla miya, kwola miya, wola ze alijanu fiba, a guzhenyi a fazan zan ba, n zafun nukwoi dohodohoi.

³Gama abye vinya n ku nuwan nukwoyi efinya owo abo nukwoi nya sin. Asu anyi nya n ku bahin dagma n woi, anyakunyi n ku ze anyanbwai ntu n wo nayida kala bo.”

⁴Mawo begye kwoi gmi n eshe kwoi gna, “Fye la kun n wo aba emi aza, fyeto ye bedo n wo alaifiyin, kada a tafe bedo n woi.

⁵Gama owo alaifi n la tugbaga n lawu n eshe, Shekwoyi nku shiri zhin wa tawo ntu wo abe nukwoyi bo.

⁶Zhin wo shi wa zhin ho, ndubo, gbawo abe zhin-zhin nukwoyi ta zun ba. Wa ga aza ebwe bugba wunya, gawo lonu zunba.

⁷Wola sase dna n nanyi do n agmadai, mwi kwo do n kasu n ibugbawunyi n anyi. Nsayi woi gma nge, ‘Mi zhin Sarauniya nu tu n mi esu-shinkpegye, mito zhin anyigbai banzanya nun, mi ta kpe bugba wun yen.’

⁸Ntuce nu bugba wun efi nya n bwiciyi, n mikunyi bei befye aba n nyipyeyi gmanyi nu, ena yi gyiwo n sagmanyi yi, gama Dagayi zhin iko da nu n wo dawo owa nyi.

⁹“Anyi tukwoda nba dnabwa n wo abo nukwoyi a wyebwon nya zhinyi, bai dagma n wo alheri nyi, ba bei ciwo ebwi shi ba bei gye awu bai gmi n wo agusa.

¹⁰Ba bei zhi n kpayi, bai vin n ednai, bai cibwi ge, ‘Owyi, Babila ezhi dnagmai n esa gmanyi nu n kwo kni zun abe.’

11“Anya siyi anyi nya bei cibwi, bai wun bugba ntu nwo ɓo, gama zaho to cegni lo wa si oba akayan.

12Owonu bei zhinɓa anya siyi dnagmayi n zinariya, azurfa, akuta manayi, lu’u-lu’u yi, linen manayi, siliki, n eje byei-byei yi, n na shinwan sundayi, n na akaya yi n na zhin n dagba nyi-kna yi, n na shinwan nakwoyi, akaya yi n sinkna byei-byei yi, n sunkna zhiyi-zhiyi, n kuta manayi yi.

13N yaji yi, ntulare yi, n emi yi, n luban yi, n anab nuwan yi, zaitun emi yi, n wyluku luku-luku yi, n alkama yi, anakwo, na adoko, karusai n na afyenuyi, har bedo n na a zanyikwoci wyeweyei.

14“Anya amanayi vinya n ɓa ɓo daho ɓa du, anyida n mwa-mwai n ɓa daho nyi ɓa ta jeha aba ben, ɓa du nyalo-nyalo.

15“Ntucenu anyakunyi, nɓa ze a nyabwai ntu n na anya deye kun ɓo nyi, ɓa bei zhi n kpai, bai wo wahala dna n bahin tukwo, bai cibwi bai fi aku.

16‘Aiya, ezhi dnagmai, n bmiya ngye nyikwoza, n zhi-zhinyi n linen putu-putu yi, n eje bye-byei ciwu, n zhin-zhin yi n zinariya yi, n na a kuta manayi, n lu’u-lu-uyi.

17N esa gmanyi yi ezhi yi nyabwa vinya n la wunya.’ Ayada vinya n aya tukwodai, n aya dnayi ɓa bei zhi n tagni.

18Bai cibwi shi ɓa gye awu ɓa gmiya gun eshe, nge, ‘Nknibwayi nu n ezhi dnagmayi lo ngye deye pya?’

19Ba kpe abwitukun n ɓa tukwo, dna nɓa bugba wun, ɓa gna, ‘Ewyi, Ewyi, n ezhi dnagmayi aba, kwa zhinyi yi ze anyabwayi ntu n kwo nyabwa ɓo. N’saiye n esa gmanyi yi ɓa ku bwi vinya.

20“ ‘Amma oho, O eshe, dagma n owo bwi-bwi, efye Shekwoyi abi, n na anabiya n na amanzaniyi, gama Shekwoyi ku owa dawo gafye n sayi.’ ”

21Navun malaika yakwo, wala, kuta n wu n gye ata wyigwonya, wa shekwoya dna n nuwan yakwo, wa sawyi, “Babila ezhi dnagmai aba she kwoya, shi ma she kuta ye ya nyi. Kwa bwi n awyeba nyalo-nyalo.

22Ata shan anyi begye wo n kwon, kwo amolo kwo amwayin, ata shan abwa ze doho-dohoi ze n ezhi yin, ata shan ewyi gwon.

23Wyegma, wyegma okwo asukwo vinyal kwo fitila ato bei gye n kwo atagan n I jesun ato bei je amula a shan won, n na amula ɓa n na amula anyikwoyi begye dadayin. A kpe owo anyansiya ye vinya n anyi, n wa dna anyi kwoce n wo abeyi-sunyi

24Anabi n aza gyi-gyi-yi vinya n na abei wu ɓanyi, oba ami tulo n wo tukwo.”

Yohanna Bewyegye 19

Aza Yezhi Agmada Nshe Mi

- ¹Ndeye avun mawo deji kwoi bewyi n eshe, “Haliluya, la Dagayi tu, Gnigni gmi n Shekwoyi aba nu. Mwa-mwa n begyi zhin owo nya nu gmanyi.
- ²Gama owo wada zhin befyece nu n gaiciya yi. Wola karuwa yakwoi ta n wo bei tu anyi cegye n wo alaifi nyi, woi gba ta ga wo afyenu n na bei wu nyi.”
- ³Oba begye aiwo njesun cici, bei kwo anyi ge, “La Dagayi tu! Awu owo nagyi nya ba gunlo eshe nyalo-nyalo.”
- ⁴Atukwoda shiba cei anyi, n awyewyeyi dayi ngun anyi ba yazhi n kni bai ga Shekwoyi mwa-mwa, n wo sasetu n Esu-shinkpegye bai gna, Amin, Haliluya la Dagayi tu.
- ⁵Begye a gmi n Esu-shinkpegye kwa gna, “La eyi Shekwoyi tu, ofye owo abara vinya, dnagmayi n nawyi yi, n fye wowo edna nyi.”
- ⁶Mawo aboci n jesun ngye aza begye beda, kwo n gye anuwan yakwo n baluya n na adnagbe, kwo ngye ogma wyisa yakwo, “La Dagayi tu. Gama Dagayi eyi Shekwoyi iko da vinya gyi ebe lo.”
- ⁷Yi dagma ya nya agmada, ya gawo mwa-mwa, gama esa n lasi n na ba zhin buki kugya nya, owo mula nyikwo n la wohin zhin shiri.
- ⁸Ala ye wo wa kpe linen n kwo du n gyi-gyi n bui-buyi n bmiya-bmiya yi. (Linen manayi zhin aƙe mana nu n Shekwoyi aza zhin).
- ⁹Malaika wa ba beda ye gami, “An, abarka da nu aza n na la ba yi ba ƙe kugya a buki aba.” Wa kma beda ƙe nge, “Shekwoyi nu na dace.”
- ¹⁰Ma yashi nwo apita ma ga wo mwa-mwa, ama wa gna, lafa to zhin. “Gama mi zhin Shekwoyi fyenu nu n gye ho ce, n ho azajei a Yesu viyi, n ba zhin seida n ba gaiciya gayi n Yesu nyi.” Delili anabci ye nya vinya, n na ƙoi n ma wu ho nyi, ba zhin seida nu tu n Yesu tukwo.

Asu Aje Su

- ¹¹Nnavun ma gye eshe n guya gni n dokwo buyi gni agni gni n ƙo, ayi oza n wo bei sase tu n dokwo yi nyi ge, “Gbenuyi n Gaiciya yi” Oza nwo ta aza nyi, woi sun okun.
- ¹²Owo awye wu ngye ena go-goyi n na rawani yi kpe nwo tukwo n mwa, n wo yei katu n nyikunmi n zaho ta kpe kwo yelon sai owo.
- ¹³Wo n na ajei kpe n dafi n ami, ayiwo ge, “Shekwoyi Beda.”

¹⁴Akun sunyi n eshe vinya n na linen manayi kpe bmiya-bmiya yi vinya, bai viwo n kpe n adokwo buyi.

¹⁵Wo n ebe yakwo gyi-gyi-yi shi nwo egbe wa zun abye kni n cei, wa gyi ebe tu nba tukwo n sinkna bwayi, wa dna anab nuwan-piba Shekwoyi ikoda minagyi nya.

¹⁶Nwo eye yi kakpe n wo jekpe n buzhi-kwo nge, “Esu aje Esu, Dagayi a dagayi aje nya.”

¹⁷Magye malaika gni agni gni n nyipyeyi za-za, woi sawyi ga alu vinya nge, “Fye be, fya yezhi ntu Shekwoyi Dnagmayi buki bo!

¹⁸Fye be fya gyi asu abu, n na akun atukwoda abuyi n na bezhe yakwo yi, n na adokwo yi, n ba gunyi-i, n na azanyi-kwoci yi, adnagmayi n na biyi-i alo-loi ya n na apapayi.”

¹⁹Nnavun magye, Nyawye-wyei Nukwoi, woi ye a gwomnati anyi nya zhi nba asojayi, ba sunkun n zai nwo tu n dokwo buyi nyi n wo akunsun yi.

²⁰A wan Nyawye-wyei n Anabi Katayi, n wo zhin abo wowoi esa n Nyawye wyei nukwoyi gni n cei nyi, abo a wo-woi nba dna aza kwoce n ba bei gwo Nyawye-wyei Nukwoyi zetu, n ba ga owo nya zhin-zhin mwa-mwa nyi, Oba ba Nyawye-wyeyi nukwoyi n wo anabi Katayi a sheba yafi n wye-wyeyi yi n ena zundna n kwo gyina n suffa yi nyi.

²¹A wu ba akun sunyi vinya, n ebe yakwoyi n kwo dna n oza egbe n wo tu n dokwo buyi nyi. Alu anyi bmanaya vinya ba gyi ba abu nubo’a ku ba fu har eshakpi.

Yohanna Bewyegye 20

A La Shetan Pa

¹Nnavun magye malaika woi kashi n eshe n mabudi obwo tnacei nyai shi n na agma yakwoyi shi n wo akun.

²Wa wan Dragon, owa kwo-kwoi, oza nukwoyi, Shetan, wa pawo n na agma yi har eye tagyi ngun awo, (1,000).

³Wa shewo ya dna n obwo tnacei wa gu wa makuli dna, n na bai n wota dna abye kwocen sai aye tagyi ngun awo n la duya. Nnavun ai lowoya esafyewyi.

⁴Nnavun magye esushinkpegye n na azai sase kpe n bai n na la izini ga ba ba dawa, ma gye a wye-wyeyi aza nya n na bei kmiba tukwo ya ntu nba seida Yesu nya bo, ntu n Shekwoyi beda wa’azi zhin bo, n na azai n bato ga Nyawye-wyeyi mwa-mwa n owo nya zhin-zhin yin, to ba gwo owo zetu nba nyikunmi ko

abwan. Bai ku wye-wyeyi jebwa bai gyi ebe ngnisun n Kristi yi har aye tagyi ngun awo (1,000).

⁵Kalaku n efi kmisunyi nu nyi, (azafi nba ce nyi ba to kukala kpan sai aye tagyi ngun awo n la duya).

⁶Anabarkada nu n agyi-gyi yi aza nba bwa lo-lo dna n kalaku kmisunyi. Gama Efi Bayi to n ikoyi lo n ba tukwon gama baba zhin a prist Shekwoyi anya n Kristi yi bai gyi ebe n woi har aye tagyi ngun awo.

⁷Shi aye tagyi ngun awo bei la duya ai lo shetan ya n wo kurkuku.

⁸Wo; gmilo wo dna abye kwoce n na anyi wa yeba zhi gnisun, Gog n Magog yi, ba sun okun, aza begye, to ai shin ban, ngye amwi n ba kpe n ela gbe.

⁹Ba bei gunlo ba duyalo bmana yakwo anyi nya bai she Shekwoyi aza gun, n ezhi ye-yei Urushelima nya, ama ena bei gmi n Shekwoyi aba kwoi gyi akunsunyi vinya kwoi wuba.

¹⁰Nnavun, Shetan nwa dna ba kwoce nyi ai shewo yadna n ena zundna n kwo gyi n sulfa yi nyi, aba n Nyawan-nyawan n Anabi katayi fi nyi, ai wu ba anyi n nyipyeyi n sukwoyi nyalo-nyalo.

¹¹Magye esu-shinkpegye bui-bui, n zayi nwo sase tu n kwo, Anyi n eshe bmana yi ba busi n wo awyeba, ama to ba bwa abwi ban.

¹²Ma gye azafi, adnagmayi n abiyi n gni a gni zhi n Shekwoyi abye, a gu a Littafi ya, n littafi wye-wyeyi nyai be. A da azafi owa n nya yi nkwo kafi n na a Littafi yi mi, zaho-zahoi shiwa zhin n wu.

¹³Anuwan-yakwo ba ga oba aza n ba bo wan, ekni n kwo azai n kwo gyi, A da zaho-zahoi owa shi wa zhin n wu.

¹⁴Ashe efi n Hades yi ya dna n Anapi deye kwonu zhin Efi Bayi–Anapi Ena zundna.

¹⁵Oza n na to gye owo eye kadna n litafi wye-wyeyi nyan a shewo ya dna n anapi–Ena zun–dna.

Yohanna Bewyegye 21

Anyi Woiwoyi Nshe Woiwoyi-i

¹N navun magye, anyi woi woyi (n tna ala) n eshe woi-woyi, gama anyi nsaiye nya n duya.

²Omi Yohanna, magye, Ezhi Gyi-gyi-yi, Urushelima woi-woyi kwoi gmi n Shekwoyi aba n eshe kwoi shin zhi be, nya bmiya-bmiya yi, ngye mula anyikwo n wo mula pa aba.

³Ma wo begye yakwo, kwoi gmi n esu-shinkpegye kwoi gna, “Shi awye Shekwoyi puwa lo n kunsun n na azai nsayi, wa sase n kunsun nbaí ba zhin owo aza, E, Shekwoyi nwohin tukwo wa sase dna nba atasin.

⁴Wa wunba awyenyi ya n na awyeba vinya, efi ta shan sun, kwo bugba wun, kwo ebwi cin, kwo nayi, san. Abeye vinya nla duya nyalonyalo.”

⁵Oza nwo sase tu n esushinkpegye nyi wa gna, “Gyewye, mi zhin anya woi-woyi nu,” wa gnami nsai ge, “Ka abeye kpe, gama obo n mi gnaho nyi kwo zhin obo hin-hin nu n gaiciya yi.”

⁶Aku zo zhin, Emini zhin A n Z yi, Kmisunyi n Kmazoyi, mi ba ga oza n nuwan mikun wowo a nuwan kpeba, nuwan wye-wyeyi nya, cauta.

⁷Ozaho-zahoi n wa gyi nasara, wo ba bwa anyi gye vinya gado, ma ze wo Shekwoyi wa ze mi obi.

⁸Ama abibi n ba fa mi vibo bai jeze n na avun yi, n na azayi nba ta nu egben, n na cegye dayi, azawuyi, n na abenukwoyi-zhinyi, n na aza yi n ba dabo n alijanu yi, n na shangbayi, n na a kataceyi vinya, oba abwiba nyi n anapi ena zundna n kwo gyi ena n sulfa yi. Efi bayi nu.

⁹Malaika gmanyi n na amalaika tnaba mi nba n bo ze a papa anyasan dnagmayi nya nyi, wa be wa gna mi ge, “Gni be n miyi ma wuho mula-nyikwo, kugya nyikwo.”

Ezhi Latu Nya

¹⁰Wa la mi dna n ruya wa lomi yi n epe nshe, ma gye ezhi manayi-i, Urushelima gyi-gyi-yi kwoi gmi n na anyi bmana n Shekwoyi aba.

¹¹Kwo bei nunuyi n Shekwoyi mwa-mwa yi, kwoi bmiyana ngye lu’u-lu’u na bmiyayi n wu pyanyi n gye jasper.

¹²Okwo a galu n mwakpa n mwapata n na abwokumiyi fi n gun awocei aba, a malaika ngun awocei-aba bai gu abwokunmi yi, n na a Israilai bye ngun awocei-aba aye yi kakpe n abwokunmi awocei-aba yi.

¹³Abwokunmi fi n sepa dohodohoyi, n arewa abwokunmi ngun ata, n kudu abwokunmi ngun ata n yamma, abowkunmi ngun ata, n gabas abwokunmi ngun ata.

¹⁴A galu yi n na agoro yi awocei-aba n na bara kugya nya aye yi kakpe n kwo agoro awo-cei-aba yi.

¹⁵Malaikayi n Zinariya busi nyamwinyai shi n wo akun, wa mwi ezhi yi n kwa abwokunmiyi n kwa agaluyi.

¹⁶Shi wo bei mwi kwo wa gye kwo n na abwakwonu yi ngun anyi n mwi awye. Ekpa n pata yi sun dei-dei mile dubu gmanyi ncei kpe tagyi ngun atnun. (1,500)

17N navun wa mwi galu shin-shin wa gye kwo apita tagyi ngun aba ncei-kpe awocei tnanyi (216). N zunduya Malaika yi wa wumi mwi-mwi yi aye n nyamwi ye hin-hinyi.

18-20 Ezhi n kwihin tukwo, nwu serai n gyi-gyi-yi zinariya nabmiya yi ngye maganyi. A zhin kwo agalu n jaspas yi nu, amikwo kpe n agoro awo-ceiaba n na akuta a nakwoyi – lu’u-lu’u yi goro kmisunyi n jaspas yi bayi n Sapphire yi tayi n chalcedonyi yi nyiyi n emaraod yi tunyi n Sardonyi yi tnanyi yi n Sardus yi tnaba yi n Crysolite yi nyimwa-nyimwa yi n beryl yi ciwa-gmanyi yi n topaz yi nwo yi n Chrysoprase yi awocei-gmanyi yi n jecinth yi awo-cei-aba yi n amethyst yi.

21A zhin abwokunmi awo ce i aba yi n lu’u-lu’u yi nu, lu’u-lu’u dohodohoi n kwo bwai. Okwo azokwo n gyi-gyi-yi zinariya na bmiya yi, n gye maganyi.

22Aduwa-nyakun to bei nyi n ezhi yin gama Dagayi Shekwoyi ikoda n Kugya yi a ga ba nu mwa-mwa n na aba vinya.

23Ezhiyi to n nyipyeyi beyi pman kwo epyan, ba gakwo buzagnan, gama Shekwoyi n kugya mwa-mwai nu gakwo buzangna.

24Okwo buzangna bei ga abye buzangna n anyi, abegyiyi n anyi vinya bei be nba mwa-mwayi n kwo.

25Ata gu okwo abagu-nyan, baguya zhi nylo-nyalo, sukwo to lon bom.

26Abei be n abye-mwa-mwai n ba latuyi n kwo mi.

27Ato bei ye n nyaho-nyahoi n kwo zhin nukwoyi nbon, benukwoyi-zhinyi kwo tnagaiciya da to bei lo bon sai aza nba aye kafi n Kugya Litafi wye-wyeyi nya.

Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira
2021, Vitória/ES - Brasil